





1393



XXVI D 5-12

27. D.

1.

JOANNIS LAURENTII BERTI

FLORENTINI

FRATRIS EREMITAE AUGUSTINIANI

LIBRORUM

DE THEOLOGICIS

DISCIPLINIS

TOMUS I.

Continens Prolegomena, ac disputationes
de Existentia, & Proprietatibus


UNIUS DEI.



ROMAE APUD PANTHEON ANNO D. MDCCXXXIX.

EXCUDERAT ANTONIUS DE RUBEIS

SUPERIORUM PERMISSU.



DE
THEOLOGICIS
DISCIPLINIS.

lum. Is quippe ego sum, quem olim, cum Generalibus Comitibus Perusiae celebratis adesse, ibidem commorantem, pro tua erga me, ignotum licet ac minimum singularissima humanitate, vehementer hortatus ut sacrae doctrinae sedulam darem operam, affirmasti propositam tibi spem esse proditura aliquando me auctore in literarium Orbem nonnulla Augustiniana Theologiae Commentaria. Hæc vero, quæ ex parte divinum te fecit, mira comitas & urbanitas adeo animum meum devinxit, ut quamvis compertum habeam quantum exornatæ a me Dissertationes careant eruditionis ornatu, verborumque elegantia; quamvis illæ, quemadmodum procreatæ sunt mente humili admodum & angusta, ita cum summa qua fulges dignitate, & cum sapientiæ ingenique tui nitidissimo lumine non sint ratione aliqua comparandæ: eas tamen ausus sum tuo committere Patrocinio, cujus spe præformatæ fuerunt, & properant ad complementum. Adauget summopere fiduciam istam per antiqua tibi ingenita indoles, qua inter nos constitutus, & ad præcipua

*cipua Cænobiorum Provinciarumque regi-
 mina, ad Generalis Assistentis munus præ-
 stantissimum, ad supremi quoque Antisti-
 tis honorem promotus innumeris propemo-
 dum benefactis cumulaſti univerſam Augu-
 ſtinianam Familiam, cui ab incunte adole-
 ſcentia nomen dederas, nobili proſapia, ge-
 neris claritudine, rerum opulentia, fortu-
 niſque omnibus abdicatis. Neque priſtinæ
 in te conſuetudinis inducere potuerunt obli-
 vionem aut Inviſtiſſimi Hiſpaniarum Mo-
 narchæ PHILIPPI V. regalis munificen-
 tia, aut redituum ad ſacram Militiam
 ſpectantium commiſſa Præſectura, aut in-
 tima cum Optimatibus familiaritas, aut
 collatum Regii Caſtellæ Conſilii ampliſſi-
 mum Præſidis munus, aut Eccleſiaſticarum
 Inſularum ſplendor, aut denique Vaticanæ
 Purpuræ inſignia. In tanta potius merito-
 rum tuorum celebritate, in tanto Nominis
 tui & Dignitatis incremento non ſolum
 magis enituit mens illa excelfa ulli difficul-
 tati cedere neſcia, ardor amplificandæ Re-
 ligionis, ſtudium in Apoſtolicam Sedem
 præcipuum, mirabilis in componendis diſſi-
 diis*

EMINENTISSIMO AC REVERENDISSIMO^v
P R I N C I P I
D. F. G A S P A R I
D E M O L I N A

ORDINIS FF. EREMITARUM S. P. AUGUSTINI
S. R. E. C A R D I N A L I

*Sanctæ CRUCIATÆ Generali Commissario,
Episcopo Malacensi, Sacri Castellæ Consilii
Supremo PRAESIDI, &c.*

F. JOANNES-LAURENTIUS BERTI EJUSDEM ORDINIS
PERPETUAM FELICITATEM.



*Ingulari divini Numinis
providentia factum ar-
bitror, PRINCEPS EMINENTISSIMÉ, ut dum
ego suadente universi Ordinis nostri Ma-
gistro*

diis prudentia , & inaudita in rebus prosperis moderatio ; verum etiam antiqua præditus comitate amicos veteri retines observantia , Religiosos homines complecteris eadem amoris conspiratione , & a construendis amplificandisque Cænobiis , ab erigendis sacrandisque DIVO THOMAE Valentino Archiepiscopo Aedibus Fontisplani , ab augendis honore Viris vitæ doctrinæque spectabilis , a fovendis studiosorum animis nulla te cura divellit . Jure itaque hanc in omnes profusam beneficentiâ mihi propitiâ fore confido ; præsertim quod Patrocinium tuum simul quærit Augustiniana Theologia , quæ Tibi , CARDINALIS EMINENTISSIME , in Eremitano Ordine , in Regum Magnatumque confessu , & in Ecclesiastica Hierarchia impense patrocinata est ; Tibique ambit in his Voluminibus subjici , quæ Te ad animi præstantiam , & ad gloriæ fastigium evexit . Ipsa enim Theologia Te in celeberrimis Hispaniarum Aca-
demiis insigni laurea condecoratum ceteris instituendis regendisque præfecit : ipsa Te plurimum in ejus exercitatione doctrinisque

versatum perduxit ad maxima, quæ consequutus es præmia: ipsa summa, qua polles gerendarum rerum intelligentiæ, scientiisque omnibus, quibus præfulges contulit ordinem, decorem & pulchritudinem. Quum autem illam insectentur nefariæ hæreticorum phalanges, novorumque dogmatum inventores subvertere & labefactare conentur, nonnulli etiam viri alioqui Catholici refellant quamplura Scholarum nostrarum placita; in cujus fidem & clientelam conferre se debet Theologicum Opus, in quo pro modulo ingenii mei simul traduntur veritates Orthodoxæ, Patrum documenta, & Augustinensium doctrinarum vindiciæ, nisi Patronum nanciscatur Virum in Ecclesia dignitate conspicuum, eximium Theologum, & Augustiniani Ordinis Germen inclytum, talem nempe, qui auctoritate, sapientia, atque jure necessitudinis illud communiat ac tueatur? At pauci mortalium sunt, in quibus præcellant omnes hi characteres, præter Te unum, PRINCEPS, & CARDINALIS AMPLISSIME. Patere igitur, qualemcumque vigiliarum
labo-

laborumque meorum fructum Tibi devovere, measque Theologicas lucubrationes tuo validissimo Patrocinio munitas publicamque judiciorum aleam subire: quas si consucta humanitate digneris excipere, ego quidem immortale beneficium, & diutissime expectitum me consecutum fuisse gloriabor; Tibique multum debebunt cum Hispaniarum Provinciae, in quarum commodum Aegidiana doctrina tuo jussu ac favore fuit novis Commentationibus illustrata, tum Italicae, & quotquot viderint Augustinianam Theologiam magno a Te praesidio suffultam. Nostri denique Adolescentes, quorum praecipue causâ appuli animum ad scribendum, statim ac hujus Voluminis initio nuncupatum Tibi Opus deprehenderint, percipient ex celeberrimo clarissimoque Nomine tuo, quantum scientiarum cultus bene institutis atque integerrimis afferat emolumentum, dum Tibi tantam existimationem & auctoritatem comparavit, quantam post Norisium, Virum illum maximum, & de Historia, universaque Theologia optime meritum, nemo fuerat apud nos assequutus.

Verum quum perpauci præditi sint tali facultate atque ingenio, multi insuper res humanas experiantur adversas; condiscant ex Te omnes quomodo debeant perfungi laboribus, singulis benefacere, & eandem semper æquabilitatem tenere: ac postremo ex hac Epistola, demisso licet stilo, & absque fuco phalerisque conscripta, cognoscent quæ ratione custodienda sit beneficiorum memoria, quo animi candore Majoribus congratulandum; & si latentes in me sensus ex hac publica significatione perspexerint, quam vehementi desiderio diuturna Tibi incolumitas, & majora gloriæ incrementa sint votis omnibus apprecanda.



A U C T O R I S AD AUGUSTINENSES

Theologicis Disciplinis formandos

Π Α Ρ Α Ϊ Ν Ε Σ Ι Σ.



Irari vos credo, Juvenes ornatissimi, unde sit, quod præ ceteris Studiorum, nostrorum Moderatoribus, qui & ingenii acumine, & delectu orationis, & humanarum divinarumque rerum cognitione præpollent, ego potissimum Theologicas Disciplinas nova quadam methodo exornatas ante conspectum vestrum, exhibeam, hac præsertim ætate ob literarum cultum splendoremque vere aurea, in tanta optimorum librorum copia, ex amplissima autem MAGNI AUGUSTINI familia, in qua & omnium minimum me esse cognosco, & innumeros plane video huic implendo muneri idoneos, necnon doctrinæ laude nominisque celebritate clarissimos. Quamquam vero mihi videor hujusmodi cogitationibus vestris plenissime satisfactorius, si dixerò me ad scribendum supremi Antistitis, NICOLAI ANTONII SCHIAPPINATI olim Neapolitanæ S. Joannis Congregationis, nunc universi Ordinis vigilantissimi Præsulis auctoritate fuisse compulsus; quod nullus æquus æstimator reprehendet in homine vinculis juramentorum obstricto: credo tamen ideo vigilantissimum Præsulem in me animum convertisse, quod viri exercitatissimi opus aut minus elaboratum, aut brevi absolutum nunquam prodire paterentur in lucem, vel prima fortassis divinarum scientiarum rudimenta publici juris facere minime dignarentur, sublimioribus studiis addicti, moliendisque duntaxat summæ eruditionis voluminibus. Cum itaque temporum angustia cogerent, atque ageretur tantum de Tironibus erudiendis, neque es-

sent

sent opuscula ista Eruditorum manu terenda; scribendi onus impositum mihi est, obscuro scilicet homini, cujus fama, periclitari non posset, eo forte consilio, ut his additis incitamenti viri illi doctissimi ac celeberrimi perpolitum aliud Theologicum Opus aggrederentur, quod nullatenus morosi Critici fastidirent, atque cum uberiori proventu repeterent Candidati. Neque ab instituto detertere nos potuit magna illa multitudo Scriptorum, qui de rebus Theologicis accurate, ornatèque disseruerunt: quippe non omnia, quæ conscribuntur in manus incidunt singulorum; & perutile est de eisdem quæstionibus plures a pluribus libros perfici, quibus, si fieri potest, etiam ad negligentiores veritas aliquando perveniat, quemadmodum initio magni Operis de Trinitate, & in libro de unico adversus Petilianum Baptismate scite beatissimus Augustinus admonuit. Urget præterea, torporemque nostrum vehementer excitat numerus ille Scriptorum, ex quo & sententiæ complures spargi cœperunt adversus instituta Majorum, & plura exorta fuerunt quæstionum genera, quæ veteres prætermiserunt Scholastici, nunc autem dedecus est ignorari. Quæ cum ita sint, non abs re factum puto, si Theologicas Disciplinas ex Antiquorum placitis, studiisque Recentiorum complexus fuero, in quibus nova simul ac vetera proferantur; omniaque ad certa principia, duce præsertim & facem præferente Augustino, quantum poterit imbecillitas ingenii mei, revocavero. Aequo igitur animo labore hoc nostro, Juvenes, unusquisque vestrum fruatur: navate operam Theologiæ; id vero quanta animi voluptate, & qua ratione facere debeatis, quantum denique, si feceritis, gloriæ decorisque possit vobis ipsis accedere, non rhetoricorum pompa verborum, sedhortatoria dicturus sum oratione.

Non illam vobis propono, Augustinianæ Doctrinæ Cultores, percipiendam voluptatem, quæ in omni sensu implicata penitus insidet, & majores partes animi a virtute, detorquet, sive quam malorum escam Plato appellabat, Tullius vero decoris labem, atque illecebram turpitudinis; sed quæ interiorem hominem, mentem scilicet rationalem honestif-

nestissima suavitate perfundit, & maximum habet cum virtute commercium; explet autem insatiabilem in cognoscendis rebus ardorem, animumque incommutabili bono conglutinat. Istud quidem manifesta veritatis contemplatione, atque indissolubili perpetuoque nexu in cælesti Jerusalem possidendum, multimodis nos allicit ac demulcet: at nulla est in hac mortalium peregrinatione, si una excipiatur Theologia, tam excellens facultas, cujus ope humana ratio luce divina illustretur, & consortium quodammodo habeat supernæ felicitatis. Memineritis, opinor, quanta inviti etiam ac reluctantes legeritis sub ferula Grammaticorum poetarum figmenta; nec prorsus ignoratis quam anceps sit, contentiosa, & per anfractus discurrens scientia illa, cui novissimam dedistis operam, nimirum Physiologia. Proh quanta animi ægritudine in literarium ludum urgebamini adolescentuli, memoriæ mandantes plenum armatis equum, incendium Ilîi, errores Aenæ, amorem Didonis, Creusæ umbras, atque fabellas hujusmodi plurimas; de quibus legentes incoerentem sletum, ac verba Augustini, (*Conf. 1. cap. 17.*) Ita ne aliud non erat, ubi exerceretur ingenium meum? optime percipietis quale vos traxerit aspersum felle atque amarissimum blandimentum. Posteaquam vero accessistis ad Philosophicas Institutiones, ut mittam barbarissimos latinis, & torquentes ingenia complexiones thecnasque Dialecticorum, quæ neque nos, veluti testa odorem quo recens imbuta est, provecta jam ætate abjecimus; quid vobis, quæso, aut certitudinis, aut jucunditatis attulerunt Categoriæ Aristotelis, Platoniorum archetypi, Epicuri atomi, Cartesii elementa, atque alia complura, scitu quidem aliquo modo necessaria, sed innumerabilibus controversiarum ambagibus implicata? Nunc autem his omnibus ad naturæ opera investiganda improbo labore comparatis, en vobis profero incommutabilem veritatem, Deum Unum, Deum Trinum, Deum Condito rem univerforum, Deum Largitorem gratiarum omnium, Deum humani generis Reparatorem, Deum, inquam, Deum, in quo bonitatis ac sapientiæ thesauri inveniuntur absconditi. Profecto si ratio-
 ne,

ne, atque experimento comprobatas scientias ceteris præferendas esse jure meritoque arbitramur, quemadmodum Mathematicas firmis innixas definitionibus, exploratisque theorematibus, anteponimus Physicis, ac Logicis Institutionibus, quarum illæ circa sensuum ministeria versantur, hæ autem circa humanæ mentis idola; longe supra ceteras se extollunt Theologicæ meditationes, quibus non traduntur Græcorum Philosophorum inventa, non corporum generationes, non pugnæ elementorum, non sensibilibium facultatum officia, non quantitatis proprietates ac dimensiones; sed mysteria gentibus abscondita, impervia sensibus, immutabilia, spiritalia, divina; eaque Prophetarum vaticiniis, revelatione Spiritus sancti, statutis Ecclesiæ, testimoniis Patrum, & certitudine miraculorum apertissime confirmata. Quamobrem nullam ex universis naturalibus humanisque scientiis, quantam ex una Theologia, potest rationalis homo percipere voluptatem, sive res ipsa spectetur, & inconcussa atque exploratissima veritas, sive præceptionum, aut locorum, unde argumenta deducuntur, perspicui fontes, ac regula stabilis & immutabilis. Neque vero spiritualium æternorumque bonorum ubertatem & copiam, ostendunt Theologicæ disquisitiones ad excitandum inutile desiderium, & quasi ad animum exeruciandum. Sit hæc miserissima aliarum scientiarum conditio, ad ea, quæ consequi non possumus cupiditatem accendere, aut de iis, quæ si adipiscamur, deteriores efficiamur, laboriosa exercitatione disserere. Perpauci enim minimam partem assequuntur bonorum, quæ in rerum creaturarum complexu a natura ministrari demonstrat Philosophia; omnesque e contra temporum vicissitudini subjiuntur, & properant ad interitum, humana duntaxat investigantibus teterrimum & miserandum. Verum Theologi in Deum, qui simul & via & veritas & vita est, animum intendentes non solum ubi perennis felicitas sita sit non ignorant; verum etiam planissimum rectissimumque, quod arripiant iter agnoscunt, discernentes a superstitione religionem, ab hæresi fidem, a Satanae conventu Ecclesiam Catholicam, a mercenariis pastores, a morum corru-

corruptelis regulas probitatis; ut non possint, nisi summa pervicacia reddantur rebelles lumini, extremam subire calamitatem. Itaque, lectissimi Adolescentes, cum nihil tam honestum ac sanctum, tam gratum ac per jucundum in hac mundanarum rerum varietate possit excogitari, quam accedere ad beatissimam illam vitam, quæ in contemplatione consistit; bene ac sapienter exclamabat in commendationem sacræ doctrinæ eximius Ecclesiæ Doctor Hieronymus, (*Epiſt.* 155.) Quid hac voluptate jucundius, qui cibi, quæ mella, sunt dulciora, quam Dei scire prudentiam, & in abdita ejus intrare, & sensum Creatoris inspicere, & sermones Domini, qui ab hujus mundi sapientibus deridentur, plenos docere sapientia spiritali? Cedat, cedat Theologicis contemplationibus consideratio naturæ, quam Cicero dixit animorum ingeniorumque pabulum: cedat inspectio astrorum, cui deditus Ptolomæus putabat se pedibus contingere sidera, atque attolli ad consortium Deorum: cedat conviviorum, apparatus, cedat divitiarum opulentia, cedat corporum forma, valetudo, & integritas, cedat honoris splendor, decorisque amplitudo: cedant denique quæcunque alia tam animi, quam corporis oblectamenta.

Sed audio quosdam hæcenus dictis repugnantes in me verba contorquere, propterea quod nullus Scholasticis honor soleat ætate hac nostra deferri, ipsaque Theologica studia permultis adeo videantur aspera, ut quæ tædio affecti compendiosis notis, sparsisque lacunis dictante Magistro scriptitarunt, ea blattæ tineæque corrodant. Hos paullulum alloquar, opus est. Ergone ex ipso veritatis fonte, quem vobis attingere singulari Numinis providentia datum erat, ad cisternas dissipatas, quæ salubres aquas continere non valent, atque a sacrarum literarum consortio, vel ad temporalium rerum administrationem, vel ad vitam otio & languore torpentem, tandem animum convertistis? Ergone fuit literarii certaminis vestri meta commodiorem agere vitam, præesse ceteris, laureæ ornamenta capeſere, & ampliori nomine celebrari, ita ut post tam miseram compensationem virtutis, unusquisque vestrum, quasi accepto

bravio, stadium percurrere in posterum detrectaret? At non ista mehercule sunt, de quibus Præco divinus inclamat, Currite ut comprehendatis. Nam qui habitat inaccessibilem lucem, ipse requirentibus veritatem merces est, nec aliis, nisi iis, qui fuerint mundi corde, & humiles spiritu, reprobata. Accepimus, spectatissimi Adolescentes, cur isti queruli supernarum veritatum jucunditatem minime degustaverint; ideo nempe, quia superbia tumidi, noxiisque irretiti cupiditatibus, non ipsam sapientiam revera meditentur, sed res illas mortalium, in quarum assistentia deprehendit Ecclesiastes vanitatem, & spiritus afflictionem. Atque hoc erat, de quo initio orationis vos commonefaciendos esse putavi, quando me demonstraturum dixi, qua ratione danda sit opera Theologicis Disciplinis. Quum etenim harum notitia melior sit cunctis pretiosissimis, neque omne desiderabile possit ei comparari; profecto turpe est disciplinas ipsas postponere humanæ vitæ sollicitudini; magis turpe illas temporis progressu deferere; turpissimum vero non incommutabilis veritatis, sed quæstus vel ambitionis causa easdem appetere. Rectissimum propterea quisquis ad Theologiam accedit, sibi finem proponat: inquirat cælestia; terrena contemnat: ad fores sapientiæ quotidie vigilet, neque abjiciat eam, cum invenerit. Quotidianæ lectioni preces præmittat: Deo, quicquid didicerit, gratias referat: caveat ne scientia absque caritate animum inflando ipsum reddat insipientibus deteriore. Hoc erga Auctorem omnium servato fine, modum etiam in ceteris teneat: præscriptam a Præceptore methodum non immutet: disputationibus assiduus intersit: fugiat rixandi libidinem, & puerilem ostentationem decipiendi adversarium. In usu facultatum, quas sibi sedulo comparavit, tale studeat servare temperamentum, ut eloquentiam non affectet, vitet tamen orationis barbariem: utatur logicis potius ac metaphysicis institutionibus, quam traditis in Scientia naturæ: argumentationes autem neque sophisticè perscringat, neque rhetorice exornet. Animadvertat præterea magno sibi futuras esse adjuvamento Hebraicas Græcæque literas, quarum notitia planior

red-

redditur Scripturæ sensus, refellitur Judæorum pervicacia, detegitur hæreticorum calliditas, percipiuntur Veterum dogmata, & controversiæ innumeræ dirimuntur. Interdum quippe pendet ab una dictione quæstio universa; quemadmodum, ut ex multis producā exemplum aliquod, interpretatio vocabuli *Silob* demonstrat an ad Messiam spectet Jacobi vaticinium, *Alma* an Virgo sine maritali complexu peperit, *Emmanuel* an sit una in Christo persona: sæpenumero aut suffixum, aut punctum, aut litera pedagogica omnem tollit dubitationem, ut contingit in hujusmodi disputationibus, An primus homo fuerit sepultus in Hebron, an Diabolus verum serpentem assumpsit, an Messia pedes ac manus fuerint transfigendæ: frequenter uno Græcorum articulo explodimus cavillationes hæreticorum, pugnantes præsertim pro Verbi divinitate, & pro subsistentia Spiritus sancti. Impossibile est etiam, ut antiquas hæreses insectemur, nisi perdiscamus quid sit Omoousion, quid Hypostasis, quid Theotoxos, ut prætermittam alia vocabula Græcorum quamplurima: immo qui cum Latinis tantum versabitur, etiam nomina sacrorum librorum ignorabit, Geneseos, Exodi, Deuteronomii, Paralipomenon, Evangelii, Apocalypsis; quid plura? ipsius, quam tradimus Theologiæ, & scientiarum reliquarum etymologiam, nominisque rationem. Igitur perutilem esse Theologo utriusque linguæ notitiam nemo jure negabit. Idem de Ecclesiastica Historia judicium ferendum est, nisi hanc magis etiam necessariam affirmare velimus: historiâ enim, paucis exceptis parabolis, vetus Testamentum comprehenditur: historiam vitæ, ac mortis Reparatoris nostri enarrant Evangelistæ: ex historia Religionis Christianæ dignoscitur institutio & progressus: historiæ commemorant profligatas hæreses, & confirmatas Majorum traditiones in Synodis Oecumenicis: in historia demum recondita sunt omnia fidei nostræ præclarissima monimenta. At quoniam historiam universam memoriæ mandare est impossibile, neque tempus superest statutis studiorum vestrorum annis pervolutandi Eusebium, Socratem, Theodoretum, Evagrium, Baronium, aliosque in hoc ar-

gumento percelebres; conscriptis industria vestra brevissimis catalogis, quorum unus enumeret sacros libros eorumque argumenta, alter supputet per Epochas sæcula, tertius tradat seriem Romanorum Pontificum, quartus celebriorum Conciliorum, quintus sanctorum Patrum, postremus Hæreticorum, qui ad hanc usque ætatem vexarunt Ecclesiam, aliquam saltem sacræ Historiæ Epitomen perlegere, minime negligatis. Sint vobis usui pro conficiendis catalogis accurati recentiores, Petavius, Pagius, Schelestratus, aliique complures, non quidem singuli, sed unus, aut alter: atque Historiæ compendium eligite, quale olim ad quartum usque sæculum protraxit Severus Sulpitius, ac postea ad ætatem nostram Bossuetius. Interim compilatas ab Heterodoxis Historias, in quibus latet anguis in herba, prorsus abjicite; etiam si audiat non absque laude celebrari Centuriatores, Basnagium, Clericum, Usserium, Caveum, & ceteros hujus surfuris: hos omnes disciplinis jam imbuti tanquam hostes adite, expugnatæ, refellite, extrahite ex ipsis visceribus viperarum adversus venena medicamentum. Præter hæc universim dicta, ut palam fiat quam solemniter mentiatur Antonius Charlas, dum in sua Parænesi de omnibus sacrorum Virorum Ordinibus ausus est indiscriminatum pronuntiare, quod Theologia in Monasteriis tradita longe ab eruditione Ecclesiastica distare solet, multique Theologiæ Professores se in Ecclesiasticæ antiquitatis studio peregrinos monstrarunt; vos saltem, Adolescentes optimi, in singulis fidei controversiis expendite priori loco sacras literas additis Catholicorum interpretationibus, consulite traditiones Apostolicas, exquirite Ecclesiæ definitiones, examine testimonia Patrum, attendite verborum omnium scopum, ac sensum, probate communes Theologorum assertiones: atque hæc vestra propugnacula sint; non mentis figmenta, non fallaciarum structura, non jejuna, vel spinosa ratiocinatio. Pugnantis Scholarum plastra versate cum ingenii moderatione: parum vos exerceant Veterum quodlibeta: sive Aristoteles dixerit, sive Socrates, sive Plato, vera tantum probate: ante Interpretum Commentaria scrutamini
textus

textus Auctorum, sæpenumero magis, quam sint aliorum. Interpretamenta, perspicuos. Hæc vobis monita præscribo; reliqua vos usus, atque experimentum docebit.

Dummodo studia vestra his præceptionibus dirigantur, firmissimam habeo spem, fore ut aliquando consequamini ampliora Ordinis munera, Ecclesiasticas dignitates, atque in literaria Republica nomen honestissimum & celeberrimum. Convertite, quæso, oculos in peristylli, gymnasiique parietes, & paullulum contemplamini pietas Majorum imagines, necnon ea, quæ iis apposuit Curtius, aut Pamphilus, Epigrammata. Refert hæc tabula Romanum Aegidium Bituricensium Antistitem, quo post Augustinum neminem plura, neminem accuratius scripsisse affirmat Sabellicus, ac tantæ auctoritatis & doctrinæ virum, ut illum adhuc viventem Generalia Comitia Florentiæ habita Scholarum nostrarum Duccem elegerint. Proximus est Gregorius Ariminensis, quem nullus veterum Scholasticorum in Augustini lectione superavit, ut recte Norisius, Macedo, Deschampsius, alique plurimi contestantur. Exhibent tabulæ reliquæ Thomam de Argentina, Gerardum Senensem, Paulum Venetum, & Scholasticos alios innumeros, quorum scripta dignis, plenisque laudibus celebrantur. Inter istos vero illi maxime, qui ad exercitationes Scholasticas addiderunt peritiam linguarum, eloquentiam, historiam, ac multiplicem eruditionem, non solum inter Nostrates, verum etiam inter viros cujuscunque Ordinis celebriores laudibus splendidissimis cohonestantur. Quis enim non congerit laudes omnes in Onuphrium Panvinium, quem alii heluonem Antiquitatis, alii Fastorum Conditorum, alii Romanæ & Ecclesiasticæ Historiæ Patrem appellant? Quis amplissimis præconiis non exornat Aegidium Canisium decus Purpuratorum Patrum singulare, a Jovio, Sadoletto, Bembo ob poesim, solutamque orationem Maroni ac Tullio comparatum, declaratumque publicis Leonis Decimi testimonis hominem egregium atque dignissimum? Quis gloria & prædicatione non effert Hieronymum Seripandum Cardinalem amplissimum, ac in Tridentino Concilio Apostolicæ

Sedis Legatum; qui, ut Donius scribit, linguæ Græcæ & Hebraicæ, ac divinarum, humanarumque scientiarum cognitione ad miraculum imbutus in se omnium admirationem convertit? Quis ad sidera usque non extollit inclytum & percelebre nomen Henrici Cardinalis de Noris, Augustinianorum librorum Vindicis strenuissimi, suorum oblectatorum invicti Debellatoris, reconditarum Historiarum Scriptoris accuratissimi, & posteriorum Chronologorum omnium Ducis ac Principis? Christianum etiam Lupum ob Moraliū doctrinarum gravitatem ac pondus, ob illustratos sacrorum Conciliorum Canones, ob historicarum Dissertationum copiam atque præstantiam quis non laudat, non prædicat, non commendat? Hi quidem, & qui brevitatē gratia prætermittuntur silentio, tantam adepti sunt gloriæ lucem atque amplitudinem, eo quod Scholasticam Theologiam bonarum artium societate honestarunt, peregrinas linguas excoluerunt, lustrarunt vetera monumenta, rudera quoque confractosque lapides pervolutarunt. Fateor non omnes tali ingenio ac fortuna præditos esse, ut possint ad horum doctrinam & decora, adhibito etiam omni conatu, pertingere: sed qui parem ipsis dignitatem non assequetur, aliquam saltem, nec mediocrem reportabit; si nullam prorsus arripiet, satis illi gloriosum erit promeruisse: si nec promeruerit, honestum valde atque decorum, curam omnem & diligentiam ad promerendum locasse. Monui quippe, atque iterum moneo, non esse solam hominum existimationem, & cumulatam honoribus famam sapientiæ virtutisque mercedem: sapientia ipsa suimet corona est, & scientiarum omnium, quæ sunt participationes veritatis æternæ, ipsa veritas præmium ac retributio. Porro hæc merces rependitur iis omnibus, qui bene utuntur distributis a Deo talentis, sive decem, sive quinque, sive duo tantum acceperint; illique soli remuneratione frustrantur, qui unum sibi collatum tenent pigritia atque inertia reconditum in sudario. Fruuntur supernæ veritatis luce ex Magni Augustini discipulis, non tantum Prosper hæresis Semipelagianæ devictor, Fulgentius Propugnator divinæ Gratiæ, & profligator

gator Arianorum, Thomas Præfulum & Concionatorum, Exemplar, alique inter Divos relati, & literis æque ac sanctitate conspicui; verum etiam permulti ex ordine illorum, qui ad cathedras regendas inepti e Schola exierunt instructi saltem, ac parati ad reliqua Religiosæ vitæ exercitia. Verum in tanta sanctorum Virorum multitudine nullus prorsus poterit connumerari, qui Superiorum nutu inter studentes cooptatus propter pigritiam aut ignaviam sacrarum disciplinarum studia neglexerit. Quæ cum ita sint, vos spectatæ indolis Juvenes oro, atque obtestor, ut si quis vobis inest felicitatis amor, si quis scientiæ ardor, ac stimulus honestatis; in Theologicas veritates omnem ingenii facultatem, intendatis, additoque sacræ eruditionis ornatu exhibeatis vos dignos Augustini discipulos, athletas fidei, Evangelii ministros, atque hostes acerrimos hæreticorum. Ad hanc rem libros istos conscribere jussus causa duntaxat vestræ utilitatis superavi metum consequentis laboris; vosque demisse precor, ut fraterna caritate quicquid vobis profero excipiat: si quid erit perutile, Deo primum, deinde Augustino referatis acceptum; errores autem mihi illorum auctori æquo animo condonetis. Ad te denique supplex accedo, Pater ac Magister omnium optime, AURELI AUGUSTINE, pro me, hisque adolescentibus sacra doctrina imbuendis patrocinium tuum enixe deprecaturus. Te optimum Fidei Magistrum, Legis Oraculum, Ecclesiæ auctoritatem ac Duce[m], splendidissimum scientiæ solem, munitiorem contra hæreticos partem, Doctorum omnium sustentaculum, Pontifices, Patres, Theologi, universi demum fideles proclamant. A Te profligatas quasunque hæreses, productas in lucem veritates fidei Catholica, firmisque & invictis rationibus solidatas, declarant Constitutiones Romanorum Pontificum, definiunt Occumenicæ Synodi, testantur totius orbis Episcopi. Verbis præsertim tuis Sententiarum libri, in quos tot Scholastici Commentaria ediderunt, suere conscripti, iisdem fabricati canones Conciliorum, ex iis depromptæ Scripturarum sanctarum perspicuæ & dilucidæ expositiones. Etiam si tui, Præsul ac Pater sanctissime, non essemus,

mus, cum absque ulla dubietate doctrinam tradideris sanctarum Scripturarum auctoritati in omnibus concordissimam, & nullus Doctorum abstrusa quælibet diligentius exquisierit, verius invenerit, veracius protulerit, luculentius enodaverit, robustius defenderit, effusius disseminaverit; postularet æquitas ipsa, ne alium in Scholarum nostrarum columen, ac præsidium præligeremus. Nunc vero, quoniam Tui sumus, impellit nos præter æquitatem filiorum necessitudo, atque in tui clientelam trahit etiam amor ac pietas. Ex illa itaque beatorum Spirituum patria, ubi præfulges inter Doctores Ecclesiæ, tanquam sol rutilans inter sidera, dirige me scribentem; & pro ea gratia, quam in te pusilli cum magnis miramur, quid tenere debeam ostende. Theologicis studiis addictos, quibus decretum est Te suspicere, colere, tuæque dicta quasi propria defendere, omni caritate ac benevolentia prosequere; & excubante pro universis membris corporis Christi vigilantissima industria tua, Eremitanam Familiam paterno, & singulari amore complectere.



C E N S U R A .

DE mandato Reverendissimi Patris Magistri Regentis Fratris Nicolai Antonii Schiaffinati Generalis legi libros, quorum titulus est, *De Theologicis Disciplinis*, elucubratos opera & studio admodum Reverendi Patris Magistri Fratris Joannis Laurentii Berti Florentini; in quibus nihil sane offendi, quod sanam Orthodoxamque doctrinam undique non redoleat, immo omnia ibidem perspicue, apposite, graviterque ita discussa, omnigenaque eruditione referta conspexi, ut nedum Tironibus nostratibus dirigendis, & ad bona studia inflammandis, sed etiam doctis, veteranisque in abditiora sacrae doctrinae penetralia inducendis utilia, idoneaque mihi videantur. In his siquidem Auctor ita Scholasticam methodum sectatur, ut linguae barbariem quondam Peripatum obtinentem penitus exuat, ac perpetuo declinet. Dogmaticas, Polemicasque controversias passim occurrentes ita pertractat, ut & offusas sub peregrinae eruditionis specie a versutis Novatoribus tenebras, arcessitis undique e sacrationi peni illustribus testimoniis, omnino depellat; & sacrorum Oraculorum, sanctorumque Patrum auctoritatem a malignantium, aut minus critices peritorum calumniis egregie vindicet; Scholasticas demum, adiaphorasque quaestiones ea modestia, brevitate, ac perspicuitate dissolvat, ut & planiorem, ac Augustini sensibus accommodiorem sententiam domesticis Juvenibus aperiat, & externarum Academicarum sibi adversantium placitis debitum honorem ubique servet: eaque propter censeo e re Augustinianae Scholae esse, quod praefatum Opus typis mandetur. Romae die 26. Septembris anno 1737.

Fr. Benedictus Augustinus Gattini Pratenfis, Sacrae Theologiae Magister, Procurator Generalis Ord. Eremit. S. P. Augustini.

C E N S U R A.

Opus inscriptum *De Theologicis Disciplinis*, ab A. R. P. Magistro Fratre Joanne Laurentio Berti Florentino in Scholæ Augustinianæ commodum elaboratum vidi, pervidi, probavi. Vidi, inquam, ut mandatis Universi Nostri Ordinis Magistri obtemperarem: pervidi, ut voluptatem, quam in sensu legendis hisce lucubrationibus perceperam, mihi ingeminarem: probavi, ut non solum Nostratum, sed Externorum etiam Magni Augustini studiosorum utilitatem proveherem. Est enim Opus perspicua, claraque methodo digestum; solida, sanaque doctrina instructum; ac multiplici, minimeque obvia eruditione respersum: totum denique spirat, atque exhibet Augustinum. Est igitur cum alijs titulis, tum hoc uno nomine publica luce dignissimum. Sic censebam

Romæ in D. Augustini pridie Idus Sextiles 1737.

F. Hieronymus Augustinus Zazzeri Ord. Erem. S. P. Augustini Sacra Theologia Magister, Ex-Assistens Italia, Congregationis Sacrorum Rituum Consultor, & in Archiepiscopio Sapiientia Urbis Sacra Script. Interpret.

F. NICOLAUS ANTONIUS SCHIAFFINATI
NEAPOLITANUS

*S. Joannis ad Carbonariam, Sacrae Theologiae Magister Regens,
socius Ord. FF. Erem. S. P. AUGUSTINI Prior Generalis,
& Commissarius Apostolicus.*

CUM Opus inscriptum *De Theologicis Disciplinis*, a Rev. Patre Magistro F. Joanne Laurentio Berti Florentino elaboratum, duo nostri ejusdem Ordinis Theologi a Nobis deputati recognoverint, & in lucem edi posse probaverint; Nos tenore praesentium facultatem concedimus, ut typis mandetur, si ita iis, ad quos reliquum spectat, videbitur.
Datum in Conventu nostro S. P. Augustini de Urbe die 10. Martii 1739.

*F. Nicolaus Antonius Schiaffinati Generalis,
& Commissarius Apostolicus.*

Nostri mun. aff. Sig.

*Magister Fr. Augustinus Gioja a Favenario
Ordinis Secretarius.*

Reg. lib. 6.

Im-

IMPRIMATUR,

Si videbitur Rmo Patri Magistro Sacri Palatii Apostolici.
Philippus Spada Episc. Pisauri Vicefg.

C E N S U R A.

Cum ex mandato Reverendissimi Patris Joannis Benedicti Zuanelli Sacri Apostolici Palatii Magistri accurate perlegerim tria *Theologicarum Disciplinarum* Volumina, quorum in priori disputatur de Existencia, & Proprietatibus unius Dei, in altero de Summa Trinitate, de Angelis, de rerum corporearum productione, in tertio denique de Originali peccato, de hæresibus adversus liberum arbitrium, & gratiam, ac de ipsa gratia Reparatoris, Opus elucubratum per Adm. Rev. P. Mag. Joannem Laurentium Berti Florentinum Ordinis Fratrum Eremitarum S. Augustini, tantum adest ut in eo quidpiam a recta fidei, vel morum norma alienum offenderim, ut potius miratus sim Authoris ingenium, eruditionem, ac doctrinam. Quamobrem studiosorum omnium Sacræ Theologiæ bono lucubrationes hujusmodi publica lucis usura dignissimas censeo.

Datum in Conventu Transpontinæ Idibus Octobris anni 1737.

F. Petrus Thomas Cacciari Carmelita Sacræ Theol. Mag. & Doctor, Romani Cleri Examiner, atque in Collegio de Propaganda Fide ejusdem sacre Disciplinæ Lector.

C E N S U R A.

UT mandatis obsequerem Reverendissimi P. Jo. Benedicti Zuanelli Sacri Apostolici Palatii Magistri, attente legi Librorum *De Theologicis Disciplinis* tres priores Tomos, Opus sanæ doctrinæ & eruditionis plenum, ab Adm. Rev. P. Mag. Jo. Laurentio Berti Eremita Augustiniano sollemniter, atque ingeniose elucubratum, in quo nihil Fidei Catholicæ aut bonis moribus adversum, quamplurima Sacræ Theologiæ studiosis utilissima deprehendi: in cujus fidem, &c.

D. Antonius Andreas Galli Abb. Canon. Regul. S.S. Salvatoris, & Sac. Congr. Indicis Consultor.

IMPRIMATUR.

F. Jo. Benedictus Zuanelli Ord. Præd. S. P. A. Magister.

IN



I N L I B R O S
DE THEOLOGICIS DISCIPLINIS
PROLEGOMENA.



IVINARUM RERUM DISCIPLINAM, *quam propriè sapientiam nuncupari*, affirmat in lib. XIV. cap. 1. de Trinitate maximum Catholicæ Ecclesiæ lumen ac firmamentum Augustinus, non solum contentiosam illam, quam Scholasticam dicunt, & quæ sublimiori & longe jucundiori, quam appellant dogmaticam, viam sternit, eamque validissimo prædicio tutatur, verum etiam hanc ipsam, in qua Fidem, Sanctorumque dogmata contra impio-

rum machinamenta vindicamus ac propugnamus, quantum vires tenuissimi ingenii mei suppetunt, adolescentibus nuper Philosophiæ doctrina formatis, divino implorato Numine, tradere aggredior. Quoniam vero quisquis in novam aliquam facultatem intendit animum, quænam ea sit, quæ præsertim comprehendat, qua methodo teneatur, quidque voluptatis afferat non mediocri solet inquirere solitudine; huic ego morem gerens Isagogicam Diatribam præmittere excogitavi: ut habita instituti mei ratione, in ipsoque limine dicendorum varietate, & utilitate perspecta, arduum quidem iter, sed felicitatis decorisque plenum arripiat. Etsi enim ego talis profecto non sum, qui vel eruditione, vel argumentorum copia Scholasticas disputationes efficere possim pleniores; dabo tamen operam, ut pluribus antiquorum Scriptorum dumetis purgata, ac interdum recentiorum flosculis, placitisque conspersa amplior videatur via, quam juniores in scholarum latebris versaturi animo ingrediantur alacriori. Illud autem me consecuturum esse confido; si Augustinenses discipuli,

To. I.

A

quo-

quorum tantummodo caussa universam Theologiam his libris mandare satago, una cum his elucubrationibus Opera Sanctissimi Protoparentis assidue legant & pervolvent, *humiliter orantes misericordiae Dominum, ut eandem spiritum intelligentiae legentes accipiant, quem ille accepit ut scriberet; & eandem illuminationis gratiam adipiscantur ut discant, quam ille adeptus est ut doceret.* S. Fulg. Lib. II. de Verit. Præd. & Grat. cap. 18.

C A P U T I.

De notione, variisque generibus Theologiae.

ITaque altissimam hanc facultatem Græco vocabulo *Theologiam*, appellamus, quo significari intelligimus de divinitate rationem, sive sermonem, ait lib. VII. de Civit. Dei cap. 1. S. P. Augustinus. Nam Græca lingua Deum dicimus *Θεός*, sermonem vero *τὸ λόγος*. Quæ generali appellatione omnem de supremo Numine orationem, sive per scientiam ac disputationem instituta sit, sive fabulis, rhetorumque figmentis exulta, sive sacra, sive superstitionis ac profana, non incongrue dicere possumus Theologiam. Eapropter quæ de summo Deo tradidit Plato, & quæ de idolorum cultu Numa Pompilius, laudato nuper libro cap. 9. Magnus Augustinus Theologiæ nomine haud veritus est insignire. Sed quemadmodum naturali ratione ducti vix divinam attingimus existentiam, ac nonnulla summi Dei attributa, quæ humanam nullatenus superant perceptionem; ita naturalis illa Platonis, aliorumque Philosophorum supremæ causæ notitia ad Ontologiam, non ad specialem aliquam Sapientiam videtur spectare. Quæ vero de Gentium diis veteres idololatricæ commenti sunt, tantum Theologiæ nomine censenda erunt indigna, quantum longe recedunt a veritate. Theologos ergo proprie dicimus, quos ex revelatis arcanis de divinitate audimus differentes, ut recte observant Budæus in Commentariis, & in Prolegomenis Dionysius Petavius. Atque inde promanavit Theologorum nomen; quo primum appellatos novimus Christi discipulos ab Areopagita in suo, ut creditur, de Divinis noninibus libro, ubi ait: *Aderat & Petrus supremum decus, & antiquissimum Theologorum culmen.* Hactenus de vocabuli significatione.

Pagani triplicem Theologiam habuere, Fabulosam, qua utebantur in theatris vario carminum genere ad numinum suorum flagitia, erroresque narrandos; hujusque Ethnicorum poetarum pleni sunt libri: Naturalem ac physicam, per quam Deorum genus philosophi scrutabantur, ut præstiterunt olim Cicero in libris de Natura Deorum, Macrobius in Saturnalibus, nec non posterioribus temporibus Lilius Giraldus Ferrariensis, Vossius, & quos contra Polytheos disputans op-

portu-

portuniori loco commemorabo: Civilem denique, quæ in urbibus commorantes, & confluentes ad templa erudiebat circa ritus ac sacrificia, ad cultum peragenda Deorum. Quam postremam Numa septem Latinis, ac septem Græcis libris explicuit, quos erutos ex agro Petilii sub Janiculo a cultoribus altius terram molientibus, refert Livius Historiarum XI. ad annum Urbis Conditiæ DLXXIII., fuisse Senatus iudicio concrematos.

Universam hanc idololatrarum gentium Theologiam perstringit Apostolus in Epist. ad Rom. cap. I. v. 23. his verbis: *Et mutaverunt gloriam incorruptibilis Dei in similitudinem imaginis corruptibilis hominis, & volucrum, & quadrupedum, & serpentum. Quibus redarguit primo eos, qui corporeos homines supersticioso cultu venerati sunt non solum Romanos, sed & Græcos, & Persas, aliosque populos mortales Deorum turmas sacrilega religione persecutos; quamquam unicuique naturali rationis acumine notum est quod de vero Deo scripsit Antiphanes, ἐξ ἀπορίης ἢ ὁράται, ἰδὲν οὐκ, oculis non videtur, nemini est similis. Quare imbecilles infirmosque Deos ipsos fatetur in Epistola ad Matrem Alexander Rex Macedonum invictissimus, ut recte in libro de idolorum vanitate Cyprianus, Felix in Octavio, & Athenagoras in Apologia pro Christianis. Et deinde damnat Paulus Aegyptios, quorum aquatica, terrestria, & volueria numina commemorant Theophilus Antiochenus, Strabo, Philo, atque Virgilius, Juvenalis, synchronusque Paulo Lucanus. At quoniam Deorum gentium vanitatem modo refutare non vacat; audiatur D. Thomas hæc ad Apostoli testimonium adjiciens: Videtur autem Apostolus triplicem Theologiam tangere Gentilium. Primo quidem civilem, quæ observabatur a Pontificibus in adoratione idolorum in templo, & quantum ad hoc dicit: Et mutaverunt gloriam incorruptibilis Dei. Secundo Theologiam fabularem, quam poætæ tradebant in theatris, & quantum ad hoc dicit: Qui commutaverunt veritatem Dei in mendacium. Tercio Theologiam naturalem, quam observaverunt Philosophi in mundo partes mundi colentes, & quantum ad hoc dicit: Et coluerunt, & servierunt creaturæ potius, quam Creatori. Hæc D. Thomas.*

Eandem idolis addictæ Gentilitatis divinam, si ita fas est nominare, scientiam jure, ac merito S. Pater Lib. VIII. de Civit. Dei c. 5. Platoniorum Theologia existimat deteriorem. Nam qui hanc olim fecerant sunt, licet fidei lumine destituti, esse unam universorum causam, unumque beatitudinis largitorem nequaquam dubitaverunt. Cedat eis igitur, sic eximius Ecclesiæ Doctor effatur, non solum theologia illa fabulosa Deorum criminibus oblectans animos impiorum; nec solum etiam illa civilis, ubi impuri Demones terrestribus gaudiis deditos populos Deorum nomine seducentes, humanos errores tanquam suos divinos honores habere voluerunt: ubi ad spectandos suorum criminum

ludos cultores suos tanquam ad suum cultum studiis immundissimis excitantes, & sibi delectabiliores ludos de ipsis spectatoribus exhibentes: ubi si qua velut honesta geruntur in templis conjuncta sibi theatrorum obscenitate turpantur, & quaecunque turpia petuntur in theatris comparata sibi templorum sanctitate laudantur. Et ea, quæ Varro ex his sacris, quasi ad calum & terram, rerumque mortalium semina interpretatus est, quia nec ipsa illis ritibus significantur, quæ ipse insinuare conatur, & ideo veritas conantem non sequitur: & si ipsa essent, tamen anima rationali, quæ infra illam creaturæ ordine constituta sunt; pro Deo suo colenda non essent, nec sibi præferri debuit tanquam Deos eas res, quibus ipsam prætulit verus Deus. Et ea, quæ Numa Pompilius revera ad sacra ejusmodi pertinentia secum sepeliendo curavit abscondi, & aratro eruta Senatus jussit incendi. His autem prædictas superstitiosæ Theologiæ species & enumerat Augustinus, & quali inexistimatione habendæ sint luculenter demonstrat.

Verum mitto profanorum hominum rudimenta, & ad Theologiam nostram sermonem verto. Quam desinire possumus rerum divinarum vel ex naturaliter cognitis, vel ex revelatis principiis comparatam doctrinam. Et si ea ex principiis naturaliter notis deducitur, pertinet, ut jam diximus, ad Ontologiam, seu Metaphysicam, quæ singularum rerum creaturarum, ac supernarum inquirat essentiam. Si autem ex his, quæ per revelationem innotescunt proficiantur, erit illa Theologia quæ particularem constituit sapientiam; & quæ nonnullis divinitus animo illabitur, qualem habuere Salomon, & Apostoli, qui Spiritu Sancto repleti, *cæperunt loqui magnalia Dei*, nec non Sanctorum plurimi, etiam feminæ, ut nostri Ordinis Sanctimonialis Clara, quæ non semel de altissimis Fidei nostræ mysteriis fertur differuisse. Sed ut plurimum studio ac labore comparanda est; nam Spiritus ubi vult spirat, & prout vult, gratiarum charismata dividit. Habes hinc, ut arbitror, discrimen inter *infusam*, & *acquisitam* Theologiam.

Porro hanc ratione methodi dividunt in Positivam, Scholasticam, & Mysticam. *Positivam* aliqui eam dicunt, quæ non servatis dialecticæ præceptis fusiori quodam dicendi genere divinam Scripturam, Fideique exponit mysteria: sed alii dictam putant, quod sua principia *supponat*, atque ex sacris literis, Apostolicis Traditionibus, & Catholicæ Ecclesiæ statutis suas inferat positiones. *Scholasticam* nuncupamus Theologiam illam, quæ ad syllogisticæ artis regulas sese accuratius accomodat, neque a priori diversa est, nisi methodo disputandi: unde qui servato verborum delectu & ampliori oratione sua ex Theologicis fontibus deprompserit argumenta, non tam Scholasticam, quam Positivam tenere is videbitur Theologiam; eritque hac temporum ætate auditoribus suis haud ingratus, sive in rerum divinarum contemplatione, sive in his quæ ad formandos mores pertinent, occupa-

cupabitur: etenim hæc Theologia præstat utrumque, & pro argumenti diversitate *Speculativa* dicitur, & *Moralis*. Mysticam porro nominamus illam, quæ non in sola contemplatione versatur, sed in Deum dirigit cordis affectum: de qua possumus ea verba Davidis usurpare Ps. x1. 7. *Eloquia Domini eloquia casta: argentum igne examinatum, probatum terræ, purgatum septuplum.*

Ratione autem argumentorum, quæ Theologo pertractanda sunt, dividere possumus Theologiam in Polemicam, Dogmaticam, & Adiaphoram. *Polemica*, idest bellatrix, ea est, qua cum hæreticis, ceterisque fidei hostibus funem ducimus contentionis, ea nempe, quæ in dirimendis Controversiis inter Fideles & Etherodoxos tota versatur. *Dogmaticam* ego quidem illam appello, quæ Patrum placita, sententiasque ad trutinam revocat; quippe *Dogma* idem est, ac scitum, vel decretum, etiamsi *Polemicus* Theſes sermonis usus & consuetudo *Dogmaticas* indifferiminatim denominet. *Adiaphoram* autem dico, quæ absque fidei discrimine, errorisque periculo exercitationis causa inter Doctores exagitur, ut cum de suis distinctionibus Scoti, ac Divi Thomæ discipuli digladiantur. Denique ratione subiecti dividi potest Theologia in Theologiam *Dei*, *Beatorum*, ac *Viatorum*, quæ proculdubio fatis solo nomine comprehenduntur. Atque hanc Theologiæ partitionem si quis minus aptam arbitrabitur, alteram fortasse meliorem excogitet proprio Marte, vel consulat initio sui Apparatus Petrum Annatum.

C A P U T II.

Num Scholastica Theologia, quæ Dialecticam in usum assumit sit penitus abijcienda?

IN SCHOLASTICAM THEOLOGIAM, quam diximus Dialecticæ usum ac philosophicam methodum differendo complecti, contumeliosis verbis ac disteriis hæretici fere omnes debacchantur. Opponebat olim Augustino Cresconius Grammaticus, quod & ille Dialecticus esset, ac in Fidei quæstionibus disputandi artem adfumeret, ut refert idem Sanctus Doctor lib. 1. cap. 13. Novatores quoque ut eam omnino perderent nullum non lapidem moverunt; nam Wiclephus in articulis a Synodo Constantiensis damnatis asseruit Universitates & studia Theologorum, quorum gymnasia Castra Cainitica nuncupabat, eo modo Ecclesiæ prodesse, *sicut prodest diabolus*. Et Lutherus lib. 2. de abroganda Missa nostrorum Scholas *lupanaribus* comparat, appellatque D. Thomam *phialam iræ Dei*. Joannes Calvinus in suis Institutionibus hæc audacissime eruat: *Tota Papatus Theologia immane est chaos, & horribilis*

ribilis labyrinthus, quia neglecto Christo sibi insans, & ventosis speculationibus indulget. Pari audacia in sua Apologia Philippus Melancthon ait Lutetiæ Parisiorum natam esse profanam Scholasticen, eaque admissa obscuratum Evangelium ac Fidem extinctam. Eo autem dementiæ devenerunt Withemburgenses Hæretici, ut anno 1520. Scholasticorum libros feretro impositos sacras defunctorum celebrantes vigilias magna ministrorum, populi que frequentia ad mediam deferrent urbem, ac in ardentem rogi projicerent, ut in Appendice ad Naucleri Chronicon refert Surius. Qua impia improborum hominum indignatione satis, superque apparet quanto animi odio & veteres, & recentiores hæretici communionis Romanæ Theologos, quos dicimus e Schola, prosequantur.

Connumerandus est his Nicephorus Gregoras, qui circa annum 1328. floruit, Andronico Juniore imperante, & in Latinos iniquissimus non tantum invehitur, quod ex Petri successione arrogant sibi Primatum; sed etiam acriter illos reprehendit eo, quod temere ac superbe, præsertim Itali, in Theologiam disputantes insiliant. Quam Scholarum invidiam longa querimonia adauget Erasmus asserens in quæstionum nostrarum delectu plurimas offendi supervacaneas, & fatius esse ad bene, beateque vivendum Deum humili religione diligere, quam de ipsius natura, ac personis plura operosa inquisitione tractare. Ad ejusmodi criminationem proniores videntur moderni Scriptores, qui cum nudam, ac subtilem physiologiam, quæ penes nos hætenus obtinuit cachinnis ac risu excipiunt; tum hanc differendi methodum damnant, exercitationes despiciunt, vocabula, quorum forte significationem ignorant, barbarissimos censent latinitatis. Non obscuræ sunt in hujuscemodi commentationibus Constantini Grimaldi lubricationes; quas litteratorum horum judicio probatas damnat Magistra veritatis Ecclesia.

Ego quidem causam, cur id genus hominum nostras parvipendant cathedras mihi videor divinare. Nam vel de Sectariis loquimur ab Ecclesia alienis, vel de Catholicis viris, qui in Scholasticos communi quodam odio feruntur. Sectarii nollent nos ad evitanda ipsorum sophismata instructos, sed in ratiocinando difficiles, quo majori conatu ac dolo ea, quæ profitemur dogmata impeterent; unde traditur dixisse Bucerus, *Tolle Thomam, & dissipabo Ecclesiam*: dignissimi, quos Dominicus a SS. Trinitate de Theologicis disciplinis optime meritis, libr. 2. Biblioth. sect. 1. cap. 3. comparat Philistæis, qui devictis ad Gabam Hebræis prohibuerunt, ne deinceps fabros ferrarios haberent, auctore lib. 6. Antiquit. cap. 7. Josippo, ut soli posset contra hostes lanceas, gladiosque tractare. Hi verò duplici de causa in subtiles, & acutas disputationes declamant; quarum una est, quod experimentalis philosophiæ impensius navantes operam remotiora

a sen-

a sensibus vix delibarent; altera quod dicendis in foro contentiosis incumbunt orationibus, sermonisque fucum ubique expetunt, ignari gravissimum auctorem Clementem Alexandrinum in I. Stromateon monuisse, neque probandum esse ciborum apparatus, *in quo plura sunt condimenta, quam quæ parata sunt ad alendum, neque scitum esse sermonis usum, qui oblectandis potius, quam juvandis auditoribus servit.* Sed ne videamur cultum, ornatumque in Theologis nostris dammare, nimiumque futilibus argutationibus indulgere, exponam modo quodnam ferendum sit in hac dissertatione iudicium.

PROPOSITIO I. Theologo usus dialecticæ summo opere est utilis, ac necessarius.

OSTENDITUR I. propositio deprompta ex sacris litteris argumentatione. Theologi munus est incredulos & contradictores arguere, detegere impugnantium sophismata, ac interroganti de his, quæ profiteantur, congruam veramque rationem reddere. At hæc omnia suppeditat ars dialecticæ, quæ nexus argumentorum, sermonum versutias, & oppositionum indicat solutionem. Est ergo viro Theologo dialecticæ usus apprime necessarius & utilis. Priorem propositionem tradunt expresse divinarum oracula Scripturarum; nam Apostolus affirmat opus esse, ut Ecclesiarum Rectores fidelem sermonem amplectantur, ut exhortari possint, & eos qui contradicunt arguere, quoniam, inquit in Epistola ad Titum cap. 1. v. 11. *multi sunt docentes quæ non oportet.* Et Petrus Epistola 1. cap. 3. v. 15. *vult vos paratos esse ad satisfaciendum, omni poscenti rationem de ea, quæ est in vobis, spe;* nimirum Apologiam exhibere, si quis a nobis causam poposcerit Religionis. Debemus etiam, ut hortatur Sapiens cap. 8. v. 8. *scire versutias sermonum, & dissolutiones argumentorum.* Quod vero hæc omnia ad munus pertineant dialecticæ satis constat.

Probatur II. ex PP. S. Clemens Alexandrinus in 6. Strom. scribit: *Sepimentum est dialectica, ut ne a sophistis veritas conculcetur.* Basilii in Caput 1. II. *Facultas dialectica muri instar est dogmatibus, quod ea non sunt facile diripi, & quorumlibet incursum patere.* Gregorius Nazianz. Orat. 20. summis laudibus Basilium ipsum extollit, quod cum eo disputabant facilius esset ex labyrinthis sese extricare, quam argumentorum ejus laqueos effugere. Ambrosius in cap. 5. Lucæ: *Quæ sunt Apostolorum, quæ laxari jubentur retia, nisi verborum complexiones, & quasi quidam Orationis sinus, & disputationum recessus, qui eos, quos ceperint, non amittant.* Atque ne singulos commemorem, S. P. Augustinus, cujus in II. Libro de Doctrina Christiana cap. 31. hæc sunt verba: *Disputationis disciplina ad omnia genera questionum, quæ in literis sanctis sunt, penetranda & dissolvenda plurimum valet. Tantum ibi cavenda est libido rixandi, & puerilis quædam ostentatio decipiendi*

piendi adversarium. Ex quibus Patrum testimoniis istud contextitur argumentum. Ea facultas Theologo perutilis est, ac necessaria, quæ est contra impugnatores sepimentum veritatis, & muri instar univærsis dogmatibus, & quæ a doctissimis, sanctissimisque viris commendatur, ac valere plurimum dicitur ad omnium quæstionum genera. Talem esse artem disputandi, seu dialecticam asserunt Sancti Patres. Hi igitur artem istam perutilem viro Theologo judicant, ac maxime necessariam.

Tertio loco propositio demonstratur ratione. Dialectica duo præstat, disputandi peritiam, qua absque erroris periculo unum ex alio deducitur, & notitiam sophismatum, qua adversariorum tela retundimus. Atqui utrumque munus exercere debet Theologus, qui & theses suis ex fontibus profert, & Atheorum, damnatorumque hominum declinat argutias. Ei ergo erit podissequa ars disputandi. Urget hoc argumentum contra Cresconium Grammaticum S. P. lib. 1. cap. 13. ubi ait: *Quid est enim aliud dialectica, quam peritia disputandi? Quod ideo aperiendum putavi, quia etiam ipsam mihi objicere voluisti, quasi Christianæ non congruat veritati, & ideo me doctores vestri velut hominem dialecticum merito fugiendum potius, & cavendum, quam resellendum, revincendumque censuerint. Quod cum tibi non persuaserint, nam te adversus nos etiam scribendo disputare non piguit; tu tamen in me dialecticam criminatus es, quo falleres imperitos, illosque laudares, qui disputatione mecum congredi noluerant. Sed tu videlicet non dialectica uteris, cum contra nos scribis? Ut quid te ergo in tantum disputandi periculum projecisti, cum disputare non noveris? Aut si nosti, cur dialecticus dialecticam criminaris, ita vel temerarius, vel ingratus, ut aut imperitiam, qua vinceris non refrænes, aut doctrinam qua juvaris accuses? Utuntur quippe non semel contra nos disputationibus iidem Hæretici, qui in disputando peritiam criminantur. Et Arnobius Junior in conspectu objicienti Serapioni quod in dialecticum sophisma prorumperet, ita occurrit: *dialecticum sophisma duas facies recipit; & ut verum probetur quod adstruitur, & non verum ex aliqua parte arguatur.**

Postremo contra eos, qui Theologos dialectica utentes, tanquam fallaces & captiosos admonent esse vitandos, ita ex Augustino argumentor. Paulus Apostolus cum Stoicis, qui certissime dialectica arte pollebant, non semel contulit; vel ipse dialecticus erat, vel, si non erat dialecticus, & Christiano homini dialectici sunt evitandi; ergo ipse a dialecticis sese subduxisset, quod non fecit. Si fecit & ipse dialecticus; ergo non est dialectica, tanquam vitium in Theologo viro redarguenda. Stoici certe, inquit citato lib. cap. 14. S. Pater, *maxime dialectici fuerunt: cur Apostolus Paulus, ne conferrent cum illo, non eos cautissime devitavit, & vestros Episcopos laudas, quod nobiscum velut cum dialecticis nolint habere sermonem? Aut si & Paulus dialecticus*

Ellicus erat, & ideo conferre cum Stoicis non timebat, quia non solum acute disputabat sicut & illi, sed etiam veraciter, quod non illi; jam cave cuiquam dialecticam pro crimine objeceris, qua usus Apostolos confiteris. Idem argumentum urget cap. xviii. ejusdem libri, de Christo.

In cujus argumenti confirmationem addere possumus exemplo Pauli, imo & Christi, dialectica usus fuisse Ecclesiæ Patres, præsertim Justinum in Apologia pro Christianis, Athanasium contra Arianos, Basilium & Gregorium Nyssenum contra Eunomium, Cyrillum Alexandrinum in Dialogis, Hieronymum contra Helvidium, & Vigilantium, sanctissimum denique parentem Augustinum contra Academicos, Manichæos, Donatistas, & Pelagianos, ut in hujus decursu Operis horum, aliorumque Patrum magna ex parte construendi argumentis, facile quisque conjiciet.

PROPOSITIO II. Non superfluit, sed viro Theologo plurimum confert etiam naturalis Philosophia.

Hanc propositionem probabo 1. Scripturarum divinarum auctoritate. Sapientiæ vii. v. 12. Salomon de se ait: *Et letatus sum in omnibus, quoniam antecedebat me ista sapientia, & ignorabam quoniam horum omnium mater est.* Et quænam hæc Sapientia fuerit, v. 17. exponens sequitur: *Ipse enim dedit mihi horum quæ sunt scientiam veram: ut sciam dispositionem orbis terrarum, & virtutes elementorum, initium, & consummationem, & medietatem temporum, vicissitudinum permutationes, & commutationes temporum, anni cursus, & stellarum dispositiones, naturas animalium, & iras bestiarum, vim ventorum, & cogitationes hominum, differentias virgultorum, & virtutes radicum, &c.* Paulus etiam ad Coloss. i. v. 28. *Quem nos annuntiamus, inquit, corripientes omnem hominem, & docentes omnem hominem in omni sapientia, divina nempe, & humana.* Unde sic arguo: Verus Deus proculdubio utilia docet, nec unquam ipse vanam, ac perniciosam scientiam rationalium hominum menti indidit: utiliter quoque ad homines perficiendos ea adsumitur sapientia, quam proprio usu Apostoli commendarunt. Sed Deus bonorum omnium largitor etiam naturalem rerum notitiam docuit Salomonem, eamque Paulus in corripiendis, formandisque neophytis adhibuit. Ergo hæc Theologo non vana erit, & noxia, sed perutilis, & accomoda.

Secundo assero Sanctorum Patrum momenta. Clemens Alexandrinus lib. 1. Strom. docet, *Philosophiam ante Domini adventum Græcis ad justitiam fuisse necessariam; nunc autem ad Religiosam pietatem utilem esse, eo quod prævia quadam eruditio sit iis, qui fidei per demonstrationem fructum colligunt: rursus, philosophiam ipsam ad sapientiam comparandam conducere.* Plura ex Clemente collegit Canus lib. ix. de loc. Th. cap. v. ac Petavius in Prolegomenis cap. iv. Accedit

To. I.

B

Hila-

Hilarius, qui lib. 12. de Tr. ait: *Fidem non nudam Apostolus, atque inopem rationis reliquit: quæ quamvis potissima ad salutem sit, tamen nisi per doctrinam instruat, habebit quidem inter adversa tutum refugiendi recessum, non etiam retinebit constantem retinendi securitatem, eritque ut infirmis sint post fugam castra, non etiam ut arma habentibus adsit interrita fortitudo.*

Uterius sic ab exemplo argumentor. Philosophica, naturalique ratione & Christus, & Apostoli, maxime Ecclesiæ Doctores sæpe sapius, veritatem firmarunt: non est igitur Theologis Philosophiæ usus interdicendus. Ant. pr. 1. Christus Dominus Matth. xx1 1. v. 20. ex imagine numismatis infert Cæsari solvendum esse tributum. 2. Paulus Ep. 1. ad Corinth. cap. 12. probat, non opus esse, ut omnes in Ecclesia omnium gratiarum genere, ac scientiarum munere polleant, quod in unoquoque corpore diversa sint membra, quorum singula suam habent energiam: nam, *si totum corpus*, inquit v. 17., *oculus; ubi auditus? si totum auditus; ubi odoratus?* &c. 3. Gregorius Thaumaturgus eruditum de Anima conscripsit volumen solis Philosophicis argumentis compactum rogatus a Tatiano, quem sic alloquitur: *Justi, præstantissime Tatiane, ut cum efficacibus argumentis, sive demonstrationibus, sermonem, atque disputationem de anima tibi conscriptam mitterem, eaque in re nullis scripturarum uterer testimoniis.* Athanasius sacrilegos homines, qui ex divinitatis doctrina cauponariam exercebant, redarguit, ut in Orat. de ejus laudibus narrat Nazianzenus, *texto flagello, & probabilibus argumentis ad persuadendum accomodatis.* Origenes studia Philosophiæ detrectantibus, ut scribit Euseb. Historiæ Eccl. lib. v1. cap. 15., reposuit se naturalibus scientiis sedulam dedisse operam, sed faciem sibi prætulisse Apostolicos doctores Panthænum, Heraclam, aliosque. Didymus de se in suis ad Ecclesiasten Commentariis fatetur Grammaticæ, Rethoricæ, ac Philosophiæ operam non exiguam navasse; ac de postrema ait: *Nec minus adeunda Philosophia est, ut facilis suppetat demonstrationum facultas in iis, quæ contraria videntur.* Quod de Didymo narrat etiam in v111. Hist. Tripart. cap. 8. Theodoretus. Augustinus denique, ut Melitonem, Justinum, Lucianum, Damascenum, aliosque innumeros prætermittam, nomine lib. x1x. de Civit. Dei cap. 4. & in toto Opere Imperfecto contra Julianum, ex morte, hujusque vitæ miseriis demonstrat Originale peccatum ab Adæ posteris contrahi? Christus ergo, ac PP. quod demonstrandum erat, etiam philosophia, ac naturali ratione plura ad fidem moreque pertinentia confirmaverunt.

Postremo nonnullas hujus assertionis rationes producā. Harum prima sit: Theologo frequenter occurrit, ut hæc vocabula Generatio, Processio, Hypostasis, Libertas, Natura, aliaque plura, quæ partim sermonis usus, partim vero hæreticorum innoxia versutia, usurpare

pare debeat ratiocinando : Atqui horum notionem ideamque suppeditat philosophia : Ergo hæc illi multum affert commodi , & ancillatur . 2. Cuique ut ad fidem veniat exhibenda sunt , quæ illi videntur familiaria ; uti Paulus in medio Areopagi ex ipsa aræ inscriptione occasionem arripuit nunciandi Evangelium , neque cum Epicureis ac Stoicis differere detrexit , prout Actor. narrat historia cap. xvii. v. 17. & 23. factus Hebræis Hebræus , Philosophis Philosophus , ut omnes lucrificaret : At etiam Theologus congruere debet aliquando cum acutissimis Philosophis , qui solius rationis reguntur : Congruum est ergo ut eos naturalibus , physicisque argumentis alliciat , ac trahat . 3. Supernaturalis scientia , etsi philosophiam supergreditur , huic tamen non adversatur ; fides etenim rationem superat , non evertit : Ergo si contra doctrinam Salvatoris hostes physici insurgant argutationibus , debent naturali Scientia retundi , ostendendo huic eandem Christi Doctrinam non esse contrariam . Audias Clementem Alexandrinum in 1. Strom. Porro *Græca philosophia ad Doctrinam Salvatoris accedens , non potentiorē facit veritatem , sed sophisticam adversus eam impressionem imbecillum reddens , propulsansque dolosas contra veritatem insidias , congruens vineæ sepimentum , & vallum dicitur .*

PROPOSITIO III. Non debet Theologus naturali solummodo duci philosophia , sed illam in obsequium fidei captivare revelationibus divinis subnixus .

Assertum istud , quod maxime notari vellem , eo namque præcipua corruunt objecta adversariorum , probo 1. ex Sanctis PP. Joannes Damascenus Dialogorum primo ait : *Porro decet Reginam ancillarum quarundam uti ministerio . Accipiamus igitur doctrinas istas tanquam veritatis famulas , & impietatem , quæ tyrannico dominatu sibi eas usurpaverat , procul amandemus : neque bono male utamur ; nec ad circumveniendos simplices convertamus artem illam disputandi .* Ac S. Pater Augustinus Epist. ccxxi. 1. , iterato monet , *U: in quibusdam rebus ad doctrinam salutarem pertinentibus fides præcedat rationem .* Cyrillus pariter in lib. iv. Commentariorum ad Joannem , *Post fidem , inquit , cognitio sequitur , non illam antecedit .*

Deinde probatur ratione . Etenim discursus Theologicus , ut scribit Quæst. 1. art. 2. Gregorius noster Ariminensis , cui ceteri omnes assentiuntur , constat ex revelatis propositionibus , vel saltem ex altera hujusmodi . Debent enim alia esse principia Theologiæ naturalis , alia supernaturalis , atque , ut docet Magister Sententiarum in Prologo , Fides nostra Davidicæ turris clypeis commuari : Atqui Theologus principiis naturalis philosophiæ hæret tantum , quando asserta argumento a sola ratione petito corroborat : Ergo si Philosophiæ tantum insit , nunquam Theologico procedet discursu .

PROPOSITIO IV. Scholastica methodus , ad quam Petrus Lombardus

duſ Theologiam revocavit, non eſt abſolute neceſſaria, bene tamen perutilis, & accommoda.

Conſtat prima pars; ſiquidem ante Magiſtrum pluribus ſæculis Fides perſeveravit, floruit maxime virtus, Patres Orthodoxi quamplurimos Hæreticos confutarunt, quamquam non erat præſens methodus Theologicas res pertractandi. Conſtat etiam altera pars; quippe optandum eſt, ut in tradendis diſciplinis confuſio, quantum fieri poſteſt vitetur, agendo primum de natura & exiſtentia objecti, deinde de ejus proprietatibus, & conſequenter de reliquis ad idem ſpectantibus, ſingula ad certa capita revocando: Sed hoc præſtat Scholaſtica methodus: Ergo, &c.

PROPOSITIO V. Theologia Scholaſtica, quidquid reclament nebulones, eſt utilis, neceſſaria, & ad proſtigandas hæreſes, fidemque fervandam aptiſſima.

Sequitur aſſertum ex dictis, ac oſtenditur primo: Vera Scholaſtica Theologia ea eſt, quæ ad oracula Scripturarum, ad Apoſtolorum traditiones, ad antiquorum teſtimonia Patrum addit pro arguendis erroribus, ac veritatibus confirmandis aliqualem uſum dialecticæ: quæ nititur quandoque naturali philoſophiæ, ut ſapientes fidei lumine deſtitutos ſibi captivet, & in obſequium veritatis devincat: quæ demum diſſerendo non vagatur inordinate, ut facere cogeantur antiqui modo unum dogma, modo alterum, cum varii errores inſurgerent, vindicando; nam ego iſtam de Theologia ideam habeo, quidquid contendunt qui in frivolis, minimisque præcipuam operam perdunt. Sed dialectica in unaquaque ſcientia apprime requiritur, ut apparet ex priori propoſitione: naturalis philoſophia, ut oſtendi propoſitione ſecunda, a Theologo jure adhibetur; atque recta methodus, præterquamquod accidentaria eſt, nec ſcientiæ naturam immutat, ut dicebam nuper, ſcilicet propoſitione præcedenti, a cordato viro rejici non debet. Ergo Scholaſtica Theologia utilis eſt, neceſſaria, & ad fidem juvandam idonea.

Comprobatur Concluſio Summorum Pontificum auctoritate; nam Urbanus IV., Innocentius VI., & Joannes XXII. Summam D. Thome plurimum commendaverunt, ut videre poteſt apud Contentionum illius doctriinæ deſenſione, & Eminentiffimum Gotti *Queſt. 1. dub. 111. §. 2. num. xiv.* Innocentius IV. mandavit Alexandro Aſenſi ut Summam Theologicam ederet, quam Alexander IV. ſuo probavit diplomate. Sixtus V. in Bulla, in qua D. Bonaventuram connumerat eximiis Eccleſiæ Doctõribus, ait: *Hujus tam ſalutaris Scientiæ cognitio, & exercitatio ſemper certe maximum Eccleſiæ adjumentum afferre potuit ſive ad Scripturas ipſas vere, & ſane intelligendas, & interpretandas; ſive ad Patres ſecurius, & utiliùs perlegendos; ſive ad varios errores & hæreſes detegendas, & refellendas..... Quanto igitur magis illi, ideſt*

ideſt Heretici, hanc munitiſſimam Scholaſticę Theologię arcem oppugnare, & evertere conantur, tanto magis nos deceſ hoc invictum Fidei propugnaculum defendere, & hereditatem Patrum noſtrorum conſervare, & tueri. Magnifice pariter hanc Theologiam extollit Conc. Lateranenſe 1v. damnans ejus impugnatoſem Abbatem Joachimum: Vienenſe Concilium de parvulorum Baptiſmo: & Sacra Tridentina Synodus ſeſſ. 5. de Reform. cap. 1. ubi præcipit ut hujus Theologię inſtituantur Magiſtri indiſta præbenda ac ſtipendio.

Tandem quis ſibi met perfuadeat inutile eſſe ſcientiam tanto labore a Viris doctiſſimis, ac ſanctiſſimis comparatam; cujus toto terrarum orbe viget uſus; quam univerſæ celebriores Academię profitentur; & quæ in dies clariſſimarum Virorum exercet ingenia? *Erit ergo Theologia Scholaſtica*, ut quidam ait apud Franciſcum Henno quæſt. viii. concl. *Eccleſia lumen, Fidei columen, trutina veritatis, errorum clava, fulmen hæreſum, fax myſteriorum, & Catholiçæ doctri-næ lapis lydius*. Fortaſſe vellent Theologi, ut acerbiori ſtylo facultatem ſuam vindicaſſem, ac detractoribus vicem reddidiſſem; ſed frugi ſcriptori, qualem me eſſe deſidero, eſt a loquacitatis libidine temperandum.

C A P U T III.

Solvuntur ea, quæ contra Scholaſticen obijciuntur.

EA modo, quæ contra vindicatam hætenus Theologiam ab ejus impugnatoribus opponuntur, ſunt diluenda: quorum aliqua ſolam philoſophiam perſtringunt; aliqua vero in methodum, rationemque Scholaſticorum invehuntur. Sunt autem iſta.

Opp. I. Philoſophiam, humanamque ſapientiam nobis ſacri libri interdiciunt. Ergo huic nihil eſt operis impendendum. Prob. ant. Nam Eccleſiaſtes cap. 1. 13. legitur: *Et propoſui in animo meo quærere, & inveſtigare ſapienter de omnibus, quæ ſiunt ſub ſole*. Hanc occupationem peſſimam dedit Deus filiis hominum. Et Apoſtolus ad Colofenſ. 1. 8. Videte, ne quis vos decipiat per philoſophiam, & inanem ſullaciam, ſecundum traditionem hominum, ſecundum elementa mundi, & non ſecundum Chriſtum. Et 1. ad Corinth. cap. II. v. 4. *Sermo meus, & prædicatio mea non in perſuaſibilibus humanæ ſapientia verbis, ſed in oſtenſione ſpiritus, & virtutis: ut fides veſtra non ſit in ſapientia hominum, ſed in virtute Dei*. Cujus generis plura in divinis occurrunt literis.

Confirmatur I. Ex Patribus; etenim S. Baſilius ſic libro 1. contra Eunomium invehitur: *Hæc illum ex mundi ſapientia garrire, a qua*

qua in præceptis abreptus hanc sermonis novitatem ingressus est, non est difficile monstrare. Aristotelis enim sunt, ut qui legerunt testari possent, sermones illi de habitu, & privatione in libro ejus, qui inscribitur Categoriarum. Et infra de iis, qui sæculari humanaque reguntur sapientia exponit illud Psalmi cxviii. v. 85. Narraverunt mihi iniqui fabulationes, sed non ut lex tua. Consimilia habet Gregor. Nyssenus lib. 2. contra eundem Eunomium, & Cyrillus Alex. Thef. xi. Quid vero de cavenda Philosophia non ait Tertullianus? Is lib. de Præscript. cap. vii. dialecticam appellat coactam, duram, versipellē, molestam operariam contentionum, ac artificem destruendi; & demum esse ab Ecclesia eliminandam his verbis affirmat: Quid ergo Athenis, & Hierosolymis? quid Academia, & Ecclesia? quid Hæreticis, & Christianis? Nostra institutio de porticu Salomonis, qui & ipse tradiderat Dominum in simplicitate quarendum. Viderint qui Stoicum, & Platonicum, & Dialecticum Christianismum protulerunt. In libro quoque de Anima non semel clamat, auferendam esse argumentationem. Item Leo Magnus sermone v. de Nat., Abigatur, inquit, terrenarum caligo rationum, & ab illuminata fidei oculo mundana sapientia fumus abscedat.

II. Confirmatur ab exemplo. I. quoniam Apostoli, qui tamen veri fuerunt Theologi, neque Dialecticam, neque Philosophiam habuerunt, licet juxta Domini pollicitationem illos Spiritus Sanctus omnem docuerit veritatem. 2. Augustinus disputans contra insaniam Manichæorum, qui gloriabantur se initium, finem, & mundi causam adinvenisse, ait lib. 1. de Actis contra Felicem cap. 15. *Non legitur in Evangelio, Dominum dixisse, mitto vobis Paracletum, qui vos doceat de cursu Solis, & Lunæ. Christianos enim nos facere volebat, non Mathematicos. Sufficit autem, ut homines de iis rebus, quantum in schola didicerunt, noverint propter humanos usus. Ad usum ergo Theologiæ humanæ rationis doctrinam nihil prodesse ex Augustino didicimus.* 3. Narrat Socrates Historiarum lib. 1. cap. 8., quod cum in Nicæna Synodo Dialectici quidam argumentantes omnia turbarent, ita illos simplex quidam Laicus compellavit: *Christus & Apostoli non artem nobis Dialecticam, nec inanem versutiam tradiderunt, sed operam, ac simplicem sententiam, quæ fide bonisque actibus custoditur. Quibus dictis assenserunt omnes, & ipsi Dialectici æquiore animo quieverunt. Hinc ista emergit argumentatio: Si Dialectica ac Philosophia Theologo aliquid afferret utilitatis & commodi, has disciplinas docuisset Apostolos Spiritus Domini, eisque Concilia ac Patres insurgentes hæreses depulissent: Atqui oppositum omnino accidit: Ergo &c.*

Rursus confirmatur tertio. A philosophia deteriora hæresum portenta promanarunt: Ergo tantum abest, ut Ecclesiæ sit utilis, quin potius ei nocet quammaximè. Præb. antecedens auctoritate, & expe-

experimento : Auctoritate , nam Tertullianus lib. de Anima cap. 3. Philosophos appellat *Patriarchas Hæreticorum* : Et cap. v. 11. de Præscript. hoc discrimen statuit Hæreticos inter & Catholicos , quod hi in simplicitate Dominum quærant , illi autem inferant *Aristotelem* , qui illis *Dialecticam instituit* . Ambrosius lib. 1. de Fid. cap. 3. & in Ps. cxv. 11. scribit , Arianos in perfidiam ruisse , quod elegerint disputationum tendiculas *secundum Dialecticæ disciplinam* : & S. P. Aug. serm. 81. de Tempore asserit ciniphes , qui tertia plaga vexarunt Aegyptios , designare Philosophos simul , & Hæreticos , qui verborum *stimulis animas terebrant* . Accedunt experimenta ; etenim Aristotelicis inventis ad exitium , ac pestem abusi sunt Arius , Eunomius , Aetius , ut scribunt Rufinus , Basilius , Gregorius Nyssenus , Epiphanius , & Socrates . Quapropter anno 1204. Philippo Augusto Rege Francorum , Aristotelis Metaphysicam Parisiis damnatam esse narrat in libro de Gestis Philip. Rigordus . E secta quoque Platoniorum prodiisse omnes fere superiorum ætatum hæreses Valentinus , Marcionis , Manetis , aliorumque nebulonum , initio primi libri de Trinitate ostendit Petavius . Auctoritate ergo , atque experimento compertum est singulas hæreses philosophorum tendiculis fuisse confutas .

Resp. ad argum. nego ant. Sacræ enim literæ volunt Ecclesiæ Doctorem idoneum esse ad hortandum , docendum , corripiendum , ad distinguendas versutias sermonum , ac respondendum stultis juxta stultitiam suam . Monent tantum ne ad humanarum rationum momenta Christiana Fides potissimum exigatur ; quod & nos præcepimus superiori propositione 111. Itaque ad locum Eccles. repono , Ecclesiasten de felicitate hujus vitæ verba facere , & diligenti creaturarum omnium inquisitione hoc unum evincere , quod omnia vana sint , obnoxia mutationi , ac spiritus afflictio , ita , ut in nullo hujus sæculi bono rationalis hominis vera consistere valeat beatitudo , idque contra eos , qui hanc sive in voluptatibus , sive in affluentia deliciarum , sive in humana locaverunt sapientia . Propterea non dixit *occupationem pessimam* esse scrutari humana intelligentia cælestem , terrenamque creaturam , sed in ista occupari ; idest tanquam finem illam habere . De quo locum quod apertissimus sit cuique legenti , tum quod disertissime , ut cetera omnia , expendatur a Cano lib. 1x. cap. 9. satis mihi videor dixisse . Alterum Pauli ex Epist. ad Coloss. immerito in nos detorquent , cum ibi hortetur fideles , ut caveant ab Epicureorum secta ; quæ per inanes fallacias Dei providentiam evertens a vera religione , quam Atheniensis concukaverat Epicurus , plurimos retrahebat . Explodit ergo Paulus illam dumtaxat philosophiam , quæ adhæret falsis improborum hominum traditionibus . Quod etsi vulgari populo Apostolus vetaret philosophiam , non idem iudicium ferendum esset de Pastoribus , & Doctoribus ; quorum non solum est credere , sed etiam redere

dere rationem poscentibus. Enim vero neque nos universis Ecclesiæ membris necessariam ducimus esse Theologiam, sed tantummodo Corpori. Addo, nos Philosophiam eodem fine in Scholis recipere, videlicet, ne quis nos seducat, & *decipiat per philosophiam, & inanem sapientiam*; facilius enim evitantur jacula, quæ prævidentur.

Ad 1. Confirmationem dico Patres illam tantum philosophiam, abjicere, quæ sola naturali ratione arcana fidei scrutatur; necnon fallacem Dialecticam, quæ tricis & sophismatibus ingenia implicat tardiora. Et merito, cum nata vix religione, Christiana Fides Paganos habuerit irrisores, hostesque implacabiles Hæreticos, qui in eam Platonis & Aristotelis nefaria dogmata inducere tentaverunt ex horum philosophorum officina prodeuntes. Ceterum Philosophiam, & Dialecticam ancillam fidei, & veritatis indagatricem non semel commendaverunt, quippe qui optime noverant esse contra Sophistas veritatis sepimentum. Basiliius ergo, Nyssenus, Cyrillus eo pacto loquuntur contra Arianos, qui per ideam humanæ generationis divinum Verbum creatum esse temere contendebant; statuebantque, ut ait lib. 1. de Fide Divus Ambrosius, *Omnem vim venenorum suorum in Dialectica disputatione*. In eo sensu ait Leo Magnus illuminatæ fidei oculum non esse fumo mundanæ sapientiæ offuscandum. Facillimum est ergo veteres inter se conciliare, si dicamus reprobari ab illis usum Philosophiæ tanquam pestilentem, ac noxium, quando sola credendi ratio in humana ratiocinatione concluditur; & cum ad circumveniendo rudes callida, & versuta Dialectica identidem usurpatur: non vero procul amandandas esse mundanas disciplinas, cum præsidio sunt Religioni, eique tanquam ancillæ deserviunt.

Addam nonnulla de Tertulliano, cujus præsertim testimonio inimici Scholasticæ abutuntur. Is citato libro de Præscript. Philosophos carpit, qui *gloriæ solius, & eloquentiæ libidinosi si quid in sacris Scripturis offenderunt digestum pro iustitio curiositatis ad propria vertuntur*: qui *assèlant veritatem & assèlendo corrumpunt*, qui *de una via obliquos multos, & inextricabiles tramites sciderunt*; tales enim fuisse illius ætatis Philosophos, affirmat cap. XLVII. Apologetici. Quos ego non philosophos dixerim, sed philodoxos. Et in libro de Anima loquitur contra asserentes eam esse mortalem pertinaciter innixos solis sensuum animadversionibus, quibus observabant homines nasci, crescere, & mortalia appetere ad vitam alimenta: cujusmodi erat quidam medicus Soranus nomine; de quo cap. VI. ejusdem libri. At Tertullianum minime usum improbasse philosophiæ satis constat. Primo quia in lib. de Resurrect. Carnis asserit, quod, *nos quoque provocant Hæretici philosophari*: quibus verbis, ait in Notis ad cap. VII. de Præscript. Jacobus Pamelius, *necessariam esse aliquam Philosophiæ scientiam satis indicat*. Deinde in eodem libro aperte sese explanat ubi ait:

Est

Est quidem & de communibus sensibus sapere in Dei rebus, sed in testimonium veri, non in adiutorium falsi: quod sit secundum divinam, non contra divinam dispositionem; quædam enim & natura nota sunt, ut immortalitas animæ, &c. Præterea Tertullianus ipse disputans contra Marcionem probat dari non posse duo summa magna, quia hoc est esse summum magnum par non habere: probat lapsum hominis Deo non esse imputandum, quoniam Deo coeternam esse bonitatem apparet ex universi factura: probat materiam non esse Deo coeternam, quia is debet esse causa omnium, ut illum Deum confiteri possimus. Immortalitatem vero animæ nonne demonstrat in libro de Resurrect. Carnis ex Platone, ex communibus sensibus, ex hominum conscientia? Invehitur ergo in eos tantum, quibus nulli assentiri dogmati libet, quod humana ratione non capitur; vel qui ventosa sapientia auram captant, & circumveniunt simplices, homines non solum fidei, sed etiam Reipublicæ perniciosissimi, expulsi olim a Thebanis, a Spartiatis, ab Argivis, ut idem Tertullianus scribit in suo Apologetico, atque imperante Domitiano ab ipsa Roma, ut refert Eusebius in Chronico.

Ad 2. Confirmat. Resp. nullo ex adductis momentis improbari in Theologo physiologiam. Nam primum ab exemplo Apostolorum in Adversarios retorquetur. Apostoli non fuerunt Grammatici, non eloquentes, sed ex tempore ad Philosophos ac Tyrannos revincendos sapientissime loquebantur. Ergo si exemplum placet Apostolorum, ignorare debemus Grammaticam, esse barbaros, & repente colloqui, implentes in nobis promissum Christi, Matth. x. v. 19. *Nolite cogitare quomodo, aut quid loquamini*. At non valet in nobis exemplum Apostolorum; nam illis omnia divinus Spiritus suggerebat: nos autem sumus hoc peculiari munere destituti. In secundo, ac tertio non est cur diutius immoremur; nam Augustinus jure reprehendit Felicem Manichæum; cum nihil pertineat ad Christianam Fidem, de qua cum hæretico disputat, esse Mathematicum, & siderum cursum metiri: & Socrates loquitur de quibusdam dialecticis, qui licet Scripturarum auctoritatem reciperent, spretis divinis literis, solis paralogismis conabantur adstruere Filii divinitatem.

Ad ultimam Confirmat. dist. ant. A philosophia promanarunt hæreses, cum aliqui sacras literas, ac traditiones arte dialectica tentarent convellere, & credendi regulam in sola humana sapientia constituerunt; conc. E philosophia hæreses derivarunt, quum posita in divinis revelationibus ratione credendi, humanis disciplinis usi sunt in fidei præsidium ac fulcimentum, neg. Jam habes quid respondeas ad utramque hujus antecedentis probationem. Tantum nota, Magdeburgenses inter Tertulliani errores collocare, quod affirmaverit ex philosophia ortas hæreses; ut observat Pamelius in Notis loc. cit. Sed

Tò.I.

C

nos

nos Tertullianum, aliosque commodius interpretatur.

Secundo respondetur, Hæreticos abuti etiam Scriptura sacra, ut scribit Hilarius ad Constantium Augustum: *Nemo hæreticorum est, qui se non secundum Scripturas prædicare ea, quibus blasphemat, mentiatur*; & tamen sacras literas noxias, & inutiles esse nullus dixerit.

Opp. 2. Scholastica Theologia Fidei Catholicæ adversatur. Ergo merito ipsi litem plures intentant. Pr. ant. Scholastices non est certe ad credendum necessaria; neque ad fidem formandam exigitur, dicente Tertulliano de Præscript. cap. 8. *Nobis curiositate opus non est post Christum Jesum, nec inquisitione post Evangelium*. Deinde ejus perfectionem minuit, cum perfectius sit simpliciter credere, quam veritatem inquirere: unde Cassianus serm. de Fide agebat: *Quid mihi querere quomodo verum sit quod Deus dixit, cum dubitare non debeam, quin verum sit quod Deus dixit*? Ad hæc tollit ipsius fidei quodcunque meritum, auctore Gregorio Hom. 26. *Fides amittit meritum, ubi ratio præbet experimentum*. Denique removet a Dei cultu, cum viri docti videantur contemplationi veritatum æternarum minus dediti, & ad perfectam vitam capeffendam parum idonei. Sed facultas, & ars quæ ad fidem non exigitur, quæ minuit ejus perfectionem & tollit meritum, quæ reddit hominem erga Deum tepidiorem, Fidei censenda est adversari: Ergo, &c.

Resp. nego ant. Ad ejus probat. singulas propositiones distinguo: Scholastices non exigitur ad Fidem, id est, non conducit ad nova dogmata inveniendâ; Esto. id est, nullo modo deservit ad defensionem, & explicationem eorum dogmatum, quæ sunt tradita; nego. Perfectius est simpliciter credere, quam veritatem scrutari libidine rixandi, & contentionis prurigne, co. ad ipsius Fidei præsidium, & proximorum institutionem, nego. Fides amittit meritum, ubi ratio præbet experimentum rationis, & ubi hoc experimentum queritur motivo incredulitatis; ut in Thoma, qui noluit credere Christum resurrexisse, antequam vulnera ejus palpasset, & de quo laudato loco sermonem habet Gregorius, id quidem verum est: ubi additur experimentum rationis ad revincendam obsecutorum perfidiam; id falsum est. Viri docti quandoque tepidiores sunt ob doctrinam, quoniam hæc seipsa a Dei cognitione, & amore retrahat; Est propositio Moliniana sexagesima, quarta ab Innoc. XI. proscripta in Bulla, *Cælestis Pastor*, & injuriosa innumeris Ecclesiæ Patribus, qui pietatem ac sapientiam conjungere; opposita quoque naturali rationi, quæ docet majorem esse Dei amorem, ubi major est Dei cognitio. Removet aliquando a Dei cultu propter cupiditatem, vel curiositatem, cui nimis addicitur; concedo hanc propositionem, & nego consequentiam.

Opp. 3. Saltem verum est, quod contra Scholasticos objiciebat Pappus Argentoratensis, Scholasticos ipsos nunquam inter se convenire,

re,

re , atque de rebus etiam ad fidem pertinentibus scandalosa contentione differere .

Resp. Id nobis ab Hereticis opponi , quod in eos adamussim quadrare compertum est , cum ad invicem contentionibus pugnent insensissimis , & ex una illorum secta innumere statim prodierint ; ita ut repeti debeant verba Hilarii ad Constantium : *Periculosum nobis , atque miserabile est , tot nunc Fides existere quot voluntates : & tot nobis doctrinas esse quot mores* . Vide de innumeris Novatorum placitis Historiam Variationum Jacobi Bossuetii . Nos autem duo questionum genera distinguimus , alterum earum , quæ dogmata fidei comprehendunt , cujuscmodi sunt , an Deus sit unus , an sit in divinis Personis Trinitas , an Verbum carnem assumpserit ; alterum illarum , quæ in utramque partem absque fidei discrimine defendi possunt , veluti quando de virtuali ac formali attributorum divinatorum distinctione , de præcipua Incarnationis Dominicæ causâ , de simultanea rerum productione altercamur . Neque nos latet , Sanctum parentem Augustinum lib. de Peccat. Orig. cap. 23 . scripsisse : *Longe aliter se habent questiones istæ , quas esse præter fidem arbitratur , (Cœlestius) quam sunt illæ , in quibus salva fide , qua Christiani sumus , aut ignoratur quid verum sit , & sententia definitiva suspenditur , aut aliter , quam est , humana , & infirma suspitione conjicitur* . Itaque in iis , quæ ad fidem spectant , quoniam certa nituntur revelatione , penitus consentimus ; sed in iis , quæ accipiti herent fundamento , iniquus est quisquis in nobis unanimum sensum expostulat , maxime dum is in fidei capitibus dissentit ab aliis .

Dices : Quid sibi vult in his pertractandis illa turpis , & lutulenta vocabulorum barbaries , *Entitas , quidditas , opus operatum , materialiter , formaliter* , aliorumque plurium , quibus a Scholasticis suo nitore , ac puritate expoliata est Theologia ?

Resp. Et his vocabulis suam subesse ideam , eaque , licet obscuram reddant latinitatem , tollere sermonis equivocationem , & planiori via exorta diffidia dirimere . Recordamur scripsisse Augustinum Enarrat. in Ps. 36. *Non timeamus ferulas Grammaticorum , dum tamen ad veritatem solidam , & certiore perveniamus* : & lib. 4. de Doctrina Christiana cap. 11. *Bonorum ingeniorum insignis est indoles in verbis verum amare , non verba* : tum in lib. contra Adim. cap. 71. *Mundanis scriptoribus tota cura de verbis est ; nostris de rebus* . Attamen propter eos , qui ad Religionem , optimosque mores trahendi sunt & alliciendi , ornatum delectumque verborum laudamus ; quamquam ego eloquentiam nunquam ostentans contentus ero duntaxat , ut quod intelligo declaretur . *Quoniam inter se habent nonnullam similitudinem vescentes , atque discutes ; propter fastidia plurimorum , etiam ipsa , sine quibus vivi non potest , alimenta condienda sunt* ; inquit , S. P. cit. lib. IV. de Doctrina Christiana cap. 11.

Opp. 4. Argumentorum tria sunt genera, primum, quod dicitur *demonstratio*, alterum proprium dialecticę, ac *probabile*, tertium ad decipiendum, idest *sophisma*: Atqui ex his nullum in divinis rebus explicandis afferre potest utilitatem: Ergo debet Theologus omnium argumentorum genera deponere, & argumentantibus Scholasticis nuneium mittere. Minor probatur. Demonstratio propositiones exigit confesas, & certas, quę sint conclusionem notiores, & quę vel inductione, vel sensibus, vel experientia reddantur manifestę; quarum nulla in Fidei dogmatibus potest occurrere, eo quod ad contemplandum difficiles sunt rerum divinarum rationes. Syllogismus vero ex opinabilibus, & verosimilibus procedens ad veritatis inquisitionem valde est imbecillis. Atque sophisma, & fallax argumentatio in absurda dilabitur, & veritatem minutis ambagibus dissecat: unde elegantissime in Pręfat. ad Apoth. ait Prudentius:

Idcirco mundi stulta elegit Deus,

Ut concidant sophistica.

Igitur nulla argumentorum species videtur cum Theologicis disciplinis miscenda. Ita contra Scholasticos irascitur Gręculus Scriptor Nicephorus Gregoras.

Resp. nego min. Ad probationem dico veram demonstrationem exigere quidem principia, quę conclusionem sint notiora; sed minime opus est, ut hæc noticia manifesta sit sensu, atque experimento; nam ad scientiam per demonstrationem comparandam sat est, si principia nota sint lumine superioris scientiæ, quemadmodum *Prospectiva procedit ex principiis notis per Geometriam, & Musica ex principiis notis per Arithmeticam*, ait D. Thomas qu. 1. art. 2. Porro Scholasticę Theologię principia fide, ac revelatione nota sunt, ideoque demonstrationes poterunt inde deduci. Si vero intendat Gregoras, has demonstrationes Catholicę Fidei non suffragari; jam congruum in solutione 2. Oppos. habuit responsum. Argumenta vero probabilia proferuntur a nobis vel ad solam veritatis ampliorem confirmationem, vel ad probandum ea, quę licet salva fide possimus ignorare, utiliter tamen, ut dicam infra, discutiuntur. Sophismate denique non utimur ad implicandos simpliciores, sed ad ipsos compescendos Sophistas.

Contra Gregoram producant Petavius cap. v. Proleg. & Auctor Bibliothecę Theologicę libro 2. sect. 1. Emmanuelem Calecam, qui robustiori oratione contra tetricos, qui nolebant processionem Spiritus Sancti a Patre, & Filio argumentationibus concludi, quemadmodum præfato argumento contendit Nicephorus, plura veriora, ac solidiora depromit. Ostendit hunc esse sibi contrarium, quoniam contra argumentationem loquitur argumentando: demonstrat Paulum argumentatione redarguere eos, qui ex rebus aspeçtabilibus noluerunt agnoscere Creatorem: usum esse syllogismi etiam Christum Lucę cap.

x1. v. 20. & Matth. cap. 22. v. 32.: reprehendendos fore Græcos omnes, qui Processionem Spiritus a solo Patre argutissime conantur inferre, si nefas est processionem ab utroque argumentis conficere: colloquium denique, & communionem de medio tolli, si a Theologia, syllogismi penitus excludantur. Hæc breviter delibavi; propterea quod argutatio Gregoræ, si firma esset, efficeret istud tantum, non esse Scholasticen veram scientiam, quod cum ex dictis, tum ex sequenti cap. poterit quisque conicere falsum esse.

Opp. 5. Recens admodum est in Ecclesia Scholasticæ; atque, ut ei majorem tribuamus antiquitatem, Divi Joannis Damasceni ætatem nequaquam præcedit. Supervacua est igitur, & ad labefactanda bonorum ingenia illepipe a Philosophorum Commentatoribus est adinventæ.

Resp. dist. ant. Nuperrima est, ac junior, quantum spectat ad methodum, ac partium dispositionem, quæ pro Doctorum arbitrio, si ita lubet, potest etiamnum immutari; concedo: est recens ac nova quantum spectat ad ejus dogmata, vel usum, nego; dogmata enim, quæ propugnamus perantiqua sunt, & usus ea ratiocinationibus confirmandi, ut dictum est Proposit. 1. & 2., vetustissimus.

Insurgens: Atqui Scholastici opus ac tempus conterunt in pluribus metaphysicis quæstionibus agitandis, quæ apud præcos Ecclesiæ Patres fuerunt prorsus inauditæ.

Resp. Has quæstiones in Theologiam ab ipsis Hæreticis fuisse inductas. Illi enim, ut rudes per elementa mundi a veritate traducerent, elegerunt aucupia verborum, ad quæ declinanda necesse fuit sacram doctrinam pluribus dissertationibus exornari. Insurgentes enim E. G. Ariani, qui, ut scribit Epiphanius Hæres. 76. in disputandi palæstra, diligenter exercitati in id incubuere, ut divini Verbi rationem nova doctrine imagine inverterent, & ejus divinitatem trecentis sophisticis argumentis nisi sunt impugnare, Theologos impulerunt, ut de divina, æternaque generatione subtilius & accuratius inquirerent. Idem dicendum est de Sabellianis, Nestorianis, & de Græcis, qui Spiritus Sancti a Filio originem præfactæ negantes in Theologiam disputationes de relationibus, de personarum notione, de principii unitate, aliisque similibus invexerunt. Quid? nonne ipsi Calviniani, ut Christi Corporis in Eucharistia præsentiam impugnent, ex idea Corporis, quod loci extensionem circumscibitur, impossibilitatem illius præsentiae in cælo ac in terra demonstrare conantur, provocantes nos ad investigandam corporum, ac specierum naturam? Definant ergo nos vitreis hisce jaculis laceessere: quippe *didicimus singulas quasque hæreses intuisse Ecclesiæ proprias quæstiones, contra quas diligentius defenderetur Scriptura divina, quam si nulla talis necessitas cogeret*, ait lib. 2. de Dono Persev. cap. 2. Augustinus.

Insistes: In pluribus occupantur Scholastici, quæ non solum inu-

tilia



tilia sunt, verum etiam futilia, ac propemodum infana. Hujusmodi sunt supervacaneæ illæ quæstiones, quarum pleraque recenset ad cap. 1. Ep. 1. ad Tim. Desiderius Erasmus. Videtur ergo in Theologis ventosa illa loquacitas, quæ, ut ait D. Bern. sermone 58. in Cant., *sterilitatem magis intulit terris, quam fertilitatem*.

Primo respondere possem has quoque quæstiones plurimum Theologo utilitatis asserere, quatenus ingenium acuiunt, & ad polemicam exercitationem juvenes reddunt instructiores. Nam & milites, priusquam ineant cum hoste certamen, instruunt se apparenti hostilitate ad bellum; & nautæ, antequam se navali prælio committant,

Tranquillo prius arma lacu, clavumque, leveſque

Explorant remos, atque ipsa pericula discunt.

Ita nimirum Constantino Grimaldo respondet Epist. 1. Aletinus. Bern. vero in eodem libro Serm. 36. satis Theologos commendat, dicens: *Non ignoro, quantum Ecclesia profuerint literati sui, sive ad refellendos eos, qui ex adverso sunt, sive ad simplices instruendos*. Sed, ut liberalis sim adversariis; dico Erasmi argumento non impeti Scholasticam, sed eos, qui plures quæstiones prosequuntur, quas *nec juvenes portare possunt, nec senes ferre*, inquit Canus lib. ix. de loc. Th. cap. vii., ubi hæc aliaque Theologorum vitia expolito genere orationis castigat. Quamquam in delectu quæstionum, quas notat Erasmus, sunt multe ad depellendas hereticas cavillationes necessarie, ut demonstrat Petavius cap. v. Proleg. num. vi., quales sunt, an numerus Personarum in divinis pertineat ad substantiam, an ad relationem; an potestas creandi possit communicari creaturis, an Deus generet Deum, & aliæ id genus quamplurimæ. Multas quoque in ludibrium vertit insulsis putidisque vocabulis, veluti quum eam quæstionem, possit ne Deus assumere irrationalem naturam, ita proponit, an hæc propositio Deus est scarabeus, aut cucurbita, tam possibilis sit, quam hæc, Deus est homo. Et tamen is est, qui de Colloquiorum utilitate ait: *Indecorum est, Theologum joci*. Erit qui dicat mirum non esse, vituperari Theologiam ab Erasmo; qui encomium fecit Moriæ. At ego homini non succenseo: iuste enim ab illo Theologorum ordo laceratur, si tantum jocatur in ociosas illorum disceptationunculas; nec has ipsas tamen simpliciter improbat, verum eos damnat, qui in his solis Theologicæ rei puppim, ut ajunt, & proram collocant, quique logomachiis, ut Divus appellavit Paulus, ejusmodi sic occupantur, ut nec Evangelicas, nec Propheticas, nec Apostolicas literas vacet legere: quæ moderatione sese excusat in Epist. ad Doriþium. Quod si dixisset ubique, gratias monenti referrem; neque ulla mordacitate sugillarem hominem in studiis sæpe, multumque versatum, hoc saltem in campo, in quo procax detractorum Scholasticæ illiberalitas me fecit nimium expatiari.

CAPUT IV.

*De illis, quæ in sacra Doctrina Proæmio disputare
Theologi consueverunt.*

QUAMQUAM probe tueri possum nullas esse supervacaneas quæstiones, in quas rhetoricantes Critici cristas efferunt; attamen ut omnem de me tollam suspensionem, velle de quæstiunculis, ut aiebat Erasmus, tanquam pro focus, & aris certare, proæmiales uno tantum capite expedio. Hujusmodi istæ sunt, an Theologia veram habeat rationem scientiæ, an ad praxim, vel speculationem pertineat, an naturalis sit, an sit unus simplex habitus, an ejus objectum sit Deus; quas modo paucis resolvo.

PROPOSITIO I. Theologia propriè ad scientiam refertur; at non est ejusdem rationis cum aliis scientiis.

Prior pars, quæ est omnium fere Theologorum, prob. 1. auctoritate S. P. Augustini lib. xiv. de Trinit. cap. 1., ubi de Theologia ait: *Huic scientiæ attribuitur illud tantummodo, quo fides saluberrimè gignitur, nutritur, defenditur, roboratur.* Deinde suadetur ratione: Scientia est habitus constans, qui ratione moveri, ac labefactari non potest: Talis est Theologia: Ergo est scientia. Altera pars, quam propugnat Gregorius noster Ariminensis, Frassenius, ceterique Scotistæ, ostenditur 1. contra quosdam Divi Thomæ discipulos Angelici Præceptoris apertissimo testimonio in 111. dist. 33. q. 1. *Si esset aliqua scientia, quæ non posset reduci ad principia naturaliter cognita, non esset ejusdem speciei cum aliis scientiis.* Secundo firmatur hoc ratiocinio: Nulla scientia, quæ habeat communem rationem cum ceteris, præcipue innititur auctoritati; quippe si auctoritati innitatur, vel ad fidem spectat, vel ad sapientiam comparatam ex fide, dicente Augustino in lib. de Utilit. credendi cap. 21. *Quod intelligimus debemus rationi, quod credimus auctoritati:* Theologia divinæ auctoritati principaliter innixa est: Igitur Theologia non eandem cum ceteris participat rationem scientiæ.

Opp. 1. Scientia quælibet ex principiis per se notis procedit: Theologia non utitur principiis per se cognitis: Ergo non est ullo pacto scientia.

Resp. Dist. ma. Si ea sit scientia undequaque naturalis, conc. si ea sit, vel in rerum notitia, vel in suis principiis, extra naturalium scientiarum ordinem; nego. Fateor Theologiam habere principia, quæ artem, experimentum, humanamque rationem superexcedant, quale est divinum Verbum, sive scriptum, sive ore tenus traditum; sed est tamen immobilis in mente ratio, rectam præferens ac firmissimam

nam cognitionem. Quamvis enim Aristoteles, alique Philosophi scientiam arbitrabantur, cui communis est, ac evidens in principiis intelligentia; hi naturalem describebant, cujusmodi potuit eis esse, nota. Datur superior scientia nullis enigmatum involucris oblecta, tanto scientię nomine dignior, quanto non percipit veritatem lumine rationis humane, quę potest errare; *sed certitudinem habet lumine divine scientię, quę decipi non potest*; ut utar verbis S. Thomę 1. p. q. 1. art. 5. Atque hinc est, quod Theologia neque est Fides, neque cum Fidei habitu impossibilis. Non est Fides, quoniam hęc immediate versatur circa principia Theologię, divinamque revelationem; scientia vero Theologica erga veritates, quę ex principiis illis inferuntur. Non est impossibilis cum Fide, quia Fidei habitus non consistit quidem cum naturali evidentia; bene tamen cum sapientia derivata ex principiis divinitus revelatis.

Opp. 2. Singulare est Theologię facultatis objectum: Sed de singulari objecto non est scientia: Ergo non est scientia Theologię facultatis.

R. dist. ma. Theologię objectum est singulare, & unius generis cum rebus creatis variabilibus, contingentibus, & mutationi obnoxiiis; nego: Singulare est, sed sempiternum ac perpetuum, atque immutabili æternitate consistens, concedo. Quod si argumentum urgeas de aliquo Theologię partiali objecto, dist. min. Non est scientia de objecto singulari, in se ipso tantum inspecto, concedo: prout subest divine infallibili revelationi, nego.

PROPOSITIO II. Theologię habitus ad praxim simul, & speculationem reducitur.

Ita Theologi nostri, ac Thomistę, nec non Juenin, Petavius, Boucat, Habert, alique recentiores, contra Frassen, Henno, ceterosque Scotistas. Ac probatur 1. auctoritate Augustini, qui cap. ult. Enchiridii, ait: *Omnia præcepta divina referuntur ad caritatem, de qua dicit Apostolus, Finis præcepti caritas*: Theologia de divinis quoque præceptis instituit disputationem: Ergo refertur etiam ad caritatem, quę præcipuum est, ac maximum rationalis creaturę officium. Probatur præterea argumentatione Gregorii Ariminensis q. 5. Prologi artic. 4. Aliquis Theologię scientię actus nullius praxis est directivus, ut demonstratio hujusce veritatis, Deus est unus, Deus est trinus; aliquis e contra ad praxim ordinatur, ut disquisitio hujus asserti, Christus colendus est adoratione patrię; in quo exhibetur species adorationis debitę Christo: Scientia quę modo contemplatur veritatem, modo dirigit humanos actus, ex æquo refertur ad speculationem, ac praxim: Ergo theologia scientia ad praxim, & speculationem simul reducitur. Et corroboratur propositio. Theologus scrutatur ea quę sunt Dei, & prout est prima veritas, & prout est rationalis Creaturę ulti-

ultimus finis : Deus, ut est prima veritas, est terminus altissimæ contemplationis; ut vero est finis ultimus, est principium, ac regula humanarum actionum : Ergo Theologus inquit ea, quæ sunt Dei, quatenus objectum est tum speculationis, tum praxeos.

Opp. 1. In eodem objecto reperiri nequeunt duæ oppositæ differentiæ, cuiusmodi sunt speculativum, ac practicum. Igitur uni, eisdemque scientiæ convenire non valent.

Resp. dist. ant. In objecto inferiorum scientiarum, quod creatum est ac finitum, & in quo eadem veritas non est simul ratio speculationis, & actionis, transeat : in eodem objecto summo ac divino, in quo permanet scrutanda veritas, & ultimus univerforum finis, nego. Vel cum Gregorio nostro idem antecedens distinguo : in eodem objecto relate ad eundem scientiæ actum ; co. comparate ad varios actus, ac partes ; nego.

Opp. 2. Qualisvisque Theologica veritas ad Dei cultum, ac dilectionem ordinatur : Est ergo Theologia tantummodo practica.

Resp. dist. antecedens : Quæcunque Theologiæ pars ad amorem Dei cultumque refertur, excitans pium cordis affectum ; concedo : exhibens caritatis regulas, ac præcepta ; nego. Fateor universam sacram Doctrinam ad dirigenda virtutum officia multum conferre ; non enim ignoro, Augustinum lib. 111. de Doctrina Chris. cap. 10. ista, proferre : *Hæc omnia ad caritatem nutriendam atque roborandam, & cupiditatem vincendam, atque extinguendam valent* : Sed scientia undequaque practica ea est, quæ tota, ac natura sua ad usum, & vitæ exercitationem refertur, ut ea pars philosophiæ quæ dicitur Ethica ; ea pars Geometriæ, quæ traditur problematibus. Si enim ad constituendam practicam scientiam sufficit animum afficere, atque ad virtutum officia inflammare ; jam nulla erit scientia non practica, quum omnis notitia veritatis rationalem voluntatem alliciat.

PROPOSITIO III. Quamvis principia Theologiæ lumine supernaturali innotescant, attamen illa ad naturales scientias pertinere videtur.

Id asserunt omnes fere Doctores contra Content. dissert. 1. cap. 2. spec. 3. & P. Boucat. dissert. Præambula art. 3. concl. 3. ac primo ostenditur : Theologica scientia non habetur propter solam notitiam principiorum, quæ sunt divinitus revelata, nam *hæc scientia non possent fideles plurimi, quamvis polleant ipsa fide plurimum*, ut inquit lib. 14. de Trinit. cap. 1. Augustinus ; sed propter connexionem illorum principiorum cum assertionibus inde illatis : neque enim assentimur huic conclusioni, *Christus risus est*, quia Deus revelaverit ; sed quoniam connectitur cum isto principio nobis revelato, *Christus est homo* : Atqui connexio inter principia revelata, & conclusionem inde illatam naturali lumine nota est, ut vel ethnicus hanc possit animadvertere : Ergo naturalis est scientia, quæ per Theologiam comparatur. Ulterius S. Thomas disputans q. 1. art. 2. num Sacra Doctrina sit scientia, ait : *Sacra Doctrina est*

To. I.

D

scien-

scientia, quia procedit ex principiis notis lumine superioris scientiæ, quæ scilicet est scientia Dei, & beatorum; Sed ex quo Theologiæ principia nota sunt lumine scientiæ Dei, & beatorum, non consequitur Theologiam viatoris hominis esse Dei, ac beatorum sempiternam visionem: Ergo ex quo principia Theologiæ supernaturali revelatione comperta sunt, minime infertur ipsam Theologiam esse supernaturalem scientiam. Ad hæc: Acquiritur Theologia naturaliter, humano scilicet ratiocinio, institutione doctoris, discipulorum studio, ac labore: Scientia, quæ naturaliter acquiritur naturalis est: Ergo naturalis est ipsamet scientia Theologiæ. Denique: Supernaturalis habitus a Deo infunditur: Habitus Theologiæ non infunditur: Igitur habitus Theologiæ supernaturalis non est.

Oppones I. Notitia perfectior naturali, censenda est supernaturalis: Theologia habet notitiam, & certitudinem perfectiorem notitiæ, & certitudine naturali, Ergo habet notitiam & certitudinem supernaturalem.

Resp. dist. min. Et hæc potior certitudo habetur de solis sacræ doctrinæ principiis, circa quæ versatur fides, & non scientia; conc. Et hæc notitia perfectior, est de connexionione horum principiorum cum assertionibus, inde illatis, in quam fertur habitus Theologicus, & non fides; nego: talis enim connexio cognita est naturaliter.

Opp. 2. Cum P. Boucat. Legitur Sap. x. v. 10. *Dedit illi scientiam Sanctorum*, quod recte potest intelligi de Theologia, qualis traditur in scholis: Scientia Sanctorum est intrinsece supernaturalis: Ergo &c.

Resp. Hoc loco commemorari visionem Jacob, de qua cap. xxviii. Geneseos; quando nempe vidit mysticam scalam, descendentes, & ascendentes Angelos, illique innixum Dominum gloriæ. Itaque scientia Sanctorum significat divinorum Mysteriorum revelationem. Est & Sanctorum scientia illa, de qua Job cap. xxviii. v. ult. *Ecce timor Domini, ipsa est sapientia; & recedere a malo, intelligentia.*

Opp. 3. Contenf. Theologia habet objectum supernaturale, qui est Deus, ut a fide cognoscitur; neque aliis principiis, ac motivis per se utitur, quam supernaturalibus Fidei articulis: Erit ergo supernaturalis & ipsa.

Resp. dist. ant. Et ipsum objectum, principia, & motiva supernaturalia spectantur a Theologia immediate ac proxime, ratione divine revelationis, prout referuntur ad Fidem; nego: remote tantum, & ratione connexionis, quæ naturali acumine percipitur, & qua comparatur scientiæ habitus; conc. Vide, si lubet, contra Contentum Clarissimum Virum Cardinal. Gotti Quest. 2. de Nat. Th. dub. 3.

Opp. ult. Theologia est, ut scholæ loquuntur, scientiæ beatorum spirituum subalterna: Hæc est supernaturalis: Ergo etiam illa.

Resp. nego ma. enim vero Scientia subalterna, (ut appellant,) a superiore

superiore sumit principia; ut medicina a naturali philosophia, prospectiva a geometria, ars frenofactoria ab equestri . Theologiæ vero non supponit principia Scientia beatorum, qui Deum revelata facie intuentur, sed Fides, sperandarum substantia rerum, argumentum non apparentium . Vel data ma. & min. nego conf. quippe etiam naturalis scientia, referri potest ad supernaturalem, tanquam ei subalterna, si, quemadmodum Theologia, principiis supernaturalibus innitatur .

PROPOSITIO IV. Theologia sive speculatrix, sive moralis, sive polemica unus est habitus .

I. Probatur : Omnium Theologicarum veritatum idem est objectum, de quo mox quæram ; eadem principia, nimirum divinæ revelationes : Sed ex unitate subjecti, atque ex unitate principiorum infertur unitas scientiæ, vel habitus : Ergo, &c. 2. Ita corroboratur : Eadem intellectualis potentia sese extendit ad plura perceptibilia, tametsi unum est altero difficilius : eadem sensibilis facultas, puta oculus, vel auris, ad singula colorata, ac sonora ; unus Fidei, aut Caritatis habitus ad omnia, quæ oportet credere, & quæ jubemur diligere, licet unum præ alio ad videndum, credendum, & diligendum magis sit arduum . Una ergo eademque Theologia sat est ad omnes assequendas veritates, quæ ad suum pertinent objectum .

Opp. 1. Theologia thetica ac positiva, & Theologia scholastica, discriminantur ab invicem . Etenim una amplior est & loquentior, altera rixis, & argumentis asperrima ; illa scripturis utitur, hæc naturali quoque ratione ; prior planior videtur & certa, secunda anceps ac sinuosa : Ergo diversam habent methodum, diversa principia, diversam difficultatem ; quæ omnia etiam distinctionem arguunt habituum .

Resp. hæc omnia solam accidentariam diversitatem inferre ; delectus enim verborum non parit Theologiam, sed ad instar vestis exornat . Neque obest habituum unitati diversa actuum difficultas ; cum una E. G. virtus Caritatis in amicos pariter & inimicos feratur, quorum illi lubentissime diliguntur, hi difficulter . Naturali autem ratione non utitur Theologus per se, sed secundo duntaxat, idest, tanquam instructus philosophia . Hanc tamen, ut inquirunt, elevat, ac revelatis principiis adnectit ; quorum ductu omnia refert ad idem objectum, ex quo unitas scientiæ promanat .

Opp. 2. Tametsi eadem humana ratio ad naturales scientias comparandas conducat, & eadem infusione primus homo omni naturalium rerum notitia donatus fuerit, nihilominus scientiæ naturaliter acquisite, & scientiæ infusæ in Adam constituunt diversas scientiarum species . Ergo etiam si ex eadem divina revelatione Theologus res omnes discutiat, erit tamen Theologia diversarum scientiarum complexio .

Resp. nego paritatem : Etenim naturalis ratio, & infusio omnium scientiarum in Adam, est causa effectrix, non specificativa & formalis ;

lis; ista namque non est lumen, sive naturale, sive supernaturale illud sit, sed tendentia in objectum: ac præterea naturales scientiæ objecta plura habent, quorum unum non refertur ad aliud. E contra in Theologia divina revelatio est etiam causa formalis; & quæcunque in ea pertractantur, singula in idem objectum collineant.

PROPOSITIO V. Hujus scientiæ objectum attributionis est Deus: objectum adæquatum est omnis conclusio, quæ inferri potest ex propositionibus fidei: objectum formale est ipsa revelatio divina.

Ostenditur prima pars: Attributionis objectum illud appellant, ad quod omnia revocantur, quæ in aliqua scientia expenduntur: Omnia, quæ expendit Theologia revocantur ad Deum vel unum, vel Trinum, vel omni perfectione exornatum, vel Conditorem universorum, vel finem ultimum rationalis creaturæ, vel humani generis Reparatorem, &c. Ergo Deus est objectum attributionis Theologiæ. Pars altera sic probatur: Adæquatum alicujus disciplinæ objectum illud est, in quo illa tota versatur: Theologia sistit tota in propositionibus, quæ deducuntur ex notis fidei principiis: Ergo sunt hæc objectum hujus disciplinæ adæquatum. Posterior pars hac ratione monstratur: Objectum formale dicitur illud, cujus ratione scientia attingit objectum adæquatum: Theologia attingit objectum adæquatum ratione divinæ revelationis: Ergo, &c.

Opp. 1. Basilii Epist. 141. Cyrillus Alex. lib. 1. in Joan. Nazianz. Orat. xxxv: 11. Ephrem Antiochenus in Epistol. adversus Eutychianos, alique plures affirmant Incarnationis mysterium nullatenus ad illam Theologiam pertinere, quæ est de Divinitate scientia: Ergo non omnia, quæ inquirat Theologus, ad ipsum Deum revocantur.

Resp. Theologiæ vocabulum, si vocis etymon expendatur, significare tantum de Divinitate rationem: si vero pro hac scientia usurpetur, denotare de Deo, & de iis, quæ ad Deum spectant, disputationem ex Fide cognitis derivatam, ut dixi priori cap. Itaque Græci Patres duas in Christo contra Eutychianos discernentes naturas, divinam scilicet, & humanam, admonent, quod disputare de illa pertinet ad *Θεολογία*, agere de ista spectat ad *κρημνισία*, & maxima, prudentique advertentia a Theologia Christi Incarnationem secernunt. Hinc dist. ant. Et laudati Patres *Theologia* vocabulum apposite usurpant secundum vocis etymologiam; conc. juxta peculiarem notionem Theologicæ disciplinæ; nego antecedens.

Opp. 2. Existentia objecti non probatur ab ulla scientia, sed præsupponitur: Theologia probat Dei existentiam. Ergo Deus non est Theologiæ scientiæ objectum. Et confirmatur, quandoquidem consideratur Deus ut auctor naturæ, atque ut auctor supernaturalis: Ut auctor naturæ percipitur naturali ratione, ut auctor supernaturalis attingitur Fide.

Resp.

Resp. omiffa ma. diff. min. Theologus demonftrat divinam exiftentiam ex principiis extraneis, ac philofophicis, quæ ultro ad fubliorem doctriinæ ubertatem divinis literis, & facræ difciplinæ apparatu exornat; conc. ex propriis, fibique intrinsecis principiis; nego. Ad Confirmat. dico, Deum effe objectum Theologiæ ac Fidei, fed diverfimode: Fidei, inquit Sylvius, quatenus revelatur immediate: Theologiæ, quatenus percipitur per difcurfum, qui fit ex articulis Fidei, tanquam principiis: quod ego præmonueram Prop. I. Resp. ad 1. At de his fatiis, ne clamitet Erasmus: *Nunc neque quæftiuncularum ullus est finis*, cit. ad Dorpium Epift.

C A P U T V.

De variis Propositionum generibus, quæ a Theologo propugnari debent, vel impugnari.

NON abs re factum puto, si Theologica Asserta sub Propositionum titulo expositurus, diversas harum species, quantum spectat ad Sacræ Doctrinæ candidatos, nunc explanabo; cum ea, quæ de hac argumentationum parte dicuntur in scholis, ut ad nexum syllogismorum addumuntur, nota sint ex dialectica Institutione. Itaque propositionum quædam sunt propugnandæ Theologo, quædam refutandæ. Prioris generis sunt articuli nostræ Fidei, dogmata Catholicæ Ecclesiæ, sententiæ Patrum, Communia doctorum scita, & quæ insuper, salva veritate, utiliter in alterutram partem videbuntur, absque rixandi prurigne, exagitanda. De his omnibus paullulum verba faciam; quoniam ad eam Theologiæ partem attinent, quæ de Locis Theologicis solet inscribi, & quæ non exiguam expostulat a nobis operam, si pro rei dignitate, atque dissertationum copia volumus illam exornare. Est ergo Articulus Fidei principalis quædam veritas omnibus ad explicite credendum proposita, & distinctam præferens difficultatem: cujusmodi sunt quæ in Apostolorum Symbolo continentur; in quo iccirco passio, mors, ac sepultura Christi ad unum Articulum spectant, propterea quod si Filium Dei suffixum Cruci, & vere dolorum nostrorum credas fuisse participem, nulla hæsitacione fateberis esse, posteaquam emisit spiritum, conditum monumento. Differunt autem Articuli Fidei ab Ecclesiæ dogmatibus, quod illi primarii sint, ac veluti rerum credendarum Capita singulis fidelibus proposita, eisque ad consequendum æternam salutem necessaria: at Fidei dogmata latius pateant, eaque dicantur, quæ ad illa capita reducuntur, continentia quidquid Catholici profitentur; E. G. Deum esse in Personis trinum, in Christo duas naturas, ac voluntates existere; aliaque hujusmodi. Ita nempe Con-

ceptio,

ceptio, & Nativitas Christi, erunt Fidei articulus: quod nascens fuerit reclinatus in præsepio, pannis involutus, adoratus a Magis, &c. dogma Catholicum. Quapropter supervacaneum est disputare, An singula fidei dogmata sint proprie articuli Fidei: quam tamen questionem pertractat Petrus Annatus in suo Apparatu lib. 1. art. viii. & ex eo Cardinalis Vincentius Gotti in Tractatu Isagogico dub. vii.

Porro propositiones Fidei Joannes de Turrecremata Sum. Eccl. p. 2. cap. 9. ad septem gradus redegit, quos apposite distinctos arbitramur, etiam si Canus lib. xii. cap. vi. more Jurisperitorum traditos putat, & minutius in tenuissimas concisos particulas. Est itaque primus ordo propositionum Fidei earum, quæ in sacris libris habentur expressæ, E. G. *Verbum erat in principio: Verbum caro factum est*. Secundus earum, quæ ex sacris literis certissima consecutione inferuntur, E. G. *Christus est omnium Redemptor: Ejus corpus in Eucharistia continetur*. Tertius illarum, quæ constant Divina, & Apostolica traditione, E. G. *Libri, quibus modo utitur Romana Ecclesia sunt revera divini: Tenenda est perpetua Deipara Virginitas*. Quartus earum, quæ definitæ fuerunt in generalibus Ecclesiæ Conciliis E. G. *Anime in Purgatorio detentæ juvantur Sanctorum precibus: Statim, ac purgatæ sunt beata perfruuntur visione*. Quintus earum, quæ statutæ sunt irrefragabili Romani, & Apostolicæ sedis auctoritate; ut, *Hæresim continent quinque Jansenii propositiones: Ha a recta fide in sensu auctoris aberrant*. Sextus earum, quæ probantur unanimi Sanctorum Patrum consensu, accedente Ecclesiæ judicio. Postremus denique illarum, quæ ex tertio, quarto, quinto, ac sexto genere firmissimam habent consecutionem.

Ex Patrum vero sententiis tres propositionum ordines videntur distinguendi. Unus illarum, in quibus universi conveniunt; & hæc certissime sunt, neque absque Fidei discrimine, ut nuper diximus, possunt negari. Alter earum, in quibus multi ex Patribus consentiunt, ceteris reclamantibus; quæ erunt plus, minusve probabiles, pro Patrum majori, aut minori numero, & auctoritate: inter quos illi erunt ceteris preferendi, qui occasione insurgentium hæresum idem argumentum accuratissime pertractarunt. Postremus est illarum propositionum, quæ ab uno tantum vel altero proferuntur, vel incidenter explanantur; quæ parum firmæ sunt, & absque temeritatis nota negari poterunt. Doctorum autem Scholasticorum placita in duplici sunt differentia, communia scilicet, quibus universi subscribunt; atque uni, vel alteri particularia: quorum illa pro firmissimis habenda sunt; altera nullam penes nos habent auctoritatem, nisi ubi validissimo rationis præsidio corroborantur. Sed hæc omnia opportuniore loco a nobis explicabuntur.

Ad illas modo propositiones, quas impugnare debemus, orationem

nem converto : sunt autem propositiones : *Hæretica*, *erronea*, *sapientes hæresim*, *temeraria*, *scandalosa*, *piarum aurium offensiva*, *seductrices simplicium*, *impia*, *blasphemica*, *injuriosa*, *Schismaticæ*, *Judaica*, *Athica*, *improbabiles*. Quarum notarum plures uni, eisdemque propositioni possunt competere : unde de Wiclephi articulis legitur in Concilio Constant. sess. vi. *Notorie hæretici*, & *a Sanctis Patribus reprobati*; *alii non Catholici*, *sed erronei*; *alii scandalosi*, & *blasphemi*; *quidam piarum aurium offensivi*; *nonnulli temerarii*, *seditioni* &c. Definivit quoque Innocentius X. Jansenianas propositiones esse *Hæreticas*, *erroneas*, *suspectas*, *temerarias*, *scandalosas*, *blasphemias*, *impias*, *contumeliosas*, *divinæ pietati derogantes*, *immituentes offensionem in aures pias*.

Quenam sit *hæretica* propositio ex dictis facile conjicitur. Cum enim propositio de Fide ea sit, quæ in sacris literis, in receptis ab Ecclesia traditionibus, in decretis ac definitionibus Ecclesiæ expresse continetur, aut inde certa, manifesta, firmissimæque consecutione deducitur; illa propositio hæretica censenda est, quæ uni ex iis e diametroprehenditur esse contraria, exempli gratia hæc : *Homo non tenetur amare Deum*, *neque in principio*, *neque in decursu suæ vitæ*, quæ adversatur apertissimo Caritatis præcepto, *Diliget Dominum Deum tuum ex toto corde tuo*. Est autem quælibet hæretica, quemadmodum & Catholicæ Fidei propositio, vel in materia Juris, vel in materia Fidei cum Jure conjuncti, quod modo appellant Dogmaticum. Si quis autem hujusmodi aliquam propositionem enunciat, non continuo dicendus erit hæreticus; cum hæresis sit *error in Fide cum pertinacia*: quorum unum, videlicet quod sit *error in Fide*, spectat ad ipsius propositionis naturam; alterum, idest, *pertinacia*, ad proferentis perfidiam. Est igitur proprie hæreticus quisque errori circa Fidem pertinax, ac protervus adhæret. Atque huc spectant propositiones sapientes hæresim, & hæresi proximæ; illæ nempe, quæ damnatis hæresibus valde videntur affines.

Propositio *erronea*, ut ratione & re ab hæretica secernatur, videtur ea, quæ opponitur veritati, quam unanimis Sanctorum Patrum, ac Doctorum sententia existimat revelatam, sed nondum Ecclesia talem esse definivit. Hujus propositionis notio non eadem est omnibus, sed quam nuperrime tradidi, videtur communis recepta. Gaspar Juenin suarum Instit. p. 1. dissert. v. quest. II. reprehendit Canum, quoniam erroneam propositionem putat esse illam solam, quæ adversatur alteri, qua non evertitur Fides Catholica: sed, me quidem iudicæ, immerito. Quippe Canus plures errorum gradus constituit: in quorum altero eandem erroneæ propositionis tradit notionem, quam approbat Juenin. Is enim, *Propositio*, inquit, *erronea est ea, quæ negat veritatem, quam communis Ecclesiæ sensus judicat esse mediate re-*
vela-

velatam, quamvis Ecclesia id nondum definierit. Et Canus pariter libro xii. cap. x. *Quum veritas aliqua, sapientum quidem opinione velementi, Fidei veritas est, sed non est plane ab Ecclesia definita, nec certo argumento demonstrata; tunc veritati illi adversari non est hereticum, sed erroneum.* Conveniunt ergo adinvicem; neque Iuenin animadvertit varios illos errorum gradus, quos Canus distinguit: in quorum primo locat errores, quibus Fides quatitur, sed non evertitur, idest, qui Catholicæ veritati adversantur, sed tamen non sunt hæreticæ; veluti si quis dixerit: *Non licere Fratribus ex mendicitate vivere, ac teneri victum querere labore manuum.* Quænam tamen sint propositiones adversæ veritati Catholicæ, quatientes Fidem, & immunes ab hæresi, non tam apertè rationi nostræ succurrit; quamquam habet fortasse Canus, quo propriam tueatur opinionem.

Temerariam propositionem illam dicunt, quæ nulla ratione, nulla auctoritate affirmatur, & quæ communi opponitur Doctorum sensui, ut velle futurum iudicii diem absolute definire: item quæ contra Ecclesiæ decreta in disputationem vocatur, ut asserere Mariam semper Virginem fuisse originali labe contaminatam. De quo Apostolica Sedes, etsi nondum contrarium statuit, vetat ne disceptetur. Rursus quæcunque insolenter, & nimium audacter profertur, ut contendere beatam Virginem non esse in cælos cum corpore assumptam. Observat Cardinalis Gotti in has quandoque prorumpere cum intemperatæ critices studiosos, tum Morales quosdam Theologos, qui levissimis permoti conjecturis novas doctrinas inducunt. Vocatur *scandalosa*, quæcunque occasionem præbet proximo spiritualis ruinæ, aut illum removel ab exercitamento virtutum: talis esset adoranti Eucharistiam dicere: *Quisnam scit hanc hostiam esse revera consecratam?* vel jejunianti juxta Ecclesiæ consuetudinem suadere, multa sequi incommoda valetudinis ex præcepta corporis afflictatione. *Piarum aurium offensiva* est, quæ obscænum aliquod & indecorum in verbis continet; a qua iis præsertim cavendum est, qui agunt de sexto præcepto Decalogi. Maxima etiam cura ab isto propositionum genere abstinere se debent qui de Partu Virginis disserunt, ne sacratissimum mysterium aliqua corporearum partium commemoratione polluantur.

Seductiva simplicium est, quum error fraudolenta verborum æquivocatione ad circumveniendum rudes contigitur; ut cum Nestorianis asserere Mariam esse Dei susceptricem, aut cum Semiarianis, *Verbum esse Patri Homensson*, idest, simile; quasi non genuisset Virgo personam Verbi, & istud Patri consubstantialia non esset. *Impia* est, quæ removel a Dei cultu, & a caritatis erga homines officiis: E. G. *Anima unita abstinere sese debent a bonorum operum exercitio: Non est eleemosyna ex omnibus superfluis in pauperes eroganda.* *Blasphemant* appello & propositionem, quæ in Deum, vel Sanctos convicium ejaculat.

cu-

cujusmodi est illa, *Deus est auctor peccati, & prædestinat pro suo beneplacito quem libuerit ad sempiterna supplicia*, aut, *Gregorius Magnus fuit primus inter Pontifices Antichristus*. Auctor Biblioth. Theolog. inter blasphemias enunciationes illas connumerat, quibus sacra iridentur; ut quod Sanderus lib. 111. de Schismat. Anglicano refert de Elisabetha, quæ quum adepto regno sacro oleo inungeretur, dixit circumstantibus nobilioribus ancillis, *Abite, ne factor hujus olei vos offendat*.

Injuriosa est ea propositio, quæ detrahit honori illorum, qui in Ecclesia insigniti sunt charactere, vel dignitate, videlicet Summis Pontificibus, Cardinalibus, Episcopis, & universo Ordini Clericorum, vel Monachorum. *Schismatica* porro est, quæ scissioni Corporis mystici Ecclesiæ viam sternit, ac ejus membra dirumpit, veluti si quis dicat legitimum *Romanum Pontificem esse Antipapam: Regem Angliæ esse in sua ditione verum caput Ecclesiæ*. *Judaicam* propositionem dicimus, qua etiamnum asserunt antiquæ promissiones, aut cæremoniæ, ut, *Nondum advenit Messias: Circumcidendus est infans. Atrea est, quæ Dei existentiam, aut providentiam tollit, ut Non est Deus, Fortuito eveniunt singula, Post mortem corporis nihil. Improbabilem* liquet esse propositionem absque ulla veritatis imagine pronunciatam. At qui harum omnium uberiorem peroptat expositionem legat Canum lib. xii., Annatum lib. 1. art. v. Turrecrematam Sum. Ecclef. lib. iv. p. 2. Dominicum a SS. Trinit. lib. 2. Bibl. sect. vii. Juenin in Prolegom. dissert. v. Gotti quest. 1. dub. v. aliosque.

Pro hujus capitis coronide sedulo animadvertendum est, ferre quarumlibet propositionum censuram ad nullum privatum hominem pertinere; sed ad evitanda contentionum scandala servandum ubique esse Innoc. Papæ XI. monitum in Decreto, quo lxxv. morales propositiones damnavit: *Ut ab injuriis contentionibus Doctores, seu Scholastici, aut alii quicunque in posterum se abstineant, & ut paci, & caritati consulatur, idem Sanctissimus in virtute sanctæ obedientiæ præcipit, ut tam in libris imprimendis, ac manuscriptis, quam in thesibus, disputationibus, ac prædicationibus, caveant ab omni censura & nota, necnon a quibuscvis convitiis contra eas propositiones, quæ adhuc inter Catholicos hinc inde controversantur, donec a Sancta Sede recognita, super iisdem propositionibus judicium proferatur. Quæ cum ita sint, videant qua mutua caritate sese invicem prosequantur prout quidam, & contentiosi Theologi, qui aliorum dogmata judicio Ecclesiæ adhuc immunia, vocant Calviniana, Pelagiana, Janseniana, & si quid est aliud auditu horribilius. A quorum consuetudine est mihi longo itinere recedendum; & si aliquando æstu disputationis abreptus in idem, quod damno, crimen dilabar, hanc a lectoribus meorum opusculorum gratiam deprecor, ut inconsulto loquenti humanissime in-*

To. I.

E

dul.

dulgeant. Ita enim spero fore, ut mihi hanc ipsam vicem rependant; & errantem me ad semitam veritatis hac solertia, & cautione reducant. *Quis enim non sentias*, ait lib. de Peccato Origin. cap. 23. Augustinus, *in his, atque hujusmodi variis, & innumerabilibus quaestionibus, sive ad obscurissima opera Dei, sive ad Scripturarum abditissimas latebras pertinentibus, quas certo aliquo genere completi, ac definire difficile est, & multa ignorari salva Christiana Fide, & alibi errari, sine aliquo haeretici dogmatis crimine.*

C A P U T VI.

*De requisitis ad assequendum Theologicas veritates
dispositionibus, atque de hujus nostri
Operis instituto.*

UT in propugnandis veris, atque in refutandis errorum dogmatibus cum doctrinae laude, & moralium virtutum incremento versetur quisquis ad Theologicas disciplinas convertitur; operæ pretium est, ut mentem, ac voluntatem certis quibusdam regulis, ac præceptis ad has capeffendas disponat. Principio quantum ad mentem attinet, deserviunt Theologo omnes naturales scientiæ, de quibus non incongrue beatus Thomas quæst. 1. artic. v. interpretatur verba Proverbiorum cap. 1x. vers. 3. *Misit ancillas suas, ut vocarent ad arcem, & ad mœnia civitatis.* Aliquæ tamen sunt Theologo necessariæ; aliquæ utilissimæ; aliquæ ornatum addunt solummodo. Necessaria est dialectica, & naturalis Philosophia; quæ duo Scholasticæ methodum, & humanas rationes suppeditant, ut cap. II. demonstravi. Assiduum præterea studium in sacris literis, in Apostolicis traditionibus, in Romanorum Pontificum statutis, in Sanctorum Patrum sententiis, in Historicis monumentis collocandum est; inde enim, veluti ex perennibus fontibus argumenta exhaurit Theologia. Nam si humanis rationibus primo insistimus; potius erimus contentiosi philosophi, quam sacrarum doctrinarum cultores. Cavendum est igitur, ne Theologiæ ingressus limina in sinistram defleat partem, ubi degunt ii, *Qui*, inquit Cyrillus Alex. lib. II. Thesauri; *Nibil aliud, quam Aristotelem rutiunt, & istis potius disciplinis, quam Scripturarum scientia sese venditant.*

Utilissimæ videntur Theologo linguæ, præsertim Hebræa, & Græca: illa ad majorem divinarum Scripturarum intelligentiam, hæc etiam ad Sanctorum Patrum lectionem. Quamquam enim Vulgata nostra authentica est, ceterisque Sacrorum Bibliorum versionibus longe præstantior, necnon præclara Græcorum Opera Latina fecit Scrip-
torum industria; utilis tamen est linguarum notitia ad cognoscendas

idio-

Idiomatum proprietates, ad evitandum errorem ex amphibologia latini sermonis, atque ad intelligenda quædam vocabula propria, quæ in sola lingua a qua derivantur etymologiam servant, & tamen ipsa nunquam immutantur, ut *Adam*, *Abel*, *Cain* &c. & quædam alia, quæ commode in alienam linguam transferri forte non poterant, vel saltem in gratiam antiquioris linguæ etiamnum perseverant, ut *Raca*, *Anathema*, *Marana*, *Mammona*. Hinc S. P. August. lib. 2. de Doctrina Christiana cap. 11. trium linguarum Hebraicæ, Græcæ, & Latinæ magnopere studium commendat, easque in causa mortis suæ Christus ipse videtur probasse. Viennense Concilium, ut habetur in Clement. 1. Tit. de Magistris, statuit, ut in præclarissimis Universitatibus Bononiensi, Parisiensi, & Salmanticensi trium harum linguarum pararentur præceptores; quod ut servetur in generalibus Religiosorum studiis non semel decreverunt Pontifices, quorum statuta recitat in sua Medulla linguæ Sanctæ Paulus Mediceus. Gregorius item XIV. Seminarii nostri Bononiensis Institutor, præcipit, ut Hebrææ linguæ Novitiis rudimenta tradantur. Id vero hoc præfenti tempore specialiter est executioni mandandum; quum Hæretici continuo nos ad Hebraicos, Græcosque Codices provocent freti hac linguarum peritia, & Patres Latinæ Ecclesiæ contemnentes, qui ea præditi non fuerunt, ut constat in editis contra S. P. Augustini Opera a Joanne Pherepono Animadversionibus, tali audacia conscriptis, ut non solum Catholicis viris, verum etiam nonnullis Hæreticis stomachum moverint. De advocando autem Latinæ orationis præsidio hoc loco non loquor; nam auditoribus nostris ea lingua disciplinæ traduntur. Vellem tantum, ut de se ipso scripsit Petavius in Proleg. cap. VII. num. x. scribendi, ac dicendi stylus *neque barbarus, ac non latinus esset; & oratorio tam ille fuco, ac pigmentis careret.*

Pari ratione de ceteris quibusdam facultatibus arbitror esse judicandum; quemadmodum de utilitate Matheseos ostendit erudita dissertatione Rabbius vir doctrina, ac morum suavitate conspicuus. Demonstrat enim quantum utilitatis afferant Theologo Geometria, Cosmographia, Arithmetica, & ceteræ mathematicæ disciplinæ. Hæ tamen valde humilem ac prudentem hominem requirunt. Ut enim exemplum proferam de Arithmeticis; habent quidem omnes Sacrarum literarum numeri aliquam significationem, quam ingeniose exponit aliquando Augustinus in numero E. G. septenario, quadragesimo, trigésimo octavo &c. at si quis arbitratur numeros ubique eandem significationem præferre, is meo judicio decipitur. Etenim quis probet, binarium V. G. exitiosissimum esse, ut conatur demonstrare Petrus Bongus in libro de Numerorum Mysteriis, ex eo quod duo sunt duces dæmoniorum Behemot, & Leviathan, duo genera delictorum proprium & alienum, duo damnatorum poenæ sensus & damni; & quia

duo cæci clamabant in Hierico secus viam, duæ mulieres fornicatæ sunt in Aegypto Oolla, & Oliba, duos menses puella Jephthe flevit virginitatem suam, duobus testibus damnatur reus? Profecto si hoc modo nugari fas est, dicam ego e contra optimam esse dualitatem, quoniam Deus duplicem condidit creaturam, spirituales, & corporeas; duplicem in se naturam copulavit divinam, & humanam; necnon in duobus mandatis universa lex pendet; duo ad efficiendum Sacramentum concurrunt, verbum, & elementum; duo inde effectus promanant gratia, & character; duo viri fertilissimæ Palestinæ terram primitus invenerunt; duo fuere Hebræorum salvatores, Moyse, & Aaron; duo Apostoli qui prima vice sequuti sunt Christum, Petrus & Andreas; duo sunt rerum omnium principia, materies ac forma. Et quod dictum est de binario, de omnibus aliis numeris in quodam meo Ms. contra Bongum opusculo demonstravi, probans nullam certam significationem inesse numeris, nisi quam Sacræ literæ, ac Patres deprehenderunt; eamque non ratione numerorum haberi, sed rerum. Itaque hac lege tantum Arithmetica utilis esse potest Theologo: quod affirmo de ceteris scientiis mathematicis; quæ nisi ad hanc normam expendantur, erunt Theologo parum utiles. Hæcenus de iis, quæ ad Theologiæ studium ex naturalibus scientiis prærequiruntur.

Ex parte autem voluntatis requiritur cordis mundities, inanis gloriæ contemptus, discendi ardor; & qui erat initio commemorandus, timor Domini. De cordis munditie hæc habentur Sap. 1. v. 3. & seq. *Perversæ enim cogitationes separant a Deo: probata autem virtus corripit insipientes. Quoniam in malevolam animam non introibit sapientia, nec habitabit in corpore subdito peccatis. Spiritus enim Sanctus disciplina effugiet scilum, & auferet se a cogitationibus, quæ sunt sine intellectu, & corripietur a superveniente iniquitate.* Et revera animus terrenis cupiditatibus irretitus nunquam poterit in summi boni contemplationem assurgere: unde Orat. xxxi. 11. ita loquitur Nazianzenus: *Non cujusvis est de Deo disserere, sed eorum duntaxat, qui corpus, & animam a vitiorum sordibus purgarunt, aut jam hoc agunt, ut se a vitiorum labe purgent; impura enim rem puram attingere periculo non caret, quemadmodum nec agris oculis solis radios intueri.* Hac de re, ut arbitror, antiquiores Theologi incipiebant in libros sententiarum Commentaria ab ea questione, *Quid sit frui, & uti*, in qua docebant non esse rebus creatis fruendum noxia delectatione, sed esse illas in usum assumendas ad finem ultimum consequendum; initio commonefacientes oportere cuique, sed præsertim discenti de Deo, ne sit temporalium bonorum aut vana cupiditate illectus, aut damnabili fruitione illaqueatus. Huc etiam spectat ille timor, de quo regius Vates Pf. 110. v. 9. *Initium sapientiæ timor Domini.*

Præterea ad Theologiam accedenti necessaria est humilitas, & inanis

nis gloriæ contemptus. Ait enim Spiritus Sapientiæ apud If. cap. LXVI. v. 2. *Ad quem autem respiciam, nisi ad pauperculum, & contritum spiritu, & tremementem sermones meos?* Et Augustinus lib. 111. Confess. cap. v. *Institui animum intendere in Scripturas Sanctas, ut viderem, quales essent: & ecce video rem non compertam superbis, neque nudatam pueris, sed inaccessu humilem, successu excelsam, & velatam mysteriis: & non eram ego talis, ut intrare in eam possem, aut inclinare cervicem ad ejus gressus, &c.* Atque Augustini verbis addere possum exemplum ejusdem; qui cum humilitate, & caritate plurimos antecelleret, talem habuit divinarum scientiarum intelligentiam, ut indutus virtute ex alto abundantius omnibus laboraverit: atque illius ministerio Dominus uberiores fidelibus suis præbuerit instructionem. Comparatur autem hæc humilitas non solum consideratione sui ipsius, verum etiam hujus scientiæ scopo, atque argumento. Nam sive ingenii acumine polleas, sive memoriæ tenacitate, sive utroque, ceterisque donis ad naturam, & gratiam pertinentibus; neminem fugit, omne donum defursum esse descendens a Patre luminum: quod si horum donorum minorem partem acceperis, te non latet nullum hominum esse odibiliorum superbo ac paupere. Argumentum vero Theologiæ eo majorem postulat humilitatem, quo sublimius est, & in illo plures temporis, ac operis fecere jacturam: quippe de summo Deo differendum est, qui habitat lucem inaccessibilem. Scopus denique, ac finis in omni quidem scientia, sed præsertim Theologiæ, debet esse, Dei honor, sui ipsius ac proximorum ædificatione promovendus: quem finem nunquam assequuntur qui superbia elati studiis, ut promoveantur ad Religionis gradus, totis nervis incumbunt. Memoria tenendum est quod serm. xxxvi. in Cant. scripsit Bernardus: *Sunt namque qui scire volunt eo fine tantum ut sciant ipsi, & turpis curiositas est. Et sunt qui scire volunt, ut scientiam suam vendant, verbi causa, pro pecunia, pro honoribus, & turpis questus est. Et sunt quoque qui scire volunt ut ædificent, & caritas est: & item qui scire volunt ut ædificentur, & prudentia. Horum omnium soli ultimi duo non inveniuntur in abusione scientiæ, quippe qui ad hoc volunt intelligere, ut bene faciant.* Et infra: *Volo proinde animam primo omnium scire seipsam, quod id postulet ratio & utilitatis & ordinis. Et ordinis quidem, quoniam quod nos sumus, primum est nobis: utilitatis vero, quia talis scientia non inflat, sed humiliat, & est quædam preparatio ad ædificandum; nisi enim super humilitatis stabile fundamentum, spirituale ædificium stare minime potest.*

Exigitur denique in Theologiæ candidato ardentissimus discendi ardor; neque oblivioni debet mandari saluberrimum Ecclesiastici monitum cap. vi. v. 23. & seq. *Sapientia enim Doctrina secundum nomen est ejus, & non est multis manifesta: quibus autem cognita est, permanet usque.*

usque ad conspectum Dei. Audi fili, & accipe consilium intellectus, & ne abjicias consilium meum. Injice pedem tuum in compedes illius, & in torques illius collum tuum: subjice humerum tuum, & porta illam, & ne accideris vinculis ejus. In omni animo tuo accede ad illam, & in omni virtute tua conserva vias ejus. Investiga illam, & manifestabitur tibi, & continens fatus ne derelinquas eam. Hujus moniti rationem profert S. P. Augustinus Epist. 137. ad Volusianum, amplitudinem scilicet, ac profunditatem doctrinæ: *Latet, inquit, altitudo sapientie, ut annosissimis, acutissimis, flagrantissimis cupiditate addiscendi hoc contingat, quod eadem scriptura quodam loco habet, cum consummaverit homo, tunc incipit.* Neminem tamen detertere debet hæc divinarum scientiarum præstantia; quin, cum ipsa ad amorem Dei inflammet, & mentem nostram igne naturam mutante collustret, eamque Cœlestium Spirituum faciat consortem; hanc ardentius concupiscamus, quæ animam rationis participem ad inseparabilem Dei conjunctionem disponit. His fere verbis ad Theologiæ studium nos hortatur Diadochus Episcopus in libro de Spirituali perfectione cap. 67.

Supereſt, ut nonnulla dicam de Theologiæ partibus, atque de ordine, & instituto hujus Operis. Sanctus Joannes Damascenus, qui floruit Imperante Leone Isaurico Iconomacho, libris quatuor de Fide Orthodoxa universam Theologiam primum omnium eo ordine complexus est, quem deinde secuti sunt Petrus Lombardus Magister Sententiarum, ceterique Scholastici. Qui in priori libro de Deo uno, ac de Trinitatis Mystero pertractant: in 11. disserunt de Angelis, de creatione hominis, ejusque lapsu: in 111. de humani generis reparatione: in postremo de Sacramentis, quibus Christi Redemptoris nostri meritum vulneratis per peccatum hominibus applicatur. Paullulum ab ea methodo recedit S. Thomas Aquinas, qui Theologicam Summam in tres. tantum partes divisit: in quarum una de Deo uno, Trino, & Creatore, in altera de Deo ultimo fine, in tertia de Christo, & ab eo institutis Sacramentis, pluribus quæstionibus & articulis plenissimas disputationes comprehendit. Ex nostris vero Scriptoribus fere omnes Magistri Sententiarum methodum tenuere, ut Aegidius Romanus, Gregorius, Gerardus, Argentinas, & quotquot in Aegidium superioris, hujusque ætatis Scriptores Commentaria ediderunt.

Verum cum hi omnes, ut erat Patrum nostrorum consuetudo, & ingenium, operam ac laborem insumpserint enucleandis controversiis innumeris, quas ætate nostra mutabilis hominum sensus fastidit; compellor in his opusculis veterum plura penitus prætermittere, quædam minus necessaria extremis, ut inquit, labiis gustare, multa Historicis, dogmaticis, criticisque ornare dissertationibus. Quæ omnia si pro rerum amplitudine ac dignitate me facturum esse polliceor, ridebunt me jure homines universi. Neminem quippe fugit quanta
scripse.

scripserit de solis Patrum dogmatibus Dionysius Petavius, qui tamen illorum Sententias vix recitavit, neque de his definivit: quanta insuper Thomassinus, qui neque totam Theologiam in ea parte prægrandibus voluminibus explicavit. Historicæ item dissertationes quam fuse, pertractet Natalis Alexander nemo non novit; de Ecclesiæ Conciliis quanta conscripserit Christianus Lupus habemus præ oculis: sola polemica Theologia quantum temporis, ac laboris postulat ex solo Bellarmino possumus conjicere. De solis Ecclesiæ Sacramentis quam late differant etiam brevitatis amatores scripta ostendunt Estii, Juenin, Tournely, aliorumque. Ipsa moralis Theologia a P. Vanroy brevissime simul ac nervose tradita plures Tomulos implevit; pluresque pariter Complexio recentiorum questionum, quam superioribus annis elaboravit noster Aurelius Piette. Si quis igitur numeris omnibus absolutam a me expectat Theologiam, is proculdubio me ad scribendum Superiorum meorum mandato compulsus tentat penitus exanimare. Proferam itaque quidquid imbecillitas mea, & angustia temporum patitur: neque libello titulum facio ampullosum, *Theologia Scholastica, Positiva, Moralis, Polemica*, qui discendi cupido uberrima spondeat: neque *Apparatus Theologicus*, qui solam methodum, & elementa suppeditet; neque *Theologica Institutiones*; quo vocabulo, non disputationes significancur, sed regulæ ac præcepta. Opportunius videtur, si hunc præferat titulum *de Theologicis disciplinis*; idest, qui uni, aut alteri Theologiæ, itemque ampliori, ac breviori conveniat; neque ostentet scribentis audaciam, neque deprimat dignitatem scientiæ.

Iste autem erit dissertationum nostrarum ordo. Agendum principio de vero ac supremo Numine, & contra Atheos, ac Polytheos pugnandum: tum divinæ perfectiones sese offerent examinandæ: Trinitas deinde Personarum contra pertinaces Impugnatores acerrime est vindicanda. Quod implere conabimur novem prioribus libris. Accedent posthac Tractatus de Cælestibus Spiritibus, de rerum corporearum productione, præsertim vero de homine primo, ipsius lapsu, pœnitentia, exilio, propagatione posterorum, atque peccati, pœnarumque in singulos transfusione. Id vero complecti curabimus dissertationibus quatuor, idest a libro decimo ad xiv. Præterea tradenda est rationalis Creaturæ institutio, non quidem quantum spectat ad commodum, & utilitatem reipublicæ, id enim proprium est Ethices, sed quatenus dirigentibus legibus, & auxiliante divina Gratia conari debet ut finem ultimum assequatur, & ab illo vitiis & peccatis avertitur. Quapropter hæc tertia pars sex libros de divina Gratia, & exortis adversus illam hæresibus, in quibus libris situm est universum Augustinianæ Doctrinæ Systema, deinceps pertractationem de legibus, & insuper quatuor libros de humanis Officiis comprehendit; ideoque extenditur a quartodecimo libro ad quartum, ac vicissim.

Differendum

40 In Libros de Theologicis Disciplinis Prolegomena.

rendum deinceps quinque libris de Salvatoris nostri ad reparandum humanum genus adventu, de ejus Vita mysteriis, & miraculis plena, de Apostolis quos elegit, & de Ecclesia ab ipso instituta. Itaque hæc quarta pars libro vigesimo quinto inchoata complebitur in vicessimo nono. Disputabimus denique de septem Ecclesiæ Sacramentis, quibus Christiana Religio nutritur ac roboratur, a libro trigesimo ad postremum. Ita fiet, ut quinque partibus, libris autem trigintaseptem nostrum de Theologicis disciplinis Opus comprehendatur commode quinquennio absolvendum.

In feriis autem, festisque diebus, quibus consuetæ lectiones præmittuntur, præ manibus habendi erunt libri, quorum usus in singulis hisce partibus debet esse frequentior, & qui titulum referent: *Librorum de Theologicis disciplinis Supplementum*. Pertractabitur in his de locis Theologicis accuratius, & de controversiis reliquis in hoc priorre Opere prætermisiss: quarum amplitudo ac dignitas uberiolem, ac singularem postulat tractationem. Sparsa tamen in libris istis xxxv. 1., & suo quæque loco distributa occurrent quæcunque magis necessaria videbuntur, & convenientia cujusque libri argumento. Qui vero in pervolutandis Theologicis dissertationibus offenderit difficilia, atque ad ea percipienda indiget spiritu intelligentiæ, quemadmodum hortatur Beatus Jacobus in Epistola Catholica cap. 1. v. 5., *postulet a Deo, qui dat omnibus affluenter, & non impropert: & dabitur ei.*





DE THEOLOGICIS DISCIPLINIS LIBER PRIMUS

*In quo contra Atheos, ac Polytheos unius
Supremi Numinis defenditur
existentia.*



IN DEI OPTIMI MAXIMI vindicanda existentia præstat Theologicarum Exercitationum ponere rudimentum, ac illud in principio statuere Deum esse, & quidem unicum. Nam Theodorus Cyrenaicus, ut scribit Laetius in Aristippo, & in priori libro de Natura Deorum Marcus Cicero, omnes de Diis sustulit opiniones. Protagoras dubitavit an revera aliquod Numen extaret, ut ait lib. 2. de Principiis Theodoretus. Epicurus teste

Plutarcho de Placitis Philosophorum existimavit omnes Deos humana specie præditos esse, nec res humanas curare. Diagoras quoque Milesius, auctore Suida, appellatus est *Atheus* quod nullos Deos arbitraretur existere: in quorum deliramenta consensere Lucilius quidam Tollese anno 1619. igni Senatus Decreto damnatus, alique obscurioris nominis Romæ ætate nostra, anno scilicet 1719. perpetuis addicti carceribus. Utinam non occulte serperet hæc, nescio, num ignorantiam dicere debeam, num insaniam.

Causa cur mortales in eam miserrima cæcitate devenerint est,
F quod

quod in voluptate ac tranquillitate animi, quam frustra in temporaliu bonorum participatione existimarunt consistere, amore sæculi ceterisque cupiditatibus in pœnalem cœcitatem dejecti finem suum irrationabiliter locaverunt. Recte proinde in Atheos declamat S. P. Augustinus Enarrat. in Psalmum x111. *Dum amant hoc sæculum, & non amant Deum; ipse sunt affectiones, quæ corrumpunt animam, & sic excæcant, ut posset etiam dicere imprudens in corde suo: Non est Deus;* & lib. de vera Relig. cap. 38. *Nego, inquit, esse quemquam istorum, qui nihil colendum existimant, qui non aut carnalibus gaudiis subditus sit, aut potentiam vanam foveat, aut aliquo spectaculo delectatus infansiat.*

Revera Epicurus perditissimæ hujuscæ sectæ signifer, atque, ut ait Creechius Censura in librum 1. Lucretii, insanientis sapientiæ consultus erro, putabat sublata opinione de Providentia, & de pœnis post mortem futuris, tolli molestiam omnem, & formidinem, atque levare nos metu mortis, ac superstitione Deorum: e contra hæc remorari animi quietem, & quamplurimas secum trahere perturbationes. Quo nihil absurdius poterat excogitari; quippe Supremi Numinis cura bonos tristitia liberat, neque ullus horret parentes optimos, principesque benevolos: quorum amorem studiumque longe superat beneficentissima Dei caritas. Ex quibus consequitur Atheorum insaniam a turpitudine mortui, tanquam ab impuro fonte manasse: *Boni siquidem, ut elegantissime scribit ad Joan. Gratianum Joannes Antonius Vulpus, suppliciorum terrore, quæ apud inferos esse constat, quod videlicet ad se non pertineant, minime percelli solent.*

Licet hoc explorato principio absurda Atheistarum opinio radicitus convellatur, appareatque nullum penitus eis consentire qui probe vivat; est tamen ista impietatis moles, & hydra vitiorum pluribus argumentationum generibus exterminanda. Harum quædam methaphysicæ sunt, aliquæ physicæ, morales aliæ, Theologicæ multæ. Primi generis argumenta petuntur a recentioribus Philosophis ac Theologis ex indita omnibus idea entis perfectissimi; ab antiquioribus vero ex ente necessario, & contingenti. Physica deducuntur ex prima causa, metu, ac serie causarum secundarum: Moralia ex compagine & ordine universi, atque ex communi omnium hominum sensu: Theologica ex Scripturis, ex Patribus, ex miraculis, aliisque Capitibus; quæ ad refutandos Atheos minime valent, nisi postquam Sacrarum literarum veritas, & Christianæ Religionis monimenta fuerint invictissime confirmata. Hæc ergo postrema argumenta erunt modo prætermittenda, sed in decursu Theologiæ sese ultro offerent. Quare ad alia, etiam si potest ea sibi jure tribuere Philosophus, stylum verto.

CAPUT I.

*De illo argumentorum genere, quod petitur ex omnibus
ingenita idea Dei.*

COMPERTUM est omnibus, ut arbitror, qua via ad probandam Dei existentiam progrediatur Cartesius meditat. 3. & 5. & quam magnifice gloriatur se id efficere certioribus argumentis, quam ullum sit Geometricum Theorema. Illius philosophiæ elementa, & canones sunt, cogitationes nostras esse aut ideas, sive rerum imagines, aut affectus, aut judicia: idearum alias esse innatas, veluti cum intelligimus quid res sit, quid sit veritas, quid cogitatio: alias adventitias ab externis rebus formatas, cujusmodi sunt rerum corporearum imagines: alias denique nobis confectas, ut chimæra, sirenes. Idea itaque innata est impressa a nobis ab auctore naturæ cognitio, non comparata discursu, neque sensibus hausta.

Præterea certum est hujus sectæ Philosophos asserere ideas omnes, quamquam sunt inter se pares, & certæ in quantum sunt modi cogitandi, differre tamen adinvicem, prout referuntur ad res, quas repræsentant; itaut idea substantiæ plus in se contineat *realitatis objectivæ*, quam idea cujuscunque modi adventitii, & consequenter idea Dei realitatem omnem, ac perfectionem exhibeat. Porro omnem ideam affirmant habere sui causam; nam si quis habeat ideam machinæ, in qua omne excogitabile artificium contineatur, inde optime inferitur ideam istam ab aliqua causa profluxisse. Cum vero omnis causa debeat vel formaliter, vel eminenter effectum suum continere; inferunt ingenitam ideam Dei, quæ omnem cogitabilem perfectionem repræsentat, pendere ab aliqua causa, in qua sit omnis illa perfectio, nempe a Deo revera existente.

Rursus docent, certissimum judicii canonem esse, ut quidquid in aperta, & clara idea alicujus rei relucet, id certissime de eadem re possit enunciari; & quemadmodum est impossibile nos non existere, dum cogitamus, mentem non esse distinctam a corpore, & dari montem absque valle, quia in idea cogitantis, in idea mentis, in idea montis, existentia, spiritualitas, & vallis elucet; pari ratione evidentissime demonstratur summi Numinis existentia, quoniam hæc in idea clara Dei lucet, atque splendet.

Brevissime his expositis, quæritur, an Athei his argumentis possint aperte convinci. Affirmant non solum Cartesiani omnes Philosophi, sed etiam ex viventibus Theologis nostris plures doctrina atque eruditione præstantissimi; a quorum nomine jubeor ab ipsorum mode-

stia abstinere; ex aliis Honoratus Tournely quæst. 1. art. 1. & 3. Jue-
nin tom. 2. quæst. 2. demonstrat. 8. & quotquot placitis adhærent Car-
tesianorum. Negant contra antiquiores omnes Theologi; & Carte-
sium impugnant, non tantum Socinus in Prælect. Theolog. cap. 2.,
Wolzenius in Meditationes metaphysicas Renati Descartii medit. 3.,
quos tamen neque Crellius sequitur, neque Smarcus & ipsi Sociniani,
verum etiam plures Catholici ac sapientissimi viri, ut Illustrissimus
Daniel Huetius in Censura cap. 1v. & Nicolaus l'Herminier de Exist.
Dei q. 1. Imo Recentiorum argumenta præviderat, eaque longo tem-
porum intervallo solverat vir in Augustiniana lectione versatissimus,
magnique nominis Theologus Gregorius de Arimino, dist. 3. qu. 1v.
artic. 1. Quid nobis videatur sequentibus Propositionibus explica-
bimus.

PROPOSITIO I. Valde probabile est, inditam esse singulis homini-
bus ab univerforum Auctore ingenitam, atque anticipatam ideam sui.

Pr. 1. Sacrarum literarum testimoniis. Ps. 1v. v. 7. habetur: *Si-
gnatum est super nos lumen vultus tui, Domine.* Joan. 1. v. 9. *Erat
lux vera, quæ illuminat omnem hominem venientem in hunc mundum.*
Paulus etiam ad Romanos 2. v. 14. *Gentes, quæ legem non habent,
naturaliter ea, quæ legis sunt faciunt; ejusmodi legem non habentes
ipsi sibi sunt lex: qui ostendunt opus legis scriptum in cordibus suis, testi-
monium reddente illis conscientia ipsorum:* Atqui illud lumen signatum
super nos, ea lux, quæ illuminat singulos omnino homines, ea lex
rationalis creaturæ inscripta conscientiæ, est impressa unicuique idea,
ac notitia supremi Numinis: Ergo ejusmodi idea ac notio naturaliter
indita est omnibus rationalibus creaturis.

Respondet Nicolaus l'Herminier hæc, aliaque divinarum Scriptu-
rarum loca exponenda esse sive de sola naturali intellectus facultate;
sive de operibus Dei ita nostræ obvis contemplationi, ut ad Auctoris
sui cognitionem nos trahant; sive de gratiarum beneficiis, quæ nobis
uberrime conferuntur. Addit Franciscus Henno neminem ex Patribus
ejusmodi verba interpretari de ingenita nobis idea, sed de Providentia
Dei, de ipsius imagine, de sola lege naturæ.

Verum etiam si ultro fateamur recte, & commode prædicta sacrorum
librorum loca de intellectiva facultate, de rerum creaturarum notitia,
de supernaturalibus donis, de impressa nobis divina imagine, de pro-
videntia & de naturali lege a Patribus explicari; impius enim esset, ac
stultus, qui putaret hæc omnia nequaquam nos ad cognitionem ma-
nuducere Creatoris: non excludunt hæc interpretationes ideam ingeni-
tam, sed stabiliunt. Mens enim creata, & externa opera Dei, cum
sint coarctata virtutis, non possunt esse causa, ut mox dicam, per-
cipiendi incommutabile bonum, nisi firmissima, ac perpetua veritatis
regula accedat. Fides, aliaque gratiarum dona non conferuntur sin-
gulis;

gulis; & proculdubio vivida, ac supernaturali notitia Dei carent quamplurimi. Extat quidem in nobis Providentia Dei, Conditoris imago, naturæ lex: sed providentia illa cum nobis rationem indidit, hanc necessariis adminiculis, ac stabili veritatis regula communivit: legem naturæ, quæ ab æterna non deviat, ideæ, ac notitia ingenita non immutat, sed constituit; neque ea lex æquipararetur æternæ, nisi principio cohereret invariabili.

Neque verum est Patres recitata sacrarum Scripturarum loca nulli de ingenita notitia Dei interpretari. Produeta Psalmistæ verba ita exponit S. P. Augustinus Enarratione in eundem Psalm. num. VIII. *Hoc lumen est totum hominis & verum bonum, quod non oculis, sed mente conspicitur. Signatum autem dixit in nobis, tanquam denarius signatur regis imagine. Homo enim factus est ad imaginem, & similitudinem Dei, quam peccando corrumpit. Nos autem ideæ ingenitæ nomine nihil aliud intelligimus, quam lumen nobis affulgens, firmamque veritatem, quæ non conspicitur oculis, non hauritur sensibus; & quæ ob originalem labem sopita a creaturis veluti excutitur & excitatur, nempe illud idem, quod percipit Sanctus Pater. Deprompta ex Evangelio Joannis sic explanat D. Hieronym. ad cap. 1. Epistolæ ad Galatas: Ex quo perspicuum fit natura omnibus Dei inesse notitiam; nec quemquam sine Christo nasci, & non habere in se semina sapientiæ, & justitiæ, reliquarumque virtutum. At quid sunt ideæ a nobis assertæ præterquam certa rerum notitia naturæ indita, atque veritatis ac bonarum virtutum una cum Dei gratia fontes & semina? Postremum locum Apostoli ita exponit Origenes in priori contra Celsum libro: Non est mirandum, Deum eorum, quæ per Prophetas, & Servatorem docuit, semina indidisse omnium mortalium animis, ut in divino iudicio omnis homo sit inexcusabilis habens legem mentis scriptam in corde suo. At hanc legem mentis, rationisque mortalium omnium animo inlitam, hanc eandem ideam ingenitam appellamus.*

Hinc probatur 2. propositio Patrum auctoritate. Justinus Martyr Apologia 1., quæ tamen vulgo nuncupatur secunda, Dei, inquit, appellatio nomen non est, sed rei inenarrabilis naturæ hominum inlita opinio. Eusebius lib. 2. Preparat. Evang. cap. 9. Eximium illud ac salutare in primis, quod Dei nomen, essentiamque significat, ipsius naturæ ductu, impressisque animo per sese notionibus, vel divinitus potius inspiratis nemo non intelligit. Hoc enim omnes populi communi quodam rationis sensu percipere, cum id omni animo ratione, & intelligentia prædito, idem hujus universitatis artifex naturalibus quibusdam cogitationibus inleverit. Tertullianus lib. de Testimonio Animæ cap. v. Magistra natura, anima discipula. Circumventa ab adversario meminit sui auctoris: sed quis ejusmodi eruptiones animæ non putaverit doctrinam esse naturæ congenitæ, & ingenitæ conscientia? Certe

Certe prior natura quam litera ; & prior sermo quam liber ; & prior sensus quam stylus , & prior homo ipse quam Philosophus , & Poeta , Arnobius lib. 1. contra Gentes : *Quisquam ne est hominum , qui non cum istius principis notione diem primæ nativitatis intraverit ? Cui non sit ingentum , non affixum , imo ipsi pene in genitalibus matris non impressum , non insitum , esse regem ac dominum cunctorum quæcumque sunt moderatorem ?* Consulto ex pene innumeris Antiquorum testimoniis hæc protuli , quæ non videntur recte explicari per cognitionem comparatam per sensuum officia , ut occurrit l'Herminier ; quod sic ostendo . Non est e sensibus hausta illa idea ac notitia , quæ ipsi naturæ hominum insita est , quæ per sese hominum imprimitur animo , quæ est doctrina quædam ingenta , & congenita conscientiæ nostræ , quæ denique ante primum nativitatis diem rationali animæ affigitur : Talem esse ideam ac notitiam Dei affirmant apertissime Patres : Ergo asserunt hanc summi Dei notitiam ac ideam ministerio sensuum non esse acquisitam .

Tertio loco probatur ratione Augustinianis testimoniis corroborata . In idea ac notione , qua Deum percipit communis hominum ratio , relucet infinitas , independentia , immutabilitas , & quæcumque alia perfectio : Idea hæc repræsentans debet esse ingenta , naturæ indita , anticipata , non comparata per sensus : Ergo esse debet congenita & naturæ inspirata idea ac perceptio , quæ nos reddit de existentia summi Dei certiores . Major propositio constat ; eamque tradit Augustinus lib. 1. de Doctrina Christiana cap. 7. ubi ait : *Omnes pro excellentia Dei certatim dimicant , nec quisquam inveniri potest , qui hoc Deum credat esse , quo melius aliquid est .* Minorem vero hinc momentis demonstro . I. Hæc idea Dei in hominum mente firmissimum ac immutabile iudicium parit : Non esset idonea huiusmodi iudicii causa , nisi esset congenita & naturaliter indita : Ergo indita est , congenita est . Prob. minor. Lex & regula firmissimi ac immutabilis iudicii extra omnium corporearum , & finitarum rerum ordinem , quæcumque eæ sint , statui debet ; nam omnis causa debet effectum suum vel formaliter , vel eminenter in se continere ; nulla autem res finita , mutabilis & creata tantam habet præstantiam , ut exhibere possit illam summæ perfectionis ideam ; ideoque hæc neque a nobis ipsis proficiscitur , neque a parentibus , neque a præceptoribus , neque a contemplatione rerum aspectabilium . *Hæc autem lex ,* inquit S. Pater Augustinus lib. de vera Religione cap. xxx. num. 56. *cum sit omnino incommutabilis , mens vero humana , cui talem legem videre concessum est , mutabilitatem pati possit erroris , satis apparet supra mentem nostram esse legem , quæ veritas dicitur .* Et paulo supra dixerat , absque ista incommutabili lege non solum de omnium artium præstantia , verum & de æqualitate & inæqualitate corporum , de locorum , ac temporum interval-

lis ,

lis, de majoribus ac minoribus figurarum spatiis rectum fieri non posse iudicium. *Quis est*, ait, *qui summam æqualitatem vel similitudinem in corporibus inveniat, audeatque dicere, cum diligenter consideraverit, quodlibet corpus vere ac simpliciter unum esse: cum omnia vel de specie in speciem, vel de loco in locum transeundo mutantur, & partibus constent sua loca obtinentibus, per quæ in spatia diversa dividuntur? Porro ipsa vera æqualitas ac similitudo, atque ipsa vera & prima unitas, non oculis carneis, neque ullo tali sensu, sed mente intellecta conspiciuntur. Unde enim qualiscunque in corporibus appeteretur æqualitas, aut unde convinceretur longe plurimum differre a perfectâ, nisi ea quæ perfectâ est mente videretur: si tamen quæ facta non est, perfectâ dicenda est? Vide & lib. 11. de lib. arb. cap. x11. num. 34. Quod si requiritur lex incommutabilis ac sempiterna, ut certum proferatur iudicium de rebus aspectabilibus, quanto magis erit necessaria ad percipiendam sempiterni numinis existentiam?*

Præterea: Sensuum ministeria hebetiorem ac tardiores mentem reddunt, & veritatis ascensionem non juvant, sed retardant; Ergo inde certa, & invariabilis veritas non elucet: *Noli querere quid sit veritas*, ait idem Augustinus lib. 8. de Trinitate num. 3. *statim enim se opponunt caliginis imaginum corporalium, & nubila phantasmatum, & perturbabunt serenitatem, quæ primo ictu diluxit tibi, cum dicerem, Veritas.*

Ad hæc: Quælibet idea mediis sensibus comparata non est semper eadem in omnibus; quippe corporei sensus educatione, ætate, rerum præsentia, locorum ac temporum intervallis commutantur: Sed idea Dei penes omnes homines cujuscunque ætatis, regionis ac temporis una est, eadem est, perpetua & incommutabilis est: Ergo hæc idea sensuum ministerio non comparatur. Augustini est argumentum istud lib. 2. de lib. arbitrio cap. 20. ubi ait: *Quapropter nullo modo negaveris esse incommutabilem veritatem hæc omnia, quæ incommutabiliter vera sunt continentem; quam non possis dicere tuam, vel meam, vel cujuscunque hominis; sed omnibus incommutabilia vera cernentibus, tanquam miris modis secretum, & publicum lumen præstid esse, ac se præbere communiter. Plura afferrem, nisi hætenus dicta ad explorandam Augustini mentem sufficerent.*

Fortasse dicet aliquis Sanctum parentem Augustinum fuisse Platonium, ac tandem Platonis dogmata retractasse. Sed hæc obijcienti repono: utique Platonis philosophia magna ex parte purgatissimo Augustini arrisit ingenio; sed maximæ illi referendæ sunt gratiæ, quod cum videret statuendum esse immutabile iudicii criterium, & commentitias jure censi innumeras propemodum ideas a Platonis excogitatas, & quæ Aristotelem, aliosque Philosophos a Magistro suo separarunt, necnon in orbem tantam Acronum, deorumque turbam invexerunt;

invexerunt;

runt; Augustinus Platonis non discipulus, sed castigator videns multitudinem idearum unam statuit æternam a Deo indistinctam, invictumque unius Numinis testimonium. In qua Sententia adeo perstitit, ut illam in primo Retractionum cap. 4. his verbis firmaverit: *Sed hoc quoque improbo: credibilis est enim propterea vera respondere de quibusdam disciplinis, etiam imperitis earum, quando bene interrogantur, quia præsens est eis, quantum id capere possunt, lumen rationis æterna, ubi lex immutabilia vera conspiciunt: non quia ea noverant aliquando, & obliti sunt, quod Platoni, vel talibus visum est.* Quo in loco retractat quidem quæ dixerat lib. 2. Soliloq. cap. 20. eruditos liberalibus disciplinis illas in se oblivione obrutas quodammodo refodere, & scientiam omnem esse reminiscantiam; sed antiquam de congenito sempiternæ veritatis lumine confirmat opinionem, imo per istam Platonicum errorem impugnatur.

Denique probatur Propositio: Quod omnibus hominibus insita sit & congenita aliqua Dei notitia consentiunt ipsi Scriptores Ethnici, ab impiorum pectoribus erumpente manifestissima veritate: Iamblicus enim in libro de Mysteriis, quem ex Græco Latinum fecit noster Nic. Scutellius, cap. 3. lib. 1. *Cohæret, inquit, nostra ipsi substantia de Diis innata cognitio.* Cicero in 1. de natura Deorum: *Quæ gens unquam vel fuit, vel est, aut quod genus hominum, quod non habeat sine doctrina anticipationem quamdam deorum, quam Epicurus appellat ~~quidam~~, idest anteceptam rationem, & animæ præviam rei quamdam informationem, sine qua nec intelligi quidquam, nec queri, nec disputari possit.* Et Seneca Epistola 117. *Deos esse inter alia sic colligimus, quod omnibus de Diis opinio insita est: nec ulla gens usquam est a Deo extra leges, moresque projecta, ut non aliquos Deos credat.*

OBJECTIONES SOLVUNTUR.

Opp. 1. Hæc de ingenita Dei notitia opinio adve rsatur recepto in Scholis Axiomati: *Nil est intellectu, quin prius fuerit in sensu;* imo & Apostolo in Epistola ad Romanos cap. 1. v. 20. scribenti: *Invisibilia Dei a creatura mundi per ea, quæ facta sunt, intellecta conspiciuntur, sempiterna quoque virtus ejus, & divinitas;* quibus verbis docet Paulus Creatoris existentiam non ex anteceptis ideis, sed probari tantum ex aspectabilibus creaturis: Quod repugnat communi Axiomati, & præsertim divinis literis, absouum, & commentitium figmentum habendum est: Ergo commentitia censenda erit & absoua opinio de ingenita Dei notitia.

Resp. nego majorem; quippe vulgare illud axioma, *Nil est intellectu, quin prius fuerit in sensu,* exponi debet de perceptione rerum corporearum, & de acquisita, non vero de congenita, & antecepta.

pta. Aut si de ista quoque volumus axioma illud accipere, in eo tantum sensu a nobis admittitur, quod animâ corpori colligata & immersa a rebus sensibilibus excitatur, ut ad inditam, atque anticipatam ideam advertat. Itaque juxta Peripateticorum, Epicureorumque mentem, proloquium illud vulgare rejicimus, sicut & aliud, quo humana mens comparatur tabulæ dolatæ, in qua imago nulla sit picta. Cohærenter dicimus Apostolum asserere hoc unum, quod per creaturas elevamur ad notitiam Dei, quoniam videntes creaturas quaslibet esse finitas ac dependentes, & proinde non esse summum bonum ac summum verum, convertimus animum ad seipsum, ubi in idea summi boni ac summi veri Divinam existentiam attingimus. Audiamus Augustinum hæc omnia explicantem Enarrat. in Psalm. XLII. num. 7. *Video enim quæ fecerit Deus meus, non autem video ipsum Deum meum, qui fecit hæc. Sed quoniam sicut cervus desidero ad fontes aquarum, & est apud eum fons vitæ, & in intellectum scriptus est Psalmus filiis Core, & invisibilia Dei per ea quæ facta sunt intellecta conspiciuntur: quid agam, ut inveniam Deum meum? Considerabo terram: facta est terra. Est magna pulchritudo terrarum, sed habet artificem. Magna miracula sunt seminum, atque gignentium; sed habent ista omnia creatorem. Ostendo magnitudinem circumfusi maris, stupeo, miror, artificem quæro: Cælum suspicio, & pulchritudinem siderum: admiror splendorem solis exerendo diem sufficientem, lunam nocturnas tenebras consolantem: mira sunt hæc, laudanda sunt hæc, vel etiam stupenda sunt hæc, neque enim terrena, sed jam cælestia sunt hæc: nondum ibi stat sitis mea: hæc miror, hæc laudo; sed eum, qui fecit hæc sitio. Redeo ad me ipsum, & quis sim etiam ipse qui talia quæro, perscrutor: invenio me habere corpus & animam; unum quod regam, aliud quo regar; corpus servire, animam imperare. Discerno animam melius esse aliquid quam corpus, ipsumque inquisitorem talium rerum non corpus, sed animam video: & tamen hæc omnia quæ collustravi, per corpus ea me collustrasse cognosco. Terram laudabam, oculis cognoveram; Cælum, sidera, solem, lunamque laudabam, oculis cognoveram. Oculis membra sunt carnis, fenestræ sunt mentis: interior est qui per hæc videt; quando cogitatione aliqua absens est, frustra patent. Deus meus, qui fecit hæc, non istis oculis est inquirendus. Aliquid etiam per seipsum conspiciat, utrum sit aliquid quod non per oculos sentiam, quasi colores & lucem; non per aures quasi cantum, & sonum; non per palatum, & linguam, quasi saporem; non per totum corpus, quasi mollietatem, & duritiem, rigorem, atque fervorem, asperitatem, lenitatemque pertractem; sed utrum sit aliquod intus quod videam. Quid est intus videam? quod neque color sit, neque sonus, neque odor, neque sapor, neque calor, aut frigus, aut duritia, aut mollietudo. Dicatur ergo mihi, quem colorem habeat Sapientia. Cam cogitamus justitiam, ejus-*

que intus in ipsa cogitatione pulchritudine fruimur, quid sonat ad aures? quid tanquam vaporem surgit ad naves? quid ori infertur? quid manu tractatur, & delectat? Et intus est, & pulchra est, & laudatur, & videtur: & si in tenebris sunt oculi isti, animus illius luce perfruitur. Quid est illud quod Tobias videbat, quando videnti filio cecus consilium vitæ dabat? Est ergo aliquid quod animus ipse corporis dominator, rector, habitator videt; quod non per oculos corporis sentit, non per aures, non per palatum, non per corporis tactum, sed per seipsum: & utique melius quod per seipsum, quam quod per servum suum. Est prorsus: seipsum enim per se ipsum videt, & animus ipse, ut norit se, videt se. Nec utique ut videat se, corporalium oculorum quærit auxilium; immo vero ab omnibus corporis sensibus, tanquam impediens, & perstreptibus abstrahit se ad se, ut videat se in se, ut noverit se apud se. Hactenus Augustinus demonstrans quomodo res corporeæ nos ad percipienda invisibilia manuducant, revocando animum ad seipsum, in quo summa veritas non per sensus, sed per inditam ipsi animo perceptionem conspicitur.

Insurgens: Quum a rerum aspectabilium contemplatione in Dei notitiam assurgimus, idea & conceptus summi boni efficitur per negationem finitatis, dependentiæ, aliarumque imperfectionum, quas in creaturis deprehendimus: Idea ergo Dei non ingenta & indita est, sed acquisita.

Resp. nego ant. Si enim recitata verba Augustini attentissime legeris, non iccirco percipitur summum bonum, independens, infinitum, æternum, quoniam res creatæ sunt dependentes, finitæ; temporales; sed contra creatæ res deprehenduntur finitæ & imperfectæ, propterea quod a summo ac perfectissimo bono deficiunt; idest quia, habent artificem, & longe absunt a perfectione auctoris, qui interiori percipitur animo. Ergo non infinitum per ideam finiti, sed finitum, per ideam infiniti dignoscitur; nam quod intrinsece est limitatum, & variabile non potest esse certa regula firmissimæ atque incommutabilis veritatis. Vide alia Augustini verba in 3. prob., cui assentitur Boetius lib. 3. de Consolat. Philosoph. Prosa 10. ubi ait: Omne quod imperfectum esse dicitur, in diminutione perfecti imperfectum esse perhibetur.

Insistes: Si idea ex rebus aspectabilibus comparata non potest esse certissimum iudicii criterium, quia creaturæ omnes finitæ sunt ac mutabiles; ergo neque Deum potest repræsentare idea ingenta atque antecepta, cum & ipsa creata sit, ideoque coarctata ac finita.

Respondent aliqui ideam creatam ac finitam non posse repræsentare Deum adæquate, bene tamen inadæquate. Verum videtur mihi hac responsio totum ideæ ingentis systema pervertere, neque argumento satisfacere. Everit ideas ingentis, quia inadæquate Deum repræsentant etiam ideæ ex creaturarum contemplatione formatæ: Non satisfa-

tisfacit argumento, quia idea creata semper in se finita est, & consequenter nequit esse ullius judicii, etiam inadæquati, constans, & immutabilis regula. Cartesiani vero aliqui respondent, esse quidem creatam ejusmodi ideam; sed tamen spectari posse dupliciter; primo modo, quatenus esse *formale*, & *proprium in mente nostra habet*: deinde *secundum esse Vicarium*: & priori modo a nobis pendere, & esse pro lubitu variabilem, idest posse nos libere cogitare, vel non cogitare: secundo autem modo habere causam necessariam, exhibere infallibiliter veritatem, neque penes nos esse, aliter, atque aliter de eadem re, quæ vera sit judicare. Ita Cartesii mentem explicat Antonius Le Grand Instit. Philosoph. P. 2. cap. 2. num. x.

At juxta Augustini principia respondetur, quod lex illa, per quam mens rationalis de rebus certa judicia pronuntiat, non est perceptio, aut aliquid se tenens ex parte potentiæ tantummodo; sed ipsum lumen indefectibile veritatis perenniter menti assistens, & perceptionem illam in intellectu producens. Constat id ex hæcenus dictis, quoniam omne creatum intrinsece mutabile debet esse: & expresse inferitur ex verbis S. P. Augustini libro de vera Religione cap. xxxi. *Nec jam illud ambigendum est, incommutabilem naturam, quæ supra rationalem animam sit, Deum esse; & ibi esse primam vitam, & primam essentiam, ubi est prima Sapientia. Nam hæc est illa incommutabilis veritas, quæ lex omnium artium recte dicitur, & ars omnipotentis artificis*. Itaque ad argumentum dist. consequens: ipsa idea ingenta creata est, quatenus dicit perceptionem rationalis animæ, concedo: quatenus dicit indefectibile lumen, quo hæc perceptio producitur, nego.

Urgebis adhuc: Si ipsum indefectibile lumen humanæ menti perpetuo adesset, rationalis creatura intuitive Deum videret, & quidem naturaliter: Hoc damnatum est a Viennensi Concilio, & improbatum a Patribus, qui ad hujusmodi Visionem requirunt Lumen gloriæ: Ergo rationali animæ illud lumen indefectibile minime illabitur.

Resp. dist. ma. Videretur a creatura rationali intuitive Deus; si ei adesset indefectibile lumen per modum naturalis legis exhibens solam existentiam Dei, & ceteras divinas perfectiones confuse, atque inferens perceptionem ænigmaticam; nego. Videretur intuitive, si lumen istud æternum mentem illustraret, & adesset per modum specialis objecti, præsentans distincte omnem divinam perfectionem, inferensque cogitationem vividam, claram, plenissimam; conc. Atque me explicio ex ipso Peripateticorum systemate. Docent hi oculum intueri propria sensatione colores, non tamen videre perspicue illam speciem, quæ oculo colores præsentat. Quare? Propterea quod species ista ad visionem tanquam medium, non tanquam speciale objectum concurrat. Pariformiter non intuebimur Deum vivide & clare, dum in corpore vivimus, eo quod indefectibile lumen est præsens menti, quatenus me-

dium est, & naturalis lex discernendi, non prout est objectum speciale, quod perspicua cognitione percipiatur. Adde animam corpori colligatam, & mutabilibus phantasmatibus addictam non posse lumen illud propria sensatione percipere, esto ratione hujus luminis cetera omnia cognoscat: quemadmodum existens in Theatro, & scenicis objectis immerfus, hæc vivide conspiciit medio lumine; quod tamen in homine, comicis distracto vividam sui perceptionem non excitat. Porro Vienneſe Concilium, ac Patres damnant eos, qui arbitrabantur Deum absque superno lumine gloriæ posse vivida, speciali, & plenissima perceptione videri; quales fuere Beguardi, alique; de quibus alibi. Illam vero imperfectam, & ænigmaticam Dei visionem adstruit beatus Paulus I. ad Corinthios cap. xiii. v. 12. *Neque enim quod ait Apostolus, Videmus nunc per speculum in ænigmate, &c. Nunc scio ex parte, non cernitur mente: cernitur plane, sed beatissimos nondum facit. Illud enim beatissimos facit, quod ait, Tunc autem facie ad faciem, &c. Tunc cognoscam, sicut & cognitus sum:* ait S. P. Aug. lib. 1. Retract. cap. xiv. num. 2. Lege & libri x. caput ix.

At rursus persistes: Si ea veritas incommutabilis, quæ Deus est, naturaliter illucet rationali creaturæ, igitur hæc naturaliter in Deum tendet, naturaliter habebit in se fidei semina, naturaliter erit Christiana: quæ profecto Semipelagianismum redolent.

Resp. non sapere Semipelagianismum, si quis asserat esse in nobis naturalem perceptionem Dei ut Auctoris naturæ, & in hunc rationalem creaturam naturaliter tendere; sed Semipelagianorum hæresis est in viribus naturæ initialem gratiam, & fidei locare primordia. Fides equidem ea, quæ sunt ordinis naturalis non spectat, sed superiora, & recondita, quæ nequeunt naturali lumine hominibus innotescere, ut sunt Trinitas, Incarnatio, alique revelata. Neque Dei existentia objectum est fidei, nisi prout creditur propter testimonium Dei revelantis, atque parati sumus illam fateri, quamquam naturali obvia non foret rationi. Quod si fides ampliori quadam significatione accipiatur, nempe pro quacunque noticia Dei; nullus negat indita cuicque semina Christianæ fidei. Sed ista minus proprie dicitur fides, eoque tantum sensu, quo Tertullianus loquens de iis, qui licet falsis diis mancipati sæpe sæpius Deum nominant, cap. xvi. i. Apologetici clamat: *O testimonium animæ naturaliter Christianæ!*

Opp. 2. Congenita idea Dei vel est habitus, vel est actus: non est actus quoniam omnis actus elicitur, & non infunditur; non est habitus, quia homini indita est sola naturalis facultas intelligendi: Ergo hæc idea Dei congenita fictitia est. In hoc argumento satis deprehendi insitæ ideæ figmentum existimat eruditus Theologus Nicolaus L'Hermelier.

Resp. Ideam si accipiatur pro sola mentis perceptione esse actum; nec

nec tamen elicitur a sola humana mente, ut supra diximus: si vero sumatur pro lumine, & incommutabili lege veritatis, datur per modum habitus, neque est sola facultas naturalis intellectionis, ut videtur fateri Honoratus Tournely; sed ipse Deus nobis intime præfens, tanquam perpetua regula ac norma, ad quam judicia nostra exigantur.

Opp. 3. Idea innata Dei vel est notitia alicujus Dei, qualiscunque ille sit; vel idea ac notitia Dei, ut est summum bonum universe; vel idea entis perfectissimi præcise: non est idea qualiscunque Dei aut veri, aut falsi, quia hæc idea non datur; non est idea Dei, prout Deus est summum bonum universe; si enim idea Dei, & idea summi boni promiscue accipiantur, sequitur Gentes, quæ Deum ignorant, nunquam peccare, nam quisvis homo etiam Ethnicus semper agit propter bonum, ideoque semper propter Deum: non est denique idea entis perfectissimi præcise; quicunque enim fatentur se habere ideam entis perfectissimi, non admittunt propterea existentiam Dei; cum Epicurei, Spinoza, & alii Athei, qui ens aliud non agnoscunt præter mundum universum, fateantur se habere ideam entis perfectissimi, & tamen negent Dei existentiam. Agitur ergo de idea veri Dei, prout est mundi auctor, & rector; sed hujusmodi idea non est innata sed adventitia: Ergo, &c. Ita ratiocinatur idem L'Herminier.

Resp. Ideam Dei nobis ingentam esse ideam summi boni, ac perfectissimi entis. Neque hinc infertur Ethnicos semper agere propter Deum, & nunquam peccare; quum rationem summi boni constituent sapenumero in eo, in quo constitui non debet. Insuper ad agendum, propter Deum non sufficit agere universe propter bonum, sed opus est ut agatur propter summum bonum; nam Deus non est bonum qualecunque, sive verum, sive apparens, sive finitum, sive infinitum; sed summum bonum, infinitum bonum, verum bonum. Ideam vero summi boni, ac perfectissimi entis, quam affirmant se habere Athei, quis non videat esse ideam perversè confectam, non inditam nobis, atque acceptam? Summum bonum quamlibet perfectionem complectitur. Itaque cum aut Epicurus, aut Spinoza, aut quisvis Atheus in Mundo omnem perfectionem deprehenderit, tunc poterit jure merito ideam perfectissimi entis cum idea mundi confundere. Verum perdet operam; nam si circumeat universas creaturas quærens summum bonum, undique illæ clamabunt: *Quære super nos, non sumus*. Creatio denique, & quaecunque opus ad extra, libere fit a Deo, ideoque in ingenta notitia Dei non relucet: sed Deus concipitur ut mundi auctor, & rector per ideam ex ejus operibus acquisitam.

Opp. ultimo Henno: Habitus primorum principiorum sufficit ut firmissimum proferatur judicium; Sed habitus primorum principiorum est acquisitus: Ergo habitus acquisitus sufficit ut judicium certissimum proferatur.

Resp.

Resp. eadem brevitate, qua Henno argumentationes omnes coniungit, nego minorem: habitum enim primorum principiorum, qui sit irrefragabilis veritas nullum agnosco præter ideam ipsam ingentam, & intime nobis assistens indefectibile lumen.

PROPOSITIO II. Supposita idea congenita Dei singulis hominibus insita, facile demonstratur Deum ipsum existere.

Prob. Quælibet idea habet causam, in qua aut formaliter, aut eminenter præcontinetur: Idea entis summe perfecti, ut ostendimus Propos. præcedenti, neque formaliter, neque eminenter in creaturis præcontinetur: Ergo creaturæ nequeunt esse causa ideæ entis summe perfecti; & consequenter hæc idea ab ipso Deo proficiscitur. Et confirmatur: nam, ut ex dictis constat, quidquid in idea congenita; & clara alicujus rei elucet, id firmissime & absque erroris periculo debet de eadem re enunciari: In idea Dei, quæ exhibet notionem summi boni, ideoque cuiusque perfectionis, elucet quoque existentia, cum & ipsa sit aliqua perfectio rei: Ergo existentia invicta, certoque iudicio debet enunciari de Deo. Quibus argumentationibus utuntur non solum Platonici, & Cartesiani Philosophi, sed etiam S. P. Augustinus lib. VII. de Civit. Dei cap. 6., in quo ubi ostendit inesse animis hominum speciem intelligibilem rerum, infert hanc speciem, si est prima & incommutabilis, esse incomparabilem, in eaque omnem contineri perfectionem, ideoque rectissime ex ea consequi quod existat rerum omnium principium.

Opp. 1. Tametsi in idea substantiæ cogitantis actualis existentia reluceat, & in idea creaturarum existentia possibilis; nihilominus certus non ero substantiam cogitantem actu existere, aut creaturam existere posse, nisi supposita divina providentia ac veracitate, quæ non patitur quemlibet hominem decipi: Ergo etiam si in idea, ac notionem entis summe perfecti resplendeat existentia actualis, non proinde certus ero de summi Numinis existentia, nisi divina veracitate supposita: & consequenter prædicta argumenta petunt principium, idque supponunt quod probant. Antecedens admittitur a Cartesio, qui medit. III. ait: *Sum certus me esse rem cogitantem. Unde vero certus sum? quia claram & distinctam ejus habeo perceptionem. Quid si etiam hic me Deus fallat, ut id clare, & distincte percipere mihi videar, quod nihilominus falsum est? Fieri sane potest. Examinare igitur debeo, quamprimum occurret occasio, an sit Deus, & si sit, an possit esse deceptor.*

Resp. nego antecedens, non enim Cartesium nos undequaque sequimur, sed Augustinum. Ab illo dialelysmo & circulum committi contendit Huetius Censuræ cap. IV. n. X. quippe revera probat Deum existere, quia ego cogito, & vera est idea quæ est in me; & deinde probat veram esse ideam quæ est in me, quia Deus est, & non potest esse

esse deceptor . Scribit etiam Wolzogenius in Critica Meditationis 111. Cartesium binis præcedentibus Medd. inanem luisse operam, quippe antequam demonstret esse Deum qui non possit decipere, nequit certus esse, id esse verum, quod de sua natura clare, & distincte sibi visus est percipisse, se nimirum esse substantiam cogitantem . Itaque nos cum Augustino idearum ingenitarum nomine non intelligimus solam perceptionem mentis, sed legem incommutabilem, & indefectibile lumen, ut satis in superiori Proposit. explicavimus . Idea sic accepta non est clara & certa supposita divina veracitate, sed e contra certi sumus Deum esse veracem, quoniam veracitas relucet in idea entis undequaque perfecti . Ex quo autem hæc idea sit ipsum divinum lumen increatum, ideoque ipsemet Deus, non consequitur nos quoque peccare *ἡμᾶς αἰσῶν*, per circulum, ac petitionem principii: siquidem idea non est divinum lumen prout existit in se, sed divinum lumen prout est nobis intime præsens; & consequenter non proficiscitur nostra argumentatio a præsupposita divina existentia ad hanc eandem probandam; sed a manifesta existentia divini luminis in mente nostra ad demonstrandam Dei existentiam in se .

Opp. 2. Ex quo in idea E. G. trianguli dilucide percipitur non posse dari triangulum, cujus tres anguli non sint duobus rectis æquales, non consequitur existere actu triangulum: & ex quo in conceptu ideoque creaturæ existentis reluceat perspicue ipsamet existentia, non proinde certi sumus creaturam existere: Ergo neque certo percipimus extare Deum, ex eo quod in idea clara Dei obvia sit existentia .

Resp. nego consequentiam, & paritatem. Etenim in nulla idea, ingenita cujusque creaturæ venit existentia actualis: ad essentiam quippe rei creatæ pertinet duntaxat quod possit esse, non quod sit actu . Quapropter idea creaturæ actualiter existentis est idea factitia, non antecepta . Hæc videntur statuta idea cuique insita facile a Cartesianis explanari, ut ab Edmundo Purchotio cap. II. Pneumatologiæ 1. & 2. argum. metaphysico, & Antonio Le-Grand loc. cit.

PROPOSITIO III. Quod idea entis perfectissimi, ex qua modo demonstrabatur Deum esse, reapse sit cuique congenita, & indita, non est ita certum, ut ex ea possint Athei evidenter convinci: at certum est dari hanc ideam aut insitam, aut a sensibus hausitam, ex caque divinam probari existentiam .

Habet hæc propositio duas partes, quarum prima est contra omnes Cartesianos, qui arbitrantur se demonstrare ideas congenitas probationibus geometricis, non probabilibus tantum ac plausibilibus: altera pars revocari nequit in dubium .

Itaque primam Propositionis partem sic ostendo . In primis, si dixeris pluribus Theologis hujus, atque antiquioris ætatis, datur notitia Dei anticipata & ingenita, quæ non comparatur per sensus, hi
salva

salva Fide ideam istam dari negabunt : Ergo a fortiori poterunt eandem ideam negare Athei .

Deinde : Probaturus adversus Atheos existere hanc ideam , aut conaberis id efficere sacris literis , aut Patrum testimoniis , aut naturali ratione . Si urgeas divinarum Scripturarum auctoritatem , Atheus eas spernit ; quin & Theologi plurimi illas interpretantur non recurrendo ad ullam hujusmodi ideam ; cujus existentia si expresse comprobaretur ex sacris literis , pertineret ad fidem : quod nemo potest asserere . Si provocas Atheum Sanctorum Patrum sententiis ; in eundem incidis scopulum : nam pervicax ille Atheus Patrum doctrinæ non credit , & furdo canis . Fidelis vero Sanctorum dicta libenter excipit ; sed ea non prorsus absurde exponit de notitia acquisita , non de accepta . Ergo cum Atheis ratione , non auctoritate certandum est . Jam vero cogaris ostendere congenitam ideam Dei argumentis a ratione petitis : quæ ad duo capita revocabuntur , sive ad perceptionem Cartesii , sive ad legem incommutabilem , quam ego cum Augustino propugno . Atqui neutra nedum Atheo , verum nec unicuique fidei firmissimum extorquet assensum .

Loquamur de sententia Cartesii . Hujus doctrinæ prolixius expositione hæc est summa : Cum ego sim substantia cogitans , ideam entis perfectissimi in mente habeo : Hæc idea a me non proficiscitur , quia ejus objectivam realitatem non æquo : Ergo alia præter me illius ideæ existit causa . Principio indubitanter asserit se esse substantiam cogitantem , quod ait posse in dubium revocari , nisi prius examinetur , num sit Deus , & possit esse deceptor : quod ait Huetius evertere quod Cartesius molitur , & esse jocularum petitionem principii . Deinde affirmat se habere dum cogitat ideas in mente , & utique innatas . Quamdiu non noverit Deum deceptorem non esse , dubitare debet , an ideæ quas habet sint mera phantasmata , aut maligni spiritus illusiones : cumque omni sensu non careat , erunt fortassis hæc ideæ imagines rerum per sensus perceptarum , quæ adhuc ejus menti obversentur . Ait inter alias ideas , se habere ideam entis perfectissimi , & hanc a se distinctissime percipi . Sed videtur aliquibus rem implicatam narrare ; quandoquidem si talis idea distincte percipitur , habet realitatem subjectivam finitam ac terminatam , ideoque finita ac terminata erit quoque realitas objectiva : & si dixerit ideam illam non representare infinitum in tota sua latipotentia ; non erit hæc idea infiniti , quemadmodum non erit imago hominis , quæ extremum refert capillum . Docet se non esse causam illius ideæ ; sed cum ipse Cartesius fateatur ideam nullam ex se realitatem formalem exigere , præter illam quam mutuatur a cogitatione , cujus est modus , sequitur quod idea habeat ab ipsa cogitatione etiam realitatem objectivam , & quod causa hujus ideæ sit ipsamet cogitatio , non Deus . Præterea cum non sit , ut modo dicebam , nisi
idea

idea ac perceptio finita, poterit aliunde proficisci, quam a re infinita, ac summe perfecta. Ita eludit præfatum argumentum Cartesii Wolzogenius; qui breviter a me dicta late explicat, & amplioribus notis confirmat. Addit Huetius, Cartesium sese proprio gladio jugulare; aperte enim fatetur quod non possit percipi infinitio rei infinitæ, nisi negative: ideoque percipitur res infinita per ideam finiti, non e contra, ut alibi affirmat; atque hanc manifestissimam repugnantiam non satis candide ab ipso excusari in Epistola xv. & xvi. Tom. 2. Vide Censuram Huetii loco cit. num. 111. & 1v.

Alterum Cartesii argumentum eadem facilitate convellitur; tum quia perceptio quæque, licet clara, est finita & variabilis, & per consequens non potest esse incommutabile veritatis criterium; tum etiam quia Cartesiani asseveranter docent, posse Deum efficere ut vera sint, quæ clarissima perceptione nobis videntur esse falsa. Ergo, inquit Huetius cap. 11. num. xii., fieri quoque potest, ut clara, & distincta perceptio non sit norma veritatis. Itaque huiusmodi argumentatio: Datur idea ingenita qualis adstruitur a Cartesio, Ergo datur Deus, non est contra Atheos invictissima, quia potest impune negari antecedens.

Videamus modo de idea cuique indita, qualem statuimus ex Augustino. Noster Ariminensis Dist. 111. q. 1v. art. 1. duplici via omnia S. Patris loca explicat absque Dei notitia congenita. Primo animadvertit quod aliquid cognosci in veritate superna potest diversa ratione explanari; vel enim cognoscitur objective, sive ut in objecto cognito, quemadmodum res absentes percipiuntur in propria specie: vel cognoscitur causaliter, sicuti color dicitur videri in lumine, non quod videatur in eo tanquam in medio cognito, cum color videatur immediate in seipso, sed quia lumen est partialis causa visionis, qua color in se videtur. Augustinus itaque affirmat omnia cognosci in prima veritate secundo modo, idest causaliter, non objective; tanquam in lumine quod est causa nostræ perceptionis, non tanquam in idea, sive specie. Et revera Augustinus lib. 2. de lib. arbitrio cap. 17. ait: *Sicut multa, & diversa sunt, quæ in luce solis vident homines, lux tamen ipsa una est; ita lux sapientiæ, in qua ipsa videri possunt, omnibus sapientibus est una communis.* Quo in loco S. Pater supernam veritatem comparat luci, quæ causat visionem rerum corporearum, quæ tamen in seipsis videntur, & non in luce. Hæc non dissentient Peripatetici; qui existimant omnem notitiam esse haustam a sensibus. Quis enim sanæ mentis neget unquam, primum ac summum verum ad nostras perceptiones tanquam causam concurrere?

Præterea observat Gregorius, quod S. Pater in eodem libro de libro arbitrio cap. 4. volens ostendere Deum esse, incipit a rebus immediate notis, puta, quod nos sumus, vivimus, & intelligimus;

Tol.

H

& deinde

& deinde progreditur per gradus perfectionum, quia scilicet vivētia præstantiora sunt iis, quæ tantum sunt, & intelligentia iis, quæ tantum sunt, & vivunt; & tandem probat quod sit veritas, quæ mentibus nostris est præstantior, & inde concludit Deum esse, idque præstat quoque in VI 11. de Civit. Dei cap. 6. & Enarat. in Pl. 41. *Ex quibus apparet, ait Ariminenſis, quod notitia Dei non eſt prior, nec ex illa proceditur ad notitiam aliorum: ſed e contra ex aliis nobis notis probatur eſſe aliquam veritatem primam incommutabilem; ex qua cauſſaliter nota ſunt nobis quæcunque incommutabiliter vera ſunt.* Eadem ratione Auguſtinianam ſententiam expedit Thomiſta cum ſuo Angelico Præceptore; qui 1. Parte quæſt. xii. art. xi. ad 3. hæc habet: *Omnia dicimur in Deo videre, & ſecundum ipſum de omnibus judicare, in quantum per participationem ſui luminis omnia cognoviſimus, & dijudicamus. Nam & ipſum lumen naturale rationis participatio quædam eſt divini luminis, ſicut etiam omnia ſenſibilia dicimur videre, & judicare in ſole, ideſt per lumen ſolis. Unde dicit Auguſtinus primo Soliloquiorum, Diſciplinæ ſpectamina videri non poſſunt, niſi aliquo velut ſuo ſole illuſtrentur, videlicet Deo.* Ita nimirum abſque ulla idea congenita & antecepta depromptis ex Auguſtino argumentis occurrunt.

Hæc nullatenus nos a ſtatuta ſuperius congenita idea Dei debent removere: nam Philoſophiæ Carteliæ Cenſoribus reſpondendum eſt, a nobis non in ſola perceptione, ſed in æterno & indefectibili lumine, quod proculdubio realitatem habet objectivam, hanc ideam conſtitui. His vero, Gregorio videlicet, ac D. Thomæ in eo aſſentior, quod ſempiternum lumen eſt cauſſa noſtræ perceptionis: ſed nego iſtud æternum lumen immediate in ſe non videri, nec in ſe videri lumen ſolis, quando per illud corporea conſpiciamus. Utique lumen non videmus intuitivè, propterea quod concurret ad viſionem tanquam medium, non tanquam objectum, quod propria ſenſatione percipiatur. Videtur tamen, & videtur in ſe, & per illud res corporeæ videntur, non contra illud videtur per res corporeas. Idem affirmamus de ſempiterno veritatis lumine relate ad quælibet intelligibilia. Supra rem totam in Reſp. ad 1. Oppoſ. explicavimus. At quorſum hæc? Ingenue fatendum erat, ſententiam de anteceptis ideis non omnibus probari, neque ex hoc fonte hauriri invictiſſimum contra Atheos argumentum.

Ceterum, quod erat altera pars Propositionis, datur notitia entis perfectiſſimi, aut ſit naturaliter indita, aut acquiſita: Ergo datur Deus. Probatur conſequentia: Si hæc idea & notitia eſt ingēnita, nullam aliam habet cauſſam niſi lumen incommutabile veritatis, imo hoc ipſum incommutabile lumen nobis intime aſſiſtens eſt ipſa idea: Lumen iſtud indefectibile veritatis eſt Deus: Ergo ſi datur notitia ingēnita Dei, datur Deus. Atque hoc argumentum ex 1. & 2. Propoſit. ſatis corroborat.

boratur . Si vero hæc idea entis summe perfecti sit e sensibus hausta , ita argumentor : Efficitur idea summi boni , summi veri , summè perfecti , quia inter creaturas conspiciamus unam magis bonam , magis veram , magis perfectam altera , ideoque creaturæ magis , minusve approximantur bonitati , veritati , & perfectioni , quæ sic ceteris supereminet , ut superiorem non habeat : Sed bonitas , veritas , & qualiscunque perfectio , quæ ita ceteras antecellit , ut superiorem non habeat , est Deus : Ergo si datur idea entis summè perfecti etiam a sensibus hausta , existit Deus . Utitur hoc argumento Augustinus Enarrat. 2. in Ps. 26. & lib. viii. de Civit. Dei cap. 6. Anselmus in Monologio cap. 4. Richardus Victorinus lib. 1. de Trinitate cap. 11. D. Thomas quæst. 2. art. 3. Prob. 4. Aegidius noster dist. 3. p. 1. princ. 1. art. 3. Philosophi ac Theologi omnes : explanatque illud disserta eruditione Petavius lib. 1. cap. 2. num. vii. vii. & viii.

Opp. 1. Ex pluribus creaturis , quarum una magis participat rationem mali quàm altera , non potest hauriri idea summi mali existentis . Ergo ex pluribus creaturis , quarum una est altera melior , effici nequit notio existentis summi boni .

Resp. ideam summi mali existentis commentitiam esse , ac repugnantem . Quid est enim malum , nisi alicujus boni defectus ? Igitur summum malum oportet omni careat bonitate : At existentia est bonum aliquod : Nequit ergo summum malum percipi cum existentia . Bonum contra est perfectio carens aliquo malo : erit itaque omne bonum expers quacunque malitia : Atqui non existere aliquod malum est : Ergo omne bonum concipi numquam potest absque existentia . Quamobrem nego præfati argumenti consecutionem .

Opp. 2. Ex quo detur unus E. G. color lucidior altero , unum animal alio perfectius , minime sequitur dari colorem lucidissimum , aut perfectissimum animal : Igitur ex quo aliqua creatura sit melior altera , frustra arguitur quod existat res optima , & singulis creaturis præstantior .

Resp. retorquendo argumentum : nempe ex quo unus color præcellat alteri recte consequitur dari albedinem , quæ est color aliis lucentior ; & ex quo unum animal superet aliud infertur existere hominem , animal rationale brutis perfectius . Ergo ex quo una res sit melior altera probatur dari rem optimam singulis rebus præstantiorem . Verum tamen est , quod in idea hujus coloris vividioris , scilicet albedinis , atque in idea istius animalis rationalis , videlicet hominis , non refulcet infinitas , neque necessaria existentia ; quoniam idea infinitatis repugnat cum idea rei finitæ , cujusmodi est quilibet color ; & idea necessariæ existentia adversatur ideæ rei contingentis , cujusmodi est quodcunque animal . At idea infinitatis comprehenditur e contra in idea summi boni ; quandoquidem idea summi boni qualemcunque exhibet perfectionem :

infinitas autem aliqua perfectio est. Sed de ideis, quantum Augustiniani Theologi intererat, hæcenus.

C A P U T II.

Adversus Atheos argumenta reliqua producantur:

SOLIS a natura inistis perceptionibus pergebat Renatus Cartesius ostendere Deum esse; at denique in vulgatissimam ratiocinationem prorupit: *Si sit alia præter Deum causa, quæri potest an sit ex se, vel ab alio? si ex se, erit Deus, si ab alia, toties quæretur, donec ad illam perveniat, quæ a se, & sit Deus, cum in infinitum progredi non liceat.* Quod animadvertens Socinianus Cartesii Cenfor, *Cur, quæso, inquit, per tot ambages & meandros eo contendit auctor, quo trita via jam pridem alii pervenerunt?* De ideis & nos quidem, ut juxta Augustinum statuerentur, plura diximus: nolumus tamen ab ea semita deflectere, quæ ceteri omnes incedunt; atque hoc loco alias probationes afferre instituiamus.

Primum momentum metaphysicum ex rerum creaturarum contingentia.

Quæcunque oculis nostris conspiciuntur, contingenter existunt; nam videmus arbores germinare & arescere, fontes fluere & exsiccari, animantia generari ac perire, ipsumque præstantissimum animal hominem, Ps. LXXXIX. 6. comparari herbæ, quæ *mane floreat & transeat, vespere decidat, induet, & arescat*: Hæc rerum aspectabilium contingentia supponit extantiam entis necessarii, ac summè perfecti, quod existat immutabiliter, & a se: Ergo ens summè perfectum ac necessarium, nempe Deus, revera existit. Prob. min. Si omnia essent contingentia, neque esset ens summum ac necessarium, cum res contingens ita sit ut possit non esse, rationabiliter fieret suppositio, quod nulla res existeret: Ea suppositione facta manifestum est existere ens summum ac necessarium: Ergo si omnia aspectabilia contingenter sunt, consequitur entis summi ac necessarij existentia. Minor facile ostenditur, quippe si supponatur nihil existere, nihil erit producibile, omniaque impossibilia; quod enim nihil est, non potest esse causa rei existentis.

Confirmatur ex Damasceno libro 1. de Fide Orth. Quidquid est mutabile & contingens, creatum est, vel increatum: Si creatum; ergo oportet esse conditorem omnium rerum mutabilium & contingentium.

Si

Si increatum, ergo non erit contingens, sed immutabile, quoniam non potest esse mutationi subiectum, nisi quod esse cepit a mutatione.

Rursus corroboratur: Quæ contingenter existunt nullam habent vim sese conservandi, possunt enim contingentia singulis momentis definire: Igitur quod perseverent, beneficium est alicujus causæ, quæ ea fervet, & in dies quodammodo reproducat: Atqui non minor potentia requiritur ad rem producendam, quàm conservandam: Ergo si ut perseverent indigent causa, ac principio non contingenti, tali causâ ac principio indigent quoque ut existant.

Respondet Epicureus dari quidem ens necessarium, ac perpetuum, at istud nullum esse præter insectiles atomos, cum experientia comperit sit ex nihilo nihil fieri, & nihil in nihilum reverti, ut decem argumentis demonstrat Lucretius Lib. 1. De rerum natura ab eo versu,

Nam si de nihilo fierent, ex omnibus rebus

Omne genus nasci posset &c.

Sed nihil absurdius Epicuri deliramentis. Primo quoniam atomorum quædam sunt solidiores, quædam humectiores, quædam rotundæ, quædam aliis instructæ figuris, & omnes perpetua collisione franguntur, adeoque nequeant esse insectiles, ac persistentes. Deinde dato Epicureis quod omnes atomi, & rerum aspectabilium semina sint perfectæ solida, soliditas non potest percipi nisi partium contactu; partium vero contactus non datur nisi in corporibus coneretis: aut saltem si atomi deprehenduntur solidæ, deprehenduntur eo contactu, quo percipiuntur solida corpora quæque concreta. Itaque si ex soliditate posset argui æterna existentia, quælibet corpora concreta, quæ tactu percipiuntur solida, forent æque indissolubilia, ac atomi & semina. Ulterius, ut demonstrat Thomas Creechius Censura in librum 1. Lucretii, argumenta, quibus Epicurei adstruunt suis atomis æternitatem, vitiosa inniuntur suppositione. Detur enim, quodlibet e quo libet oriri non posse, res nasci statutis temporibus, agros fertiliores reddi agricolarum industria, detur quidquid affirmat Lucretius: quomodo inde efficitur, ipsas atomos non fuisse productas, & nihil fieri supremi Numinis providentia? *Neutrum*, ait Creechius, *concludet; ideoque decem argumenta perierunt.* Rectissime igitur creditur Deus omnia de nihilo fecisse, quia etiam si omnia formata de ista materia facta sunt, hæc ipsa materia tamen de omnino nihilo facta est, inquit S. P. Augustinus lib. 1. de Genes. contra Manichæos.

Respondet Spinoza nullum dari ens contingens ac producibile, sed res omnes solum produci ratione extensionis, quippe omnis substantia definitur, *Eus per se subsistens*: Atqui omnes res corporeæ sunt substantiæ: Ergo existunt per se, nec sunt ab ente aliquo necessario productæ.

Verum Spinoza inaniter fucum facit; definitio enim substantiæ, quod

quod sit *ens per se existens*, est definitio substantiæ Dialecticorum, idest ideæ, qua percipitur res in se existens, non subiecto adherens, ut figura, extensio, motus, & alia quæ dicimus accidentia: quæ definitio convenit etiam substantiæ productæ, & a necessario ente distinctæ, ut animæ, corpori, plantæ, rebusque universis spiritualibus, & corporeis. Quid est ergo propriæ substantiæ? id quod est, (aut a se, aut a Deo fit), & non advenit rei quæ est. *Dicitur homo, dicitur cælum, dicitur sol, luna, lapis, mare, aer: omnia ista substantiæ sunt, eo ipso quo sunt*: ait Augustinus in Psalm. LXXIII. ferm. 1. num. 5. Si contenderet Spinoza, a nulla secunda causa produci novam substantiam, & formas quasque esse materiæ congeriem, modum ac dispositionem, quia nulla substantia potest ex nihilo a creatura produci, tamen obvia esset responsio, quod formæ educuntur e subiecto, quo non eget causa creatrix, concederem argumentum; non enim quisquis negat formas Peripateticas æstimandus est atheus, dummodo asserat permixtionem, & particularum congeriem, in qua statuit formas, fieri circa materiam a Deo productam, quæcunque ea demum sit.

Respondent alii Athei, ineptam esse illam consecutionem, quæcunque res aspectabiles sunt contingentes, ergo contingens erit tota rerum aspectabilium complexio; non enim a distributivo ad collectivum, a partibus ad totum tenet argumentatio.

Sed inutilis sane responsio; nam etiam si non valeat illatio a partibus ad totum in quibusdam enunciationibus, quæ pertinent ad extensionem continuam, vel discretam, E. G. tenuissimæ sunt singulæ guttæ aquarum, pauci sunt incolæ unius oppidi, ergo parum extenditur mare, neque multitudinem efficiunt homines universi: valet nihilominus id genus argumentationis in ceteris, præsertim, quæ ad essentiam pertinent, V. G. Quilibet lapis est corpus, singuli homines sunt rationales, unaquæque particula aquæ est fluida, igitur omnis acervus lapidum habet extensionem, universa hominum collectio pollet ratione, fluidus est oceanus, aut fluvius. Certe quod res contingentes possint non esse, ad earum spectat essentiam; si enim ita essent ut non possent non esse, incommutabiles forent, non contingentes.

Oppones: Ex quo singula possibilia possint esse, non consequitur ergo omnia possibilia collectivè possunt actu existere: Ergo ex quo contingentia singula possint non esse, non inferitur, quod omnia contingentia, collectivè valeant actu non existere. Resp. nego paritatem. In idea ac perceptione possibilium venit existentia possibilis, non actualis, ideoque repugnat quod omnia collectivè possibilia actu existant; quandoquidem si omnia possibilia sint actu, jam nullum remanet quod sit potentia, & consequenter tollitur omnis possibilitas. Contra in idea contingentium percipitur ex æquo potestas existendi, & potestas

stas non existendi : ac proinde semper sunt contingentia ac mutabilia, siue supponantur in actuali existentia cum potestate ad non existendum, siue non extantia actu cum possibilitate existendi.

Momentum secundum Physicum ex motu, ac serie
causarum secundarum.

Sensu vividissimo omnia moveri conspiciamus,
Nam certe non inter se stipata cohaeret
Materies, quoniam minui rem quamque videmus ;
Et quasi longinquo fluere omnia cernimus ævo,
Ex oculisque vetustatem subducere nostris :

Ait idem Lucretius lib. 2. Sed quæcumque moventur primitus a superna causa, quæ sit immobilis, moveri debent : Ergo existit hæc causa suprema atque immobilis, quæ Deus est. Minor probatur ; etenim, quæ moventur vel moventur a se, vel ab alio ; non a se, aliàs erunt primum principium movens immotum, quod nos dicimus Deum : ergo moventur ab alio : Atqui in causarum serie repugnat processus in infinitum : Sistendum est igitur in aliqua prima causa movente quasunque alias, quæ causa est Deus. Quod in causarum serie repugnet processus in infinitum demonstrant omnes Theologi, & Philosophi, quia aliàs nullus effectus produceretur in tempore ; cum enim res præsertim corporeæ moveantur, & agant temporum intervallo, si numero infinitæ essent causæ, a motione illius causæ quæ nunc agit nullis sæculorum spatiis ad primam causam moventem posset perveniri. Singulare autem exemplum protulit ante Mersennium sapientissimus noster Aegidius 2. Meth. q. 18. ex numerorum ratione. Enim vero si non detur unitas, quæ est principium numerorum, nullus numerus poterit supputari ; nam nisi sit unitas, non potest dari binarium, quia istud resultat ex duplici unitate ; & nisi detur binarium, excogitari nequit numerus quaternarius, resultans ex duplici binario, &c. At causæ subordinatæ, quarum una movet alteram, se habent ad instar numerorum, quorum unus alium supponit : Ergo nisi detur causa movens unica ac prima, nulla alia causa movens poterit excogitari.

Quod vero prima causa ceteras omnes præmovens sit Deus, ita evincitur ex Augustino lib. x. Confes. cap. vi. Quocunque corpore perfectior est anima, quæ corpus movet ; Ergo qualicunque re mota præstantior est causa, quæ movet omnia. Rem autem omnium præstantissimam esse Deum fatetur singulorum hominum sensus. *Veritas enim dicit mihi : Non est Deus tuus calum, & terra, neque omne corpus. Hoc dicit eorum natura videnti : Moles est, moles minor est in parte, quàm in toto. Jam tu melior es, tibi dico anima, quoniam tu vegetus*

getas molem corporis tui, præbens ei vitam, quod nullum corpus præstat corpori. Deus autem tuus etiam tibi vita vita est. Sed lege totum Caput præcitatum magni Augustini.

Hoc argumentum videtur invictissimum etiam Hugoni Grotio, qui libro 1. de Veritate Religionis Christi. ita breviter ac diserte illud proponit. *Res aliquas esse, quæ esse caperint, sensu ipso & confessione omnium constat. Ea autem res sibi non fuerunt causa, ut essent: nam quod non est agere non potest; nec ipsa res esse potuit, antequam esset. Sequitur igitur, ut aliunde habeant sui originem: quod non tantum de illis rebus, quas ipsi aut conspiciamus, aut conspeximus fatendum est; sed & de iis, unde illa ortum habent, donec tandem ad aliquam causam perveniamus, quæ esse nunquam caperit, &c.*

Respondet Epicureus dari quidem motus, sed horum primam effectricem causam esse atomos, quæ per inane infinitum deorsum tendentes interjecto inani cohærescunt, rerumque omnium formas efficiunt.

Belle Lactantius Firmianus libro divinarum Instit. 111. cap. 17. ait: *Nemo ista præter unum Leucippum somniavit, a quo Democritus eruditus hæreditatem stultitiæ reliquit Epicuro.* Et quidem Epicurei opinantur corpuscula deorsum descendere, quoniam eo genere motus corpora quoque concreta feruntur. At inepta est consecutio: lapis, lignum, & omne grave tendit deorsum, ergo eadem ratione moveri debent horum concretorum particule; rotæ enim, elateres, & reliquæ partes machinæ non moventur seorsim, quomodo faciunt conjunctæ. Præterea vel atomi recta moventur lineis parallelis, vel paululum incurvantur, ut ex ipsis fluant concreta: si hoc secundum asserat Epicurus, motus atomorum non erit essentialiter rectus; si primum, affirmet, ergo nunquam cohærescent ad perficienda corpora, nisi ab exteriori aliqua causa inclinentur; parallelæ enim lineæ nunquam sese intercident quocunque protrahantur. Dato igitur unicuique corpori motu recto, ut non diffidentur recentiores Philosophi plurimi, *quæ nova causa in natura est, quæ declinet atomum? aut num sortiuntur inter se, quæ declinet, quæ non? aut cur minimo declinet intervallo, majore non? aut cur declinet uno minimo, non declinet duobus, aut tribus?* Ita hortos Epicuri, ait Creechius, vastat Cicero in lib. de Fato. Apposite de insanissimo Philosopho Augustinus lib. 111. contra Academicos cap. x. num. 23. *Iste luxuriosus cum atomos quasi ancullas suas, idest corpuscula quæ in tenebris letus amplectitur, non tenere viam suam, sed in alienos limites passim sponte declinare permittit, totum patrimonium etiam per jurgia dissipavit.*

Respondent quidam Pagani Sineses omnium rerum causam esse bonitatem quamdam essentialem undique diffusam, sed a materia indistinctam, quæ est aut materies quædam subtilior, aut quinta Pythagoricorum essentia.

Hoc

Hoc Indorum systema aperte dictis confoditur. Etenim hæc bonitas si est a se, erit Deus; si ab alio, erit a Deo, & erit bonitas per participationem, non per essentiam. In subtiliori autem materia, quam Pythagoras quintam vocat essentiam locare summam bonitatem, putidum figmentum est: quippe si hæc summa bonitas est ipsa materia in quolibet corpore divisa, quomodo est una, quomodo universalis, quomodo undique circumfusa? Sed neque differt iste, nisi nomine tenuis, ab errore Epicuri & Spinosæ, quem nuperrime refutavi. Non opus est igitur, ut in eo refellendo immoremur. *Videte, quam expedita sit sententia Catholicæ disciplinæ, quæ aliud dicit bonum, quod summe, ac per se bonum est, & non participatione alicujus boni, sed propria natura & essentia; aliud, quod participando bonum, & habendo, habet de illo summo bono, ut bonum sit, in se tamen manente illo, nihilque amittente. Ita Deus summum bonum est, & ea quæ fecit bona sunt omnia, quamvis non sint tam bona, quam est ille ipse, qui fecit. Quis enim hoc tam insanus audet exigere, ut equalia sint artificis opera, & condita conditori? Quid amplius desideratis? An etiam vultis aliquid planius? Augustinus lib. II. de moribus Manichæorum cap. IV.*

Opp. I. Ut servetur causarum series, non opus est deveniamus ad primam, res enim creatæ ad instar catenularum in circulo connectuntur, & sese movent ad invicem: Ergo athei effugiunt processum in infinitum, etiamsi negent existere primam causam.

Resp. nego ant. Etenim partes circuli non a se invicem producuntur, sed tantum inter se habent connexionem & ordinem, & nihil implicat quominus plures partes distinctæ sibi mutuo cohareant. At res productæ a suis causis efficiuntur, & necesse est causam vel tempore, vel natura suis effectibus antecire. Sic in describenda circuli periferia unum punctum effluit ab alio, & nunquam consurgeret circulus, si non esset primum punctum, unde alia ad efformandam lineam exirent.

Opp. 2. Creatæ voluntas movet seipsam ad bonum quidem in sententia illorum qui negant vitæ ac prædeterminantis gratiæ necessitatem, ad malum vero in omnium Theologorum sententia: Ergo falsum est moveri ab alio quidquid movetur.

Resp. voluntatem creatam ad bonum moveri per virtutem sibi a Deo inditam, sive sit gratia prædeterminans, sive indifferens, ideoque virtualiter moveri ab alio; imo ad primam intentionem finis, nullatenus seipsam movet, sed movetur; cum illa prior intentio sit prorsus indeliberata. Moveri autem ad malum non est aliquid efficere, sed deficere. *Tu fortasse, ait S. P. Augustinus lib. 2. de libero arbitrio cap. 20. Tu fortasse quesiturns es, quoniam movetur voluntas cum se avertit ab incommutabili bono ad mutabile bonum, unde ei iste motus exisat; qui profecto malus est, tamen si voluntas libera, quia sine illa*

To. I.

I

acc

nec recte vivi potest, in bonis numeranda sit.... Omnem rem, ubi mensuram & numerum, & ordinem videris, Deo artifice tribuere, ne cuncteris. Unde autem ista penitus detraxeris, nihil omnino remanebit: quia etsi remanserit aliqua forma alicujus inchoatio, ubi neque mensuram, neque numerum, neque ordinem invenias, quia ubicunque ista sunt forma perfecta est, oportet auferas etiam ipsam inchoationem formæ, quæ tanquam materies subjacere videtur artifice. Si enim formæ perfectio bonum est, nonnullum jam bonum est & formæ inchoatio: ita detractio penitus omni bono, non quidem nonnihil, sed omnino nihil remanebit. Omne autem bonum ex Deo: nulla ergo natura est, quæ non sit ex Deo.

Momentum III. petitum ex rerum aspectabilium compagine.

Si infimæ fortis Philosophus, ac prorsus non stupidæ mentis homo universum intueatur, fieri non potest quin statim percipiat ex recta partium concatenatione, fuisse productum a causa, quæ sit maxima sapientia ac ratione prædita, neque somniare poterit fortuita corporum incurfione fuisse compactum: Hæc causa auctrix, quæ universo molem tanto artificio construxit, Deus est: Ergo nullus, nisi forte mente & oculis captus, hujus Dei existentiam inficiabitur. Minor propositio probatur primo contra omnes atheos pluribus exemplis. Unum affert Tullius lib. 2. de natura Deorum illius, qui cum in domum aliquam, aut in gymnasium, aut in forum venerit, cum videat omnium rerum rationem, modum, disciplinam, statim intelligit esse aliquem qui præsit, & cui pareatur. Alterum proferunt Philo lib. 1. de Monarchia, Athanasius in libro contra Gentiles, Auctor Quæstionum quæ tribuuntur Justino, quæst. 3., & S. P. Augustinus lib. II. de Civit. Dei cap. 4. ab eo qui in civitate, vel exercitu leges optimas, cives, milites, plebem in suo ordine videns, non dubitat, quin civitas a Principe, & exercitus ab Imperatore regatur. Aliud exemplum producit Creechius Censura in 2. librum Lucretii, & Antonius Le-Grand p. 2. Philosoph. cap. 4. ex Sphæra Archimedis, & machina Protagoræ, quas nemo sanæ mentis dixerit fortuito natas, non arte ingenioque perfectas; quid plura? Atheum ita perstringit Chrysostomus in Pl. 13. *Non est fundamentum: & quomodo fiat ædificium? non est carina: & quomodo consistit navigium? non est fabricator navis; & quomodo navis compacta est. Non est ædificator: & quomodo domus facta est? non est architectus: & quis urbem condidit? non est agricola: & quomodo agri tulere manipulum? non est musicus: & quomodo in mundi lyra apparet concentus? non est qui provideat: & quomodo per omnia pervadit providentia? non est auriga; & quomodo elementorum qua-*
suor

ignor curvus agitur ? non est statuarius ; & quomodo homines veluti quædam statuae in mundo facti sunt ? &c. Si tanti luminis beneficio Athei rerum omnium artificem minime videant , repetam cum Augustino enarrat. in Psalm. LXXIII. n. 25. *Et quid faciam talibus ? ostendam quod non vident ? non possum : non enim propter illos Deus visibilis (idest corporeis oculis) debet fieri .*

Deinde terrarum orbem non esse casu productum ostendo particulariter contra Gregem Epicuri , qui fatetur factum , sed sola repentina incurfione atomorum putat compaginatum . Si contigit aliquando ut casuali seminum dispositione omnia aspectabilia confurgerent , cur nunquam accidit , ut denuò talem ordinem mobiles atomi nanciscantur , neque prodeunt ex luto novi homines , neque novæ arbores , novaque elementa sua sponte gignuntur ? Si homines fortuito sunt progeniti , quænam causa naturam compulit , ut duos tantum produceret , eosque masculum , & feminam ad futuram prolis generationem ? Quod si plures homines ex materie incurfione procreati sunt , cur ubique terrarum corpus habent eisdem partibus instructum , neque diversam habent figuram , structuramque membrorum ? Ad hæc : nunquam nostræ , majorumque ætate compertum est quod atomi casu motæ lapides levigarent , atque his aptatis invicem muros , oppida , urbesque construerent . *Si mundum* , inquit Cicero lib. II. de natura Deorum , *efficere potest concursus atomorum , cur porticum , cur templum , cur domum , cur urbem non potest , quæ sunt minus operosa , & multo quidem faciliora ? Certe ita temere de mundo effutiant , ut mihi quidem nunquam hunc admirabilem cæli ornatum suspexisse videantur .* Præterea nullus nisi forte infans omnigenas apicum formulas , literasque græcas , latinas , hebraicas stante vento permixtas speraret ita ad invicem necti , ut characteribus , lineisque dispositis nulla scribente manu Homeri Iliades , Virgilii Aeneidas , aut Davidis Psalmos componerent . Atqui longe mirabilior ordo & armonia in partibus universi spectatur . Ergo insipiens est qui existimat omnia incurfu particularum esse tam concinne disposita . Postremo : ipsemet Lucretius invitus , vel incautus libro 1. scribit Epicurum nec fama Deorum , nec fulminum timore compressum religionem pedibus subjectam calcasse , providentiam curamque Deorum dejecisse ; & tamen firmissimam naturæ legem , & præscriptos ordines materiæ testatur , quibus vere florescunt rosæ , ætate segetes maturescunt , autumnò vites vinum fundunt , & qui nisi essent , omnia incertis spatiis , atque alienis anni partibus exorirentur , arbuta extemplo proflirent , subito infantes adoleferent , neque augendis , procreandisque rebus ullus esset seminum usus .

Atque hæc re nequeunt ex omnibus omnia gigni ,

Quod certis in rebus inest secreta facultas :

Atqui hæc naturæ constantia , facultas ista secreta , invariabilis ille

rerum nascentium reductus, nequeunt esse munera materiei expertis ingenio, & casu permixta: Ergo erunt opera providentiæ, & imperii sempiterni rerum omnium Artificis. *Unde ego, ut Lætantii utar verbis cap. 2. de Opificio Dei, philosophorum, qui Epicurum sequuntur amentiam soleo mirari, qui naturæ opera reprehendunt, ut ostendant nulla providentia instructum esse, ac regi mundum: sed originem rerum infestabilibus, ac solidis corporibus assignant, quorum fortuitis concursibus universa nascantur, & nata sint.*

Quoniam vero inter naturæ fetus, quos damnat Epicurus, haud infimum tenet locum fabrica humani corporis, ex ea divinitatem effectricem ita hoc momento liceat comprobare. Aut spectetur exterius, aut intra artus moles corporea hominum, clamat esse Deum artificem suum. De exterioribus illorum membris vide Tullium in 2. de Natura Deorum, & loco nuper citato Firmianum. In omnibus sensuum organis providum auctorem miramur: patet auditus, quo excitemur a sono: aures extra eminent ne voces adjectæ labantur: palpebræ mollissimæ sunt ne lædant faciem: oculi ut suo munere fungantur altissimum tenent locum: stat homo erectus, ut contempletur gyrum, armoniam, lucem, motumque cælorum constantissimum; quorum, ut legimus Ps. xviii. *in omnem terram exivit sonus*, idest, delineatio eorum, eo quod ubique celebretur perfectissimi operis summa, & ad normam exacta pulchritudo, inquit Jacobus Benignus Bossuet Meldensium Episcopus. Convertatur ad internas corporis partes animus. In oculo namque nectuntur muscoli, quibus undique globulus fertur: tunicæ quæ radios frangunt, & congregant: humor aqueus, crystallinus, vitreus, qui a prioribus iusto intervallo retinam separat. In aure malleus sunt, incus, & stapes, quæ efficiunt ne tympanum laxetur, aut æquo tentius evadat: teres ligamentum, quod moderatur auditorii musculi actionem: cochlea item, quæ in testudinis formam efficta soni confusionem amolitur. Infinitus essem, si vellem singulæ sermone comprehendere. Et tamen hæc omnium minima de auctore suo perhibent testimonium. Quid vero de Anima? Stulti illi philosophi compositam putant ex minutis particulis auræ, aeris, caloris; sed cum in his perceptionem nequaquam valeant apprehendere, coguntur addere quartum, nescio quid innominatum, situm in pectore, & sensus, ac cognitionis principium, tanquam araneum tractans ad captandas muscas filamenta: de quo Lucretius in l. i.

*¶ Jam triplex animi est igitur natura reperta.
Nec tamen hæc sat sunt ad sensum cuncta creandum:
Nil horum quoniam recipit mens posse creare
Sensiferos motus, quadam qui mente volent.
Quarta quoque his igitur quadam natura necesse est
Attribuatur; ea est omnino nominis experta.*

Prætermitto stirpes, miniarias fodinas, aquarum rivos, volucrum indolem, animantia omnia, memor verborum Augustini Serm. xxvii. in Pl. 118. *Quis enumerat saltem generatim testimonia Dei? Cælum, & terra, visibilia, & invisibilia opera ejus dicunt quodam modo testimonium bonitatis, & magnitudinis ejus; & ipse cursus frequens, usitatusque naturæ, quo temporum rapacitas volvitur, in rerum quarumque generibus quamvis temporalibus atque mortalibus, quæ certe consuetudine viluerunt, si pius considerator advertat, perhibet testimonium Creatori.*

Momentum IV. depromptum ex naturali hominum instinctu.

Accedit ad probandam Summi Numinis existentiam naturalis cujusque creaturæ rationalis affectio: ex qua mihi argumenta quatuor, eaque planissima suppeditantur. Sit primum: Omnes homines innatum habent æternum vivendi desiderium; quod desiderium cum sit commune, & proinde a natura insitum, vanum non est: At perennem vitam, siue sit animæ unitæ corpori, siue inde divulsæ, præstare non potest nisi potentissima causa, nempe Deus: Ergo existit iste Deus. Quidam urgent hoc argumentum de innato desiderio videndi Deum, & fruendi corporis immortalitate: sed arbitrantur alii istiusmodi desiderium ad gratiam spectare, non ad naturam. Secundum argumentum depromitur a Lactantio, Tertulliano, Arnobio, & etiam Seneca in libro iv. de Beneficiis ex communi loquendi consuetudine; nam cum jurant, cum optant, cum gratias agunt, non Jovem aut Deos multos, sed Deum nominant; adeo ipsi veritas cogente natura etiam ab invitis pectoribus erumpit: & si belli tremor infremuerit, si morborum pestifera vis, si sæva tempestas, si grando increbuerint, si alimenta frugibus siccitas denegaverit, ad Deum confugiunt, Dei petitur auxilium, Deus ut subveniat oratur; ait in 2. lib. cap. 1. Lactantius. Lege Tertullianum cap. xvii. Apolog. & Arnobium in 1. adversus Gentes. Addo Arrianum dissertat. Epicteti lib. II. cap. 7. afferere gentes olim Deo supplicasse ea precum forma, quæ a primis sæculis utitur Catholica Ecclesia, nimirum *Κύριε ὁ Θεός*, quæ est manifesta naturæ Opificis, ac Rectoris invocatio. Addo timorem, quo impli scelere patrato agitantur, testimonium illis reddente conscientia ipsorum, & inter se invicem cogitationibus accusantibus, ut inquit Apost. ad Rom. 2. v. 15. *Quem timorem ut tollerent Athei dixerunt superos nulla angi mortalium sollicitudine, & animam evaporantibus atomorum effluviis ad instar fumi dissolvi. Videtur tamen, ut ait Cicero in 3. de nat. Deorum, Epicurus ludere, dum negare Deos esse non audet, sed nihil agere, nihil curare confirmat, membrisque humanis esse præditos, sed eorum membrorum usum*

asum nullum habere. Lucretius ipse Deo sapientiam attribuit lib. IV. de natura rerum, dicens:

*Nam si, ut ipsa petit majestas cognita rerum,
Dicendum est: Deus ille fuit, Deus, inclute Menimi,
Qui princeps vitæ rationem invenit eam, quæ
Nunc appellatur sapientia, &c.*

Atque, ut liberalior sim, licet mortalis foret anima, pœnarum metus minime tolleretur; quippe ipsa mors maxima foret calamitas: eamque statuere, juxta Epicurum, finem miseriarum, perinde est, ac si jactato procellis in motivum solatii proponatur naufragium. Rationalius ergo allicimur boni spe perennis felicitatis; & improbi timore æternorum suppliciorum concutiuntur. Argumentum ultimum petitur ex aris *Ignoto Deo* olim erectis. Legimus enim in Laertio de Eupimenide Cretensi, qui sine nomine aras sacravit, quod nesciret, cui deorum esset pro avertenda pestilentia sacrificandum. Veteres quoque Romani, ut scribit Agellius lib. II. cap. XXV. ubi terram movisse senserant, nuntiarumque erat, ferias edicto imperabant; sed Dei nomen, cui servare ferias oportebat edicere quiescebant, ne alium pro alio nominando falsæ religioni populum alligarent: nesciebant quippe Pontifices, ut scribit Varro, per quem Deorum terra tremeret. Invenit etiam Paulus Athenis aram dicatam, *Ignoto Deo*, ut legimus in cap. XVI. Apostolorum Act. v. 23. hujusque aræ causa fuit duplex; una, victoria a Persis reportata, cum Athenienses exercitum ducebant in Græciam, altera pestis grassata pridem Athenis: ex qua cives suspicati sunt esse Deum aliquem, quem ipsi absque honore reliquissent; quique iratus immiserit pestilentiam. Quam causam probat Oecumenius; confirmatque exemplum aliarum gentium, quæ, ut tradunt Macrobius, Pausanias, alique; multas excitabant aras cum tali inscriptione *ὁμὴ ἀγνώστῳ, Ignoto Deo*. Idcirco, quod affirmant Baronius, Lorinus, Cornelius a Lapide, ceterique interpretes, fuisse ab Atheniensibus erectam aram *Ignoto Deo*, quod accepissent ab Hebræis esse *יהוה Deum scilicet ineffabilem*, nullo innititur fundamento, præsertim cum Judæi nomen tetragrammaton nunquam vulgo efferrent, ne fieret ludibrio gentilibus: hi vero nullatenus Judæis crederent. Hucusque dicta sic brevissime proponuntur. Constat ex communi ad semper vivendum instinctu, ex loquendi ac deprecandi consuetudine, ex improbe conscientie stimulis, ex aris erectis *Ignoto Deo*, existere supremam causam omnium auxiliatricem, & aliquem bonorum operum remuneratorem, vindicemque malorum: Igitur manifestum est esse Deum.

Momentum V. Ex communi Sapientum confessione.

Ad existentiam Dei comprobendam v. loco produco omnium Philosophorum consensum. In Ionica sc̄cta asseruit Mentem procreatricem rerum omnium Anaxagoras; imo ante illum idem tradiderant Thales & Xenophanes: Pythagoras cum universa Italica Schola Deum agnovit in sese totum, mundiſque Opificem: Plato pro rei dignitate de divina natura in Timæo, aliisque commentariis disseruit; eumque secuti sunt Speusippus, Maximus Tyrius, Plotinus, Jamblicus, Proclus, Apulejus, ceterique Platonici. Primam causam assecutus est Aristoteles, & ipsius discipuli Heraclides, Theophrastus, Simplicius: Socrati hujus veritatis confessio mortem attulit: Antisthenes Cynicorum, & Zeno Stoicorum principes hanc doctrinam sequacibus suis tradiderunt. Nec ipsi Epicurei, ut diximus, Deos penitus substulerunt: Luculentata de Deo testimonia reliquerunt Seneca, Tullius, Epictetus, Marcus Aurelius. Horum verba collegere Clemens Alexandrinus, in libris Strommateon, Justinus in Apologetico, Lactantius in libro de ira Dei, Minucius Felix in Octavio, Athenagoras, Cyrillus, Eusebius, Augustinus, alique: atque ex his omnibus operose Augustinus Steuchus in libris de perenni Philosophia, erudite in libro 1. de Progressu Idololatriæ Gerardus Vossius, brevissime lib. 2. Quæstionum Alnetan. Petrus Daniel Huetius. Quos, dum vacat, lege.

Etiam Poetæ Deum commemorarunt. Homeri carmina, ubi phoenix Uliſſem affatur, recitat in sua Apologia Justinus Martyr. Ex Paræneticis Phocylidi plura laudat Eugubinus lib. 3. de perenni Philosophia cap. II. Orphei, Arati, Hesiodi, & Sophoclis multa proferunt Athenagoras, & Lactantius; quamquam Orphei carmina videantur supposita, cum Origenes lib. 1. contra Celsum testetur ad ætatem suam minime pervenisse. Nonnulla exscripsit vir clarissimus Dionysius Petavius lib. 1. cap. 3. De Virgilio sat est si legeris Minucium. Lucanum adeas libro nono Pharsaliæ ab eo versu, *Hæremus cuncti superis, temploque tacente*: Horatium libro 111. Carm. 4. ab eo: *Qui terram inertem, qui mare temperat*: Manilium ab illo prioris libri: *Ac mihi tam præſens ratio*, &c. Ovidium initio Metamorphoseon ad istum, *Hanc Deus, & melior litem natura diremit*. Præclara etiam sunt Sibyllarum testimonia; sed de harum auctoritate inter doctos non convenit.

Denique, inquit loco citato cap. 1. doctissimus Abrincensis Episcopus: *Consentientes habemus potissimum eas gentes, quæ aliquam ab ingenio & elegantiori cultu duxerunt commendationem, Romanos, Græcos, Aegyptios, Assyrios, Chaldaeos, Persus; qui ignem & solem,*

lem, non ut Deos, sed ut supremi Dei, rerum omnium principii, & auctoris imaginem coluerunt; Brachmanes, quæ Indica gentis, Sineses, quæ Orientis totius cultissima pars est: inter quos secta quedam summum Mundi epificem Tao appellat, nomine, uti conjicio, ab Aegyptiorum Theuth deducto. Hujus argumentationis summa est: Incredible est sapere qui Deum negant, si Deum esse fateantur non solum Fideles, sed etiam Philosophi Ethnici, Gentiles Poetæ, Nationes quæque totius Orbis terrarum: Philosophi, Poetæ, Gentes universæ esse aliquem Deum profitentur: Ergo incredibile est non nihil sapere, qui Deum negant.

Momentum ultimum, quod exhibet numerus, vita, & ignorantia Atheorum.

Tam exiguus est numerus Atheorum, ut probabilis sit illorum opinio, qui censent nullos unquam speculative, & directe fuisse Atheos; quamvis fuerint plures practice, scilicet vita, ac moribus. Nam Scriptura, ac Patres, ubi tales perstringunt, designant Atheos corde, non mente, ut in Psalm. 118. v. 32. *Dixit in corde suo, oblitus est Deus:* & Apostolus ad Titum 1. v. 16. *Confitentur se nosse Deum, factis autem negant.* Quod enim L'Herminier opponat verba Sap. 111. *Vani autem sunt omnes homines, in quibus non subest scientia Dei, & de his, quæ videntur bona non potuerunt intelligere eum, qui est, neque operibus attendentes, agnoverunt quis esset artifex: sed aut ignem, aut spiritum, aut citatum aerem, aut gyrum stellarum, aut nimiam aquam, aut solem & lunam, rectores orbis terrarum Deos putaverunt:* id quidem nihil me commovet. Nam si de mente, non de cordis affectu essent accipienda, & falsum esset quod sequitur, *Quorum si specie delectati, deos putaverunt: sciant quanto his dominator eorum speciosior est: speciei enim generator hæc omnia constituit. Aut si virtutem, & opera eorum mirati sunt, intelligant ab illis, quoniam qui hæc fecit fortior est illis.* Atque si priora illa verba rigoroſe acciperentur, frustra Theologus ille Deum ex creaturis conatus esset ostendere, quem athei ex his non potuerunt intelligere, & frustra contenderet illos omnes vincibili laborasse ignorantia. Ergo multi non potuerunt Deum intelligere cupiditatibus præpediti, non mente obcæcati: quod nos dicimus esse atheum practice. Tales fortasse fuere, quos cap. præcedenti memoravimus; non tamen Andreas Cæsalpinus. Cujus error fuit Angelos, & animas nil esse præter particulas Dei tenuissimis corporibus sociatas; quod utique impietate non caret: sed auctore Vossio in II. de Idolol. cap. 11. statuit unam causam motricem cœlestium orbium, quæ est per se una substantia; unde frustra Cæsalpinus ab L'Herminier inter Atheos connumeratur. Verum quidquid sit de existentia

stentia Atheorum , pugnaciter assero nunquam tales fuisse , qui rationis ductum persequerentur .

Arbitror quoque non omnes fuisse Atheos , qui hoc nomine sunt appellati . Primo quoniam Gentiles vocabant Atheos , quicumque Deos gentium pro Diis non haberent ; quemadmodum Euripides discipulus Anaxagoræ , quod in fabula Phætonis solem dixerit auream glebam , quinque talentis & exilio multatus est . Deinde quia etiam Christiani a Gentilibus Athei dicebantur , ut in II. Apologia affirmat Justinus ; qui & ipse Lucianum appellat Atheum , secutus in hac parte adversariorum sententiam . Plures itaque fuerunt impietatis accusati , non quod revera Deum esse negarent , sed quod vulgares Græcorum Deos irriderent .

Præterea qui de Deo asseruerunt absurda , fuerunt inquinati perditissimis moribus ; & e contra Dei notitiam custodierunt , qui fuerunt vitæ consuetudine probatissimi . De Theodoro namque Cyrenaico legimus in Laertio , postquam impie Deum omnem negavit , docuisse citra pudorem committenda esse adulteria , sacrilegia , atque nefanda cum scortillis facinora . Et de Epicuro , quem sui probum , honestumque prædicarunt , libro 1. de Nat. Deorum refert Cicero , quod contumeliose Aristotelem vexaverit , Phædoni Socratico turpissime maledixerit , Metrodori Sodalis sui fratrem Timocratem plenis voluminibus conciderit , in Democritum Magistrum suum fuerit ingratus , & Chrysippum nunquam , nisi Chelippum vocarit . Fuisse tamen gravem ac temperantem , atque solo pane cibario , & aqua vitam transegisse , ad auram pseudogloriæ captandam propter veterum omnium testimonia concedimus . Titus Lucretius amatorio poculo in furorem versus propria se manu interfecit , librorumque quos per intervalla insaniæ (etsi id non probet Creechius , nec Fabricius ,) conscripsit pœnam luit anno U. C. DCCIII. ante Aeram Christianam LI.

Tandem , si qui sunt divinitatis plane inscii , ut Tartari , Caribæ , & Canadensium plerique ; tanta earum gentium est feritas & immanitas , ut belluis potius , quam hominibus sint comparandi . Inter sapientes , ut probatum est , aut nulli fuerunt , aut perquam pauci . Horum opinio flocci habenda est , propterea quod statim , ac universim rejecta sit , tanquam proveniens non ex recta ratione , quæ hominibus est communis , sed a studio novitatis , a mente corrupta , a pravo eorum ingenio , quorum interest , ne sit Deus scelerum suorum ultor , ac vindex . Hujus ergo probationis hæc erit synopsis : Athei aut nulli reapse fuerunt , aut admodum pauci , & hi rursus aut insipientes , aut improbissimi : Iniquum est velle consentire rudibus , stultis , sceleratissimis ; non sapientibus , honestis , ac ferme universis : Ergo iniquum est velle Atheis assentiri .

C A P U T III.

*Reliquæ Epicuri, Lucretii, Spinoſæ, aliorumque
atheorum cavillationes diſpelluntur.*

PLura contra Atheiſmum conſcripſi. Reliquum eſt, ut atheorum argutiunculæ convellantur; maxime quod diſſertationem ſuſceperim amplam, eaque ſit majori ex parte abſoluta.

Opponunt ergo 1. Deum nemo vidit unquam; Ergo creditur Deum eſſe propter educationem Parentum, hominumque inſinuationem, cum præjudicio rationis.

Lepide reſpondet Grotius lib. 1. de Verit. Rel. Chriſt. cap. II. Ne beſtias quidem capere quid ſit homo; multo minus ſcire qua ratione homines reſpublicas inſtituant ac regant, aſtrorum curſus metiantur, mare navigent. Sed olim hæc S. Pater in Pfalm. LXXIII. n. 25. *Non video, inquit, quid crediturus ſum? Anima enim tua videtur, ut opinor? Stulte, corpus tuum videtur; animam tuam quis videt? Cum ergo corpus tuum ſolum videatur, quare non ſepeliris? Miratur, quia dixi, Quare non ſepeliris? Et reſpondet, (ſapit enim ad hoc,) Quia vivo. Unde ſcio quia vivis, cujus animam non video? unde ſcio? Reſpondebis, Quia loquor, quia ambulo, quia operor. Stulte, ex operibus corporis agnoſcis viventem: ex operibus creaturæ non poteſ agnoſcere Creatorem?*

Reponit Athens, & hanc animam nihil eſſe præter volubiles auræ igniſque particulæ: una cum corpore naſci, adoleſcere, interire: experimento compertum eſſe quod in puero non viget animus, deſicit in ſenē. Abs re ergo eſt exemplum allatum ab Auguſtino.

Reſp. Sit anima, prout viſ, ac pereat. At tu illam præcipue locas in quarto quodam innominato maxime mobili, ac perſubtili, quod neque vides, neque ſcis deſſinire. Ergo, te judice, eſt aliquid quod non videtur. Verum Atheum habeo: Non ſufficiunt, inquit, ad animæ perceptionem atomi aeræ & igneæ, quoniam hæ nequeunt efficere motus ſenſiferos, ideoque hi tribuendi ſunt cuidam naturæ, quæ eſt expers nominis, &

Qua neque mobilius quidquam, neque tenuius extat, ait Lucretius. Atqui hæc natura tenuiſſima & perſubtilis non eſt corpus, ſed ſpiritus; quippe ſi non poteſt ineſſe viſ ſentiendi & cognofcendi in particulis auræ & caloris, neque ſita eſt in aliqua corporea natura, qualiſcunque ea ſit, cum viſ intelligentiæ omne corpus quantumvis diminutum, ſuperexcedat: Ergo Anima erit Spiritus, ideoque immortalis. Utique ſi anima corpus eſſet, ejus particulæ deberent eſſe volubiles ac tenuiſſimæ: ſed illam corpoream eſſe nondum Athei probaverunt. Nam quod affirmant animam naſci, adoleſcere,
ac

ac deficere, quia puer est ad percipiendum ineptus, & senex desipit, id hoc exemplo Thomas Creechius diluit Censura in 111. Lucretii. *Similiter artificem peritissimum in machina colloces, alia vero partes istius machinae nimis rigescant, alia sint aequo flaccidiores, deterantur alia, alia autem nimis turgescant; & deinde stultè expectabis ordinatos motus; licet maxime labores peritissimus ille artifex.* Sed de immortalitate animæ non est hujus loci differere. Illud tantum animadvertere, Epicureos illam iccirco negavisse, quod hominis beatitudinem in corporis constituerent voluptate, ut dixi initio istius libri: unde sequitur loco nuper laudato Augustinus: *Et forte qui dicit, Cum mortuus fuero, postea nihil ero, & literas didicit, & ab Epicuro didicit hoc, nescio quo deliro philosopho, vel potius amatore vanitatis, non sapientia; quem ipsi etiam philosophi porcum nominaverunt: qui voluptatem corporis summum bonum dixit, hunc philosophum porcum nominaverunt, volutantem se in cæno carnali.* Ab illo forte didicit iste literatus dicere, *Non ero posteaquam mortuus fuero.*

Opp. 2. Mundus, & quidquid in eo continetur a nullo artifice sempiterno, & ratione ac sapientia prædito productus fuit: Ergo illius artificis existentia ex rebus procreatis minime evincitur. Antecedens pluribus momentis ostenditur. I. Imperceptibile est Deum sempiternum mortale fecisse Mundum, & postquam innumerabilibus ante sæculis cessavit, repente extitisse fabricatorem universorum: cur delectari voluerit, quasi signis, arboribus, animantibus, sideribus: quomodo potuerit inde gloriam voluptatemque nancisci, si numquam potuit honore, & felicitate carere: quærendum esse, quibus usus sit ferramentis, vestibus, machinis, ministris ad tale opus constringendum: si ut melius habitaret corpoream lucem, cælosque creavit, consequens esse, ut prius infinito tempore in tenebris, tanquam in gurgustio latuerit. II. Si hominum causa hæc constituta fuerunt; Sapientum ne, an stultorum? non sapientum, nam propter paucos tantæ facta non est rerum creaturarum molitio, perpauci enim sunt, qui sapiant: non stultorum, quoniam ii potius debuerant tali beneficio privari. Urget hæc duo argumenta Vellejus apud Ciceronem lib. I. de Natura Deorum. III. Temere & fortuito Mundum esse conditum infert Lucretius lib. v. ex confusione, atque inordinatione partium, quarum plurimæ sunt penitus hominibus destitutæ vel propter assiduum frigus, vel propter nimium calorem; aliæ volucribus, belluis, ac reptilibus destinatæ, ut aer, montes, silvæ, mare, paludes. IV. Agri natura sua sentibus obducuntur, & terra maxima hominum industria ac labore fata frugesque producit; interdum vero subita grandinum tempestate, vel aquarum inundatione perduntur camporum germina: in qua sane vicissitudine nihil divinum apparet. V. Si pro hominibus prudens artifex procreasset terræ, non productæ essent imma-

nissimæ feræ, quæ nobis mortem intentant, neque easdem maria, sal-
tusque enutrient; aut saltem non inesset viventibus vitæ amor, &
mortis horror. Cum igitur fortuito eventu accidant morbi, pestilen-
tiæ, & interpestivus viventium interitus, apparet nullam esse supre-
mi numinis providentiam. VI. Si aliquis Deus pro hominibus Mun-
dum creasset, foret homo omnium animalium præstantissimum: At
non ita est: Hominis infelicitatem testatur vagitus infantium, huma-
ni corporis nuditas atque imbecillitas, vestium, alimentorum, do-
morumque indigentia. Quare videtur quodlibet, vel minimum ani-
mal hominem sua conditione antecellere: ut enim pecudes, ac bruta,
nascuntur, non egent præceptoribus, nutricibus, indumentis, ne-
que turribus, mœnibusque, ut se, ac sua ab hostium incurfione de-
endant. Hæ sunt præcipuæ Atheorum argutiæ.

Resp. ad argumentum nego ant. ad 1. probat. dico primum quod
illud etiam docere debent Epicurei, cur materia æterna sit, habeat-
que ingenitum motum, & tamen post innumera sæculorum spatia ap-
paruerit Mundus iste sensibilis, cui & ipsi contra quosdam Philosophos
attribuunt principale tempus, ac futurum interitum. Illa autem quies
per immensa tempora in summe perfectæ causæ nulla ratione fingitur;
siquidem tempus mensura est existentiae creaturæ mutabilis, & ante-
quam creatura esset, tempus non erat; quod proinde, ut fuisse tradit
Plato in Timæo cum cælo, ac terra creatum est. Hinc Augustinus
lib. xii. de Civit. Dei cap. xv. ait: *Ubi nulla creatura est, cujus mu-
tabilibus motibus tempora peragantur, tempora omnino esse non possunt.*
Et lib. xi. Conf. cap. 13. *Si enim ante cælum, & terram nullum erat
tempus, cur queritur, quid tunc faciebas? non enim erat tunc, ubi
non erat tempus: nec tu tempore tempora præcedis, alioquin non om-
nia tempora præcederes, &c.* Neque ministris, instrumentis, vesti-
busque eget omnipotens artifex; quin e contra horum necessitas ar-
guit artificis impotentiam. Sed de hoc priori argumento vide citato
loco Augustinum, nec non Petrum Abaelardum lib. 3. Introduct. cap. 6.
& Franciscum Piccolomineum lib. de Placitis veterum Philosophorum
cap. 20.

Alterum sic diluitur: non est Deus, ut fingitur, adeo parcus,
& malevolus, ut nihil agat causa nostri, sed omnia suisipius emolu-
mento. Produxit ergo mundum propter homines, (quamquam causa
princeps fuit infinita ejus bonitas) & principaliter propter sapientes;
quorum nomine non Stoicos, non Platonicos, non Epicureos signifi-
camus, sed rectos ac integros, quorum magna semper fuit in omni
ætate multitudo. Quod vero multi sint mali, id non a summo bono
procedit, sed ab humanæ voluntatis arbitrio: cujus vitium etiam si
sapientissimus auctor præviderat, nihilo tamen minus maluit homi-
nem condere, ut sapientes Creatorem diligenter, quam malos non
per-

permittere , ut libertatis beneficium in rationali creatura periret . Cumque in improbis Dei iustitia , exercitatio bonorum , & superni numinis providentia deprehendatur , *Melius iudicavit de malis benefacere , quam mala nulla esse permittere* : ait in Enchiridio ad Laurentium , S. Pater .

Tertio autem argumento occurro affirmans partes mundi quas Lucretius inordinatas appellat maximum commodum asferre , & esse singulas Opificis sui testimonium . Nam montes fluctus maris coercent , defæcatissimum habent aerem , sylvas ac secessus , quibus degunt armenta , necnon homines a mundanis curis semoti : rupes metallorum ac marmorum continent fodinas ; quæ omnia si in planicie essent , non daretur diversa terræ facies , nec ferarum antra essent ab hominibus segregata ; sed forent omnia confusione permixta . Flumina vel impetia dividunt , vel pisces alunt , vel hortos irrigant , vel urbes exornant . Nulla dicitur esse in mundo fertilior terrarum pars India , quæ tota , inquit Strabo lib. xv. , *amnis irrigatur* : nullaque apud Europæos venustior Italia , quam abluit Tiberis , Padus , Arnus , Athesis . Ex mare confluant nubes , imbres , multique vapores , quibus fecundantur campi , & aer reparatur : cum enim solis ardores irrequietis ignibus totam regionem inter cælum ac terram exagitent ac resolvant ; necessarius erat latissimus aquarum cumulus , ex quo aer posset restaurari , terraque esset hominibus habitabilis . Mitto navigiorum , quibus a remotissimis oris ad nos amplissimæ deferuntur divitiæ , per quammaximam commoditatem . Caloris , ac frigoris , nisi alia vis esset , profecto hæc non est parva , quod in rectissima cæli revolutione dum frigus nobis tellurem gravidat , remotissimis terræ partibus æstivus ardor maturas fruges apportat . Detestabile est ergo Lucretii vitium , quod ea , quæ primo aspectu deformia videntur magno verborum apparatu commemorat , altoque silentio illorum præterit utilitatem .

Ad quantum vera est responsio , quod terræ sterilitas pœna est peccati Adæ , cui post transgressionem dictum fuit a Domino Gen. 111. v. 17. *Maledicta terra in opere tuo : in laboribus comedes ex ea cunctis diebus vitæ tuæ . Spinæ & tribulus germinabit tibi , &c.* Sed quoniam divinam legem , ac iustitiam Athei contemnunt , dico ex tantarum vicissitudine induci homines , ut terrena cuncta despiciant , & labore manuum suarum victitantes nequaquam otio torpescant ; nam ut apposite Manilius lib. 1. Astronom.

Et labor ingenium miseris dedit , & sua quemque

Advigilare sibi iussit fortuna premedo .

Ejusdem rationis est quod quinto loco consequitur . Mors enim , & ferarum inimicitia sunt originalis culpæ stipendium : quam si Athei ignorat ; experiri saltem potest , vino , livore , ac venere sibi met homines exitium accelerare . Nullas item esse inter feras , quæ aut ad

victum,

viſtum, aut ad voluptatem, aut ad morborum medicamenta non conferant: quod, cum plura legi poſſint apud Tullium in 2. de Nat. Deorum, & Steuchum in VII. de peregrini Philoſophia, ſatis eſt innuiſſe.

Ad poſtremum, quo Lucretius naturam in homine fabricando iniquitatis inſimulat, eamque Plinius lib. VII. tanquam novercam conviciis proſcindit, non alia eſt adhibenda reſponſio, quam Laſtanti in libro de Opificio Dei. Nam unumquodque animal vel a conditione naturæ, vel a ratione inſtrui neceſſe eſt; ſi autem naturalibus munitis inſtruatur, ſupervacanea eſt ratio: quid enim excogitabit? quid faciet? quid molietur? in quo lumen illud rationis oſtendet? Si autem ratione ſit præditum, quid opus erit ſepimentis corporis, cum ſemel conceſſa ratio naturæ munus poſſit implere? Reſpondemus itaque Atheis longe potioſorem eſſe hominum conditionem, quam pecudum; quippe illi quidquid neceſſarium eſt prudentia ſibi comparant, & induſtria conſervant. Neque enim ullum futurum fuiſſe arbitramur, qui, ſi illi data fuiſſet optio, non elegiſſet ſapientiam cum imbecillitate corporis, potiusquam brutorum feritatem abſque ratione.

Opp. 3. Contingere omnia caſuali atomorum incurſione demonſtrant oſtenta, quæ in omnium rerum generibus conſpiciuntur: nam Auguſtinus in XVI. de Civit. Dei cap. VII. & VIII. plura enarrat monſtra hominum, ſive androgynorum, ſive lunatas plantas, ſive binos tantum digitos habentium, ſive brutorum, capita aliæve membra referentium. Quandoque etiam equos, vitulos, avesque, mulieres fuiſſe enixas produnt hiſtoriæ; neque in ſolis hominibus, in piſcibus, in quadrupedibus, in quacunque animantium ac plantarum ſpecie monſtroſa haud raro ſpectantur: Atqui ſi rebus ſingulis præſſet ſapiens, ac providus auctor ille portenta ejuſmodi averteret: Non ergo extat auctor iſte ſapiens, providuſque.

Reſp. nego min. nam quælibet oſtenta ac monſtra ſupremi Numinis exiſtentiam commonſtrant, non evertunt. Etenim cum ſint, ſatentibus Atheis, certæ naturæ leges, ac imperturbabilis ordo, ut ſupra cap. 2. mom. 3. probatum eſt; quidquid præter naturæ curſum contingit, oſtendit eſſe primam cauſam, quæ prout lubet rerum naturalium ordinem immutat, ut nova ac mira cernentes in ſui convertat admirationem. *Deus enim creator eſt omnium, atque ubi, & quando creari quid oporteat, vel oportuerit ipſe novit: ſciens univerſitatis pulchritudinem quarum partium, vel ſimilitudine, vel diverſitate contextat. Sed qui totum inſpicere non poteſt, tanquam deformitate partis offenditur: quoniam cui congruat, & quo referat ignorat*, ait S. Pater loco ſuperrime laudato. Inſuper hæc oſtenta vel ſunt ſupra naturam; eaque a nobis vera miracula appellantur, ac evincunt eſſe Deum omnipotentem, qui facit mirabilia magna ſolus, in noſtræ quidem Fidei ac veritatis inviſtiſſimum argumentum, nunquam vero in gratiam atheorum.

Vel

Vel sunt præter naturam, qualia a nobis dicuntur *monstra*; istaque ex defectu causarum secundarum proveniunt, non superioris ac primæ, quæ omnes effectus suos ita constituit, ut possint sæpenumero commutari, ac deficere.

Opp. 4. Creaturæ contingentes sunt, & nullam habent cum infinita causâ proportionem: Ergo æqueunt nos in Dei noticiam certissime manuducere.

Resp. dist. ant. Contingentes sunt, scilicet, mutationi obnoxie ac defectibiles; conc. idest a causâ productrice, ut existant, nequaquam pendent; nego. Potest artifex domum E. G. ædificare, & non ædificare. At constructa domo firmissime ratiocinamur: Est domus; ergo ab artifice constructa est. Possunt pariter produci, & non produci creaturæ: existentibus tamen recte inferitur, sunt, igitur a summo conditore fuerunt productæ. Proportio item inter effectum & causam necessaria non est ad probandam solam ejusdem causæ existentiam: non enim necesse est domum vivere ac intelligere, ut certo scias vixisse cæmentarios, atque intellexisse architectum: imo nulla causâ æquivoca eandem habere potest cum effectu suo perfectionem.

Opp. 5. Quod est omnino simplex aut totaliter cognoscitur, aut totaliter ignoratur: Deus est omnino simplex: Ergo Deus aut totaliter cognoscitur, aut ignoratur totaliter: Atqui a Viatoribus nequit perfecte cognosci: Ergo debet penitus a Viatoribus ignorari.

Resp. ex doctrina nostri Ariminensis plures esse voces & conceptus simplices in se, quæ tamen plura connotant, idest consignificant, ut terminus iste *creatio*, cui respondet res quælibet producta ex nihilo. Talem conceptum, ac terminum appellat præclarissimus Doctor conceptum ac terminum connotativum atque complexum. Itaque dist. ma. Quod est prorsus simplex vel totaliter cognoscitur, vel totaliter ignoratur, si non valeat exprimi voce, & conceptu connotativo & complexo, esto: si vocem, & conceptum connotativum, complexumque habeat, nego majorem.

Opp. ultimo. Ipsi corporeæ materiæ nequaquam repugnat summa providentia ac sapientia; aviculæ namque dum nidos struunt, ovifque incubant ingenium magnum præferunt: apis plusquam humana sapientia mella colligit, & ædificat laquearia: formica minimum animal adeo est provida ac solers, ut Proverb. vi. vers. 6. legatur: *Vade ad formicam, o piger, & considera vias ejus, & discite sapientiam: quæ cum non habeat ducem, nec præceptorem, nec principem, parat in æstate cibum sibi, & congregat in messe quod comedat.*

Resp. aves, formicam, apem, omnia viventia ac mortua dirigi ab auctore naturæ, & prædita esse sapientia, quam scholæ appellant *passivam*. Intollerabilem vero esse Atheistarum dementiam, qui cum videant animantia hæc minima omnium hominum artem, & opificium

exce-

excedere, velint tamen singula sine sapientissimo Opifice procreata. Quis enim peritissimus artifex unam aviculam, apemque humana efficit industria? Itaque mittamus insipientes, quos vel una bestiola confutat.

C A P U T IV.

Quædam præcedentium confectaria proponuntur, atque explanantur.

INQUIRUNT Scholastici an hæc Propositio, *Deus est*, sit per se nota, an saltem adeo sit naturali rationi obvia, ut nullus hominum quantumvis sylvestris ac rudis possit eam impune, & absque culpa ignorare: quæ duo, tametsi ex dictis apertissime consequuntur, sunt tamen hoc loco juxta scholæ consuetudinem definienda. Itaque propositionem per se notam eam dicimus, quæ sola clara perceptione terminorum redditur manifesta, neque ut illi assentiamur opus est ratiocinatione, & discursu. Quod enim Theologi dividant propositionem per se notam in per se notam in se, & per se notam respectu nostri, prioremque definiant eam, in qua de re aliquid enunciat quod ipsi essentialiter convenit, propter illorum auctoritatem recipio; sed hanc dici vellem *essentialem*, non *per se notam*: quippe notum aliquid appellatur relate ad mentem, quæ noscit. Illud ergo quæritur tantum sit ne per se nobis manifestum Deum existere; præsertim cum omnes fateantur Deo essentialiter competere existentiam, quod, ut monui, dicunt esse notum *quoad se*. Porro affirmativam sententiam tenent quotquot Ideam Dei ingentam defendunt, necnon Scotus, Aureolus, D. Bonaventura, horumque discipuli, qui tamen diversa a nobis ratione ducuntur. Aliorum quidam docent illam propositionem nullatenus esse notam viatoribus, ut Thomistæ omnes, & ex nostris Gibbon, Puteanus, Benedictus a Sancto Jacobo, ac sapientissimus Magister Henricus Florez, quem Deus optimus maximus diu servet incolumem. Quidam vero affirmant notam esse sapientibus tantummodo, ut Aegidius, Gerardus, Argentinas, Lasosse, Gavardi, alique Nostrates.

PROPOSITIO I. Hæc enunciatio *Deus existit*, est nobis sese nota ac manifesta.

Probatur: Propositio dicitur per se nota, cui perceptis terminis absque alia ratiocinatione humana ratio assentitur: Huic enunciationi, *Existit Deus*, perceptis terminis absque ullo medio discursu mens assentitur: Ergo enunciatio ista, *Deus existit*, dicenda est per se nota. Minor probatur iisdem momentis, quibus cap. I. statuimus ineffe cuique Dei noticiam ingentam, quorum summa hæc est: Alicui enun-

ciationi statim ac voces terminique innotescunt ratio humana assentitur, quotiescunque in clara eorumdem terminorum perceptione elucet quidquid in propositione enunciat, etiam si aliquando primo aspectu minime a rudibus intelligantur. Est enim per Adversarios per se nota nobis hæc propositio: *Incorporea non sunt in loco commensurati*, tametsi ignarus statim non percipiat quid sit res incorporea, quidque loco commensurari, quoniam ubi quisque hujus enunciationis intima perceptione penetrat terminos, ei penitus acquiescit: Atqui in clara idea ac notione hujus nominis *Deus* relucet apertissime existentia, quamvis ultro darem Adversariis, esse inter incolas Capitis bonæ spei, & Canadensium plerosque barbaros plane inscios, ut nunquam Dei nomen audierint, de quibus sup. cap. 2. mom. ult. Ergo huic propositioni, *Existit Deus*, quisque perceptis vocabulis absque ullo discursu acquiescit. Minor propositio, præterquamquod cap. 1. comprobata est, traditur ab Augustino lib. 1. de Doctrina Christiana cap. 1. ab Anselmo in Alloquio cap. 2. necnon a Cicerone in lib. 1. de Nat. Deorum, a Sexto Empirico in VII. adversus Mathematicos; neque, fatentibus omnibus, quisquam est, qui certa animi notione non præsentiat, talem esse Deum, ut in omni natura nihil possit esse præstantius. Sed in perceptione ideaque rei perfectissimæ ac præstantissimæ elucet existentia, quæ est prima rerum omnium perfectio, ut diximus Prop. 2. cap. 1. Ergo, &c.

Resp. Ludovicus Habert, in notione summi boni includi quidem existentiam objectivam, sed non realem; idest, terminum illum. *Deus* excitare in intellectu ideam summi boni, ideoque existentis: sed utrum revera istud summum bonum detur a parte rei, non ipsa terminorum apprehensione probari, sed inspectione creaturarum. At hæc responsio nequit sententiam nostram labefactare, eo quod realis existentia est maxima perfectio, & consequenter in idea summi boni concipitur etiam existentia realis, ut loco citato demonstravimus: ac præterea summi boni existentia non solum rerum creaturarum contemplatione, sed etiam intima conscientia, insitaque idea deprehenditur.

Opp. 1. cum Friderico Gavardi, & Henrico Florez, Propositio per se nota a nullo negatur: Hæc propositio *Existit Deus* negatur ab aliquibus: Ergo non est per se nota omnibus. Minor est S. P. Augustini, qui serm. 10. de Verbis Domini explanans verba Psalm. *Dixit inspiens in corde suo, non est Deus*, ait, *Insania ista pauperum est*; & Tract. 106. in Joannem: *Exceptis enim panis, in quibus nimirum natura depravata est, universum genus humanum Deum mundi hujus fuisse auctorem*. Igitur aliqui, licet perpauci, Deum negant.

Possẽm respondere juxta ea, quæ diximus cap. 2. mom. ult. nulum fortassis fuisse atheum speculative; & producta Augustini testimonia de improbis, qui Deum negant practice, esse exponenda; siquidem

S. P. in Psalmum xiii. ait: *Nec ipsi enim sacrilegi & detestandi quidam philosophi, qui perversa, & falsa de Deo sentiunt, ausi sunt dicere, non est Deus. Ideo ergo dixit in corde suo; quia hoc nemo audet dicere, etiam si ausus fuerit cogitare. Corrupti sunt, & abominabiles facti sunt in affectionibus suis: id est, dum amant hoc sacculum, & non amant Deum; ipse sunt affectiones, quæ corrumpunt animam, & sic excæcant, ut possit etiam dicere imprudens in corde suo, non est Deus.* Quo in loco Augustinus docet esse quosdam atheos, qui dati in reprobum sensum cogitant Deum non esse, ne illum tanquam Deum glorificent; at nequeunt quod cogitant ignorare, ut sequenti propositione plane ostendam. Verumtamen transm. mal. dist. iii. Hæc enunciatio, *Existit Deus* negatur ab aliquibus, perceptis terminis, eorumque inspecta notione, nego. Nulla habita ratione terminorum, ac idem, quæ hisce terminis subest, conc. minorem. Porro hæc propositio, *Omne totum est majus sua parte*, consensu omnium est per se nota; & tamen aliqui eam negaverunt, ut scribit Aegidius Romanus in iii. dist. 39. q. 3. & Mag. Florez in quæst. i. de Exist. Dei n. 3. quoniam nondum plane rerum significationem perceperant. Igitur nihil mirum, si quidam barbari rudesque negaverint propositionem istam *Existit Deus*, non attendentes ad notionem terminorum, qui ampliorem quoque exigunt expositionem, quàm postulet præcitatum Geometricum axioma.

Dices: Si requiritur terminorum perceptio, erit ergo ea propositio tantum sapientibus per se nota, ut affirmat Aegidius, imo & Psalmista, ubi ait: *Dixit insipiens in corde suo, non est Deus.*

Resp. nihil magis me in votis habere, quam præclarissimis Theologis consentire, maxime vero Romano Aegidio omnium nostrum facile principi. Sed assero ad percipiendam significationem hujus nominis *Deus*, nullius opus esse scientiæ comparatæ ratiocinio ac discursu; sufficere autem naturalem rationem, intimamque conscientiam. Nam quod Psalmista ait negare, quod Deus sit, solos insipientes, id parum Adversariis suffragatur; tum quia Augustinus nomine insipientium comprehendit etiam sacrilegos, ac detestandos philosophos, qui humana sapientia pollebant: tum etiam, quoniam non solum scripturarum more, verum etiam Platónico dicuntur insipientes qui improbi sunt, etiam si sapere plurimum videantur. Paucis id expressit in Notis Psalm. doctissimus Bossuet, & venustè Italico carmine Cl. Gregorius Redi.

Opp. 2. Cum Thomistis. Ad propositionem per se notam requiritur cognitio terminorum, & immediata, &, prout Scholæ loquuntur, quidditativa: Terminus istius Propositionis *Deus est*, non cognoscitur immediate, sed ex rebus aspectabilibus, & ex effectibus, non in se atque intuitiva visione, nisi in cælesti Patria a beatis: Ergo ea Propositio *Existit Deus*, nulli creaturæ, si beati excipiantur, est per se nota.

Resp.

Resp. conc. prima parte majoris, nimirum quod termini propositionis per se notæ debeant immediate cognosci, nego alteram, scilicet quod necessario cognosci debeant *quidditative*, si per cognitionem quidditativam intelligas vividam, ac plenissimam Dei visionem; quod si intelligas cognitionem inadæquatam, idest solius existentiae, & etiam aliarum perfectionum notitiam confusam, & ænigmaticam, ut explicavi in resp. ad 2. opposit. prop. 1. Cap. 1., huic etiam parti subscribo. Servata autem syllogistica forma, dist. minorem: Deus cognoscitur mediate per creaturas, tantum, nego. Per creaturas, & per indefectibile lumen unicuique intime præsens, concedo. Vide quæ diximus loco nuperrime citato. Neque dicas propositionem per se notam nullatenus posse per effectus demonstrari, ut manifestum est de illo metaphysico principio, *Quodlibet est, vel non est*; id enim valet, quotiescunque propositionis subiectum nullos habet effectus, quibus comprobari possit illius existentia; secus si effectus habeat, ut Deus caussa ac principium universorum.

Opp. 3. Ex quo in clara Dei perceptione concipiatur summe bonum ac perfectissimum ens, & perfectio sit Dei providentia ac simplicitas, non inferitur, quod hæc propositio *Deus est simplex, Deus omnibus providet*, sit nobis per se nota: Ergo ex quo in idea Dei, ac summi boni eluceat existentia non consequitur, per se notam esse hanc propositionem, *Existit Deus*.

Resp. Gaspar Juenin non eandem esse rationem de providentia & simplicitate, ac de existentia Dei, multi enim dediti corporis sensibus cogitarunt in ipso Deo humani corporis figuram; multi existimantur providentiam, quæ sese ad res vilissimas demittat vanam esse sollicitudinem: e contra neminem prorsus fingere posse quod existentia aliqua perfectio non sit: idque probat ex Augustino, qui lib. 1. de Doctrina Christiana cap. 7. docet homines, quoniam diversis moventur bonis, partim ad corporis sensum, partim vero ad animi intelligentiam summum bonum concipere. Sed non opus his rimulis. Nego antecedens: nam hæc propositiones, Deus est simplex, Deus est infinitus, summè sapiens, immensus, provisor universorum, &c. sunt & ipsæ nobis per se notæ, quoniam in clara summi boni perceptione, atque in intimo, & incommutabili lumine, simplicitas, infinitas, sapientia, ac providentia, relucent immediate. Neque obest, quod nonnulli hæc divina attributa negarunt; negarunt enim, propterea quod ad corporis sensum, non ad mentis rationem summi boni notionem fingere maluerunt: quod recte ac sapienter docet citato loco Augustinus; qui nos invictissime percipere Deum esse in ipsa veritate, intimoque incommutabili lumine, probat luculenter cum locis priori capite adductis, tum de libero arbitrio a capite quinto ad decimumquintum, ubi de Divina existentia per ideam ingentiam manifesta diffusissime disputat. Sed in hoc

priori Corollario non debet ulterius oratio nostra immorari.

Alterum, quod ex dictis consequitur est, neminem posse invincibili circa Dei existentiam laborare ignorantia: non enim ignoratur invincibiliter, quod interna animadvertentia, pluribusque cuius notis momentis potest dignosci. Cum tamen Molina, alique nonnulli sentiant oppositum, addam & de hoc asserto longe probabiliorem sententiam, nostris Theologis, ceterisque fere omnibus communem. Est autem ighorantia invincibilis ea, quæ humanis mediis adhibitis nequit dispelli; qualis esset in homine pagano ignorante nondum sibi revelata fidei mysteria: de qua ignorantia, ejusque generibus erit opportuniiori loco inquirendum.

PROPOSITIO II. Nullus, quantumvis agrestis ac barbarus potest Creatorem suum invincibiliter ignorare.

Prob. 1. Psalmo 78. v. 6. hæc habentur: *Effunde iram tuam in gentes, quæ te non noverunt, & in regna, quæ nomen tuum non invocaverunt.* Sap. xlii. v. 9. *Si enim tantum potuerunt scire, ut possent æstimare sacculum; quomodo hujus Dominum non facilius invenerunt?* Et in Epist. ad Rom. cap. 1. v. 18. *Revelatur enim ira Dei de cælo super omnem impietatem, & injustitiam hominum eorum, qui veritatem Dei in injustitia detinent; quia quod notum est Dei manifestum est in illis.* Quibus aperte asseritur reos esse, maximumque promereri supplicium quotquot ad idola conversi Dominum ignoraverunt, quem ex procreatis rebus poterant naturali ratione comprehendere: sed invincibilis ignorantia delinquentem subtrahit a judicis ira, reddit excusabile quodcumque scelus; quoniam humana industria vitari non potest, nec imputari liberæ voluntati quidquid absque culpa penitus ignoratur: Ergo si gentes, quæ Deum non noverunt, neque invenerunt Dominum ex aspectabili saculo, inexcusabiles sunt, supplicioque multandæ, nullatenus ignorantia possunt invincibili laborare. Quod argumentum ita proponitur a Lactantio in 1. Divinarum Institut. *Quam sibi veniam sperare possunt impietatis suæ qui non agnoscunt cultum ejus, quem prorsus ignorari ab homine fas non est?*

Secundo probatur ex PP. Nam Gregorius Magnus lib. 17. Moralium cap. 3. scribit: *Eo ipso quod homo rationalis est conditus, debet ex ratione colligere, eum qui se condidit, Deum esse.* Tertullianus lib. de Spectac. cap. 2. *Nemo negat, quia nemo ignorat, quod ultro natura suggerit Deum esse universitatis conditorem.* Et in Apologia cap. 17. *Hæc est summa delicti volentium recognoscere, quem ignorare non possunt.* Item adversus Marcionem I. *Animæ a primordio conscientia Dei dos est: eadem nec alia & in Aegyptiis, & in Syriis, & in Ponticis, &c.* Hilarius quoque x1. de Trinit. de Deo ait: *Neque mundo ignorabilis effecti potest.* S. P. Augustinus vero lib. 2. Quæst. Evangelicarum. cap. 46. *Apud Dominum, inquit, etiam illi sunt inexcusabiles, qui-*
bus

bus lex data non est, quis per creaturam poterant cognoscere Creatorem. Tractatu etiam cv1. in Jo. *Hæc est vis veræ divinitatis, ut creaturæ rationali jam ratione utenti non omnino, & penitus possit abscondi.* Nec non Enarrat. in Ps. Lxxiv. *De nullo loco judicat, qui ubique secretus est, ubique publicus? quem nulli licet ut est cognoscere, & quem nemo permittitur ignorare.* Paulus quoque Orosius in lib. Histor. 6. cap. 1. *Deum quilibet hominum contemnere ad tempus potest, nescire in totum non potest.* Adde loca producta cap. 1. Prop. 1. prob. 2. non enim alia proferam in confirmationem veritatis, de qua idemmet Tullius in 1. de legibus scripsit: *De hominibus nulla gens est, neque tam immansueta, neque tam ferrea, quæ non, etiamsi ignoret, qualem Deum habere deceat, tamen habendum sciat.*

Tertio probatur propositio argumentis a ratione petitis, quorum nonnulla seligam. Sit vero primum. De priori Decalogi præcepto, *Unum Deum cole*, ut ostendam in lib. xxi. dari non potest invincibilis ignorantia: Ergo neque de summi Numinis existentia, quæ a memorato præcepto jam manifesta supponitur. Accedit alterum: Quisquis invincibiliter Deum ignoraret, quantumvis flagitiosissimus, nunquam peccati theologicæ foret reus, sed philosophici tantum. Est enim peccatum philosophicum actus humanus disconveniens rectæ rationi, non tamen transgressio divinæ legis, si perpetretur ab eo qui Deum ignorat: Atqui hæc propositio anno 1690. ab Alexandro VIII. proscripta est: & peccatum philosophicum est commentitium: Ergo Deum nemine potest invincibiliter ignorare. Postremo: Ignorantia invincibilis ea est, quæ humanis mediis, aliisque in nostra potestate positæ nequit superari: Ignorantia existentæ Dei a quocunque licet ferreo ac sylvestri mediis, quæ in ejus sunt potestate facillime tolli potest: Ergo in nullo, quantumvis immansueto ac rudi, ignorantia divinæ existentæ censenda est invincibilis. Minor constat; nam unusquisque præditus est intelligentia ac ratione, qua sive per inditam sibi ideam Dei, sive per rerum corporearum contemplationem, potest summi boni, ac primæ causæ sibi comparare notitiæ. Atque etiamsi rationalis facultas se sola in Dei cognitionem minime posset assurgere, præsto tamen sunt singulis hominibus in Adversariorum nostrorum sententiæ auxilia supernæ gratiæ: quam tamen ad cognoscendam Existentiæ Dei necessariam non esse, vera est, & communior sententiæ.

Opp. 1. Ad solam fidem pertinet superni Numinis existentia: Potest ergo impune ab iis, quibus non est revelata, ignorari; quales erant, inquit Molina, incolæ Brasilæ, antequam a Lusitanis subjugarentur.

Resp. nego ant. Etenim & ad naturalem rationem, & ad fidem simul spectat supremi Conditoris cognitio, eo sensu, quem explanavi postrema instantia 1. Opp. cap. 1. Imo est D. Thomæ sententiæ, cui assentiuntur & nostri, quod *Deum esse* non sit Fidei objectum, sed ad Fidei arti-

articulos quoddam præambulum, Sed tradita a me responsio conformior est Augustino, qui in li. de lib. arb. cap. xv., ait: *Est enim Deus, & vere, summeque est: quod jam non solum indubitatum, quantum arbitror, fide retinemus, sed etiam certa, quamvis adhuc tenuissima forma cognitionis adtingimus.*

Opp. 2. Puer in sylvis, aut apud Atheos parentes, quorum diis plurimum fudit, enutritus nunquam audit Deum esse: id ergo ignorat excusabiliter.

Resp. nego consequ. Ille enim puer, quidquid sibi parentes ac præceptores curent insinuare, clariori lumine inditæ sibi conscientie, & creaturarum Conditorum suum conclamantium potest divinam existentiam attingere. Neque a culpa erit immunis propter domesticorum traditionem; quibus si non fideret negantibus ea quæ oculis conspiciuntur, vel obvia sunt naturali rationi, neque debet aures præbere dicentibus, *Non est Deus.*

Insurges: Ad invincibilem ignorantiam tollendam duo requiruntur, unum ut aliqua Dei cogitatio pulsset animum, alterum quod talis cogitatio aperte proponatur cum debito comparandi perfectiorem cognitionem: Fieri potest, ut nulla Dei cogitatio animum subeat, neque prædicto puero cum tali debito proponatur: Ergo potest in puero illo reperiri invincibilis ignorantia.

Resp. nego majorem: nam si ad ignorantiam vincibilem necessaria esset prævia aliqua cogitatio, quotiescunque datur incogitantia, atque inadvertentia, daretur ignorantia invincibilis. Quare satis est, si ea cogitatio præsto sit, & sine ullo labore possit haberi: alias invincibiliter prima principia omnibus per se nota, nec non meipsum ignorarem, cum aut dormio, aut aliud cogito. Nec etiam necessaria est perfecta, ac certa cognitio; cum ad operandum non sit necessaria certitudo metaphysica, sed sufficiat moralis. Atque hinc est, quod ipse Amicus, qui præfatus utitur argumento, concludit tandem: *Quamvis hæc probabilis sit: probabilius tamen defendi potest sententia opposita, ut neque in paucis, neque ad tempus perfecta ratione utentibus dabilis sit invincibilis ignorantia de Deo.*

Urgebis adhuc: Saltem in priori instanti, quo ipse puer pervenit ad rationis usum, hac invincibili ignorantia poterit affici, & a Deo aliquantisper averti.

Resp. nego propositionem loquendo de instanti morali, quo deliberare incipit agere, ac sese ad aliquod bonum convertit: nam de instanti physico fateor, quod ante deliberatum voluntatis motum sit necessaria animadvertentia, & cogitatio; sed dum mens animadvertit & cogitat; imo, ut dicebam, dum facile potest animadvertere & cogitare, nulla est talis ignorantia, quæ dici valeat insuperabilis. Est tamen opinio aliquorum, qui existimant in primo instanti rationis puerum

rum illum teneri ad convertendum sese in Deum sub ratione boni incommuni, non sub particulari, prout est universarum rerum principium ac finis. At sub ista quoque ratione potest Auctoris sui existentiam percipere ex illa eademmet Boni idea insita illius menti, ex intima sui ipsius conscientia, atque ex rerum aspectabilium contemplatione.

Opp. 3. Quamplurimi adeo sunt rudes ac plumbei, ut ratiocinio uti non possint, quo divina existentia firmissime demonstratur, maxime cum Petrus de Alliaco, aliique Theologi arbitrentur argumenta, quæ ad probandam Dei existentiam proferuntur probabilia quidem esse, sed non plane demonstrativa: alii insuper in suorum criminum pœnam in tantam prolabantur cæcitatem, ut nequeant in Dei notitiam, & cogitationem assurgere: Ergo in his saltem erit invincibilis ignorantia.

Resp. falsum esse antecedens, non enim invenitur homo rationis compos, qui adeo sit stupidus ut ad intimam sui conscientiam nequeat advertere, neque tam scelestus, ut omni penitus lumine vel naturali, vel supernaturali destituatur. Sed dato antecedenti, nego conf. quippe ad tollendam ignorantiam invincibilem non requiritur evidens demonstratio, sed sufficit tantum probabilis.

Opp. ult. Hugo Grotius, & alii interpretantur verba Apostoli ad Rom. 1. v. 19. *Manifestum est in illis*, multis inter ipsos, scilicet Pythagoreis, Platonicis, Stoicis, quorum argumenta convincendo Aristoteli, & Epicuro sufficiunt. Eundem præferunt sensum Patrum testimonia. Crimina denique patrata ab ignorantibus Deum rectæ adversarentur rationi, sed non manifestatæ divinæ legi. Corruunt ergo momenta pro hac assertionem producta.

Resp. nego ant. de omnibus indiscriminatim sermonem instituunt Sacræ literæ ac Patres, omnesque rationali lumine præditi sunt; & si philosophi soli Atheos profligarunt, poterant tamen singuli Atheos detestari. Labitur quoque absque æterna lege humana ratio, quemadmodum occasu solis offunduntur tenebræ: est enim ratio humana æternæ participatio legis, sicuti terrenorum corporum splendor solis irradiatio. Ea propter si Deum tollas, evertitur lex æterna; si legem æternam, extinguatur ratio; si rationem, natura perit humana; neque aliquid fingi potest ineptius, quam opus rationi dissonum, nec æternæ legi repugnans.

C A P U T V.

De Polytheismi, sive Idololatriæ causa & origine.

A Theis, quantum temporis angustia patitur refutatis, stylium acuo adversus Polytheos, idest, plurium divinitatum cultores; quorum populus & amplior fuit apud Gentes, & pervicacior. Etenim, qri-

quidam adeo in Deos fuere liberales, ut Homerus, Hesiodus, & Chrysippus magnam illorum invexerit turbam: Orpheus vero, auctore Theophilo Antiocheno lib. ad Autolyicum 111. ducentos sexaginta duos commentus sit, quos profana Græcorum, ac Romanorum profecuta est Religio. Manetem Persam duos constituisse, unum efficientem quælibet bona, alterum omnia mala inferentem tradunt Athanasius, Epiphanius, Augustinus, Nicetas, alique. Faustus autem multos finxit, & inter eos duodecim quosdam magnos, ternos per quatuor tractus, quibus ille unus circum agitur, quem vocat regentium regem, sceptrigerum, perennem, floreis coronis cinctum, & facie rutilantem, ut inquit S.P. Augustinus lib. contra eundem Faustum xv. cap. 5. Prætermitto Tritheitas, quos in errorem induxit effrænis divinatorum mysteriorum, audaxque curiositas; & quorum sectam instituit initio sexti sæculi Joannes Philoponus, eamque in Polonia restituit Georgius Paullus, & Casanovius a Valentino Gentili, ut in libro de unitate divinæ essentiae conqueritur Theodorus Beza, fascinati: in quam insaniam anno 1567. prolapsus est ejusdem Bezae discipulus Petrus Statorius. Tale vero non est aliorum Polythecorum nomen, præsertim Aegyptiorum qui etiam stipitibus, brutis, arboribus, astrisque genera curvarunt, ut illorum singularem mentionem faciamus.

Deorum originem in particulari contexere non est hujus loci, atque Instituti; sed sat erit nunc Polytheismi investigare principium: quod Rab. Maimonides in libro de idololatria refert ad Enos. Alii Hebræis insensissimi, nisi intrusum, instauratum contendunt a Mose. A sola historia rerum ab ipso Mose gestarum universam Theologiam Gentilium promanasse, omnesque populares Deos esse eandem Personam Mosis, conatur ostendere in Demonstratione Evangelica a tertio ad undecimum caput clarissimus Daniel Huetius. A Cham Noemi filio, ejusque posteris idolorum cultum promanasse existimant alii. Et quoniam ad refellendum errorem maxime conducit lutulentum, sordissimumque fontem inquirere; hæc omnia brevi hac dissertatione resolvam.

PROPOSITIO I. Qui putant Enos fuisse superstitiosi Polytheismi auctorem labili fundamento nituntur.

Prob. Hæc aliquorum Hebræorum opinio nullo comprobatur momento præter quam versu 26. cap. iv. Genes. *Sed & Seth natus est filius, quem vocavit Enos: Ille cepit invocare nomen Domini*; ubi legendum putant, *Tunc cepit profanari nomen Domini*: Hoc momentum inane est, atque infirmissimum: Ergo nullo firmo divinæ literæ testimonio præfata corroboratur assertio. Prob. minor. 1. auctoritate nostræ Vulgatæ, in qua Amama nil reprehendit præter pronomen *Ille*, quod male putat substitui pro adverbio *Tunc*; quod valde futile est, tum quia Vulgatæ nostræ lectionem confirmant versiones vetustissimæ, ac

ac Patres, probatque etiam vir illi criminatori summus Hugo Grotius: tum etiam, quia Lucas Burgenſis, atque idemmet Caſtaliſo ita verba Geneſeos exponunt, quod Enos vivente, eoque auctore, certis conſtitutis ritibus inſtauratus ſit Dei cultus: quæ eſt Steuchi, omniumque Latinorum Interpretum expoſitio: tum denique, quoniam Enos proprie tribuitur, quod ipſe primus Dominum invocaverit, eo quod ille, ut ſcribit Auguſtinus lib. xv. de Civit. Dei cap. xvi. 11., *De patre generationum in meliorem partem, hoc eſt ſuperna civitatis ſeparatarum, primus commemoratur exortus*. II. probatur minor; nam præcitato textu non profanatio divini nominis innuitur, ſed cultus & invocatio; Caldæus enim juxta Complutenſem editionem legit: *בכין שריאו בני אנשא לצללה בשמא ריין*, ſcilicet, *Tunc caperunt homines orare in nomine Domini*: cui interpretationi ſuffragatur etiam ratio, quia ab Enos cœpit generatio juſtorum, qui in ſacris literis ſpeciali quodam titulo *filii Dei* nuncupantur.

Opp. 1. Rab. Maimonides, & Kimki ita Geneſeos locum explant, ut ſub Enos filii Adam poſt idololatriam erraverint, eamque interpretationem patitur Hebraicus textus.

Reſp. falſam eſſe horum Rabbīnorum explicationem, cujus occaſio fuit hebraicum verbum *רוחל*, quod modo pro *incipere*, modo pro *violari*, ac *proſanari* uſurpatur; ſed priori ſenſu poſitum eſſe ratione, & auctoritate nuper oſtendi; atque Maimonidi opponimus Aben-Ezram, qui & ipſe ita exponit: *הטעם שחלו לרחקלל*, id eſt *Tunc caperunt ad orandum*.

Opp. 2. Ipſe Enos cœpit vocari Dei nomine, voluitque Deus appellari. Hoc videtur voluiſſe in ſua verſione Aquila, nec diſſentiunt Cyrillus, & Irenæus, qui filios Dei commemoratos cap. vi. Geneſ. v. 2. & 4. intelligunt filios Enos. Is ergo qui ſeſe Dei nomine compellavit, idololatriæ fuit auctor.

Reſp. gratis amiſſa Aquilæ interpretatione, quæ tamen ſubſcura eſt, ac multiplicem ſenſum patitur; gratis etiam dato, quod Enos primus omnium appellatus ſit Deus, nego conſequentiam; ſiquidem juxta Cyrillum, & Irenæum Dei nomen Enos accepit, ut ſolent angeli, ac juſti: quod aperte in eum locum explicavit Emiſſenus, dicens: *Speravit Enos Deus dici, id eſt filius Dei: Juſti enim qui erant ex ſemine Seth filii Dei vocabantur*.

PROPOSITIO II. Ab Hebræorum gente non fuit exortus Polytheiſmus, neque illum Judaico populo Moyſes præſcripſit.

Probat 1. ex ipſis Hebræorum legibus, quarum præcipuum mandatum eſt Exodi xx. v. 3. *Non habebis Deos alienos coram me. Non facies tibi ſenſibile, neque omnem ſimilitudinem quæ eſt in calo deſuper, & quæ in terra deorſum, nec eorum, quæ ſunt in aquis ſub terra. Non adorabis ea, neque coles*. Si quæ autem imagines in ſacris

Tb.I.

M

lite-

litteris commemorantur, illæ aut non erant ad adorandum expositæ, aut speciali mandato ad ornatum templi sculptæ crant, nunquam tamen ut idola religioso cultu aservatæ.

Deinde sinceram verissimamque Mosis religionem, quam erga unum Deum Hebræorum populo tradidit, demonstrat ejusdem zelus; nam conflato ab Aaron vitulo arripiens idolum combussit, & contrivit usque ad pulverem, dixitque fratri, Exodi xxxi. 1. v. 21. *Quid tibi fecit hic populus, ut induceres super eum peccatum maximum? atque eo jubente quasi viginti tria millia hominum, qui peccaverant, gladio occiderunt.*

Præterea accedit ipsorum Ethnicorum testimonium. Tacitus enim Historiarum v. scribit: *Judæi mente sola, unumque nomen intelligunt, & nihil quidquam prius imbuuntur, quam contemnere Deos.* Quomodo ergo Polytheos, idololatriasque censebimus? Testatur Mosen instituisse sacrificia in detestationem Deorum Gentium. *Cæsar*, inquit, *ariete, veluti in contumeliam Hammonis. Bos quoque immolatur, quem Aegyptii Apin colunt.* Affirmat nullam a Judæis imaginem servari, *Nulla*, ait, *simulacra urbibus suis, nedum templis sunt.* Tradit jam olim ab exitu de Aegypto Hebræos fuisse gentem diis invisam, atque inde expulsam Hammonis oraculo. Hæc Tacitus; qui tamen sibi met contradicit, dum scribit, Judæos malos cultus ac mores instituisse in odium Aegyptiorum; etenim ibidem ait eos *corpora condire, non cremare more Aegyptio.* At antiquissimum fuisse in Aegypto morem condiendi cadavera affirmant Strabo lib. xvi. Herodotus lib. xi. cap. 86. atque, ut alios omittam, lib. 2. Strommat. S. Clemens Alexandrinus. De Judaica quoque religione hæc Dio lib. xxxv. 11. *Nullam statuas Hierosolymis habebant, & Deum ineffabilem quemdam, & visui non obnoxium arbitantes magna religione, & super ceteros homines eum colunt. Cui & Templum maximum, & pulcherrimum construxerunt.* Ceteri scriptores appellarunt Hebræos curtos, sabbatarios, recutitos, clementes in porcos, nunquam tamen idololatrias; sed cum eos viderent absque Deorum simulacris orare, suspicati sunt quod colerent cælum; ac nubes: unde de iis Juvenalis:

Nil præter nubes, & cæli lumen adorant.

Igitur ex Hebræorum legibus, ex factis Mosaicis, atque ex testimoniis etiam Gentilium manifestum est, Polytheismum non esse a Mose institutum, neque probatum.

Opp. 1. Conflato in solitudine vitulo, Aaron ædificavit altare coram eo, & præconis voce clamavit, *Gras solemnitas Jehova est*: Exodi xxxi. 5. Sed Jehova est verus Deus: Ergo Aaron credidit vitulum in deserto conflatum esse verum Deum.

Respondet Vossius lib. 1. Idololatriæ cap. 3. Hebræos in deserto sub vituli simulacro revera unum Deum coluisse, peccasse tamen peccato

cato maximo eo quod adoraverint verum Deum in effigie Deorum Aegyptiorum: quod etiam affirmat de idolo Michæ, ac de vitulis, quos in Dan, & Bethel collocavit Jeroboam. Iccirco poterat jure, & absque mendacio clamare Aaron, *Cras solemnitas יהוה, Domini est*. Sed melius respondetur, hunc esse sensum verborum Aaron, *Cras solemnitas Jehova est*, scilicet vituli, quem vobis pro vero Deo constituitis: nec necesse est recurrere ad interpretationem Vossii, ac Professorum Leydensium, contrariam Patribus, ac præsertim Augustino scribenti in Pl. LXXIII. *Vitulus ille, quem adoravit populus infidelis apostata, quarens Deos Aegyptiorum, dimittens eum, qui liberavit de servitute Aegyptiorum*. Resp. Lyranus ac Vatablus Aaron hoc dixisse, quod speraret Moſen quamprimum rediturum ad cultum Idoli in Jehova festum commutandum. Hanc postremam responſionem adhibet quoque Eminentissimus Gotti: qui & aliam addit ex Grotio, quia Aaron sperabat veri Dei spiritum in eam imaginem venturum, sicut de astrorum spiritibus gentes aliæ sentiebant. Sed absit tanta ab Aaron insania; licet parum referat, si dicamus Aaron nondum Pontificem constitutum peccasse, ut concedere videtur A lapide. Neque Grotius ait, *sperabat*; sed *sperabant*, scilicet idololatræ, non Aaron: unde ego arbitror Grotium inclinare in sententiam Vossii, Calvinii, ac Leydensium, existimantium Hebræos in vitulo aureo adorasse spiritum veri Dei.

Opp. 2. Ipse Moſes æneum serpentem infixit perticæ, ut eum aspiceret populus: Atqui hæc est imago ac simulacrum Aesculapii, ei simillimum, quod ab Epidaurio urbe Peloponnesi adductum Romam narrat Ovidius in Fastis, & Propertius in Eleg. lib. 2. Ergo Moſes falsi numinis sculpsit imaginem, eamque erectam ad adorandum exposuit.

Resp. nego conf. non enim, ut adoraretur a populo erexit Moſes æneum serpentem, sed ad conferendam ei sanitatem. Ita respondet Tertullianus lib. 3. contra Marcionem, & S. P. Augustinus lib. x. de Civit. Dei cap. viii. Neque Moſes Deo mandante serpentem erexit in memoriam Aesculapii, aliorumve numinum Aegyptiorum, sed in promissionem Salvatoris, quod idem Augustinus serm. x. de Tempore his demonstrat. *Hæc mihi videtur quod duas significationes habere possit, unam propter diuturnitatem, quia vasa ænea diutius durare solent; aliam propter vocis claritatem, nam inter omnia metalla vasa ærea majorem tinnitum reddere, & longius sonare solent; Christi doctrina non in una tantum Judæorum gente innotescere, sed per univærsam mundum clavo salutiferæ prædicationis sono poterat pervenire: ideo serpens ille æneus efficitur, ut doctrina Christi in univærsio mundo clariùs prædicetur, &c.*

Opp. 3. Tacitus citato loco de Judæis scribit: *Effigiem animalis; quo monstrante sitim, famemque depulerant, penetrati sacraverunt*. Erat autem hæc effigies caput Alni, de qua Justus Lipsius Comment. in Ta-

citum ait: *Hoc de capite Asini magno consensu omnes veteres tradiderunt: ne tantopere noster culpetur, tanquam mendaciorum plenissimus Scriptor.* Meminit hujus Asinini capitis Posidonius, Apollonius, & Apion Grammaticus, cujus hæc sunt verba apud Josephum lib. 2. contra Apionem: *Dam Antiochus Epiphanes expoliasset templum, illud caput invenit ex auro compositum multis pecuniis dignum.* Consensu itaque scriptorum, & rei eventu manifestum est, Judæos caput Asini ex Majorum instituto superstitiosa religione servasse.

Resp. Tertullianus in Apolog. cap. xvi. hanc de Asinino capite narrationem putam fabulam esse. I. quia idem Tacitus in eadem Historia refert Cn. Pompejum, cum Jerusalem cepisset, & adiisset templum speculandis Judæorum arcanis, nullum illic reperisse simulacrum. II. quoniam si id Hebræi coluissent, nusquam nisi in sacrario fuisset servandum, quod solis Sacerdotibus licitum erat adire, conspectu ceteris interdicto per velum oppansum. In sacrario autem nihil dignum reprehensive ab Antiocho fuisse adinventum probat Josephus contra Apionem plurium Gentilium Historicorum testimonio, Polybii Megalopolitani, Strabonis Cappadocis, Castoris Chronographi, aliorumque. Extra sanctuarium vero unicuique fas erat inspicere. III. Neque Tacitus, neque ullus idololatra potest hæc Judæis objicere, cum Gentes ipsæ hæc aliaque horribiliora monstra adoraverint. Vide Tertullianum loco cit., Josephum Hebræum, & Marcum Minucium in Octavio. Observa etiam, an Tacitus sibi constet, qui supra scripserat Judæos; nullum penitus colere simulacrum. At Lipsius non ideo excusat Tacitum a mendacio, quod verum aliquid enarraverit, sed asserit non esse in eum fabulam referendam, quam tradiderunt scriptores alii. Qui tamen illam acceperunt ab Apione Grammatico pugnantly narrante, dum ait Asininum caput inventum ab Antiocho, postquam scripserat sublatum a Zabdo. Fabula derivata est a malitia, aut ignorantia Aegyptiorum, qui legentes, vel audientes hebraicam vocem פִּי אֲשֵׁי *Pi-jabo*, idest, *Os Domini*, in sacris literis usitatissimam, commenti sunt Judæos PIEO, sic illi appellant Asinum, adorare: vel a quodam Templo Judaici ritus condito ab Onia in Aegypto, quod propterea dictum fuerit, *וְהָיוּ לְעוֹן*, *Templum Onia*; sed Alexandrini sic acceperint, quasi esset appellatio *אֲשֵׁי פִי הָאֵל*, *ab Asino*.

Opp. ultimo: Joseph lib. vii. de Bello Jud. cap. xxi. inter cetera prodigia, quæ evenerunt ante dirutum incensumque a Tito templum, istud enarrat: *Festo autem die, quem Pentecosten vocant, nocte Sacerdotes intimum templum more suo ad divinas res celebrandas ingressi, primum quidem motum, quemdamque strepitum senserunt: postea vero subitam vocem audire, quæ diceret: Migremus hinc.* Et Cornelius Tacitus: *Expansa repente Delubri fores, & audita major humanæ vox, Excedere Deos; simulque ingens motus excedentium.* Cum ergo

in

in extrema populi calamitate Dæmones, ac Dii gentium Ierosolymis emigraverint; consequens est, ut antecederet fuerint Hebræis plures Dii Templi præsidium, populique numina tutelaria.

Resp. nego consequ. Etenim emigrantes a Ierosolymis spiritus, cum non fuerint Apis, neque Serapis, neque Numen aliud Judaico populo invisum, nulli fuerunt nisi custodes Angeli Urbem deferentes, ac celeste præsidium in posterum denegantes; vel ipsum summum Numen ad vindictam a scelertissimo populo provocatum per se, vel per Angelos suos terribili voce clamans, *Migremus hinc*.

PROPOSITIO III. Idololatria a posteris Cham originem ducit, & longe ante Moſen fuerunt Dii gentium, non solum numina naturalia, sed etiam animalia.

Demonstratur 1. Præclarissimorum Scriptorum auctoritate. Ita enim docent Hebræorum doctissimi Abenefdras, & alii, Laſtantius lib. 2. Institut. cap. 14. Hieronymus cap. 2. in Oſeam, S. P. Augustinus lib. viiii. de Civit. Dei cap. 24. Vetæres omnes qui de Idolorum vanitate scripserunt. Quibus addo Liliū Gyraldū Ferrariensem in Syntagma. Deorum, Joannem Boccaccium in sua Genealogia, Paulum Perusinum, cujus Commentaria de Diis Boccaccius exſcripſiſſe, sed immerito, fertur. De hoc etiam argumento eruditè scripſere Voſſius amplissimo volumine de Idololatria Gentium, Grotius in celebri Explicatione Decalogi, & Joannes Clericus in Prolegom. Historiæ Ecclæs. ſect. 2. Hanc ſententiam explico ſimul, ac probo. Principio homines pro Diis venerati ſunt aſtra, ſidera, & ignem; idque longe ante Moſen; quippe Ignis colebatur in Ur Chaldæorum, cujus cultum fuſiſſe Abraham vetuſtiſſima eſt Hebræorum traditio, neque videtur a Sacris literis diſſepare. Juſtinus quoque cum Tryphone diſputans ſcripſit Deum deſiſſe antea ſolem adorandum, permittendo nimirum, non approbando.

Una cum aſtris Dii vocati ſunt, diviniſque culti honoribus Reges atque Reginæ. Ita Chryſoſtomus in 2. ad Corinth. cap. xi i. Et colligitur ex Diodoro, qui lib. i. Biblioth. ait, Idololatriam ab antiquis temporibus in cultu regum fato ſunctorum fuiſſe ſitam. Aegyptii Iſidem & Oſiridem Reges ſuos tanquam Deos habuerunt: cumque eos puderet mortuorum animos colere, commēti ſunt Iſidem eandem eſſe ac lunam, & Oſiridem eundem cum ſole. Phœnices, auctore Athenæo, regem ſuum כרן Kronon in eam ſtellam, quam Græci a Phœnicibus edoſti *ὡς ἑρως*, Latini autem Saturnum vocant, conſecraverunt. Aſtarte in Veneris ſtellam, Hammon in Arietem pariter ſacraſti ſunt. Hoſ antiquiſſimos Reges fuiſſe poſteros Noe, qui Moſen præceſſerunt, ſalva Huetii veneratione, quem virum ob maximam eruditionem ſummo honore proſequor, certifiſſimum putæ, atque alibi oſtendo Neptunum idem eſſe cum Iapete filio Noe, Vulcanum cum Tubalcain, Martem cum Belo primo Rege Aſſyriorum, Apollinem cum Jubal Citharæ inven-

iuventore, Saturnum cum ipso Noha, &c., consecrantibus posteris Cham Patrum suorum memoriam. Cumque habeamus ante Mosen, Deorum historiam, falsum est omnes populares Deos Gentilium unam esse cum eodem Mose personam. At ad institutum revertor.

Cum sidera habeant quamdam cum animantibus similitudinem, exeperunt homines Regum suorum adoratores fingere idola animalium, ita ut Bos dictus sit Apis ob lunam: Phœnix, draco, & accipiter propter solem: Ibis ob Mercurium: Canis ob Sirium: atque hinc paullatim adinventæ sunt aliæ Deorum imagines, avium, pecudum, piscium, & monstrosæ quamplurimæ quibus essent capita brutorum, membraque hominum. Quapropter idolum vituli conflatum ab hebræis erat, ut arbitror, imago lunæ, & Apis: colebantque Gentes in animantium formis sidera, in sideribus Regum suorum animos. Ultro idololatria processit, nam intervallo temporis relata sunt in Deorum numerum ipsamet animalia, serpentes quoque, & crocodili; tandem etiam lapides ac plantæ, reputantibus Polytheis Deum quidquid eis utile videbantur.

Ex quibus colligitur idololatriam principio fuisse absque idolis, ac simulacris: hæc autem primo fuisse animantium, deinde alicujus Monstri, in his illudentibus simpliciores homines per oracula, ac signa mendacii malignis spiritibus. Idola humanam effigiem repræsentantia primus omnium traditur fecisse Ninus Rex Assyriorum, de quo loco citato Hieronymus. Hunc Ninum puto fuisse filium Nembrodi, filii Chus, filii Cham, filii Noe. At non omnia idola hominum vel animantium imaginem referebant: sed & erant quædam cum stellarum figuris, quibus icunculis ex veteri Syrorum superstitione arbitrabantur se futura prænoscere. Appellantur hebraice *Teraphim* תרפים: erantque hujus generis ea, quæ Rachel abstulit Labano patri suo Genes. xxx. 1. v. 19., & quibus divinationis causa execranda superstitione suspendebant in aures, ut scribit S. P. Augustinus Epist. lxxxi. 1., & inferitur ex cap. xxxv. Genes. v. 4. Consimile idolum habuit Nero, cujus monitione dicebat se futura prænoscere, ut narrat Suetonius. Hæc est verissima origo Idololatriæ, quam a Chananæis ad Aegyptios, hinc ad Phœnices, ab his ad Græcos, a Græcis vero ad Romanos fuisse derivatam constat omnium Historicorum consensu. Nunc vero contra hanc idololatriam natam ab homine, cui Pater suus maledixit, communibus Scholasticorum, ac specialibus quoque argumentis Dei unitatem vindicare conabor.



C A P U T VI.

Unum esse Deum demonstratur.

NOrunt omnes Tertulliani adagium lib. 1. contra Marcionem, *Deus si unus non est, non est*. Omnia quippe argumenta quæ probant Dei existentiam, demonstrant quoque unitatem; ut recte animadvertit lib. 2. Theologicorum Dogmatum cap. 1. vir clarissimus Ludovicus Thomassinus. Superaddam tamen, ut id exploratius fiat, Momenta quædam ex Sacris literis, ex miraculis, ex Theologicis rationibus, & ex ipsa Gentilium Theologia, indigitans ubi possint hæc pleniori doctrina pertractata a studiosis adolescentibus reperiri. Neque hoc loco præmitto divinas Scripturas, quæ & valent contra Tritheistas, & argumenta suppeditant contra omnes Idololatrias validissima.

Momentum I. e sacris literis erutum.

Divina Scriptura nil frequentius admonet, quàm unum esse Deum, non solum Hebraici populi, verum etiam universorum; Huic & propter Scriptorum auctoritatem, & propter veracitatem divinam, quæ duo nunc præsupponimus, firmissima habenda est fides: Igitur unus est Deus. Major probatur; etenim Deut. xxxi. v. 39. legitur: *Videte quod ego sum solus, & non sit alius Deus præter me*: 1v. Regum cap. v. v. 15. *Vere scio quod non sit alius Deus in universa terra*. Ps. 17. *Quis Deus præter Deum nostrum?* & 82. *Tu solus altissimus super omnem terram*. If. xxxv. 11. *Tu es Dominus solus*. I. ad Corinth. cap. vii. v. 4. *Scimus quia nihil est idolum in mundo, & quod nullus est Deus nisi unus*.

Neque id solum Scriptura narrat, sed etiam rei eventu confirmat, ratione universi, productione hominis, punitione impiorum, ac præsertim idololatrarum. Nam qui vitulum conflatum adoraverunt, cæsi sunt jubente Domino Exodi xxxi. fere viginta tria millia hominum: sociati Idololatriæ Israelitæ traditi sunt in manus Regum terræ, Judic. cap. i. 11. & e contra ad Deum suum reversi, fuerunt a Philistiim tyrannide liberati. Perit Rex Achab in bello propter cultum idolorum, obiitque Ochosis consulens Beelzebub Deum Accharon, ut Regum narrat historia. Exaltati e contra idolorum everfores Jacob, Moses, Josue, &c. Et quod enarrat scriptura confirmavit posteriorum sæculorum historia, ac miserabile fatum Neronis, Diocletiani, Maximini, Licinii, Juliani Apostatæ, aliorumque, qui idolorum cultum instaurarunt. Si enim dii gentium essent, virtute ac potentia summa pollerent, & potuissent contra Deum Israel salvare eos, qui eorum cultum summo opere promovebant; neque ipsis invitis unius Dei religio longe lateque

que fuisset diffusa . Urget hoc contra Ethnicos argumentum Laët. lib. 2. divin. Instit. cap. 4. Tertul. in Apologetico cap. 26. , & S. P. Augustinus in 1. de Civit. Dei cap. 4. ubi deorum vanitatem ostendit ex quo cultores suos , sibi que addictas civitates non potuerunt servare .

Respondent Gentiles vel hæc falsa esse , vel similia a suis quoque diis fuisse patrata . Addit Phereponus Animadvers. in Augustini Opera pag. 576. imprudentes videri Patres , qui iis armis usi fuerunt , quæ & Ethnici adversus Christianos tractare poterant .

At prior responsio propellitur ab Augustino lib. x. de Civit. Dei cap. viii. & xvi. Si enim pertinaciter negare velimus historias , nullis libris præbenda erit fides , multo minus Ethnicorum , qui vel Magi fuerunt , vel poetæ , & a suis quoque , ut infra ostendam , despiciuntur . Animadversio autem Phereponi impudentissima calumnia est , ac puerilis ratiocinatio . Nam libri Ethnicorum testantur urbes & cultores idolorum cecidisse diis invitis & contra pugnantibus : sic Ilium eversum invito Neptuno , sic a naufragio liber , & Turni victor Aeneas repugnante Junone . Infirmos ergo ac nullos hos Deos valide Augustinus demonstrat . E contra si Hebræorum , aut Christianorum templa diruta sunt , si in occisione gladii mactati fideles , si vera Religio ab hostibus perturbata , hæc omnia Deus noster prædixit , & evenerunt eo permittente ac volente in pœnam impiorum , nominisque sui exaltationem : eo vel maxime quod vera Religio crevit inter magna discrimina ; idololatria vero nunquam post fata revixit . Perperam itaque in Patres Phereponus debacchatur .

Momentum II. ex innumeris a Deo patratis miraculis .

Idololatrarum punitioni accedunt mirabilia , quæ in sui cultus exaltationem operatus est Deus . Plenæ sunt his sæculorum omnium historiae . Enim vero de Mose in libro Exodi legimus colubrum in virgam , & aquam vertisse in sanguinem , per undas maris Rubri populum traduxisse , eo petram percutiente saluberrimam fluxisse aquam , & orante celos manna distillasse . Quæ fecit Josue in transitu Jordanis , atque in expugnatione urbis Jericho , quæ Gedeon in Madianitas , quæ David in Philistæos , quæ Daniel apud Babylonem , quæ denique Machabæorum exercitus contra potentissimum Antiochum in ceteris Scripturæ libris recensentur . Atque hæc in conspectu idololatrarum pro unius veri Dei cultu fuere perfecta . Servatoris nostri Christi signa ac prodigia in novo habentur testamento : Petri , Pauli , ac Stephani in Actibus Apostolorum ; Discipulorum Christi ac Martyrum in Tabulis , & Ecclesiasticis Monumentis . Sufficiat hæc commemoravisse : in libro

libro enim de Angelis ostendam hæc fieri nisi divina virtute non posse . Ergo cum Deus sit , qui facit mirabilia magna solus , neque inveniri possint miracula perpetrata ab aliquo Gentilium Numine , prout ostendam infra solvens argumenta Ethnicorum ; consequens est unum esse . Denm , qui ab Hebræis , & Christi Fidelibus adoratur . Utuntur hoc arguendo S. P. Augustinus lib. xx1. de Civit. Dei cap. viii. alique Patres , nec non Hugo Grotius lib. 1. de Verit. Relig. Christ. n. xiiii. & lib. iv. num. viii. , Clericus etiam in Hist. Eccl. anno clvii. num. ix. & x. & in Prolegom. scet. 2. n. xi. & xii. quos propter eos nomino , qui negant miracula esse veræ Religionis argumentum . Ex Scholasticis vero ad probandam Dei unitatem hoc præsidio utuntur Antonius Boucat differt. 2. art. 2. & ex mirabilibus ordinis naturalis fati ingeniose ratiocinator noster Gavardi Quæst. 1. de subst. Dei art. iiii. n. 10.

Si dixeris hæc miracula fieri a spiritibus Deorum administris ; Respondeo id quidem verum de pluribus esse , quæ peraguntur ab Angelis , qui sunt administratorii spiritus . At sola Dei potestate , nutuque hæc efficiunt , sicut in regnis bene constitutis , nihil ministri extra communes leges operantur , nisi unius summi Rectoris arbitratu .

Momentum III. sive plurium argumentorum a ratione complexio .

Comprobat Dei unitatem etiam manifestissima ratio . Primo : Deus est summe magnus : ergo est summe unus . Ita argumentatur Aug. lib. i. de Trinit. cap. 7. Tertullianus in 1. adversus Marcionem , & Auctor libro- rum de Trinit. qui inscribitur Novatianus , Anselmus lib. de Incarnat. cap. 4. & D. Thomas in 1. contra Gentes c. 42. Ant. est communis omnium de Deo sensus : consequ. probatur ; quoniam hoc est esse summum , par non habere : par autem non habere uni tantum competit : *Duo ergo summa magna quomodo consistent ?* inquit Tertullianus .

Præterea : Si plures sunt Dii , vel differunt essentialiter , vel accidentaliter : In Deo neque essentialis , neque accidentalis differentia , potest excogitari : Ergo non sunt plures Dii . Probatur mi. si namque differunt essentialiter , idest quomodo species a specie sub eodem genere distat , perfectio essentialis quæ in uno est deerit alteri , & neuter erit summe perfectus : si vero differunt tantum accidentaliter , idest , aut sapientia , aut jurisdictione , aut loco , aut felicitate , neuter erit omnipotens , neuter immensus , neuter beatissimus . Quod si dixeris differre tantum numero , ut plura ejusdem speciei individua , ac tanquam Plato distat a Socrate ; vel a se invicem propagati sunt , veluti homo generatur ab homine , vel nullus habet ab altero originem : si propagati sunt a se invicem , is erit primus ac summus , a quo alii ortum ha-

To.I.

N

bent;

bent; quod si a nullo habent originem, erunt plures species, seu naturæ diversæ, reditque prior argumentatio. Quam urget in lib. de Trinit. Boetius, Lactantius lib. 1. divinarum Institutionum, Petavius lib. 1. Theolog. dogm. cap. 1v. n. 11. Thomassinus lib. 2. cap. 1. n. v. 111. Instantiam, quam patitur argumentum petitam ex divinarum Personarum distinctione diluam paulo infra. Reducuntur ad hæc duo genera argumenta omnia ab idea entis a se, infiniti, singularis, omnipotentis, ultimi finis: quæ iccirco omitto, sed rerum multarum cupidus ea adinveniet apud Aegidium, Gibbon, Gonet, & Suarezium, qui hæc planissime enucleant.

Tercio: Unus est mundus: Ergo unus illius opifex. Consequentia probatur; nam sicut unius Regni unus est Princeps, ita unius Mundi unus debet esse Conditor ac Rector; alias non foret universalis Dominus. Quamquam enim sunt in Mundo Respublicæ in quibus principantur Optimates, unus tamen hanc Regiminis formam proposuit, unus jecit urbium fundamenta, ut Athenarum juxta Platonem Pallas, Romæ Quirinus seu Romulus, Patavii, ut fertur, Antenor. Atque si compatiuntur Principatus consortium homines, pati non potest summus Deus; illi enim infirmi, & errandi capaces egent alterius consilio ac potentia; Deus autem summe verax ac potens neque consultatione indiget, neque auxilio. Quod si dixeris plures mundos fabricatos esse, vel diversæ ejusdem mundi partes a Diis pluribus, subsistit adhuc argumentatio. Nam vel multorum opera ad universas creaturas molendum erat requisita, vel unus poterat omnes constituere: si poterat unus, cur alios adhibuit? aut necessitate, aut libertate: si necessitate, ergo impotens est, non Deus; si libertate, non sunt igitur plures Dii necessarii. Si autem singulorum opificium requirebatur, consequitur omnes fuisse imbecilles. Vide in Oratione contra Gentes Athanasium. Atque huc spectat argumentum petitum a mundi ordine ac regimine, quod Hieronymus in Epist. ad Rusticum, & Cyprianus in lib. de Vanit. idolor. explicant comparatione apium, gruum, armentorum, & exercituum, quibus omnibus unus est imperator; & Athanasius, eodem loco, exemplo navis, quæ, nisi unus regat clavum, cursum recte non tenet; & citharæ, quæ non edit concentum, nisi unus philarmonicus eam plectro feriat.

Denique: irrupto semel limine unitatis, innumeri propemodum confluent Dii; semel enim effusam divinitatem nemo poterit sistere, & cum numerus eo sit perfectior quo major, multitudinis Deorum non erit terminus: Atqui Deos innumeros nullus sibi conscius fatebitur; Ergo neque plures. Argumentum est Tertulliani contra Marcionem: eo utitur noster Gibbon in hac quæst. n. 1x. accuratius vero Thomassinus loc. cit. num. v. 11. & ampliori etiam eruditione doctissimus Cardinalis Gotti n. v. 11. & v. 111.

Mo-

Momentum IV. a Gentilium testimonio, atque idololatrarum amentia.

Auctoritate quoque Gentilium refutatur Polytheismus, cum unum Deum fere omnes Scriptores etiam Idolis mancipati profiteantur. De Platone, Porphyrio, Iamblico, Proclo, aliisque hujus sectæ constat unum statuisse summum Deum, aliorum quidem, sed inferioris sortis, progenitorem. Empedocles, & Antisthenes multos populares Deos, at naturalem unum agnoverunt. De Aristotele, Simplicio, ac universa Peripatetica Schola compertum est, unicum rerum omnium constituisse principium. Quid senserint Cicero, Varro, Plutarchus ostendit in præclarissimo Opere de Civit. Dei Augustinus, & qui in illud Commentaria ediderunt, Vives, & Coquæus. Veterum Poetarum consensum probant Clemens Alexandrinus in Protreptico, Athenagoras, Lactantius, Tertullianus. Hoc argumentum proponunt quotquot de summo Deo disputationem instituunt, at ornatissima eruditionis copia Gerardus Vossius in 1. de Idololatria cap. 2. & Petrus Daniel Huetius in Concordia rationis & fidei lib. 2. num. xiii.

Si reponas longe majorem fuisse numerum illorum, qui plures Deos coluerunt, ut animadverti initio cap. v. Respondeo horum nullam habendam esse rationem. I. quia & ipsi unum Deum aliis præesse opinabantur: quem, auctore Plutarcho in Iside & Osiride, incolæ Thebaidos Cneph appellabant; ceteri idololatræ ignorabant quisnam esset, aut quo nomine vocaretur, si de Aegyptiis loquamur; at si de Romanis, Græcisque, erat lis omnium princeps aut Jupiter, aut Saturnus. Idem fatentur omnes Gentiles, ut in Concilio Carthaginensi sub Cypriano ait Saturninus Confessor, & in Epistolis ad Augustinum Longinianus, & Maximus: idem nota inscriptio Delphici Templi ΕΙΣ ΕΙ, *Unus est*, de qua Eusebius lib. 11. Præparat. Evangelicæ cap. 7. : idem oracula Apollinis apud Porphyrium, de quibus Augustinus lib. xix. de Civ. Dei cap. 23. idem denique Romani, qui cum Pantheon, idest, Deorum omnium Templum, modo Sanctæ Mariæ ad Martyres Sacrum curante Agrippa excitarent, Jovi tamen Victori dicarunt.

Secundo: demus existimasse idololatræ Deos imperio ac virtute pares; eorumdem tamen stulticiam certis rationibus comprehendimus. Principio ex hoc ipso capite, quod summæ dementiæ est plures Deos inter se æquales excogitare, ut probat Momentum præcedens. Deinde quia ii Dii aut erunt boni, aut mali: si boni, servabunt ordinem inter se: si est inter eos ordo, erit unus summus ad cuius præscriptum ceteri erunt colendi; ut nos Angelis & Sanctorum animabus præstamus religiosum obsequium: at vero in hac hypothese Dii non sunt. E contra si mali, non erunt illud summum bonum, quod sæpenumero memoravimus.

vimus. Ulterius Gentes cultum flagitiosissimis hominibus vita functis impendunt, impio in fratrem Romulo, ebrioso Baccho, Jovi in patrem sacrilego; impo Arimanio, Cacodamoni, malo Genio, quibus & nunc hostias mactant Indi, Aethiopes, ac Persæ. Rursus sacrificia immolant, ut cap. præcedenti diximus, animantibus, quæ cum ratione careant, sunt ipsis cultoribus deteriora: multo minus sunt hominibus comparanda sol, luna, astra, elementa, quæ nec vivunt, nec sentiunt: longius ab adoratoribus suis distant Numina, quæ nec subsistunt, & sunt corporum affectiones, ut motio. & salsedo maris, valetudo, eventus, cupiditas, quæ sub nomine Salaræ, Veniliæ, Fortunæ, Amoris supersticiosa gentilitas venerabatur. Quis vero dixerit Deum esse cultore suo inferiorem, Dominum servulo, Opificem structura sua, Auctorem figmento, ac plasmate? Denique extremam Gentium stultitiam eadem ipsarum produnt sacrificia, ac ritus; dira præsertim consuetudo idolis humanas victimas, puerorum quoque ac virginum, cruenta immolatione mactandi. Nefanda hæc sacra commemorant Lactantius, Plutarchus, Porphyrius, Saubertus. De turpitudine Sacrorum Matris magnæ scribit elegantissime S. Pater in vii. de Civit. Dei cap. xxv. e xxvi. de placentis conspersis adipe ab Hebræorum feminis Gentilium more oblati Reginæ cæli, ut legitur in Hierem. cap. 44. venustissimus noster Poeta Joannes Baptista Cotta in Adnot. ad Hymnum vii. ubi cæli reginam recte docet esse lunam. Nam (addam hæc ad præclarissimum Scriptorem, quem honoris causa nominavi.) Hebræi cæli reginam vocant *חַלְבַּי*, & a Philone Byblio dicitur *Βαλτις*, ab Abydeno vetustissimo Scriptore apud Eusebium in fine ix. de Præparat. Evangel. *Βάλτις*, Beltis, uxor Beli, & prima Regina Assyriorum; qui, ut capite præced. diximus, in *sole*, & *luna* Reges suos adorant. Atque factæ talibus Diis, Deabusque hujusmodi placentæ, ac liba satis vesaniam redarguunt superstitionem.

Tria ad hæc regerebant Pagani. I. Se non colere lapides ac metalla; sed simulacra, altaria, custodiam ignis & cetera id genus esse immortalium Deorum symbola: ita Celsus apud Origenem lib. vii. II. Aiebant conficta esse probra de ipsorum diis enarrata. III. Idola solum sculpta esse ad accersendas aereas potestates.

Verum commenticia sunt hæc omnia. Et primum quidem; nam certum est simulacrorum inventores existimasse Deos esse corporeos, atque ipsis idolis simillimos; ant. saltem consecratione ita statuis alligari, ut arbitrarentur se carere Diis, cum essent ablata eorum iconculæ. Habes exemplum Michæ Judicum xviii. v. 24. & plurima apud Ethnicos de asportatis Penatibus ne restaurari possent urbes hostium everse. Quapropter siue statuam, siue præsentem Deum dicant se colere, perinde est, ac eodem pacto insanire. Ejus generis est responsio altera; nam Deorum flagitia non nostri Scriptores primo commemorarunt,

rarunt, sed Homerus, Varro, Phornurus, & alii: qui si commentitia narrant, erunt ejusdem furturis Deorum virtutes, necnon Saturni, Jovis, Martis aliorumque Deorum nomina. Atque si falsa sunt, saltem Pagani Deorum probra imitantur, ut constat in Terentiana, Eunuch. Act. III. scena v.; & arbitrantur Deos delectari obscenissimis sacrificiis, quæ perstringit ingeniose Augustinus in II. de Civit. Dei cap. XXI. *Et sunt miseris*, ut scribit Cyprianus Epistola II., *religiosa delicta*. Tertiam denique responfionem ita impugnat Athanasius in Orat. contra Gentes: *Si hæc simulacra facta sunt, ut per ea advoceant potestates; cur hæc iisdem, quas invocant, potestatibus pluris faciunt? cur iisdem simulacris Dei nomen, & honorem imponunt, ac præstant? Quod si reponant se idolis potestates has anteferre, ingeret se iterum prior refutatio.*

C A P U T VII.

Objectiones contra prolata momenta solvuntur.

IN Polytheorum patrociniū primo loco afferri possunt divinæ Scripturæ. Habetur namque Exodi VII. v. 1. Moſen fuiſſe Deum Pharaonis. In Psalm. LXXXI. legitur: *Deus stetit in ſynagoga Deorum.* Et infra: *Ego dixi Diis eſtis, & filii excelsi omnes*: quo teſtimonio Chriſtus propriam divinitatem comprobavit Joannis cap. x. v. 35. Ad Corinth. prima cap. VIII. v. 5. *Siquidem ſunt Dii multi, & Domini multi.* Corruit ergo Momentum primum peti- tum ex ſacris literis.

Reſp. nego conſequentiam, quæ haud recte ex productis locis infer- tur, ut oſtendami ſingulorum explicatione. Exodi VII. Moſes dicitur Deus conſtitutus; ergo non erat ille Deus natura ſua, ſed Dei vicem gerebat. Deinde ibi appellatur Deus ſolo vocabulo Elohim אלהים, quo judiciaria potestas ſignificatur: ideoque ſenſus eſt Moſen electum a Deo fuiſſe ut divina judicia contra Pharaonem exequeretur, unde tranſtulit Jonathan, *Ego te conſtitui timorem Pharaonis*. Præterea ibidem v. 2. aperte innuitur quo ſenſu Moſes dicatur Deus: *Tu loqueris omnia, quæ mando tibi.... Sed ego indurabo cor ejus, & multiplicabo ſigna, & oſtenta mea in terra Aegypti.* In Psalm. item LXXXI. eſt vocabulum אלהים, & ſenſus eſt, *Deus stetit in ſynagoga judicum*; exercere enim Reges ac Judices miniſterium ipſius Dei, qui Proverbiorum VIII. v. 15. ait: *Per me reges regnant, & legum Conditores juſta decernunt.* Propterea dicit Psalmiſta Deum judicaturum ipſos judices, qui perverſe agunt, ut proceres Iſrael, qui Abſalomum fuerant ſecuti: *Deus, inquit, stetit in ſynagoga Deorum: in medio autem Deos dijudicat. Uſquequo judicatis iniquitatem: & faciem peccatorum ſumi-*

sumitis? Quod ex eodem Psalmo profertur, idem omnino est: videlicet, Dii estis, Iudices estis, atque secundum legem, ac præscriptionem meam ad regendos populos constituti, Diique participatione regiminis, non sempiterna substantia; Vos enim (nota quænam illico subsequantur,) sicut homines moriemini: & sicut unus de principibus cadetis. Quomodo eo loci Christus suam probat divinitatem, & invictorum retundit criminationem, ostendam in lib. de Trinitate contra Arianos, qui hoc testimonio abutuntur. Demum Apostolus de fallaci gentium opinione, non de proprio sensu loquitur, cum statim addat: Nobis tamen unus Deus. Atque ad communem hanc interpretationem addo Græcum textum, καὶ γὰρ ὁμοίαι αὐτοῖς ἀνθρώπων εἰσιν, Nam & si sunt qui dicuntur Dii, scilicet qui Deorum habeant nomen: quod satis, indicat Gentilium idola esse tantummodo εἰδωλά, Deos nomine atque appellatione.

Instabis. Concordant divinæ Scripturæ cum Theologia Paganorum. Hæc docet unum Deum præesse cælo, idest, Saturnum, alios aliis partibus mundi: hominis satorem esse Jovem: huic adstare Consentes, quos consulat in rebus maximis; unum denique esse Deum Hebræorum, ceteros nationum ceterarum: Atqui hæc omnia divinæ affirmant Scripturæ: Ergo his Deorum pluralitas nequaquam adversatur. Prob. mi. Primo Genesios legitur: *In principio creavit Deus cælum, & terram*: Hebraice ברא אלהים, observa vocabulum אלהים, *Elohim*. Capit. 2. v. 7. habetur, *Formavit igitur Dominus Deus hominem*: Hebraice יהוה יוצר יצחק nota Dei nomen *Jehova*: Ergo cælum condidit Deus *Elohim*, & iste est *Saturnus*; hominem vero plasmavit Deus יהוה *Jehova*, & iste est *Jupiter*. Eodem cap. 1. v. 26. Sator hominum *Jehova* ait: *Faciamus hominem ad imaginem, & similitudinem nostram*. Consultat ergo Deus *Jehova* Senatui Deorum in plasmatione præstantissimæ creaturæ, idest, hominis. En. *Jovem* in synagoga Deorum *Consentium*: denique cap. 2. v. 4. ubi omnium rerum commemorantur generationes legimus, *In die quo fecit Dominus Deus cælum; & terram*, in Hebræo Codice, ביום עשות יהוה אלהים. Occurrit istic & nomen Dei Conditoris hominum, יהוה *Jehova*, & aliorum Deorum, qui ceteras res procrearunt, אלהים *Elohim*; Igitur diversi Dii diversis rebus præsunt, unus cælo, alter hominibus, idest Hebræis, ille Philistiim, &c., probatque Gentilium Theologiam ipsa divinarum Scripturarum auctoritas.

Resp. nego minorem. Ad probat. dico I. Deum Creatorem cæli, & Deum Conditorem hominis esse unum; nam cap. 1. v. 1. dicitur cælum, & terram creasse Deus אלהים. Vers. 26. ait *Faciamus hominem*, Deus אלהים. Cap. 2. v. 7. habetur formasse hominem, Deum יהוה, versu 5. creasse cælum & terram, Deum יהוה אלהים. Est ergo idem אלהים ac יהוה, idemque Sator hominum, & Creator cælorum.

Quam-

Quamquam principio commemoratur nomen אֱלֹהִים, non יְהוָה vel quia istud revelatum est Moyſi, eratque olim ignotum: vel quia speciali quodam providentiæ titulo Deus univerſorum appellari voluit Deus hominum. II. Ea verba, *Faciamus hominem*, nequaquam ſignificant conſultationem Deorum; non enim requiritur Senatus conſultus ubi omnia moderatur perfectiſſima ſapientia: ſed ſignificatur hic aliquarum Perſonarum diſtinctio, ut explicabimus agentes de Trinitate. Quod ſi gratis admittatur expoſitio veterum Hebræorum exiſtimantium Deum Regum more nihil inconſultis angelis moliri, vel etiam opinio Platonis, qui in Timæo commentus eſt ſummi Dei ad Deos minores colloquium; erit verus Deus unus ille ſummus, cui obtemperant Angeli, Diique minores. III. Optime dicitur cap. 2. v. 4. Deum ac Dominum, *Elohim*, & *Jehova* operatum eſſe univerſa; ſed unius Dei plura ſunt nomina. יְהוָה *Jehova* incommutabilem exiſtentiam, אֱלֹהִים, *Elohim*, ut ſcribit Aben-Eſra, denotat intelligentiam, ſapientiam, prudentiam. Poſtremum nomen pluralis eſt numeri, ſed communis ſignificationis, quam a verbo adjuſcto ejuſque numero, ac ſuffixis diſtinguimus: in omnibus vero productis locis ſingulari verbo conjungitur; & cap. 1. v. 1. legimus בָּרָא אֱלֹהִים, *creavit Deus*: verſu 26. וַיֹּאמֶר אֱלֹהִים *Et ait Deus*: cap. 2. v. 7. וַיִּצַּר יְהוָה אֱלֹהִים, *Et formavit Deus*: Unus itaque, ac ſingularis ubique Deus.

Opp. 2. Conteſtantur Deorum pluralitatem innumera fere miracula. Ergo fatendum eſt plures eſſe Deos. Ant. probatur I. Ex Idolorum oraculis; quorum plura numerat Celfus apud Origenem lib. vii. 1., ubi Hebræorum Prophetis opponit Celfus Pythias, Dodonidas, vateſque Clarii Apollinis, & Jovis Ammonis, atque conqueritur horum vaticinia nihili fieri a Chriſtianiſ. II. Ex prodigiis patratſ ab Iſide, in cujus templo excubantes infirmi a medicis deſperati, plurimi capti oculis, mutilati, oppreſſi languoribus in priſtini vigoris integritatem reſtuebantur; ut ſcribit lib. 1. Diodorus Siculus. III. Ex geſtis ab Apollonio Tyanæo, qui Romæ puellam revocavit ad vitam, evanuit ab oculis Domitiani, & raptus in cælum eſt, ut reſert Philoſtratus, inter Virginum, Divorumque concentus. IV. Ex miraculis Aſculapii, in cujus Romano Templo ad inſulam Tiberinam appenſa erat marmorea Tabula ſanatorum ab ipſo hominum exemplis inſcripta, cujus etiamnum fragmentum extat apud Gruterum pag. lxxi. V. Ex prodigiis Veſtaliū, de quibus narratur ab Ovidio in 2. Faſtorum compreſſa Sylvia Veſtæ ſimulacrum manus oppoſuiſſe oculis, divinumque ignem quali ſenſu præditum ſeſe contraxiſſe ſub cineres. De Aemilia narrat Dionyſius lib. 2. Antiquit. Roman. implorato Deæ præſidio, abſciſſam ſtolæ carbafinæ laciniam in frigidos injeſtam cineres extemplo a flammis fuiſſe correptam, cum ipſa tamen ignem negligentius aſſervaveſſet, & foret extinſtus. De Tucia ſcribunt idem Dionyſius, & Valerius Maxi-

mus

mus lib. viii. cum accusaretur violatæ pudicitie accessisse prosequente universo populo ad Tiberim, & vacuo cribro hausam aquam pertulisse usque ad forum. De Claudia etiam narrant cingulo traxisse navim deferentem Idæ simulacrum, & in Tiberis vado hærentem. VI. Ex patratâ a Vespasiano, & Hadriano: quorum ille, auctore Tacito lib. iv. cap. 81. cæcum, & ægrotum manuum impositione sanavit; is vero, Spartiano teste, cæcum a nativitate Pannonium nomine illuminavit; quod simile est miraculo Christi, de quo Joannes cap. ix. v. 32. *Æsculo non est auditum quia quis aperuit oculos cæci nati*. Sunt & alia in dissertationibus de Angelis expendenda.

Resp. nego ant. ad probat. dico nullam fidem habendam esse Gentilium miraculis, quæ & ipsorum Scriptores celeberrimi in dubium revocant, ut nulla idonea Testium fide suffulta, planeque conficta, ait Historiarum initio Livius antiquorum fabulas sequentibus verbis excusans: *Datur hæc venia antiquitati, ut miscendo humana divinis primordia urbium angustiora faciat*: & si quædam facta concedantur, aut talia fuerunt quæ in admirationem traherent rerum naturalium ignaros, aut veneficia malorum spirituum fraude conficta, aut non ab his, sed a suprema mente patrata. Ad quæ distinguenda alibi certas regulas tradam: nam satis est modo si prædictorum miraculorum falsitas ostendatur. Oracula itaque Apollinis, Ammonis, aliorumque Deorum nullam notam præseferunt divinitatis: primo, quia illorum verba fuerunt ambigua, ut demonstrat ex Oenomai locis Eusebius lib. iv. P.E. a cap. 20. ad 26. Grotius etiam in iv. de Verit. Relig. Ch. num. ix. & in libro de Oraculis Ant. Van-dale: eaque ipse Cicero in II. de Divinat. flexiloqua & obscura appellat. II. Quoniam hisce oraculis Religionis nostræ veritas firmatur, & aliquando apud Paganos aliquorum vatum opera, usus est Deus, ut ad mysteria fidei nostræ, & ab idolis aversionem superstitiosos diserneret. Nam idolorum oraculis manifestatum est Deum esse unum, Hebræam gentem sapere quæ numen ingentum veneratur, ut probat Augustinus lib. xix. de Civit. Dei cap. 23. & Paræneticus ad Græcos, qui tribuitur Justino: venturum quoque ab Oriente, qui rerum omnium potiretur, Regemque omnium Regum, ut fatetur Suetonius in Vespasiano, Tacitus lib. iv., & Cicero in II. de Divinat. III. Quia si quid definitus prædictum est, poterat ex causis naturalibus præsentiri, ut medici prædicunt exitium aut sanitatem, ut Anaximander, & Pherecydes terræmotus prænunciarent, ut astrorum inspectores de pluvia, nive, grandine vaticinantur. IV. Quia hæc oracula fieri ab Antitheis ac dæmonibus ex eo constat, quod in amores illicitos, in improborum hominum laudes, in cædes ac bella, in horribiliora crimina ab ipsis Gentilium legibus damnata cultores suos fraudulenter alliciant. Hæc de Oraculis.

Patrata ab Iside miracula nulla sunt. Refert enim loco citato Diodorus

dorus ægros in ejus templo abreptos somno de morborum remedio fuisse admonitos, quod evenire poterat fraude sacerdotum qui nocte adloquerentur infirmos, & cum essent medicæ artis peritissimi præferberent pharmacum, aut propterea quod somniarent ægroti de remedio, de quo antecederent agentes medicos audierint. Quod si pauci extemplo curati sunt, fuit sanitas restituta in iis languoribus, qui aut sola imaginatione, cujus maxima vis est in chronicis morbis, aut agente intus cacodæmone graves admodum videbantur.

Apollonium Tyanæum præstigiis, magicisque artibus deditum ostendit Eusebius contra Hieroclem, nec dissentit Tatianus in Annotatis ab Hugone Grotio ad IV. de Relig. Christiana num. VII. Dicam de ipso breviter: alia ab ipso patrata narrantur Romæ anno Aeræ Christianæ xci. Domitiani Imperatoris xli. alia Ephesi in Xysto anno xcv. ac i. Nervæ: alia in ejus excessu in Cretensi Templo Dianæ Diçtynnæ. Omnia in Christi contemptum ficta a Philostrato constat comparatione factorum; quod & ipse dicatur ab aliorum oculis evanuisse, Demetrio ac Damadi Puteolis conspectum, creditumque phantasma se iis præbuisse tangendum, ascendisse in cælum inter angelorum, ac virginum choros. Deinde Philostrati mendacia se se produnt, dum scribit Domitillam fuisse sororem Domitiani, & Clementem perpaucis diebus ante Domitiani obitum fuisse trucidatum, cum oppositum doceant Dio, Suetonius, Eusebius. Item dum recitat orationem, quam ait ab Apollonio conscriptam; & ex nugis, ac stylo manifestum est Criticis omnibus, fetum esse ipsius Philostrati genuinum. Rursus dum fatetur plura a se de Apollonio narrari ex incerto rumore, neque reperiri veridicum testem, cum & Damis ad Nervam magistri jussu professus sit, ne ullus eum morientem videret. Sed concedamus liberaliter omnia. Nullum Apollonii factum est, quod superet virtutem dæmonum. Romæ enim raptus a Domitiano, Ephæsi quæ Romæ contigerant edoctus fuit a malo Genio. Duo tantum mirabiliora videntur: resurrectionis cujusdam puellæ; idque Philostratus ipse in dubium revocat, asserens quod forte vitalis auræ scintilla intra puellam compressa medicos delituerit. Assumptio in cælum in Templo Diçtynnæ; & hanc fabellam plura momenta confutant: unum, quod alii narrant Apollonium mortuum Ephesi, alii in Lindo, alii in Creta, ut fatetur ipse Philostratus: alterum, quod scribat Apollonium a Sacerdotibus Dianæ conjectum in vincula, nec potuisse canes arcere qui Templi custodiebant fores, nisi objecta illis ossa: tertium, quod sine ullo auctore, ac teste hæc omnia Philostratus fabulatur. Quid plura? Neque illud mirandum est, Dæmones una cum corpore malefici spiritum asportasse.

Veniamus ad Aesculapium. I. Videant idololatræ qualis iste sit Deus, quem de cælo a Junone percussum fulmine narrant Polyanthus To. I. O Cyre-

Cyrenæus in libro de Ortu Aesculapii, Sextus Empiricus in I. adversus Mathem. cap. x11. Telesarchus, Chalcedonius, qui Clementi Alex. vi. strom. vocatur Melesagoras; unde sanator Glauci, filiarumque Proeti non potuit salvare seipsum. II. Aesculapii curationes suspectas ostendit, & comico sale conspergit Aristophanes in Pluto, quoniam Sacerdotes noctu cum puellis ægros circuibant, idoli, divarumque speciem simulantes. Postremo: nunquam Aesculapius verbo & imperio quemquam sanasse legitur, sed tantum potionibus, succisque herbarum ac graminum: necnon quamplurimi ejus medicamine ebibito sese perniciosius habuerunt. Vide in 1. contra Gentes Arnobium.

Jam ad Vestales. Corrupta Sylvia apparuisse in Vestæ idolo præfatum ostentum scribit quidem in II. Fastorum Ovidius, sed in VI. ait:

Esse diu stultus Vestæ simulacra putavi:

Mox didici curvo nulla subesse tholo.

Nulla erat ergo in Templis effigies Vestæ, licet in antiquis numismatibus plures conspiciantur, non solum mulieris sedentis, ut scribit Plinius; sed etiam stantis, ut in nummo Vespasiani apud Lipsium cap. 111. In nummis tamen Faustinae, & Q. Aemilii sunt Vestæ inscriptiones absque effigie. De Aemilia & Tucia resp. Augustinus lib. xx11. de Civitate Dei cap. x1. quæ ab his gesta sunt non excedere naturalem Dæmonum facultatem: alii Theologi affirmant non repugnare quin vera miracula in veritatis testimonium, atque innocentiae patrocinium, etiam a paganis efficiantur. Augustini de Vestalibus judicium firmissimum est: nam in Tucia Dæmonis apparet calliditas, qua ipse falsam de Virgine suspicionem Romanorum animis insinavit, ut confirmandi idololatriæ cultum per cribri aquam præberetur occasio. Dionysius enim eodem loco scribit, accusatorem Tuciæ post hac multum diuque conquistum nec vivum usquam comparuisse, nec mortuum. Demum ne Vestæ patrocinio tribuamus Tuciæ, Aemiliæ, Claudiae, aliarumque salutem, faciunt consimilia Vestalium exempla. Aquiliam namque Severam, repudiata Paula quod maculam haberet in corpore, contra jus, fasque uxorem duxit Avitus, tenuitque cum probro atque dedecore, nec Vesta illatum Virgini suæ stuprum vindicavit, ut narrat Jo. Xiphilinus in vita Sardanapali. E contra Ant. Caracalla Vestales quatuor occidit; ex quibus una, quam vitiare non poterat, (obstiterat enim Virgo,) non opitulante Dea viva sepulta est, exclamans scire ipsum Antoninum se virginem esse. Ergo Vesta ignis sui custodes neque incontaminatas in extremo periculo liberavit, neque a furentium libidine reddere potuit immunes.

De Hadriano, ac Vespasiano affirmant uno ore Theologi esse per simulationem facta quæ nobis sexto loco opponebantur; idque non gratis, sed auctore Tacito, qui refert curatos a Vespasiano non fuisse humana arte insanabiles, neque cæco, cui visum restituit, excusam prorsus

prorsus vim luminis : auctore quoque Spartiano , qui affirmat Hadriani miracula a Mario Maximo irrideri tanquam simulationes ad levandam Imperatoris stultitiam adhibitas . Nam Antoninus Pius , ut Hadrianum volentem se occidere in spem induceret recuperandæ salutis , ei febrienti Pannonium tanquam veterem ætæum præsentavit , ut apparenter illuminatus oppressum desperatione virum levaret . Lege Salmasium Hist. Augustæ in Spartiano . Hæc communiter Theologi : quibus perpaucæ addam . Quantum attinet ad Hadrianum , tametsi eum febris reliquit , quod passim in debilitatis corpore contingit , invaluit tamen ejus morbus , eodemque anno a . d . vi . Idus Julias obiit apud Bajas . Vespasianum vero inquit Tacitus Alexandria sanasse quemdam oculorum tabe notum , aliūque ægrum manu , *Monitu Serapidis Dei , quem dedita superstitionibus gens ante alios colit* ; Suetonius scribit hunc non manu ægrum fuisse , sed *debilem crure* . Ergo neque de re gesta consentiunt , neque negant interfuisse Sacerdotum Serapidis subornationem . Ero denique liberalissimus , & Vespasiano datam miraculorum virtutem fatebor . Illum ad principatum signis , & ostentis ab aliquo numine divinitus excitatum scribunt Tacitus in i . & iv . Historiarum , Suetonius cap . 7 . Josephus in iii . de Bello Judaico cap . 27 . Præordinaverat enim illum Deus Christianorum contra pervicaces Hebræos ministrum justitiæ suæ : ab eoque dirutum est Jerosolymitanum templum , versa civitas , dispersi per orbem Judæi . Ergo præmovente eodem Deo Christianorum mira operabatur Vespasianus : nec male Grotius in iv . Relig. Christ. cap . viii . *Si verum est per Vespasianum cæco visum redditum , factum id est , ut in hac re venerabilior Imperium Romanum facilius adipisceretur ; lectus quippe Deo judiciorum ipsius in Judæos minister* .

Opp. 3. Argumenta a ratione petita ex æquo militant contra Polytheismum , & contra Trinitatis mysterium : Ergo vel inde unitas Dei non probatur , vel evertitur divinarum Personarum pluralitas . Probatur ant. I . Si tenet argumentatio ista , Deus est summe perfectus ergo est unus , debet valere & hæc : Persona divina est infinite perfecta : Ergo in Deo una tantum persona est . Rursus si recte arguitur ; Unus Deus differre non potest ab alio neque substantialiter , neque accidentaliter : ergo nullo modo ; fas erit ita ratiocinari : una persona neque accidentaliter , neque substantialiter potest differre ab alia : Ergo nulla prorsus ratio . Item si bona est consecutio : Poterat unus Deus esse auctor univerforum : Ergo Dii plures superflui ; habebit eandem vim hoc enthimema : sufficit ad omnia moderandum una persona , ergo frustra creduntur plures . Tandem irrupto limite unius personæ non iccirco constituuntur infinitæ : Ergo infiniti Dii non confluent , tametsi detur multitudo Deorum .

Resp. nego antecedens . Ad i . probationem dico tres divinas personas

fonas non esse plura summa, ac perfecta bona, sed unum duntaxat; unam scilicet substantiam undequaque infinitam: quomodo autem cum hac indivisibili substantia tres divinæ personæ consistent, dicam, quantum humana ratio potest percipere, in 1. libro de Trinitate cap. vi. Nam modo fat est si respondeatur cum D. Bern. lib. v. de Considerat. cap. 1. *Nunc vero cum tres illa personæ illa substantia sint, & illa una substantia tres illa personæ, quis numerum neget? Nam vere tres sunt. Quis numeret tamen? nam vere unum sunt.* Itaque nego consequentiam; quippe tres Personæ, quæ sunt una substantia, sunt etiam unum summum bonum: plures autem Dii cum sint natura secreti, sunt plura bona, ideoque finita. Ad 2. dico, quod necesse est, ut plures Dii distinguantur adinvicem aut specie, quemadmodum equus distat ab homine, aut separatione ejusdem naturæ, prout Plato distinguitur a Socrate: utrumque vero importat divinæ substantiæ limitationem. At personæ neutro modo ad invicem distinguuntur, cum sint eadem numero atque indivisa substantia: sunt autem diversæ sola personalitate, quæ, ut ait Damascenus lib. 1. de Fide Orthodoxa cap. vii. *quæ vox nec naturæ discernen, nec dignitatem, sed subsistendi modum indicat.* Nego itaque consequentiam, ac paritatem. Ad tertium respondeo creare, regere, providere non esse attributa quæ convenient Personæ ratione Personæ, sed ei competunt ratione substantiæ, atque omnipotentis, auctoritatis, domini, quæ sunt in singulis divinis personis penitus indistincta: unde nego suppositum consequentis, ac paritatem: cum diversi Dii diversa potentia sint præditi, eo quod separata natura separantur quoque operationes ac munera; divinæ autem personæ eadem pollent omnipotentia, cum non sit dividenda facultas & operatio, ubi non potest separari substantia. Ad ultimum pariter neganda est consequentia: etenim Dii gentium multiplicantur cum propagatione ac separatione substantiæ, neque idonea causa reddi potest cur unus Deus alium generet, iste alium, & tamen cessent generationes Deorum, qui, eo ipso quod Dii, fecundissimi debent esse. Verum Personæ originem habent, inter se absque ulla separatione naturæ, atque fecernuntur invicem solis connotatis & relationibus: quæ nequeunt amplius multiplicari; quoniam si in Deo est una indivisa substantia, erit quoque una generatio, & unus Filius: erit una dilectio, & unus Amor: & si contra plures constituentur filii, plures erunt generationes, pluresque substantiæ, neutra autem illa divina, quæ cum sit infinita, una est; ut hætenus demonstravi.



C A P U T . VIII.

*De iis qui statuerunt duo summa Principia,
Bonum unum; alterum Malum.*

INserunt huic libro recentiores Theologi Marcionitarum, & Manichæorum Historiam, qui duo, ut dixi initio cap. v. constituerunt Principia. Marcion illorum Hæreticorum Magister, Helenoponticus fuit, patriamque habuit urbem Sinopen. Vitiata virgine, tametsi continentiam voverat, a patre Episcopo Ecclesia pulsus, Cerdonem Gnosticum hæresiarcham audivit, eundem sequutus Romam; quo Cerdo advenerat Hygino vivente, ac proinde ante annum cxxviii., Marcion vero circa annum ccli., vel, ut aliis videtur, clv. Certum est errorem suum disseminasse vertente II. sæculo, duosque statuisse Deos, *tantumquam duas symplegadas naufragii sui*, ait lib. 1. cap. 2. Tertullianus. At nonnulli Marcionis discipuli, ut scribit Rhodon apud Eusebium Hist. Eccl. v. cap. 13., non duos, sed tres affirmarunt; unde factum est, ut ipsi Marcioni tria a quibusdam fuerint exprobrata principia, non solum ab Epiphanio Hæresi 42. atque a Theodoretto, & Cyrillo in locis, quæ erudite expendit Natalis Alexander SÆC. II. Dissert. 2. art. 2. verum etiam, quod prætermisit Alexander, a Dionysio Romano apud Athanasium libro de Decretis Synodi Nicenæ num. 26. Ab ea ergo Questione an Marcion duos tantum, an tres Deos agnoverit, cum facile veteres possint conciliari, arbitror esse abstinendum; atque sufficienter illam resolveri ab Augustino lib. de Hæresibus n. xxii., ubi ait: *Marcion quoque, a quo Marcionitæ appellati sunt, Cerdonis secutus est dogmata de duobus principiis: quamvis Epiphanius eum tria dicat asseruisse principia, bonum, justum, prævum; sed Eusebius Sincrum, quemdam trium principiorum, atque naturarum scribit auctorem.* Non levis mihi suspicio est, *justum ac prævum* perperam fuisse distincta, cum per Marcionitas ac Cerdonianos essent unum; qui *bonum* dicebant tanquam Deum misericordem, *justum* vero appellabant prævum, quasi immitem ac ferum: unde falluntur qui in Augustino pro *justo* censent legendum esse *injustum*. Merito igitur doctissimi Patres Benedictini productam nuper Augustinianam lectionem retinuerunt.

Marcioni, quem martyr Polycarpus appellavit *Primogenitum diaboli*, adhæsit sæculo III. Cubricus Persa servili genere natus, quem anus quædam manumissum adoptavit, atque librorum Terbinthi, seu Buddæ, nec non bonorum omnium conscripsit hæredem. Is est Manes, quem sui Manichæum nominaverunt, *quasi manna fundentem*. Manetis enim nomen, quod assumpserat Cubricus, eo quod apud Persas designet eloquentem virum, ac disputatorem egregium, commutarunt

in Manichæum, ne Hæresiarcha *furore percitus diceretur, quod significat Græce Manes*, a verbo *manas* ex quo *manias*, *Stultitia*, nomen. Is imperante Probo xxii. discipulos sibi adscivit, inter quos celebriores fuit Thomas, Hermas, & Adda. Dixi *imperante Probo* cum Augustino lib. xiiii. contra Faustum cap. 10. quem sequitur Petavius in Adnot. ad Epiphanium, & Natalis Alexander in Synopsi Hist. Eccles. Sæculo iii. art. ix. §. 1. Joannes Sianda in Lexico Polemico refert ortum hujus hæreseos ad annum 277. nempe ad tempora Aureliani. Siandæ sententia vera est, & ab Eusebio atque Epiphanio traditur, eique subscribit Gerardus Vossius in Fragmento de Manichæis. Non tamen hi recedunt a sententia Augustini; quippe Manetis hæresis cœpit innotescere in Perside anno 277. sub Aureliano, & coalescere cœpit ac propagari sub Probo, qui tantum biennio post suscepit imperium, nempe anno Christi cclxxix. Hæc dicere malo, quàm cum Natali de anno exorti Manichæismi nutare: ita enim Historici antiquiores, qui alias non convenirent, facillime conciliantur. Mancti a Perfarum rege cutis vivo detracta est arundinibus, in quibus supersticiosa religione Manichæi hac de caussa cubabant. Alios Manetis errores, præter duo rerum principia, ad hunc referre locum instituti ratio non postulat. Scribere contra Marcionem Clemens Alexandr. lib. iiii. Strom. Irenæus lib. iv. adversus Hæres. cap. 14. Tertullianus integris libris quinque. Oppugnarunt vero Manichæos Titus Bostrensis, Epiphanius, Theodoretus, & alii; sed omnium luculentissime S. P. Augustinus pluribus contra eos Operibus editis: hunc autem errorem in libro præsertim de natura boni, & xx. contra Faustum. Hæc est brevissima Marcionitarum ac Manichæorum Historia, quorum error manavit a falsa opinione, quod malum substantia esset atque natura, non boni deficientia. In his videntur omnes consentire; sed non a Manete, non a Marcione, non a Cerdone, aut Valentino exortus est error iste, ut communiter traditur. Antiquiorem habuit originem, qua patefacta perversum dogma oppugnabo.

PROPOSITIO I. Opinio de duobus Diis bono, ac malo una cum idololatria a posteris Cham cœpit diffeminari.

Explicatur simul propositio, ac probatur. Vetustissimam apud Aegyptios idololatriam colligimus, ex dictis cap. v. Prop. iiii. quod Isidem, & Osiridem Reges suos principes Deos habuerunt; primos autem Aegyptiorum Reges ad tempora filiorum Misraim, qui & Aegyptus, esse referendos satis constat. Atqui in Iside, & Osiride Aegyptii duo contraria principia venerabantur, scribente Plutarcho in Iside, & Osiride existimasse priscos Aegyptios, *non unam esse rationem quæ universa contineat, & dirigat, sed cum multa e bonis juxta, malisque sint confusa, imo nihil natura hæc sincerum proferat, non esse unum aliquem primum, qui e duobus deliis res nobis, veluti aliquem liquo-*

liquorem distribuat, ac misceat; sed a duobus principiis contrariis, ad-
versisque duabus facultatibus, quarum altera ad dexteram, altera
retrosum avertitur, atque reflectat, cum vitam esse mixtam, tum ip-
sam mundum circumferri, variisque, & omnis generis motibus agita-
ri. Igitur apud Aegyptios una cum Polytheismo error Marcionitarum
invaluit. Hinc ad Chaldaeos & Persas propagatum. Magi enim Persa-
rum, quorum princeps est Zoroaster, quem Ammianus Marcellinus
lib. xxxi. i. i. asserit vixisse saeculis praeiis, ac longe ante Cyrum, Scri-
ptor autem Recognitionum, aut sit Cleniens Alex. aut quisvis alius,
lib. iv. putat eundem esse cum Misraim filio Cham, neque ipse Hue-
tius saltem Mose facit posteriorem: Magi, inquam, seu Persae ab ini-
tio agnoverunt Deum Oromasdem causam boni, & Arimanium caus-
am mali, auctore eodem Plutarcho cit. loco, necnon Aristotele, Her-
mippo, ac Laertio. Propagatus ergo est una cum Idololatria error Ma-
nichæorum. Transiit præterea Polytheismus ad Græcos, inter quos
emergentibus Philosophorum sectis floruerunt Platonici & Stoici, ac
inter hos Democritus primum & Chrysippus. Qui & fati necessitatem,
& incompressam materiam, adversariam, reluctantem naturæ benefi-
cæ agnoverunt, ut colligitur ex Platone in lib. de legibus. Hauserunt
ergo hi a Chaldaeis duorum principiorum perversum dogma. A Stoicis
exorti Gnostici; quorum princeps fuit Simon Magus primum omnium
hæreticorum, ut ait lib. 2. contra advers. legis ac Prophet. magnus
August. quamquam Epiphanius Gnosticorum originem arcescit Hæresi
xxvi. a Nicolaitis. Simon anno a Christo passo vi. cepit hæresin spar-
gere: discipulum habuit Menandrum, Menander Basilidem, quem Eu-
sebius in Chron. ad annum Ch. 134. Gnosticorum fecit auctorem, Ba-
silides Cerdonem, de quo Tertullianus de Præscription. cap. 11.,
Accedit his Cerdon quidam. Hic introducit initia duo, idest duos Deos,
unum bonum, & alterum sævum: bonum superiorem; sævum mundi
creatorem. Cerdonis, ut diximus, auditor fuit Marcion; quem pro-
inde idem Tertullianus lib. v. cap. penult. Stoicum jure dicit, collocan-
tem cum Deo creatore materiam de porticu Stoicorum. Ea propter Mar-
cionitæ cum Stoicis fati necessitatem adstruxerunt, liberumque negave-
rint arbitrium ad peccandum, existimantes quodcumque nialum neces-
sitate quadam a principio malo pendere. Itaque talis est, ut arbitror,
hujus insanix origo, ac progressus: Esse Deum bonum ac Deum ma-
lum Manichæi acceperunt a Marcionitis, Marcionitæ a Gnosticis, Gno-
stici a Stoicis, Stoici a Chaldaeis & Persis, Persæ ab Aegyptiis, Aegy-
ptii autem a filiis Cham, a quibus omnis idololatria. Si quis vero con-
tendat cum Natali Alexandro Dissert. xlv. sæc. II. Art. 1. Deum Mar-
cionis fuisse ante Christum penitus inauditum, eo quod Tertullianus
lib. 1. cap. vii. novum appellat; sequatur, si placet, virum doctissi-
mum. Ego Tertulliani argumentum probando dicam Marcionis Deum
ficti-

fictitium esse, quia novus: sed novus, quia illum novitas aliquando produxit cum primum consecravit, ut de Saturno ait ibidem Tertullianus. At novum esse, & post passionem Christi consecutum non tanta facilitate affirmaverim.

PROPOSITIO II. Malum non est aliqua substantia, quam necesse sit ab efficiente summa causa produci.

Id asserunt omnes Ecclesiae PP. omnesque Theologi, inter quos distincte hanc propositionem propugnant D. Thomas Quæst. XLV. 1. 1. art. 1. noster Aegidius in 2. Sent. dist. 1. Sylvius in præcitatam D. Thomæ Quæstionem, Thomassinus lib. 2. Theol. dogmat. cap. x. & xi. & alii, quos memorare non vacat. Ac 1. probatur ex sacris literis. Quidquid a prima causa productum est, bonum est, siquidem Gen. 1. legitur: *Vidit Deus cuncta quæ fecerat, & erant valde bona*: & in priori ad Timoth. cap. 4. *Omnis creatura Dei bona est*. Ergo malum non est a prima causa productum.

Deinde probatur Sanctorum PP. auctoritate: ait namque Scriptor de Divinis Nom. cap. 4. *Privatio est malum*. Ath. in Orat. contra Gentes: *Necessum est veritatem Ecclesiastici dogmatis explendescere: nullum malum nec a Deo, nec in Deo, nec ab initio extitisse: neque ullam esse ejus substantiam*. Ambrosius lib. de Isaac, & anima cap. 7. *Quid est aliud quod malum dicitur, quam privatio boni?* Damascenus lib. 2. de Fide cap. 4. *Neque aliud quidquam est malum, quam boni privatio*. Augustinus lib. xi. de Civit. Dei cap. 22. *Omnino natura nulla est malum, nomenque hoc non est nisi privationis boni*. Plura habet consimilia Augustinus in lib. de Nat. boni, in lib. 1. contra Adv. legis, in vii. Confess. cap. xii. in iiii. de lib. arbitrio cap. 13. &c. Ludovicus Thomaf. demonstrat eandem fuisse veterum Philosophorum Sententiam, quod de omnibus propter ea, quæ dixi in præced. Propositione, non ausim proferre.

Probatur tandem traditis ab Augustino rationibus. Primo quidem; nam substantia mali aut incorruptibilis est, aut corruptibilis: si incorruptibilis, est summe bona: si autem corruptibilis, corrumpi ac vitiari non posset, nisi bona esset. Ergo substantia mali nulla est. Ita S. P. lib. vii. Confess. cap. nuper laudato. Uterius: Quælibet natura in quantum est, bona est, quippe bonum est existere & esse; malum ergo non est natura aliqua, sed naturæ defectus. Ita in lib. de Nat. boni cap. 3. Præterea: malum vel extra naturas rationales reperitur, quale est elementorum pugna, animantium interitus, temporum fluxus, exitium ac solutio corporum; vel situm est in naturis ratione præditis, ac liberis, cujusmodi est peccatum angelorum, hominum lapsus, mentis ignorantia, anxietas cordis, voluntatis flexibilitas: Neque illud, neque istud malum aliud est quam bonitatis privatio; Ergo nullum malum substantia sive natura dicendum est. Minor probatur, & primo de malo

malo existente extra liberas creaturas : Deus bonus debuit constituere bona creata mutabilia , ut possint fluere , decedere , interire , ac sese a summa bonitate deslectere ; si enim creaturæ immutabiles omnino forent , essent bonum incommutabile , & Deus ipse : Igitur quod creaturæ defluant , pereant , pugnent invicem , non est quædam proprietas substantiæ malæ , sed deflexio naturæ bonæ , deficientis ab ea incommutabili bonitate , a qua producta est flexibilis , & mutabilis . Vide Augustinum lib. xii. de Civit. Dei cap. 4. Probatur quoque de malo , quo creatura rationalis liberè afficitur : Rectissime Deus condidit cum angelum , tum hominem ea libertate , ut , si nollent , mali esse non possent , libere auctorem suum diligendo , & libere præceptis ejus obtemperando : si vellent , miserimi fierent libere peccando , & libere mutabili bono adhærendo , proposito præmio ut liberaliter Deo servirent , indicto supplicio ut humiliter Deum timerent : Ergo malum culpæ , in quam labitur creatura rationalis & libera , non est natura ac substantia per se mala , sed deficientia ipsius creaturæ ab illa sempiterna bonitate , a qua libera producta est . Videfis Augustinum lib. iii. de lib. arbitrio cap. 11. lib. 5. Operis ultimi contra Julianum n. 60. & lib. xii. de Civit. Dei cap. 9. & 10. &c.

PROPOSITIO III. Non dantur duæ summæ ac principes causæ , quarum una sit ejusque boni , altera malorum omnium effectrix .

Consequitur propositio ista ex præmissis , eam vero totis nervis propugnant omnes Patres , omnes Scholastici , omnes Dogmatistæ : sed ex Patribus præcipue Tertullianus contra Marcionem , & Augustinus contra Manichæos ; ex Scholasticis D. Thomas Quæst. 49. art. 111. & noster Argentina lib. 1. Sent. dist. 2. quæst. 1. Concl. 1v. , ex Dogmatistis Petavius lib. 1. cap. 3. Thomassinus lib. 2. cap. ix. x. xi. & xii. Natalis Alexander in Historiam Ecclesiasticam SÆC. II. dissert. 2. artic. 2. Non male etiam aliqui , tametsi falsæ religionis , ut Grotius lib. 1. de Verit. Relig. Christi , Vossius in priori de Idololatriæ origine , & Clericus in Hist. Eccles. ad annum cxli. n. vii. & seq. Hanc propositionem confirmant omnia momenta Capitis sexti : Marcionitarum vero Manichæorumque fundamentum subvertit assertio præcedens . Addo tamen , proximas argumentationes . Principium summe malum aut vivit , & intelligit , aut non : si neque vivit , neque intelligit , fatentibus Manichæis , operari non potest , neque universa mala producere : si est atque intelligit , nequit esse principium summe malum , quandoquidem in eo reperitur aliquod bonum , existentia scilicet , vita , & vis intelligentiæ : Principium ergo summe malum fictitium est ac repugnans . Ita errantes Manichæi , ita delirantes , imo vero ita insanientes , ut non videant in eo quod dicunt naturam summi mali , ponere se tanta bona , ubi ponunt vitam , potentiam , salutem , memoriam , intellectum , temperiem , virtutem , copiam , sensum , lumen , suavitatem , menturam .

suram, numerum, pacem, modum, speciem, ordinem. Principes enim tenebrarum & vixisse in sua natura dicunt, & in suo regno salvos fuisse, & meminisse, & intellexisse, &c. S. P. A. de nat. boni cap. 41.

Præterea ita argumentamur. Illi duo Marcionitarum Dii aut æquam vim ac potestatem habebunt, aut unus erit præstantior altero: Si æqua sit amborum potestas, Deus bonus nihil operabitur renitente malo, Deus malus nihil efficiet contradicente bono. Nullum ergo extabit unquam aut bonum aut malum. Si autem unus præcellat alterum, non erunt ergo hi Dii pares potestate ac virtute, neque ambo summi, ut Marcionitæ contendunt. Si reponant Deum bonum aliquando permittere, ut operetur malus, ac vicissim; occurrit illico vulgatissimum illud dilemma: Aut Deus bonus potest arcere mala opera Dei mali, aut non potest: Si non potest, erit impos, & imbecillus, non summe potens: Si potest, neque malum impedit, erit malignus: *Quid enim tam malignum, quam nolle prodesse cum possis?* inquit Tertullianus lib. 2. advers. Marcionem cap. 22. Et si insistent valere hoc dilemma etiam contra Unum Deum quem nos profitemur summe bonum; in promptu est responso, quoniam Deus noster, quamquam summe bonus, non debet avertere mala. I. Quia non tenetur condere rationalem creaturam impeccabilem; quin cum sit bonus, delectari debet libera obedientia, quam præmio possit compensare. II. Quia cum sit misericors rationabiliter permittit mala, quorum duntaxat occasione misericordiam exercet. III. Quia si Deus est summe bonus, est etiam justus, & ad justiciam pertinet punire peccata, quæ si non essent, hominibus justitia non innotesceret. IV. Denique quia mala non habent causam efficientem, sed deficientem, ideoque non in Deum refundi debent si ea permittat, sed in solam rationalis creaturæ libertatem. Quæ omnia affirmare nequeunt Marcionitæ, qui arbitrantur malum a Deo malo contra mentem ac dispositionem Dei boni efficienter produci, & iccirco hunc Deum bonum, aut impotentem existimant, aut malignum.

Ultimo probatur propositio: Hæc duo principia omnino contraria aut separantur invicem, aut simul existunt. Non consistunt simul, neque unum in altero, quia summi boni, & summi mali natura dissimilis est, & infociabilis, atque sese mutuo extinguendi vim habent. Ergo disjuncta sunt ac separata, atque unum quiddam tertium erit, quod illa dirimat. Est ergo inter Deum bonum, & Deum malum principium tertium dividens unum ab alio. Atque hoc tertium principium aut bonum erit, aut malum, utriusque enim naturæ simul esse nequit. Si bonum, quonam pacto segregatum erit a malo? Si malum, quomodo disjunctum erit a bono? Recurrendum erit ad aliud principium tertium: & sic in infinitum. Existit ergo una summa causa, a qua efficiuntur omnia bona, & a qua permittuntur omnia mala; quæ propterea mala sunt, quod ab illius summæ causæ bonitate defleunt.

Argu-

Argumenta quæ contra Marcionitas, & Manichæos probant veterem quoque legem esse a Deo bono, erunt, ubi de hac lege disputabitur, proferenda.

OBJECTA SOLVUNTUR.

Non erit operosum Manichæorum diluere argumentationes. Quarum prima ita ex sacris literis proponi potest. Il. 45. v. 7. legitur *Ego Dominus, & non est alter formans lucem, & creans tenebras, faciens pacem, & creans malum: ego Dominus.* Amos 3. 6. *Si erit malum in civitate, quod non feceris Dominus.* Il. ad Corinth. 4. v. 4. *Deus hujus sæculi excacavit mentes infidelium.* Joan. 11. v. 31. *Nunc princeps hujus mundi ejicietur foras.* Est ergo Deus malus creator tenebrarum ac mortis, princeps sæculi, & auctor spiritualis cæcitatibus.

Resp. Isaiam, & Amosum loqui de malo pænæ, supplicii nempe, quæ a Deo justo peccatoribus immittuntur. *Malum hoc loco non peccatum, sed pœna intelligenda est. Dupliciter enim appellatur malum: unum quod homo facit, alterum quod homo patitur,* ait S. P. lib. contra Adimantum Manichæum cap. 26. Revera Esaias Medorum, Lydiorum, ac Babyloniorum everfionem, & Amos justas animadverfiones in Judæorum iniquitatem prænunciavit. Retorqueri etiam potest Esaiæ textus; si enim idem Dominus format lucem, & creat tenebras, facit pacem & creat malum: non differt creator lucis, & auctor pacis ab illo Deo, qui permittit malum, & dividit tenebras. Locum Apostoli explicat Chrysostomus dicens: *Quomodo excacavit? nunquid efficacia sua ad hoc impellens? absit. Sed permittens.* Respondent Tertullianus, Cyrillus, & S. P. lib. 21. contra Faustum cap. 9. Deum hujus sæculi posse hoc loco commode intelligi ipsum diabolum. Recte quidem; nam ita verba Apostoli consonant cum iis, quæ habet Joannes, *Nunc princeps hujus mundi ejicietur foras,* Itaque diabolus dicitur Deus quomodo ad Philipp. 111. 19. *Venter,* qui Dei vice colitur: atque videtur mihi Apostolus sese explicare in Epist. ad Ephes. cap. 11. v. 2. ubi deditos olim vitiis ac magicis artibus sic alloquitur: *In quibus aliquando ambulastis secundum sæculum mundi hujus, secundum principem potestatis aeris hujus, spiritus, qui nunc operatur in filios diffidentie:* Joannis vero XII. assererat Christus ejiciendum hunc principem, id est, expellendam a mundo idololatriam, & magnam illam Deorum turbam, cui addicta erat Gentilitas; tum septem illos dæmonas, quos memorante Origene Celsus appellabat *ἑπτὰ ἀρχόντας, septem principes:* hunc denique ipsum Manichæorum malum Deum dictum Πέλλο *ἄρχον τῶν τάρχεων, principem terrestrium.* Quibus expositis, dist. consequens. Est aliquis Deus princeps sæculi, & creator malorum, malorum pænæ, concedo: malorum culpæ; subdistinguo, Deus ac princeps in-

existimatione idololatrarum, concedo: Deus ac princeps suamet natura, qui hæc mala permittat, esto; qui hæc mala efficiat, nego.

Urgebis: Verus Deus, qui sit bonus, non potuit hominem constituere labilem, neque mala culpa, idest, peccata permittere: ergo hæc & efficiuntur & permittuntur a Deo malo.

Resp. nego ant. Sapientissime enim Deus condidit creaturam rationalem cum libertate, ut ostendi Prop. II. argument. ultimo, & in hac 111. prob. 2. Hinc enim in laudem creatoris sui & bona necessaria, & bona libera apparuerunt: hinc innotuit rationalis creaturæ conditio: hinc manifestata est reſtitudo juſtitiae: hinc infinita miſericordia perditum hominem redimendi occasionem arripuit. Neque ipſe Deus impulit Adam ad peccandum; neque præcepit Evæ, ut aſſentiretur ſerpenti; neque condidit hominem ut perderet creaturam ſuam: ſed reliquit illum in manu conſilii ſui, quia bonus eſt, nec libertatem interimit; permiſit tentationem & lapſum, quia bonus eſt, & novit de malis bona facere, atque de tenebris lucem ſplendentem; præſcius erat, neque culpam Angelorum, hominumque impedivit, quia bonus eſt, & ſervat imperturbabili voluntate juſtitiam ſimul ac pacem.

Opp. 2. Exiſtit ſummum bonum: ergo & ſummum inaleum. Probatuſe conſequentia: Sunt in rebus creatis quæ bonitatem participant, & quæ malitiam: Quæ participant bonitatem demonſtrant extare aliquod ſummum Bonum: Ergo quæ malitiam participant offendunt exiſtere aliquod ſummum maleum. Et confirmatur I. Ubicunque datur magis, ac minus, datur quoque ſummum ac pleniffimum eſſe: Datur magis, minusve maleum: Ergo datur maleum ſummum, pleniffimumque. Corroboratur II. Unum contrarium inferit neceſſario exiſtentiam alterius, cui adverſatur: Summum bonum ac ſummum maleum, contraria ſunt invicem: Ergo ſummum Bonum inferit ſummi, atque infiniti mali exiſtentiam.

Resp. nego conſeq. Etenim ſummum maleum, ut ſupra demonſtratum eſt, cum in idea ſui cujuſque perfectionis importet deficientiam, nullatenus poteſt ſubſiſtere; & conſequenter ſubſtantia undequaquæ mala repugnat, & nihil eſt. Ad prob. nego paritatem; quandoquidem Bonum dicitur per aliquam participationem bonitatis quæ res eſt, & aliquid; dicuntur enim bonum, res, aliquid ad convertentiam; maleum vero appellatur ob participationem malitiæ, quæ non eſt ſubſtantia aut res aliqua, ſed privatio ac defectus, ut conſtat ex Prop. II. Quapropter bonum inferit exiſtentiam cauſæ efficientis; maleum vero cauſam deficientem tantummodo: *Nemo ergo querat efficientem cauſam mali, non enim eſt efficiens, ſed deficiens*: ait lib. XII. de Civit. Dei cap. VII. D. P. Auguſtinus. Ad primam confirmat. diſt. majorem: Si illud ſit aliquid poſitivum, co. ſi privatio ac defectus, nego; nam Deus optimus maximus eſt ſummum bonum, cujus majori aut minori

norī participatione res creatæ efficiuntur magis aut minus bonæ : cuius majori, vel minori privatione evadunt magis, vel minus malæ. *Satis est* (inquit S. P. lib. 2. de Mor. Manich. cap. 7.) *Satis est, ut videatis nullum esse de bono, & malo religiosa disputationis exitum, nisi quidquid est, in quantum est, ex Deo sit : in quantum autem ab essentia deficit, non sit ex Deo, &c.* Ad ultimum dist. ma. Si opponantur contrarie, concedo : si privative, nego. Et quoniam ex dictis responsio redditur manifesta, huic dissertationi finem præscribo verbis ejusdem Augustini ita Deum adloquentis in VII. Confess. cap. XII. *Itaque vidi, & manifestatum est mihi, quia omnia bona tu fecisti, & prorsus nullæ substantiæ sunt, quas tu non fecisti.*

C A P U T IX.

*Quid constituat Essentiam Dei, & quo potissimum
exprimi possit vocabulo.*

DIVINAM NATURAM, si physice spectetur, omnium perfectionum esse cumulum, vel potius rem unam summam ac perfectissimam, & summi Boni notitia, & communi consensione probatur. De ipsa igitur, prout concipitur metaphysice, videlicet de re, quæ in Deo primum ab humana mente percipitur, atque intellectu nostra est divinarum proprietatum fons & origo, distincta quidem ratione nostra, nedum a rebus creatis, ab attributis quoque divinis, & relationibus, perfectissima tamen, ac Deo digna : de ipsa, inquam, natura nonnulla juxta scholarum consuetudinem occurrunt definienda. Quæ statim ac proponuntur, ingerunt animo quantum infirmitati nostræ sit indulgendum, dum undequaque maximam perfectissimamque naturam in has coarctamus angustias : & quàm recte nos S. Pater commonefaciat, dum in Psalmum LXXXV. num. 12. ait : *Intendat caritas vestra, Deus ineffabilis est. Facilius dicimus quid non sit, quam quid sit.*

Hanc Dei naturam sic acceptam Scotistæ aliqui in infinitate constituent, eorumque sententiæ ex nostris adherent Toletanus, & Argentina. Collocant alii cum Suarezio, Okamo, pluribusque Scotistis in omnium attributorum aggregatione. Longe plurimi, præsertim, Aegidiani ac Thomistæ, ut Gonet, Joannes a S. Thoma, Salmanticenses, Gavardi, Gibbon, alique eam statuunt in actuali intellectu. Quidam reponunt in spiritali substantia, quæ sit facultas intelligendi, ut noster Fulgentius Tolofanus, & Godoy. Multi denique, quibus subscribo, constituendam putant in *Esse a se* : & hanc sententiam recentiores Theologi communiter amplectuntur, Nicolaus L'Hermenier, Habert, Du-Hamel, Boucat, Juenin, Tour-
nely,

nely, Petavius quoque lib. 1. Theol. dogmat. cap. vi. Atque eam pertractant brevi, & clara methodo Hortatus Fabri, Bancel, Gotti, Arpe part. 2. quæst. xiii., De Comitibus.

PROPOSITIO I. Constituitur metaphysice Dei natura per esse a se.

Ex sacris literis, Patribus, ac ratione brevissime id ostenditur. Exodi xii. v. 14. Deus interroganti Moysi quis esset, respondit: *Ego sum qui sum*. Sic dices filiis Israel: *Qui est misit me ad vos*. Job. cap. 23. v. 14. *Ipse solus est*. Apocalyp. i. v. 4. *Qui est, qui erat, & qui venturus est*. Præcipuum ergo Dei nomen est illud, quod significat perpetuo ac immutabiliter esse; neque aliud est prius ac præstantius, quo divina explicari possit essentia.

Consentiunt Patres. Hilarius lib. 1. de Trinit. *Non enim* (inquit) *aliud proprium magis Deo, quam Esse intelligitur*. Hieronymus in Epist. ad Damasum. *Una est, & sola natura, quæ vere est. Id enim quod subsistit non habet aliunde, sed suum est*. Gregorius Nazianzenus Orat. vii. *Ὁ μὴ ὢν, ἀλλ' ὁ ὢν καὶ πάντες τῶν ὢν ὁρίσματος: Ἐν, & Deus magis quodammodo essentie nomina sunt*. S. P. Augustinus in Psalmum 134. num. 4. *Ego sum, qui sum, qui est misit me ad eos. Non dixit, Dominus ille omnipotens, misericors, justus: quæ si diceret, utique vera diceret. Sublatis de medio omnibus, quibus appellari posset, & dici Deus: ipsum Esse se vocari respondit: & tanquam hoc esset Dei nomen, hoc dices eis, inquit. Qui est misit me. Ita enim ille est, ut in ejus comparatione ea quæ facta sunt, non sint*. Si plura SS. PP. testimonia expetas, vide loco citato Petavium.

Probatur ultimo ratione, ac simul propositio explicatur. Quod metaphysice essentiam constituit illud est, quod primo in re aliqua percipitur: id vero competit *enti a se*; dicente Dionysio de Divinis nominibus: *Est ipsum per se esse antiquius quam ipsissimam esse vitam, & ipsissimam esse sapientiam, & ipsissimam esse similitudinem divinam, & cetera quæ sic esse participant, ut ante omnia, ipsum esse participant. Imo vero illa per se omnia, quæ entis participant, ipsum per se esse participant, neque ullum est ens, cujus non sit essentia, & duratio ipsum esse*. Et revera quid potest prius excogitari, quam *Esse*? Deinde requiritur, quod essentie divinæ, constitutivum perfectissimæ substantiæ ideam exhibeat: quod competere *enti a se* ita demonstrat Bernardus lib. 1. de Consolat. cap. 6. *Quis est? non sane occurrit melius, quam qui est. Hoc ipse de se voluit responderi, hoc docuit dicente Moyse ad populum ipso quidem injungente, qui est misit me ad vos. Merito quidem. Nil competentius æternitati, quæ Deus est. Si bonum, si magnum, si beatum, si sapientem, vel quidquid tale de Deo dixeris, in hoc verbo insinuat, quod est, est. Nempe hoc est ei esse, quod hæc omnia esse. Si centum & talia addas, non recessisti ab esse. Si ea dixeris, nihil addidisti. Si non dixeris, nihil minuisisti, &c. Præterea.*

ut.

neceſſe eſt, ut eſſentia rem a qualibet alia ſecernat. At *eſſe a ſe* primo diſtinguit Deum a creaturis, quæ mutabiliter ſunt: *Quod autem vocatur, & non ſolum vocatur, ſed vere eſt, incommutabile eſt; ſemper manet, mutari neſcit, nulla ex parte corrumpitur.* Ait Auguſt. Tract. 4. in cap. xii. Epiſt. i. Joannis. II. Diſtinguit, ratione tamen, Dei naturam a divinis perſonis, ac proprietatibus, quæ ab *eſſe* concipiuntur promanare, eique advenire; *In hoc enim primo ſtatim incubitu mens intendit, ac primo cogitat ipſum eſſe, deinde ſic quodammodo eſſe iſta conſiderat.* Inquit Maximus martyr apud Petav. loc. cit. n. viii.

Hinc vero probatur aſſertum, aliorumque rejiciuntur ſententiæ. Infinitas, ſapientia, & quæcumque perfectio conſequitur ratione noſtra ad *eſſe a ſe*, iſtud vero perfectiſſimam naturam, omniumque divinarum perfectionum fontem ſignificat atque originem: Eſſentia metaphyſice inſpecta id eſt, quod primo percipitur, & unde cetera intelliguntur profluere: Ergo Eſſentia Dei metaphyſice ſpectata in *eſſe a ſe* videtur conſtituenda.

Opp. 1. cum noſtro La-Foſſe: Superior ſententia in eo deprehenditur minus vera, quod Deum definiat per genus remotiſſimum, non, autem proximum; ſicut peccaret, qui definiret hominem per ens rationale, non autem per animal rationale. Ergo divina eſſentia per ſubſtantiam ſpiritualem a ſe, non præciſe per *eſſe a ſe* metaphyſice conſtituitur.

Reſp. nego antecedens. Ratio enim *entis a ſe* ac per eſſentiam non eſt Deo remota, ſed proxima ac puriſſima, nam in Deo concipere nequaquam poſſumus *eſſe a ſe* abſque ſubſtantia, ac tota plenitudine eſſendi: quippe quod eſt a ſe, eſt per ſe, eſt in ſe, eſt ipſa eſſentia, ipſa exiſtentia, ipſa ſubſtantia. Hanc ego entis a ſe ideam habeo. Profecto qui definiret hominem *ens rationale*, illum non diſtingueret ab Angelo, ideoque opus eſt, utatur genere magis limitato, & coarctato. At Deus per hoc quod *ſit a ſe*, ab omni re diſtinguitur, quæ non eſt Deus. Nolumus tamen de nomine pertinaciter pugnare: *Nam & ipſa natura nihil eſt aliud, quam id quod intelligitur in ſuo genere aliquid eſſe. Itaque ut nos jam novo nomine ab eo, quod eſt eſſe, vocamus eſſentiam, quam plerumque ſubſtantiam etiam nominamus: ita veteres, qui hæc nomina non habebant pro eſſentia, & ſubſtantia, naturam vocabant.* S. P. Auguſt. lib. 2. de Morib. Manichæorum cap. 2. quo magiſtro *eſſentiam* ac *ſubſtantiam* indiſcriminatim accepimus. Quod ſi aliqui concipiant *eſſe* veluti ſupremum genus, ac ſubſtantiam præcedens; liceat per me quidem in illo ente eſſentiam collocare, ſubſtantiam vero ita apprehendere, quaſi ſit perfectio adveniens, non conſtitutivum eſſentiæ. Ita videtur loqui Epiphanius Hæreſi 69. *Ὁντιν αὐτῷ ἐστὶ, ἔχει πρῶτον. ἀλλὰ αὐτὸ τὸ ἐστὶν. ὡς περὶ Μωϋσῆ. ὁ αὐτὸς ἀπεκαλεῖται με, ἐπὶ αὐτῷ οὐκ ἔστιν ὁμοία. ὁ αὐτὸς αὐτῷ ἐστὶν ὁ αὐτὸς ἐν ἑαυτῷ, ὅτι ἐστὶν πρῶτον, ὅτι ἐστὶν πρῶτον.* *Uſia eſt, non*

perinſia. Sed illud idem quod eſt, ut ait Moſes: *Qui eſt miſe me*. Die filiis Iſrael. *Qui eſt igitur, eſt ens*. *Eus autem ipſa eſt ESSENTIA, quæ eſt*.

Oppones 2. Infinitas Deum a creaturis diſtinguit: Ergo infinitas Divinam conſtituit eſſentiam.

Reſp. diſt. ant. Infinitas diſtinguit Deum a creaturis primario, ut rationalitas diſtinguit a brutis hominem, nego: ſecundario, ut a brutis diſtinguit hominem riſibilitas, concedo. Infinitas concipitur ratione noſtra tanquam modus aut proprietas eſſentiæ a ſe ſubſiſtentis, quemadmodum & finitas intelligitur vel, uti modus *eſſendi* ab alio, ideoque neque illa Dei, neque iſta creaturarum erit primum metaphyſicum conſtitutivum. Adde infinitatem cum eſſentiæ, tum divinis proprietatibus convenire, & fortasſe præter eſſendi amplitudinem nihil poſitivum in idea infinitatis deprehendi: infinitum eſt enim, quod caret ſine. Eſſentia vero nunquam in ſola negatione conſtituitur.

Dices: Erit ergo conſtitutivum divinæ naturæ illa infinitas, quæ in ſe omnem perfectionem complectitur, ſcilicet ens perfectiſſimum, de quo cap. 1. diximus eſſe incommutabilem eſſentiam, cujus regula iudicamus de re quacunque finita: atque ita ſita erit Divina eſſentia in cumulo perfectionum.

Reſp. ita eſt; ſi de eſſentia ſecundum rem ſpectata oratio inſtituitur: at modo conſideramus omnes perfectiones Dei ad inſtar facultatum, ac proprietatum a ſuo principio emanantium. Enimvero primo intelligimus rem aliquam eſſe, deinde autem eſſe perfectam. Igitur ſapientia, juſtitia, immenſitas & quidquid de ſummo bono enunciat, ſunt quidem ſecundum rem idem Deus, at ratione noſtra ſunt veluti adventitia ſubſtantiæ: ac præterea hæc omnia jure ac merito infinita dicuntur, neque propriam exhibent notionem naturæ, ſed quamdam rebus omnibus divinis communem.

Infurges: Non ergo erit conſtitutivum divinæ eſſentiæ ipſum exiſtere *a ſe*, quoniam ex æquo commune eſt eſſentiæ, atque attributis.

Reſp. nego propoſitionem; Attributa enim non ſunt a ſe, omni-
moda (ut Scholæ utar vocabulo) *aſſeitate*; & quamquam cauſſam non habent proprie dictam, habent tamen late acceptam, naturam ſcilicet, a qua concipiuntur eſſuere. Ita dicendum eſt de divinis perſonis; quæ, ſi Patrem excipias, habent originem, neque ſunt a ſe penitus. Ipſa vero paternitas naturam ſubſiſtentem ſupponit, ideoque eſſentiam jam conſtitutam.

Urgebis adhuc: Filius, & Spiritus Sanctus non ſunt a ſe, ut dictum eſt modo: ergo ſi divina natura conſtituitur per *eſſe a ſe*; neque Filius, neque Spiritus Sanctus eſt Deus.

Reſp. diſt. ant. Filius, & Spiritus Sanctus non ſunt a ſe ratione perſonæ, quæ aut generatur, aut procedit, conc. ratione naturæ atque eſſen-

essentia, nego antecedens, & suppositum; quippe essentia neque generat, neque procedit; ut dicam alibi.

Opp. 3. Idea substantia intelligentis exprimit summum ac perfectissimum gradum vitæ: Ergo intellectio est ultimum divinæ naturæ constitutivum.

Resp. dist. antecedens: idea substantia intelligentis exprimit perfectissimum vitæ genus, & vita ac intelligentia est illud primum, quod in Deo concipitur tanquam fons divinarum perfectionum, nego: & est perfectio quædam ratione nostra a primo divinæ naturæ constitutivo dimanans; concedo. Et quoniam istud præcipuum est plurimum Thomistarum argumentum; peto, num velint essentialem naturæ Dei differentiam consistere in intelligendi vi ac facultate, an in ipsa intellectione actuali? non in actuali intellectione; tum quia hæc est aliqua operatio; omnis vero operatio principium habet ac supponit subsistentem naturam: tum quia Angelicus Doctor 1. parte q. 14. art. 1. demonstrat esse in Deo plenissimam ac summam intellectionem eo quod in ipso est *ens a se* omni prorsus expers materia; & q. 18. art. 3. demonstrat esse in Deo perfectissimam vitam ex intellectione: quare, tametsi divina essentia physice sit ipsa vita, ipsumque summum *intelligere*; metaphysice tamen vita intellectionem, intellectio naturam, videlicet *esse a se*, præsupponit. Ita contra Domesticos suos ratioeinatur Eminentissimus Gotti q. 111. dub. 111. part. 111. num. x111. Si vero constitui velint divinam essentiam per vim atque facultatem intelligendi; primo omnis potentia & facultas ab essentia intelligitur proficisci; deinde potentia ejusmodi convenit quoque rationalibus creaturis, homini & Angelo: postremo non est radix omnium perfectionum divinarum; nam quænam est ista consecutio, Deus intelligit; ergo est omnipotens, immensus, bonus, &c.? Contra vero hæc omnia ab *esse a se*, ut ait laudato loco Bernardus, dimanant. Quamobrem falluntur qui affirmant intelligendi potentiam esse perfectiorem quemdam gradum ipsomet *esse a se*; cum potius intellectio Dei sit perfectissima, quoniam & ipsa est *a se*, in quo verbo omnia perficiuntur atque instaurantur.

Quæ cum ita sint, acerrimus ille propugnator doctrinæ Thomisticae Joannes Baptista Gonetius disp. 2. art. 1. §. v. fatetur neque potentiam, neque actum intelligendi constitutivum esse naturæ Dei, quoniam illa nequaquam est actus purus cujusque potentialitatis expers, hæc vero, cum sit operatio, habet, a quo efficiatur, principium. Quid ergo? Sita est, inquit, divina essentia in intelligere, non quatenus est operatio, sed prout est ultima formalis, completa, & subsistens actualitas; nam & D. Thomas affirmat sentire, & intelligere, quandoque accipi pro quibusdam operationibus, quandoque autem pro ipso *esse operantium*. Quam sententiam amplectitur Magister Hen-

To. I.

Q

ricus

ricus Florez, qui pro Hispaniarum Provinciis exornandæ Scholasticæ Theologiæ novissimam impendit operam. Recte hi quidem, si intellectiōnem absque ratione potentiæ, & operationis percipiunt. At, quæso, quid est hæc subsistens intellectiō, quæ ratione nostra a potentia atque ab operatione secernitur? Ego si ab omni facultate, & ab omni operatione mentem retraho, nihil quidem apprehendo quam *esse a se*, quod est quidem re ipsa & intellectiō, & bonitas, & immensitas, & quidquid Deus est, ut optime S. Thomas. Ac præterea si intellectiō ab operatione quomodolibet præscindatur, quod nescio num fieri possit, quomodo erit *ultima actualitas*, si concipitur absque operatione sibi propria? Hæc poterant prætermitti, sed Adversariorum dignitas ac doctrina me reddiderunt molestiorem.

Insistes: Verbum ex vi originis suæ ac per æternam generationem recipit naturam divinam, aliàs non esset Filius, ut docent Theologi: Atqui recipit intellectiōnem, cum procedat per modum verbi, & nihil sit aliud quam Patris sapientia: Ergo ipsa intellectiō ac natura sunt prorsus idem.

Hoc argumento suadere conantur prælaudati Thomistæ sententiam suam ad explicandum Trinitatis mysterium longe videri opportuniorem, & commodiorem. At D. Thomæ, omniumque Thomistarum doctrinæ videtur potius contraria. Docent hi nomen Verbi ac Filii nullo modo esse nomen essentiæ, sed personæ tantummodo: ita S. Thoma quæst. xxxiv. art. 1. docent processionem filii esse generationem, quia procedit per intellectiōnem Patris quæ est operatio vitæ, & a principio conjuncto in similitudinem naturæ: ita S. Thomas quæst. xxvi. art. 11. Docent intellectiōnem, per quam procedit Verbum esse actum notionalem, quæ est operatio nedum divina essentia, sed etiam paternitate secundum intellectum posterior. Ita S. Thoma quæst. xi. art. 1v. Quomodo ergo hi Thomistæ intellectiōnem cum natura, nomina personalia cum essentialibus contra apertissimam Angelici sui Præceptoris doctrinam confundunt, affirmando divinum Verbum esse naturam suam intellectiōnem, ideoque in intellectiōne divinam naturam constitui, quasi nomen Verbi esset nomen essentiæ, intelligere Patris esset natura, & non actus notionalis; atque principium divinæ generationis proximum, ut inquirunt, ac formale, idem esset ac differentia essentialis constitutiva Dei? Profecto si aliqua vis esset præfatæ argumentationis, ita in gratiam Socinianorum posset quis argutari: Natura divina est intellectiō per quam verbum procedit: intellectiō per quam Verbum procedit, est in solo Patre: Ergo in solo Patre erit natura divina. Itaque juxta D. Thomæ doctrinam dist. minorem: Verbum divinum procedit per intellectiōnem atque in similitudinem naturæ; per intellectiōnem *essentialem*, nego minorem; quippe hæc tribus personis ex æquo communis est, & principium formale, ac proximæ divinæ gene-

generationis uni , non alteri personæ convenit : per intellectiōnem *notionalem* , concedo min. sed hæc est operatio , non solum naturam , verum etiam paternitatem supponens. Dixi juxta D. Thomæ doctrinam ; nam cur Verbi divini processio sit generatio , non est fortasse adhuc compertum , neque ad definiendum facile , ut quamplures existimant .

PROPOSITIO II. Divina essentia explicari non potest magis proprio atque idoneo vocabulo , quam Hebraico יהוה *Jehova* , aut אֱלֹהִים *Eſer Ebeie* , aut Græco ὁ θεός , aut Latino , *Qui est* .

Sequitur ex dictis : atque inde inferitur soli Deo competere incommutabiliter & essentialiter , ut sit . *Est enim vere solus , quia incommutabilis est* : ait S. P. Augustinus lib. VII. de Trinit. cap. 5. Inferitur quoque substantiam creatam esse in Dei comparatione , *tanquam nihilum* , ut habetur in Psalmo XXXVIII. v. 6. quod ita idem Augustinus num. 9. exponit : *Quid enim dicam ? Quibus verbis ostendam nihil esse quod sum in comparatione ejus quod est ?* Inferitur tertio in Deo , cum sit esse incommutabile , nullum accidens physicum reperiri : quod Augustinus asserit lib. v. de Trinitate cap. 2. *Aliæ , quæ dicuntur substantiæ , vel essentiæ capiunt accidentia , quibus in ea fiat vel magna , vel quantacunque mutatio . Deo autem aliquid ejusmodi accidere non potest ; & ideo sola est incommutabilis essentia , vel substantia , quæ Deus est : cui profecto ipsum esse , unde essentia nominata est , maxime ac verissime competit* . Inferitur quarto Essentiam , quam de summo Deo enunciamus , omnem in se comprehendere plenitudinem , & quidquid percipitur sensu longe imparem divinæ substantiæ nobis exhibere rationem : unde S. P. Enarrat. 2. in Psalm. 26. ait : *Totam ab animo rejicite ; & quidquid occurrerit quod cogitare possitis , dicite , non est illud* . An vero præfata nomina , aliaque plura , adæquate divinam Essentiam significant , & quænam sit singulorum notio , & origo , in eo , qui consequitur , libro conabimur explicare .





DE THEOLOGICIS DISCIPLINIS LIBER SECUNDUS

*In quo de divinis attributis universe,
ac singillatim differtur.*



INVESTIGATA DEI EXISTENTIA AC NATURA; ejus proprietates, quæ usitatissimo vocabulo Attributa appellantur, sese offerunt examinandæ. Sunt autem hæc attributa perfectiones quædam, quæ ratione nostra Dei consequuntur naturam. Quarum aliqua absoluta dicuntur, & communia tribus Personis; alia autem relativa, quibus Personæ divinæ adinvicem referuntur. Ex illis vero, in quibus tantummodo hoc præsentī libro versabimur, præter unitatem, de qua disputatum est hætenus, duodecim connumerantur a Scholasticis, vigintiduo a Boetio, neque pauciora sunt *æternitas*, videlicet mentis nostræ excursionibus, quibus aliquid non indecorum, neque indignum de supremo Numine excogitamus. Potiora autem sunt ineffabilitas, simplicitas, infinitas, æternitas, immutabilitas, immensitas, veracitas, omnipotentia, pulchritudo ac perfectio; & quæ particularem postulant dissertationem, invisibilitas, scientia, voluntas ac libertas, providentia, prædestinatio. Horum itaque notitiam tradam ea methodo, quæ præferat amorem sapientiæ moderatum.

C A P U T I.

De ineffabilitate Dei, atque de divinis nominibus.

ARbitratur impius hæreticus Eunomius, quem Nyssenus lib. xii. cavillatorem, nominumque aucupem appellabat, Deum pluribus significari nominibus, quorum singula divinam naturam quatenus in se subsistit exprimerent. Ad confutandum versipellem hominem sat est, si duo brevissime præstentur, nimirum probetur nullo simplici vocabulo designari posse reconditam divinitatem, nisi prout mente nostra inadæquate concipitur; ac diversa nomina Dei, sive substantiva sint, sive adjectiva, varias mentis ignorantie tenebris involutæ exhibere perceptiones.

PROPOSITIO I. Deus est ineffabilis, idest, licet plura vocabula significant divinam essentiam, aut attributa, prout a nobis percipiuntur, nulla excitant ideam divinæ naturæ, prout est in se.

Probatur I. ex libro Prov. cap. xxx. v. 4. *Quod nomen est ejus, & quod nomen filii ejus, si nosti?* II. Sanctorum Patrum sententiis, quos inter Justinus in Cohortatione ad Gentes ait: *Fieri non potest ut proprium aliquod Dei nomen attribuat.* Lactantius lib. 1. divin. Instit. cap. 6. *Deo nomen non est.* Novatianus lib. 1. de Trinit. cap. 4. *Nomen Dei proprium edici non potest, quoniam non potest nec concipi.* S.P. Augustinus in Psal. lxxxv. n. 12. *Deus ineffabilis est.* Et ibidem: *Quævis quid sit? Quod oculus non vidit, nec auris audivit, nec in cor hominis ascendit.* Tertio probatur communi Philosophorum consensu. Ita namque scribit Plato in Parmenide, & de Republ. vi. Plotinus Aenead. lib. 5. cap. 16. Proclus Th. Platon. lib. 2. cap. 4. Jamblicus Segm. vii. quos citat, & longiori explicatione persequitur Thomassinus lib. vi. Th. Dogm. cap. v. Addere possum Alcinoium, ac Maximum Tyrium, quorum loca refert Petavius lib. vii. cap. vi. n. 6. Addit Huetius Alnetan. Quæst. lib. II. n. xv. Simplicium, & Philemonem Poetam, qui ait terribile esse nomen Dei, nec a quoquam proferri posse. Accedunt cum Hebræi, qui in hodiernam diem nomen Dei Tetragrammaton, cujus etiamnum ignoratur pronuntiatio, efferre nesciunt, tum Samaritani, qui Garizimitanum Templum Deo sacrum omni carere vocabulo dixerunt Antiocho illustri, ut libro xii. Antiquit. cap. 7. scribit Josiphus. Denique probatur ratione: Nomina sunt signa conceptuum nostrorum: Essentiam divinam non possumus in hac vita perfecte cognoscere: Ergo neque perfecte possumus aliquo nomine exprimere.

Oppones: Aliqua Dei nomina non pendent ab hominum instituto, sed Deum ipsum, qui ea Mosis revelavit, habent auctorem. Ergo hæc saltem plane ac digne exprimere poterunt Dei naturam.

Resp.

Resp. nego consequentiam. Etenim, quemadmodum Deus cum esset invisibilis in assumpta creatura dignatus est apparere, ut nos misericorditer visitaret; ita, cum sit ineffabilis, congruum existimavit se aliquo vocis sono nominare, quia admittens humanæ vocis obsequium, *verbis nostris in sua laude gaudere nos voluit*. S. P. Augustinus lib. 1. de Doct. Christiana cap. 6.

PROPOSITIO II. Divinorum nominum alia divinam naturam ac substantiam significant, alia attributa.

Sequitur ex dictis, & probatur: Tametsi nihil divinæ naturæ adveniat, indulgetur tamen imbecillitati rationis nostræ, ut concipiamus *esse a se* tanquam naturam; justitiam, misericordiam, & alia quæ habent quamdam connotationem, veluti proprietates consequentes essentiam: imo sunt divina nomina personalia, quæ de natura & essentia, enunciari non possunt, nisi, ut Scholæ loquantur, *in concreto*: Atqui nomina significant res prout mente nostra percipiuntur: Ergo alia Dei nomina significant essentiam, ut istud *Eus a se*, alia vero attributa, aut personas, ut, *justitia, Pater, &c.*

Opp. Athanasius in libro de Decretis Nicænæ Synodi, Cyrillus in lib. Theſauri cap. 19. atque alii Patres affirmant tam nomen Dei, quàm nomen Filii, ac Patris, (quod afferendum est de quocunque alio nomine) divinam significare substantiam, cum in Deo nihil sit eorum, quæ naturam sequuntur. Ergo quaecunque divinum nomen Essentiam significat.

Resp. Athanasium ac Cyrillum Alexandrinum disputare contra Arianos, qui asseriebant Verbum natura ac substantia realiter distinctum a Patre, excogitantes divinam generationem adinstar humanæ, quæ sit cum propagatione ac decisione naturæ. Augustinus autem in viz. de Trinit. cap. 1. alique Patres docent nomen Filii, Verbi, Imaginis, & id genus plurima, relationem, non substantiam significare. Quæ in libris de Trinitate data opera explicabuntur. Dist. itaque ant. Nomina divina, quæcunque sint, significant substantiam, si accipiantur secundum rem, & absolute, concedo: si spectentur secundum rationem intelligentiæ nostræ, & connotative; nego: nam etiamſi Essentia Dei, hypostasis, atque attributum sit una eademque substantia; hanc tamen nos appellamus *naturam* prout sola ac simplex per se spectatur, *personam* quatenus ad aliam refertur; *proprietaem* propter connotationem ad aliquem terminum, ut in sequentibus explanabitur.

Si vero quæras quænam præcipua sint Dei nomina, respondeo decem apud Hebræos, (prætermisſis quæ Thalmudistæ ac Rabbini, necnon Cornelius Agrippa vir superstitiosissimus, alique malefici excogitarunt,) in sacris literis connumerari. Quorum primum est ineffabile nomen יהוה dictum Hebræis אלהים אלהים *Nomen filius quatuor literarum*, Græcis, quod idem est, *Τετραπληκτων*. Atque hunc literarum numerum in Deum nominando observant etiamnum Græci, Latini,

ni, Hispani, Galli, Theutones, Turcæ quoque ac Arabes, qui Dei nomen sic efferunt, **סאס**, DEUS, DIOS, DIEU, GOTT, ALLA; unde & imitatione digni videntur Itali, qui omnium gentium exemplo scripserunt IDIO, consona non geminata. Nomen illud vel a radice **יה**, vel ab **יהוה**, quod est *Fuit*, creditur derivatum, unde ejus etymon exponitur in Exodo 111. v. 4. **יהוה אשר אלהיה**, *Sum qui sum*. Certa hujus nominis pronunciatio nondum innotuit, *Jabo* effert Clemens Alex. Strom. V. *Jave* Theodoretus quæst. xv. in Exodum, *Jebue*, Genebrardus in Psalm. lxxxii. *Jova* Angelus Caninius lib. de locis Hebraicis cap. 1. Post Galatinum communiter omnes *Jebova*. Quidam, auctore Hieronymo Epist. 136. propter elementorum similitudinem, scilicet inter Hebræum **ה** & Græcum **π**, atque inter **י**, & **ι**, legere consueverunt **Πιρ**, Pipiones non illepide dicti. De his restet Exodi vi. v. 3. **וַשְׁמִי יְהוָה לֹא נִקְרָאתִי לָהֶם** *Et nomen meum Adonai non indicavi eis*. Ex hoc loco comprobatur pronunciatio **יהוה**, quam reprehendit Genebrardus: nam Hebræi, Septuaginta, necnon Vulgata nostra vertunt nedum hoc loco, sed ubique pro **יהוה** Adonai, **אֲדֹנָי**, *Dominum*. Ergo non male inscriptum est nomen tetragrammaton punctis vocalibus nominis *Adonai*, mutata tantum priori vocali propter litteram gutturalem **א**, quæ nusquam patitur simplex Scæva. Hæc non abque magna utilitate Theologi dicta sunt; etenim ubicunque in novo, ac veteri Testamento legeris *Dominum* substitutum loco hebraici nominis **יהוה**, certissime inferes ibi de vero Deo sermonem institui.

II. Est **יה** *Ja* ab eodem Themate. Hinc Alleluja, *laudate Deum*.

III. **אל**, *El* a radice **איל** *fortem esse*, unde latine *Fortis*, græce **ισχυρις**, Deus in publicis Ecclesiæ precibus Feria sexta majoris hebdomadæ appellatur.

IV. **אלוה**. *Eloab*.

V. **אלוהים**. Utrumque ab **אלה** *Juravit*, latine *Princeps*, *Judex*, græce **ἀρχαὶ**, **ἄρχα**: Aliqui derivare putant ex Arabismo, in quo **אלה** significat *adorare*. Hieronymus hæc duo nomina distinguit; sed diversa sunt solo regiminis statu.

VI. **שדי** *Saddai*, a relativo **ש** *Qui*, & **די** *sufficere*, Latine reddi potest *sibi sufficiens*, *omnipotens*, *neque indigens nostri*, Græce **ἄλκιμος**, **παραυπάτης**, **αὐτάτης**. Aliqui in caput lxi. i. Esaiæ v. 9. observant hoc nomen tribui aliquando Archangelo Michaeli, fortasse, quod fit ad salvandum pronus, atque præpotens ad bellandum.

VII. **אדני** *Adonai*, *Adon*, **אֲדֹנָי**, **דָּוִדָּא**, *Dominus*, ut diximus supra. Hujusmodi nomen connotat creaturas, in quibus Deus dominatur; & quoniam non semper creaturæ fuerunt, Tertulianus disputans contra Hermogenem, qui putabat materiam esse Deo cœternam, cap. 3. ait: *Dei nomen dicimus semper fuisse apud semetipsum, Dominum vero non semper*.

VIII.

VIII. אשר יהוה græce *ὁ θεός*, latine *Qui est*, de quo in I., ex relativo, ac verbo יהוה *esse*.

IX. יהוה אלהים צבא *Dominus Deus Sabaoth*, idest, *Exercituum*: a radice צבא *Exercitus*: quo nomine intelliguntur nedum Angelicæ potestates, sed etiam Danielis viii. v. 10. Sacerdotes, qui Regi cælorum militantes excubias agunt in Templo. Ob utramque significationem commemoratur in Præfatione Missæ, *Dominus Deus Sabaoth*.

X. עליון *Elion*, עליון, *excelsus, supremus*, a th. עלה *ascendere, præesse*. Ex quo autem Deus maximus sit, & summe excelsus, animadvertenter Salomon Glassius vir hæreticus quidem, apprime tamen, eruditus, Dei nomen loco Epitheti dici de rebus excellentissimis, ut Pf. lxxix. v. 11. *Cedri Dei* dicuntur arbores procerissimæ; *plaga Domini* II. Paralipp. xxvi. v. 20. lepra Oziæ: ut mittam exempla Glassii lib. III. Philolog. sacræ Traët. I. Can. xvii. n. 3. Atque de his Dei nominibus, præter Hebraicarum dictionum Interpretes, ut Buxtorfius, Pagninus, & alii, vide citata Epistola Hieronymum, Isidorum Hispalensem lib. vii. Origenum cap. I. Angelum Caninium de locis Hebraicis cap. 2. Petavium lib. viii. cap. ix. nonnulla etiam apud Scholasticos, præsertim Ludovicum Habert Traët. de Deo uno cap. 1. & Contenson differt. v. cap. 11. spec. iii.

Satis de Hebraicis nominibus summi Dei, qui Græcis dicitur *Θεός* unde latinum, *Deus*; vel a verbo *ראה*, *videre*, atque *contempleri*, quoniam *אין דיא פארט*, *inspicit omnia*: vel a, *דין*, *currere, ponere, facere*, quod omnibus præsto sit, omnia disponat, omnium sit artifex; vel *אין די פאדעם*, *urere ac fulgere*, non quod ignis sit, ut Persis, Aegyptiisque Deus *Phtba*, sed propter vim cupiditatum, consumptricem, aut inaccessibilem gloriæ lucem. Eo nomine significari substantiam docent Latini Patres, Tertullianus in primis adversus Hermogenem cap. 3. Græci fere omnes, efficientiam & energiam. Facile conciliantur; nam si istud nomen referas ad ideam proferentis, significat Dei naturam, si ad vocis etymologiam, operationem aut facultatem. Idem assero de nominibus Aethiopicis אמלך *Emlab*, forte ab hebræo מלך *Rex*; אנויא, vel אנויאב *Egbzia, Egbziaber, Dominus bonus*. Omnia ferme penes ceteras nationes divina nomina eandem habent cum expositis significationem.

Loquamur pauca, quandoquidem huc deducta est oratio, de dulcissimo nomine JESU. Derivatum est אשׁוּעַ *Salus*; unde Iesus idem est אשׁוּעַ, *Salvator*. Negant aliqui, inter quos Caninius numerat Osiandrum, istam originem, quoniam alicubi scriptum reperitur יושׁוּעַ *Josueu* absque radicali litera י *Ajin*, unde dictum putant, inquit Listerius, a verbo substantivo *Est*, ישה *ישׁ*. At infussa nimium argutatio. Mosis tempore scribatur, ut constat ex libro Josue, ירושׁוּעַ *Je-*

Jefofuab ; post Babylonicum exilium , ut reperimus apud Efdram , & Nehemiam , scriptum est producta sub Jod vocali paucioribus literis *יְהוֹשֻׁב* *Jofuab* , etſi antiquiorem ſcripturam retinuerint Aggæus , & Zaccharias . Ex Syrorum , Arabumque commercio deſueſcere cœpit poſtrema litera *y* , quod Caninius in l. demonſtrat ex *שבע* *ſeptem* , quod ſcriptum aliquando in Thalmud *שב* abſque *Aiin* , & Hugo Grotius ad caput I. Lucæ v. 5. ex nomine *אלישבע* *Elifabab* , unde abraſa finali , & ſubſtituta *ת* , T, Syrorum exemplo , Græci ac Latini fecerunt *Elifabetb* . Satis hinc refutatur hallucinatio Oſiandri , & manifeſta redditur nominis JESU recepta fere ab omnibus interpretatio : de qua Matthæi 1. v. 21. *Vocabis nomen ejus JESUM: ipſe enim ſalvum faciet populum ſuum a peccatis eorum* . *Χρισ* , *Chriſtus* a verbo *χρίω* , *ungo* idem eſt ac *משיח* , *Mefſias* , a *מָשַׁח* , *ungit* .

Fertur Reparatoris noſtri nomen ita prædixiſſe Sibyllam Cumanam :

Sed quæ ſit numeri totius ſumma , docebo .

Namque octo monades , totidem decades ſuper iſtas .

Atque hecatontadas octo , infidis ſignificabit

Hominibus nomen : tu vero mente teneto .

De Sibyllarum carminibus dicam alibi , Oraculum , qualecunque ſit , nunc expono . Octo monades ſunt unitates 8. Octo decades 80. Octo hecatontades 800. totius numeri ſumma , 888. Nomen *ἸΗΣΟΥΣ* , *Jefuſus* , eundem continet numerum , nam *ι*. valet 10. *η* 8. *ς* 200. *ο* 70. *τ* 400. *ς* 200. Supputa , num reſultent 888. , & *protegat te nomen Dei Jacob* . Pſalm. xix. v. 2.

C A P U T II.

De ſimplicitate Dei .

PRÆTER memoratos præcedenti libro Gentiles , qui Deos humanis membris præditos cogitarunt , hominemque impiiſſimum Spinoſam , qui materiam ac naturam Deum eſſe commentus eſt , haud recte de divina ſimplicitate ſenſerunt iv. Eccleſiæ ſeculo Aegyptii Monachi , qui turmatim in eum errorem deſcivere , quod Deus ſit Anthropomorphos , formæ ſcilicet humanæ & corporeæ . Quibus dubitari poteſt an præluſerint ſecundo ſæculo Melito Sardenſis , qui anno 169. miſit pro Chriſtianis ad M. Aurelium Apologiam ; qua creditur permotus ad vetandum , ne quiſquam in poſterum religionis cauſſa Chriſtianos calumniaretur . In eandem hæreſeos ſuſpicionem inducitur Tertullianus , Audius , a quo fertur Anthropomorphitas dictos fuiſſe Audianos , & , quod gravius eſt , a Socrate , & Sozomeno etiam Epi-

To.I.

R

phanus.

que Hieronymus, neque ipse Theodoretus Melitonem accusant. II. Inquiunt Origenis textum sic vertendum esse cum Sixto Sen. lib. v. Biblioth. annot. 18. *Melito scripta reliquit de eo argumento, quod dicitur Deo corpus inesse*. III. Falsam suspensionem ortam esse ex inscriptione libri *πρὸς ἰνσώματι Θεοῦ*, quam Rufinus vertit *De Deo corpore induto*. IV. Gennadium virum fuisse iudicio præcipiti, utpote qui postulavit Dionysium Alexandrinum Arianæ impietatis, novitatis vero Augustinum.

Verum hi comiter a Melitone errorem conantur abstergere. At ad 1. respondetur, Eusebium ex Origene, Hieronymum ex Eusebio de Melitone exscripsisse, librosque Sardenfis Episcopi, non errores connumerasse. Imo ne hæretici abuterentur præstantissimi Præfulis auctoritate, Rufinus & Hieronymus quædam dissimularunt; librum enim scriptum *πρὸς κτίους, ἢ ζωίους Χριστοῦ, de creatione, ac generatione Christi*, propter ambiguum vocem *τῶν κτίους*, reddiderunt alter, *de Incarnatione Christi*, alter vero, *de fide & generatione Christi*, idque habent & nonnulli Eusebiani Codices *πρὸς κτίους, ἢ ζωίους Χριστοῦ*. Sixtus autem Senensis aperte fallitur, & immerito reprehendit interpretationem Joannis Pici; nam revera in emendatissimis Theodoreti Codicibus legitur, *ἰνσώματι Θεοῦ ἢ Θεοῦ, corporeum esse Deum*. Inscriptionem libri *πρὸς ἰνσώματι Θεοῦ de corporeo Deo* referens Hieronymus Græcam Eusebii vocem retinuit, Rufinus reddidit, *de Deo induto corpore*, Christophorfonus *de Deo incarnato*, Henricus Valesius, *de Incarnatione Dei*; ita quoque Natalis Alexander sæc. II. cap. 1v. artic. 111. sed liber *πρὸς ἰνσώματι Θεοῦ* diversus est a libro *de Dei incarnatione*, qui inscribitur apud Anastasium Sinaitam cap. xxx111. *πρὸς σαρκίους Χριστοῦ*. Quæ diversa inscriptio & litem dirimit, & in contrariam sententiam traxit doctissimos viros, qui prius erant defensores Melitonis. Postremo Gennadius contra antiquissimum scriptorem non potuit studere partibus, quemadmodum Semipelagianis fortasse adiectus iniquus fuit Augustini expostulator; at de Melitone consentientes habet gravissimos, ac synchronos auctores, quos neque ex scriptis Melitonis, quæ perierunt, neque ullo veterum redarguere possumus testimonio.

PROPOSITIO II. Propior fuit Anthropomorphitarum errori Tertullianus, nec certis argumentis defenditur.

Illius Patroni sunt Natalis Alexander dissert. 1x. sæc. 11. art. 11. Honoratus Tournely de Divin. Attrib. quæst. v. L'Herminier de Simpl. Dei, Boucat dissert. 111. art. 111. & alii. At majorem esse de eo, gravissimamque suspensionem docet S. Thomas 1. contra Gentes cap. 20. Petavius lib. II. cap. 1. num. v. & seqq. Petrus Annatus lib. 1v. art. x11. Huetius in Origenianis lib. II. q. 1. num. vi111. Pamelius in Paradoxis cap. 15., noster Gavardi quæst. de Simpl. Dei art. 1., & Critici fere

omnes. Probatur 1. S. P. Augustini apertissimo testimonio : ait enim Ep. 190. ad Optatum : *Mirandum non est hoc somniasse Tertullianum , qui etiam ipsum Creatorem Deum non esse nisi corpus opinatur*. Et lib. 2. de Origine animæ cap. v. *Tertullianus , inquit , sicut animam , ita etiam Deum corporeum esse contendit*, S. Thomas quoque loco citatos *His rationibus , inquit , excluduntur deliramenta simplicium Judæorum , Tertulliani , Audianorum , seu Anthropomorphitarum , qui Deum corporalibus lineamentis figurabant*. II. Probatur ex eodem Tertulliano , qui lib. de Anima cap. 7. ait : *Nibil enim si non corpus*. Item libro de Carne Christi cap. 11. *Quum autem sit , habeat necesse est aliquid per quod est . Si habet aliquid per quod est , hoc erit , corpus ejus : omne , quod est corpus est sui generis . Nibil est incorporale , nisi quod non est*. Lib. etiam contra Praxeam cap. 2. *Quis enim negabit Deum corpus esse , etsi spiritus sit ? spiritus corpus sui generis in sua effigie*. Et lib. 2. adv. Marcionem cap. 16. *Nam dexteram , & oculos , & pedes Dei legimus , nec ideo tamen humanis comparabuntur , quia de appellatione sociantur*. His verbis , inquit Pamelius , fati se explicat .

Attamen reponunt viri doctissimi , atque erga Tertullianum humaniores . I. Augustinum lib. de Hæres. ad Quodvultdeum hæc. 86. asserere quod Tertullianus *Corpus* pro qualicumque substantia usurpavit . II. Tertullianum in lib. de anima vel loqui de solo ente creato , vel de corpore late accepto . III. In lib. de Carne Christi sese explicare , dum ait *omne quod est , esse corpus sui generis* . IV. In libris contra Marcionem Deo tribuere membra metaphoricè , juxta Divinarum Scripturarum consuetudinem .

Utinam hæc invicta essent pro Tertulliano argumenta ; Sed primo Augustinus in ejus patrocinium loco citato , ait : *Possent enim quoquomodo putari* ; dum verò ipsius errores recenset , definitè , neque uno in loco , Tertullianum redarguit . Vellem ego non benignam , ac liberalem excusationem , sed certam , qualem viri alioquin docti spondent , Apologiam . Quod in libro de anima loquatur de solo ente creato me certiores non reddunt ea verba , *Nibil enim si non corpus* ; ac similia in libro de carne Christi , *Nibil est incorporale nisi , quod non est* . Ait quidem contra Praxeam cap. 2. *Spiritus est corpus sui generis* ; sed eo sensu , quod spiritus sit corpus in comparatione horum terrenorum , tenuissimum , ac præditum sua effigie ac membris , quæ saltem Deus intuetur ; sequitur enim immediate : *Sed invisibilia illa quæcunque sunt , habent apud Deum & suum corpus , & suam formam , per quæ soli Deo visibilia sunt* . Ajant observandum esse loqui Tertullianum contra Praxeam , qui existimabat Verbum Divinum esse rem vacuum , & inanem . Illud animadverti , sed quare ad Praxeam confutandum , vir haud impos Latini sermonis , & florentissimus novorum verborum inven-

inventor *Corporis* nomine non vacuam rem significaverit, id non satis percipio: poterat enim uti non sibi ignotis vocabulis *Spiritus*, *substantia*, *essentia*, *persona*, &c. Atque non contra Praxeam tantummodo, sed ubique scribit, *nil esse præterquam Corpus*, & audivimus repetitam sæpe cantionem. Denique adversus Marcionem non metaphorice corporeas partes tribuit Deo, sed veras: distinguit enim sicut duplex genus animi, ita duplex genus corporis, & duplex genus sensuum. Tum inquit: *Quanta erit diversitas divini corporis & humani sub eisdem nominibus membrorum, tanta erit animi divini, & humani differentia sub eisdem licet vocabulis sensuum, quos tam corruptorios efficit in homine corruptibilitas substantiæ humanæ, quàm incorruptorios efficit in Deo incorruptibilitas substantiæ diviniæ.* Quo in loco si Tertullianus nequaquam Deo negat veram rationem animi, neque denegat veram rationem corporis, licet diversi generis ab humano passibili, & corruptibili.

Oppones: Tertullianus cap. xx. Apologetici ait Deum esse *Spiritum*: lib. de Anima cap. 7. *Incorporalitem* nihil pati, e contra lib. adversus Praxeam cap. 29. Deum esse *impassibilem*; quæ ponderans Augustinus lib. x. de Genes. ad lit. cap. 25. affirmat Tertullianum priorem revocasse sententiam. Denique lib. de Baptismo cap. 11. fatetur Dei propriam esse *simplicitatem*.

Resp. hæc omnia si prædictis comparentur, parum Tertulliani causam juvare. Ille enim spiritum contra corpus distinguit non per negationem materiæ, sed per intrastabilem tenuissimamque corpoream effigiem; ait enim contra Praxeam cap. 2. *Spiritus corpus est sui generis in sua effigie.* In anima vero passibilitatem affirmat, quam negat in Deo: sed loquitur de passione, quæ suapte natura dolorem infert, quam non audet asserere in Deo, cui tribuit passionem aliquam ac sensus generis sui, videlicet, *incorruptorios*. Augustinus, si eum attente legas, non ait Tertullianum priorem revocasse sententiam, sed eum potius arguit antilogiæ. Denique, inquit, *Tertullianus quia corpus esse animam credidit non ob aliud nisi quod eam incorpoream cogitare non potuit, & ideo timuit ne nihil esset si corpus non esset, nec de Deo valuit aliter sapere: qui sane quoniam acutus est, interdum contra opinionem suam visa veritate superatur. Quid enim verius dicere potuit, quàm id quod ait quodam loco, Omne corporale passibile est? Debuit ergo mutare sententiam, qua paullo superius dixerat, etiam Deum corpus esse. Neque enim arbitror eum desipuisse, ut etiam Dei naturam passibilem crederet.* &c. Quorum verborum sensus est: Tertullianum non solum animam hominis cogitasse corpoream, sed etiam Deum, quia non valuit sapere quod aliquid existeret incorporeum; non tamen constare sibi, sed contra opinionem suam manifestissime superari, si enim credidit omne corporale passibile, neque adeo desipuit, ut naturam quoque

Dei

Dei passibilem crederet: Ergo, ut sibi constaret, *debuisset mutare sententiam*. At quod reapse pristinam sententiam revocaverit, aperte Augustinus non asserit. In libro demum de Baptismo Tertullianus Deo tribuit simplicitatem, quæ opponitur corpori nostri generis, non spiritui quem putat esse corpus generis sui. Dicunt appellavisse Deum *Corpus generis sui* etiam Clarissimum Agenni Episcopum Phœbadium, de quo Severus Sulpitius lib. 2. Historiæ sacræ, in Tractatu adversus alteram Formulam Sirmiensem a Potamio Olyssiponensi conscriptam, nec tamen venisse unquam in suspensionem hæreseos. Soebadium alii, alii Fygadum, aut Fægadium nominaverunt. At is neque Deo effigiem, neque membra, neque sensus tribuit, uti Tertullianus: de quo gravis exoritur suspicio; eaque non omnino benignis his interpretamentis extergitur.

PROPOSTRIO III. Neque Sanctus Epiphanius, neque Audius Deum esse anthropomorphon existimaverunt.

De Sancto Epiphanio Eruditi omnes conveniunt. Et probatur; nam Hæresi LXX. rusticam simplicitatem Audianorum redarguens, qui in humano corpore divinam statuebant imaginem, pag. 815. Petavianæ edit. Paris. ait: *Qui fieri potest, ut quod aspectabile est ei simile sit, quod videri non potest, aut corporeum corpore experti? & infra: Penes Deum neque affectio ulla, neque defectio est: sed undecunque lumen est: Spiritus enim Deus est, qui omnem Spiritum exsuperat*. Ubi differte in Græco Deus appellatur ab Epiphanio ἀσώματος, ἀόρατος, ὁ ἀπὸ παντὸς ὁσιώμα, incorporeus, invisibilis, spiritus supra spiritum. Deinde, auctore Hieronymo Epist. 61., cum Joannes Hierosolymitanus anno Christi 393. contra Anthropomorphitas coram populo, qui ad audiendum Epiphanium convenerat, concitatum haberet concionem, atque manu, oculis, totiusque corporis trunco sanctissimum Senem vellet inspectum facere stultissimæ hæreseos; ille contra, salutata Ecclesia: *Cuncta, inquit, quæ locutus est collegio frater, atate filius meus contra anthropomorphitarum hæresin, bene & fideliter loquutus est: quæ mea quoque damnatur voce: sed æquum est, ut quomodo hanc hæresin condemnamus, etiam Origenis perversa dogmata condemnemus*. Ille ergo non est inter Anthropomorphitas connumerandus, qui illorum hæresim vocem scripto damnavit: Epiphanius voce ac scripto damnavit hæresim Anthropomorphitarum: Ergo. &c.

Neque obstat Epiphanium in hæreseos suspensionem a Joanne Hierosolymitano fuisse adductum. Nam Joannes maximo odio prosequabatur S. Epiphanium, a quo fuerat accusatus quod errores foveret Origenis: unde magnum exortum est an. 391. Joannem inter ac Epiphanium dissidium. Socrates quoque lib. v. cap. 10. & Sozomenus lib. v. cap. 14. male de Epiphanio sentiunt. At de his minus curandum. I. Quia nimiam præbent fidem accusationi Joannis viri Origenistæ, hostisque in-

San-

Sanctum Salaminæ Antistitem infensissimi. II. Quia etiam historiam pervertunt, & Paulinianum fratrem Hieronymi, quem Epiphanius ordinavit Diaconum ac Presbyterum in quodam Monasterio Palestinæ, ordinatum scribunt prope urbem Constantinopolitanam, & in Ecclesia, quæ sub Jurisdictione esset Joannis Chrysostomi. III. Quoniam Socratem, & Sozomenum offendit consuetudo Epiphanii cum Theophilo Alexandrino, qui cum Aegyptiis Monachis hac infectis hæresi communicavit. Sed & Monachi illi rusticana potius simplicitate, quam pervicacia ac malicia peccaverant, neque hac de causa communiter infimulabantur hæreseos, ut animadvertit etiam Augustinus in libro ad Quodvultdeum de Vadianis: &, quidquid sit de Fidei Theophili, cum eo tantum convenit Epiphanius circa damnationem librorum Origenis, eumque in suas partes trahere conatus est etiam Joannes Hierosolymitanus. Neque credibile est Theophilum accusasse Epiphanium de hæresi Anthropomorphitanem, ut scribit Socrates, in eandem hæresim ipse Theophilus consentiret. Quod si tam callidum velimus dicere ac versutum, ut hæresin propriam fraudolenter infectaretur; jam excusatione dignus erit quisquis cum illo aliquandiu communicavit.

Altera pars propositionis de Audio probatur. Nam, ut scribit eadem hæresi LXX. Epiphanius, ille nulla in re a Catholica dissentit Ecclesia: præfractæ tantum interpretabatur verba Scripturæ; quæ hominem conditum ad *imaginem Dei* significant, propugnans talem imaginem in Corpore sitam esse: quod male intelligentes illiterati absurdum de Deo conceperunt sententiam, quasi humanis membris constaret, de viri clarissimi nomine, cujus abutebantur doctrina, appellati *Audiani*. At etiamsi Audius putaverit divinam imaginem in humano corpore expressam; non consequitur Deum fecisse corporeum: potuit namque credere, Deum, ut hominem fingeret, humanam ad tempus sumpsisse formam, tanquam efformandi hominis typum, ut scribit Prudentius sub finem Apotheosis, & Eugubinus in Cosmopoeja; vel asserere hominem factum ad imaginem Verbi Incarnati, jam prævisi, ut aliqui exponunt quædam testimonia Tertulliani. Dissimulandum tamen non est, Audium edicto Constantini relegatum fuisse in Scythiam, *quod populos ab Ecclesiâ obsequio retraheret*, ut refert idem Epiphanius: sed hæc schisma quidem redolent, non hæresim; aut si hæresim, fuerit hæc *Quartadecimanorum*, non Anthropomorphitarum. Vide S. Epiphanii Panarium hæresi LXX.

PROPOSITIO IV. Ut ut sit de Audio, Tertulliano, ac Melitone; Deus est purus ac simplex spiritus qualicumque corpore expertus.

Spectat hæc propositio ad fidem, & probatur. I. Ex Sacris literis; nam Jo. 1x. v. 24. habetur: *Spiritus est Deus*, idest animus solutus ac liber, segregatus ab omni concretionem mortali. Ibi namque Christus Samaritidem mulierem adloquitur, docetque Deum adorandum

dum in *spiritu & veritate*, idest non corporeo cultu, vel uno tantum in Templo, sed mente, & ubique, ideoque significat *Spiritus* hoc loco Animum nullo corpore, aut termino circumscriptum.

II. Probatur ex Patribus. Gregorius Nazianz. orat. xxxiv. *An corpus, inquit, eum esse dices? Quonam ergo modo immensus, infinitus, figura expertus, ac denique ejusmodi, ut nec tangi, nec oculis cerni queat?* Hilarius in Psalm. cxxix. *Intelligendum est, Deum incorporealem esse, neque ex partibus quibusdam, atque officiis membrorum, ex quibus unum corpus efficitur consistere.* S. P. Augustinus lib. 8. de Civit. Dei cap. 5. *Porro si noster animus corpus non est, quomodo Deus creator animi corpus est?* Joannes Damascenus lib. 1. de Fide Orthodox. c. 4. *Quo etenim modo corpus esse queat, quod infinitum, & interminatum est, quod figura caret... quod denique simplex est, nec compositum?* Lege Petavium lib. 11. cap. 1. & 2. Thomassinum lib. 1v. cap. 1. & 3. Tournely *Quæst.* v. art. 1. concl. 2., &c.

Tertio probatur a doctissimo Huetio lib. 2. *Quæst. Alnetan.* n. 11. veterum Philosophorum testimonio; Deum namque expertem quocunque corpore, ac simplicissimum docuerunt Pythagoras apud Lactantium De ira Dei, Xenophanes apud Clementem Alexandrinum V. Stromat. Plato apud Augustinum lib. viii. de Civit. D. cap. 9. Afferunt idem ab Aristotele, a Simplicio, a Sallustio Cynico, ab ipso quoque Epicuro, qui dicebat Deos non habere corpus, sed quasi corpus, non sanguinem, sed quasi sanguinem. Prætermitto Proclum, Alcinoum, Apulejum, Plotinum, & alios plurimos.

Ultimo probatur rationibus, primo: Quocunque excogitato corpore, majus & majus sine fine poterit cogitari: id enim postulat quælibet, ingentissima licet, moles corporea, ut amplior magnitudo possit ei superaddi: Deo, ut omnibus persuasissimum est, nihil majus potest excogitari: Ergo Deus frustra quæritur inter corpora. Argumentum est Augustini Serm. xiv. ex additis a Parisiensibus. Rufus: Quidquid constat corporeis membris, non est totum ubique: Deus totus ubique est: Ergo Deus non constat corporeis membris. Idem Augustinus lib. vii. Confess. cap. 7. n. xii. Præterea rationalis anima potentia vivacitate quodcunque corpus excedit; nam judicat cuique corpori inesse partes majores ac minores, easque invicem sua dividit cogitatione: Deus super omnes rationales animas incommutabilis permanet: Ergo virtute ac potentia sua Deus quaecunque corpus excedit. Ex eodem Augustino contra Epistolam Fundamenti cap. xvi.

Oppones: Ex sacris Scripturis plura habentur, quæ huic propositioni adversantur. Primo Deuter. 1v. 24. & ad Hebræos xii. 29. dicitur Deus, *Ignis consumens.* Gen. 1. v. 26. homo factus ad *imaginem ac similitudinem Dei*: at homo ex anima rationali, & humana ac terrena carne subsistit. Job. x. v. xii. legitur, *Manus Domini fecerunt me,*

me, & *plasmaverunt me*. Commemorantur quoque alia divini corporis membra, ac sensus; *os* Is. i. v. 20. *aures* Psal. cxxix. v. 2. *oculi* Exod. xxxiii. v. 13. *pedes* Is. lxxvi. v. 1. *brachium* Exodi vi. v. 6. *dextera* Ps. cxxvii. *digiti* Ex. viii. v. 19. *odoratum* quoque Genes. viii. v. 21. Ex his istud conficitur argumentum. Illa substantia corporalis est, quæ virtutem habet activam, & consumptricem ignis; cujus imago est in creatura terrena, ac mortali; cui denique insunt dispositæ partes, ac sensitivæ potentix: Istiusmodi est Deus: Ergo Deus substantia corporalis est.

Resp. Stolidos esse, qui non animadvertunt Dominum Deum per homines hominibus loquentem audientium infirmitati sermones suos accommodare. Itaque ubi in Sacris literis hac de causa sive humana membra, sive sensus, ac passionibus Deo tribuuntur, debent per metaphoram explanari. Quod egregie probat Augustinus Epist. 148. ad Fortunatianum. *De membris Dei*, inquit, *quæ assidue Scriptura commemorat, ne quisquam secundum carnis hujus formam & figuram nos crederet similes Deo, propterea eadem scriptura & alas habere Deum dixit, quas nos utique non habemus. Sicut ergo alas cum audimus, protectionem intelligimus; sic & cum audimus manus, operationem intelligere debemus; & cum audimus pedes, præstationem; & cum audimus oculos, visionem, quæ cognoscit; & cum audimus faciem, notitiam, quæ innoteſcit, &c.* Quamquam hæc Augustini verba præfatum argumentum penitus solvunt; singulas tamen ejus partes quambrevissime persequar. Itaque vocatur Deus *Ignis* præsertim ob iram adversus peccata, quemadmodum *fumus* ira ipsa appellatur Psalmo lxxx. v. 5. *Lucerna* etiam dicitur 11. Regum cap. xx. v. 29. quoniam lucis, gratiarum, ac omnium felicitatis est auctor. Ergo sicut nullus dixerit in Deo *fumum*, ac *lucernæ* molem reperiri, ita neque excogitari potest, Deum esse *ignem*. Imaginem Dei refert quidem homo, sed non corpore; animo solo, ac præminencia & dominio, ut dicam suo loco. Anthropopathiæ autem; sive humanorum membrorum, ac passionum, quæ Deo tribuuntur, hæc est ratio: *Facies* significat intimam visionem, ac familiaritatem, unde de Angelis Mat. xvi. v. 10. habetur, *semper vident faciem Patris*. Tribuuntur Deo *oculi* propter exactissimam rerum omnium notitiam, dicente Apostolo ad Hebræos iv. v. 13. *Omnia nuda, & aperta sunt oculis ejus*. Legitur græce *τιταχουµενα*. Est autem *τιταχουµενα*, detracta spina dorsi animal quasi anatomice dissecta; unde Apostolus vocabulum tranſtulit, & comparisonem victimarum, quibus spina detrahitur, significat Deum, quasi facta anatomia, secreta omnia conspiciere. *Aures* quandoque demonstrant Deum ratas habere Fidelium suorum preces, ut Psal. cxxix. v. 2., quandoque vero nostram erga Deum servitutem, ut Ps. xl. v. 7. *Aures perfecisti mihi*; quæ verba Messiam futurum significant erga Patrem obsequentissimum, translato

- *Τὸ.Ι.*

S

verbo

verbo כרה *perficere ac perfodere* ab exemplo servorum, quibus in perpetuum mancipatum aures perforabantur. *Manus* vel Dei potentiam, vel flagellum, vel mitem animadversionem, vel promissum significat, quod facile ex adjunctis verbis intelligitur; nam *extendere* manum idem est ac auxilium afferre, seu pœnam immittere: manum *alleviari* est mitius corripere: manum *reducere* est pœnas repetere: manus *expandere* est ad veniam & resipiscentiam invitare: manum *levare* est jurare ac promittere; & *plaudere* manu ad manum apud Ezech. xxi. aut manum *complodere*, est summe adversari, atque favere interfectoris. In *brachio* robur, in *dextera* virtus innuitur ac potentia, in *digito* autem summa facilitas, mirabile artificium, ac donum Spiritus Sancti; quippe perfectiora ac pretiosa non extentis brachiis, maximoque corporis robore, sed summis digitis elaborantur. *Pedes* & immensitatem, & in conterendis hostibus indignationem significant; aliquando etiam Ecclesiæ doctrinam; nam pusilli solent ad præceptorum suorum pedes assidere. Idem de sensuum vocabulis dicendum est; *Auditus* enim pro benevolentia & gratia, qua preces exaudit, *odoratus* pro complacentia, ac delectatione bonorum operum; *gustus* & *tactus* pro alacritate, & operatione sumuntur. Illud denique observandum est, quod *Corpus*, nusquam in universis Bibliis tribuitur summo Deo, præterquam ubi sermo est de Christo; de quo multiplice ratione dicitur. Ac primo quidem ad significandam assumptam a Verbo carnem: deinde ad demonstrandam unionem, & complexum Ecclesiæ; postremo ad ostendendam novi Testamenti præstantiam, cujus veteres cæremoniæ figura erant & umbra. Eo sensu de Neomeniis, ac sabbatis ait Apostolus ad Colossens. ii. 17. *Quæ sunt umbra futurorum, corpus autem Christi*. His & plenissime solutum est argumentum, & ad plures divinarum literarum tropos exponendos latissima patet via.

C A P U T III.

*Idem pertractatur argumentum, & de divinorum
attributorum agitur distinctione.*

Diximus Gilbertum Porretanum errasse in Deo intrinsecam ac realem distinctionem adstruendo, sed de ejus hæresi inter Scriptores non convenire. Nam quidam putant errasse quod distingueret Essentialiam divinam atque attributa ab ipso Deo, non autem eadem attributa abinvicem, ut Vasquez disp. 126. cap. 2. Claudius Frassen Tract. 1. disp. 2. art. 2. quæst. 2. quibus subscribit Nicolaus L'Herminier; alii contra, afferunt Gilbertum etiam inter divina attributa realem distinctionem constituisse, ut Petavius lib. 1. cap. viii. Juanin dissert. 111. q. 1. in

eamque propendit Eminentissimus Gotti Quæst. 1v. dub. 1. §. 2. Antequam vero nostram de Attributorum distinctione proferamus sententiam, istud sit de Gilberto iudicium.

PROPOSITIO I. Gilbertus distinxit Deum ab essentia, Personas a relationibus, & omne concretum ab abstractis; sed num sejunxerit divinas proprietates ab invicem non satis constat, & videtur negativa sententia probabilior.

Brevissime probatur I. Quoniam Gilbertus idcirco accusatus fuit, quod negabat concedendam esse illam propositionem, *Deus est natura divina*, aliasque id genus, quibus abstracta enunciantur de concretis. Ulterius recensentur apud Baronium ad annum 1147. n. VII. errores Gilberti, de quibus fuit accusatus, & distinguuntur in quatuor principalia capita, quorum unum est de distinctione Dei a natura divina, alterum de distinctione proprietatum personalium ab ipsis personis, tertium quod Personæ in nulla propositione possint prædicari, ultimum quod divina natura non sit incarnata. At de distinctione attributorum adinvicem nec verbum quidem. Præterea Concilium Remense contra Gilbertum hanc edidit Fidei professionem: *Credimus, & confitemur, solum Deum Patrem, Filium, & Spiritum Sanctum æternum esse, nec aliquas omnino res, sive relationes, sive proprietates, sive unitates dicantur, vel alia huiusmodi adesse ab æterno, quæ non sint Deus: & credimus simplicem naturam divinitatis esse Deum, nec aliquo sensu Catholico posse negari, quin divinitas sit Deus, & Deus divinitas*. In qua Fidei professione damnatur distinctio realis inter concreta & abstracta, scilicet inter Deum, & deitatem, atque inter Personas, & relationes; at de proprietatum ab invicem distinctione nil penitus. Rursus Gilbertus in Commentariis ad Boetium diserte profitetur iustitiam ac sapientiam Dei ab ejus essentia non secerni. Denique nullus nunquam Gilberto errorem istum impingit quod attributa ausus sit ab invicem sejungeri, neque S. Bernardus, qui Gilbertum profligavit, neque Gaufridus, neque Otto Frisingensis, qui licet erga Gilbertum propensior fuerit, & teste Raderico, morti proximus testatus sit se forsitan in historia Gilberti quemquam potuisse offendere, tamen in recensendis ejus erroribus, aut accusationibus, videtur rem acu tetigisse, si ejus historia cum Gilberti libris, ac Remensis Synodi definitionibus conferatur.

Opp. Gaspar Juenin. S. Bernardus, cui certe major habenda est fides, quam Ottoni, Serm. LXXX. in Cantica ait Gilbertum affirmavisse Deum esse justum, bonum, sanctum, per formas, quæ a se invicem discrepent: Ergo distinxit iustitiam a bonitate, tanquam formam a forma: *Recedant, inquit Bern., recedant a nobis, carissimi, recedant novelli, non dialectici, sed heretici, qui magnitudinem qua magnus est Deus, & item bonitatem, qua bonus, sed & sapientiam qua sapiens, & iustitiam qua iustus, postremo divinitatem qua Deus est,*

Deum non esse impiissime disputant. Divinitate, inquit, Deus est; sed divinitas non est Deus. Accedit testimonium Gaufridi Monachi Clavallensis, qui in Aëtis Remensis Concilii, quæ misit ad Cardinalem Albanensem, ait Gilbertum docere, & credere, quod divina essentia, sapientia, bonitas, magnitudo non est Deus. Item ausum fuisse dicere: Forma Dei est divinitas, qua Deus est, & ipsa non est Deus. Eodem argumento ducitur doctissimus Cardinalis Gotti.

Resp. utique plus deferendum esse D. Bernardo, & etiam Gaufrido, qui contra Gilbertum in Synodo Remensi steterunt, quàm Ottoni nimium fortasse in Gilbertum propenso. At Bernardus citato loco asserit, Gilbertum statuissse distinctionem inter sapientiam, justitiam, bonitatem & divinitatem ex una parte, atque ipsum Deum ex alia; non vero sejunxisse sapientiam a justitia, justitiam a bonitate, bonitatem ab essentia. Idem affirmat Gaufridus. Certe non video divina attributa istic tanquam secretas invicem formas, aut ab essentia sejunctas, connumerari. Erravit ergo, ac pessime, Gilbertus distinguens attributa & essentiam divinitatis ab ipso Deo: at unum attributum ab alio, singula vero ab essentia sejunxisse Gilbertum, nondum ex Bernardo audiui. *Quin* is lib. v. de Confid. cap. vii. scribit, Gilbertum admisisse in Deo *quaternitatem*, eo quod præter tres distinctas personas, etiam divinitatem a Deo ausus sit distinguere. *Quod* si comperisset aditui ab eo distinctionem etiam inter attributa & essentiam, atque inter unam proprietatem & alteram, non quatuor tantum, sed longe majorem distinctorum numerum diceret esse a Gilberto confectum. Denique S. Bernardus eodem lib. v. de Considerat. cap. 7. aperte fatetur Gilbertum docuisse, magnitudinem, bonitatem, justitiam, & alia ejusmodi unam esse divinitatem, sed hanc divinitatem non esse Deum. *Quartum* hoc, inquit, *omnino respiciamus* (scilicet divinitatem qua Deus est, & quæ ipse Deus non est, ut asserbat Gilbertus). *Multa dicuntur esse in Deo, & quidem sane, catholiceque, sed multa unum. Alioquin si diversa putemus, non quaternitatem habueris, sed centenitatem: Verbi causa, dicimus magnum, bonum, justum, & innu-mera talia: sed nisi omnia unum in Deo, & cum Deo consideres, habebis multiplicem Deum. . . . Scio quod ad hæc respondere solent. Non multa, inquit, sed unam tantum divinitatem, quæ omnia illa sunt, Deo ut sit conferre asserimus. Afferitis ergo, etsi non multiplicem, duplicem Deum, & non ad merum simplex pervenistis, neque ad id, quo melius cogitari non potest. Hæc Bernardus disputans, ut patet, contra hæresin Gilberti, quamquam suppresso istic ejus nomine, quod in conventu Remensi Episcoporum sententiæ humiliter acquieverit.*

PROPOSITIO II. Divinorum attributorum, distinctio nulla est, nisi penes diversa connotata, ut docet Gregorius Ariminensis; & omnis distinctio intrinseca est a Deo procul eliminanda.

Ante-

Antequam vero hæc propositio demonstretur, quædam sunt breviter præmittenda. Ac primo quidem, nos minime negare distinctionem rationis extrinsecam, videlicet diversas mentis nostræ perceptiones, quibus E. G. substantiam divinam a relationibus, aut misericordiam a iustitia distincto sensu, ac notione intelligimus. Hanc enim distinctionem expresse comprobatur Florentinum Concilium Sess. xviii. in qua Latini Patres dixerunt: *Nos dicimus substantiam, & personam, sive hypostasim esse idem re, differre autem nostro intelligendi modo*, respondentibus vicissim Græcis: *Hæc in parte nulla est inter nos discrepantia*. Patres quoque contra Eunomium, qui contendebat quælibet nomina, quæ de Deo enunciantur, eandem habere significationem, & solo differre sono, singulis proprias subesse notiones unanimiter tradiderunt. Atque nullus quidem est ex Theologis, qui cum Patrem nominat, aut Filium, personam, sui que juris subsistentiam a divinitatis essentia mentis apprehensione non separet, illam, non istam intelligendo.

Hanc distinctionem rationis nullibi negat, quidquid dicant Vasquesius, Tournely, alique Theologi, doctissimus noster Ariminensis. Is recte observat dist. viii. art. 2. quod aliqua dicuntur distingui ratione dupliciter; primo modo, quod ipsa sint rationes & conceptus distincti; alio autem modo, quod eorum sint in mente nostra rationes, & conceptus diversi. Itaque negat distinctionem rationis priori modo explicatam, quoniam Dei perfectio non est conceptus animæ, sed res summa, & in se ab æterno subsistens. Ceterum distinctionem rationis secundo modo acceptam Gregorius disertè propugnat ii. Concl. ejusdem articuli pluribus argumentis, inter quæ primum est illud obvium ac tritissimum: Quorumlibet nominum diversa significantium, vel connotantium diversæ sunt rationes: Attributa, ut manifestum est ex ipsorum definitione, sunt ejusmodi nomina, quæ diversa significant, vel connotant: Sunt ergo attributorum diversæ rationes. Itaque Gregorii sententia & distinctionem rationis amplectitur, & e diametro pugnat cum errore Eunomii.

Animadvertit autem Theologus ille, meo quidem iudicio eximius, in attributis aliud esse quod principaliter significatur, aliud connotatum extrinsecum: verbi causa, misericordia principaliter significat Deum miserentem, connotatque extrinsece hominem miserum. Ergo contendit Gregorius divinorum attributorum distinctionem attendendam nequaquam esse penes id quod principaliter significant, sed penes extrinseca connotata, ita ut iustitia a misericordia distinguatur, quia illa connotat pœnam inflictam impio, hæc vero collatum misero beneficium.

Hæc est sententia Gregorii, quæ cur aliquibus displiceat, me latet. Et primo videtur mihi concordare cum Doctrina Magistri, qui iv. Sententiarum distinct. xlv. Cap. *Sed quomodo*, de iustitia ac misericordia

cordia Dei hæc habet: *Justitia enim Dei, & misericordia non duæ res sunt, sed una res, idest una divina essentia: quia non est Deo, aliud esse misericordem, quàm misericordiam, nec justum quàm justitiam, sed idem prorsus: nec aliud est ei esse misericordem quàm justum, vel misericordiam, quàm justitiam, sed omnino idem, quia non denominative, sed essentialiter hæc de Deo dicuntur. Cur ergo dicit Scriptura de operibus Dei, quædam esse misericordiam, quædam justitiæ? His responderi potest sic: illis locutionibus, quibus hujusmodi operum fiunt distinctiones, ut alia misericordia, alia justitiæ tribuantur, non diversitas subjacentis, idest rei his vocabulis significatæ exprimitur, sed varietas sensuum & effectuum in creaturis monstratur. Cum enim dicitur Deus justus vel justitia, essentia divina prædicatur, & etiam quod ipse sit distributor, & judex meritorum datur intelligi. Ita & cum dicitur misericordia essentia divina prædicatur, & insuper quod ipse sit miserorum liberator, intelligi datur. Inde ergo quædam opera misericordiam, quædam justitiæ dicuntur, non quin divina essentia hæc & illa operetur, & quin hæc & illa sint opera divinæ essentiæ, quæ dicitur misericordia & justitia; sed quia quædam sunt, quibus ostenditur judex & æquus distributor, quædam quibus ostenditur miserator. Ex quibus patet Magistrum justitiam ac misericordiam sejungere sola effectuum ac terminorum ratione, non rei subjacentis, atque his expressæ vocabulis; quæ et eadem prorsus sententia Gregorii.*

Virtualem distinctionem, quam acerrime Theologi Thomistæ, & Aegidiani propugnant, si, ut jam ab omnibus explicatur, accipias pro summa ac perfectissima re, simplicissima quidem, sed pluribus rebus distinctis æquivalente, nemo, ut arbitror, negare potest. Quis enim negare potest infinitam Dei virtutem tantum valere, quantum distinctæ inter se creaturarum finitæ vires? Quis non libenter assentiat Augustino scribenti xv. de Trin. cap. 17. *in Deo non distingui memoriam, intellectum, dilectionem sive caritatem, sed unum aliquod esse quod omnia valet?* Illud tantum minus placet, quod afferant doctissimi alioquin Theologi, plures ex parte objecti reperiri rationes, quarum una in esse cogniti non est altera. Hanc rationum diversitatem ex sola mente humana arbitror esse repetendam. Docent hanc eorum distinctionem habere fundamentum in re, idque duplex, summam scilicet Dei simplicitatem, & realem distinctionem creaturarum, quibus illa dicitur æquivalere: unde Scholastici aliquanto *Cassanovi* appellarunt distinctionem rationis ratiocinatæ. Nos contra fundamentum unicum agnoscimus in effectibus, terminis, connotatis: neque proinde summam illam simplicitatem negamus, sed distinctionem omnem aliunde repetentes, vellemus simplicissimam Dei perfectionem magis asserere. Queruntur Gregorium nec etiam per intellectum attributa distinguere: verum id quo sensu sit accipiendum, satis præmonui; non enim ille

ille uspiam inficiatur diverforum attributorum diversas esse rationes; sed illud tantummodo, quod hæc diversitas repetenda sit penes id, quod principalius significant. Non est ergo tam atrox, & aspera nobis cum doctissimis theologis colluctatio, si res penitus inspicatur, & ad trutinam revocetur.

A prædicta virtuali distinctione nomine tenus differre *formalem* Scoti, atque *intentionalem* Henrici, arbitrantur Herrera, Suarez, Gavardi, alique plures, propterea quod ipse Scotus in 1. Sent. dist. 2. q. vii. distinctionem suam *differentiam virtutalem* appellat. Et quidem *formalitatum* vocabulo neque rerum diversitatem, neque accidentium, quæ in Deo non sunt, vir disputandi acumine celebris voluit significare, sed diversas rationes suis definitionibus notas, quas placuit Henrico nominare *intensiones*, veteribus Thomistis rationes *objectivas*, vocibus forte ad offundendas luci tenebras excogitatis. Quæ si veræ sunt, implacabile illud utriusque Scholæ dissidium verborum erit, non rerum. At modo illuc controversiæ status devenit, ut diversæ illæ rationes juxta Scoti discipulos distinctæ sint ante mentis operationem, secundum Thomistas vero virtute sola, ac potentia: nam Henricus in creaturis quidem formalem distinctionem agnoscit, sed non in Deo; Scotistæ vero utrobique. Atque hanc fuisse sententiam Scoti erui potest ex 1. Sent. dist. viii. quæst. iv., unde vereor, quin Theologis, quos memoravi, fucum fecerit speciosum *virtualis differentie* vocabulum. Hæc de attributorum distinctione deberent frugi Theologo sufficere: sed ut morem geramus Scholæ, erit nunc ad argumentationes procedendum.

Itaque nullam intrinsecam distinctionem dari inter divina attributa, sic demonstro. Intrinseca distinctio aut *realis* est, aut *formalis*, aut *virtualis*, quæ fundamentum habeat ex parte objecti; virtualem enim extrinsecam, quæ habeat fundamentum penes effectus, & connotata, dari fatemur: Neque realis, neque formalis, neque virtualis distinctio inter divina attributa intercedit: Ergo nulla. Prob. mi. de distinctione reali: I. Ex allata definitione Florentini Concilii Sess. xvi. & ex Conc. Lateranensi cap. *Firmiter*; ubi definitur omnia, quæ reperiuntur in Deo unam esse substantiam, unam rem, unam naturam. II. ex PP. etenim Augustinus lib. xv. de Trinit. cap. 5. ait: *Una eademque res dicitur, sive dicatur æternus Deus, sive immortalis, sive incorruptibilis, sive immutabilis, itemque cum dicitur vivens, & intelligens, quod est utique sapiens, hoc idem dicitur. Non enim percipit sapientiam, quia esset sapiens, sed ipse sapientia est.* Quod unanimi consensu ceteri omnes Patres confirmant. III. Ratione: Omnis realis distinctio exoritur sive ex limitatione, ut evenit in rebus creatis; sive ex oppositione relationis, ut in Personis individue Trinitatis; inter divina attributa non est realis distinctio ex limitatione proveniens, cum
sunt

sint infinita, non consurgens ex relatione, cum non opponantur : Ergo, &c.

Probatur thesis nostra de distinctione *formali*. I. Quia Patres solam distinctionem rationis inter Dei essentiam, ac proprietates, atque inter has invicem agnoverunt. *Discrepant*, inquit Damascenus lib. iv. cap. 3. *inimias mentis, subtilibus cogitationibus: verà & inivisus, secundum considerationem*, in primo adversus Eunomium Basilii; *cogitatione, sive ratione*, in Florentino Concilio Joannes Theologus. Quæ dum Scotistæ exponunt per distinctionem oppositam reali, extra intellectum tamen existentem, videntur quoque extra mentem locare, *inivisus, rationem, cogitationem*: At consideratio & cogitatio frustra extra intellectum quærentur: Ergo & incassum excogitatur extra mentem attributorum distinctio. Ad hæc: Gilbertum, qui divinitatem sequebatur ab ipso Deo impetit hoc duplici telo Bernardus; *Si Deus non est, quid est? aut enim Deus est, aut aliquid quod non est Deus, aut nihil. Equidem non das Deum esse. Sed ne nihil quidem (ut opinor) dabis; Quod si aliquid est, quod non est Deus: aut minor erit Deo, aut major, aut par. At quomodo minor qua Deus est? Resat ut aut majorem facias, aut minorem. Sed si major, ipsa est summum bonum, non Deus: si par, duo sunt summa bona, non unum. Hæc serm. lxxx. in Cantica. Et lib. v. de Consid. cap. 7. Quid est Deus? quo nihil melius cogitari potest. Si approbas; non oportet assentiariis esse aliquid, quo Deus sit, & quod Deus non sit: hoc enim sine dubio melius. Longe quidem abest ab hæresi Gilberti Scotistarum sententia, & qui consentire affirmant, hi procul dubio decipiuntur. Nihilominus hæc duo Bernardi argumenta quater videntur Scoticam distinctionem. Ac primum; nam hæc subtilis Theologi *Formalitates* quid sunt? aut Deus sunt, aut aliquid quod non est Deus, aut nihil. Si eadem sunt Dei natura; quomodo ab ea distinguuntur? Si Deus non sunt, erunt creatum aliquid; sive substantia illud sit, sive accidens: si nihil sunt, stulti videntur qui de nihilo tantas instituunt disputationes. At reponunt has formalitates esse quidem divinam essentiam realiter, sed non *formaliter*. Verum, quid sibi velint, crassioris ego, rudisque minervæ non capio. Nam si quidquid est, aut Deus est, aut creatura est, aut nihil est: erunt hæc formalitates aut Deus, aut creatura, aut nihil; eritque hæc distinctio formalis vel distinctio Dei a creatura aut a nihilo, vel distinctio nihili a creatura, vel distinctio nihili a nihilo. Alterum D. Bernardi contra Gilbertum telum erat: Deo nihil melius cogitari potest: Cogitari potest Deus indistinctus a deitate, qui utique melior est ipso Deo a divinitate distincto: Ergo Deus, qui a divinitate distinguitur, non est Deus. Atque idem sic potest contra Scoti sententiam urgeri; Simplicitate, quæ plures *formalitates* actu distinctas compatitur, perfectior cogitatione nostra est ea simplicitas, quæ rejicit actualem plurium *formalita-*
tum*

rum distinctionem: In Deo admittenda est simplicitas, qua perfectior cogitari non potest: Ergo in Deo ea simplicitas admittenda est quæ actualem excludat plurium *formalitatuum* distinctionem.

Compertum mihi est respondere Scotum, plures illas formalitates nullam facere compositionem, quoniam non habent rationem actus & potentiae, ut de divinis Personis omnes fatemur, quæ licet distinctæ, divinam minime tollunt simplicitatem. Ceterum inane videtur ejusmodi effugium. Quidquid enim sit de compositione, quam do a Scotistis vitari; quomodo unitatem ac simplicitatem salvant, ubi plura seipsis distincta constituunt? quomodo est summe unum, quod non est actu natura sua indivisibile? Exemplum vero divinarum Personarum non est ad rem: in his enim non potest cogitari unitas, nisi ratione essentiali atque attributorum, a quibus neque ipsæ Personæ *formaliter* distinguuntur. Ut Personæ realiter sunt distinctæ ob relativam originis oppositionem. Denique de hac formali distinctione loqui videtur Joannes Gerso in quadam Epistola data anno 1426. ad Fratrem Ordinis Minorum; in qua hæc habet: *Damnata est nuper per Prædecessores meos in Sacra Theologia facultate sub pluribus articulis Doctrina, quam nonnulli solum impune subtilem garriunt, quam ignorantes veluti pica loquacissimæ stabilire nituntur, cum sit mera insania, & vanitas falsa. Unus articulus inter ceteros est: Quod aliquid sit Deus realiter, quod non sit formaliter Deus.* Suspectam esse relationem Gersonis putat doctissimus L' Herminier Scoticæ distinctionis propugnator acerrimus, quod neque damnationis annus, neque articuli auctor prodatur, sed Honoratus Tournely utrunque invenit. Scribit enim retractatum eundem articulum a quodam Ludovico anno 1362. Proscripserat quoque eundem artic. anno 1276. Stephanus Parisienſium Episcopus. Non ausim tamen asserere tam grave celebris sententiæ præjudicium. Rigidius Parisienſium sese gerebat Academia, ne resurgeret superioris sæculi hæresis, videlicet Gilberti. Eam Theologi etiam Scotistæ damnant: quamquam Dionysius Petavius lib. 1. cap. viii. n. 8. hæc pronunciat: *Ab hac vero vel nihil, vel parum discrepare Scholasticorum aliquot opinio creditur, ut Scoti; qui citra notionem, & intelligentiam nostram per se ab essentia divina differre proprietates, & inter sese ipsas, existimat.*

Demum distinctio virtualis intrinseca, qua ex parte objecti statuuntur diversæ rationes ante operationem mentis potentia distinctæ, facile obruitur. Contendunt quippe Thomistæ divina attributa esse, unum reipsa, plura tamen, ut inquirunt, conceptibiliter; idest, summam illam rem, quæ Deus est, non ex solo intelligentiæ nostræ modulo, sed ex propria natura, atque amplitudine esse multiplici ratione perceptibilem; non confuse tantum, & permixte, sed cognitione clara & distincta, adeo, ut etiam ex parte objecti una divina perfectio non involvatur in alia. Quis autem implexam hanc, operantemque doctrinam

recte perspicit, & assequitur? Ego sane non video, quomodo consistat in una, eademque re penitus indistincta illa multiplex dilucida & expressa *cognoscibilitas*. Eiusdem enim indivisibilis entitatis sicut una, est simplex veritas, ita ex parte objecti una simplex *cognoscibilitas* statui debet; ideoque cognoscibilitas varia & multiplex aut non erit distincta & clara, aut discernenda erit tantummodo per extrinsecam objecta, quæ dicimus connotata.

Afferamus nihilo fecius adversus labilem illam, & flexiloqueam Thomistarum sententiam argumentationes nonnullas. Ac prima sit: Istæ rationes objectivæ quo pacto intelligentia nostra seunguntur? Aut cogitatio mentis nostræ est causa efficiens, qua prædictæ rationes distinguuntur actu, aut causa formalis. Si causa efficiens; aut divinas proprietates re ipsa separat, aut sola cogitatione: si re ipsa, ergo divinam tollit simplicitatem; si sola cogitatione, ergo distinctio est in sola mente, quæ cogitat. Si vero eæ rationes objectivæ distinguuntur per intellectum tanquam per causam formalem; aut tanquam per formam ipsi intrinsecam, sicut unum accidens dicitur distinctum ab alio, aut tanquam per formam extrinsecam, sicut quælibet res distinguitur a seipsa per comparisonem ad plura extrinseca connotata; V. G. una, eademque extensio, quæ si ad diversas referatur, erit maior & minor, æqualis & inæqualis. Profecto divina attributa non distinguuntur ratione, tanquam intrinseca forma, quum conceptus nostri extrinseci sint objecto; Ergo distinguuntur ratione tanquam per formam extrinsecam, qua ad plura connotata comparantur; quæ est distinctio Gregorii. Præterea: divina attributa vel distinguuntur ratione aliqua ipsis intrinseca quæ sita sit extra mentem humanam, vel ratione extrinseca, idest sola humanæ mentis cogitatione: Si primum affirmant Thomistæ, virtualis distinctio erit prorsus idem cum distinctione formali Scotistarum: nam sive dixeris cum D. Thoma 1. dist. 22. q. un. art. 3. etiam in Deo *inveniri distinctionem rationum, quæ realiter & vere in ipso sunt*, sive cum Scoto distinct. v. quæst. ult. mavis appellare *formalitates*, parum refert; unde merito Franciscus Henno Quæst. 2. concl. 3. prope finem, advocat sibi Doctoris Angelici patrocinium. Quod si velint distinguere attributa sola ratione ipsis extrinseca, nostris scilicet cogitationibus; habemus intentum. Postremo: Nunquam ratione & cogitatione nostra res ipsa intrinsece fieri potest non ipsa: Ergo nunquam ratione, & cogitatione nostra res ipsa distinguitur a seipsa; ideoque omnis distinctio rei simplicissimæ, nihil est aliud quam rationum ac perceptionum nostrarum diversitas.

Respondent Thomistæ, utique divinas proprietates sola intelligentia ac ratione nostra distinguere: sed hujus distinctionis dari intrinsecum fundamentum, infinitam nempe Dei perfectionem, quæ pluribus realiter distinctis æquivalet.

Duo hac responsione vulgatissima comprehenduntur : unum dari in Deo summam infinitamque perfectionem pluribus æquipollentem , & hanc nullus omnino denegat ; alterum hanc summam perfectionem esse fundamentum distinctionis ; idque gratis asseritur . Etenim dum intelligentia nostra Deum infinite quidem perfectum percipimus , & divinam aliquam cogitamus proprietatem , vel mens nostra id contemplatur absque ullo ordine & absolute , vel cum referencia & comparatione ad aliquem terminum . Si Deum concipio absolute ut existentem , aut bonum , aut justum , impari licet cogitatione , non distinguo existentiam a bonitate , neque bonitatem a justitia . Distinguo tamen unum ab altero , dum cogito existentiam in se , misericordiam comparate ad miseros , justitiam relate ad rectos vel impios , quibus mercedem aut pœnam rependit . Fundamentum itaque distinguendi divina attributa inter se hoc unum est , quod cogitationes nostræ modo Deum spectant ut est in se , modo ut refertur ad aliud : & si de solis attributis sermo instituitur , unum ab alio se jungitur , quoniam ad varios terminos comparantur . Fictitium est ergo fundamentum illud intrinsecum , quod in summa Dei perfectione cogitatur , absque comparatione ad extrinsecam connotata . Ipse Gabriel Vasquez , qui Gregorium impugnât dis. cxvi. 1. cap. 3. probat divina attributa non posse distingui sine respectu ad creaturas , quod etiam demonstrare conatur ex D. Thoma . Et Hugo Viëtorinus *Quæst. ccxv. in Epistolam ad Romanos* , docet sapientiam , scientiam , prævidentiam , ceterasque divinas proprietates esse diversa nomina , quæ *divina usia , cum sit una & simplex , propter varios effectus sortitur* . Hi ergo effectus ac termini diversis cogitationibus nostris fundamentum suppeditant .

Reliquum est , ut argumentationes expendantur quæ pro Scoti sententia afferunt Frassen , Hennus , L' Herminier , qui tamen repetunt pervulgata Fabri ac Mastrii momenta ; tum si quæ superesse videbuntur contra Gregorium , quem impugnant loco cit. Vasquesius , Juenin , Gotti , & ex nostris quoque quamplurimi .

SATISFIT ADVERSARIORUM ARGUMENTIS .

Opp. 1. In Deo voluntas , & intellectus , bonitas , & justitia ante quamcunque mentis operationem distinguuntur : Distinguuntur ergo natura sua , ac *formaliter* . Ant. probatur 1. Intellectus , voluntas , misericordia , justitia , aliaque divina attributa diversis definitionibus describuntur : Habent ergo diversam in se *formalitatem* atque naturam . Deinde : Deus intelligit peccata , quæ non vult ; & confert uni victricem gratiam misericorditer , alteri eam juste denegat : distinguuntur itaque divinus intellectus a voluntate , atque a misericordia justitia . Rursus : Filius , cum sit Verbum Patris , procedit per intellectum ,

Spiritus Sanctus, cum sit utriusque Amor & Caritas, per voluntatem: Sunt ergo intellectus ac voluntas Dei duo principia suapte natura sejuncta. Denique de eadem omnino re verificari nequeunt contradictiones: Atqui de voluntate & intellectu Patris, de iustitia ac misericordia, ut colligitur ex dictis contradictiones verificantur: Ergo intellectus & voluntas, misericordia & iustitia non sunt idem omnino *formaliter*.

Resp. nego ant. Ad 1. probat. dico diversas divinorum attributorum definitiones, non explicare diversas res atque essentias, alias divinarum proprietates reipsa & essentialiter forent distinctæ; sed unam eandemque rem, quatenus plura respicit connotata. Quod Magister ostendit apertissime in iv. sent. dist. xlv. 1., neque dissentit Aegidius in 1. dist. 33. q. 2., docens ex diversitate definitionum solam inferri perceptionum nostrarum distinctionem. Atque missis Scholasticis, magnus Basilius Epist. lxxx. docet, quod omnes Deo convenientes notiones ac voces, *τὸ πᾶν τοιοῦτον ἔστι ὁμοειδὲς διακρίσει ἀναγκαίᾳ, nullum habent in rei subiecta significatione discrimen*. Augustinus quoque lib. xv. de Trinit. cap. ult. ait, quod cessabunt in Patria multa, quæ nunc de Deo dicimus, neque erunt tibi volubiles hominum cogitationes, quia *omnem scientiam nostram uno simul conspectu videbimus*. Ex quo Henricus Florez demonstrat suam quoque distinctionem virtutalem in cælesti patria evanescere; atque inde consequitur, has omnes divinarum rerum notiones ex variis provenire effectibus, ex quibus Deum cognoscimus tanquam per speculum, & ænigma. Distinguo igitur propositionem: Divina attributa diversis describuntur definitionibus, quæ demonstrant aliquid in re subiecta describunt; nego: in effectibus & connotatis; concedo.

Dissolvitur pari ratione 2. probatio: si enim de re vocabulis subiacente loquamur, & voluntas intelligit, & intellectus vult, & misericordia punit, & iustitia misereatur, quoniam hæc præstat eadem essentia penitus individua, dicente Augustino xlii. de Civit. Dei cap. 13. *Essentia tua scit, & vult incommutabiliter, & scientia tua est, & vult incommutabiliter, & voluntas tua scit & vult incommutabiliter*. At vero diversæ illæ enunciationes, *Intellectus non vult, misericordia non punit*, ac similes, spectant ad divinas proprietates & attributa, non quatenus in se sunt, sed comparate ad connotata; nam intellectus est divina essentia ut omnium rerum scrutatrix, voluntas ipsamet essentia ut approbans bonum, aut malum permittens, misericordia essentia eadem, ut sublevatrix miserorum; itaut multiplicitas attributorum ex effectuum varietate tantum confurgat. Quod singulari exemplo in ipsa Dei scientia verum esse monstratur. Deus enim unica intellectione omnia videt tam præterita, quam futura, & consequenter præscientia & Dei intellectio sunt idem omnino; & tamen præteritarum rerum est intellectio, quarum non est præscientia, non alia de causa,

caussa , nisi quia præscientia dicitur connotative ad futuras . Quare diversa connotatio omnes illas enunciationes , quæ videntur oppositæ , planas reddit : neque ad eas verificandas requiritur distinctio aliqua intrinseca . Per quæ diluitur quoque ultima argumentatio .

Ad tertiam vero repono mysterium esse imperferutabile , cur Spiritus Sanctus non sit Filius , quemadmodum est Verbum , vel saltem comentitium esse duplex illud principiorum discrimen , quod ab intellectu ac voluntate repetitur , in eo saltem sensu , quo dicuntur *formalitates* a natura distinctæ : nullam quippe certam rationem possumus assignare , nisi forte quod Verbum est Filius quia procedit ab uno , Spiritus Sanctus est amor quoniam est a duobus . Atque illud accedit , quod unum idemque potest esse principium diversarum operationum , ut eadem lux illuminat , & calefacit ; eadem creata voluntas diligit , & odio habet ; eadem volitio divina est causa effectrix omnium creaturarum . Repetendum est itaque quodcumque discrimen divinarum operationum a connotatorum diversitate : at hæc in libro 1x. , qui erit 111. de Trinitatis mysterio , erunt recudenda .

Opp. 2. Intrinsecam aliquam divinarum proprietatum discrepantiam apertissime tradunt Patres ; ac præsertim Augustinus . Qui lib.viii. de Trinit. cap. 2. probat duas divinas Personas non esse *aliquid majus* , quoniam non sunt *aliquid verius* . Supponit ergo veritatem a Dei magnitudine esse distinctam ; nihil enim probatur per idem . Et lib.v. ejusdem operis cap. v. docet relationes a substantia distingui : *Non enim omne quod dicitur secundum substantiam dicitur ; dicuntur enim ad aliquid sicut Pater ad filium* . Lib. quoque xv. cap. 3. docet omnes divinas perfectiones esse æquales : æqualitas autem inter duo extrema intercedit . Denique lib. 3. contra Maxim. cap. 10. ait : *Si in una persona Patris & illa invenis quæ plura videntur , & partes non invenis : quanto magis & Pater , & Filius , & Spiritus Sanctus & propter uniuscujusque proprietates tres personæ sunt , & propter deitatem individuum unus Deus est , &c.* Quæ Augustini argumentatio ridicula foret , inquit Frassenius , nisi intrinsecam distinctionem admitteret : quippe redderet sensum : Non officit divinæ simplicitati distinctio rationis attributorum ; Ergo neque officit divinæ simplicitati realis distinctio Personarum . Hæc autem consecutio omnino est inepta atque explodenda . Igitur Augustinus discrepantiam aliquam majorem distinctione rationis inter divina attributa constituit .

Accedit Damascenus , qui lib.1. de Fide Orth. cap. 41. & 49. disertissime docet , quod : *Si dixeris bonum , iustum aut quid tale non naturam Dei dicis , sed quæ circa naturam* : censet ergo bonitatem , ac justitiam a natura distingui . Eadem docet Gregorius Nyssenus Orat. 12. contra Eunomium , & Nazianzenus Orat. xxx111. Quibus nihil clarius & expressius pro sua formali distinctione posse proferri , existimat Franciscus Hennus .

Verum

Verum hæc nil penitus me conturbant. Atque ut omnia, quæ producuntur ex Augustino uno verbo exsufflentur, operæ pretium est præmittere, quid sint juxta Sanctum Patrem divina attributa. Fontem universæ doctrinæ suæ aperit Serm. xl. de Temp. cap. 7. In quo docet justitiam, sapientiam, intelligentiam, & quidquid Deo tribuimus, esse unam simplicissimam Dei unitatem, & varias affectiones animæ nostræ, quæ multiplices fiunt ex rerum creaturarum contemplatione, sed in Deo ratione longe diversissima continentur, sunt enim in illo, tanquam in caussa, & principio eminentissime ac simplicissime. Idque Augustinus explicat exemplo lucis, qua funduntur in rebus corporeis multifformes colores, albus, flavus, rubeus, viridis, alique. Lux autem in se neque alba est, neque flava, neque rubra, neque viridis, sed una qualitas, quæ illata corporibus illustrat omnia, diversoque aspergit nitore. *In Deo*, inquit, *omne quod dicitur idipsum est. Neque enim in Deo aliud potestas, & aliud prudentia, & aliud fortitudo, & aliud justitia, & aliud castitas. Quidquid horum de Deo dicitur, neque aliud, & aliud intelligitur, & nihil digne dicitur. Quia hæc animarum sunt, quas illa lux perfundit quodammodo, & pro suis qualitatibus afficit: & infra: Ergo animarum sunt istæ affectiones, quæ bene affectæ sunt ab illa luce, quæ non afficitur; & formata ab illa, quæ non formatur. Hæc Augustini verba, & exemplum lucis ab eo prolatum omnem cavillationem elidunt*, inquit clarissimus Thomassinus lib. iv. Theol. dogmat. c. xi. n. 6.

Resp. itaque ad primum, magnitudinem, & veritatem distingui, quatenus sunt affectiones & notiones animæ nostræ, quæ ex variis Dei effectibus & operibus multiplices haurit perceptiones, non autem distingui quatenus sunt in Deo, qui eminenter ac simplicissime continet omnem magnitudinem ac veritatem, sicuti color flavus ac ruber distinguuntur, prout sunt corporum affectiones, non prout continentur in luce. *Deus multipliciter quidem dicitur magnus, bonus, sapiens, sed eadem magnitudo ejus quæ bonitas, eadem bonitas quæ sapientia*, ait idem Augustinus lib. vi. de Trinit. cap. 7. Ad 2. nego, S. Patrem distinguere relationes a substantia; ait enim ejusdem operis lib. vii. cap. 6. *Quemadmodum hoc illi est esse quod Deum esse, quod magnum, quod bonum esse: ita hoc illi est esse, quod personam esse*: Atqui essentia nullo pacto intrinsicè distinguitur a divinitate, imo per Scotum dist. xxxv. quæst. 1. art. 4. neque distinguitur ab *intellectualitate*: Ergo per Augustinum nullatenus distinguitur magnitudo a bonitate, neque divina essentia a Persona. Verum tamen est quod non omne vocabulum de Deo prolatum idem prorsus significat; sed hoc nomen *substantia* significat essentiam prout est in se; hoc nomen *Pater* significat eandem essentiam prout connotat Filium; ideoque sola discrepantia monstratur nominum, connotatorum, & existentium in mente nostra cogitationum.

num. Ad tertium dico æqualitatem ibidem usurpari pro unitate, quo sensu contra Arianos tradunt Patres Filium esse æqualem Patri, idest, unum substantia: vel accipiuntur attributa prout cogitatione nostra distinguuntur in ordine ad connotata, tam enim relucet infinita misericordia in distributione gratiarum, quàm infinita iustitia in retributione mercedis. Ad 4. dico hanc esse vim illius Augustiniani argumenti contra Maximinum: Bonitas & Sapientia non sunt partes divinitatis quia a divinitate non distinguuntur: Ergo divinæ Personæ non sunt partes essentiæ, quia ab Essentia non distinguuntur. Non supponit igitur Augustinus distinctionem attributorum ab invicem, sed solam indistinctionem ab essentia, quam fatebatur Ariani. Atque inde probat, neque divinas Personas esse per nos partes divinitatis, quia per nos nullatenus a divinitate fecernuntur. Redarguit quoque S. Pater Hæreticum ex verbis ejusdem. Dixerat namque Maximinus Deum esse, Dominum, Regem, Creatorem, bonum, sapientem, clementem, nec tamen esse compositum ex partibus, quia hæc omnia sunt una eademque simplex virtus. Itaque, inquit, neque Personæ partes erunt, quia sunt eadem *Deitas individua*. Miror tamen clarissimum Claudium Frassen nequaquam advertere, quod sicut explodenda est hæc argumentatio: Non officit divinæ simplicitati distinctio rationis: Ergo non officit distinctio realis; ita ridenda esset altera, Attributa non habent rationem partis, quia *formaliter* distinguuntur: Ergo neque habent rationem partis divinæ Personæ, quæ distinguuntur *realiter*. Non enim a distinctione *formali* ad realem tenet consecutio. At Frassenius argumentationem illam exscripsit a Fabro in 1. dist. 2. quæst. 7. disp. 20. cap. 3.

Ad Joannis Damasceni, aliorumque Patrum testimonia, respondeo, hæc nomina, *Bonum, justum &c.* non Dei naturam significare, sed quæ circa naturam sunt, secundum cogitationem nostram, non re. Etenim nos divinas perfectiones cogitamus tanquam adventitias substantiæ, ut ait eodem libro cap. 11. Damascenus: *Quod ibi commune est & unum, re consideratur, quoniam una est trium aternitas, & eadem essentia, actio, voluntas. Cogitatione vero constat quod est distinctum.* Atque in proprietatibus personalibus ibidem præter distinctionem *secundum cogitationem*, statuit rationem *causæ*, & *ejus quod est ex causâ*. Elidit dubitationem omnem Augustinus scribens lib. xv. de Trinit. cap. 5. *Si dicatur Deus æternus, immortalis, incorruptibilis, immutabilis, vivus, sapiens, potens, speciosus, justus, bonus, beatus, spiritus; horum omnium novissimum quod posui, scilicet, spiritus, quasi tantummodo videtur significare substantiam: cetera vero hujus substantiæ qualitates. Sed non est ita in illa ineffabili simplici natura: quidquid enim secundum qualitatem illic dici videtur, secundum substantiam vel essentiam est intelligendum. Absit enim,*
ut

ut spiritus secundum substantiam dicatur Deus, & bonus secundum qualitatem: sed utrumque secundum substantiam. Sic omnia cetera quæ commemoravimus.

Opp. 3. Minor est distinctio inter Bonum, & bonitatem divinam, quàm inter bonitatem & justitiam: Inter Bonum, & bonitatem est distinctio rationis: Ergo inter bonitatem & justitiam est distinctio major distinctiōne rationis.

Resp. dist. majorem. Distinctio minor intrinseca, nego: extrinseca, co. Bonitas discrepat a bono cogitatione nostra, quæ concipit bonitatem adinstar qualitatis advenientis substantiæ: & differt a justitia cogitatione nostra, quæ concipit bonitatem adinstar qualitatis adventitiæ, & connotantis objectum diversum ab objecto justitiæ. Quamquam enunciationes illæ, Deus bonus est bonitate, & justus justitia, indignæ videntur viro Theologo, & subolent quodammodo hæresim Gilberti. Melius enim dicitur, Deus est sapientia, & Deus est justitia, vel Deus est sapiens sapientia quæ ipse est, Deus est justus justitia quæ ipse est, cum Deus sit ipsa sua bonitas, ipsa sua sapientia, ipsa sua justitia, ipsa sua magnitudo. *Sed dicit hæreticus, (verba sunt Bernardi Serm. lxxx. in Cant.) Deum divinitate esse dicis? Non, sed eandem divinitatem qua est, Deum nihilo minus assero, ne Deo excellentius aliquid esse assentiar. Nam & magnitudine dico magnum, sed quæ ipse est, ne majus aliquid Deo ponam; & bonitate fateor bonum; sed non alia, quam quæ ipse est, ne melius ipso aliquid mihi videar invenisse. Et de ceteris in hunc modum securus & liber pergo inoffenso, ut ajunt, pede in ejus sententiam, qui dicebat, Deus non nisi ea magnitudine magnus est, quæ est quod ipse; alioquin illa erit major magnitudo, quàm Deus. Augustinus hic est validissimus malleus hæreticorum.* Hæc Bernardus, qui accurate legerat quæ habet S. Pater lib. de Trinit. v. cap. 10.

Opp. 4. Sapientia in communi non est *formaliter* bonitas in communi: Ergo infinita sapientia non est *formaliter* infinita bonitas. Probatur ant. Si sapientia in communi esset *formaliter* bonitas in communi, sapientia creata esset *formaliter* bonitas creata: Sapientia creata non est *formaliter* bonitas creata: Ergo Sapientia in communi non est *formaliter* bonitas in communi. Consequentia autem tenet, quippe esse infinitum, aut creatum formalem rationem sapientiæ ac bonitatis non destruit. Quod est præcipuum Scoti argumentum.

Resp. Gregorius sic retorqueri contra Scotum præfatam argutationem: Si sapientia infinita esset realiter bonitas infinita, sapientia in communi esset realiter bonitas in communi, & consequenter bonitas creata esset realiter sapientia creata: Atqui per Scotum sapientia in communi non est realiter bonitas in communi: Ergo sapientia infinita non est realiter bonitas infinita. De qua argumenti retorsione vide Frideri-

dericum Gavardi Quæst. 2. de Attributis art. viii. qui eam vindicat a Fabri cavillis . Nam is Gregorium vocat insulse argutantem , quippe qui ab identitate reali progreditur ad formalem . At Faber minime affectus est acumen Gregorii : cujus argumentationis vis in in eo sita est , quod sicuti se habent plures realitates in specie ad realitatem in communi & in genere , ita se habent plures formalitates in specie ad formalitatem in communi & in genere : Sed ex quo bonitas & sapientia essent idem formaliter in specie infert Scotus quod bonitas & sapientia deberent esse idem formaliter in communi & in genere : Ergo ex quo bonitas & sapientia sint idem realiter in specie , inferri debet quod bonitas & sapientia sint idem realiter in communi , & in genere . Atqui bonitas infinita & sapientia infinita sunt idem realiter : Erunt ergo idem realiter sapientia & bonitas in communi , & per consequens idem realiter erunt quoque sapientia & bonitas creata . In quo argumenti genere Gregorius exacte servavit regulas proportionum apprime iis necessarias , qui a paritate volunt argumentari , ut in libro de utilitate Matheos admonet noster Rabbius .

Sed ea retorsione prætermissa , ad argumentum Scoti nego consequentiam ; non enim est inconveniens aliquid esse de ratione inferioris , quod non est de ratione superioris . Scotus namque tenet divinam essentiam esse *formaliter* vitam intellectualem , & tamen essentia in communi non est *formaliter* intellectualis vita in communi . Hæc Gregorius . Ceterum sapientia , & bonitas in communi , & in genere , sunt idem mentis , quas *universalia* appellant dialectici : neque fas est ab humanæ cogitationis figmento ad rei veritatem argumentationes deducere .

Opp. ultimo contra Gregorii sententiam . Hæc Nominalium opinio est eadem prorsus cum hæresi Aetii , atque Eunomii : Ergo falsa est , & penitus abjicienda . Probatur ant. Eunomius asserbat quælibet divina attributa differre tantum nomine tenus , ita ut omnia forent synonyma , quibus ex parte objecti nulla subesset notionum diversitas , & qui unum perciperet , comprehenderet universa . Adversus hunc errorem ait Basilii lib. 1. *Quoniam igitur patet non erit deridendus , si creandi virtutem substantiam esse dicat , si providentiam rursus substantiam ?* &c. Et infra : *Nonne manifesta est insania , si dicat proprium significatum unicuique nomini subiectum non esse , sed contra verborum vim decernas nomina omnia idem inter se valere ?* Atqui Ariminensis defendit solam discrepantiam nominum , quibus ex parte rei significatæ una eademque notio respondet : Ergo ejus opinio est hæresis Eunomiana . II. Aut Gregorius nominibus , quæ dicuntur de Deo , idem tribuit significatum , aut diversum : Si idem prorsus , in eam incidit confusionem synonymorum , quam exprobat Eunomio Basilii : si diversum , oportet admittat aliquam differentiam rationis non solum ex parte intellectus cogitantis , verum etiam ex parte rei significatæ , asseratque cum Cy-

To. I.

V

rillo

rillo xxxi. Thefauri: *Non omnia ergo, quæ in Deo sunt, & de Deo dicuntur, substantiam significant: reliquum est igitur in voce modoque dicendi accidentia dicimus, quoniam modo accidentium ea intelligimus.* III. Eunomius neque negabat, neque negare poterat distinctionem connotatorum, credebat enim se ex creaturis Deum perfecte comprehendere; & tamen Patres aliam notionum discrepantiam ab eo exigebant: Ergo præter differentiam connotatorum admittenda est distinctio rationum ex parte objecti. Hinc Petavius post acerbiorum illam in sententiam Scoti censuram, quam supra commemoravi, ait: *Ad Actii, & Eunonii placita implicati videntur generis alterius Theologi, quos Nominales vocant, qui in iisdem illis proprietatibus solum nominum discrimen agnoscunt; cum ne intelligentia quidem nostra invicem distincta sint.*

Ut plane his satisfaciam, & sententiam nostram ab omni vindicem Eunomianæ hæreseos suspicione, maximam inter utramque discrepantiam præpono. Eunomius itaque dicebat, varia quæ Deo tribuuntur nomina, etsi diversa sunt vocibus, idem tamen sonare, & eandem habere cum nomine *Ingeniti* significationem, ut constat ex Basilio lib. i. laudato. Gregorius contra docet attributa & voce differre, & non esse synonyma, quoniam synonyma sunt, quæ neque diversa significant, neque diversa consignant, ut si dicas *Simon, Petrus, Cephas*: At si idem significant, diversum autem consignant, non sunt dicenda synonyma, ut *Jonas Filius, Piscator, Princeps Apostolorum, Frater Andrea*, quæ nomina significant eundem Petrum, sed consignant diversa, nempe Patrem, munus, præminentiam, consanguinitatem: & consequenter divina attributa, quæ diversa consignant, minime esse synonyma; ita Gregorius dist. viii. art. 4. quæst. 2. Præterea Eunomius omnia attributa permiscebat, etiam quæ maxime distant, eoque nitebatur, ut crederet se Deum comprehendere si unum tantum Dei nomen perciperet. Contra Gregorius docet omnia attributa diversas esse mentis nostræ affectiones, quarum una non Dei naturam in se, sed attingit respectum unius connotati duntaxat. Eunomius denique dicebat nomina *ingeniti, creatoris, patris*, & quotquot dicuntur de Deo, quamquam ex diversis effectibus mutuata, eandem in nos excitare divinæ naturæ notitiam: Gregorius noster docet ea diversa nomina signa esse diversarum rationum, & cogitationum nostrarum, quarum unaquæque est Deo longe impar, quoniam ejus naturam non intropiscit, sed vix unum ex pluribus terminis, quos consignificat. Distat ergo toto cælo ab Eunomio Gregorius.

Quibus præmissis ad primum nego antec. non enim sunt synonyma, quæ varios effectus, aut terminos consignant, esto in re subiecta nulla sit discrepantia. Ad id, quod sequitur, dico diversis Dei nominibus diversam subesse significationem, sed hanc secum asferre differentiam

tiam rationum, & cogitationum nostrarum, quæ rei significatæ sunt prorsus extrinsecæ; idque demonstrat Cyrillus, dicens divina attributa non significare substantiam *in voce, modoque dicendi*: quo loco perperam Cardinalis Gotti, & Gaspar Juevin putant Cyrillum designare differentiam rationum ex parte objecti. Basilii quoque, cuius in nos urgent testimonia, loco supracit. ait, omnia Dei nomina *nullum in rei subiectæ significatione habere discrimen*. Ad tertium respondeo Eunomium nequaquam negavisse nominum, & connotatorum discrepantiam, sed in hoc pessime errasse, quod crederet notione unius nominis divinam naturam comprehendendi, cum singula nomina diversa connotent, & consignificent; & sermone nostro declaretur *quod quis animo complexus est, non Dei natura*, ut ait Orat. xxxiv. Nazianzenus. Cæsura demum Petavii aut sententiam nostram non carpit, aut carpit Petavium ipsum: qui cap. xi. ejusdem libri num. v. probat ex Athanasio in lib. de decretis Nicænæ Synodi, omnia quæ dicuntur de Deo non esse synonyma, sed discrepantem habere notionem, quia rem eandem variis significationibus subiectam designant: *Ut cum dico*, inquit, *Jonas filius, Princeps Apostolorum, Piscator, Andrea frater*. Atqui hæc nomina non singularem, sed divisam habent notionem, quia diversa connotant, & consignificant: Ergo ex hoc eodem capite omnium, quæ dicuntur de Deo, petenda est discrepantia.

PROPOSITIO III. Nulla intrinseca compositio in Deo est admittenda.

Consequitur ex dictis: compositio enim est unio distinctorum, ideoque ubi non adinvenitur distinctio, nulla fieri potest compositio. Probat tamen brevissime. Compositio quæ excogitari potest in Deo, vel esset compositio ex corpore & spiritu, vel ex substantia & qualitatibus, vel ex natura & personis, vel ex essentia & existentia. Non datur in Deo prior compositio, quia corporeus non est, sed expers omnino materiæ. Non compositio secundi generis, quia Deus non est bonus, justus, sapiens superadditis qualitatibus, sed ipse est sua bonitas, sua justitia, sua sapientia. Non compositio ex natura ac personis, quia hæc distinguuntur quidem abinvicem, sed sunt eadem omnino divinitas ac substantia. Non denique compositio ex essentia & existentia, quoniam in Deo non est aliud esse, aliud existere. Hæc omnia superioribus propositionibus fuerunt comprobata. Nullum ergo intrinsecum compositionis genus in simplicissima divinitate potest excogitari.

In his Theologi omnes conveniunt; discrepant tantum de compositione rationis: quam dari in Deo putant Nominales, præsertim Gregorius distinct. vii. quæst. i. quibus accessit Du Hamel, negant alii communiter. Si quæstionem ita accipias, num de Deo pronunciari possit quod sit substantia, & ratione nostra cogitari possit substantiæ genus quomodolibet creaturis, Deoque commune, puto Deum esse sub genere; ait enim Augustinus in v. de Trinit. cap. 2. *Est tamen Deus sine dubi-*

dubitatione substantia : & Damascenus lib. 1. Inst. cap. vi. 1. *Genere summo continetur hac corporis expert essentia, ut Deus, ut Angelus, ut animus, ut demon*. Si vero intelligatur quaestio, sit ne ex æquo enunciabilis ratio substantiæ de Deo ac de creaturis; sive, concipi possit in Deo genus aliquod *univoce*, ut inquirunt, *per differentias contrahibile*, nego Deum comprehendi sub genere: nam ait Clemens Alex. lib. v. Strom. *Deus neque genus est, neque differentia, neque species, neque individuum*. Boetius in libro de Trinit. *Substantia in illo non est vere substantia, sed ultra substantiam*. Castior & defæciator est Theologia, si propter incommutabilem Dei simplicitatem, quemadmodum dicimus, Deus est ipsa sua bonitas, ipsa sua magnitudo, non vero, subiectus est suæ bonitati, suæ magnitudini; ita dicamus, Deus est sua substantia, non, Deus comprehenditur genere, & subijcitur prædicamento substantiæ: atque reminiscences, quæ adolescentuli de decem Categoriis disputavimus, dicamus cum Augustino 1v. Confess. cap. 16. *Falsitas erat quam de te cogitabam, non veritas; & signimenta miserie meæ, non firmamenta beatitudinis tuæ*.

C A P U T IV.

Ostenditur Deum esse infinitum, immensum, atque immutabilem.

Sophistam aliquantulum molestiorem Gregorius & Scotus me fecerunt: sed redeo jam ad ingenium *Twisus contrarius*, idest, compendio caussam expediens. *Deus*, inquit Maximus Martyr apud Eutyrium P. 1. tit. 2., *simplex est quia interminatus: interminatus quia & infinitus*; comes est enim simplicitatis infinitas, quoniam re simplicissima non possumus cogitare majorem: quo argumento utebamur & nos Cap. 11. hujus libri, prop. 4. Nunc ergo ab uno ad alterum progredimur attributum.

PROPOSITIO I. Deus est secundum essentiam suam infinitus.

Dixi secundum *essentiam*; nam in Deo neque corporea extensio, neque ulla qualitas reperitur, sed quidquid in eo est, ipse est; ideoque in omni prorsus genere est interminatus. Hanc thesim negari a Socinianis ait Tournely: sed constat ex Wolzogenio Com. in cap. 6. Mat. v. 10. hos negare solam diviniæ essentiae quantum ad locum immensitatem, non esse illimitatum in se, ac infinitam potentiam: de quo errore propositione sequenti. Propositionem hanc probant sacrae literæ; legitur enim Baruch 111. 25. *Magnus, & non habet finem: excelsus, & immensus*, & Pl. cxliv. 3. *Magnus Dominus, & laudabilis nimis*: quæ verba exponens Aug. ait: *Ipse non finitur: illius magnitudo sine*

sine fine est. Probat consensus Patrum, qui omnes Augustino consentiunt, Auctor de Div. Nom. cap. 9. Gregorius Nyssenus Orat. 12. contra Eunomium, Damascenus lib. 1. de Fide Orthodoxa cap. 9. &c. Probat doctrina Ethnicorum, inter quos Anaxagoras statuit mentem infinitam principium omnium rerum, Aristoteles dixit Deum ipsam continere infinitatem, & Zeno & Melissus interminatam perfectionem nunquam deficientem. Probant denique rationes Theologicæ, ac tres præsertim apertissimæ: prima; Nil Deo cogitari potest perfectius: Quacunque essentia finita cogitari potest perfectior: Ergo Dei essentia non est finita. Altera: Omne quod limitatum est, vel habet formam aliquam intrinsece receptam, vel saltem habet esse ab alio productum; quidquid enim finitur, vel a se, vel ab alio finem habet: Deus non habet aliquid esse receptum, cum sit suum esse; neque esse productum ab alio, cum sit esse a se: Ergo Deus non habet unde limitetur ac finiat. Postrema: Deus res procreavit ex nihilo, ad quod necessaria est infinita potentia: Sed infinita potentia supponit essentiam infinitam, imo ab ea nulla ratione secernitur: Ergo, &c.

Opp. 1. Infinitas in divinis literis non significat rem maximam, atque illimitatam: legitur namque Numer. xxxi. 1. magnam jumentorum copiam esse *infinitam substantiam*; atque decem & octo vicibus enunciatnr infinitas de manubiis, de divitiis, de sceleribus, de numero populorum, de erectis aris, in pluribus Scripturæ libris: non ergo sulcitur hæc propositio sacrarum literarum præsidio.

Resp. nego conf. res enim creatas dicimus *infinitas* populari sensu, & communi verborum usu, quo ingentes, & plurimas res infinitas compellamus, ex. caussa, infinitam stellarum multitudinem, infinitam militum copiam, infinitas arenarum congeries. Quam verborum consuetudinem hoc populari sensu nefas est de Deo usurpare. Quare? Præter populos, manubia, aras, jumenta, & alia quæ in sacris literis infinita dicuntur, aliæ memorantur gentes, aliæ prædæ, alia jumenta; ideoque infinitas de rebus productis enuntiata totam ipsarum rerum amplitudinem nequaquam designat. Secus est si loquamur de Deo; nam *Unus est Deus, qui est super omnes, & per omnia, & in omnibus nobis*: Ad Ephes. iv. 5.

Opp. 2. Si corpus aliquid esset infinitum, non esset præter illud aliud corpus: Ergo si divina substantia foret infinita, non esset præter illam substantia alia. Resp. dist. ant. Obstante corporis infinitate, nego: obstante locali extensione ac impenetrabilitate, qua infinitum corpus quælibet loca implens expelleret inde quodcunque aliud, trans. ant. nam & hac impenetrabilitate in sententia plurium Theologorum, ac Philosophorum, qui Corporis naturam non locant in soliditate ac dimensione, posset illud corpus expoliari, & consequenter in eodem loco alia corpora sibi compenetrata compateretur.

PRO-

PROPOSITIO II. Deus immensitate sua est ubique.

Id affirmo contra Conradum Worsium Calvinianum, Wolzogenium, aliosque Socinianos, qui arbitrantur Deum proprie quoad essentiam suam supremum cælum inhabitare, unde infinita ejus vis & potentia in omnes partes dimanet, in quibus eam vult exercere. Quem errorem tribunt aliqui etiam Eugubino, & Erasmo: neque ille potest iudice Petavio excusari, cum in Psalmum cxxxviii. scribat Deum esse ab omnibus remotissimum, & præsentiam suam, qua dicitur esse ubique, non substantiæ esse, sed potentiæ, tanquam lucis ab eo manantis: sed excusari potest tamen, ut ostendam cap. sequenti. Atque is, nempe Erasmus, videtur potius ridere aliquorum logomachias, qui disputant num Deus sit in spatiis imaginariis: quidve agat, ut ipse ait, in antro scarabæi: quarum plerasque sine causa reprehendi, diximus in Prolegomenis. Quidquid sit de horum opinione; probatur assertum & contra Worsium, & quotquot tam impie delirant, ut Deum vel cum gentibus in olympi recessu, vel cum gentilibus Philosophis in superiori sphaera, vel cum quibuklam Hebræis in Hierosolymitani Templi angustiis coarctaverint. Ac primo probatur auctoritate divinorum librorum; tum Patrum sententiis: postremo naturalis Theologiæ obvia aliqua, ac perspicua ratione.

Atque e sacris literis hæc sunt apertissima. Josue 2. *Deus in celo sursum & in terra deorsum*: Ps. 138. *Si ascendero in cælum tu illic es; si descendero in infernum ades*. Hierem. 23. *Cælum & terram ego impleo*. Baruch 3. *Magnus est, excelsus, & immensus*. Hæc vero Crellius, & Wolzogenius frustra conantur eludere per solam vim & efficaciam; Deus quippe, cum simplicissimus sit, est suamet operatio, ideoque si ubique Dei experimur virtutem atque efficientiam, ubique præsens est Dei substantia. Noto hic obiter, sententiam D. Thomæ quæst. viii. art. 1., & nostri Aegidii in 1. dist. xxxvii., qui docent ex Dei operatione invictissime ipsius demonstrari præsentiam, videri ad revincendos Socinianos validiorem opinionem Scoti, qui eadem dist. xxxvii. ait ineffaciter probari Deum esse ubique, quia ubique operatur. At oportet, ut operatio, quæ certum facit divinæ præsentiae argumentum infinitam virtutem præseferat, qualis est rerum creatio, verum miraculum, & omne opus, quod sese prodat esse divinum. Tunc enim recte ratiocinabitur quisquis dixerit: Divina substantia est ab ejus operatione penitus indistincta: Ubique Deus sua virtute operatur: Ergo ubique Deus præsens est sua substantia. Dissimulandum tamen non est, quod illi, qui Scoti sententiam putant hæresi proximam, & directe adversantem Apostolo dicenti Act. xvii. v. quod Deus: *Non longe sit ab unoquoque nostrum: in ipso enim vivimus movemur, & sumus*, vim illius testimonii minime expendunt, cum Paulus non provocet Athenienses ad subtiles de essentiali Dei præsentia disputationes; sed

sed illud tantum asserat non esse Deum adeo a cognitione nostra remotum & distitum, quin possit ex nobis ipsis intelligi, quamquam Athenis inscripta esset ara IGNOTO DEO. De qua Epigraphe dixi superiori libro. Sed quum postea offenderim in plures, qui putant Atheniensem aram inscriptam plurali numero ΑΓΝΩΣΤΟΙΣ ΘΕΟΙΣ, quam sententiam sequitur Erasmus, Listerius, Meursius, Sponius, Clericus, hujusque furfuris plurimi; addo hæc omnia conciliari: licet enim plures fuerint Aræ plurali titulo inscriptæ; dubitari non debet quin fuerit alicubi quoque ea inscriptio in singulari; præsertim cum Pausanias scribens Athenis fuisse aras *ἑῶν ἀγνώτων*, *Deorum ignotorum*, vel it tantum fuisse plures aras inscriptas *ΘΕΩ ΑΓΝΩΣΤΩ*, ut contendit Grotius, & ipse Wolzogenius. Atque ad rationem alibi productam ex Epimenide & Laertio, accedit quod Auctor Dialogi, qui inscribitur Philopatris, jurat per *Deum ignotum* qui colebatur Athenis, & quem ibi se invenisse & adorasse testatur. Hæc dicta sint partim in confirmationem illius sententiæ nostræ, partim ad solutionem illius Scholasticæ contentionis sit ne Deus ubique præsens per substantiam ac potentiam: de qua temporis iacturam facerem, si plura proloquerer.

Probo nunc Catholicum theorema ex Patribus. Arnobius in vi. adversus Gentes: *Hoc est, inquit, proprium Deorum complere omnia vi sua, non partiliter uspiam, sed ubique esse totos: adesse, non abesse, non cænatum ad Aethiopas pergere, & post dies bisseños privatum ad Domicilium redire.* Scomma est notam de Iove fabulam ridentis. Cyrillus Cat. vi. *In loco minime definitus: sed locorum opifex: in omnibus existens, & a nullo circumscriptus: Unus est ubique præsens.* Hilarius lib. i. ad Const. *Deus & ubique est, & totus ubique est.* S. P. Aug. Ep. lvi. *Patendum est ubique esse Deum per divinitatis præsentiam; &c.* Quid moror Ecclesiæ Patres? Lege Zenonis sententias apud Laetium, Proclum ad Timæum, definitionem Empedoclis apud Huetium, qui veterum momenta collegit lib. ii. qq. Al. 7. Quibus addo Senecam Epist. 41. Dionem Chrysostomum apud Grotium in Caput xviii. Act. Apostol. celeberrimum denique oraculum apud Porphyrium,

πάντα θεῷ πλήρη. πάντα θεὸς ἐστὶ, πανταῖα.

Omnia Deo plena; ubique Deus est, Phanethe.

Rationem omnium potissimam putat Habert cap. xi. quoniam si Deus alicubi confisteret, locum suum deferere cogeretur, ut alibi præsentem se sisteret, quemadmodum Angelus, aut homo. Vera est; sed reponerent Worsius, & Crellius nullibi extra cælum se præsentem sistere, nisi effusa luce ac potentia. Ut rimulæ Sociniani præcludantur, utendum est hoc argumento: Quia Deus est undequaque infinitus nequit ullo perfectionis genere limitari: Ergo nec potest aliquo loco circumscribi. Vel eo, quod supra innui: Ubicunque est Dei potestas, est & substantia: Potestas ubique est: Ergo ubique est & substantia. Quo-
rum

rum primum est Basili in v. adversus Eunomium ; alterum Anselmi in libro de Incarnat. cap. 4. , utrumque Augustini citata Epistola LVII. ad Dardanum .

* Opp. 1. Deum ubique non esse probatur ex sacris literis Genes. v. 1. legitur Cain egressum fuisse *a facie Domini* . Non erat ergo Dominus in plaga , ad quam Cain profugus abiit , Orientali . Cap. 25. dicitur Rebecca perrexisse , ut *consuleret Dominum* : Ergo non erat Deus in regione , in qua Isaac peregrinabatur cum sua uxore . Rursus : Deus olim in Templo Silo , deinde in Hierosolymitano habitavit , ut constat ex 1. & 2. Regum , itaut Deus ipse cap. VII. v. 6. dixerit Nathan : *Neque habitavi in domo ex die illa , qua eduxi filios Israel de terra Aegypti usque in diem hunc : sed ambulabam in tabernaculo , & in tentorio* . Item saepenumero legimus Dominum descendisse , ambulasse , recessisse ab impiis , mansionem apud eos facere , qui cum diligunt , aliaque id genus plura ; quæ substantiæ præditæ immensitate convenire non possunt .

Resp. futilia esse quæcunque obijciuntur . Cain dicitur egressus a facie Domini , idest a loco , in quo ei Deus apparuerat , & *ab ovila* (inquit Calmet) *parentum suorum sede* . Rebecca perrexit ad consulendum Dominum , idest in peru & cubiculum , remotior a marito ad orandum : nam verbum *נִסְּלָה* *consuluit* , idem est , ac *vehementer precari* , ut constat ex versu 5. Psalmi XXXIII. Tamen perrexisse Rebecca ad consulendum Abrahamum , vel Heberum , vel alium e schola magni Sem , tradunt Rabbin veteres . Eodem loco Geneseos v. 21. legitur *deprecatusque est Isaac dominum pro uxore sua* , hebraice *יִשְׂרָאֵל בָּרַךְ לְרַבְרָבָה* *pro* , & *coram* uxore sua . Erat ergo ibi Dominus , qui eum exaudiret . Habitare dicitur Deus in arca , in templo , in iustorum animabus gratiosa manifestatione , & largitione gratiarum . *Fatendum est Deum esse ubique per divinitatis præsentiam ; sed non ubique per habitationis gratiam* , ait S. P. Aug. citata Epist. LVII. ad Dardanum , nunc 187. Conquerens autem Deus se habitare in Domo cedrina , & in medio pellium , in tabernaculis , in tentoriis , non optat regiam habere , qualem Cadmus apud Euripidem , sed ut David cogitet de Domo ædificanda ad immolandas hostias , & peragenda sacrificia . Descendere denique dicitur , ambulare , accedere , *quando curam humanæ fragilitatis habere dignatur* ; ait Augustinus serm. LXX. de Temp. vel *cum aliquid facit in terra , quod præter usitatum naturæ cursum mirabiliter factum præsentiam ejus quodammodo ostendat* ; inquit idem S. P. XVI. de Civitate Dei cap. 5. Hinc descendere ad videndam turrim Babel Gen. XI. iram , & poenam superborum , descendere cum Jacob in Aegyptum Gen. XLVI , gratiam , & patrocinium , descendere Spiritum Sanctum Matth. III. invisibilis sub specie columbæ manifestationem , & descendere Filium Dei de cælo humanæ naturæ assumptionem designat .

Op. 2. Matth. v. 16. habetur, Deum in cœlis habitare: & sequenti cap. docere Christum, ut id in quotidiana oratione exprimatur. Absit ergo Deus ab aliis terrenis partibus. Confirmat hoc vetus Hebræorum traditio, qui cælum in tres dividunt partes, in aerem unde pluvia atque ros decidit, in firmamentum stellarum, ac in remotissimum locum, ubi Deus & Angeli habitant. Hanc vero traditionem confirmant Scripturæ; nam Paulus II. ad Corinth. xii. 2. locum habitationis Dei tertium cælum appellat: & Psal. cxiii. 16. habetur, *cælum cæli Domino*. Atque ea est consuetudo Scripturarum, ut *cælum cæli* omnium supremam partem designet, ut *Deus Deorum* Deum altissimum, *Dominus dominorum* Dominum valde magnum. Igitur, etsi divina potentia vastissimo cælorum ambitu non possit comprehendi, præsentia tamen essentialis abditissimo loco præcluditur. Utitur hoc argumento Joannes Ludovicus Wolzogenius.

Resp. Deum specialiter dici quod sit in cælo, primo quia ibidem ostendit faciem suam, & locus ille magis est particeps ipsius operationis, & gloriæ; deinde quia ibidem incessanter laudatur, regnantque Angeli facientes ejus voluntatem. Ita Aug. 2. de Trinit. cap. 5. & Patres communiter. A quibus neque dissentiant inimici veritatis Brentius, Glassius, & Calviniani omnes, ac Lutherani, Wolzogenius. Coin. in cap. vi. Matthæi ait Templum dici habitationem ac locum Dei, quia specialiter illic sua providentia habitat, & benignis supplicum preces exaudit. Quod Deus sua providentia dicatur habitare in Templo non probat hanc providentiam in omnes partes minime dimanare, ipso Wolzogenio fatente: Ergo quod Deus dicatur habitare in cælis, non evincit quin essentiali præsentia ubique consistat. Ea de causa orantes ad cælum convertimur, quasi solum Divinæ majestatis venerantes, & hac demissione profitentes non esse Deum terrestrem patrem infirmum, ac senescentem, sed auctorem omnium, omnipotentem ac sempiternum. Ita & Hebræi, ut summum Deum a suis fecernerent Patriarchis, orabant אֲבִינוּ שְׁכֵנֵם, quod idem ferme est, ac Dominicalls orationis exordium. Substantivorum duorum ratio notare auxilium verum est non solum in notatis a Wolzogenio, & cum idem nomen repetitur, verum etiam in synonymis, ut Psalmo xv. 5. *pars hereditatis* designat omnimodam partem, xxxix. 3. *lutum facis* sordidissimam sordem; Esaïæ xxxi. 1. *spina & vepres* plurimam sentem; Mich. ii. 4. *Depopulationis vastatio* extremam desolationem. Sic *cælum cæli* supremum gloriæ solum demonstrat, non quo premat vestigiis Eridanum, ut poetice Aratus; sed quo regnum impertiatur electis.

Opp. 3. cum Worstio: Dedecet summam Dei majestatem locus infimus, caliginosus, ac sordidus. Resp. neque solis lucem a sterquilinio fœdari, neque animam infici leprosi corporis sordibus, neque aerem abduci a casa fumaria. Quid ergo inficere poterit Deum incommuta-

To. I.

X

bilem

bilem lucem, infinitum spiritum, universorum causam, expertem omni motu, omni extensione, omni labe?

Ultimo oppones. Patres haud semel fatentur Deum nusquam esse Resp. Deum non esse alicubi locorum spatiis circumscriptum. Etenim omnia loca, ait Augustinus Serm. 1. in Ps. cxiii. n. 14. *tanquam indigentia continet, non ab eis tanquam indigens continetur.*

Ne præstoleris hoc loco consuetam de spatiis imaginariis disputationem. Quid sunt, quæso, hæc spatia? *Inanes hominum cogitationes, quibus infinita imaginantur loca, eum locus nihil sit præter mundum.* Ita August. xi. de Civit. Dei cap. 5. Trahunt tamen ad se Augustinum Assertores affirmativæ sententiæ. At si attente legeris; videbis ibidem confutari Manichæos, & quotquot ante mundum æterna tempora præcessisse autumabant. Hæc est summa Augustinianæ argumentationis: Extra mundum non est locus, quia locus una cum mundo productus est; Ergo ante Mundum non est tempus, quoniam omne tempus fuit cum mundo productum. Quod si volatilis sensus frustra quærit tempus ante mundum, idest antequam fieret ipsum tempus, ut demonstrat S. Pater xi. Confess. cap. xii. xiii. & xiv., quis imaginari potest locum extra mundum, idest extra locum, in quo productus est omnis locus? Verum si exercitationis causa velis de inani mentis nostræ figmento garrere; pro affirmativa sententia plenissime disputat Theophilus Raynaudus Th. nat. disput. vii. Suarezius disp. xxx. Metaph., noster Gibbon disp. x. dub. 4.; pro negativa fere omnes, Scotus, D. Thomas, Aegidius, & qui in eos ediderunt Commentaria. Omnium fere vox una est, Deum in spatiis imaginariis esse tantum potentia; nempe si hæc spatia producerentur, Deus his coexisteret. Erat ea ratione etiam in mundo, antequam crearetur. Sed antequam crearetur mundus, Deus ubi erat? quid tunc faciebat? Quærenti quid tunc faciebat, respondet Augustinus laudato libro num. 15. *Non erat tunc, ubi non erat tempus.* Quærenti ubi erat, respondendum est: Non erat ubi, ubi non erat locus. *Dicet aliquis, (ait S. P. enarrat in Ps. cxxi. n. 4.) antequam faceret Deus cælum & terram, ubi habitabat? ... In se habitabat Deus, apud se habitabat, & apud se est Deus.* Idem de mundo antequam fieret, ac de spatiis imaginariis quæ non sunt, erit nobis absque hæsitatione pronunciandum.

PROPOSITIO III. Deus est omnino immutabilis.

Immutabilitas est perpetua rei permanentia, in quam neque substantiæ, neque accidentium intercidit vicissitudo. Atque hanc immutabilitatem convenire Deo probatur 1. ex Scripturis, dicente Malach. iii. 6. *Ego Dominus, & non mutor. Sap. vii. 17. In se permanens omnia innovat.* Num. xxiii. 19. *Non est Deus ut filius hominis, ut mutetur.* Jacob. i. 17. *Apud quem non est transmutatio, nec vicissitudinis obumbratio.* Appellaverat hoc loco Jacobus Deum *patrem luminum*; & ideo servata solis metapho-

taphora utitur vocabulis astronomicis, quæ mire in græco textu deprehenduntur. Ibi *transmutatio* dicitur *παράλλαξις*, *obumbratio* *ἐκσένιασμα*. *παράλλαξις* est varius solis conspectus in ortu, in meridie, in occasu. *ἐκσένιασμα* est solis umbra ex subjectis corporibus. Est itaque (ait Jacobus) Deus Pater lumen, a quo omne donum descendit, sed non oritur, non occidit, non recedit, non aliquid ei accidit mutationis & umbræ, dum lucem effundit, idest, dum ejus opera apparent. Vere singulare divinæ immutabilitatis testimonium!

Nullus Patrum hanc apertissimam veritatem in dubium revocat. *Immobilem Deus habet naturam*, inquit Chrysostom. *Semper eodem modo se habet*, inquit Cyrillus. *Est bonum simplex, & incommutabile*, inquit Augustinus. Omnium loca accurate persequitur Petavius lib. 111. cap. 1. & 2., Thomassinus lib. v. cap. 8. 9. 10. quæ omnia recitare quid præstat? Philosophorum, præsertim Platonis, Procli, Alcinoi, Hieroclis, Cleanthis, & Numæ Romanorum regis in hac re consensionem. vide apud Huetium lib. 11. Aln. *Quæst.* cap. 11. 8. 9. & 10.

Accedit multiplex Augustiniana ratio. Si enim gradatim a rebus corporeis ad intelligibiles conscendas, comperies naturæ magisterio illam minus esse mutabilem, quæ est perfectior. Ergo omnium perfectissima erit omnino incorruptibilis & immutabilis. Vide S. P. lib. vii. Conf. cap. 17. Deinde; Omnis mutatio facit non esse quod erat: In Deo non potest non esse quod erat, cum sit essentialiter ipsum esse: Ergo in Deo non potest esse mutatio. Vide lib. de Nat. Boni cap. 19. De Fide, & symb. cap. 4. & v. de Trinit. cap. 2. Ulterius; Quidquid mutatur transit de meliori in deterius, sive a deteriori in melius: Summum bonum transire nequit de meliori in deterius, neque a deteriori in melius: Ergo summum bonum nequit esse mutabile. Vide Tract. xxiii. in Joannem; & lib. vii. Confess. cap. 4. Deinceps; Apud Deum est causa, origo, ac ratio omnium rerum mutabilium: Origo, causa, ac ratio omnium rerum mutabilium est omnimoda immobilitas, ut constat ex præcedenti libro: Ergo, &c. Vide de Vera R. cap. 18. & 31. Ultimo; Quælibet mutatio aut substantialis est, aut accidentalis: In Deo non est mutatio substantialis, neque accidentalis; quia in Deo neque fuit quod jam non est, neque erit quod nondum fuit: Ergo nullus prorsus mutatio est in Deo. Vid. lib. vii. de Gen. ad lit. c. 19. & lib. ii. de lib. arb. cap. 16.

Opp. 1. Deus iræ, pœnitudini, ceterisque passionibus animi subjicitur. Est igitur aliquibus obnoxius mutationibus. Pr. ant. Genes. vi. 6. *Pœnituit eum quod hominem fecisset in terra. Et tacuit dolore cordis intrinsecus, Delebo* (inquit) *hominem, quem creavi*. &c. Imo posteaquam diluvio omnem fere carnem perdiderat, facti pœnitens ait Gen. vii. 21. *Nequaquam ultra maledicam terræ propter homines. De ira Dei vide Hierem. ix. ab eo versu: Nunquid super his non visito,*

tabo, &c. Furorem quoque Dei Psal. cv. 40. *Et iratus est furore Dominus*, atque alibi sæpe numero. Tristitiam animi tribuit Deo Esaias lxxv. 10. dicens *Afflixerunt Spiritum Sancti ejus*. Quid? Et zelotypiam suam testatur Deus Exodi xx. 5. & innumeris aliis in locis. Percellitur ergo omni passionum genere divinus animus.

Resp. nego ant. ad probat. dico tribui Deo pœnitentiam, omnesque humanas affectiones metaphorice, idest: *Dei pœnitentia non est post errorem, sed rerum in ejus potestate constitutarum mutatio*. Ubi enim legitur quod pœniteat Deum, mutatio rerum significatur, immutabili præscientia manente divina; & ubi non pœnitere dicitur, non mutare intelligitur; ait S. P. xvi. 1. de Civit. Dei cap. 7. Est ergo Dei pœnitudo aut inflectionis pœnarum, aut divinæ commiserationis significatio. De ira Dei idem Augustinus scribit in Ench. ad Laurent. cap. 33. *Cum Deus irasci dicitur, non ejus significatur perturbatio, qualis est in animo irascentis hominis: sed ex humanis motibus translato vocabulo, vindicta ejus quæ nonnisi justa est, iræ nomen accepit*. De furore Domini in præfatum Psalm. cv. n. 32. ait: *Noluerunt quidam interpretes nostri iram ponere, in eo quod Græcus habet θυμῷ: sed quidam posuerunt, quidam vero indignationem, quidam animum interpretati sunt*. Quodlibet autem horum dicatur, perturbatio non cadit in Deum; sed de consuetudine translatus potentia vindicandi hoc nomen accepit. Vocabulum græcum θυμῷ non iram solum, sed & mentis velocitatem, animositatemque designat. Irritari Spiritum Sanctum apud Esaiam lxxv. maxima est execratio impletatis. Ipse Gentilis Seneca de contritione spiritus scripsit Epist. xli. *Ita dico, Lucili, Sacer intra nos spiritus sedet bonorum, malorumque nostrorum observator, & castos: hic prout a nobis tractatus est, ita nos ipse tractat*. Dei zelotypia nunc honoris sui curam, nunc vero ardentissimam innuit erga nos dilectionem. Igitur Deus, ut Augustinus ait lib. 1. contra Adim. cap. 20. *Quando eum pœnitet, non movetur & mutat: quando irascitur non movetur, & vendicat: quando miseretur, non dolet & liberat; & quando zelat, non cruciatur & cruciat*. Quorum omnium ratio theologica est, quod omnia quæ dicuntur de Deo sunt, ut diximus cap. præc. affectiones mentis nostræ, & mutabilium connotationes effectuum.

Dices: ira & motum animi importat, & perturbationem: licet perturbatio non fit in Deo, est tamen motus animi, dicente Tertulliano in 1. adversus Marcionem cap. 26. *Stupidissimum esse, qui non offenditur factis, quod non amat fieri*.

Resp. neque motu animi, neque perturbatione tangi divinum nomen. Tertullianum illum tribuere signo tenus atque efficientia putat Pameliæ in notis: utrumque Deo assignare censuit Petavius lib. 3. cap. 11. num. xv. Parùm refert quid asserat Tertullianus, reclamantibus contra universis.

Opp. 2.

Opp. 2. Quos Deus volebat salvos fieri, mutato consilio reprobabat, damnat, addicit gehennæ propter perpetrata ab his crimina: Ergo hominum scelera divinam immutant voluntatem.

Resp. dist. ant. Volebat salvos fieri, ipsis volentibus, & ejus obtemperantibus legi, concedo: ipsis nolentibus, ac renitentibus gratiæ, nego. *Aspernanti, fugienti que infundenda in gremium est divinæ benevolentia gratia? Nulli Deus infert necessitatem, imperiosa formidine nullum terret: neque enim necessaria nostra illi salus est; inquit adversus Gentes Arnobius. Sed de Divina voluntate in V. Opuſculorum iſtorum libro.*

Opp. 3. Ante productionem mundi Deus non erat creator, non erat Dominus, non erat creaturarum rector ac pater; post mundi vero creationem hæc omnes denominationes illi advenerunt: Ergo in mundi productione mutatus est.

Resp. Ea quæ dicuntur de Deo alia dici secundum se, alia connotative. In iis quæ connotative dicuntur, ut nova accedat denominatio, sufficit si solus terminus commutetur. Habemus exemplum in singulis relativis, & singulare quoddam in nummo, qui indemutatus fit pretium, fit pignus: de quo lege Augustinum in V. de Trinitate cap. 16. Dist. itaque minorem: Post mundi productionem advenerunt Deo hæc denominationes, quæ sunt secundum se, & absolutæ, nego; quæ sunt solum connotativæ atque extrinsecæ, concedo. Vide & Tertullianum cap. 3. adversus Hermogenem, & quæ breviter prænotavi in 1. hujus libri explicans V. 11. Dei nomen אֱלֹהִים *Adonai*.

Si autem infurgas: Hæc denominationes acceſſerunt Deo ratione creationis, quæ est ejusdem Dei operatio: Atqui hæc operatio perfecta est in tempore: Ergo in tempore advenit Deo, quod non habebat ab æterno, videlicet quod sit creator;

Adhibenda est eadem responsio: Dist. minorem: In tempore perfecta est creatio terminative accepta, & quantum spectat ad productionem rerum creatarum, concedo: considerata ex parte Dei Creatoris, nego. Non debemus Deum modulo nostro metiri. In nobis distinguuntur consilium, voluntas, & operatio: est enim aliquando sine consilio voluntas, sine operatione consilium. Hæc tria in Deo ob perfectissimam simplicitatem sunt idem, neque potest consistere unum absque altero. Quemadmodum ergo intelligimus opus perfici in tempore a sempiterno consilio, ita debemus asserere effici temporaliter æterna ac immutabili operatione; ita ut mutabilitas tota rei, quæ perficitur, sit permixta. Ut lineæ productæ a centro ad circumferentiam circuli, si spectentur in centro, sunt singulæ punctum indivisibile; si in circumferentia, spatium intercipiunt, & eo amplius, quo magis effluunt a centro: ita omnia Dei opera, si ea in creaturis metimur, distant invicem ac mutantur, si in centro æternitatis, a quo profluunt, incommutabiliter permanent,

manent, nec ab invicem divelluntur. Vide quæ tradit duodecimo libro de Civitate Dei cap. 17. magnus Theologorum dux Augustinus. Si quæ sunt alia, quæ contra Dei immutabilitatem possunt opponi, E. G. divina libertas, æterni Verbi incarnatio, concordia humani arbitrii cum Dei prædefinitionibus, tametsi dirimi possunt ex dictis, suo quæque loco expendentur.

C A P U T V.

Quod solus Deus propriam habeat eternitatem.

DUAS vera æternitas habet dotes: unam, quod caret principio ac fine; alteram, quod omnem excludit successionem. Desinitur a Boetio: *Tota simul ac perfecta interminabilis vitæ possessio*, idest, duratio permanens & expers successionis in substantia spiritali ac vivente. Prout æternitas utramque dotem complectitur soli Deo, nullo mortalium contradicente, creditur convenire: idque demonstrabo priori hujus capituli propositione. At quatenus æternitas *perpetuum esse* designat, & *carere* durationis principio, quo sensu dicitur a Græcis *ΑΙΩΝ*, *Æon*, quasi *αἰς ὁ*, quod *semper est*, competit quidem Deo; sed quædam præter Deum hanc proprietatem tenere, imperiti improbique homines delirarunt. Nam aliqui etiam e secta Platoniorum Mundum crediderunt extitisse ab æterno, non intelligentes quomodo prima causa tanto sæculorum intervallo ab universi molitione cessaverit; alii materiam saltem existimaverunt sempiternam, ut impius ille Hermogenes, cui diem indixit Tertullianus. De his autem, quoniam ad mundi structuram attinent, agam libro XI. Refutandi sunt tamen hoc loco nonnulli, qui nescio quos *Æonas* ab Ecclesiæ incunabilis commenti sunt, & Græculi quidam Monachi increatæ lucis a Deo diffusæ, & ab ipsius separatæ substantiæ, insipientes ac superbissimi jactatores.

Æonum fabulam Hesiodæo more finxit circa annum Christi CXX, imperante Hadriano, Valentinus quem Epiphanius Hæresi xxxi. 2. vocat Phreboniten, recentiores Critici Ptenethiten, e patria maritima, prope Bolbiticum ostium. In Aegypto primùm errorem sparsit, deinde Romæ, quo adventasse creditur anno Ch. AERÆ CXXI. 1. Statuit in Pleromate, seu plenitudine divinitatis xxx. Æonas, quos in Ogdoadem, Decadem, & Duodecadem partiti sunt. In Ogdoade priorem tenet locum Deus inconspicuus ac princeps Æonum; quem vocabat *ἡ ἀρχὴ*, *ἀρχή*, ἢ *ἀρχὴ*, *Ante principium*, *Ante patrem*, & *Fundum*: cui conjugem dabat *ἡ σιγή*, *ἡ σιγή*, ἢ *ἡ σιγή*, *Mentem*, *silentium*, & *Gratiam*. Hæc a Bytho grævida enixa est *ἡ* ἢ *ἡ*, *Mentem* & *Veritatem*: Hinc procreati *ἡ* *ἡ*, *ἡ*, *Sermo*, & *vita*: ab his *ἡ* *ἡ*, ἢ *ἡ*.

ἢ Ἑλλαντία, *Homo*, & *Ecclesia*. En Valentiniana Ogdoas; in qua prima tetras, nempe Bythos, Ἄννα, Nus, & Alethia peperit alteram, Verbum, Vitam, hominem, & Ecclesiam. Ab hac posteriore Tetrade orta est Decas, & Duodecas Aeonum: decas quidem a *Verbo* & *vita*; duodecas ab *homine*, & *Ecclesia*. Filii itaque *Sermonis* ac *vita* sunt decem Aeonæ Βῶδις, Μίξις, Ἀγάπη, ἔνθεσις, Αὐτοπῆς, Ἡδονή, Αἰνῆσις, Σύγκρισις, Μονογενής, Μακάριος, *Profundum*, *Mixtio*, *Non-Senescens*, *Unio*, *Personascens*, *Voluptas*, *Immobilis*, *Concretio*, *Unigenitus*, & *Beata*. Duodecas progenita ab *homine* & *Ecclesia* hæc est: Παράκλησις, Πίστις, Πατρωνίς, Ἐλπίς, Ματρωνίς, Ἀγάπη, Ἀντις, Σύνεσις, Ἑλληνογενής, Μακαρίτης, Θωπῆς, Σοφία, *Consolator*, *Fides*, *Paternus*, *Spes*, *Maternus*, *Caritas*, *Semper-mens*, *Prudentia*, *Ecclesiasticus*, *Felicitas*, *Voluntarius*, *Sapientia*. Hos triginta Aeonas complectitur Valentinianum *πλῆρμα*, idest *plenitudo*: de quibus vide Irenæum, Tertullianum, & Epiphanium, necnon Natalem Alex. Hist. Eccl. Sæc. II. cap. 2. Art. VI. Massuetum quoque Dissert. I. art. I. Cum tam absurda sit Valentini fabulosa hæresis, habuit tamen qui eundem fuisse Orthodoxum contenderit, Fœditum Abbatem, qui edidit Dilucidationem Doctrinæ, & Historiæ priorum sæculorum.

Alterius erroris auctor fuit conventus Monachorum, qui in monte Atho prope Thessalonicam dicti *Quiescentes* gloriabantur omnes, qui in eo vitæ genere exercebantur divinum lumen conspiciere ab æterno a divinitate diffusum, quale Christo in monte Thabor putabant circumfulsisse. Quorum deliramenta detexit, & confutavit Barlaamus Monachus, qui ex Italia Byzantium venerat, & aliquandiu cum *Quiescentibus* versatus fuerat; unde adversarium habuit Gregorium Palamam, primo illius instituti professorem, deinde Thessalonicensium Episcopum. Fuit Barlaamus natione Calaber, ut scribit Jo. Cantacuzenus lib. II. cap. 39. & Georgius Phranza lib. I. cap. XI. & ex Italia Constantinopolim adiit imperante Andronico Juniore, qui contra Avum conspirans imperium arripuit an. 1328. stetitque e partibus Barlaami Gregorius Acindynus, & Joannes Chrysoloras, ut narrat citato loco Phranza. Hunc Chrysoloram putant plurimi etiam primæ notæ Scriptores esse Emmanuelem illum, qui regnante Bonifacio IX. Venetiis, Florentiæ, Romæ, ac Ticini Græcas literas tradidit, Leonardi Bruni Arretini, Raphaelis Volateranni, Pauli Jovii, Baptistæ Platinae, aliorumque Historicorum testimonio celebratissimum. At cum Emmanuel Chrysoloras, cui plurimum debet Italia, decesserit in Constantienfi Concilio mense Aprili ann. 1415., honestatus elegantissima oratione Poggii Florentini ejus discipuli, & de Historia benemeriti, contentio autem cum Barlaamo contingerit vivente ac imperante Andronico, qui obiit anno 1341., puto hunc a priori Chrysolora esse diversum; non enim adolescentulus cum Palama disputasset, neque tanta ætate gratus

tus memoratæ Synodo interfuisse: præsertim cum nominum habeatur diversitas, & unius Chrysoloræ ad alterum recitentur Epistolæ. Fuerit ergo Joannes Chrysoloras senior Emmanuele. Barlaamum pertinaciæ, malevolentiae, & popularis gloriæ cupiditatis redarguit Nicephorus Gregoras lib. Hist. xi. ejusque argumenta veluti araneorum telas discussa a Palama scribit citato loco Phranza: sed Gregoras paullo ante virum dixerat sacris dogmatibus eruditum; & postea mutata sententia Constantinopolitanam Pseudosynodum, quæ Barlaamum damnaverant, post ejus in Italiam reditum, decem libris impugnavit. Phranzes eundem Barlaamum fatetur disertum & eloquentem, & Joannes Cantacuzenus acutum & perspicacem, libro Hist. ii. cap. 39., licet Cantacuzenus Palamitarum fabulas approbet. Hæc addidi ad horum Græcorum historiam, quam ornate refert Petavius lib. i. Th. Dogmatum cap. xi., cum Jacobus Gretserus vir & ipse eruditissimus adnotat. in cap. præcitatum Cantacuzeni animadvertat hanc controversiam historiamque fuisse Latinis Scriptoribus propemodum ignotam.

Et ne sub magnis nominibus errandi tribuatur occasio, quod recte cautum facit vir disertissimus Lamindus Pritanius prope finem librorum de ingeniorum moderatione; falsum est omnino affinem esse Palamitarum dellris Augustinum Steuchum, etiamsi id asserant plures, & idem Petavius lib. iii. cap. v. n. iii., & Possevinus in Apparatu pag. 147. Nam Steuchus, quamquam haud scite cælum empyreum, & claritatem cælestis regni increatam, & a divinitate emanantem nuncupavit; affirmat tamen hanc lucem ac regnum eandem esse divinitatem. Ait enim in libro de rebus incorporeis & invisibilibus de hoc cælo ac regno: *Hoc est divinitas, hoc regnum Patris, & Sanctissima Trinitatis*, & post pauca: *Quod cælum etiam eodem modo Paulus vocat lucem inaccessibilem, eamque dicit a Patre inhabitari, nimirum a se ipso manantem, non alienam a se*. Vocat ibidem hanc lucem, & regnum: *increatum, incorruptibile, inalterabile, immutabile*. Atque initio Cosmopæjæ pag. 3. probat nihil prorsus potuisse ab æterno consistere distinctum a Deo his verbis: *Ubi est æternitas semper item est existendi vigor ac potestas, quæ sola in Deo est; & tanta est hæc divinitas & potestas, ut alteri etiam ab ipso Deo non possit conservari*. Quapropter si Eugubinus hanc lucem appellat æternam, si affirmat non esse alienam a Deo, si asserit esse ipsam Patris divinitatem; non existimavit emanare a Deo in sensu Palamitarum, sed quemadmodum nos communiter dicimus emanare a Dei substantia ejus proprietates, ratione nimirum nostra, non distinctione reali. Neque obstat Eugubinum asserere, non facile dictum an hæc lux corporea sit, an incorporea, & hanc esse Olympum poetarum; benigne enim exponendus est, non quasi corpoream suspicatus sit, aut locum extensum: sed quod ea lux corporalia ac spiritualia superemineat, & sit ipsa beatorum spirituum sempi-

sempiterna felicitas. Quod declarant ipsius Eugubini proxima verba, *Hæc lux manat duntaxat a Deo, quæ cum sit lux divinitatis ejus, semper cum eo fuisse necesse est. Et hæc si calum Empyrium est, semper ab æterno fuit calum Empyrium, idest immensa lux divinitatis, beatissimum illud quod est supra calum, quod appellare non audeo. Nam neque locus est, neque corpus, neque tempus.* Errant ergo, qui putant Steuchum Palamitarum nugis ineptire, & gerris Manichæorum tradere consentanea: quæ dicta sint salvo judicio Petavii viri accuratissimi, & de Dogmatica Theologia præ ceteris optime meriti. Jam vero a Critica & Historia, quæ duo quanta potui brevitate expedivi, ad scita & assertiones me conféro.

PROPOSITIO I. Deus æternus est, nec potest ejus æternitate aliqua creatura potiri.

Demonstro priorem partem divinis Scripturis: Deuteronomii xxxi. 40. habetur: *Vivo ego in æternum.* Ps. ix. 8. *Dominus in æternum permanet.* Dan. vii. 14. *Potestas ejus potestas æterna.* Ad Hebr. i. 11. *Ipsi peribunt, tu autem permanes.* In his autem advertendum est, quod etsi Deo tribuuntur anni, sæcula, & vicissim rebus temporalibus æternitas, & ipsum etiam hæbraicum *חַיִּים Holam*; dicuntur tamen de Deo cum quadam emphasi, quæ nulla ratione ceteris potest convenire. De annis namque illius dicitur Ps. cxl. 28. *Tu autem idem ipse es, & anni tui non deficient.* De sæculis, & *חַיִּים Psalm.* lxxxix. *מְעוֹלָם מְעוֹלָם*: *A sæculo usque in sæculum tu es Deus*: hoc est, quodcumque pertranseat sæculum, tu semper idem immutabiliter permanes.

Idem docent unanimiter Patres. Tert. in 2. contra Marcionem: *Viva, & germana divinitas nec de novitate nec de vetustate censetur. Deus si est vetus non erit; si est novus non fuit.* &c. Nazianzenus Orat. lxxxviii. *Deus & erat semper, & est, & erit: vel, ut rectius loquar, semper est.* Aug. ix. Confess. 10. *Fuisse & futurum esse non est in eo, sed esse solum.* Ita omnes alii. Quibus cum discipulorum suorum grege subscribunt Socrates, Plato, Parmenides, Euripides, & Thales; qui hanc Dei tradit definitionem: *Deus est quod caret principio ac fine, omnium rerum antiquissimum, & nunquam genitum.*

Magni Augustini argumenta hæc sunt; Primum in lib. de nat. Boni cap. 39. *Quidquid est immutabile debet esse æternum; nam si non caret principio mutatur de non esse ad esse, si non caret fine mutatur de esse ad non esse: Deus est prorsus incommutabilis: Ergo Deus est æternus.* Alterum in lib. vii. de Gen. ad lit. cap. 26. *Nullum excogitari potest intervallum ac spatium, quo circumscripta sit Dei immensitas. igitur nequit concipi tempus aut sæculum, quo sit definita Dei permanentia.* Tertium in lib. iv. Confess. cap. 10. *Deus est summa animæ beatitudo, in qua dolere non potest neque affici desiderio aut timore.* At-

To. I.

Y

qui

quæ anima aut dolet, aut desiderat, aut timet, quotiescunque figitur voluptate in bono, quod oritur, definit, ac perficitur: Ergo Deus est bonum sempiternum, in quo nihil incipit, nihil cessat, nihil crescit. Huc spectant quæ de aliis attributis dicta fuerunt: unum etenim ex alio consequitur.

Probatur 2. pars. Aeternitas Dei est interminabilis vita quantum ad existentiam & operationem omnino immutabilis: Immutabilitas nullo pacto rei creatæ potest competere: Ergo nullo pacto creaturæ competere potest Dei æternitas. Hinc habes recte Boetium lib. v. de Conf. Prosa v. 1. asserere, quod etiamsi mundus non habuisset initium, ut quibusdam philosophis visum est, nihilominus non fuisset Deo coæternus. Nam mutationi esset subiectus, & temporis pateretur vicissitudinem: Habes etiam quo sensu Patres mortalem quandoque scribant rationalem animam: quia scilicet habet quidem non definentem vitam; sed in cognitione & amore mutatur, deficit, proficit. Vide Aug. in Ps. lxx. & Tract. xx. in Joannem. Paulus quoque 1. ad Tim. v. 16. ait de summo Deo: *Qui solus habet immortalitatem*. Nempe & a se, & omnino incommutabiliter. Lege Aug. lib. 1. contra Maximinum cap. 12.

Quod affirmant Scholastici æternitatem esse mensuram durationis divinæ, accipiendum est de mensura improprie, & secundum rationem nostram accepta, ut scite animadvertit Magister Florez Tract. 1. 1. quæst. 2. Art. 6. §. 2. num. 12. Non enim duratio ab æternitate, & æternitas a Dei substantia distinguitur, sed idem sunt penitus; ut ait S. P. Enarrat. 2. in Psalm. c1. n. 10. *Non enim aliud anni Dei & aliud ipse: sed anni Dei æternitas Dei est: æternitas ipsa Dei substantia est, quæ nihil habet mutabile, &c.*

PROPOSITIO II. Jure ac merito Valentiniana Aeonum fabula exploditur.

Afferam quasdam demonstrationes præter eas xv. quas ex Irenæo collegit Natalis Alex. differt. xv. 2. sæculi art. 1. quas tamen vide. Sit 1. Aeonæ Valentini, sive ab Hebræorum Kabalis, ut putat Joannes Franciscus Budæus in differt. de hac hæresi, & Salomon Glassius De posteriori Kab. membro, vel, ut probat doctissimus Renatus Massuet differt. 1. pag. xx. & seq. ex Chaldæorum Theologia, atque ex Pythagorica Quaternatione habuerunt originem: Sed Kabala est elementaria Scripturarum expositio, literarum aut numerorum pro libitu permutatio, inconstans, atque ut plurimum superstitionis; Chaldæorum vero Theologia, ac Pythagoræ quaternitas ex idololatriæ semine germinavit: Ergo explodenda est Aeonum fabula impuris his fontibus derivata. II. Aeonæ aut sunt affectiones ac motus unius Dei ab essentia divina distincti, ut videtur eos cogitasse Valentinus, aut personæ ejusdem divinitatis, ut commentus est Ptolomæus, de quo Tertull. lib. adv. Valentinum XIV. Non primum, quia summus Deus non est mutabilis, & affectionibus adventitiis obnoxius; non secundum, quia inter Aeonæ solus Nus est præ-

stantissimus, totamque Bythi complectitur magnitudinem, Personæ autem ejusdem divinitatis æqualem habere debent perfectionem. Oportet ergo ut omnes Aeonēs sint procreati, ideoque non erit, neque Axinitus, neque Aeonus, neque Autophnes. III. Bythus & Antepincipium debet habere ante generationem Nou vitam, prudentiam, felicitatem, beatitudinem; non sunt ergo progenitæ post conjugium Nou, Zoe, Synesis, Machariotes. IV. Aeonēs aut sunt spirituales, aut corporei: Si corporei, non ergo spectant ad pleroma intelligibilia: si spirituales, quomodo est inter Aeonēs Syngrasis, Mixis, Enosis? quomodo Sophia fere absorpta fuit? quomodo sine corpore sexuum distinctio, connubia, generationes? V. *Acbamoth*, quam Valentinus dicit filiam Sophiæ, & extra Plenitudinem collocat, & eadem *Sophia* Synonima sunt; atque unum græcum est, scilicet *Σοφία Sophia*, alterum hebraicum, idest *חכמה Achamoth*; & utrumque significat sapientiam: Alethias, Logos, Synesis ad unam spectant facultatem intelligendi; Pistis, Agape, Elpis sunt nomina virtutum eidem spiritui convenientium; quare ergo finguntur Aeonēs, aut saltem ab iisdem parentibus non gignuntur? Hæc ego addo ad argumenta Irenæi, quæ validiora sunt quidem; sed requirunt notitiam totius systematis Valentiniani, cujus Aeonum fabula est una tantum pars, & alia superest Enthymesis, ac tertia de Operibus Demiurgi: quæ sunt forsitan adolescentibus, quibus hæc conscribo, adhuc ignota. At argumentationes istæ, si conseras cum nominibus propriis Aeonum supra expositis, erunt vel rudioribus satis obviæ.

Oppones: Aeonas a filio Dei progenitos ac procreatos affirmat divina Scriptura, confirmant testimonia Patrum, corroborat Kabalistica ars: Non est ergo undequaque fabulosum Valentinianum systema. Ant. probatur; nam in Epist. ad Hebræos cap. 1. 2. ubi nos legimus: *Per quem fecit & sacula*, habent Græci codices, *δι' ὃς καὶ τὰς αἰῶνας ἐποίησεν*, *Per quem & Aeonas condidit*. Et cap. x1. 3. ubi nos legimus: *Fide intelligimus aptata esse sacula verbo Dei, ut ex invisibilibus visibilia fierent*, habent Græci, *πίστιν νοῦν καὶ καταρτίσαν τὰς αἰῶνας ὁμοιωτὶ θεῷ, οἷς τὸ μὴ ἐν φανερῷ τὰ ἀφανήματα γέγονεν*, *Fide intelligimus aptatos esse Aeonas sermone Dei, ut ex non apparentibus visibilia fierent*. Aeonēs itaque ex Nu ac Logo fuerunt progeniti, ut corporalia conderentur secundum ideam Aeonum invisibilium existentium in Pleromate. Nec dissentiunt Patres. Gregorius enim Nyssenus in 1. contra Eunomium scribit: *Sæculi Conditorum Αἰῶνες, & qui in eis est locum antea constituisse, in iis vero omnia deinceps procreasse*. Quod numerorum comprobatur ratio, siquidem xxx. Aeonēs in annis Christi, x11. in Apostolis fuerunt designati, quorum duodecim Judas proditor & apostata *Sophiam* invadam ac suo loco dejectam figurabat. Scripturis itaque, Patribus, & Kabalæ videtur Valentini systema consentaneum.

Resp. nego ant. Ad argumentum ex Epistola Pauli ad Hebræos facilis

cilis est responsio, si dicamus Aeonas conditos *μεταγεννητους*, *metonymice*, & per enallagen numeri, ut dicimus creatum tempus ætatemque rerum corporearum. Aeon quippe non est res aliqua quæ per se subsistat, sed vita rerum intelligibilium. Ita Damascenus lib. 2. de Fide Orth. cap. 1. Possumus quoque priorem textum ita exponere, *Per quem creavit & mundum*; quum Hebraice sit, *ובה עבר לעלמא*. Possumus & asserere significari a Paulo Christum esse Messiam, cujus gratia dicebant Hebræi fuisse creata universa; quandoquidem particula *אז* cum genitivo interdum valet *propter*. Alter vero textus significat tantummodo in ordinem fuisse digestas jussu ac verbo Dei mundi partes, & conditas ex non extantibus, cum essent olim in Verbo Dei invisibilia, quemadmodum sunt opera in mente Artificis. Gregorium Nyssenum minus proprie & accurate locutum scribit Petavius lib. III. cap. v. 8. Sed mihi videtur id solum velle, quod Deus principio Aeonas & universum condiderit tantquam conceptaculum rerum visibilium, quia in principio condidit Mundum & Angelos, sed terra erat inanis & vacua; quam postea singularum creaturarum generibus exornavit. In quo nihil est non accuratum, non proprium. Kabalisticæ Valentinianorum argutiunculæ flocci sunt faciendæ; tamen si Christus vixisset xxx. annos, quod est alienum a vero: explevit enim xxxiii.; atque his annis male aliquot detrahuntur, male superadduntur a pluribus Recentioribus, ut ostendam opportunius. In Juda damnato ac perduto homine male designatur Sophia, cujus interitum Horus a Bytho & Sige genitus extra Pleroma impedivit. Cum a Verbo decem fuerint geniti Aeonas, quare non sunt pares huic numero Apostoli? aut quare duodecim Aeonis non addidit Valentinus LXXII. alios numero pares discipulorum? Sed mitto jure ab Irenæo ac Tertulliano irrisas fabulas.

PROPOSITIO III. Fictitium est lumen illud increatum ac sempiternum, in quo Græci Palamitæ jactabant se Deum videre.

Facillime demonstratur argumentatione Joannis Cyparisioti Decade VI. Ejusmodi lux, quæ beatorum corpora circumfulget, ut Græculi isti contendunt, est defluxio & energia manans a divina substantia: Fictitia est defluxio, & energia manans a divina substantia, quæ sit improducta, sempiterna, & distinguatur a divinitate; non enim diversa est Dei natura ab ejus proprietatibus & operationibus: Ergo fictitia est illa lux æterna, & defluens a divina substantia, & quæ ab ea distinguitur. Confimile est argumentum Barlaami, de quo Joannes Cantacuzenus lib. II. cap. 39. Nihil inter Deum & creaturam potest excogitari; nam quidquid est, aut est a se, aut productum ab alio: si est a se, Deus est; si ab alio productum, creatura est: Igitur stultissimæ mentis figmentum erit illa lux sempiterna, increata, & tamen a divinitate distincta. An vero in eo lumine ac defluxione, si daretur, videri posset divina Essentia, videbitur in eo libro, qui proxime ad istum consequetur.

Dices:

Dices : Meminit increatæ hujus lucis Basiliius Hom. 1. in Hexam.

Resp. arcanam , & inaccessibleam lucem divinitatis , quam Basiliius commemorat , esse eandem divinitatem , & sempiternum Dei filium ; de quo ipse Basiliius lib. 1v. contra Eunomium cap. 1. *Filius* , inquit , *cum splendor sit , non aliquando erit , sed est coæternaliter . Lux enim est Deus , ut David inquit , In lumine tuo videbimus lumen , & Daniel , Lux cum ipso est .* Itaque Basiliius lucem illam sempiternam ac splendorem Dei , cujus meminit Hom. 1. in Hexam. , non aliam intelligit præter ipsum Deum , & Unigenitum procedentem a Patre .

C A P U T VI.

*De infinita potentia Dei , & de iis quæ ad hanc
evertendam possent adduci .*

RABSAÇES , quem legis suæ desertorem Hebræi putant , eo quod hebraice loqueretur , & ad ejus maledica verba Ezechias sciderit vestimenta , adeo infirmum aiebat esse Dominum Deum Israel , ut non posset liberare Jerusalem de manu Regis Assyriorum . Populares ipsi Judæi in solitudine ausi sunt contra Omnipotentem in hanc blasphemiam erumpere : *Nanquid poteris Dominum parare mensam in deserto ?* Ps. lxxvii. In eo quippe detinebantur errore , quod & Dii essent alii apud Gentes , & unus ille , quem colebant , non haberet ubique maximam potestatem . At Deus manifestam reddidit potentiam suam statim post Rabfacis blasphemiam percuciens centum octoginta quinque millia in castris Sennacheribi ; & contra murmurantes Hebræos , pluentibus cælis manna , & aquis de petra fluentibus saluberrimis . De Manichæis jam dictum supra , Deum bonum tam fecisse impotentem , ut non posset malum avertere . De Petro denique Abaelardo scribit Epist. 190. S. Bernardus , soli Patri plenissimam tribuisse potentiam , aliquam tantum Filio , nullam penitus Spiritui Sancto , contra apertissimam divinarum scripturarum ac Patrum auctoritatem . Ergo adversus horum deliramentum summa Dei potestas est comprobanda , necnon expedienda sunt dubia quædam , quæ a Theologis omnibus solent in hoc argumento promoveri .

PROPOSITIO I. Deus infinitam habet potentiam .

Ita sacra Biblia. Esther xlii. 12. *Domine rex Deorum , & universæ potestatis .* Job. xlii. 2. *Scio quia omnia potes .* Eccles. i. 8. *Unus est altissimus creator omnipotens , & Rex potens .* Matth. xix. 26. *Apud Deum omnia possibilia sunt .* Ita Patres : Cyrillus Catech. vii. Nyssenus lib. 1. contra Eunomium , Tertullianus de Resurrect. carnis cap. xi. Magnus Augustinus de Fide & Symbolo cap. 2. quorum , aliorumque loca

loca vide apud Petavium lib. v. cap. v. Ita Gentiles Philosophi ac poetæ, quorum collegit dogmata Huetius lib. 2. Conc. c. 11. n. xx1.: unde merito S. P. ferm. cxxxix. de Temp. ait: *Non dico, da mihi Christianum, da mihi Judæum: sed da mihi paganum, idolorum cultorem, demonum servum qui non dicat Deum esse omnipotentem. Negare Christum potest, negare omnipotentem Deum non potest.* Ita demum Theologica ratio, quæ ex multis ab Augustino traditis sic depromitur: I. Deus est universæ opifex creaturæ: Ad creaturæ universæ opificium necessaria, est omnipotentia: Ergo omnis, plenissimaque potentia tribuenda est Deo: *Ex Sermone cxix. de tempore.* II. Magnam habet Imperator in regno suo potestatem, quia alia jubet, alia permittit: In amplissima, immensaque universæ creaturæ Republica nihil fieri potest quod a summo imperatore Deo, aut non jubeatur, aut non permittatur: Habet ergo Deus in omnia, quæ fieri possunt, plenissimam potestatem: *Ex lib. 111. de Trinit. cap. 4.* III. Ille est omnipotens, qui potest facere omnia, quæ fieri possunt: Ille potest facere omnia quæ fieri possunt qui semper & immutabiliter est: Ergo qui semper, & immutabiliter est, est Omnipotens. Pr. minor. Ex rebus omnibus quædam fuerunt, quædam sunt, quædam erunt, quædam sunt solum potentia: Igitur virtus producendi omnia est virtus quæ fuit, quæ est, quæ erit: At virtus quæ est, quæ fuit, quæ erit, est virtus summi Dei, qui semper & immutabiliter est: Ergo qui semper & immutabiliter est habet virtutem faciendi omnia, quæ fieri possunt: *Ex lib. xxvi. contra Faustum cap. 5.*

Ut facilius argumentis occurras, quæ possunt ex adverso proferri, animadvertite *Impossibile* aliquid dici posse multipliciter. Ac primo impossibile appellatur, ad quod pares vires non suppetunt, ut parvulus exercere nequit athletam, videre catulus, vivere perpetuo animal. Deinde appellatur impossibile, quod ut plurimum non fit, quo sensu ait Matth. v. 15. *Non potest civitas abscondi supra montem posita.* Tertio dicitur impossibile, quod rationi non est consentaneum, aut legi adversatur, ut Gen. 44. 22. *Non potest puer relinquere patrem suum.* Quarto vocatur Impossibile, a quo iusta de causa voluntas est aliena, ut Matth. x111., & Marc. vi. 5. *Et non poterat ibi virtutem ullam facere, propter incredulitatem eorum.* V. Impossibile nuncupatur, quod hominibus quidem est tale, non autem Deo, ut concipere virginem, hominem iterato nasci, & qualecunque miraculum perpetrare. Quum ergo dicimus nihil Deo esse impossibile, accipitur impossibile in primo secundo, ac postremo sensu, non in tertio, vel quarto: quippe certum est Deo plura non convenire, ut posse mori, posse peccare; pluraque fieri ab eo, aut prætermitti, quæ possent alias: pro ejus lubitu evenire. Atque rationem reddimus apertissimam; si enim Deus indecora ac prava posset efficere, non esset justus ac sanctus, sed deficiens ac impro-

improbis ; & consequenter repugnat Deum optimum maximum posse facere quæ rectæ adversantur rationi , & quæ a deficiente & infirma , non a potentissima causa dependent . Quod si non posset voluntate sua plura , quæ possibilia sunt , non efficere ; foret necessarium agens , non liberum , & facultate perfectissimi arbitrii careret .

Oppones 1. Deus non potest mori , non mentiri , non peccare , non facere quod res jam præterita non fuerit , non immutare , & evertere naturas rerum . Ergo non potest omnia .

Resp. nego consequentiam . Quæcunque enim memorata sunt nequaquam posse , non infirmitatis argumentum est , sed potentia , quod de singulis breviter quidem , sed ratione probaturus sum validissima . Quantum ad potentiam moriendi , optime respondet Estius dist. XLII. §. 2. ac Sylvius Q. XXV. art. IV. Deum dici omnipotentem secundum potentiam activam , & non secundum potentiam passivam , quæ est imperfectio consecratoria materiae : Atqui posse pati , mori , augeri , mutari , passionem , non actionem significant : Ergo nullatenus ad Dei spectant omnipotentiam . Ac Sylvius hæc acceperat a D. Thoma II. contra Gen. cap. 25. , cujus doctrinæ fidelissimus est interpres . Addo hæc primo tradidisse Augustinum , qui lib. V. de Civit. Dei cap. X. ait Deum esse omnipotentem *faciendo quicquid vult , non patiundo quæ non vult* . Et quidem si posse mori non imbecillitatis esset , sed potestatis ; nonne immortalis anima , atque Angelici Spiritus forent pecuditione , natisque ad corruptionem corporibus deteriores ? Vere itaque Deus est omnipotens , quia mori ac pati non potest ; nam quod patitur & moritur , impotens est .

Idem dicendum est de potentia fallendi ac peccandi . Quod primum ostendo , quoniam mendacium & peccatum non causam effectricem habent , sed deficientem , quum defectum importent ac privationem : deinde istam argumentationem propono : Sicut ens quod potest excidere ab ente , non est summum ens ; ita potentia , quæ potest excidere a veritate & a bonitate , non est summa potentia ; etenim summa potentia est summum ens , & veritas pariter ac bonitas sunt aliquid ens : Atqui posse mentiri , & posse peccare , est posse excidere a veritate , & bonitate : Ergo posse mentiri & peccare non est summa Potentia . Quapropter S. P. ferm. CIX. de Temp. inquit : *Non potest mori , non potest peccare , non potest mentiri , non potest falli : tanta non potest , quia si posset , non esset omnipotens* . Idem habet lib. V. de Civit. Dei citato loco , & ferm. de Symb. ad Catech. cap. X. Neque dicas , hæc nullam importare contradictionem , quum homo & fallatur , & mentiat , & moriatur : confestim enim repono , equidem non implicare si conferantur cum creatura , quæ potentiam habet passivam , & deficere potest ab esse ; at non ita est , si comparentur cum summa potentia , quæ nulla ratione , ut dixi , ab ullo esse potest excidere .

De

De rebus præteritis non una est Theologorum sententia. Nam S. Petrus Damian. Opusc. xxxvi. nititur probare, quod Deus omnipotens illud quoque possit efficere, ut compressa virgo non sit compressa. Ita docet Gilbertus Porretanus in lib. de Trinit. & Guilelm. Antiochod. in Summa: quibus subscribit Gregorius noster Arimin. dist. xlii. art. 2. quæst. i. quamquam Frid. Gavardi affirmet Gregorium instituere disputationem de re præterita non *reduplicative*, & in sensu composito, nempe prout sub præteritione consistit, sed in sensu diviso, & præteritione præcisa: quo sensu quæstionem dirimit etiam Gaspar Juenin disert. iv. quæst. ix. cap. i. sed Theologi & numero & eruditione præcipui negant unanimiter spectare ad infinitam potentiam, ut efficere possit non fuisse, quæ fuerint. Neque in hac quæstione diutius immorabor: cum apertissime illam definiat S. Pater Augustinus lib. xxvi. contra Faustum cap. v. dicens: *Quisquis dicit, Si omnipotens est Deus, faciat ut quæ facta sunt, facta non fuerint; non videt hoc se dicere, Si omnipotens est, faciat, ut quæ vera sunt, eo ipso, quo vera sunt, falsa sint. Potest enim facere quod aliquod non sit quod erat, tunc enim facit ut non sit, quando id esse invenerit, de quo fiat; ut cum aliquem, qui capis esse nascendo, facit non esse moriendo, hoc enim factum invenit de quo fieret. Quis autem dicat, ut id quod jam non est, faciat non esse? Quidquid enim præteritum est, jam non est; quod si & de ipso fieri aliquid potest, adhuc est, de quo fiat.* In his autem Augustini verbis putant quidam, alioquin docti viri, aperte distingui duplex illud præteriti genus quod commemoravi, præcisa scilicet præteritione, & ea consistente. Sed ego hebes ingenio hanc discrepantiam non video: imo neque sine præteritione præteritum cogitare possum; quemadmodum sine humanitate hominem, sine productione rem productam, sine divinitate Deum nequeo aliqua ratione comprehendere. Quod si creaturam transactam, aut præsentem, aut futuram ab omni sejunxeris temporum differentia, non aliam mihi ideam suggeris, quam creaturæ; ad quam producendam validissimam esse potentiam Dei nemo potest rationabiliter dubitare. Dicendum ergo implicare, & a nullo hominum ratione prædito posse intelligi, nunquam fuisse quod fuit aliquando; neque in disputationem vertendum esse, num possint fieri quæcunque fieri non possunt. De quibus si lubet, ut sit interduum, raptis extra orbitas cavillari; nostratum manibus teruntur pro Ariminensis sententia argumentationes Hyacinthi Tonti Theologi atque Concionatoris clarissimi, ad cujus laudum cumulum parum posset accedere, si verborum delectum, & ingenii servasset severiorem moderationem.

Naturas autem rerum esse immutabiles fateor, si in ideis ac notionibus inspiciantur, sive ut Scholæ utamur vocabulis, in prædicatis essentialibus: non enim ita acceptæ sunt aliud, quam perceptiones animæ, quæ ad regulam exiguntur divini luminis & incommutabilis veritatis.

tatis . At si accipiantur ut existunt , & in rerum creaturarum serie constituantur ; quisquis illas diceret immutabiles , ipse naturas rerum perverteret . Etenim potest Deus aquam in vinum , in sanguinem , in vaporem ignis convertere , potest fuscitare de lapidibus filios Abraham , potest universi ordinem immutare : & fictitia est ac repugnans perceptio immutabilis creaturæ ; quæ eo ipso , quo creatura est , non potest non esse mutabilis .

Opp. 2. Dei potentia & Dei voluntas idem sunt , atque , ut Augustinus scribit cap. 96. Enchirid. , *Non ob aliud Deus veraciter vocatur omnipotens , nisi quoniam quidquid vult , potest* . Sed Deus non vult omnia : Igitur nec omnia potest .

Resp. Omnipotentiam , & voluntatem Dei esse idem realiter & in se , non autem connotative ; illa namque connotat omnia possibilia , hæc definita tantum , ac volita . Augustinus vero iccirco affirmat Deum esse omnipotentem , quoniam quidquid vult illud potest ; non quod Dei potentia concludatur voluntate , sed quod ex voluntate possit apertissime demonstrari . Nam si probatur creaturæ imbecillitas ex quo impediri possit quod ipsa vult ; probatur optime summa potentia Dei ex quo impediri non possit quod Deus vult : & propterea S. P. immediato ait : *Nec voluntate cuiuspiam creaturæ voluntatis omnipotentis impeditur effectus* . Habes in eodem Enchirid. libro cap. 95. hæc alia Augustini verba , quæ omnem tollunt dubitationem : *Tunc in clarissima luce , sapientia videbitur , quod nunc piorum fides habet , antequam manifesta cognitione videatur : quàm certa & immutabilis , & efficacissima sit voluntas Dei , quàm multa possit , & non velit , nihil autem velit quod non possit , quamque sit verum quod in Psalmo canitur , Deus autem non esset in cælo & in terra omnia quaecunque voluit fecit . Quod utique non est verum , si aliqua voluit & non fecit ; & quod est indignius , ideo non fecit , quoniam ne fieret quod volebat omnipotens , voluntas hominis impedivit* . Attamen ut plane proposita dubitatio expendatur , sit

PROPOSITIO II. Potest Deus plura facere , quæ non facit .

Spestat hæc prop. ad fidem , eamque defendunt Catholici omnes contra Abaelardum , & Wiclefium , quibus addit Estius Calvinum , qui tamen fatetur in lib. de vera Religione , posse Christum , si vellet , panem in suum corpus convertere ; ideoque ab hoc errore immunem fuisse putant Juénin dissert. IV. cap. 2. & Petavius lib. V. cap. 6. n. XVII. Calviniani tamen asserunt , quod revera natura rerum non patitur , ut panis substantia in corpus Christi convertatur ; & forte non est ubique sibi constans eorum antesignanus ; neque errat Estius , qui errorem Calvinii distinguit ab errore Wiclefi ; iste enim hoc nicitur fundamento , quod Deus agat necessitate naturæ ; Calvinus vero quod agat necessitate iustitiæ ac sapientiæ suæ , quæ non patiuntur res alio ordine fieri , quàm prout institutum est , etiamsi consequatur libertatis exitium , & peccandi

To. I.

Z

candi

candi necessitas. Præ ceteris hanc quæstionem pari eruditione, & copia dissolvunt Hugo Victorinus de Sacram. Fid. lib. 1. p. 2. cap. ultimo, Thomas Valdensis Tom. 1. lib. 1. art. 1. cap. 10. laudatus Estius Dist. 43. Petavius citato lib. v. cap. 6., Sylvius Quæst. xxv. art. 5. Greg. dist. xlii. quæst. 1. &c.

Atque probatur 1. Plura Deo possibilia esse divina narrat Scriptura, nec tamen usquam leguntur facta: Ergo præter ea, quæ facta sunt, potest Deus summe potens multa facere. Prob. ant. Sap. xi. 18. habetur: *Non enim impossibilis erat omnipotens manus tua, quæ creavit orbem terrarum ex materia inersa, immittere illis multitudinem urforum, aut audaces leones, aut novi generis ira plenas ignotas bestias, aut vaporem igniam spirantes.... Sed & sine his uno spiritu poterant occidi, persecutionem passi ab ipsis factis suis, & dispersi per spiritum virtutis tuæ: sed omnia in mensura & numero, & pondere disposuisti.* xi. Macchab. vii. 18. *Potest & venientes adversum nos, & universum mundum uno nutu delere.* Mat. xxi. 9. *Potens est Deus de lapidibus istis suscitare filios Abraham.* Ubi tamen lapides in Abraham filios commutandi figurato loquendi genere designant gentes ad fidem venturas, non tamen si literaliter accipiantur, excedunt divinæ potentie mensuram; quum Isaiæ li. 1. effecti Abrahami femur cavernæ ac lapidi comparetur: neque difficilior sit Deo hominem excidere ex lapide, quàm Isaac procreare ex infecundis, senibusque parentibus. Et cap. xxvi. 53. ita Christus Petrum alloquitur: *An putas, quia non possum rogare patrem meum, & exhibebit mihi modo plusquam duodecim legiones angelorum?* Ubi satis erat duodecim Angelos Apostolis comparare, vel unum ad perdendos hostes accerere: sed duodecim legiones nominavit ut Patris potentiam ostenderet. Porro neque immisit Dominus in Aegyptios urforum multitudinem aut leonum, neque nutu universum mundum delevit, neque suscitavit ex lapidibus filios Abraham, neque legiones Angelorum in sui defensionem adiecit: Narrat ergo divina Scriptura omnipotentem Dominum plurima posse, quæ nunquam perfecit.

Probatur 2. ex PP. inter quos Athanasius lib. iii. contra Arianos: *Poterat, inquit, etsi nunquam advenisset Christus, solummodo loqui Deus, & maledictionem solvere. Poterat etiam ab initio Salvator advenire, & cum advenit, non tradi Pilato.* Hieronymus in Comment. ad cap. 1. Isaiæ: *Qui sanctorum signorum patrator est, & cælum terrasque & maria suo facit servire nutui, etiam ipse crucem evadere potuit.* Pro omnibus sit Augustinus, qui in Opusc. ad Marcellinum cap. 1. ait: *Abstrudum tibi videtur dici, aliquid fieri posse, cujus desit exemplum: cum sicut credo non dubites, nunquam esse factum, ut per foramen acus camelus transiret; & tamen ille hoc quoque dixit Deo esse possibile: legas etiam duodecim (millia) legiones Angelorum pro Christo, ne patere-*
retur,

retur, pugnare potuisse, nec tamen factum: legas fieri potuisse, ut semel gentes exterminarentur a terra quæ debetur filiis Israel; Deum tamen id paullatim fieri voluisse; & alia sexcenta possunt occurrere, quæ fieri potuisse, vel posse fatemur, & eorum tamen exempla, quod facta sint, proferre nequeamus. Vide ejusdem libri cap. xxxv. De qua Augustiniana sententia scribit Petavius cit. loco n. x. peremptorium esse, & cum litem omnem quæstionemque dissolvere, tum subtiles quorundam nugæ & ineptias discutere.

Nec theologicæ defunt rationes; quarum sit prima: Cum omnes creaturæ simul finitæ sint, non potest earum productione exhaustiri infinita Creatoris potentia: Ergo præter ea, quæ creat & facit, nova semper, semperque creare potest, & facere. Altera: Si Deus non posset nisi quæ facit, ergo non potuit præservare Adam a transgressionem, nec Davidem ab adulterio, neque a perditione Saulem: non potuit emollire cor Pharaonis, convertere Achab, trahere Judam ad penitentiam: non potuit descendere de Cruce, non signum dare petentibus Scribis, non montem in medium maris transferre: quæ si veræ sunt, tollitur gratia, perit libertas, cessat meritum: & inevitabilis est rerum omnium eventus, excusabilis Phariseorum perveritas, necessaria reprobatorum malitia; quæ omnia quantum absurda sint, nemo est qui non videat. Postrema ratio hæc sit: Deus potest facere ut terra tremat, ut pluat manna, ut sistant se aquæ fluminum, ut tenebræ fiant super universam terram, ut scindantur petræ, & alia innumera, quæ fecit olim in diebus Moïsis, Josue, Ozæ, extremoque tempore mortis suæ; vel hæc patrare non potest: Si non potest; suam ergo perdidit omnipotentiam: Si potest; ergo potest aliqua, quæ non facit. Non enim renovantur modo prædicta, aliaque signa, quæ certum est præcessisse.

Opp. 1. Matth. xxvi. 39. ita Christus Patrem est adlocutus: *Si possibile est, transeat a me calix iste*: scilicet, subtrahe me, si fieri potest, ab imminente crucis supplicio: Atqui non transiit a Christo calix, neque cum Pater a teterrima morte subtraxit: Ergo erat id impossibile. At quare Pater filium non subtraxit a morte? Profecto quia pro humani generis salute eandem mortem decreverat. Est igitur impossibile quidquid Deus facere non decrevit, quidquid altissimæ sapientiæ suæ consilio non vult.

Resp. dist. cons. Ergo erat impossibile absolute, & impossibilitate primi generis, idest virium defectu, nego. Impossibilitate quarti generis, idest repugnante decreto, & voluntate Patris, concedo. Vide prænotata proposit. 1. Quando Christus ait: *Si possibile est, non dubitavit an posset Pater ipsum a morte subtrahere*; sunt enim apud Deum omnia possibilia, ut habetur Mat. xix. 26. sed ait, si possibile est ordinata potentia, consistente cum æterno decreto, quod perinde

est, ac si dixisset, *si vis*. Eximit omnem scrupulum Lucas xx i. 42. ita Christi orationem enarrans: *Pater, si vis, transfer calicem istum a me: Verumtamen non mea voluntas, sed tua fiat*. Quam responsum non soli tradunt Scholastici, & sacri Interpretes, verum & Grotius in hunc locum Commentario, quod propter hodiernos hæreticos dignum est ut producat. *Quomodo autem coheret conditio illa si vis, si possibile est, quam cum Matthæo etiam Marcus ponit, cum eo quod apud Marcum sequitur contra dicitur, omnia tibi possibilia sunt? Nimirum recurrendum hic est ad illam tritam in scholis distinctionem; ejus quod ad visum, impossibile, sit per se, & ejus quod ad voluntatem impossibile, sit hoc, vel illo posito. Nam per se nihil est Deo ad voluntatem impossibile, extra ea quæ sunt in semetipsis adversata repugnantia, aut quæ divina natura repugnant. At sensus est, si tua decreta ferant ut alio modo tuæ gloriæ, & hominum salutis æquè consulatur. Doctissimus Estius Comment. in loca difficiliora Scripturæ addit Christum non dixisse, Si possibile est tibi, quemadmodum pater habentis spiritum mutum apud Marcum ix. 21. ait, si quid potes, adjuva nos: quod utique aliqua videretur de divina potentia hæsitatio: sed ait Christus, Si possibile est, nempe, in se non repugnans propter paterni decreti consistentiam. Uno dicam verbo: Deus omnia potest absoluta potentia, non ordinata, & supposita voluntate; quæ non esset, si posset revocari, immutabilis.*

Opp. 2. Deus non potest facere nisi ea, quæ prævidit, nam si posset facere quæ non prævidit, posset absque providentia operari: Atqui prævidit ea sola, quæ facit: Ergo ea sola quæ facit, hæc potest.

Resp. eodem pacto dist. ma. potentia ordinata, & supposita præscientia, concedo: potentia absoluta, nego. Potest absolute Deus facere quicquid non repugnat; facit autem quod solum præcivit & præordinavit. Itaque ex præscientia ac providentia inferitur tantum ea non esse futura quæ non fuerunt prævisa, minime vero non esse possibilia: nam poterat Deus alia præordinare ac præscire. Vide loco cit. Victorinum. At forte inquit: Sapientia Dei est immutabilis: non ergo poterat Deus alia prævidere. Utique sapientia Dei est immutabilis, sed non est ad unum, vel alterum determinata. Dicitur de Deo sapientia, dicitur & præscientia: sapientia respectu omnium penitus rerum, præscientia respectu futurarum. Itaque sola præscientia quamdam habet in connotatis terminationem: at quatenus in Deo sunt, nullum est inter utramque discrimen: sed mutabilitas est penes solas creaturas, quæ ideo sunt futuræ quia sunt prævisæ; & poterant non esse futuræ, quia poterant non esse prævisæ, constante eadem providentia in eo ut non haberent, sicut modo in eo consistit ut fiant.

Opp. 3. Hieronymus Dialogo primo contra Pelag. affirmat, illud tantum esse possibile, quod est futurum.

Resp.

Resp. Hieronymum loqui de eo quod est possibile homini , contra Pelagianos , qui jactabant posse hominem vivere sine peccato ; & quos redarguit ex ipsa hominum imbecillitate satis experimento manifesta. Ceterum posse Deum tantam gratiam elargiri , si vellet , ut quilibet omne prorsus evitaret peccatum , qualem habuit Sanctissima Dei Genitrix , idem Hieronymus tradit lib. 2. contra Pelagianos cap. 6. laudatque Augustinum , qui idem affirmat lib. 2. de peccatorum meritis cap. 6. 14. & 17. Unde retorqueri potest argumentum : Potest Deus specialissimæ gratiæ beneficio hominem toto vitæ tempore ab omni prorsus peccato immunem reddere , nec tamen id præstat : Potest ergo præter ea , quæ actu exequitur , alia complura .

PROPOSITIO III. Potest Deus facere meliora iis , quæ fecit .

Sequitur ex dictis ; & probatur . I. Quia Apost. ad Eph. III. 20. ait Deum posse omnia facere præter ea quæ facta sunt hæcenus , & supra ea quæ possumus cogitare : *Potens est* , inquit , *omnia facere superabundanter quam petimus , & intelligimus* . Ubi in Græco codice habetur *τῶ δὲ δωρεῇ ὑμῶν πάντα πλεονεξῶν ὑμῶν ὑπερῶν* , &c. Repetitur particula *ὑμῶν super* , ac primo dicitur *ὑμῶν πάντα super omnia* , deinde ampliori auxilio *ὑμῶν ὑπερῶν* , *superabundanter* ; quorum primum refertur ad opera , alterum ad cogitationem nostram ; & consequenter ostenditur Deum posse & meliora his , quæ facta sunt , & meliora iis , quæ aut petere audeamus , aut cogitare .

Deinde probatur ex Patribus . Constat enim ex Augustino & Hieronymo , ut nuper diximus , posse Deum facere ut humana voluntas ope adjuvante divina in nullum prolabatur peccatum , ut immortalitate cum animæ , tum corporis rationalis creatura sit prædita ; atque , ut ait Dionysius VII. de divinis nominibus , infinitas virtutes ab iis , quæ jam conditæ sunt , in infinitum perfectiores producere . Quæ tamen omnia , ut admonui , intelligenda sunt juxta absolutam potentiam , non vero hac providentia supposita . Quis enim hoc statuto rerum ordine dubitet , quin providentissima majestas id effecerit , quod melius erat , & rectius ? Huc spectant omnes rationes superius productæ , præcipue quod nullo opere quantumvis perfecto ac mirabili infinita exauriri potest omnipotentia : & ea insuper , qua utitur S. Pater contra Manichæos 11. de Civit. Dei 22. quoniam si Deus optima quæque produceret , ut non posset addere meliora ; omnia a visibilibus usque ad invisibilia forent æqualia , & nil præter angelos vel homines procreasset .

Opp. 1. Ut asserit lib. LXXX. Quæst. 50. S. Pater , si Deus potuisset gignere Filium sibi æqualem , nec genuisset , fuisset invidus . Ergo si potuisset procreare meliora , nec procreasset , invidus pari ratione fuisset .

Resp. nego consequentiam ac paritatem : Aequalitas enim naturæ debetur filio , omnis enim generatio in naturæ similitudinem fieri debet ; & con-

& consequenter nequit pater, nisi invidus sit, filio suo perfectionem vel minimam denegare: quæ ratio de rebus creatis non militat, quibus nulla perfectio debetur, sed quæcumque habent, beneficium est ex liberalitate Conditoris. Præterea invidentia, quæ est odium felicitatis alienæ, ut eam definit S. P. in Psalm. c. 17. locum non habet in iis, qui nullum bonum vel malum possunt ex aliis capessere, neque in iis, qui maxime distant: ideoque non potest Deus esse invidus creaturis, quæ nihil possunt divinæ detrahare felicitati, atque immensum ab eo conditione ac dignitate recedunt.

Si dicas Augustinum in 4. de Gen. ad lit. cap. 16. eodem modo de Filio Dei, ac de omnibus creaturis ratiocinari; nam ait: *Si bona facere posset Deus nec faceret, magna esset invidentia;*

Estius, Sylvius, Juenin reponent minus esse auctoritati horum librorum attendendum. Revera de his scribit S. P. 111. Retract. cap. 24. *In quo opere plura quesita, quàm inventa sunt; & eorum quæ inventa sunt pauciora firmata: cetera vero ita posita, velut adhuc requirenda sunt.* Sed respondere etiam possumus, Augustinum loqui supposita hac providentia, & consistente decreto definitam perfectionem unicuique rei tribuendi; quam, cum sit immutabilis & invidentiæ, sicut & cuiusque passionis, expers, quadam consequente necessitate eo modo, quo libere definit, largitur. Nam in 111. de libero arbitrio cap. 19. utrumque distinguit, & posse Deum producere meliora, & posito hoc ordine creaturarum, invidum esse, qui velit aliquam interire: *Si dixeris, inquit, non erat tamen difficile aut laboriosum omnipotenti Deo, ut omnia quæcumque fecit sic haberent ordinem suum, ut nulla creatura usque ad miseriam perveniret; non enim hoc aut omnipotens non potuit, aut bonus invidis: respondebo, ordinem creaturarum a summa usque ad infimam gradibus justis ita decurrere, ut ille invideat qui dixerit, Ista non esset; invideat etiam ille qui dixerit, Ista talis esset. Si enim salem vult esse qualis est superior, jam illa est, & tanta est, ut adjici ei non oporteat, quia perfecta est. Qui ergo dicit, Etiam ista talis esset, aut perfecta superiori vult addere, & erit immoderatus & injustus; aut istam vult interimere, & erit malus, atque invidus. Quæ, & alia, quæ ibidem Augustinus disertissime disputat, haud obscure probant Deum ea fecisse quæ statuto providentiæ ordini congruunt, neque possunt absque malevolentia nota immutari.*

Opp. 2. Deus est optimus: sunt ergo optima quæcumque facit.

Resp. diff. conseq. sunt optima, idest præintento fini, decretoque ordini maxime congruentia, concedo: sunt optima, idest naturam habent, conditionemque præstantissimam, nego.

Si insurgas, ex opere artificis sapientiam, ac prudentiam pensari;

Dico non elucescere infinitam Dei virtutem in creatis operibus, si unice illorum attendatur substantia, quæ finita est, & in comparatione

Aucto-

Auctoris sui, *tanquam nihilum*: sed optime intelligi ex modo, & ratione producendi; quum enim supremus artifex neque materia, neque temporis intervallo, neque caussarum aliarum subsidio ad quæquæ vel maxima moliendum, opus habeat, hinc satis ejus virtus ac sapientia splendescit: atque, ut ait S. Pater II. de Civit. Dei cap. 22. *Deus ita artifex est magnus in magnis, ut minor non sit in parvis: quæ parva non sua granditate, nam nulla est, sed artificis sapientia metienda sunt.*

Si objicias ex artefactis hominum peritiam scientiamque æstimari;

Resp. id esse primo, quia cum homines materia, instrumentis, & aliorum egeant ministerio, nequeunt propriam ostendere industriam, nisi in artefactis elaborandis: deinde quia, cum hominum ars & sapientia non sit essentialis, perfectioribus operibus & ipsa perficitur, ideoque ex his æstimatur. Contra Deus summopere commendatur ex modo in minimis quoque, ut diximus, infinito; & cum sit perfectissimus essentialiter, neque artem acquirit, neque proficit operando, neque laudari proinde debet ex sola suorum operum conditione.

C A P U T VII.

Quod Deus sit verax, nec possit homines in errorem inducere.

NON omnia hoc loco ad crīsim revocabimus, quæ in sacris literis primo aspectu videntur esse mendacia; sed ea tantum quæ directe opponi possent contra divinam veracitatem. Sive enim exempli causa Abraham, Jacob, Judith, Nathan, aut Prophetarum alii quandoque ut homines mentiti fuerint, nec ne, non est hujus loci differere. At si proferri possunt quæ a Deo vel per se, vel per aliam, falso sint prænuntiata, evertantque hoc divinæ attributum veracitatis, ea hoc loco sibi vindicant sedem. Dabo tamen quasdam regulas ad cetera quoque explicanda, quæ ad Prophetarum, sanctorumque hominum prædictiones intelligendas magnopere deserviant; posteaquam sequentem firmavero positionem.

PROPOSITIO: Deus est summe verax, neque potest esse seductor, aut auctor mendacii.

Theologi omnes hanc thesim propugnant, sed breviter & nervose Canus lib. 2. cap. 3. Gregorius Ariminensis dist. XLIII. Quæst. 2. Petrus Annatus lib. 2. de divina Script. art. XII. Aurelius Piette Tom. III. quæst. IV. de Fide, & alii, quos ommitto. Et probatur I. divinis Scripturis: in quibus habetur Num. XXIII. 19. *Non est Deus quasi homo, ut mentiat*. Ad Roman. III. 4. *Est autem Deus verax, omnis autem*

antem homo mendax. 2. ad Timoth. ii. 13. *Fidelis permanet, negare seipsum non potest*. Ubi *fidelis*, & *verax* eadem significatione usurpantur, ex Græcis codicibus, in quibus *πίστες* idem est ac *ἀληθής*: & ea propter tam Græci, quam Latini dicunt *πίστες*, *mentiri* eum, qui fidem fallit.

Deinde probatur ex Patribus. Chrysostom. Hom. xxxviii. in Joan. *Mentiri, inquit, non potest Deus*. Ambros. ad Chromat. *Nunquidnam mentitur Deus? Sed non mentitur, quia impossibile est mentiri Deum. Impossibile autem istud nunquidnam infirmitatis est? Non utique*. S.P. Augustinus xxii. de Civit. Dei 15. *Si velint invenire quid omnipotens non potest; ego dicam mentiri non potest*. Consentiant Gentiles Philosophi: quos inter Plotinus lib. Enn. vi. 8., & Proclus lib. i. Platon. Theol. cap. 17. diserte, & acute probant Deum non posse ullius mendacii, vel fraudis esse causam; atque Simplicius, & Alcinous, Deum *Veritatis* nomine appellaverunt, *quod veritatis omnis ita sit principium, ut sol omnis luminis*, inquit Huetius.

Argumentum a ratione petitum, & quidem validissimum, vide præcedenti cap. Prop. 1. Diximus enim Deum, cum sit summum ens, nulla ratione posse excidere a veritate; aliàs potentiam passivam haberet, & perquam maximam imbecillitatem. Quod argumentum potest consimilibus roborari. Ac primo; nam si Deus est summum ens, debet esse summe bonus, summe verax, summe potens, summe in unoquoque genere perfectionis excellens: Ita est summe bonus, summe potens, summe perfectus, ut nulla in ipso sit malitia, nulla imbecillitas, nullus defectus: Ergo ita est summe verax, ut nullus in eo esse queat error, nullum mendacium, nulla fraus. Deinde: Repugnat Deo quod intrinsece malum est, & ab ipso vetitum; Mentiri intrinsece malum est, ac vetitum: Ergo Deo repugnat mentiri. Denique; Ea est creaturarum imbecillitas, ut deferere interdum possit veritatem, quoniam obnoxia est affectionibus, & nunquam facultate ac virtute sua in eodem permanet statu: Igitur Deus permanens, immutabilis, eadem semper volens, habet natura sua, ut sit fallere, & falli perpetuo & incommutabiliter impotens. Propterea citato Numerorum loco cum dixisset Moyses: *Non est Deus ut homo, ut mentiat, subdit e vestigio: Nec ut filius hominis, ut mutetur*. Et Matth. xxiv. 36. ut prædictionum suarum certissimus expectaretur eventus, ait Christus: *Cælum, & terra transibunt; verba autem mea non transibunt*; idest, fieri potest ut cælum & terra deficiant, non autem, ut irrita fiant verba mea: quam interpretationem ostendit Lucas cap. xvi. 17. dicens: *Facilius est autem cælum & terram præterire*. Matthæi phrasidis derivata est a proprietate Hebræicæ linguæ, in qua cum non habeatur modus hypothetici- & subjunctivus, pro *transirent*, usurpatum est futurum indicativi.

Opp. 1. Non semel Deus mentitus est: nam Genes. 4. Caino timent

menti ne occideretur, ait: *Nequaquam ita fiet*, & tamen occisus est a Lamech. Jonas cap. 3. Jubente Deo prædixit post quadraginta dies Ninivem subvertendam, nec tamen diruta est. Christus Dominus Marci xiii. 32. ait se diem, & horam extremi judicii nescire, & nihilominus omnis in eo est scientiæ plenitudo: & Joann. vii. 8. rogatus ut templum ascenderet: *Ego, inquit, non ascendo ad diem festum istum*: atque ascendit tamen. Falsum est ergo Deum nunquam protulisse mendacium.

Resp. nego ant. Ad Caini factum respondet Annatus, utique fuisse occisum a Lamecho; at Deum non prædixisse Caino nequaquam occisum iri, sed tantum id non esse eo modo futurum, quo Cain timebat, nam neque a primo occurrente vulnus accepit, neque ex intentione, ipsum Lamech interemit, sed inter aucupium, & in venando, cum crederet feram telo confodere. Quod & Hieronymus ex traditione Hebræorum scribit Epist. 125. ad Damasum, & plurimi etiam tradunt Interpretes. Sed verior est responsio, Cainum, tametsi eam promeretur mortem, uti propria ipsum monebat conscientia, & naturæ dictatam, *ut quisque ferat quæ fecit*, Deo tamen clementissime exiguum: numerum hominum spectante, fuisse a violenta morte servatum: de qua re plura Grotius in 1. De jure belli & pacis cap. 11. §. 5. & in eruditissimis notis Gronovius. Atque hanc sententiam aperte confirmant ea verba Lamech: *Occidi virum in vulnus meum, & adolescentulum in livorem meum*. Nam Cain Lamechi abavus, & pluribus major generationibus non poterat ab occisore suo adolescentulus appellari. De Ninive communis est sententia fuisse vaticinium comminatorium; nam sunt plura ejusmodi in sacris literis, quæ implenda essent sic rebus manentibus. Sed altera est ingeniosior Augustini responsio Enarrat. in Psalm. l. n. 11. *Stetit Ninive, an eversa est Ninive? Aliter quidem videtur hominibus, & aliter visum est Deo. Ego autem puto impletum fuisse quod propheta prædixerat. Respice quæ fuit Ninive, & vide quia eversa est: eversa in malo, edificata in bono: sicut eversus est Saulus persecutor, edificatus Paulus prædicator*. Eandem explicationem tradit S. Pater lib. xxi. de Civit. Dei cap. 2. Quomodo Christus dicatur diem judicii nescire, quum abutantur hoc loco Ariani & Sociniani ad ejus impugnandam divinitatem, dicam in libro vii. qui erit primus de Trinitate. Nunc satis est, si dicamus, nescire Christum illam diem, ut revelet hominibus, quo sensu proreges ac ministri dicuntur nescire credita sibi Monarcharum secreta. Ad illud, quod objicitur ex Joan. vii. 8. alii respondent Christum dixisse se non ascensurum ad diem festum palam, & eo modo quo rogabatur; alii dixisse, se nondum, scilicet eo tempore ascensurum. Et quidem utraque responsio convenit cum iis, quæ sequuntur: *Hæc cum dixisset mansit in Galilea. Ut autem ascenderunt fratres ejus, tunc & ipse ascendit ad diem festum, non manifeste, sed quasi in occulto*. Alii ne Christum argueretur mendacii legerunt

To. I.

A a

E 70

ἐγὼ ἔτι ἀναβαίνω, *Ego nondum ascendo* : quidam addiderunt adverbium temporis *ἄρτι nunc* : nonnulli delendum putarunt pronomen *ταῦτα, ista*. Sed genuinam esse vulgatæ nostræ lectionem constat, quod hinc Porphyrius olim Christum calumniatus fuerit de mendacio. Neque opus est veram immutare lectionem; nam Christus cur non ascenderet causam apertissimam protulit, dicens : *Quia meum tempus nondum impletum est*; græce *παραρταται, completum est*. Παραρταται autem, *compleri*, proprie dicitur de certo tempore, quod est expectandum.

Opp. 2. Si Deus esset summe verax, non præcepisset malis angelis & hominibus ut alios deciperent : At præcepit : Non est ergo summe verax. Pr. minor : Ex. xi. 2. ait Dominus Moysi : *Dices ergo omni plebi, ut postulet vir ab amico suo vasa argentea, & aurea*. Scilicet animo ea furandi, & commodantes fallendi. Et 111. Regum cap. xxi. 22. dæmoni dicenti : *Ero spiritus mendax in ore omnium prophetarum ejus*, respondit Dominus : *Decipies & pravalebis : egredere, & fac ita*.

Resp. nego minorem. Ad priorem ex lib. Exodi probationem, missa ea quæstione, num Israelitæ furtum patraverint, de qua non est una Patrum sententia, ut constat ex Commentariis Calmet ad cap. 111. 22. certum est, quod potuit Deus præcipere ut Hebræi vasa peterent ab Aegyptiis, & populus id exequi absque ullo mendacio, vel mutui simulatione. Quod si Israelitæ deceperunt Aegyptios dicentes se reddituros quæ ipsis commodabantur; id quidem permisit Deus in pœnam idololatrarum qui furtum licitum esse putabant, sed non præcepit. Atque idem de spiritu deceptore prophetarum Achab erit sine ulla dubitatione asserendum; quippe ea verba : *Egredere, & fac ita*, non sunt Dei præcipientis, sed permittentis. Proni namque ad fallendum nequissimi spiritus non jussu nutumque expectant, sed permissionem : & exemplum satis, ut arbitror, idoneum habemus Matt. vii. 32. ubi rogantibus dæmonibus ut mitterentur in gregem porcorum, respondit Jesus : *Ite : Quod permittentis verbum esse constat ex Marco v. 13. qui ait : Et concessit eis statim Jesus*. Cum ergo Dæmones & fallere & nocere peroptent, idque valeant nativis viribus nisi a superiori vi impediatur, non opus habent, ut proprio indulgeant genio, divino mandato aut consilio. Judæ quoque proditori ait Christus Joan. x. 11. 27. *Quoc facis, fac citius. Quæ vox non jubentis est, sed finentis*, inquit Serm. vii. de Passione Magnus Leo.

At dices : Non ita sentit Augustinus, qui in lib. Quæst. lxxxiii. q. 53. de Aegyptiis ait fuisse deceptos jubente Domino, *quoniam deceptione digni erant*. Et de prophetis Achab : *Quem Deus, inquit, per se non falleret, eum fallit, Deo jubente, Cacodæmon*.

Respondet Canus lib. 2. cap. 4. ipsum Augustinum lib. de Prædest. & Grat.

& Grat. cap. 4. docuisse quomodo ejus testimonia accipere debeamus, his verbis: *Non operatur Deus in homine ipsam duritiam cordis, sed indurare eum dicitur quem mollire noluerit: sic etiam excacare, quem illuminare noluerit, & repellere eum, quem noluerit vocare.* Recte quidem, sed non est opus extra librum præfatum LXXXIII. quæst. vagari. Quippe eodem, qui obijcitur loco, ait: *Quapropter cum Aegyptii deceptione digni essent, & populus Israel pro illa ætate generis humani in tali adhuc gradu morum constitutus esset, ut non indigne hostem deciperet; factum est ut juberet Deus, vel potius pro illorum cupiditate permitteret, ut vasa aurea & argentea, quibus adhuc terreni regni appetitores inhiabant, & peterent ab Aegyptiis non reddituri, & acciperent quasi illud reddituri.* Simulationem itaque Israelitarum non jussit Deus, sed permisit. Idem dicendum est de spiritu nequam, qui Achabum decepit: scribit enim Augustinus id factum esse, non sine judicio divino, nimirum Deo permittente. Hæc & exemplum ab ipso Augustino ibidem allatum, & absoluta sententia reddunt manifestissima. Exemplum est de odio inimicorum, de quo dictum est antiquis: *Odio habebis inimicum tuum*, ut refert Mat. v. 44. certum est autem, quod nunquam est jassum revera Israelitis ut odio haberent inimicos; sed solum non fuit expresse prohibitum. Sententia denique absoluta hæc est: *Non itaque Deus deceptor est: quod credere nefarium & impium quis non intelligat?*

Oppones ultimo: Potest Deus innocentem occidere: Ergo & decipere simplicem.

Resp. nego consequentiam: etenim spectat ad supremum altissimumque dominium vitam dare, & eripere; *Dominus enim vivificat & mortificat*, inquit Cant. Annæ 1. Reg. 11. 6. non spectat autem ad supremam veritatem quemquam fallere: sed posse in errorem inducere, pugnat cum veracitate divina; habetur namque in libro Numer. *Non est Deus quasi homo, ut mentiatur.*

In quæstione utrum mendacium sit intrinsece malum expeditur nonnulla alia, quæ hoc loco objici possent. Nunc quas principio pollicitus sum, adnotationes præmitto cum ad hanc quæstionem, tum ad sacrarum literarum intelligentiam apprimè utiles. Sit prima: Multa Dei verba quæ falsa rudioribus videntur, ubicunque Deus aut reprehendit, aut futuras prænunciat calamitates, sunt figuratæ locutiones, quas Rhetores appellant *Ironiam*. Ita Gen. 11. 22. ait Dominus: *Ecco Adam quasi unus ex nobis factus est, sciens bonum, & malum.* Jud. x. 14. *Ite, & invocate Deos, quos elegistis: ipsi vos liberent in tempore angustia.* Eisaï xv 11. 3. *Reliquia Syria, sicut gloria filiorum Israel erunt;* idest, inquit Hieronymus, *ignominia, &c.*

II. Nonnulla, quæ fabulosa videntur, sunt aptissima similitudines & parabolæ; ut Judicium 1x. narratio Jotham de arboribus quæren-

tibus, & eligentibus sibi regem, Ezech. xv 11. 2. de duabus aquilis: & aliæ plurimæ, in novo præfertim testamento. De quibus memoria tenendum est quod scribit Hieronymus in cap. 12. Eccl. *Parabolæ aliud in medulla habent, aliud in superficie pollicentur: & quasi in terra aurum, in nuce nucleus, in bursutis castanearum operculis absconditus fructus inquiritur: ita in eis divinus sensus altius perferendus.* In his maxime attendendus est scopus, ex quo earum proprietas, & significatio dignoscitur.

III. Verba Dei, quæ comminatoria sunt; ut supra dixi de subversione Ninives, accipienda sunt hypothetice, rebusque sic permanentibus. Quam regulam tradit apertissime Hieremias xv 11. 8. *Si penitentiam egerit gens illa a malo suo, quod locutus sum adversus eam: agam & ego penitentiam super malo, quod cogitavi, ut facerem ei.* Ideo post diuturna monita, & dilatam nimis penitentiam locum vix habet hæc regula; ut in prædictione Hierosolymitani excidii apud Lucam xix. 44. ubi Judæis exprobratur quod non cognoverint tempus visitationis suæ, idest oblata neglexerint remedia salutis.

IV. Ut etiam supra monui, plura quæ videntur Dei operationem imperiumque sonare, præfertim ubi alloquitur improbos, qui meditantur iniquitatem in corde suo, de sola permissione sunt exponenda: ut Elifæus filiis prophetarum importune insistentibus ut mitterent ad querendum Eliam, iv. Regum 2. dixit, *Mittite*; & Dominus ad Judæos, Jo. 11. *Solvite templum hoc.* Quo sensu dicitur Deus excæcasse cor Pharaonis, & Es. vi. 10. *Excæca cor populi hujus.* Paulus quoque ad Rom. 1. 24. *Tradidit illos Deus in desideria cordis eorum;* & paullo post, *in passionibus ignominie, & in reprobum sensum;* idest *relicti per divinam patientiam, non per potentiam compulsi,* ait S. P. August. de Prædest. SS. cap. 10.

V. In Vaticiniorum complemento observandum est non semper impleri in Personis ad quas fiunt, sed ut plurimum in earum posteritate. Sic Genes. xxv. 23. dicitur de Jacob: *Major serviet minori* quod impletum est in Idumæis, regnante Davide. Aliquando etiam completur in sensu analogico, ut in cæde Bethlehemiticorum infantium impletum est vaticinium Jeremiæ xxxi. 15. *Vox in Rama audita est, &c.*

VI. Multa non ad literam, sed mystice sunt accipienda, veluti, Joannem Baptistam esse Eliam, Christum agnum ac petram, Fideles oves, & alia id genus. In quibus ne Hæretici nobis objiciant nos sacra torquere literas, quomodo sutores dentibus extendunt pelles, ut immerito effutit Glassius lib. 11. Tract. 2. sect. 3. art. 6. de Becano, Stapletono, Joanne de S. Geminiano, aliisque viris doctissimis; æquum est, ut Ecclesiæ sequamur Magisterium, Sanctorumque Patrum interpretamenta sectemur: nec quisque propria venditet rudibus commentariola.

VII. Quum omnia, quæ in veteri testamento narrantur, fuerint umbræ & imagines futurorum; nemo debet sistere in rerum gestarum, verborumque cortice; sed potissimum considerandum est, cujus rei gratia & significatione facta, vel dicta sint. Plura enim putantur mendacia, quoniam non ea quæ vera significantur dicta intelliguntur, sed ea quæ falsa sunt dicta esse creduntur. Idque Augustinus explicat in libro contra mendacium cap. v. & 6. exemplo Jacob, qui consilio matris ait se esse primogenitum Isaac, & personam Esau fratris sui simulavit.

VIII. Si aliquando a Deo mendaces commendari videntur, ut de obstetricibus Aegyptiis legitur Exodi 1. 20. Non officiosum mendacium putandum est comprobari, sed animi pietatem, timorem Domini, & misericordiam, ut scribunt Augustinus citato libro cap. 15. & Gregorius lib. xvi 11. Moraliū cap. 4. Atque idem dicendum est de quibusdam Historiis Sanctorum, quæ opponi possunt in patrocinium mendacii: sed de hac quæstione iterum differendum. Nam de veracitate Dei, quam Canus appellat caput ceterarum, controversia finitur his regulis; quarum duæ vel tres traditæ ab Aurelio Piette exemplis a me illustrantur, aliæ non minus necessariae suppleradduntur. Vereor enim ne nimis otiosus videar si doctissimorum virorum laboribus solum fruam, & ne plagii insimuler, si Auctorum qui mihi aliquo sunt adjuncto, ubi occasio se dederit, non meminerim.

C A P U T VIII.

De perfectione, ac pulchritudine summi Dei.

SUPERVACANEUM videtur de perfectione Dei verba facere; cum enim *perfectum* sit hoc loco, non quod est ab artifice elaboratum atque expolitur, sed quod in se omne bonitatis genus complectitur; idem est quærere num Deus sit perfectus, ac sit ne summe potens, immensus, infinitus, & quidquid optimum & præstantissimum nostræ potest occurrere cogitationi. Ad faciliorem tamen Scholasticorum intelligentiam addo, ab his duplex perfectionum genus distingui: quarum aliquæ *simpliciter simplices*, aliquæ *simplices* communiter appellantur. Perfectio simpliciter simplex illa est, quæ cum majori vel æquali perfectione non pugnat, sive, ut ait cap. xiv. Monologii Anselmus, *Quæ melior est ipsa, quam non ipsa*; ut esse spiritum, esse justum, veracem, beatum. *Melius namque est esse justum, quam non justum; beatum, quam non beatum*; inquit idem Anselmus cap. 5. Profologii. Perfectio simplex ea est, quæ pugnat cum majori vel æquali, & non est melior-ipsa quam non ipsa; ut qualitas, extensio, corpus, animal, aurum, &c. *Nam melius est homini esse non aurum quam aurum, quam-*

quis

vis forsitan melius esset alicui aurum esse, quam non esse aurum, ut plumbo. Ait cit. cap. Monologii S. Anselmus. Atque hic est communis Theologorum sensus; licet doctissimus Petavius lib. vi. cap. 7. n. x. scribat, quod prædicata quæ sunt ejusmodi, ut ipsa per se meliora sint quam non ipsa, veluti esse sapientem & justum, vulgo *perfectiões simplices* dicuntur. Et quidem congruentius, & clarius loqueretur, qui perfectiões prioris generis *simplices* appellaret; alias vero *in certo aliquo genere* limitatas. Has postremas perfectiões in Deo non esse, constat ex quo in eo non sit aliquid, quo potest melius excogitari.

Sunt tamen singulæ omnium rerum perfectiões in Deo *eminenter*. Quid sit contineri *eminenter* explicant Theologi, dicentes *eminenter* contineri, quod in alio non secundum propriam formam, sed nobiliori quodam modo comprehenditur; ut rationalis anima continere dicitur vegetativam, & sensitivam. Sed quoniam ista suboscure videntur, & repetita synonyma; dixerim perfectiōem contineri formaliter, quando in ea perfectiōis specie res aliqua, veluti forma materies determinatur, & perfectiō de ipsa re enunciatur in recto: contineri autem *eminenter*, quotiescunque res in eo perfectiōis genere non est limitata, & perfectiō de ipsa re prædicatur tantum oblique. Sic aurum, argentum, calidum, frigidum *formaliter* continentur in hoc, vel illo corpore, quoniam his qualitatibus & formis corpora afficiuntur, & recte enunciatur, hoc est aurum, illud argentum, istud calidum, istud frigidum. Quoniam vero sapientia, justitia, aliaque attributa rectissime de summo Deo prædicantur, non autem sunt in aliquo genere terminata, dicuntur esse *formaliter* in Deo minus proprie; & licet invaluerit ea loquendi consuetudo, Deus est *formaliter* sapiens, *formaliter* justus; melius tamen foret dicere, Deus est sapientia, & justitia quæ ipse est, ut monui præcedenti cap. 3. Non enim est in Deo forma aliqua, aut perfectiō a summo esse distincta. Hinc Thomassinus lib. iv. cap. xii. n. 12. docet perfectiões istas aptius a Deo auferri, quam de illo affirmari. Contra, cum Deus sit causa, & exemplar omnium creaturarum, infinitus in quolibet genere perfectiōum, & creaturæ de ipso Deo enuncientur oblique, non enim dicitur, Deus est Angelus, aut homo, sed, Deus est hominum, & angelorum; perfectiō angeli, perfectiō hominis, perfectiō universalium creaturarum, non *formaliter* in Deo continentur, sed *eminenter*. Quærun Theologi an Deus, & creatura simul sint aliquid perfectius quam Deus solus: ut huic quoque scrupulo satisfiat, sit

PROPOSITIO I. Deus simul & creaturæ non sunt aliquid perfectius, quam Deus solus.

Intelligenda est thesis de perfectiōe, quam vocant *intensivam*; nam de numero & extensione, frustra a quibusdam disputatur: non enim hæc duo perfectiōem important, sed limitationem potius in aliquo

quo genere quantitatis : ideoque hoc complexum *Deus* , & *creatura* designat summum bonum , & bonum finitum ; & numerus , & extensio tantum in bono finito reperitur , ut divallum , & sejunctum a summo bono . Probatnr autem prop. I. ex scripturis , legitur enim Ps. 38. *Substantia mea tanquam nihilum ante te* . Nihilum vero & ens , si complexe accipiantur , non sunt aliquid perfectius solo ente . II. Ex Patribus , dicente Augustino Tract. XI. in Johannem . *Si fueris sine Deo , minor eris : si fueris cum Deo , major Deus non erit : non ex te ille major , sed tu sine illo minor* . III. Ratione : Deus seorsim spectatus est unus , simplex , infinitus , summum bonum continens omnia bona ; & ex collectione Dei , & creaturarum confurgit tantum numerus , & multitudo : sed numerus nullam addit perfectionem ad unum , infinitum , summum bonum continens omnia bona ; cum ad summum , & infinitum nulla fieri possit additio : Ergo collectio Dei & creaturarum nullam addit perfectionem Deo seorsim spectato .

Opp. I. Deus & creatura faciunt numerum : Ergo majorem extensionem perfectionis .

Aegidius Romanus in 1. dist. 24. q. 3. plura numerorum genera scite distinguit . Duo ex his ad rem faciunt . Primum genus numerorum spectat ad quantitatem discretam , in qua una unitas non continetur in alia : talis est numerus E. G. quatuor drachmarum , aut quinque æris quadrantium . Alterum numerorum genus spectat ad quantitatem , in qua plures distinguuntur unitates , sed una præcontinet alias : talis est distinctio sicli a quatuor drachmis , aut oboli a quinque quadrantibus . Constat autem quatuor drachmas addere ad siclum extensionem quidem numeri , non valoris ; tantum enim pendet siclus , quantum drachmæ quatuor . Expōita hoc exemplo Aegidiana doctrina , nego consequentiam ; habetur enim multitudo , & extensio numeri absque extensione perfectionis , quotiescunque perfectio unius unitatis eminenter præcontinetur in alia : quemadmodum permutato in drachmas quatuor uno siclo , multiplicantur numero nummi , non extenditur valor , quoniam valor quatuor Drachmarum in illo uno siclo continebatur .

Quod si dixeris : Quamvis nummus argenteus contineat eminenter plures minores asses , hi tamen additi nummo ejus valorem adaugent : Ergo licet Deus eminenter contineat perfectiones creaturarum , istæ nihilominus , &c. Respond. nego consequentiam . Etenim etiamsi nummus argenteus tanti valeat , quanti plures minuti asses , nihilo tamen minus cum sit finiti valoris , non habet valorem proprium viioris monetæ quæ superadditur , E. G. tanti valet siclus quam duplex didrachma , at non quanti duplex didrachma , & assis . Perfectio autem Dei est infinita , neque , si millenas addideris creaturas , pluris valet .

Opp. 2.

192 De Theologicis Disciplinis. Cap.VIII.

Opp. 2. Splendor astrorum, ac plantarum vigor eminenter continentur in sole, & tamen sol sese non est perfectior sole unâ cum plantis, & astris. Ita, &c. Resp. solem non præcontinere particularem astrorum plantarumque perfectionem, sed universalem tantummodo; quum Deus contra eminenter habeat quidquid perfectionis potest in creatis rebus adinveniri.

PROPOSITIO II. Reperitur in Deo summa, & perfectissima pulchritudo.

Explicatur, simulque probatur postrema hæc propositio. Primo pulchritudo dicit congruentiam & aptitudinem, ut corpora appellantur pulchra, quæ habent aptam figuram membrorum cum quadam suavitate coloris, auctore Tullio in 1v. Tusculana. In Deo autem est invariabilis ordo sæculorum, consonantia perfectionum, immutabilis regula providentiæ: atque, ut inquit Augustinus vi. de Trinit. cap. 10. *prima aequalitas, & prima similitudo*, idest divinum Verbum, candor æternæ lucis, & imago pulchritudinis ejus. Deinde pulchrum est quod allicit, & ad amorem trahit: & in Deo est bonitas, pietas, caritas, jucunditas, gloria, & alia, quæ nos ad amandum provocant, & in cælesti patria plenissimo replent gaudio. Pulchrum quoque est decus, & ornamentum animi: atque in Deo est virtus, sanctitas, magnificentia, & omnis justitiæ fons; unde Augustinus in Psal. xlii. *Summa*, inquit, *& vera pulchritudo justitia est. Ibi illum non videbis pulchrum, ubi deprehendis injustum. Si ubique justus, ubique decorus.* Quod & Ambrosius probat in libro de Isaac & anima pluribus argumentis, inter quæ est illud comprobatum experimento, quod in sapientiæ, ac fortitudinis venerationem effecti senis vultum, & lacerata martyris membra exosculamur, suaviter ab interiori pulchritudine allesti. Tandem simulacra & imagines rei, quam repræsentant, ostendunt venustatem, & opera Artificis sui pulchritudinem, sicut erudit probat Cicero in Oratore ad Brutum exemplo Phidiæ, cujus simulacra eximiam speciem pulchritudinis referebant, *quæ ipsius in mente insidebat.* Quanta vero sit in omnium creaturarum serie pulchritudo, & quisque propriis oculis intuetur, & præclara inductione demonstrat Vincentius Contensonius dissert. 111. cap. ii. spec. 3. & longe melius Augustinus Enarrat. in Psalmum cxlviii. num. 15., cui his verbis imponit coronidem: *Si pulchra sunt quæ fecit, quanto pulchrior est qui fecit?* Atque idem sit, ut aliquid habeat decoris, finis secundi libri.





DE THEOLOGICIS DISCIPLINIS LIBER TERTIUS

*In quo disputatur quomodo Deus inhabitet
lucem inaccessibilem.*



Ο ΚΑΛΟΝ *Pulchrum* Plato, Philoponus, & Schrevelius dictum putant ἀπὸ τοῦ καλόν, quod omnium ad se vocet & alliciat oculos, animosque afficiat voluptate: idque S. P. Augustinus apposite explicat cap. xiiii. libri Confessionum suarum quarti. Theologicum itaque stadium percurrentes, posteaquam eximiam elegantissimamque Dei commemoravi pulchritudinem, in quam spe & caritate rationalis anima fertur, tamen illecebris quandoque distrahatur cupiditatum; ad eam progredior questionem, cur dicatur Deus in priori Epistola Pauli ad Timoth. v. 16. habitare *lucem inaccessibilem*, hoc est, ut subditur e vestigio, quam nullus hominum vidit, nec videre potest. Cujus Apostolicæ sententiæ quoniam duplex sensus esse potest, de naturali mentis humanæ facultate, atque de supernaturali divinitusque concessa; & insuper de statu mortalis vitæ, & de illo, quem expectamus dissoluta hujus habitationis domo, in Civitate Sanctorum: plura inquirendi exhibetur nobis occasio, in quibus deprimitur quidem audacia nostra ab incomprehensibili majestate, sed erigitur animus repromissæ sublimitatis mercedis.

C A P U T I.

*Deus nequit ab intellectu creato clare & intuitive videri
solo naturalis facultatis acumine.*

VERTENTE quarto Ecclesiæ sæculo, ut refert Hæresi LXXV. Epiph. & LIV. Augustinus, Aetius & Eunomius in tantam cæcitatem, & arrogantiam prolapsi sunt, ut assererent se Deum perspicue virtute naturali intueri, ut semetipsos, aliosque homines aspiciabant. Ab Eunomio dicti sunt illius sectarii Eunomiani, qui cum perversum quoque dogma tenerent de Verbi cum Patre dissimilitudine, Anomzi sunt pariter appellati. Hunc vero circa Dei visionem supinum crassumque errorem a Basilio, Nazianzeno, Chrysostomo, aliisque Patribus differtissime confutatum, in inferiori Germania labente XIV. sæculo recedere ausi sunt Beguardi anno 1311. a Viennensi Concilio sub Clemente V. damnati. Execrantur Theologi omnes tam perniciosum superbumque errorem, Quietistarum, ut aliqui putant, marcidum, putidumque fermentum. Sunt tamen aliqui e schola Theologi, qui productis quidem creaturis hanc ad videndum Deum naturalem facultatem inesse negant; sed alias posse produci arbitrantur alterius ordinis ac perfectionis, quarum vim ac potestatem manifestissima Dei contemplatio minime excedat. At pugnaciter in hos insistant ceteri cum numero, tum eruditione præcipui: horumque agmen ex nostro instituto sectantur Argentinas, Puteanus, la Fosse, Consonius, Landon, Florez, & qui poterat pro omnibus solus laudari, Romanus Aegidius.

PROPOSITIO I. Solo naturali lumine nequit Deus ab aliquo creato intellectu intuitive videri.

Attinet hæc propositio ad fidem. Et probatur I. ex divina Scriptura: in qua habetur Deum esse invisibilem, ut in I. ad Timoth. I. *Regi seculorum immortalis & invisibilis*, & cap. 6. *Quem nullus hominum vidit, nec videre potest*. Quæ verba ut demonstrat S. P. Augustinus Epist. cxii. cap. 14., significant *Deum invisibilem esse naturæ*. Certum quippe est supernaturalem Dei visionem minime repugnare. Item eadem Scriptura testatur, Dei manifestationem, quæ est bonorum operum retributio, non ad naturæ facultatem, sed ad gratiæ spectare beneficium, ut in Psalmo LXXXV. *Gratiam, & gloriam dabit Dominus*; & ad Rom. vi. *Gratia Dei vita æterna*. II. Probatur ex PP. Origenes lib. I. Periarchon cap. 1. *Mens*, inquit, *nostra ipsum per se Deum, sicut est, non potest intueri*. Epiph. Hæresi LXX. *Deum quidem videri præsertim ab humana natura non posse fatemur*. Gregorius Nazianz. Orat. xxxiv. scribit, *nihil ad nos pertingere in hac vita de Dei notitia, nisi exiguum quemdam rivulum, ac velut parvum mæ-*

gnæ lucis radium. Atque ut aliquos proferam ex Latinis; Ambros. Comment. in Lucam c. 1. ait: *In potestate nostra non est Deum videre, sed in potestate illius est apparere*. Et S. P. Augustinus lib. xix. de Civit. Dei cap. xxv. *Sicut non est a carne, sed supra carnem quod jam facit vivere; sic non est ab anima, sed supra animam, quod eam facit beate vivere*.

Probatur insuper ratione: Ac primo quidem ut aliquod objectum videatur in se, requiritur ut illud sit præsens, & potentiam moveat, atque specialiter afficiat. Hoc autem est discrimen inter spiritualia & corporalia, quod ista si præsentia sunt, latere non possunt, nisi aliò animum potentior causâ amoveat, vel oculus sponte clausus radios reprimat: nam oculis apertis, & non alienato animo ac sensu corpus coloratum ac debite proximum non videre non possumus. Spiritualia vero objecta adhuc in duplici sunt differentia: alia præsentia, sunt, nec potentiam videntem movent, ut Angelus qui continuo nobis assistit, quem non videmus corporeis oculis; alia sunt præsentia, & movent potentiam videntem, ut Angelus operans videtur ab altero Angelo. Deus ubique est præsens, sed non ubique excitat, movetque specialiter intellectum, qui est veluti oculus spiritualis substantiæ, & ubicunque illum excitat, id facit pro suo lubitu, quoniam ad extra omnia libere operatur: unde præsens est damnatis ac dæmonibus, nec tamen videtur; præsens angelis, & animabus Sanctorum, & videtur, quoniam horum quidem in cælis, non illorum in inferno degentium, movet, & excitat spirituales oculos, idest mentem atque intellectum. His positis ita propositionem demonstro. Ut aliquod objectum intuitive videatur requiritur ut sit præsens, & moveat potentiam videntem: Nulla creatura tanta pollet virtute ut naturaliter istud efficere possit, quod Deus præsens illius visivam potentiam specialiter moveat: Ergo nulla creatura potest naturali virtute Deum intueri. Prob. minor. Hoc discrimen intercedit inter Deum, & alia objecta; quod Deus ad extra semper libere agit, & libere movet potentiam, ideoque si nolit, nunquam videtur; alia vero objecta dum præsentia sunt, quandoque necessario operantur, & velint aut nolint latere non possunt: Creatura non habet naturalem virtutem efficiendi ut Deus non libere agat: Ergo non habet naturalem virtutem efficiendi, ut Deus præsens illius visivam potentiam specialiter moveat.

Probatur 2. Media, quibus ad visionem summi ac veri Dei pervenimus non sunt in sola hominis potestate, sed a gratia, & a divino beneplacito principaliter dependent; sunt enim istiusmodi media fides, spes, caritas, observatio legis, & officia virtutum perfecta, ut Catholica proficitur fides, Deo præmovente ac nobiscum misericorditer operante: Ergo a fortiori ipsa bonorum operum merces, & vita æterna, quæ est clara Dei visio, a Dei beneplacito ac liberalitate principaliter pendet.

Opp. 1. Qualibet potentia naturaliter proprium attingit obiectum: Deus est obiectum intellectus creati: Ergo intellectus creatus naturaliter attingit Deum. Prob. minor. Obiectum intellectus est quodcunque verum, & intelligibile: Deus est summe intelligibilis, & verus: Igitur Deus est intellectus creati obiectum.

Resp. dist. majorem. Qualibet potentia naturaliter proprium attingit obiectum, quotiescunque obiectum naturaliter & necessario eadem potentiam allicit, excitat, movet; conc. quotiescunque obiectum libere, & pro suo beneplacito afficit, excitatque potentiam; nego. Responsio liquet ex dictis. Illud tantum adverto Theologos omnes huic argumento respondere, potentiam ferri naturaliter in suum obiectum naturale, non autem supernaturale, cujusmodi est Deus, qui omnium creaturarum rerum seriem ac perfectionem supergreditur. Id quidem vere, & sapientissime dictum est. Verum obiectum supernaturale non solum ex superexcedente naturæ ordinem sublimique substantia metiri debemus, sed etiam ex spontanea, liberali, & nullatenus necessaria, debitaque manifestatione sui ipsius: ita ut nulla facultas creata naturaliter percipere possit, & manifesta visione intueri quidquid suapte natura tale est, ut possit libere, & pro libitu voluntatis abscondi, sive intra, sive extra naturalium rerum constitutionem. Nam & secreta cordium intra naturalem ordinem continentur, nec tamen naturaliter sive ab homine, sive ab angelo cognosci possunt, eo quod eorum natura postulet, ut libere, & pro beneplacito manifestentur. Quod est esse supernaturale, ut Scholæ loquuntur, quantum ad modum cognoscendi, non quantum ad *entitatem*. Itaque id, quod asserunt Theologi, Deum esse supernaturalem, & aciem creatæ intellectus subterfugere, verum est, nec a nobis revocatur in dubium; sed causam magis obviam nobis videtur proferre: ex qua consequitur nec etiam ut Auctorem naturæ posse Deum intuitive videri, quia ut manifestetur facie ad faciem, absolute pendet a liberalissimo ipsius beneplacito.

Dices cum Tournely: Hæc ratio, quam etiam assert Scotus, & quæ unice petitur ex parte Dei libere se menti nostræ conspiciendum exhibentis, nullam vim, & momentum habere videtur; ostendit enim duntaxat deesse aliquid ex parte obiecti, non ex parte potentie. Eo fere modo, quo habens oculos sanos obiectum longe distitum videre non potest, non ob deficientiam virium in oculo, sed ex defectu sufficientis præsentie obiecti. At intellectus creatus non ex sola distantia obiecti, sed ex natura sua incapax est videndi clare & intuitive ipsum Deum.

Sed hæc nullatenus nos urgent; nam, quidquid sit de Scoti sententia, nos ex parte intellectus nullam intrinsecam ac supernaturalem virtutem ab obiecto distinctam necessariam esse arbitramur: ita tamen, ut

ut objectum intime præsens vivide excitet intellectum, ut illud valeat manifesta animadversione percipere : quam excitationem supernam qualitatem animæ impressam, & lumen gloriæ appellamus ; ideoque si objectum intime præsens sit, & moveat, afficiatque potentiam, habetur quidquid ex parte intellectus ad claram visionem Dei prærequiritur.

Opp. 2. Naturaliter homo proprium finem assequi potest : ultimus finis hominis est visio beatifica : Ergo, &c.

Resp. transmissa majori, (nam respondere commodè possumus hanc esse sortem creaturæ rationalis, ut beneficio Creatoris sui ordinata sit ad altissimum finem, quem assequi tantum valeat supernaturalibus suffulta auxiliis,) dist. minorem : Visio beata est hominis finis ultimus naturalis, idest necessario alliciens, necessario propositus, necessario rationem ac voluntatem præmovens, nego : est, finis supernaturalis, scilicet pro divino beneplacito nobis propositus, & libere & gratuito sui desiderium excitans, movensque rationem, concedo.

At, inquires, naturaliter appetitur beatitudo.

Quidam respondent distinguo propositionem : beatitudo naturæ conveniens, quæ sita est in perfecta cognitione abstractiva Dei, quam naturaliter excitant idæ congenitæ, & creaturæ necessario dependentes a prima causâ ; conc. beatitudo supernaturalis, scilicet manifesta visio intuitiva, quæ est beneficium gratiosum ac liberrimum Creatoris, nego. Quod si perstistas : Ex cognitione abstractiva exoritur desiderium visionis intuitivæ ; distinguunt eodem modo propositionem : ex cognitione abstractiva exoritur desiderium & appetitus visionis intuitivæ, si abstractivè cognoscitur objectum necessario & naturaliter potentiam afficiens ; concedo : ita enim dum video imaginem ac picturam, excitatur in me desiderium videndi prototypum, si naturaliter videri possit, nec pro suo beneplacito sese abscondat ac manifestet. Ex cognitione abstractiva exoritur appetitus visionis intuitivæ, si abstractivè cognoscitur objectum sese pro suo lubitu manifestans, nego ; loquendo de appetitu rationabili, atque, ut inquiunt, efficaci. Etenim abstractivè video alterius hominis cogitationes, deprehendo enim ex ipsa exteriori compositione aliquid velle, aliquid cogitare. Attamen, quia manifestatio internarum cogitationum ab ejus libertate dependet, & talis est illarum cogitationum natura, ut non valeant naturaliter innoscere : an non imprudens essem, & ratione destitutus, si videns hominem cogitantem vellem efficaciter ardentissimoque desiderio ipsas scrutari & intueri internas cogitationes ? Ita ex cognitione Dei abstractiva nequit oriri desiderium aliquid efficax ac prudens intuitivæ visionis, quæ est liberum Dei, & gratiosissimum beneficium ; si intra naturalis virtutis continemur angustias : nam facta hypothesi, quod Deus visionem illam clarissimam præparaverit diligentibus se, idque ad inflammanda fide-

lium

lium suorum corda dignatus fuerit revelare, jam ipsa visio prudentissime appetitur, & fideliter expectatur.

Verum respondent alii, inesse quidem homini ad plenam perfectamque beatitudinem, quæ sita est in visione unius Dei, veri Dei, summi Dei, naturale pondus amoris, & innatam inclinationem; eo quod rationalis creatura referens in se divinam imaginem in nullo creato bono possit quiescere, & ex cognitione abstractiva magis excitetur videndi Dei desiderium. Quæ opinio magnam verisimilitudinem habet, & utrum præcedenti sit præferenda, aut quo veritatis loco utraque tenenda sit, lib.xi.1. disputabitur. At qui insitum hunc supernaturalis visionis appetitum propugnant, docent non posse expleri, nisi auxiliis gratiæ rationalis substantia ad tantam finis sublimitatem evehatur. Videatur enim exemplo animæ separatæ, quæ cum sit forma corporis suapte natura illius appetit unionem, dari naturalem inclinationem ad terminum, qui solis inspectis naturæ viribus nequit haberi, qualis utique est mortuorum resurrectio. In horum ergo sententia concedo ex cognitione abstractiva magis incitari humanam mentem ad divinam substantiam videndam, ut lib. 3. contra Gentes cap. 50. etiam S. Thomas affirmat: sed nego posse absque supernaturali virtute tale desiderium satiari.

Opp. 3. Affulget singulis hominibus divinum lumen indistinctum, ab ipso Deo, per quod de rebus mutabilibus firmissime judicamus; ut abunde ostendimus libro primo: Ergo ipsum Deum perspicue intuemur.

Resp. dist. ant. Affulget nobis divinum lumen a Deo indistinctum, tanquam idea exhibens incommutabilem veritatem, quam per speculum & in ænigma referunt etiam singularum rerum rationes, concedo: Affulget tanquam objectum excitans ad claram sui contemplationem, nego. Quomodo Deus possit esse intime præsens per modum luminis, & non per modum objecti eodem 1. libro explicavi exemplo hominis scenicas repræsentationes spectantis. Sed cum sit res valde obscura, & ad sententiam nostram maxime conducat, si majori claritate exponatur, addam nonnulla. Principio visio intuitiva Dei exigit, ut videatur divinitatis plenitudo simul, & non per partes, nam Deus cum sit simplicissimus partiliter videri non potest ea visione, quæ sit visio Dei ut est in se. At lumen divinum intime præsens per modum ideæ efficit, ut ad occursum unius creaturæ judicemus de bonitate, quam nobis naturaliter exhibet quod est honestum & aptum, ad occursum alterius judicemus de magnitudine, quam nobis objicit aut corpus, aut animus. Judicamus vero per ideam ingentem bonitatis & magnitudinis: sed hanc, quæ Deus est, cognoscimus ex parte, quia istic bonitatem, illic magnitudinem intuemur. Quapropter etiam si adsit nobis idea summi boni, & lumen incommutabile, non illud videmus intuitive, quia, ut ait Apostolus, 1. Corinth. 13. *ex parte cognoscimus*: atque, ut inquit S. P. Augustinus Tract. xxxv. in Joan. *est quidem præsens divinus ac lu-*

ac lucidissimus sol, sed radius per obliqua, & per anfractuosa ad cor tenebrosum missus est. Deinde visio intuitiva requirit, quod procul tenebræ & caligines mentis abscendant. Quamquam vero præsto nobis est divinum lumen, non tamen removet phantasmata, & ærumnosæ hujus vitæ imagines ac simulacra, quæ veluti vapores ac procellæ serenum mentis cælum obtenebrant. Ergo nisi Deus intelligibilis sol procul hanc tenebrarum illuvionem expellat, quod repromisit se in cælesti Patria largiturum; tametsi cuncta ejus lumine videamus, ipsum intueri non possumus, quemadmodum in densa insipientium nubium caligine, adest equidem lux solis, cujus ope corpora cernimus, solis tamen splendidissimum orbem non intuemur. Denique per ideam ingenitam videmus Deum esse veritatem incommutabilem, justitiam, legem æternam, quæ facile intelligimus ex signato super nos lumine, vultus Domini: at in visione intuitiva videbimus Deum sicuti est. Quid autem sit videre in se Deum sicuti est, nec oculus vidit, nec auris audiuit, nec in cor hominis ascendit. Itaque visio Dei intuitiva præter Dei præsentiam habet aliquid in se præstantius, & inexplicabile, quod est liberalissimum Dei beneficium tanto explicatu difficile, quanto promittitur ex divinæ majestatis thesauro. Legite Julianum Pomerium lib. 1. de vita contemplat. cap. 2. & Thomassinum lib. v. 1. Th. D. cap. xx. 1. num. 13.

Opp. 4. Augustinus lib. x. de Civit. Dei cap. 22. ait, *solum peccatum caussum esse, cur Deum non videamus.* Ergo creatura innocens Deum naturaliter videret.

Resp. dist. antec. solum peccatum est causa cur Deum non videamus, causa moralis, quatenus nos privat gratia sanctificante, qua obtinetur finis supernaturalis ad quem beneficio Creatoris fuimus ordinati, co. Causa physica, quæ nos privat penitus intelligentia, quam misericordissimus Deus gratuita liberalissimaque beneficiorum suorum participatione potest ad se convertere, & perenniter explere, nego. Est etiam peccatum alio sensu causa cur Deum non videamus. Nam si sermo sit de visione abstractiva, qua Deum videmus dum ambulamus per fidem, peccati poena est cæcitas mentis, in qua ei corporalium rerum imagines ita obversantur, ut ejus aciem non quidem extinguant, sed comprimant tamen, ac retardent; quum e contra Adamo ante lapsum vis intelligentiæ adesset jugis & splendidior, cujus ope posset summis rebus intendere, nullo phantasmatum fluctu, ac terrenarum curarum æstu turbatus. Si vero de visione loquamur intuitiva, quæ nobis in patria repromissa est, ea ob peccatorum maculas privamur, quoniam hanc mundis corde paratam esse divina testantur eloquia.

PROPOSITIO II. Neque a Deo creari potest rationalis substantia extra naturæ ordinem, quæ Deum naturaliter valeat intueri.

Hanc quæstionem, quam Scholastici amplissimam, difficillimamque reddiderunt, ex jactis fundamentis habes resolutam. Etenim
nulla

nulla creatura quantumvis perfecta efficere potest, ut Deus sibi præsens sit per modum objecti, & illius mentem moveat, nisi id pro suo beneplacito velit: Atqui ut Deus videatur intuitive necesse est ut Deus per modum objecti sit præsens: Ergo nulla creatura quantumvis perfecta potest naturaliter Deum videre.

Oppones: Dari potest accidens supernaturale, qualis est gratia, & virtutum theologalium habitus: Ergo dari potest supernaturalis substantia: Supernaturalis substantia posset virtute sua Deum intuitive videre: Igitur, &c.

Resp. dist. ant. potest dari accidens supernaturale, creaturarum, conditioni naturaliter debitum, nego: sponte, & ex divina liberalitate collatum, concedo. Et distingo conf. Ergo potest dari substantia supernaturalis, quam Deus naturaliter debeat in sui visionem movere, nego consequentiam: quam Deus in sui visionem moveat gratuito & libere, concedo consequentiam, & nego suppositum; ea enim substantia, quæ videret Deum motione ejus liberali, gratuita, & nulloatenus debita, non esset revera supernaturalis; nec naturali, sibi que indita virtute videret ipsammet Deum.

Hæc respondeo, ut evitetur modo quæstio de supernaturalibus auxiliis, atque habitibus, quæ sunt quidem accidentia, & intrinsece inhærent, sed non sunt fortasse mortuæ illæ qualitates, quas Theologorum vulgus invexit. Nam gratiam actualem quidam cum Suaresio in intima Dei assistentia sitam esse contendunt, quidam in actionibus indeliberatis ab ipso Deo præmovere perfectis, quidam in Dei motione quemcunque actum etiam indeliberatum præcedente: & qualitatem illam adhuc pluribus incompertam etiam Thomistæ aliqui rejecerunt, præsertim Joannes Gonzalez scriptor in hoc argumento clarissimus. Gratia itaque actualis est procul dubio supernaturale accidens respectu rationalis creaturæ, cui divina misericordia confertur, sed non est entitas parva, vel magna ab ipso Deo, ejusque concursu ad opus salutare distincta. Habitualis vero est ipsa participatio divinæ naturæ, sive forma, & modus quidam vitalis a Deo in anima excitatus, ci que inhærens, a quo recte ordinata & iusta fit permanenter, & unde confurgit in eadem anima vis, & facultas merendi, necnon promptius ac rectius supernaturaliter operandi, ipso Deo, ut diligentibus se spondit, apud eam veniente, & mansionem faciente, atque peculiari gratia vigorem extraordinarium superfundente. Hoc sensu dantur accidentia supernaturalia. Quæ, cum sint a Deo, vel ab ejus operationibus indistincta, non patiuntur a nobis etiam admitti rem aliquam per se subsistentem, sejunctam a Deo, & supra naturæ ordinem constitutam. Cujus repugnantiam abunde probat argumentum, quod suppeditat Augustinus lib. 11. de Civit. Dei cap. 2. dicens: *Quantumvis non omnis beata possit esse creatura; ea tamen quæ potest,*

rest, non ex se ipsa potest, quæ ex nihilo creata est, sed ex illo, a quo creata est. Ex quo igitur creatura sit ex nihilo, non potest natura sua esse beata, neque naturaliter eas perfectiones habere, quæ ordinem universæ naturæ superexcedunt. Atque ne vager longius: Detur substantia quæcunque possibilis. Habet ne Deus aliquid dependentiæ ab hujusmodi substantiæ vi intellectuæ? Minime gentium. Ergo, inquit Emmanuel Maignan Ph. sacræ cap. xv. Prop. 111. nullam habet intellectus divino inferior aciem tam perspicacem, ut ejus aspectui Deus se non valeat subtrahere.

C A P U T II.

Quod potest supernaturali lumine gloriæ rationalis Creatura Deum intueri, non autem illum comprehendere.

IN ALTERUM e diametro oppositum Eunomianis errorem septimo Christiani nominis sæculo inciderunt Armeni, qui intellectum creatum, neque superno suffultum lumine posse clara Dei visione frui præfæcte negaverunt. Quorum hæresim luculenter perstringit lib. xiv. cap. 1. Radulphus Archiepiscopus Armacanus. His vero accesserunt, impetrante Andronico Juniore, & Joanne Cantacuzeno, Thessalonicenses Monachi Palamitæ, contra quos steterunt Barlaamius & Acindynus, ut diximus cap. iv. præcedentis libri. Non enim putandum est, Barlaamum pluribus Græcorum Pseudosynodis damnatum partibus adhæsisse Palamæ, ejusque gregalium, ut ex Leone Allatio male refert Theologus alias accuratissimus Traët. de Vis. Del quæst. 1. dub. v. pag. 155. Assecebant autem Palamitæ isti, divinam essentiam, cum sit lux inaccessibilis, videri a Beatis tantummodo in quodam lumine increato & a divinitate diffuso ipsis etiam corporeis oculis aspectabili, eo ferme pacto, quo sol, in quem non possumus aciem figere oculorum, in radiis a se emissis conspicitur. Horum Græcorum hæresis sequenti exagitabitur capite, in quo de lumine gloriæ disputabitur. Nunc vero cum omnibus orthodoxe sentientibus sit,

PROPOSITIO I. Intellectus creatus superno aliquo lumine circumfusus potest Deum, ut in se est, intueri.

Aperte probatur 1. ex Dei verbo. *Beati mundo corde, quoniam ipsi Deum videbunt:* inquit Matth. cap. v. 8. *Videmus nunc per speculum in enigmate, tunc autem facie ad faciem:* Apost. 1. ad Corinth. cap. xiii. 12. & ibidem, *Nunc cognosco ex parte; tunc autem cognoscam sicut & cognitus sum. Similes ei erimus, quoniam videbimus eum, sicuti est.* 1. Joannis 111. 2. Et similiter de Angelis ait D. Matt. xv 111. 10. *Angeli eorum in calis semper vident faciem patris mei, qui in calis est.*

T. I.

Cc

lis est.

lis est. Quibus apertissimis divinarum Scripturarum repromissionibus accedit definitio Florentini Concilii sess. xxv. in decreto unionis, & Benedicti XII. in Extravaganti, *Benedictus Deus*. Ubi decernitur ex utraque corporibus Iustorum animas Divinam essentiam facie ad faciem videre.

Firmatur propositio PP. auctoritate. Quos inter Irenæus lib. iv. cap. 37. *Homines*, inquit, *videbunt Deum, & vivent per visionem, immortales facti, & pertingentes usque ad Deum*. . . . Ille autem volens videtur ab hominibus, a quibus vult, quando vult, & quemadmodum vult. Clemens Alex. lib. v. Strommat. *Perspicuum est enim, nullum unquam vitæ suæ tempore posse Deum perspicue comprehendere. Qui autem sunt mundi corde, Deum videbunt, postquam extremam perfectionem attigerint*. Comprehendere autem, ait Clemens, idest, clare percipere & intueri, quod in præsentī vitā aut nulli, aut paucis duntaxat concessum est. Gregorius quoque Nazianzenus orat. xx. a. Beatis ait, *Sanctam ac beatam Trinitatem videri purius, ac perfectius*. Idem tradunt Latine Doctores Ecclesiæ: Ambrosius Comment. in Lucam l. iiii. Novatianus de Trinit. cap. 26. Magnus Gregorius lib. xv. l. i. Moralium cap. 28. Prosper de vita contemplativa cap. 4. Bernardus serm. iv. in Festo omnium Sanctorum. Sed omnium disertissime Augustinus Epist. 111. & 112. Nec non lib. xii. de Gen. ad lit. 26. xxii. de Civit. Dei cap. 29. Tractatu xxv. in Ioan. & alibi. Unum tantum locum ex Epist. cxii. recitabo. *Si quæris, utrum Deus possit videri? Respondeo: Potest. Si quæris, unde sciam? Respondeo, quia in veracissima scriptura legitur, Beati mundo corde, quoniam ipsi Deum videbunt, & cetera talia. Si quæris quomodo dictus sit invisibilis, si videri potest? Respondeo invisibilem esse naturā; videri autem cum vult, sicut vult. Si quæris, utrum etiam sicuti est possit aliquando videri? Respondeo filiis hoc esse promissum, de quibus dictum est: Scimus quia cum apparuerit, similes ei erimus, quoniam videbimus eum sicuti est. Si quæris unde eum videbimus? Respondeo, unde Angeli vident, quibus tunc erimus æquales, idest, in Calis videbimus. Scriptum est enim, Angeli eorum in calis semper vident faciem Patris, qui in calis est*.

Probatur denique Theologica ratione. Potest homo per gratiam consequi ultimum finem suum, æternamque vitam, ac repromissam sibi perpetuam beatitudinem: Ultimus finis, sempiterna vita, atque repromissa beatitudo est visio divinitatis in se: Ergo potest homo per gratiam in se ipsa divinitatem conspiciere. Augustini est consecutio ista laudato nuper libro de Civit. Dei, ubi ait: *Premium itaque fidei nobis visio ista servatur*. Et 1. Confess. 1. *Fecisti nos Domine ad te, & inquietum est cor nostrum, donec requiescat in te*.

Opp. 1. Sacræ literæ aperte testantur Deum invisibilem esse, & inha-

inhabitare lucem inaccessibleē ; ita nempe Apostolus in 1. ad Timoth. 1. v. 17. & v. 1. Deinde hanc soli Filio privilegii tribuunt prærogativam , ut ipse solus noverit Deum Patrem , dicente Matth. cap. x1. 27. *Nemo novit Filium nisi Pater , neque Patrem quis novit , nisi Filius .* Et Joan. v1. 46. *Non quia vidit quisquam Patrem , nisi is , qui est a Deo ;* & cap. 1. v. 18. *Deum nemo vidit unquam : Unigenitus filius , qui est in sinu Patris , ipse enarravit .* Demum nec etiam Angelis facialis , ut appellant , Dei visio conceditur , quandoquidem ejus anguntur desiderio : ait namque Petrus Epist. 1. cap. 1. 12. *In quem desiderant Angeli prospicere .* Stant ergo contra assertum istud momenta Verbi Dei scripti luculentissima .

Resp. nego consequentiam . Primo enim ab Apostolo dicitur Deus invisibilis quoniam neque oculo corporeo cerni potest , neque naturali cujusvis intellectus acumine , neque visione comprehensiva , de qua postmodum . *Quia nec ista testimonia falsa esse possunt , Beati mundo corde , quoniam ipsi Deum videbant . Et , Scimus quia cum apparuerit similes ei erimus , quoniam videbimus eum sicuti est : negare non possumus filios Dei visuros Deum :* ait S. P. Augustinus Ep. 111. Ubi probat Deum ab Apostolo appellari invisibilem , divinamque lucem inaccessibleē , propterea quod non videtur in hoc sæculo , & in altero nonnisi oculis cordis , mente scilicet , & affectu . Filio autem soli perfecta Patris notitia iccirco tribuitur , quoniam ipse in paterno consistit sinu , & exquisitam habet , perfectissimamque cognitionem ; vel quoniam cum Patre habens cum divinitatis , tum scientiæ unitatem quidquid ei erat placitum & ejus consonum voluntati , intimus corde pernovit : vel demum quia Filius primus omnium cæli portas reservavit , nulli patentes , nisi quibus Patrem , fideique mysteria interioris gratiæ revelaverit illustratione . Quæ omnia ex Evangelicis verbis sunt manifesta : nam Matth. x1. hæc leguntur : *Neque patrem quis novit nisi Filius , & cui voluerit Filius revelare .* Et Joannis v1. statim sequitur : *Qui credit in me , habet vitam æternam .* Quamquam eo loco affirmat neminem Patrem vidisse suum , contra Judæos hæc submurmurantes : *Nonne hic est Jesus filius Joseph , cujus nos novimus patrem , & matrem ?* Quomodo ergo dicit hic : *Quia de cælo descendi ?* Verba denique Petri Epist. 1. si referantur ad Christum , vel ad Spiritum Sanctum , significant Angelos gaudere de Christi glorificatione , vel summa cum voluptate Spiritum Sanctum cum Patre Filioque intueri , non eo desiderio in quo est anxietas , sed eo desiderio , quod in completa satietate semper accenditur , prout exponit Hom. v111. in Ezech. Magnus Gregorius . At si referantur ad Fidei Sacramenta , ut plures contendunt , quod Græca , & Syriaca habeant constanter , *In qua , sic a non , in quem , is is* , prout & in Latinis nonnullis legitur , atque apud Ambrosium lib. iv. de Sacram. cap. 2. , & Isidorum Pelusiotam lib. 1. Ep. 119.

Estium quoque Comment. in hunc locum, Hugonem Grotium, &c; tunc apertissimus videtur sensus, Angelos magnopere exoptare Christianæ Fidei incrementum, & summo cum gaudio conspiciere præcognitam hominum redemptionem, dignitatemque Evangelii: de quo ait Paulus in 1. ad Timoth. 3. 16. *Et manifeste magnum est pietatis Sacramentum, quod manifestatum est in carne, justificatum est in spiritu, apparuit angelis, prædicatum est gentibus, creditum est in mundo, assumptum est in gloria.*

Opp. 2. Deus, cum sit infinitus, esse non potest creatæ ac finitæ potentiaæ objectum; debet enim inter objectum, & potentiam aliquam dari proportio: Intellectus rationalis creaturæ est finita, ac limitata potentia: Ergo Deus nequit esse istiusmodi intellectus objectum.

Resp. dist. majorem: Deus non potest esse objectum creatæ ac finitæ potentiaæ, naturali virtute sibi indita ac propria operantis, concedo: intima Dei omnipotentia, ejusque virtute illam præmovere & elevante, prodeuntis in actum, nego. Deus non est objectum intellectus creati per naturales vires percipientis, atque intuentis, sed ut videat abstractive incommutabilem veritatem, eget divino lumine intime illustrante, rectamque veri notionem exhibente; atque ut videat in se, & facie ad faciem, indiget eodem lumine nedum illustrante, sed etiam per modum objecti specialiter concurrente, & intellectum vividius excitante. Quod vero naturalis potentia supernaturali suffulta, virtute extra naturalem rerum sphaeram exire valeat, revocari non potest in dubium, quum credere, diligere, & vitam æternam promereri, quod perficere non possumus naturaliter, non sit nobis impossibile accedente auxilio divinæ gratiæ, & speciali Dei præsentia, & concursu.

Insurges: Corporeus oculus, ut videbimus infra, nulla supernaturali virtute elevari potest ad videndum in se, non dico Deum, sed nec Angelum: Atqui major est distantia inter intellectum creatum & Deum, quam inter oculum & angelum: Ergo, &c.

Resp. causam, cur oculus corporeus Angelum, aut Deum in se videre nequeat, petendam minime esse a potentia visivæ finitate, sed a modo, quo objectum attingit. Fit enim visio per hoc quod radii a re corporea exeuntes retinam feriant, & tot pressiones in nervi optici latitudinem imprimant, quot sunt diversi colores, aut diversi luminis gradus in omnibus partibus objecti. Quam retinæ latitudinem, pressionemque incidentium radiorum, speciem vocant, imaginem, ac similitudinem rerum corporearum: atque ita fit visio incisione, & refractione radiorum per quam retinæ capillamenta motuumque oriuntur excitationes, quarum occasione perficitur animæ sensus. At spiritualia non horum impressione simulacrorum, sed in seipsis, dummodo menti sint præsentia, conspiciuntur. Itaque dist. ma. Corporeus oculus

oculus elevari non potest ad videndum in se Deum, vel Angelum, propterea quod sit potentia finita ac distans a Deo vel Angelo; nego, propterea quod visus natura sua sit sensus, ac perceptio in sola imagine, ac simulacro corporalis objecti radiorum ordinata incidentia depicto, nervorumque motione ad mentem delato, concedo. Huc spectat responsio e scholarum trivio petita, inter oculum & Deum nullam esse proportionem neque *entitatis*, neque *habitudinis*.

Est tamen quorundam Philosophorum sententia, præsertim Maignani Philos. Nat. cap. xxxi. & Antonii le Grand part. i. cap. ix. posse Deum, vel Angelum oculis corporeis cerni etiam absque ullo assumpto corpore. Cum enim res corporeæ nullam aliam agendi vim habeant, quam ut moveant localiter; substantiæ spirituales videri possunt oculo corporis, si omnes motus exercent, quos exercet, dum videtur, substantia corporea. Atque, inquirunt, hoc modo expeditius intelligitur, quomodo angeli se visui mortalium exhibeant, statimque abscondantur, videlicet movendo organum, lucemque flectendo, ut flecteret ac moveret corpus assumptum; & pro sua voluntate hujusmodi motiones omittendo, quod est sese hominum visui subtrahere. In quorum sententia ad argumentum respondetur non repugnare quod Deus videatur ab intellectu creato & finito, licet sit increatus, & infinitus, quoniam videtur modo finito; quemadmodum licet sit incorporeus, videri potest ob oculo, quoniam videtur modo corporeo. Neque, si hæc concedantur, sequitur Deum videri posse oculo corporis in se, & facie ad faciem, quoniam videre modo corporeo, non est videre in se, sed videre in simulacro & imagine picta, ut diximus, in latitudine retinæ.

PROPOSITIO II. Intellectus creatus Deum videns non potest illum comprehendere.

Comprehensionis nomine non qualemcumque cognitionem, sed plenissimam hoc loco intelligimus; nam S. P. Augustinus epist. 112. ad Paulinam cap. 9. ait: *Aliud est enim videre, aliud est totum videndo comprehendere; quandoquidem id videtur, quod præsens utcumque sentitur: totum autem comprehenditur videndo, quod ita videtur, ut nihil ejus lateat videntem, aut cujus fines circumspici possunt: sicut te nihil latet præsentis voluntatis tua, circumspicere autem potes fuer anuli tui. Ex. gra. duo posui, quorum alterum ad mentis obiectum, alterum ad corporales oculos pertinet. Et serm. xxxv. de Verb. Dom. alterum proferit exemplum de homine, cujus videmus faciem, non autem illum comprehendimus, quod uno eodemque tempore faciem ac dorsum nequaquam aspicimus. Requiritur autem ad comprehensionem, ut præter essentiam rei tota illius cognoscatur efficientia, & quilibet effectus, qui potest inde manare; id est tam ea, quæ *formaliter*, quam ea, quæ *eminenter*, dicuntur inesse, Atque ita, ut com-*

comprehendatur sol, non sufficit lucem, caloremque percipere; sed etiam quicquid ejus continetur potestate ac virtute, aurum, lapides, plantas, & corpora alia, quorum habet vim effectricem. Ad comprehendendum itaque Deum opus est ut cognoscantur universa, quæ ipsius scrutatur intelligentia, aut potest infinita virtus producere. Alii Theologi comprehensionem diversimode accipiunt: sed illam hoc modo explicant fere omnes nostri, itemque Vasquesius, & Petavius, qui lib. vii. cap. 4. plura illorum, qui scripserunt contra Anomæos, ad comprehensionis naturam illustrandam recitat testimonia.

Probatur 1. Propositio ex sacris literis; quum Job cap. xi. 7. habeatur: *Forſitan veſtigia Dei comprehendes, & uſque ad perfectum Omnipotentem reperiſ? Eccl. xxxv. 26. Ecce Deus magnus vincens ſcientiam noſtram.* Ad Rom. xi. 33. *Incomprehenſibilia ſunt judicia ejus, & inveſtigabiles viæ ejus.* In quibus notandum eſt ita Deum incomprehenſibilem dici, ut nullibi aſſeratur quod plane comprehendī poſſit, non ſicut dicitur inviſibilis, quod non aſſeritur ubique & conſtanter, ſed viſio ipſius ſæpeſæpius promittitur: quod argumento eſt non videri nativa creati intellectus virtute, videri tamen per gratiam. Concilium quoque Lateranenſe cap. *Damnamus*, approbat, & definit, *Deum eſſe ſummam quamdam rem incomprehenſibilem.*

Tradunt id unanimi ſenſu Eccleſiæ Patres. S. Epiphanius hæreſi lxx. *Cum inviſibile illud, inquit, infinitum aſpicit, non quatenus infinitum eſt illud intuetur; ſed quantum illius, quod imbecillum eſt, natura capere poteſt.* Quod comparatione illuſtrat hominis per anguſtum foramen cælum aſpicientis, qui totam non videt illius altitudinem atque extenſionem. Chryſoſtomus Hom. iv. contra Anomæos: *Dei exquiſitam comprehensionem habere non poteſt Angelus, aut ulla creatura.* Et S. P. Aug. ſerm. cxviii. alias xxxviii. de Verbis Dom. *Si enim comprehendis, non eſt Deus. Sit pia confeſſio ignorantie magis, quam temeraria profeſſio ſcientie. Attingere aliquantulum mente Deum magna beatitudo eſt; comprehendere autem omnino impoſſibile.*

Probatur demum ratione. Tunc comprehenditur obiectum, quando nihil latet videntem, quando cum amplitudine rei cognitæ mentis æquatur cognitio, quando percipitur quicquid in re obiectæ continetur, & ab ea poteſt effici; quam comprehensionis ideam ſupra explanavi, illamque erudita tradit antiquitas, neque eam rejicit D. Thomas in i. contra Gentes cap. 56: Atqui non poteſt intellectus creatus & finitus hæc omnia percipere, cum latitudinem habeant infinitam, neque certus ſit divinæ potentie ac virtutis terminus; ſed procreari poſſint perfectiora in infinitum effecta: Non ergo poteſt mens finita & creata Deum comprehendere. Confirmatur: Ambroſius lib. v. de Fide cap. 7. Hilarius libro 9., alique Patres demonſtrant Filii divinitatem, quia in eo theſauri omnes ſapientie, & ſcientie Dei ſunt abſcon-

sconditi, novitque numerum omnium seculorum, suorumque operum virtutes omnes, & causas: Si ergo ad hanc sapientiæ plenitudinem quis pertingeret, possemus argumentatione simili demonstrare, hunc esse ejusdem cum Deo summæ perfectissimæque substantiæ.

Opp. 1. Beati vident Deum ut est in se, cognoscunt non ex parte, sed quemadmodum cogniti sunt, noscunt supereminentem caritatem scientiæ Christi, implentur in omnem Dei plenitudinem, scrutantur quæ sit latitudo, longitudo, sublimitas, & profundum. Hæc omnia divinarum Scripturarum sunt verba. Igitur Beati Deum revera comprehendunt.

Resp. nego conf. Potest enim objectum aliquod videri in se, & facie ad faciem, tamen minime tota ejus latitudo percipiatur, ut constat allatis exemplis hominis videntis per angustum foramen cælum, & intuentis faciem alterius hominis. Potest quoque totum videri objectum, & non ex parte, licet non comprehendatur, quando scilicet nihil latet videntem eorum, quæ *formaliter* sunt in re objecta; sed non attinguntur quæcunque ab ipsis pendent efficientia, ut explicavi comparatione videntis totam etiam, splendidissimamque lucem Solis. Potest cognosci, Dei bonitatem latissime in omnes homines se diffundere, & ex infima depressione miserrimos sublevare, quamvis hanc bonitatis amplitudinem, fundumque non possumus metiri, sicuti videmus e sublimi specula maris vastitatem non inspecto opposito littore, quo circumscribitur, & aquarum gurgite, quo impletur. Potest denique anima in plenitudinem felicitatis immitteri, & omni gaudio prorsus expleri, etsi totam non comprehendat divinitatem; ut potest vas in aquam totum immergi, eaque plenum fieri, etiam si capere solum possit minimam copiam aquarum.

Opp. 2. Beati totum Deum ita vident, ut nihil eos lateat: Videre objectum, itaut nihil lateat videntem, est illud comprehendere: Ergo Beati Deum comprehendunt. Ma.pr. Non potest res simplicissima, & carens partibus in se, & dilucide conspici, quin tota videatur: Deus est res simplicissima & carens partibus: Ergo &c.

Resp. dist. ma. Nihil eos latet earum perfectionum, quæ sunt in Deo *formaliter*, concedo; quæ sunt in Deo *eminenter*, nego. Constat responso ex dictis. Sunt qui his, ac similibus argumentis respondent, comprehensionem requirere æqualitatem & commensurationem cognitionis cum objecto, nempe, ut istud cognoscatur secundum omnes perfectionis suæ gradus. In quorum sententia, etsi Dei videretur plenitudo extensive, non foret tamen visio vere comprehensiva, quod non esset hujus cum re objecta adæquatio. Sed cum istud scholarum dogma improbeant eruditi viri quamplurimi; satius erit si hæc recente missa opinione, jamdudum impressis vestigiis gradiamur.

Dices: Beati divinam vident omnipotentiam: Divina omnipotentia

tentia connotat omnia quæ produci possunt a Deo, & quæ in eo continentur eminenter. Ergo Beati vident & ea, quæ sunt eminenter in Deo, atque illum comprehendunt.

Resp. eodem modo dist. majorem: Vident divinam omnipotentiam in se, idest divinitatem, ejusque vim effectricem creaturarum; conc. vident divinam omnipotentiam secundum id quod eminenter præcontinet, nimirum quasunque perfectiones creaturarum, quæ produci possunt a Deo, subdistinguo, communi quadam ac generali perceptione, quam efficit idea Omnipotentia, conc. peculiari ac distincta, quæ proficiscitur ab idea exhibente in particulari perfectionem singularum creaturarum, quas ipsa connotat Omnipotentia, nego. Scilicet ut videas sapientiam, providentiam, omnipotentiam, aliaque Dei attributa, sat est intueri divinitatem, quæ intelligit quidquid verum est, operatur quidquid bonum est, & producere valet quidquid possibile est. Ut vero divinitatem illam comprehendas, requiritur, ut clare percipias etiam objecta ipsa, & effectus, qui ad ipsam divinitatem quomodo libet referuntur.

C A P U T III.

Inquiritur in varias veterum, ac recentiorum de lumine gloriæ opinionationes.

SARTS fit ex antecedente cap. manifestum posse rationalem creaturam, si lumine illustretur superno, usque ad beatissimam Dei visionem pertingere, quod nativa ac naturali virtute minime potest assequi. Hujus superni luminis necessitatem demonstrat Viennense Concilium damnans Beguardos, & Beguinas asserentes, *Quod qualibet intellectualis creatura in seipsa naturaliter est beata; quodque anima non indiget lumine gloriæ ad Deum videndum, & eo beate fruendum.* Atque istud impium dogma priori cap. profligavimus. Inquirendum ergo, in quo necessarium illud lumen sit proprie constituendum; quod Concilium, ne Scholasticorum placitis definitionem Fidei immisceret, caute prætermisit.

Fuit ergo Gregorii Palamæ, aliorumque Græcorum sententia, lumen gloriæ esse lucem increatam, a divinitate diffusam, ab eaque distinctam realiter, etiam corporeis oculis aspectabilem. Pro quorum errore, supino quidem, atque inter hæresum monstrum censendo, hæc afferri possent momenta. Primo: Definitum est in Synodo Byzantina act. iv. sub Andronico Juniore, & Joanne Patriarcha contra Barlaamum, & Acindynum, lumen Transfigurationis Dominicæ increatum esse, & a divina substantia distinctum: idque Monachi omnes Thessaloni-

Ioniceses tam aperte demonstrarunt, ut in horum sententiam Synodus universa descenderit; ac demum Barlaamus ipse, ut refert Cantac. lib. 2. cap. 40. prodiens in medium, veniamque suppliciter petens propriam confessus sit ignorantiam, & causæ cesserit. Deinde, ut argutabatur David Monachus, Dei substantiam neque homo, neque Angelus videre potest, quum Deus inhabitet lucem inaccessibilem: videtur itaque in lumine, quod est quidem increatum & a Deo emanans, sed non divina substantia. Præterea sic argumentatur Philotheus; Quemadmodum sol ab oculo, ita Deus ab intellectu videtur: At sol non potest videri ab oculo, nisi radiis ab illo effusis; nam si quis propius accedere tentat, ob luminis immensitatem exurit, & excæcatur: Igitur neque Deus lux inaccessa & invisibilis conspici potest ab intellectu, nisi in lumine quodam divino a se profluente. Postremum Græcorum illorum argumentum est: Lumen gloriæ est regnum Patris, paratum sanctis ante mundi constitutionem: Regnum Patris æternum est, & increatum: Ergo æternum, & increatum est lumen gloriæ.

Verum contra hanc absurdam Palamitarum opinionem immotum stat fundamentum, quod præmissum est cap. v. superioris libri Prop. III. Quidquid est, aut Deus est, aut creatura: Lumen illud non est Deus: Ergo est creatura. Tum illud Barlaami, & Gregoræ: Quod oculis corporeis visum est, non est lumen increatum ac divinum: Thaborium, lumen corporeis oculis visum est a discipulis: Ergo Thaborium lumen divinum, & increatum non erat. Hæc autem adeo sunt inconcussa, ut ipse Cantacuzenus Gregorii Palamæ studiosissimus cap. 39. scripserit: *Ut legatus Patrum verba ei recensuit, ad cetera quidem se continuit: lucem autem in Thabor increatam audiens, O rem absurdam, exclamavit; fumum enim fugientes in ignem incidimus. Audi ealum, & auribus percipe terra. Lux in Thabor increata: quid ergo illa aliud, nisi Deus secundum vos? nihil enim increatum, nisi Deus. Si autem lumen illud neque res condita, neque Dei natura est, (Deum enim nemo vidit unquam) quid reliquum, nisi vos duobus Diis servire, uni quidem omnium fabricatori, quem & inaspectabilem omnes confitemur: alteri vero & sententia vestra sub aspectu cadenti, & increato lumini?* Cui argumentationi plura Cantacuzenus ipse, & Philotheus Patriarcha reponunt, sed futilia verba sunt, ut observat in notis ad Hist. Cantac. Gretserus.

Argumentis autem superius positis facillime occurritur. Nam ad primum dico Synodum illam Byzantinam, aliasque habitas in causâ Barlaami & Acindyni, non esse œcumenicas, ut falso putat Prateolus, sed Schismaticorum Græcorum ab Ecclesiæ sinu, & veritatis fideique lumine aberrantium. Præterea neque certum est eam Synodum, præsertim cui Barlaamus interfuit, aliquid de increato lumine decrevisse; sed, si quid statutum est, evenit postquam Barlaamus Byzantio disces-

. To. I.

D d

ferat,

ferat, frigidius catholicam veritatem subistente Acindyno. Quamquam vero Cantacuzenus scribit, Barlaamum a Palama publice convictum & propriam confesum ignorantiam, omnem diligentiam pro errore emendando impigre se adhibiturum promississe; Gregoras tamen lib. x. narrat noluisse Imperatorem, ut de his, quæ ad dogmata spectabant, ageretur, & Barlaamum sub vesperam spectaculo Synodali absoluto, ignominiam gravissime ferentem, plenis velis in Italiam, & ad Latinorum instituta quibus erat educatus, rediisse. Secundum autem argumentum, quod in relatione de dissidio Barlaami, & Palamæ refert David Monachus, si quid efficeret, probaret tantum errorem, qui olim apud Armenios invaluit, non posse divinitatem in se videri, & quem paullo ante impugnavi. Tertium nihil est præter anilem delirationem; quippe supponit operationes ac proprietates Dei realiter distingui a divina substantia, quemadmodum splendor solis a sole. Postremum denique potest ultro concedi; nam regnum æternum paratumque ante mundi constitutionem nihil est aliud, quàm ipse Deus, qui olim dixit Abraham: *Ego merces tua magna nimis.*

Refutata opinione Græcorum, videndum est de communi Scholasticorum sententia. Uno ore affirmant lumen gloriæ esse qualitatem, & habitum supernaturalem infusum a Deo intellectui Beatorum, quo is ad videndum intuitive Deum elevatur. Quod Theologi probant his argumentis; ac primo: Non minus est permanens in beatis lumen gloriæ, quàm sint in viatoribus fides, spes, caritas, & aliæ supernaturales virtutes: Istæ sunt quidam habitus, & qualitates creatæ, & a Deo infusæ: Ergo qualitas & habitus creatus, & infusus a Deo, est etiam lumen gloriæ. Rursus: Requiritur lumen gloriæ non ex parte objecti, cum illud sit summe intelligibile, sed ex parte potentiæ, quæ perfici debet, & ad actum supernaturalis visionis expeditam adipisci facultatem: Intellectus vero non potest hoc modo perfici, nisi creatam qualitatem a Deo infusam recipiat. Denique: Lumen gloriæ neque Deus est, neque ipsa visio, ut Nominales arbitrantur: Non est Deus, nam alias damnari non debuissent Beguardi, quandoquidem non negarent Deum ad beatam visionem intervenire; neque est ipsa visio, quia Viennense Concilium definiit requiri lumen ad visionem Dei, ideoque sufficenter hanc ab illo fecernit: Atqui si lumen gloriæ non est Deus, neque ipsa visio, necesse est, ut sit qualitas creata, & habitus supernaturalis animæ infusus: Ergo, &c.

Huic sententiæ tam firmiter adhærent D. Thomæ, ac B. Aegidii Discipuli, ut affirmant, neque divinitus fieri posse quod absque huiusmodi creato lumine divina videatur substantia: quod sequentibus demonstrant argumentationibus. Non potest, inquit, oculus carnis videre solem nisi ejus lumine affectus: Ergo neque intellectus Deum, nisi ipsius fulgore ac lumine irradiatus. Ad hæc: Non sufficit ad videndum

dendum Deum in se uberior concursus, ut Scotistæ, Tournely, Duhamel, & communiter existimant recentiores, cum istiusmodi concursus nihil ponat in potentia, sed solum influat in actum: Requiritur ergo superinfusa aliqua virtus creata, quam lumen gloriæ propter munus mentem illustrandi compellamus. Tertio, ut arguit Contensonius, tametsi Deus supplere possit causæ secundæ efficientiam, & producere Ex. gr. lucem absque sole, non potest tamen efficere, ut causâ aliqua effectum producat absque intrinseca virtute producendi, & sol illuminet non formatus vi illuminandi: Non ergo efficere potest ut intellectus divinitatem in se attingat, nisi suffultus sit supernaturali luminis gloriæ virtute.

Ab hac communiori sententia nonnulli recedunt, qui existimant lumen gloriæ idem esse cum specie impressâ, quam maior pars Theologorum docet esse eandem divinam essentiam unitam menti beatorum. Et quidem nullam dari claram imaginem ac similitudinem Dei, quæ creatâ sit, reüssime probat D. Thomas, quoniam per similitudinem inferioris ordinis nullo modo superiora possunt cognosci; non enim per speciem corporis spiritum possumus intelligere, neque per similitudinem hominis angelum: & consequenter neque per creatam imaginem Aeternam divinamque intueri naturam. Neque vero species & imago tam pura & defæcata potest produci, ut inaccessibilem lucem valeat quomodolibet adæquare. Quam D. Thomæ doctrinam divinitus revelatam noster appellat Aegidius. Putat ergo Emmanuel Maignan cap. xv. Philos. Sacræ Prop. vii. lumen gloriæ esse eandem speciem Dei impressam, scilicet divinam essentiam conjunctam cum intellectu creato objective: quod probat ex corporeæ lucis analogia. Si enim, inquit, species coloris nihil aliud est, quàm lux suis radiis retinam feriens, quod communiter dicitur species intentionalis; neque erit lumen gloriæ aliud, quàm ipsa lux divinitatis intellectui beatorum conjuncta. Hac autem sententia, ait præcedente propos. vi., optime conciliantur diversæ Doëtorum sententiæ, quorum alii tradunt lumen gloriæ se tenere ex parte objecti, alii vero ex parte potentie. Nam cum sit conjunctio divinæ essentie cum intellectu, & objectum & potentiam simul importat. Neque singularis est hæc opinio Maignan, sed eam antiquissimi aliqui Scholastici tradiderunt, quos refert noster Gavardi Tom. 1. Scholæ Aeg. pag. 671. Atque a specie impressâ indistinctum esse lumen gloriæ putat etiam Vasquesius, sed non existimat, divinam essentiam uniri immediate beatorum menti per modum speciei intelligibilis; quod etiam sentit noster Lusitanus, & Argentinas: falso tamen, ut infertur ex dictis.

Parum ab hac sententia distat Dionysius Petavius, qui lib. vii. cap. 8. num. iv. duo notatu digna tradit: unum est, quod nemo hætenus liquido demonstravit, qualis sit hujusmodi actiuosa facultas, qua

ad videndum Deum spiritualis natura fulcitur. Alterum, quod ex veterum doctrina videtur potius ad objectum, quam ad potentiam intellecticem referri. Antiquiores enim beatissimam illam lucem Deum ipsum interpretantur, ut Plotinus Enn. v. lib. 111. c. 17. ubi de Deo inquit: *Hic verus est animæ finis lumen illud attingere: & per ipsum ipsum intueri: non alterius, inquam, lumine contueri, sed per ipsummet, per quod & videt. Per quod enim illuminata est, idipsum est quod videri oportet.* Quibus similia habet S. P. Augustinus lib. 1. de Peccat. meritis cap. 19. In Petavii itaque sententia, nullum est lumen gloriæ, præterquam ipse Deus; quamvis inquirendo potius hæc scribit, quam rem obscurissimam definiendo.

At Ludovicus Thomassinus lib. vi. cap. 16. num. viii. & seqq. nedom arbitratur lumen gloriæ, quod a pluribus annis increbuit, increatum & a divinitate indistinctum; verum etiam esse specialiter personam Spiritus Sancti beatorum mentes illuminantem. Profert vero in hujus sententiæ confirmationem locum insignem Basilii lib. de Spiritu Sancto cap. 18., & alterum Gregorii Nysseni Orat. in S. Steph., qui disertissime docent, Spiritum Sanctum esse lumen illud divinum, de quo PCxxxv. *In lumine tuo videbimus lumen.* Addit ex istorum, aliorumque Patrum doctrina, quod sicut non possumus videre Patrem nisi per Filium, ita neque Filium videre possumus nisi per Spiritum Sanctum, quem Filii imaginem ac similitudinem etiam Athan. in Epist. ad Serapion. & Cyrillus Alex. in xxxi. 1. Theſ. nuncupaverunt. Ita inquit constare quo pacto beati videant Deum, & Deus tamen videri non possit nisi a seipſo, quia vis, & potentia qua videtur est Spiritus Sanctus, species in qua videtur est Filius; & mens creata sub hac specie, & in hoc lumine delitescens Deum videt. Hæc ille Tom. 1. Th. Dogmat. P. 392.

In expositis Theologorum placitis ubique aliquid offenditur difficultatis. Communior Scholasticorum opinio vera est in quantum locat lumen gloriæ in habitu & qualitate supernaturali elevante potentiam: sed in eo quod sitam plures volunt naturam istius habitus in entitate creata ab anima & intellectu distincta, mihi, ut verum fatear, non probatur. Quæ est enim tam efficax & speciosa entitas inanimis & mortua, quæ inter creaturam & Deum, inter finitum & infinitum inducere possit adæquationem? Et si modo ad recte de veritatibus mutabilibus judicandum eget anima, ut diximus lib. 1., incommutabili, & increato lumine veritatis: multo magis superno & increato lumine opus erit ad videndam in se & facie ad faciem ipsam divinitatem, veritatemque immutabilem. Contra opinio Maignani in eo placet quod lumen gloriæ a divina natura unita per modum speciei inseparatum constituat; sed munus luminis gloriæ non satis exponit. Sicuti enim Gratiæ supernaturalis non est sola unio Deitatis per modum speciei intelligi-

gibilis, hanc enim gratiam non negabat Pelagius, qui admittebat propositionem ac manifestationem objecti sub nomine legis ac doctrinæ, sed necessaria est ulterius E. G. ad fidem qualitas supernaturalis confortans & elevans intellectum ac voluntatem: ita ad visionem Dei non sufficit unio objecti ad potentiam, nisi huic superaddatur qualitas & habitus quidam supernaturalis, ut communiter tenent Scholastici. Præterea: Beguardi qui dicebant naturaliter posse videri Deum, consequenter affirmabant divinam naturam naturaliter uniri animæ per modum speciei intelligibilis, & tamen negabant necessitatem luminis gloriæ: Ergo ad lumen gloriæ præter unionem divinæ essentiæ per modum speciei aliquid aliud requiritur. Ob eandem rationem non satis exacta videtur sententia Petavii existimantis lumen gloriæ ad subjectam rem, non ad videndi potentiam pertinere. Ultima Thomassini opinatio, me quidem iudice, penitus falsa est. Recte siquidem Patres contra Macedonianos & Arianos demonstrant Spiritum Sanctum eandem habere divinitatem cum Filio, eandemque Filium cum Patre, quia illustratione Spiritus Sancti cognoscitur Filius, & revelatione Filii dignoscitur Pater, eo quod res inferioris ordinis non possunt ideam rerum exhibere superiorum. At ratio luminis gloriæ non potest specialiter uni Personæ, & non aliis quadrare; tum quia omnes æqualiter in patria sese exhibent aspectabiles; tum quia indivisa sunt opera Trinitatis, quæ communibus & inseparabilibus attributis exercentur. Addo totam Trinitatem esse unum lumen inaccessible, neque de Patris splendore veram fidem tenentibus separari Filium, & Spiritum Sanctum, ut probat lib. 20. contra Faustum Magnus Augustinus. Ergo si Pater non videtur proprio lumine, neque videbitur lumine Spiritus Sancti, cum sit idem lumen, unum, inseparabile & indistinctum. Quæ cum ita sint, ex præfatis omnibus scitis, ne trochi in morem agamur, profero theorema istud.

PROPOSITIO: Lumen Gloriæ est ipse Deus, sive divinum & increatum lumen beatorum menti intime affulgens, suoque fulgore ac motione imprimens illi qualitatem & habitum; qui tamen non est entitas quædam realiter distincta ab anima, sed ejus ordo, affectio, & modificatio.

Quod lumen gloriæ sit ipse Deus intime præsens probatur. I. Ex Scripturis, quibus omnes Theologi probant hujus luminis necessitatem. Ps. xxxv. 10. legitur: *Apud te est fons vitæ, & in lumine tuo videbimus lumen*. Is. lx. 19. *Non eris tibi amplius sol ad lucendum, per diem, nec splendor lune illuminabit te: sed eris tibi Dominus in lucem sempiternam, & Deus tuus in gloriam tuam. Non occidet ultra sol tuus, & luna tua non minuetur: quia eris tibi Dominus in lucem sempiternam*. Apocal. xxi. 23. *Et civitas non eget sole, neque luna, ut luceant in ea: nam claritas Dei illuminavit eam, & lucerna ejus est*

est *Agnus*: & xxii. 5. *Non egebunt lumine lucernæ, neque lumine solis, quoniam Dominus Deus illuminabit illos.* His verbis designari lumen gloriæ Theologi omnes fatentur: Atqui non aliud innuitur lumen præterquam ipsum Dominum, & Agnum, idest Verbum Patris: Ergo ipse Dominus, ejusque increatum divinumque lumen est lumen gloriæ.

Probatur 2. ex PP. præsertim Augustino, qui lib. de moribus Eccl. Cath. cap. xi. ait. *Secutio igitur Dei beatitatis appetitus est, consecutio autem ipsa beatitas. Ac cum sequimur diligendo, consequimur vero non cum hoc omnino efficiatur quod est ipse, sed ei proximi, eumque mirifico, & intelligibili modo contingentes, ejusque veritate, & sanctitate penitus illustrati, atque comprehensi. Ille namque ipsum lumen est, nobis autem ab eodem illuminari licet.* Lib. xii. de Gen. ad lit. *Aliud est autem ipsum lumen quo illustratur anima, ut omnia vel in se, vel in illo veraciter intellecta conspiciat. Nam illud ipse Deus est, hoc autem creatura: quamvis rationalis & intellectualis ad ejus imaginem facta, quæ cum conatur lumen illud intueri, palpat infirmitate, & minus valet. Cum ergo illuc graditur, & a carnalibus subtracta sensibus, illi visioni expressius præsentatur, non spatiis localibus, sed modo quodam suo etiam supra se videt illud, quo adjuncta videt quidquid etiam se intelligenda videt.* In Ps. xxxv. *Si lumen est, oculos meos parem.* Serm. 284. *Lumen est, accede, cape, vide.* Et lib. 1. de Peccat. mer. c. 19. *Verumtamen si percepto baptismo de hac vita emigraveris, soluto reatu, cui originaliter erat obnoxius, perficietur in illo lumine veritatis, quod incommutabiliter manet in æternum, justificatos præsentia creatoris illuminat.* Hoc loco male scribit Petavius lib. vii. cap. 8. indicari aliquod lumen a divina essentia diversum: quod enim incommutabiliter manet in æternum est idem Deus.

Theologi, qui admittunt lumen creatum, respondebunt allata Scripturæ & Augustini testimonia intelligenda esse de luce objectiva, non de ea quæ se tenet ex parte potentiæ: sed liquido ex dictis constat tam lucem objectivam, quam illam, qua Deus videtur, esse idem divinum lumen; & eandem sempiternam divinitatis lucem eam esse, quæ videtur, & in qua videtur: quæ conspicitur, & quæ illuminat: ad quam acceditur, & quæ capitur: qua illustratur anima, & quæ conspicitur. Non ergo inter lucem objectivam & inter eam quæ se tenet ex parte potentiæ aliquod intercedit discrimen.

Ratione ita hæc propositionis pars suadetur. Requiritur lumen gloriæ ut Deus in se videatur, quod intellectus finitus & creatus disponi debeat ad objectum supernaturale, quod longe ipsius naturam excedit: Qualecunque creatum lumen non potest ita intellectum disponere ut clare videat Deum, qui omnem creatam potentiam supergre-

ditur:

ditur: Ergo quaecunque creatum lumen non potest esse illud lumen gloriæ, quo Deus in se videatur. Deinde: Sicuti impossibile est per similitudinem inferioris ordinis superiora repræsentari & cognosci, ita impossibile est per lumen ordinis inferioris superiora videri, Ex. grat. per lumen candelæ cælum, per lucem solis angelum: Sed ex quo per similitudines rerum inferiorum superiora repræsentari non valeant, D. Thomas 1. P. q. xii. art. 2. recte probat non esse possibilem speciem impressam creatam, quæ Deum, ut in se est, repræsentet: Ergo ex quo lumine ordinis inferioris superiora non videantur, infertur non esse possibile lumen creatum, quo Deus videatur, ut est in se. Denique: Lumen gloriæ nihil aliud præstat, quàm mentem illustrare, movere, ac perficere: Solum lumen divinum abunde illustrat, roborat, perficitque mentem beatorum, cum in se virtutem omnem perfectionemque contineat: Ergo solum lumen divinum est lumen gloriæ.

Quod vero præter intimam præsentiam increati luminis requiratur qualitas, habitus, seu animæ modificatio probatur I. Quia ex definitione Viennensis Concilii necesse est ut elevetur potentia. Deinde quia sola intima præsentia objecti non sufficit ad visionem, alias quilibet etiam viator, ac damnatus videret Deum; qui ubique est per suam immensitatem, nobisque semper intimior, ut ait Augustinus, intimo nostro. Tercio quia anima videndo Deum perficitur simul ac movetur; sola autem Dei præsentia neque perficit, neque movet.

Ergo ad primum communioris sententiæ argumentum respondeo habitum fidei, spei, & caritatis esse qualitatem creatam & infusam, non quod sit entitas quædam distincta ab anima, sed affectio, modificatio, & veluti impressio in ipsa anima divinæ efficientiæ ac virtutis: eo fere modo, quo figura & imago facta impressione sigilli nihil est aliud, quam subjecti dispositio, & affectio. Est igitur lumen gloriæ & lumen increatum, & qualitas etiam & habitus: lumen increatum si accipiat pro lumine, quo anima perenniter illustratur; habitus & qualitas creata, si accipiat pro affectione animæ, quam causat divinum lumen. Ita solares radii sunt lumen simul, & species intentionalis: lumen quatenus illustrant oculum; species, quatenus feriunt retinam, & axem opticum imprimunt. Ad secundum respondeo, utique lumen gloriæ se tenere etiam ex parte potentiæ, quoniam objectum intime præsens minime videretur, nisi sese in mentem imprimeret, nec advertentiam, ad quam creatura nativam virtutem non habet, supernaturali efficientia produceret. Ad tertium dico lumen gloriæ esse quidem Deum interiori splendore deitatis propriæ affulgentem, sed ultrius animam efficientem & illustrantem; & merito damnatos Beguardos, quoniam affirmaverant videri divinam essentiam solo lumine naturalis intelligentiæ, non lumine increato ac divino, de quo legitur: *In lumine tuo videbimus lumen.*

Con-

Conciliantur autem ex dictis discrepantiæ Theologorum, quorum aliqui negant etiam de potentia absoluta videri posse divinitatem in se absque lumine gloriæ, alii ex opposito affirmant. Etenim videri potest absque lumine aliquo creato, & qualitate infusa distincta realiter ab anima: & videri non potest absque intima præsentia Dei mentem creatam moventis & elevantis.

Ad argumenta Maignani dico lumen gloriæ esse quidem divinam essentiam unitam intellectui beatorum, sed huic unitioni addendam esse dispositionem, & qualitatem effectam a Deo non solum intime unito, sed etiam operante, ac movente. Atque hoc sensu exponendæ quoque sunt Patrum auctoritates, quas conjecturam faciendo laudat & profert Petavius.

Ad Thomassini placitum assero, præter dicta, Spiritum Sanctum dici lumen gloriæ, quia istud non attinet ad naturæ ordinem, sed ad gratiam, cujus auxilio supernaturalia opera efficiuntur. Spiritui enim Sancto gratiarum tribuuntur charismata. At quemadmodum lumen, quod videtur non est sola Spiritus Sancti persona; ita lumine, quo videtur, non est solum Spiritus Sancti auxilium.

Oppones rursus. Visio beatorum est actio immanens vitalis: Actio immanens vitalis requirit principium intrinsecum animæ inherens, quod non potest esse Deus, cui repugnat alteri, tanquam forma, inherere: Ergo, &c. Confirmatur; etenim in voluntate ad amandum supernaturaliter Deum necessaria est gratia, quæ intrinsece animæ inheret.

Antiquiores quidam Theologi, inter quos Mayron in 111. sent. dist. x11. q. 2. resp. animam videndo & intelligendo non agere, sed pati; ideoque disparem esse inter intellectiorem voluntatemque rationis causam; plus enim ad agendum, quam ad patiendum prærequiritur. Et quidem humanam mentem intelligendo pati assentiuntur simul Platonici, & Cartesiani, qui docent haberi perceptionem ex quo mens a Deo informetur rerum ideis, ut II. parte lib. 3. de veritatis inquisitione explicat insignis Philosophus Nicolaus Malebranch, Purchotius 2. parte Metaph. sect. 111. cap. 4. &c. *Quin* & veteres Peripatetici perceptionem spectare docent ad intellectum, quem vocant *possibilem*. At quia intelligendi opus exigit quidem ideas rerumque imagines, quibus mens formatur humana; sed indaginem quoque veritatis, contemplationemque, qua mens excitata objecti impressione aut se convertit ad externa, aut quodammodo in seipsa recluditur; ideo conc. majori, dist. minorem: Actio immanens, & vitalis requirit principium intrinsecum, quod sit forma quædam, & qualitas distincta ab anima, nego: quæ sit ipsa anima simul cum intima præsentia Dei illam efficienter adjuvantis, ac moventis, concedo.

Ad confirmationem dico: quemadmodum lumen gloriæ est Deus illu-

illustrans mentem & efficaciter voluntatem inflammans ad videndum ipsum Deum, eoque perenniter, beateque fruendum: ita gratia est Dei misericordia, & voluntas sanctam cogitationem, & bonum voluntatis motum operans. Atque hoc pacto tam lumen gloriæ, quam gratiæ auxilium, increatum, & creatum dicuntur; idest, increatum, quatenus sunt Deus ipse animæ illapsus ac præsens; creatum vero, quatenus sunt animæ elevatio ac motio vi effectrice Dei præsentis & operantis producta, ut supra dixi. Addo quoque responsum eorum, qui docent lumen gloriæ esse quidem habitum & qualitatem distinctam ab anima, sed absolute suppleri posse per uberiores concursus Dei; scilicet quod lumen non est formalis causa, neque principium vitale; quoniam causa formalis visionis est ipsamet actio mentis: vitale autem dicitur, quod procedit a principio vitali intrinseco, non quod ab exteriori producit causa; unde fit quod lumen gloriæ concurrat ad visionem Dei tantum efficienter, ut probat art. 2. concl. 3. Tournely. Quamquam Deus & principium intrinsecum est, & operationum animæ potentior causa, quam sit qualitas quæcunque creata, tametsi rationem nullam habere possit partis, ac formæ; ut ait lib. 3. cap. 4. I. B. Du-Hamel. Sed de lumine gloriæ satis differuisse mihi videor,

C A P U T IV.

*An Palamitarum errori Chrysostomus, Theodoretus,
& Hieronymus præluferint?*

SCRIPSIT Chrysostomus contra Eunomium, & Aetium Dei naturam adeo sublimem ac impenetrabilem esse, ut Angelorum quoque, prorsus superet intelligentiam: eumque plures cum Græci, tum Latini nominis Patres secuti sunt. Hinc abrepta ab incolis Montis Atho occasio asserendi quod Deus videtur in lumine, sive effluvio divinitatis, non autem in se. Vix Chrysostomum posse excusari censet Gabriel Vasquez disp. xxxv. 1. cap. 2. & 3. ubi in deteriorem partem trahit alios quamplures. Dubitatur autem præ ceteris de Hieronymo, & Theodoro: nam si possunt hi ad veram sententiam accommodari; conciliabuntur facile & alii, quorum dicta ambigua sunt & obscura. Defendunt autem istos contra Vasquesium, aliosque paucissimos, omnes fere pii, doctique Theologi; ac præter illos, qui in Sententiarum libros commentaria ediderunt, Sixtus Senenf. lib. vi. Biblioth. ann. 182. Ferdinandus Vellofilius in Advert. ad tom. 1. Chrysost. quæst. v. Natalis Alexander sæc. iv. cap. v. art. xxx. Dupin. tom. 111. Biblioth. Petavii lib. vii. cap. v. & vi. Capisuccus in controversiis, &c.

Serio autem in hac, aliisque circa Patrum mentem disputationibus
To. I. E e bus

bus est observandum, qua occasione, & quibus emergentibus hæresibus scripserint. Videntur enim aliquando in partes declinare extremas, oppositasque adversariis. Ita Cyrillus in suis contra Nestorium Anathematismis scopum dissertationum ejus non attendentibus visus est ad Eutychianos deflectere, & ubi unam adstruit Christi personam, duplicem negare naturam. Atque Augustinus adversus Pelagianos originale peccatum, & Salvatoris gratiam demonstrans visus quandoque est imperitis ad partes accessisse Manichæorum, & ubi necessitatem prædicat gratiæ, arbitrii tollere libertatem. Itaque exorta Aetii & Eunonii nefaria hæresi, Catholici PP. clamabant Deum esse invisibilem, idest ejus naturam comprehendi non posse, neque evidentibus rationibus explicari.

PROPOSITIO I. Chrysostomus non visionem Dei in se, sed solam comprehensionem possibilem esse negavit.

Affero ex eodem Chrysostomo testimonia luculentissima. Homil. 111. in epist. ad Philipp. *Justi, inquit, sive hic, sive ibi cum Rege sunt: atque ibi quidem multo magis propius, non quasi quodam interjecto vestibulo, non per fidem, sed facie ad faciem.* In Paræn. 1. ad Theodorum lapsus: *Quid dicemus quando regis cubiculis adaptis intueri licebit ipsum Regem, non per speculum nec per anigma, sed facie ad faciem: non amplius inquam per fidem, sed per speciem? Et in Oratione de S. Philogono: Hic quidem nemo Deum vidit: illic autem qui adsunt, perpetuo vident, quatenus illum videre licet, non solum præsentem, verum etiam gloriæ splendore condecorantem cætum.*

Deinde Chrysostomus animadvertens fore ut aliqui summam ei petulantiam objicerent, quod ne supremis quidem Virtutibus Deum comprehensibilem esse affirmaverit, diserte Hom. XIV. in Joannem docet, se creaturis illam denegare cognitionem, quam de Patre habet Filius, idest perfectam, & infinitam, & quæ divinam substantiam, ejusque efficientiam exhaurit. Hunc vero seipsum interpretandi canonem ac regulam tradit. *Quoties audis Deum nullum vidisse, illud intellige, nullum esse qui Dei substantiam exquisita ratione perceperit.* Ex quibus sic argumentor: *Qui tradit justos in patria videre Deum facie ad faciem, non tamen habere plenissimam divinitatis cognitionem, quam habet divinum Verbum; is proculdubio negat tantummodo possibilitatem comprehensionis, non visionis beatæ: Chrysostomus docet justos videre Deum facie ad faciem, sed non adeo exquisite ac plene, quemadmodum videt Filius: Ergo Chrysostomus non beatæ visionis negat possibilitatem, sed solius comprehensionis.*

Opp. 1. Chrysostomus Hom. 23. in Genes. ait, *Divina glorie fulgurantem majestatem neque Cherubim, neque incorporea illa Virtutes videre possunt, sed averſa facies tegunt objectis alis:* Et Hom. 14. in Joann. *Id quod est Deus non modo propheta non viderunt, sed neque* An-

Angeli, neque Archangeli. Idem affirmat Hom. 2. 3. & 4. de incomprehensibili Dei natura. Igitur possibilitatem visionis Dei revera negat Chrysostomus.

Resp. hæc de visione perfecta, & exquisita, cui adæquatur objecti intelligibilitas, esse accipienda. Constat responsio ex dictis, ex scopo Chrysostomi, ex præmissis contextibus, & ex verbis, quæ citata Hom. XIV. subjicit: *Multi Deum cognoscimus, & tamen ipsam substantiam, qualis est, solus ejus Unigenitus cognoscit, qui certam notionem, visumque, & comprehensionem habet, qualem Filium de Patre habere par est.*

Insurgit Vasquesius: Citata Hom. XIV. ait Chrysostomus: *Si eos percuntaberis*, (idest Angelos) *nihil ab his de Dei substantia audies, sed tantum referentes: Gloria in altissimis Deo, &c.* Igitur aliquid de substantia Dei enarrare non possunt: At narrare possent, si intuitive viderent: Ergo intuitive non vident.

Resp. narrari, & explicari non posse divinam, altissimamque naturam vocabulo aliquo exprimente quidquid in se Deus est, ut dixi lib. II. cap. 1., sicut enim circumscribi non potest termino, ita explanari non potest voce; ut auctoriter putabant Aetii, & Eunomii gregales. Distinguo itaque primum conf. Angeli aliquid de substantia Dei enarrare non valent, quod perfecte divinam cognoscibilitatem, & notitiam adæquet, quam habet Unigenitus in sinu Patris; concedo: Aliquid enarrare non possunt ulla prorsus ratione, subdistinguo, quia Deum non vident; nego: quia Dei natura etiamsi videatur mente, non potest designari verbis; concedo. Plura namque percipi possunt, quæ narrari non valent, ut de arcanis mysteriis, quæ vidit Paulus in raptu, ait 2. ad Corinth. XI. 4. *Non licet homini loqui.*

Insistit Vasquesius: Anomæi non adeo erant insani, ut sibi comprehensionem cognitionem arrogarent; non ergo de comprehensione contra eos agit Sanctus Antistes.

Resp. neg. ant. De Eunomio enim scribit idem Chrysostom. Homilia II. de incomprehensibili Dei nat. *Ausus est homo dicere, Deum novi, ut ipse Deus seipsum novit. Hæcine confutatione indigent? Hæcine demonstratione? An non satis est, hæc sola verba proferre, ut tota eorum impietas reveletur? Etenim hæc insania est perspicua, amentia inexcusabilis, &c.* Et Hieronymus in cap. II. Matth. *Erubescat Eunomius, inquit, tantam sibi notitiam Patris & Filii, quantam alterutrum in se habeant, vindicans.*

Opp. 2. Chrysostomus cognitionem Angelorum, quam de Deo habent, appellat revelationem, & indulgentiam ei similem, qua sese Deus Patriarchis, & Prophetis manifestavit.

Resp. id quidem recte contra Anomæos; ut videlicet ostenderet visionem Dei non pertinere ad naturalem vim intelligentiæ, sed esse

gratiæ beneficium ipsa fide, & prophetici spiritus illustratione præstantius.

Opp. 3. Ut probet Dei invisibilitatem, Chrysostomus utitur exemplo oculi corporei, atque idem de oculo affirmat & de intellectu Angelorum: Oculus corporis nullatenus videt Deum, ut est in se: Ergo per Chrysostomum neque oculus mentis, sive intellectus.

Respond. Quemadmodum ad visionem oculi requiritur imago radiis circumfusis, & in tunicas, humoresque inflexis finita ac picta, ita ad comprehensionem necessaria est quod veritas & virtus objecti sit in mente undequaque nota, & circumscripta; unde infinitum nulla ratione potest a creatura comprehendi. Dist. itaque majorem. Chrysostomus idem affirmat de oculo corporis, & de oculo mentis; idest, docet Deum immensum atque infinitum nulla posse finita intelligentia comprehendi, sicut non potest ulla sensibili specie repræsentari, concedo: idest, putat eandem vim ac potentiam inesse sensibus, ac menti; nego majorem.

Opp. ultimo: Afferit Hom. xiv. Deum visum ab Angelis solummodo post assumptam humanitatem.

Resp. Post assumptam humanitatem visum fuisse ab Angelis divinum Verbum speciali quodam modo comprehensum & circumscriptum, non in sempiterna substantia, sed in forma servi, & in similitudine hominum.

PROPOSITIO II. Ut Chrysostomus, ita Theodoretus immerito erroris in hac quæstione a quibusdam infimulatur.

Sese abunde purgat Theodoretus sequentibus locis. Comment. in epist. ad Ephes. tom. III. suorum operum ait: *Nunc bonorum, quæ sperantur, magnitudo est quidem omnino ignota fidelibus. Per fidem enim ambulant, non per speciem: tunc autem videbunt facie ad faciem.* Et in vita S. Jacobi Anachoretæ, Collectis, inquit, *undique multis prophetis, multisque Apostolis, & Martyribus quamplurimis omnes una in arca reposuit, cum sanctorum populo habitare cupiens, & cum eis resurgere, divinoque conspectu potiri.* Habet similia in vita S. Eusebii. Itaque hinc ratio ista depromitur: *Qui vident facie ad faciem, & divino potiuntur conspectu, Deum, ut in se est, intuentur: Justorum animæ per Theodoretum vident facie ad faciem, divinoque conspectu & contemplatione potiuntur: Ergo per Theodoretum Deum, ut in se est, intuentur.*

Opp. 1. Theodoretus in Dialogo, qui inscribitur Atreptos, idest, *Immutabilis*, ait: *Impossibilis est hominibus, imo etiam Angelis divina natura contuitus.* Et in cap. 14. epist. 1. ad Corinth. *Hic videmus symbola Dominici corporis: illic autem ipsum Deum videbimus; id enim significat facie ad faciem. Videmus autem ejus, non quæ sub aspectum non cadit, naturam, quæ a nullo cerni potest: sed eam, quæ de nobis sum-*

sumpta est. Ergo Theodoretus facie ad faciem solam Christi humanitatem videri testatur, non vero inaccessible divinamque naturam.

Resp. Theodoretum priores tres Dialogos conscribere contra Eutychianos, qui cum unicam assererent in Christo naturam, consequenter putabant etiam divinam in terris apparuisse. Quoniam vero Hæreticus, quem Heranistem vocat, plures errores ex superioribus hæresibus simul confuerat, ut in Præfatione Atrepti Theodoretus declarat, ob Anomæorum qui tunc grassabatur errorem, divinam essentiam indiscriminatim vocat invisibilem, ea nempe visione, quam arrogabant sibi Eunomiani, comprehensiva, ac plenissima. Dist. itaque ant. Impossibile est per Theodoretum divinæ naturæ contuitus, corporeis oculis, ut existimabant Eutychiani, concedo; oculis mentis, subdistinguo, contuitus modulo rationis nostræ attemperato, qualem statuunt Orthodoxi, nego: exquisitus ac plenus, qualem jactabant Anomæi, conc. Hujus autem distinctionis priorem partem tradit aperte eodem Dialogo Theodoretus, ubi postquam asseruit divini Verbi incarnationem ex Baruch v. 15. *Post hæc in terris visus est, & cum hominibus conversatus est:* & ex Apostolo 1. ad Timoth. 6. *Deus manifestatus est in carne;* ait: *Apte ergo divinus dicit Apostolus, Deus manifestatus est in carne. Per hanc siquidem apparuit natura, quæ cerni non poterat. Per hanc illam quoque viderunt Angelorum turma: visus est enim, inquit, Angelis. Nobiscum igitur hujus doni particeps facta, est etiam incorporea natura.* Nimirum Angeli post incarnationem Dominicam viderunt Deum indutum humanitate, qui non poterat divinitate comprehendere; ut dixi præced. prop. ad ult.

Quod vero Theodoretus deneget Angelis solam visionem plenam & comprehensivam, constat ex eodem Dialogo; ubi postquam comparavit visionem Angelorum ei, quam & Prophetæ & Patriarchæ habuerunt degentes adhuc in terris, excludere se comprehensionem, quam sibi Actiani arrogabant, satis indicat dicens: *Sic ergo de Angelis intelligamus audientes quod semper vident faciem Patris nostri: non vero vident divinam substantiam, quæ nec circumscribi, nec comprehendendi, nec mente percipi potest, & quæ universa comprehendit.* Commentariis autem in Epist. 1. ad Corinth. constat sermonem instituire de Christi humanitate, cui recte potest accomodari illud Apostoli: *Videmus nunc per speculum in enigmate; tunc autem facie ad faciem.* Nam videndi quoque Salvatorem nostrum flagramus ardore, quem adoramus speciebus ac symbolis velatum in Sacramento Corporis sui. Quo inflammatus ardore idem Apostolus ad Philipp. 1. 23. *Coarctor, inquit, desiderium habens dissolvi, & esse cum Christo.*

Opp. 2. Trahitur a nobis Theodoretus in hunc sensum, quoniam in Comment. Ep. ad Ephes. fatetur Justos aliquando visuros Deum facie ad faciem: Atqui hoc etiam loco loquitur de Humanitate Christi: Ergo nul-

go nullo fundamento ad communem sensum ille pertrahitur. Pr. minor; nam recitatis verbis hæc subnectit: *Videbunt naturam pro nobis assumptam, ab omni creatura adoratam, & sanctos una regnantes.*

Resp. dist. mi. Loquitur Theodoretus de humanitate Christi, quæ sola sit aspectabilis fidelibus, & infidelibus post corporum resurrectionem in extremo Judicio, concedo: quæ sola sit visibilis beatis Animabus in Paradiso Sanctorum, nego. Distinguit illic Theodoretus quod videbunt Justi, qui ambulant per fidem, & quod videbunt fideles simul, & infideles. De Justis affirmat visuros magnitudinem bonorum, quam vident modo per speculum & in ænigmate: de utrisque ait, quod aspicient assumptam a divino Verbo naturam. *Fideles*, inquit, *vident tanquam in speculo & in ænigmate: per fidem enim ambulant non per speciem: tunc autem videbunt facie ad faciem.* Et statim: *Fideles & infideles videbunt naturam ex nobis sumptam, &c.* Itaque per Theodoretum qui ambulant per Fidem videbunt facie ad faciem ignotam nunc bonorum omnium amplitudinem, quam credunt ac sperant; Infideles vero solam Redemptoris humanitatem, non illam beatitudinis plenitudinem, quam præparavit Deus diligentibus se. Ergo Fideles ac justi præter sumptam a nobis naturam, sempiternam quoque ac divinam intuebuntur.

PROPOSITIO III. Neque D. Hieronymus visionem divinitatis in se credidit esse impossibilem.

In Commentariis ad 1. Esaiæ caput v. 10. scribit S. Hieronymus: *Homo igitur Dei faciem videre non potest. Angeli autem etiam minorum semper vident faciem Dei. Ex nunc in speculo videmus & in ænigmate, tunc autem facie ad faciem, quando de hominibus in angelos profecerimus, & potuerimus cum Apostolo dicere: nos autem omnes revelata facie gloriam Dei speculantes in eandem imaginem transformamur a gloria in gloriam, quasi a Domini spiritu.* Quæ Epistola 112. explicans Augustinus ait: *In his verbis hominis Dei multa consideranda sunt. Primum quia secundum apertissimam Domini sententiam etiam ipse sentit tunc nos visuros faciem Dei, cum in Angelos profecerimus, quod erit utique in resurrectione mortuorum.*

Dices: Ait ibidem Hieronymus: *Faciem Domini secundum naturam suam proprietatem a nulla videri creatura.*

Resp. non videri quidem divinitatis naturam juxta sui proprietatem, scilicet plene, & tam exquisita cognitione, quæ illius æquare possit infinitatem.

Quoniam vero hujus generis plurima reperiuntur in Patribus, propter quæ a Vasquesio adducti sunt in suspensionem erroris; triplicem, ad illorum sensum deprehendendum aperio viam. Ac prima est, si eos interpretemur de oculis corporeis, quibus omnino redditur invisibilis substantia spiritualis & inextensa. Et quidem *visio* usitatissima significatione

tionem corporis sensum videtur potius designare, quàm mentis : ut enim in 1. Periarchon scribit Origenes, sive germanus ille, sive Rufini fraudem depravatus, *Aliud est videre, aliud cognoscere. Videre & videre, corporum res est : cognosci & cognoscere, intellectualis naturæ est.* Hinc Joann. xx. 19. & innumeris Scripturæ locis, verbo *videndi* sensus comprehenditur, seu corporalis substantiæ contuitus. Altera via planissima & expedita est, si Patrum dicta accipiamus de comprehensione, de qua S. P. Augustinus ait : *Ideo Deum nemo vidit unquam, quia eam, quæ in Deo habitat, plenitudinem divinitatis nemo conspexit, nemo mente aut oculis comprehendit.* Quo sensu Theodoret & Chrysostomi verba paullo ante ad dogma Catholicum revocavimus. Postremo plura de præsentis vitæ statu, præsertim vero juxta nativam mentis capacitatem possunt exponi ; de qua priori capite disputavimus. Hanc triplicem rationem ac viam ostendit lib. v. 1. Bibl. S. Sixtus Senensis : is eam acceperat a D. Thoma 1. P. q. xii. art. 1. ad 1., qui præsertim secundum interpretandi modum amplectitur : & Angelicus Doctor ex Augustino laudata Epistola 112. modo 114. ad Paulinam. In qua Epistola S. P. priorem viam aperit cap. 5. dicens : *Corporalibus oculis non quaritur, nec circumscribitur visu.* Secundam cap. 6. ubi ait : *Plenitudinem divinitatis nemo comprehendit.* Tertiam ac ultimam cap. 14. scribens Deum *invisibilem esse naturæ, videri autem, cum vult, sicut vult.* Tanto Magistro non erit perdifficile Ambrosii, Eucherii, Anastasii, Theophylacti, Euthymii, aliorumque sensa deprehendere.

C A P U T V.

Num juxta Augustinianam Theologiam Dei natura oculis cerni possit corporeis.

CORPORALIBUS oculis Deum esse invisibilem universa fatetur Theologorum caterva, ita ut mirentur aliqui eximium Ecclesiæ Doctorem Augustinum in re tam manifesta ac patente dubium ancipitemque extitisse. Imo vir clarissimus & in assidua veterum lectione versatus non solum Sanctum Parentem dubium natæ scribit ; verum etiam aliquando oppositum opinantis partes agere, & ne tolerabilem quidem opinionem explicare. Petavii lib. v. 11. Theolog. Dogmatum cap. 11. num. 3. istud judicium est. At habet Augustinus in Sacrarum disciplinarum palæstris innumeros ac strenuissimos Defensores ; qui tenent perspicacissimæ mentis Patrem nullibi asseveranter contrariam vulgari opinioni tradidisse sententiam. Ego vero omnium minimus non solum Augustini ingenuam probo doctrinam ; sed fidenter quoque pronuncio, præstantissimum Ecclesiæ Doctorem & firmissime Deum carnis oculo invisibilem tradidisse, & circa hanc veritatem nunquam penitus dubitasse.

tasse. Atque id lubentius affirmo, quod præter Augustiniani instituti Scriptores certum istud ratumque habeant Thomassinus lib. vi. cap. xv. Juenin dissert. iv. art. 3. Cardinalis Gotti Tract. de Vis. Dei Quæst. 1. Dub. v. Tournely Qu. x. art. 1. Habert cap. xiv. Paragraph. iv. Boucat Tom. 2. dissert. 1. art. vii. alique quamplurimi.

Ut vero juxta Augustini principia quæstio solvatur, & simul ejus auctoritas vindicetur, recolendum est, quod monui cap. 2. prop. 1., in hoc sitam esse oculi naturam, ut ad ejus visionem requiratur, quod anima sese convertat ad contemplandam rem objectam non immediate in se, vel in idea congenita, sed in imagine, quam radii a singulis objectorum punctis procedentes, & in tunicas & humores inflexi mirabili naturæ magisterio pingunt in retina. Quapropter visio suapte natura exigit, ut per eam exteriora cernantur objecta, eaque partibus singulis, tanquam pennicillis, in oculi fundo exaratis, non in se inspiciantur: quod si fieret, non sensus perageretur, sed intellectio. Eadem enim anima & sentit & intelligit: sentit ac videt ministerio oculorum, dum per radiorum impulsus fertur in simulacra vi exteriori depicta: intelligit, dum ad internas ac per se notas ideas convertitur.

Notandum præterea ætate Augustini fuisse nonnullos etiam Episcopali præditos dignitate, qui asserbant in altera vita futurum fore, ut Deus corporalibus oculis videatur, quam opinionem S. P. Epistola 92. alias 6. refellit, veramque dementia appellat. Sed cum quidam Episcopus Augustiniana Epistola illatam sententiæ suæ notam conquereretur, & assereret post generalem corporum resurrectionem carnales oculos evasuros spirituales & alterius naturæ, & consequenter ad videndam in se divinitatem idoneos; Augustinus singulari modestiæ exemplo, & pacis servandæ laudabili studio dedit ad Fortunatianum Epistolam 148. olim 111. in qua veniam enixe precatur, si quid in præcedenti acerbius a se scriptum fuerit: repetens tamen recta fide tenendum esse quod Deus, cum sit incorporeus, est omnino oculis carnalibus invisibilis. An vero post resurrectionem corpora alterius futura sint conditionis ac naturæ, ut efficiantur spiritualia, propter commotum Episcopum definire non existimat opportunum: sed tamen argumenta profert invicta, quibus hæc postrema opinatio impugnatur, quam merito dicit tolerabiliorem priori, idest arbitrantium quod Deus videri possit oculis hujus corporis: *quia, inquit, conatus mentis utcumque ferendus est volentis corpus convertere in spiritum; non in corpus Deum*. Pollicetur autem se de hoc corpore spirituali alibi disputaturum: quod præstat Epist. 147. alias 112. & lib. xxiii. de Civit. Dei cap. 29. ita tamen, ut ubique propendeat in sententiam negantem corpus illud spirituale, de quo unicuique liberum relinquit opinandi quidquid sibi videbitur magis accedere ad veritatem.

Distinguenda est igitur duplex quæstio; una, in qua Augustinus con-

constantissime perficit, & negantem sententiam propugnauit, possit ne diuinitas cerni corporeis oculis: alteram, quam prudentissime indefinitam reliquit, sed propriam nihilominus aperuit mentem, num corpora resurgentium erunt spiritualia. Quibus prænotatis ostendam 1. Augustinum firmissime tradidisse, quod Deus nulla ratione videri potest oculo corporali: deinde quod prudenter definire noluit questionem de spirituali corpore resurgentium: ulterius quod hæc nullo modo spectat ad præsentem disputationem; & denique, licet istam arbitrio reliquerit opinantium, se tamen stare pro contraria sententia satis manifestasse, atque spiritualia resurgentium corpora negauisse.

PROPOSITIO I. Augustinus affirmavit Deum invisibilem esse corporeis oculis, non dubitanter, sed assertive.

Hanc propositionem probo apertissimis ejusdem Augustini testimoniis. Nam lib. 1. de Trinit. cap. 6. ait: *Videri autem Trinitas humano visu nullo modo potest.* Et lib. VII. cap. 4. *Non enim est corpus, ut carnis oculis inquiratur.* Lib. de serm. Dom. in monte cap. 2. *Quam ergo stulti sunt illi, qui Deum istis exterioribus oculis quarunt, cum corde videatur.* Et Epist. ad Italicam 6., nunc 92. *Deus est lux mentium purgatarum, non istorum corporis oculorum. Erit ergo tunc mens idonea, qua illam lucem videat, quod nunc nondum est. Hoc autem oculus videre corporis neque nunc potest, neque tunc poterit.* Et prope finem ejusdem Epistolæ: *Multa proferri possunt ad istam dementiam refutandam. Ad hoc enim fide corda nostra mundantur, quia nobis fidei merces visio Dei promittitur. Quæ si per corporis oculos erit, frustra ad eam percipiendam Sanctorum animus exercetur.* Hanc vero sententiam tanta constantia tenuit Augustinus, ut male eam quibusdam audientibus, Epistola CXLVIII. ad Fortunatianum Siccensem Episcopum ita scripserit: *Sicut præsens rogavi, & nunc commoneo, ut fratrem nostrum, de quo collocuti sumus, videre & rogare digneris, ut ignoret tibi si quid durius & asperius in se dictum accepit in ea Epistola, quam me modo scripsisse non pœnitet, quia dixi istius corporis oculos nec videre Deum, nec esse visuros. Causam quippe adjunxi cur hoc dixerim, ne scilicet Deus ipse corporeus esse credatur, & in loci spatio intervalloque visibilis. Nihil enim videre aliter istius Corporis oculus potest. Et ne illud quod dictum est, facie ad faciem, sic accipiatur, tanquam membris corporis terminatus sit Deus. Ideo me ergo dixisse illud non pœnitet, ne de ipso Deo tam impie sentiamus, ut eum non ubique totum, sed per localia spatia divisibilem existimemus. Talia quippe his oculis novimus.* Non video quid his manifestius possit proferri.

PROPOSITIO II. Augustinus nedum tradidit oculis carnis non posse conspici Deum, sed ipse omnia suppeditavit argumenta, quæ profuerunt in hac questione Theologi, & alia longe clariora his, quibus utuntur vulgares Scholastici.

Theologi probant oculum corporeum non posse ad visionem at-
tollī divinitatis triplici genere argumentorum, Scripturis, Patribus,
ac ratione. Scripturis, quia locis citatis cap. 1. Prop. 1. Deus dicitur
invisibilis, & cum non sit invisibilis mente, consequitur quod sit invi-
sibilis carnali oculo. Patribus, quoniam id asserunt Ambrosius, Hier-
onymus, & alii. Ratione, quia spiritalia non sunt objectum po-
tentiae corporeae: Atqui haec omnia disertissime tradidit Augustinus:
Ergo Augustinus ipse argumenta omnia suppeditavit, quibus probant
Theologi Deum cerni non posse oculis corporalibus. Prob. iii. Augu-
stinus Epistola xciii. ad Italicam n. 3. exponens textum Apostoli 1. ad
Tim. 6. *Lucem habitat inaccessibilem, &c.* Per hoc, inquit, *videri ab*
homine non potest, per quod videt homo corpore corpora. Nam si
mentibus piorum esset inaccessibilis, non diceretur Ps. 33. Accedite
ad eum, & illuminamini: & si mentibus piorum esset invisibilis, non
diceretur: Videbimus eum sicuti est. Alia scripturarum loca eodem
modo S. P. exponit Epist. 147. alias 112. cap. 9. & 148. olim 111. cap. 3.
Priorem ergo argumentationem ex Scripturis petitam idem Augusti-
nus Scholasticis prae monstravit. Alteram ex Patribus quis Augustino
tradidit luculentius? Eadem Epistola cxlviii. cap. 6. recitat plura ex
Comment. Ambrosii in Lucam lib. 1. cap. 3. Inter quae haec habentur:
Nec in loco Deus videtur, sed mundo corde; nec corporalibus oculis
quaritur, nec circumscribitur visu, nec tactu tenetur, nec auditur
affertur, nec sentitur incessu. Alia profert cap. xi., alia cap. xiv.,
alia cap. xxiii. n. 7. Sanctus autem Hieronymus ait: (haec Augustinus)
Videre Deum sicuti est in natura sua, oculus hominis non potest: & n. 9.
Alio loco evidentius dicit, non solum Patris divinitatem, sed nec Filii
quidem & Spiritus Sancti, quae una in Trinitate natura est, posse oculos
carnis aspicere, sed oculos mentis. Igitur Augustinus nec argumen-
ta praetermisit, quae a Patrum auctoritate petuntur. Rationem autem,
qua utuntur Theologi, asserit magnus Augustinus Epist. ad Italicam
n. 3. scribens: *Omne quippe quod oculis corporis conspici potest, in loco*
aliquo sit necesse est, nec ubique sit totum, sed minore sui parte minorem
locum occupet; & majore majorem. Non ita est Deus invisibilis & in-
corruptibilis. Vide & Epist. 148. n. 1. Quilibet ergo Scholasticorum
argumenta, quibus probatur divinam substantiam invisibilem esse cor-
poris oculis, S. P. Augustinus praevit, protulit, illustravit.

Praeter ea, quae Scholasticis sunt communia, quaedam ille produ-
cit clarissima & apertissima. Primum est a natura oculi, quae, ut prae-
notavi, est potentia attingens objecta externa in imagine radiorum ad-
miniculo picta, non percipiens in se immediate res intime praesentes,
nam hoc munus est intellectus. At Augustinus apposite hoc utitur ra-
tiocinio Epist. 148. num. 2. ubi ait: *Istius namque corporis oculos dixi*
non visuros Deum, hoc intuens quod istius corporis oculi omnino non
possunt

possunt cernere nisi corpora, quæ ab eis aliquo loci intervallo separata sunt: nam si nullum intervallum sit, nec ipsa corpora per eos videmus. Quibus similia habet S. Fulgentius ad Inquisit. 3. Ferrandi. Ex quo sequitur Deum videri non posse oculo corporis, quoniam intime præsens est menti.

—Deinde utitur S. Pater exemplis aptissimis. Quorum primum est depromptum ab aliis sensibus: de quibus scribit in Epist. ad Italicam, n. 5. *Cur solis oculis corporeis hoc donum attributum esse contendunt, non autem ceteris sensibus? Sonus ergo erit Deus, ut possit etiam auribus percipi? Et halitus erit, ut sentiri possit olfactu? Et liquor aliquis erit, ut possit bibi? Et moles erit, ut possit et tangi?* Aliud exemplum petit ex caritate, de qua Epist. 147. n. 44. ait: *Ecce etiam caritas quantulacumque in nostra voluntate consistit, nobisque conspicua est, nec in loco videtur, nec corporalibus oculis quaritur, nec circumscribitur visu, nec tactu tenetur, nec auditur affatu, nec sentitur incessu; quanto magis Deus ipse, cujus hoc pignus in nobis est?* Tertium exemplum ingeniosissime affert ex hac eadem disputatione; petit enim cap. 16. illius Epistolæ a Paulina, utrum ea, quæ vera esse discernit ex jam propositis ac disputatis, videantur mente, vel corpore. Et postquam ostendit videri intellectu, non sensu: *Iis ergo, quæ vides* (inquit) *diligenter fidenterque perspectis atque distinctis, attende, quæ credis in hoc ipso sermone, &c.* Quorum argumentorum hæc vis est: Si posset corporalibus oculis divinitas in se videri, posset & tangi, & bibi, & olfactu, halituque sentiri: posset videri caritas, fides, veritas, & mentis perceptio, quæ solo animo discernuntur. Atqui nullus affirmat nosse Deum ut in se est, manibus, auribus, naribusque sentiri, vel sub carnalium oculorum aspectu cadere virtutes, animique passiones. Ergo nullus pariter debet asserere, quod oculis carnalibus possit divinitas videri immediate in se ipsa.

PROPOSITIO III. Utrum post Resurrectionem Beatorum corpora futura sint spiritualia, & oculi alterius ab istis naturæ, est alia quæstio a precedenti: & hanc S. Pater prudentissime non definiit.

Evidenter hanc propositionem demonstrat S. Pater Epist. cxlvi. 1. num. 49. scribens. *Sunt autem alii Deum quidem ipsum corpus non esse minime dubitantium; sed ideo eos, qui ad vitam æternam resurgent etiam per corpus Deum visuros putant, quoniam talem sperant spiritualis corporis qualitatē, ut etiam ipsa quæ caro fuerat, spiritus fiat. Quod si ita est, quantum distat a superiori opinione, & quam sit tolerabilius, etiamsi verum non sit, puto facillime judicari. Primum, quia multum interest, utrum de Creatore, an de creatura aliter aliquid sentiantur, quàm veritas habet. Deinde, quia conatus mentis, utcumque ferendus est, volentis corpus convertere in spiritum, non in corpus Deum. Postremo quia id quod ego in Epistola mea dixi de istis nostræ*

carnis oculis, quia neque nunc possunt, neque tunc poterunt Deum videre, etiam sic verum est: non enim dictum est nisi de oculis corporalibus, quod tunc non erunt, si corpus ipsum spiritus erit; ac per hoc corporei oculi nunquam Deum videbunt, quia cum videbitur, spiritus eum, non corpus videbit.

Ratione quoque probatur. Affirmare quod Dei natura cerni possit corporalibus oculis, quum isti, ut constat ex dictis, non possint cernere nisi corpora, est impie sentire de Deo, illumque per localia spatia facere divisibilem; quæ est hæresis Anthropomorphitarum & Audianorum: credere autem quod corpus ex animali resurgat spiritale, ut videre possit substantiam incorporealem, nullisque membrorum lineamentis ac finibus terminatam, non est aliquid impium de Deo sentire, neque illum intervallis locorum circumscribere. Ergo qui affirmat in generali resurrectione corporeos oculos spiritualis futuros esse naturæ, non affirmat oculos posse, dum carnales sunt, & corporei, divinam in se videre naturam: & consequenter hæc quæstio longe diversa est a priori.

Quod vero S. P. prudenter se gesserit, dum quæstionem hanc in suspensio reliquit, probatur. Quæstio utrum Deus videri possit oculis carnis duplici sensu agitabatur, ut constat ex eadem Epist. cap. xx. Aliqui præsumebant Deum esse corporeum, & consequenter posse videri corpore: & aliqui fatebantur Deum esse incorporeum, posse tamen videri oculo corporis, si corpus vertatur in spiritum. Prima sententia est hæresis Anthropomorphitarum: altera est quæstio pure philosophica: illa falsa est, & sacris literis & rationi adversatur; hæc, licet sit falsa, difficile exemplis & Scripturarum auctoritate potest convelli. Ut prior sententia refutetur, satis est si demonstretur Deum non posse videri oculo corporali: ut impugnetur altera, necesse est ut demonstretur corpus animale non esse in spiritus naturam transitorium. Jam vero ita argumentor. Prudenter se gerit quisquis hæreticam impugnaturus sententiam illam undequaque exagitat, & philosophicas quæstiones aut prætermittit, aut ad illam hæresim evertendam detorquet: Augustinus, dum probat carnales oculos non posse Deum cernere, impugnat hæresim Anthropomorphitarum opinantium Deum esse corporeum; & contra hanc hæresim detorquet philosophicam quæstionem, quia si necesse est ut oculi spirituales evadant ad hoc ut possint videre Deum, jam Deus non est corporeus; & ex alia parte quæstionem hanc philosophicam non definit; Ergo Augustinus prudenter se gessit.

Si dixeris, Cur ergo Augustinus quæstionem de Corpore spirituali pertrahat citata Epistola cxlvii. eamque repetit lib. xxi. de Civit. Dei cap. 29. ubique nutans, & anceps? Responso est in promptu. Dixi, contra Augustini librum de videndo Deo, sive Epistolam cxlvii. vel

vel alteram xcii. ad Italicam missitasse Episcopum quemdam Audianum; de quo scribit Fortunatiano alteram exemplari plenam humilitate. Ne Audianus Episcopus perfisteret asserendo Deum esse corporeum, propterea quod videri debet in cælo, respondet argumentis jam recitatis, quod videri quidem debet, sed mundo corde, ac mente, non oculo. Ne insurgeret Audianus, esse opinionem multorum, quod Deus videri quoque debeat oculo corporis; ne alio disputationem avertat, statim Augustinus reponit, ne in horum quidem sententia consequi Deum esse corporeum, quoniam hi talem sperant spiritalis corporis qualitatem, ut etiam ipsa, quæ caro fuerat, spiritus fiat; & per hoc spiritus Deum videbit, non corpus. An non undequaque premit Anthropomorphitam, & propria sententia, & etiam aliena, quæ illi opponebatur? Placide ad hanc revertitur citato lib. de Civit. Dei: disputat de corpore spiritali; nec ibi quæstionem definit. Id fateor: non ei occurrunt certa exempla, aut divinæ testimoniis scripturarum; at negat tamen oculos elevari posse ad visionem Dei, nisi in naturam transeant spiritualem, semper in quæstione dogmatica sibi constans, & adhuc hæsitans de Philosophica.

PROPOSITIO IV. Tametsi Augustinus noluit definire quæstionem de Corpore spiritali, quam aliqui Catholici eo tempore propugnabant, demonstrat tamen accurate se hanc nequaquam probare.

Attende, quæso, Augustini mentem, maximamque prudentiam. Primo Epistola 147. alias 112. hanc de corpore spiritali sententiam appellat tolerabiliorem hæresi Audianorum, sed tamen falsam. *Quantum distet, inquit, a superiori opinione, & quam hoc sit tolerabilius, etiamsi verum non sit, puto facillime judicari.* Deinde cap. xxi. ait videri sibi, quod hæc de spiritali corpore opinio, aut tollat naturam corporis, aut conduplicet essentiam spiritus: *Eo modo quippe, aut conduplicabitur substantia spiritus, si & corpus spiritus erit; aut si unus erit spiritus hominis, itaut commutato, & converso in spiritum corpore, neque geminatione, neque incremento conduplicetur, nec omnino ullius accessu quantitatis augeatur; metuendum est ne nihil aliud dici videatur, quam corpora non illa mutatione immortalia mansura, sed nulla potius futura, & omnino peritura.*

In lib. autem de Civit. Dei ubi disputationem reassumit: *Aut ergo per illos oculos, inquit, sic videbitur Deus, ut aliquid habeant in tanta excellentia menti simile, quod & incorporea natura cernatur, quod ullis exemplis, sive scripturarum testimoniis divinarum vel difficile, vel impossibile est ostendere? Aut, quod est ad intelligendum facilius, ita Deus nobis erit notus atque conspicuus, ut videatur spiritus a singulis nobis, in singulis nobis, videatur ab altero in altero, videatur in seipso, videatur in cælo novo, & in terra nova, atque in omni quæ tunc fuerit creatura; videatur & per corpora in omni corpore.*
quo-

quocunque fuerint spiritualis corporis oculi acie perveniente directi. idest in effectibus, in quibus causa cognoscitur, quemadmodum in motibus corporis videtur anima, ut ait S. Thomas q. xii. art. iiii. ad 2. imo idem Augustinus eo loco dicens: *Aliorum quisque vitas, cum sint indivisibiles, per corpus videt*, &c. Vide Augustinum suipius Interpretem disertissimum.

Accedit quod Augustinus Scripturæ loca, quæ Dei visionem promittunt, non de corporeis oculis accipit, sed de oculis mentis & cordis non solum Epistola 147. num. 37. & 39. & Ep. 148. num. 17. verum etiam lib. laudato de Civit. Dei xxix. cap. 29. & alibi. Ex quibus ita argumentor. Augustinus revera in eam sententiam non propendit, quam vocat tolerabilem sed falsam, quam putat tollere naturam corporis, quam ad intelligendum difficiliorem existimat, & qua nunquam asseveranter utitur in exponendis Scripturis; Talis est sententia de corpore spirituali: Ergo non propendit in eam Augustinus. Quare autem in eam alternat fluctuatque? Recte quidem, ac sapienter. Primo quia hæc erat plurimum etiam Catholicorum opinio. Secundo quia librata infinita Dei omnipotentia non debemus credere impossibilia quæcunque nobis ardua videntur. Tertio quia docere nos voluit regulam de aliorum sententia judicandi. A qua regula num longe abeat Vasquesius, qui disp. 40. cap. 1. asserit Augustinum docuisse Deum oculo corporeo non solum posse, sed etiam nunc a beatis videri, nec non Petavius qui lib. vii. cap. 2. scribit S. Patrem dubium natare, & minus, quam dudum fecerat, probabilem, imo ne tolerabilem quidem opinionem exponere, poterit quisque ex dictis facile comprehendere.

SOLVUNTUR OBJECTIONES.

Quamvis ex supradictis argumenta omnia evanescant, quæ probant aut posse oculis corporalibus videri Deum, aut Augustinum dubium in hac questione alternasse: in gratiam tamen Tironum omnia breviter perstringemus &c. primum sit: Non semel Deus apparuit Abraham, Jacob, Mosi; ejusque visionem possibilem ostendit Job, dum ait xix. 26. *In carne mea videbo Deum meum*. Ergo carnali oculo divinitas cerni potest.

Resp. nego conseq. Etenim vel Deus, vel Angelus in assumptis corporibus non semel Patriarchis apparuit, aliquibus etiam singulari privilegio quamfamiliariissime, & absque internuncio, atque manifesta, non imaginaria revelatione, locutus est: quod juxta hebraicam phrasim est colloqui *facie ad faciem*. Num vero quidam divinam quoque naturam viderint oculo mentis ac spiritu, disputabitur infra. Ad testimonium Job observat S. Pater xxii. de Civit. Dei cap. 29. appositum esse: *in carne mea, non, per carnem*: quippe resumptis corporibus

poribus singuli, etiam qui modo purgantur, quorum typum Job gerebat, mente frui debent Dei conspectu. Potest & exponi de Deo incarnato, & humanitate Christi, *qui reformabit corpus humilitatis nostre configuratum corpori claritatis sue*, ut inquit Apostol. ad Philip. 3., & idem Augustinus respondet. Commendatur & ibi fides Resurrectionis, in qua idem numero homo ex eadem carne conflatus reviviscet, ideoque de Christo venturo ad iudicium potest exponi: & propterea ait: *Rursus circumdabor pelle mea, & in carne mea videbo Deum meum: quem visurus sum ego ipse, & oculi mei conspiciuntur sunt, & non alius*. Idest, suscitabor in hoc eodem corpore, hisce oculis in novissimo die conspiciam Iudicem univerforum; non alius, non commutatus in aliam carnem, ego ipse resurgam, & hac ipsa carne circumdatus ante Christi tribunal comparebo.

Arguitur 2. Videntur exteriora objecta ab oculo, dum illum movent localiter & excitant nervum opticum: Deus movere potest localiter oculum, ejusque nervum opticum excitare: Ergo ab oculo cerni potest.

Resp. dist. maj. dum excitant, & radiorum pressione pingunt exterioris corporis in retina imaginem, concedo: dum movent absque impressione istiusmodi imaginis, nego. Eodem pacto dist. min. Deus potest localiter oculum movere, non efficiendo aliquam imaginem sui, concedo: efficiendo & imprimendo speciem & imaginem, nego. Ergo si localiter fibras oculi moveat; ea excitatione percipiet quidem animus esse aliquam moventem causam, at hanc minime sensibilibiter cernet. Quippe eo versus, ubi radiorum flexione pinguntur rerum imagines, nullam illic, nisi referentem corpora colorata potest inspicere. Vide cap. 2. prop. 1. ad 2.

Opp. 3. Potest intellectus creatus cernere objectum increatum: Igitur potest corporalis sensus intueri spiritualia.

Resp. nego consequentiam; etenim natura intellectus in eo sita est, quod contemplari possit intelligibile. Intelligibile est quidquid uniri potest menti, eamque illuminare. Deus, tamen si infinitus atque increatus uniri potest humanæ menti, imo ab ea sejungi non potest; illam vero valet præsentia sua illuminare, est enim lux vera, & veritas immutabilis. Igitur Deus a creatura cognosci potest. *Deo junctum est*, (ait August. quæst. LIV.) *quod intelligit Deum. Intelligit autem rationalis anima Deum, &c.* E contra natura sensus posita est in hoc, quod possit anima per illum sentire externa objecta corporea; quæ cum non sint per se unita menti, sed aliquo separata intervallo, exhibentur in imagine ac specie, ad quam anima corpori colligata se convertens advertit in corporis affectione, quod non poterat lumine percipere interiori. Atqui Deus non potest aliquo intervallo recedere ab anima, nec membrorum lineamentis finiri. Ergo Deus nequit conspici carnali

ac sensitiva potentia: *Istius autem corporis oculi omnino non possunt cernere nisi corpora, quæ ab eis aliquo loci intervallo separata sunt*, inquit Epist. 148. S. Pater. Vide prop. 2. & cap. 2. prop. 1. loc. cit.

Quarto loco obijcitur: Baptismatis aqua gratiam caussat, quæ est qualitas supernaturalis, & ignis corporeus spiritus torquet reprobis. Quare ergo elevari non potest oculus ad videndam divinam, corporisque expertem substantiam? Sed hæc nullius sunt momenti; neque enim aqua vel ignis hæc physica efficientia producunt; sed aqua est gratiæ causa moralis, ac spiritus infernali torquentur igne per aligationem & apprehensionem: quæ omnia alibi explanabuntur. Quamquam & illud reponi posset, oculum esse visionis vitalem ac principem causam, quæ sua virtute, ac vitali motu operatur: aquam autem baptismatis, & ignem inferni causas esse duntaxat instrumentales, quæ non propria agunt virtute, sed illius, cujus instrumenta sunt, nempe divinæ omnipotentis ac justitiæ.

Ultimo sic arguitur. D. Augustinus lib. xxii. de Civitate Dei cap. 29. ait: *Longe alterius erunt potentia (oculi) si per eos videbitur incorporea natura*. Et infra, *Vis itaque præpollentior oculorum erit illorum, non ut acrius videant, sed ut videant & incorporea*: Sentit ergo Augustinus quod incorporea natura reapse cerni debeat oculis carnis.

Resp. dist. consequens. Id censet Augustinus absolute, & si oculi corporales permaneant, nego: vide Prop. 1. & 2. Id sentit hypothetice, & si in resurrectione corpus evadat spirituale, subdistinguo, & hanc hypothesim quam aliqui vivente Augustino admittebant, & ad quæstionem istam nullatenus attinet, S. Pater explicat duntaxat, & in suspensio relinquit, ut ostendi Prop. 111. concedo: Et hanc hypothesim asseveranter, definite, & ex propria mente ipse comprobat, nego. Constat enim S. Patrem quæstionem proponere, explicare, & sententiam de Corpore spiritali judicare difficiliorem, ut demonstravi proposuit. 1v.

Neque ullius est momenti, quod adversarii opponunt, S. Patrem testari se plenissime quæstionem citato loco dirimere, ut profitetur IL. Retract. cap. 41. Istic enim quæ scripserat in libro de videndo Deo censet quidem, sed non retractat. In quo libro quantum dilucide asseruerit non posse oculis cerni nisi rem corpore & loco divisibilem, abunde monstravi. De spiritali autem corpore difficillimam sane, gravissimamque quæstionem diligentius in libris de Civit. Dei pertractasse, utique ipse fatetur: sed etiam hanc a priori diversam se affirmat. explicavisse, non vero definitivisse. Explicavit autem hinc & inde disputans accuratissime. Ex libris itaque Retractionum quæ a me dicta sunt non evertuntur, sed confirmantur. *De videndo Deo*, inquit, *scripsi librum: ubi de spiritali corpore, quod erit in resurrectione Sanctorum*, in-

inquisitionem diligentiores distuli, utrum, vel quomodo Deus, qui spiritus est, etiam per corpus tale videatur; sed eam postea questionem sane difficillimam in novissimo, idest in XXII. libro de Civitate Dei satis, quantum arbitror, explicavi.

C A P U T VI.

Utrum aliqui adhuc in hac mortali vita degentes Deum viderint, in utramque partem discutitur.

LIBRATIS Patrum ac Theologorum momentis, num Moses, Paulus, & quidam alii eximie sanctitatis viri adhuc viatores Deum viderint, videtur mihi res ambigua, & in partem utramque disputabilis. Non enim de rei agitur possibilitate, quam in dubium vertere nefas est; sed de facto, cujus neque aperta sunt Scripturarum testimonia, neque constans Patrum traditio, neque una Doctorum nostrorum sententia. Quamobrem adolescentibus nostris, ut de ingenii sui acumine aliquod periculum faciant, liberam do arenam, & quomodo contra adversarios instruere se debeant, eorumque tela retundere, demonstrabo.

Quisquis igitur sustinere velit affirmantem sententiam, poterit illam sequentibus argumentationibus comprobare. Primo Num.xi. 6. 7. 8. de Mose legitur: *Si quis fuerit inter vos Propheta Domini, in visione apparebo ei, vel per somnium loquar ad illum. At non talis servus meus Moyses, qui in omni Domo mea fidelissimus est: ore enim ad os loquor ei: & palam, & non per anigmata & figuras Dominum videt.* Et Exodi xxxiii. 11. Loquebatur autem Dominus ad Moysen facie ad faciem. Et v. 18. *Ostende mihi gloriam tuam.* Qui respondit: *Ego ostendam omne bonum tibi.* De Paulo 2. ad Corinth. xi. Raptus est in Paradisum, & audivit arcana verba, quæ non licet homini loqui. Quæ est enim revelatio tam mirabilis, quæ verbis designari non potest, nisi manifestatio divinitatis, de qua Isaias cap. 64. *Oculus non vidit, Deus, absque te quæ præparasti diligentibus te?* Scripturis itaque videtur consentanea sententia affirmans.

Eandem confirmare possumus Patrum auctoritate. Etenim Augustinus lib. 11. de Gen. ad lit. cap. 27. de Mose hæc scribit: *Concupiscerat enim, ut in Exodo legimus, videre Deum, non utique sicut videbat in monte, nec sicut videbat in Tabernaculo, sed in ea substantia, qua Deus est, nulla assumpta corporali creatura, quæ mortalis carnis sensibus præsentetur.* Erc. Eadem repetit de Mose ac Paulo Ep. 147. alias 112. cap. xi. n. 31. Et Hilarius lib. 1. de Trinit. cap. 3. & lib. vi. cap. 1x. Rupertus lib. 3. de Victoria Verbi Dei cap. 28. Isidorus Hispaniensis cap. 37. de vita & morte SS. narraht Esaiam fuisse a Judeis inter-

To.I.

G g

fectum,

fectum, quod scripserit cap. 6. -- VIDI DOMINUM SEDENTEM SUPER SOLIUM EXCELSUM -- &c. Ait autem Hilarius: *Deum Propheta vidit, & gloriam ejus usque ad invidiam Propheticae dignitatis aspexit.* Basilus quoque de Mose scribit Hom. 1. in Hexam. *Qui octogessimam aetatis agens annum vidit Deum, ut erat homini videre possibile, immo ut nemini potius licuit alii.* Et Ambros. lib. 2. cap. 2. *Hic itaque, non in visione, neque in somniis, sed ore ad os cum Deo summo locutus, neque in specie, neque per anigmata, sed clara atque perspicua praesentiae divina cognitione dignatus.* Omitto autem quae de seipso narrat Augustinus lib. 1x. Confess. cap. 10. Et de Sancto Benedicto D. Bernardus serm. 1x. de Diversis.

Congruentiae etiam satis manifestae possunt afferri. Quis enim hoc privilegium concessum negaverit B. M. V., quam scimus creaturas omnes gratiarum cumulo, & amplitudine praecellere meritum? Et certe hanc ei gratiam fuisse collatam tradunt Rupertus, Albertus Magnus, & Pater pauperum Thomas Archiepiscopus Valent. serm. de Resurrect. necnon Theologi eruditissimi, ut observat Gavardus Quaest. 1v. de Invisib. Dei art. 1v. De Mose autem ac Paulo ait S. Thomas 2. 2. quaest. 175. ad 1. congruenter manifestatam illis essentiam fuisse divinam; *nam sicut Moyses fuit primus Doctor Judaeorum, ita Paulus fuit primus Doctor Gentium.* Scripturis itaque, Patribus, & probabilibus congruentiis sic opinio affirmans defenditur.

Negativa sententia pariter ex sacris Scripturis primitus sic ostenditur. Exodi xxxi. 11. Mose summopere desideranti divinam essentiam, conspiceret respondit Dominus: *Non videbis me homo, & vivet.* Et insistenti petitionibus versu ult. ait: *Videbis posteriora mea, faciem autem meam videre non poteris.* Quibus verbis aliqui Christi humanam formam, aliqui imperfectam visionem, aliqui manifesta Dei opera putant significari. Joan. cap. 1. v. 18. ait: *Deum nemo vidit unquam.* Scripsit autem, quod valde notandum est, post Epistolam 2. ad Corinth. in qua Apostolus raptum suum refert usque ad tertium caelum. *Quem nullus hominum vidit, nec videre potest,* scribit quoque Paulus in vi. ad Timoth. scripta post Epistolam ad Corinthios nuper laudatam. Haec autem minime diceret, si videre Deum sibimet fuisset paullo ante concessum. Scripturis itaque haec secunda sententia non adversatur.

Probatum autem ex PP., & missis Irenaeo, Tertulliano, Origeni, aliisque vel errore Millenariorum suspectis, vel suboscure loquentibus, idem aperte docent Nazianz. Orat. 34. S. Leo serm. de Transfig. Gregorius lib. 18. Moralium, S. Evaristus Epist. 1. & alii, quos refert Petavius lib. vii. cap. xii. & Sylvius Quaest. xii. art. xi. Quantum vero spectat ad Augustinum, etsi aliquando stetit in priori sententia, huic tamen senior ac doctior factus accessit: nam Tract. 3. in Joan. ait: *Quid vidit Moyses? vidit nubem, vidit angelum, vidit ignem: omnis*

nis illa creatura est, typum Domini sui gerebat, non ipsius Domini præsentiam exhibebat. Lib. 2. de Trinit. c. 16. *Cum vero hic apertissime demonstretur, nec desideranti hoc fuisse concessum; quis audeat dicere, per similes formas, quæ huic quoque visibiliter apparuerunt, non creaturam Deo servientem, sed hoc ipsum quod Deus est cujusquam oculis apparuisse mortalium?* Similia repetit S. P. lib. 3. contra Maxim. cap. 12. Quæst. 154. super Exodum, lib. 4. de Symbolo ad Cathecum. cap. 3. Ex quibus fati colligi potest, inquit Sylvius, Augustinum non judicasse quod Moyses & Paulus in hac vita Deum viderunt, tametsi aliquando fuerit in eam sententiam propensior.

Neque defunt etiam pro hac parte probabiles conjecturæ. Primo enim in Dei visione nostra sita est beatitudo: Beatitudo semel habita, non potest amitti, nec Deus potest eam subtrahere, quoniam pœnam nunquam irrogat absque culpa: Si ergo Paulus ac Moyses Deum vidissent, in hac vita fuissent beati, & nunquam in posterum ipsa privati essent beatitudine. Deinde adhuc viatores extitissent, nec tamen ambulassent per fidem; fides enim tollitur manifesta revelatione eorum, quæ creduntur. Itaque rationi, Patribus, & Scripturis videtur negativa sententia pariter consentanea.

Hactenus pro utraque parte protulimus argumenta. Modo dicam quo pacto singula possint vicissim retundi. Scripturarum textus pro parte affirmante facillime possunt exponi. In xli. cap. Num. ostenditur tantum discrimen inter Moysen, aliosque Prophetas, quibus per somnia & imaginarias visiones Dominus locutus est, cum Mosi apparuerit frequenter, familiarissime, & absque internuncio, & eum fuerit adlocutus non solum propheticorum vaticiniorum velamine, sed manifesta legis, rituum, rerumque gerendarum significatione. Quod etsi quibusdam aliis momentanee fuerit concessum, ut Abraham sub quercu Mambre, & Jacobo luctanti cum Angelo, Mosi tamen datum legimus sæpenumero, & ordinaria amicorum consuetudine. Et si pertinaciter insistas, Moysen vidisse Dominum secum familiariter colloquentem; possum & istud concedere: erat enim Angelus ille, non Deus, ut habetur Act. vii., idque tandem animadvertit Augustinus Tract. lxxviii. in Joannem scribens: *Quid vidit Moyses? vidit nubem, vidit angelum, vidit ignem.* Eodem modo expeditur textus Exod. xxxi. de quo tamen est aliquid particulariter advertendum. Comminatus fuerat Dominus v. 3. se non ascensurum ulterius cum Mose ob populum duræ cervicis, divinisque jussibus reluctantem. Hoc luctus ac timoris causa. Moyses itaque Dominum placaturus ait: *Præcipis, ut educam populum istum: & non indicas mihi quem missurus es mecum, præsertim cum dixeris, novi te ex nomine, & invenisti gratiam coram me. Si ergo inveni gratiam in conspectu tuo, ostende mihi faciem tuam.* Quid ergo est. *Ostende mihi faciem tuam*, nisi, Sis, quæso, ut fecisti hactenus,

dux itineris nostri, ne moriamur in solitudine? Certe hunc sensum ipsa lectione poterit quisque dignoscere, neque hanc explanationem potest rejicere quisque oculos in hebraicum iniecerit, ubi legitur, *Ostende mihi, quæso, viam tuam*: וְרוּיַנִּינָה אֶת דְּרֹכְךָ Verum est quod Moses in hujus promissionis tesseram, *Facies mea præcedet te*, postulavit quoque, ut manifestationis particeps fieret divinitatis, repetens, *Ostende mihi gloriam tuam*. Verum huic petitioni respondit Dominus: *Ego ostendam omne bonum tibi, & vocabo in nomine Domini coram te*, idest, Præter id, quod petis, omnia tibi præstabo, exhibebo favorem, patrabo signa, ero dux ac rector itineris, faciam quidquid vis: veruntamen: *Non poteris videre faciem meam; non enim videbit me homo & vivet*. Denegavit ergo Deus Mosi gratiam quam petebat; atque ut eum novo singulariter comularet beneficio, sese illi manifestavit a tergo, idest fulgentissimo quodam lumine, quod esset divinitatis indicium, at non facie ad faciem. De raptu autem Pauli levior est difficultas, quoniam ipse non ait se in tertio cælo vidisse Deum, sed audivisse arcana, quæ ratus est esse silentio occultanda. Neque anceps fuisset an hujusmodi raptus in corpore contigisset vel extra, si claram Dei obtinuisset visionem, quæ adeo debet esse vivida ac splendida, ut procul ignorantiam omnem, dubitationemque depellat. Id vero adeo indubitatum est, ut idem Apostolus post raptum scripserit ad Timotheum, quod nullus hominum Deum viderit. Atque hoc pacto argumenta petita ex sacris literis diluuntur.

Ad PP. auctoritates respondeo non esse hanc quæstionem ex genere illarum, in qua necesse est, omnes Ecclesiæ Doctores convenire. Quamquam & ad ea quæ opponuntur patet responso. Nam quod attinet ad Augustinum, in opere de Genes. ad liter. plura quæ sita esse quam inventa, & eorum quæ inventa sunt pauciora firmata, fatetur idemmet in 11. Retract. cap. 24. Deinde constat ex dictis, in postremis operibus suis priorem rejecisse sententiam. Præterea potest ubique exponi de vividiori quadam ac sublimiori contemplatione in raptu, non vero de plena ac manifesta per speciem. Quod narrat Hilarius de Esaia occisum fuisse, quod scripserit a se visum Deum, fateor verum esse: sed Judæi, qui Prophetam intestino prosequabantur odio, quod eos appellasset Princeps Sodomorum, populumque Gomorrhæ, ut scribit citato loco Isidorus Hispalensis, inde mortis injustissimam causam prætexerunt. Constat namque cap. vi. narrari a Propheta visionem per ecstasim quam habuit in templo, & vaticinari judicium de Rege, primoribus, ac populo faciendum. Ambrosius lib. v. de Fide cap. ultimo oppositum docet, probatque ex Scripturis; unde & ipse in eadem opinionatione non stetit, vel exponi debet, quemadmodum diximus de Augustino. Is vero, ac Benedictus, alique eximia sanctitate præditi raptu sublimiori dignati sunt, sed non clarissima visione Dei, nisi exuti corporo-

corporibus. Unus est Basilius, quem frustra Eftius in II. dist. VII. §. X. ex ejus Homilia 1. de Jejunio ad se trahere studet; nam is, ut observat Petavius, post verba superius producta addidit: *Mosen in potieq-
dis presentibus Dei conspectibus fuisse, dum viveret, Angelis coequa-
lem*. Sed Basilio opponitur Gregorius Nazianz. Hieronymus, Cyrillus, Athanasius, & Epiphanius, quorum verba refert Sylvius, Petavius, Eftius, Smising, & L'Herminier, majori præ ceteris eruditione.

Conjecturis autem postremo loco productis resp. multo fuisse convenientius, ut nemo ante beatissimam Christi animam divino frueretur aspectu; quod potissimum valet de Moyse: item, ut nullus in via esset simul viator & comprehensor: ulterius, ut beatitudo non ad momentum, sed ad perennem servaretur felicitatem. Quæ tamen vellem discutì cum exceptione B. M. Virginis, cui majorem gratiarum copiam contulit Deus, quam ulli mortalium. Attamen neque Deiparam in terris vidisse in se Deum, salva pietate ac fide possumus affirmare: quod & magnus numerus docet Theologorum, & nulli Apostolicæ Ecclesiæ opponitur definitioni.

Reliquum est ut argumenta solvantur negativæ sententiæ. Atque ad verba Exodi XXXI. dico, utique ibi denegatam Mosi visionem beatam, præstantissima namque gratiarum dona non statim petentibus conferuntur, ne existimentur communia; at concessam esse postmodum colligitur ex cap. XI. Numerorum. Quem postremum locum non possumus de sola frequentia ac familiaritate divini sermonis accipere: utrumque enim hinc affirmatur, & aperta significatio divinorum decretorum per ea verba; *Ore enim ad os loquor ei*: & visio beatifica & gloriæ participatio, per subsequentiā, *Et palam, & non per anigmata & figuras Dominum videt*. Hinc LXX. verterunt, *ἐν τῷ δόξῳ κυρίου ἑώρακεν, Et gloriam Domini vidit*. Neque possumus existimare, Mosē vidisse tantum facie ad facie Angelum, quum aperte asseratur facie ad faciem vidisse Dominum, quod hebraica lectio designat vocabulo Dei propriissimo, ac tetragrammato. Porro legem datam ministerio Angelorum constat ex cap. VII. Act. Apostolor. & ex cap. 2. ad Hebr. sed solos Angelos apparuisse Mosi non recte illinc inferitur: nam ipse Moses morti proximus Deut. XXXI. v. 2. cum Angelorum exercitu Dominum legem daturum apparuisse, his verbis testatur: *Dominus de Sinaï venit, & cum eo Sanctorum millia*. Angeli quoque nomine Deum designari observat Hilarius in 1. de Trinit. cap. 3. dicens: *Habes dispensationem in Angelo, quia in Angelo officium est non natura: habes in natura nomine Deum, quia Angelus Dei Deus est*. Revera Act. VII. 3. dicitur Angelum apparuisse Moyse in igne rubi; & tamen Ex. I. 2. ait ille qui apparuit: *Ego sum Deus patris tui, Deus Abraham, Deus Isaac, & Deus Jacob*. Ergo ex quo lex lata fuerit ministrantibus Angelis, non consequitur Mosē Angelos vidisse, non Deum.

Deum. Fuit quidem dictum Moſi: *Non videbit me homo; & vivet*: Sed hoc ita ab Auguſtino explicatur: *Deum nemo videbit vivens viſa iſta, qua mortaliter vivitur in iſtis ſenſibus corporis: ſed niſi ab hac vita quaſique quodammodo moriatur, ſive omnino exiens de corpore, ſive ita averſus & alienatus a carnalibus ſenſibus, ut merito neſciat, ſicut Apoſtolus ait, utrum in corpore, an extra corpus ſit, cum in illam rapitur & ſubvehitur viſionem*. Hæc Auguſtinus lib. xii. de Gen. ad lit. cap. 27. qui ſimilia repetit lib. de vid. Deo, ſive epiſt. 147. cap. xiii. Joannes vero cap. 1. loquitur de viſione comprehenſiva, de ea nimirum, quam habet Unigenitus in ſinu Patris, ut conſtat ex textu: alias neque Angeli Deum viderent; male enim de ſolis hominibus quidam dictum putant, *Deum nemo vidit*: Eſt enim grece *ὁὐδὲς ἰδὼς τὸν θεόν* cum excluſione tam hominum, quam Angelorum. In 1. ad Timoth. 6. excluditur pariter viſio Dei pleniffima, & ea quæ per ſenſum oculorum habetur: & præterea nihil obſtat, quin in generalibus aſſertionibus aliqui ſingulari Dei beneficio intelligantur excepti, quum idem Apoſt. v. ad Rom. ſcribat omnes peccaſſe in Adam, a qua generali ſententia pie a plurimis creditur immunem eſſe Deiparam.

Quod ſpectat ad PP. negandum non eſt plures in oppoſitam abiſſe ſententiam, & hanc eſſe ob horum auctoritatem valde probabilem. Non ſunt tamen pro negativa in tanto numero, ut adverſarii arbitrantur. Etenim Gregorius Nazianz. aliique Græcorum ſcribunt contra Eunomii & Actii diſcipulos: quod & facit Ambroſ. in v. de Fide cap. ultimo, qui propterea intelligendi ſunt de viſione comprehenſiva. Alii proculdubio loquuntur univerſali quadam aſſertione, a qua ſpecialiſſimo Dei privilegio aliqui excipiuntur. Quidam, qui expreſſe Moyſen commemorant, de quotidianis ac frequentiffimis Dei viſionibus verba faciunt, non de illa ſingulari ac rariffima, quæ narratur in Numeris. Hac ratione conciliantur diſcrepantes Auguſtini ſententiæ, Moſes enim vidit Angelum & ignem in Rubo, ſed vidit quoque Domini gloriam in Sina. Non cogimur ergo aſſerere quod S. P. a priori ſententia diſceſſerit, præſertim cum ipſe tali fuerit ingenio, ut aperte fateretur quid, & ubi inter ſe pugnantia ſcripiſſet.

Rationes denique poſtremo allatæ non debent ſtudioſum juvenem detertere. Priori namque, quam urget Franciſcus Sylviuſ, ſatiſfit dicendo inammiſſibilem eſſe beatitudinem, quæ conferetur Sanctis poſt mortem ac permanentem, tanquam merces & corona prædeſtinatorum; non eam beatitudinem momentaneam, qua dignantur viri præſtantiffimæ ſanctitatis, tranſeunter, & quaſi prælibamine futuræ felicitatis. Neque hujus viſionis ſubtractio dicenda eſt pœna, quia manifeſtatio divinitatis nondum eſt corona juſtitæ, ſed beneficium ſimile raptibus contemplantium, quos neceſſe non eſt diutiſſime permanere. Idem reſpondetur ad alteram conjecturam, quæ aſſertur ab Eſtio: nullus enim ha-

bitus

bitus destruitur nisi contrario. At actus actui, habitus habitui opponitur: & consequenter actus visionis momentaneus ac transiens non destruit habitum Fidei stabilem ac permanentem. Habes igitur pro utraque sententia argumenta, argumentorumque solutiones: atque his sufficienter, quantum arbitror, pertractatis, poteris pro lubitu tam de una, quam de altera disceptare.

C A P U T VII.

Sint ne beatæ visionis modo participes Elias & Enoch?

ENOCH ET ELIAM sive in Paradiso, sive alio in loco adhuc vivere, & extremis temporibus contra Antichristum venturos, tenet, inquit Rabanus in lib. de Antich., fides Christianorum. Quæritur ergo an his saltem, qui translati sunt ne viderent mortem, & adhuc in corpore ad bonum universæ Ecclesiæ servantur, visio illa fuerit concessa, qua Beatorum animæ perfruuntur.

PROPOSITIO: Enoch & Elias probabilius Dei conspectu nondum fruuntur, nisi forte momentaneis raptibus, ac transeunt.

Demonstratur: Nondum Eliam & Enoch vita sanctos communior opinio est, quam tenere veteres omnes Rabbinos affirmat R. David in lib. 2. Regum, & traditionem esse discipulorum Domini scribit Irenæus lib. v. adversus hæreses. Eam sequuntur Patres, præsertim Gregorius Magnus hom. xxix. & S. P. Augustinus lib. 1. de peccatorum meritis & remiss. cap. 3. & lib. vi. contra Julianum, alique tam multi, ut Aretas apud Estium in cap. xlii. Eccles. asserat id credi inviolabiliter a tota Ecclesia: videtur etiam evinci ex lib. Apocal. cap. xi. 3. ubi legitur, *Et dabo duobus testibus meis*, &c., quem locum omnes fere Interpretes de Helia & Enoch exponunt. Probabilior est ergo, licet non satis explorata, hæc de Elia & Enoch nondum vita sanctis opinio: Atqui Beatitudo saltem permanens, omnium consensu, non confertur nisi dissoluta hujus habitationis domo, expletoque laborum cursu: Ergo permanens Dei fruitio nondum his duobus collata est.

Opp. 1. Eccles. xlii. 16. habetur: *Enoch placuit Deo, & translatus est in Paradisum*: & 1v. Regum 2. 11. *Et ascendit Elias per turbem in cælum*. Hic autem, inquit Calmet dissert. de Patriarcha Enoch art. 2. debet intelligi Paradisus Sanctorum, & cælum Empyreum. Ergo Enoch & Elias in cælis versantur, ideoque divino beantur aspectu.

Resp. nego consequ. nam Paradisi nomine intelligitur quilibet locus, in quo feliciter vivitur, & cæli nomine etiam superior pars aeris designatur: quoniam & volatilia *volucres cæli* Ps. v. 111. 9. appellantur, & Latroni nondum referat is cæli januis per Ascensionem Redemptoris,

Lucæ

Lucæ xxii. 43. dictum est : *Hodie mecum eris in Paradiso*. In textu Ecclesiastici Paradisi nomen in græcis, hebraicisque desideratur. Apoposuit primum Arabs interpres : & merito Vulgata nostra retinuit, quum Enoch mortalis vitæ ærumnis fuerit sublatus. Denique si de Beatorum patria accipi possent loca præfata, sequeretur Christum Dominum nequaquam primum omnium in cælos assumptum ; contigit namque longe ante Christum istorum raptus. Itaque Elias per turbinem, Enoch repentino raptu in ignotam mundi plagam fuere translati.

Dices : Revera raptos in cælum, tradunt Ecclesiæ Patres. Athanas. serm. de Assumpt. Dom. scribit, *Enochum immortalitatis terminos accepisse* : Tertullianus de Resurrect. carnis cap. 58. *De orbe translati*, inquit, & *boc ipso jam æternitatis candidati*. Hieronymus epist. ad Pamachium : *Necdum mortui, & Paradisi jam coloni, habent membra cum quibus rapti sunt, & translati*. Bernardus serm. 6. de Ascens. *Felices plane, qui soli jam Deo vivunt, soli vacant intelligendo, diligendo, fruendo*. Et Avitus Vienn. Episc. postquam dixerat Enoch translatus in cælos lib. iv. Carm. capite 6. ait :

*Quamquam, qua Noe proavus conscenderat Enoch,
Elias cursu post tempora longa secutus
Scribitur ignitis scandens penetrasse quadrigis.*

Resp. Eliam & Enoch, quum a mortalitatis contagione illos præservet mirabilis Dei providentia, atque tali confirmet gratia, ut nullo terrenarum cupiditatum desiderio premantur, merito dici ab Athanasio immortales, a Tertulliano æternitatis candidatos, a Bernardo & Avito felices ac translatos ex orbe, a Hieronymo Paradisi colonos. Certe, Bernardus eo sensu felices vocat, quod eis omnes materia & occasiones ablatae sunt, quæ eorum intellectum impediunt, vel affectum, quia soli Deo viventes nec noverunt nisi Deum, nec cupiunt nisi Deum, ut sermone explicat præcedenti. Eo itaque modo fruuntur Deo, quomodo fruuntur animæ viatorum, qui Deum specialiter diligentes diliguntur ab ipso, Angelicis dignantur conspectibus, neque sensuum pulsantur illecebris, neque dæmonum tentationibus. Quandoque etiam divina apparitione recreari videtur mihi verosimilius. Ceterum si contendas in Christi ascensione & istos in cælum assumptos, ut opinatur citato loco Hieronymus, quod tamen negat cum majori Sanctorum Patrum numero Ecclesiæ columen Augustinus, jam non restat præfenti locus disputationi.

Insurges : Paradisi nomine, si de loco, ad quem Enoch translatus dicitur, quæstio instituitur, intelligi nequit Hortus voluptatis, quem pro Adam plantavit Dominus a principio. Quamquam enim, Augustinus lib. contra Julianum vi. illic vitam degere scribat, *ubi est ipsum lignum vitæ, ubi sit potestas vivendi, nec ulla moriendi necessitas* : obsolevit tamen ista priscorum Patrum sententia ; & probabilior est

est Recentiorum opinio, aquis diluvii paradysum terrestrem fuisse ob-
rutum, & ejusdem loci situm ac viciniam incolis esse referta. Igitur
Enoch in Paradysum voluptatis nequaquam translatus est, sed in Para-
disum Sanctorum.

Resp. Enoch, & Eliam ad ignotam terræ regionem translatos esse,
ubi in magna corporis animique viventes quiete expectant mundi in-
teritum, ut soluto mortis debito & ipsi cum universa carne resurgant.
Sive sit hortus Eden, sive domicilium aliud longe ab hominum cog-
nitione remotum, divinare præsumptio non debet humana. Nullum ex
veteribus tradidisse, quod aquis diluvii, vel alia de causâ terrestris
Paradysus deperierit, affirmat Bellarminus lib. de Gratiâ primi Homi-
nis cap. 14. Magna ergo probabilitate asseritur quod Paradysus adhuc
super sit, ibique mundi exitium expectent præfati Patriarchæ clarissimi,
ut scribit aliquando Augustinus. At is de istorum in terris vita nullibi
dubitât; de loco autem non semel hæsitât, fluctuatque. Nam lib. 1.
de Peccat. meritis & remissi. cap. 3. *In Paradiso*, inquit, *fortasse pas-*
centur, sicut & Adam, priusquam propter peccatum exire meruis-
set. Et lib. de peccato originali cap. 23. in delectu quæstionum, in
quibus quid verum sit humana & infirma suspitione conjicitur, has lo-
cat: *Cum queritur qualis, vel ubi sit Paradysus, ubi constituit Deus*
boninem, quem formavit ex pulvere; cum tamen esse illum Paradi-
sum fides Christiana non dubitet: vel cum queritur ubi sit nunc Elias
& Enoch, an ibi, an alicubi alibi; quos tamen non dubitamus, in
quibus nati sunt, corporibus vivere. Quapropter cum magno Proto-
parente dicimus Eliam & Enochum adhuc esse superstites: ubi, & qui-
bus vivant sustentaculis, ignoramus.

Opp. 2. Nisi Enoch & Elias divino fruerentur conspectu, etiam-
num viatores forent ac mererentur: Id vix redditur Theologis credi-
bile; quippe in dies illorum meritum augeretur, tantoque sæculorum
intervallo omnium Sanctorum, Virginis quoque Deiparæ, excede-
rent sanctitatem: Sunt ergo in Patria, ac in termino, bonorumque
operum ac laborum retulerunt mercedem.

Resp. non unam esse Theologorum sententiam an Elias & Enoch
viatores adhuc sint, & in statu merendi. Negant Vasquez 1. 2. disp.
206. Suarez tom. 2. in 3. part. disp. 55. Pererius Tom. 1. in Genes.
lib. 7. cap. 5. quæst. 5. Estius in cap. 4. Genes. In horum itaque sententia
nego majorem. Quamvis enim Elias & Enoch confirmati sint in gratia,
sunt nihilominus extra hominum conversationem, tanquam hanc vi-
tam non amplius agentes, nec reficiuntur Ecclesiæ sacramentis, nec
meritum sibi comparant, quemadmodum erant PP. in Limbo, inquit
Estius, & quemadmodum sunt animæ defunctorum in Purgatorio, ait
Vasquesius: scilicet ne mereantur officit tantum status, non defectus
gratiæ vel caritatis. Sunt & qui censent adhuc mereri, ut Abulen-

sis, Joannes de la Haje, aliiq[ue] apud Sylveiram Opusc. tertio resolut. r. Atque juxta horum placitum nego quod possint, quantavis caritatis opera exerceant, ad meritum Dei Genitricis unquam pertingere. Etenim non ex diutina solummodo exercitatione virtutum meritum comparatur, sed etiam ex vehementi dilectione; in qua absit ut aliquis Reginam Angelorum ac dominam valeat æquare. Quod si talia opinantibus conditionem status opponas; respondebunt, dummodo vivant in corpore, non tolli rationem meriti per hoc quod sint extra communem vivendi ordinem, quoniam & Catharinæ Senensi, & Mariæ Magdalenæ Virgini absque corporali cibo vitam agere datum est aliquandiu, sive in ecstasim Aptis, sive sumpta in alimonium sacra duntaxat Synaxi, eoq[ue] tempore fuisse amplioribus meritis cumulas: hanc vero rationem minime militare pro Animabus corpore solutis, & reddentibus pro minimo quadrante rationem.

Ultimo objicies: Sacrum ac perantiquum Carmelitarum Institutum S. Patris Eliæ solemnī cultu Festum concelebrat a Romanis Pontificibus approbatum. In exitu quoque animæ illam solent presbyteri Deo commendare per merita Eliæ & Enoch. Sunt ergo ambo Sanctorum sorte, & Dei visione donati.

Resp. nego consequentiam. Invocantur enim religioso cultu, quod confirmati in gratia, & corpore & spiritu per Dei protectionem nec deficientes, nec proficientes, certissime credantur amici Dei, constat judicio Ecclesiæ singularis illorum virtus, & revelatus sit in Scripturis futuris eorum exitus. Quæ si ceteris viatoribus convenirent, posset & iis solemnī cultus decerni. At vero militantibus, quorum ignoramus finem, exhibendum est caritatis officium, non apotheosis triumphus: & orandum est ut perveniant ad consummationem virtutis, antequam illis votum reddamus honorificationis & laudis. Esse tamen discrimen quoddam inter istos, aliosq[ue] Sanctos ultro fatemur; quum & his magni reservetur gloria certaminis, & forte, quod visum Estio, in particulari preces nostras ignorent, & oretur Deus, ut propter eorum merita, & beneficia ipsis collata nobis propitiatus accedat. Quod unice ex precibus pro animabus morti proximis comprobatur.

C A P U T VIII.

*An Sanctorum animabus post diem judicii sit clara visio
Dei differenda.*

PRÆCIPUAM hujus libri aggredimur controversiam, num Justorum animæ, quibus nihil pœnarum luendum superest, sint supernorum civium gloriæ, splendorisq[ue] consortes. In qua & turpes Cerinthi erro-

errores, & falsa Papiæ dogmata, & subobscura veterum Patrum dicta aliquam a nobis postulant operam. Ergo Cerinthus circa annum vulgaris Aerae LXXX. præter alia hæresum portenta, quæ veluti sibi ab Angelis revelata venditaverat, hanc spargere cœpit doctrinam, quod post resurrectionem in terris futurum sit Christi regnum apud instauratas Ierosolymas, iustis inter cupiditates voluptatesque carnis versantibus. Quod cum referant Cajus qui initio III. sæculi floruit apud Eusebium lib. III. Hist. Eccles. cap. 28., Dionysius Alexandrinus, & alii, nullum est dubium, quin Cerinthus Chiliastarum, sive Millenariorum conditor debeat haberi.

Altero post Cerinthum sæculo, & circa an. cxvi. vixit Papias Syrus Hieropolitanus Episcopus: quem Irenæus lib. v. cap. 33. appellat Auditorem Joannis, & Sancti Martyris Polycarpi sodalem: sed, auctore præfato Eusebio lib. III. H. E. cap. 39. Papias ipse in Præfatione librorum suorum, quorum inscriptio erat, *Expositio Oraculorum divinorum* aperte testatur se nunquam Apostolos audivisse, sed eorum duntaxat discipulos. Hominem *perexigui judicii* eum vocat Eusebius, certaque profert illius inscitiae exempla, inter quæ istud de Christi regno ad mille annos post resurrectionem in terra hac duraturo. Sanctos tamen satiandos fore impuris cupiditatibus & obstringendos observatione legalium, ut dixerat Cerinthus, Papias nequaquam existimavit. Hunc fuisse virum disertissimum, & eruditissimum ac scripturæ peritum habetur cap. 36. ejusdem libri Historiæ Eusebii: sed diligenter observandum est cum doctissimo Henrico Valefio hoc elogium ab antiquis mss. abesse, neque legi apud Rufinum: unde nulla exinde accedit tenuissimo judicio Papiæ commendatio.

In Papiæ errorem consenserunt (quod dissimulandum non est) aliqui priorum seculorum Patres: inter quos enumerantur Irenæus, Justinus, Nepos in Aegypto Episcopus, Lactantius, alii. Quorum plerique, tametsi mille annorum regnum non expresse admittant, censent tamen differri ad diem judicii animarum beatitudinem, cum interim occultis clusæ receptaculis Judicis adventum expectent, suorumque operum retributionem. Hanc gloriæ dilationem propugnavit initio v. sæculi Vigilantius. Eodem tenebantur errore tempore Florentini Concilii celebrati anno 1438. nonnulli Græcorum: eoque impliciti sunt plerumque superiorum hæresum sutores, & Romanæ Ecclesiæ hostes insensissimi Martinus Lutherus, & Joannes Calvinus. Quidam in hujus dogmatis patrocinium locis quibusdam obscurioribus abutuntur Ambrosii, Augustini, & Bernardi: quos, hunc præsertim, ad partes trahere conantur Millenarii. Pro quibus stetisse quoque Joannem XXII. tradunt cum illius ætatis Historicis plures Theologi, quamvis e cathedra hanc questionem non definiisse etiam Gallorum eruditissimi fateantur. Itaque agendum primo de regno mille annorum juxta sensa

Cerinthi, & Papiæ: deinde resolvenda est quæstio de beatitudinis dilatione: præterea inquirendum de mente Ambrosii, Augustini, ac Bernardi; ac tandem de errore, quem tribunt Joanni Papæ, judicium nobis est pronunciandum.

PROPOSITIO I. Figmentum est & anilis fabula illud mille annorum regnum a Cerintho excogitatum, & a Papiæ, licet tolerabilius, inductum.

Ostenditur 1. ex Scripturis. Cum enim Pharisei carnalibus imbuti opinionibus futuram crederent resurrectionem ad vitam animalem, in qua cibo potuque opus esset, & rursus jungi deberent connubia; ait Christus Dominus Matth. xx1 1. 30. *In resurrectione neque nubent, neque nubentur, sed erunt, sicut Angeli Dei*. Verum est quod horum verborum sensus exponitur a Luca: *Neque enim ultra mori poterant*. At si corpora resurgentium non erunt amplius obnoxia morti, ac defectui; ad quid epulæ? ad quid sexuum commixtio? quæ ad generis deserviunt conservationem. Præterea Paulus ad Rom. xiv. 17. *Non est enim regnum Dei esca & potus*. Quæ verba non solum per metonymiam debent accipi, quod non paratur jus ad Regnum Dei edendo ac bibendo, sed etiam proprie & absque transnominatone, quum statim addat Apostolus, *In esca & potu pacem non esse, nec gaudium in Spiritu Sancto*. Hæc duo loca potissimum urgent Cerinthum. Addo contra Papiam ejusdem Apostoli testimonium 1. ad Thesalonic. iv. 16. ubi Christi adventu, & mortuorum resurrectione narratis, ait: *Deinde nos, qui vivimus, qui relinquimur simul rapiemur cum illis in nubibus obviam Christo in aera, & sic semper cum Domino erimus*. Ubi post Christi descensum non Chiliastarum, sed sempiternum regnum promittitur. Atque regnum istud prædicitur Lucæ 1. 33. illis verbis: *Regni ejus non erit finis*; quæ Constantinopolitanum Concilium inseruit Symbolo adversus Appollinaristas errori Millenariorum addictos. Merito ergo a Damaso in Romano Concilio celebrato anno 373. tanquam sacris literis contraria Millenariorum hæresis fuit proscripta.

Hanc auctor librorum de cælesti Hierarch. c. v11. *fabulam* vocat: idem præstat quæst. 2. Epist. ad Hedibiam Hieronymus. Origenes lib. 2. de Principiis cap. 12. & in Prologo in Cantic. exortam scribit ex intellectus sensu Judæo Scripturis. Stultam infaniam S. Ephrem Opusc. 111. appellat. De ea scribit Cajus Romanæ Ecclesiæ presbyter loco citato: *Cerinthum, qui per revelationes, quasi a magno Apostolo scriptas, portenta finxerat, velut ab angelis sibi ostensa, intronississe hanc doctrinam, qua adfirmat, post resurrectionem, regnum Christi in terris futurum, & rursus cupiditatibus & voluptatibus carnem Jerosolymæ versantem se vituram. Quin & dixisse inimicum illum Scripturarum divinarum, fallere volentem, in nuptialibus festis mille annorum spatium transactum iri*. Et Eusebius de libris Dionysii Alexandrini eodem loco scri-

scribit: *Causam præbuit Nepos quidam Episcopus Aegypti, qui promissiones sanctis hominibus factas in divinis voluminibus, Judaico sensu exhibendas docebat, & nescio quod mille annorum spatium corpora libus refertum deliciis in hac terra fore affirmabat . . . Hunc ergo Dionysius in libris de Promissionibus acriter impugnatur.*

Dixi Regnum mille annorum a Papia tolerabilius inductum, cum Augustino xx. de Civit. Dei cap. 7. *Quæ opinio esset utcumque tolerabilis, si aliqua delicia spirituales in illo sabbato affuturæ Sanctis per Domini præsentiam crederentur. Nam etiam nos hoc opinati fuimus aliquando, &c.* Sed tamen sententia Millenariorum etiam in sensu Papiæ recto Judicio Ecclesiæ damnata est, ut diximus, magisque proxima firmabitur propositione.

At contra Cerinthum etiam deductas a ratione possumus argumentationes urgere. Nam 1. Quo pacto auream atque gemmatam in terris Jerusalem, instaurationem templi, hostiarum sanguinem, otium sabbati, post consummatas Mosaicæ legis figuras, perfectamque Danielis de perpetua abominatione prophetiam expectare fas est, & liberatos a legis servitute rursus circumcisioni, & legalium subijcere vetustati? Deinde quænam Regni, cui Sancti invident, conditio est, quærare ciborum abundantiam, gulæque ac ventris ingluviem? *Nullo modo, inquit Augustinus citato loco, ista possunt nisi a carnalibus credi.* Contra Papiam vero, qui illicitas impurasque voluptates minime cum Cerintho expectandas esse affirmavit, sed inculpatas, ac spirituales duntaxat, præter ea quæ dicuntur de præsentī gloria Sanctorum, constat veram rationalis hominis delectationem ac voluptatem esse videre Deum, eique perpetuo adhærere; ut habetur in Ps. xxxv. 9. 10. *Inebriabuntur ab ubertate Domus tuæ: & torrente voluptatis tuæ potabis eos. Quoniam apud te est fons vitæ, & in lumine tuo videbimus lumen.*

SOLVUNTUR OBJECTIONES.

Cerinthus frivolis quibusdam sophismatibus absurdam nitebatur palliare sententiam. Ac primo opponebat. Matthæi xix. 29. continetur Christi promissio, quod omnis qui reliquerit temporalia, *Centuplum accipiet, & vitam æternam possidebit*: Igitur sanctis præter regnum cælorum sempiternamque beatitudinem centuplum reddendum est divitiarum, voluptatum, epularum, honorumque, quibus pro Christi amore nuncium miserunt.

Resp. nego consequentiam. Sanctus enim Hieronymus lib. 111. in Math. cap. 19. ait: *Sensus ergo iste est: Qui carnalia pro Salvatore dimiserit, spiritualia recipiet, quæ comparatione & merito sui ita erunt, quasi si parvo numero centenarius numerus compareretur.* Hoc autem centuplum non est ipsa æterna vita, ut quidam exponunt; nam & verba

verba redundarent, & Marci x. 30. aperte promittitur centuplum *nunc in tempore hoc*, æterna autem vita *in seculo futuro*. Sed est hæc centuplicata merces, superabundantia gaudii in tribulationibus & angustiis, affluentia bonorum in paupertate spiritus, atque voluptas ex fraterna caritate, quæ, ut observant in hunc locum Origenes, Theophilactus, & auctor Quæst. ad Ortod. Q. cx., longe superat quaecunque toleratum rerum dispendium. Atque hanc interpretationem approbat August. Epist. 89. ad Hilarium, ubi exponit *centuplum in hoc seculo* per illud 2. Corinth. 6. *Nihil habentes & omnia possidentes*, necnon Chrysost. hom. 40. in Genes. 17. dicens id completum fuisse & in Abraham, quando relicta paterna Domo in terram abiit peregrinam. Ergo cum centuplum in præsentī vita reddatur, atque ut ait Marcus, *in tē nūpō tēpō in tempore hoc*, nequit hoc loco designari regnum Chiliarum.

Opp. 2. Matth. v. 6. habetur: *Beati qui esuriunt & sitiunt justitiam, quoniam ipsi saturabuntur*. Ergo justis satietas quoque, epularumque copia parabitur.

Resp. nego consequ. Nam saturitas istic promittitur spiritalis & cælestis, non terrena & carnalis. Talis quippe erit satietas, qualis nunc fames & sitis. At loquitur Matth. de fame, & siti spiritali, idest, justitiæ. Ergo & de spiritali saturitate. Fames præterea, ac sitis citato textu translatione quadam vehementem significant appetitionem, ut cum dicitur a Virgilio: *Auri sacra fames*, & a Plutarcho *Qui non esurit, aut sitit vindictam*. Ita saturitas plenum animarum gaudium vocabuli translatione demonstrat: quod non est in sacris literis inusitatum. Legimus in Ps. xvi. 15. *Satiabor, cum apparuerit gloria tua*. Et cvi. 9. *Satiavit animam inanem, & animam esurientem satiavit bonis*.

Opp. 3. Lucæ xxii. 29. *Ego dispono vobis*, (inquit Christus Dominus) *sicut disposuit mihi pater meus regnum, ut edatis & bibatis super mensam meam in regno meo*. Poterat ne clarius exprimi futurus conviviorum in Christi regno apparatus?

At hæc ejusdem generis sunt. Edere & bibere metaphorice idem sunt ac frui & oblectari. Quo loquendi genere utitur Christus, quia solebat apud Judæos per verba edendi ac bibendi felicitas populariter describi. Sic de cælestis doctrinæ suavitatem dictum Proverb. ix. 5. *Venite, comedite panem meum, & bibite vinum, quod miscui vobis*. Esaiæ lxxv. 13. *Servi mei comedent, & bibent*. De ubertate Gratiæ Joannis iv. 14. *Qui biberit ex aqua, quam ego dabo ei, non sitiet in æternum: sed aqua, quam ego dabo ei, fiet in eo fons aquæ salientis in vitam æternam*. De fide cap. vii. 38. *Qui credit in me flumina de ventre ejus fluent aqua viva*. Confer & locum Apoc. xxii. 17. Hac itaque tritissima Scripturarum phrasi cæleste regnum sub mensæ apparatu signatur.

Putant

Putant quidam hoc impleri in præfenti sæculo, dum fideles reficiuntur Eucharistia, quæ in regno Dei, idest Ecclesia Catholica, de mensa Dominica ministratur. Addo his translationibus Apostolicam describi dignitatem. Duabus quippe notis solent cognosci proceres regni, honoris & potestatis. Honos est in mensæ regalis consortio: potestas in Iudiciorum participatione. Utrumque Christus apud Lucam xx. 11. spondit: Honorem dicens, *Ut edatis & bibatis super mensam meam in regno meo*; potestatem consequentibus verbis, *Et sedeat is super thronos judicantes duodecim tribus Israel*.

Quarto opponunt Cerinthiani: Matth. xxv. 29. Christus in Cœna recumbens ait: *Non bibam amodo de hoc genimine vitis usque in diem illum, cum illud bibam vobiscum novum in regno patris mei*. Nendum mensa, sed & vinum, & quidem uvis expressum, loco isto commemoratur.

Sed eadem est adhibenda responsio. Vinum læticiam frequentissime significat, & amicorum caritatem, ut xi. Cant. 4. & Zachariæ ix. 17., idque, quod vinum exhilaret cor hominis. Neque aprior Christo proferri poterat analogia. Vineæ Ecclesia dicitur tam in novo, quam in veteri testamento: *Vinea facta est dilecto meo*, inquit cap. v. Esaias: *Ego plantavi te vineam electam*, Jeremias ii. 21. *Homo erat pater familias, qui plantavit vineam*, &c. Mat. xx. 33. Appellatur Christus i. Cantic. 13. *Botrus*, Joannis xv. *Vitis*; ibidem cœlestis Patris *agricola*, Fideles vero *palmites*. Non potuit ergo melius designari gaudium Sanctorum quam sub metaphora *Vini*, sive attendatur consuetudo Scripturarum locutio, sive conferantur quæ de Ecclesia, ejusque capite ac membris dicta sunt. Atque ita *Vindemia*, & *racematio* iudicium, & uvæ contusæ, & calcatæ divinam in impios vindictam figurant, plenumque apud Joelem *Torcular* exuberantes nequitias. Sic optima est scripturarum coheræntia, si *Vinum* hoc loco spiritaliter accipiamus. Quod ut facilius a nobis percipiatur, appellatum est *Novum*, idest alterius, & longe præstantioris virtutis, quam illud sit, quo bibax inebriatur. Hoc sensu in Apocalypicos xx. 1. Beatorum patria appellatur *Jerusalem nova*: & ne cum Cerintho dictum putes de instaurata Palestinorum metropoli, monet Apostolus ad Galatas iv. 26. scribens: *Quæ sursum est Jerusalem*. Sunt qui ad literam Christi verba interpretantur de sumptione potus cum discipulis post resurrectionem, de qua Petrus Act. x. ait: *Qui manducavimus, & bibimus cum illo*. Hanc interpretationem non approbat Guilelmus Estius, quoniam istud nondum erat in regno patris, neque novum in comparatione ultimæ cœnæ. Theologi tamen eruditissimi & istam amplectuntur explanationem: pro qua respondere possumus Estio, Regnum patris dici Ecclesiam, quam Christus acquisivit sanguine suo: novum vero, & inauditum, quod habens corpus incorruptibile biberit & comederit, ut *certiori argu-*

mento

mento (inquit Chrysostomus hom.83. in Math.) *firmaret resurrectionem.*

Objicies 5. Apocalypf.xx. v.2. legitur : *Et apprehendit draconem, serpentem antiquum, qui est diabolus & satanas, & ligavit eum per annos mille : v.3. Misit eum in abyssum, & clausit, & signavit super illum, ut non seducat amplius gentes, donec consummentur mille anni : & post hæc oportet illum solvi modico tempore.* Hoc loco prædicitur apertissime postrema Ecclesiæ persecutio per Antichristum diabolo sua-dente atque impellente. Prænunciatur enim v.4. Judicium : *Et vidi sedes, &c.* Post judicium istud consequitur regnum mille annorum : *Et regnaverunt cum Christo mille annis.* Ergo post Judicium regnum mil-le annorum certissime futurum est. Secundo prædicitur ibidem duplex resurrectio, duplex judicium. Prima est resurrectio iustorum ut fru-an-tur regno annorum mille, de qua v.5. *Ceteri mortuorum non vixerunt, donec consummentur mille anni. Hæc est resurrectio prima. Beatus & sanctus, qui habet partem in resurrectione prima : in his secunda mors non habet potestatem : sed erunt Sacerdotes Dei, & Christi, & regna-bunt cum illo mille annis.* Erit igitur post resurrectionem iustorum re-gnum Chiliastarum. Secunda resurrectio, & secundum judicium prædi-citur v.13. *Et mors, & infernus dederunt mortuos suos, qui in ipsis erant : & judicatum est de singulis secundum opera ipsorum.* Post hæc mors secunda, & impiorum sempiternum supplicium. Tercio : Per re-gnum mille annorum, quod promittitur cap. xx. 6. non possumus in-telligere, ut quidam arbitrantur, cælestem gloriam, qua nunc fru-an-tur electi, quoniam regnum millenarium erit post resurrectionem Ju-storum, & ante resurrectionem impiorum, ut constat ex dictis : & gloria cælestis consequetur post damnationem reproborum, ut descri-bitur immediate sequenti capite. Accipiendum est ergo regnum ha-bendum in terris post primam resurrectionem. Denique citatis verbis, *Erunt Sacerdotes Dei & Christi*, haud obscure insinuat in regno Milliaro immolandas esse victimas, & innovanda legis holocaustoma-ta, ut aiebat Cerinthus, cujus hæc sunt præcipua momenta.

Ut obscurum Apocalypseos intelligatur oraculum, singula ejus partes sunt breviter percurrendæ. Itaque cap. xx. versu 1. memora-tur Christi primus adventus : & dicitur *Angelus habens clavem abyssi, & catenam magnam*, quoniam potestatem habet cælestium & inferno-rum, & captivam duxit captivitatem. Hinc versu 2. dicitur *satanas ligatus Per annos mille*, quia per adventum Christi cohibenda erat us-que in finem sæculi dæmonis sive ac potestas. Adstringitur autem duratio mundi ad mille annos, ut perfecto numero notaretur hujus temporis plenitudo, inquit S.P.Augustinus lib.xx. de Civit. Dei cap.7. Ob futuram Antichristi persecutionem, quæ creditur duratura tribus annis, & sex mensibus, additur : *Post hæc oportet illum solvi modico tempore.* Interim & sæculo permanente sedes positæ sunt, & pro anima-

animabus *Decollatorum* datum iudicium, quod describitur versu 4. *Decollatorum* animæ sunt martyres, quorum frequentissimum securis supplicium, simulque spiritus iustorum, ac poenitentium. At per sedes non iudicium extremum post Resurrectionem futurum significatur, istud enim describitur v. 11. & seq., sed aut particulare, aut Ecclesiæ regimen, in quo ligandi atque solvendi auctoritas exercetur. De istis *Decollatorum* animabus scriptum est, *Vixerunt, & regnaverunt cum Christo mille annis*, scilicet hoc temporum intervallo, & ante corporum resurrectionem, quo dormierunt in Christo, animæ non perierunt, non detinentur Tartari ruderibus, sed ad gloriæ solium translatae sunt. Ex quibus colligitur, quod regnum istud mille annorum, quod tribuitur solis animabus, non corporibus, & constituitur antequam solvatur satanas, & mortui magni, & pusilli resurgant, nequit esse regnum Chiliaitarum, quod & corporibus promittunt, & post generalem resurrectionem expectant.

Præfens animarum gloria appellatur resurrectio prima. Duplex est mors, duplex resurrectio. Prima mors est mors tam honorum, quam malorum, idest separatio animæ a corpore: altera mors, ut constat ex versu 14. est impiorum ad sempiternum ignem damnatio. Prima resurrectio est beatitudo animæ, ita enim appellatur etiam ab Apostolo ad Hebræos cap. xi. 35. & a Daniele xi. 2. Resurrectio secunda erit dum corpora a mortuis resurgent, quod legitur v. 12. *Quia* vero vita æterna, & prima anastasi ac resurrectione non gaudent animæ impiorum, propterea additur v. 5. *Ceteri mortuorum non vixerunt, donec consummentur mille anni. Hæc est resurrectio prima*: Scilicet non vixerunt neque vita animæ & Dei consortio, neque vita corporis, quam tandem resument in gehenna carne simul ac spiritu cruciandi. Ab hac damnatione immunes erunt animæ Iustorum; unde v. 6. legitur, *Beatus, & Sanctus, qui habet partem in resurrectione prima: in his secunda mors non habet potestatem*, idest certi sunt non esse mittendos in stagnum ignis. Ergo Martyres ac poenitentes qui jam habent partem in resurrectione prima & in spiritus beatitudine, neque subicientur unquam morti secundæ & damnationi animæ & corporis, antequam consummentur mille anni, & adveniat statutus mundi interitus, sunt *Sacerdotes Dei & Christi*, & sunt, qui *regnabunt cum illo mille annis*, ita prosequitur v. 6. Sacerdotes dicuntur, idest plebs sancta, regale Sacerdotium, ait S. P. Aug. xx. de Civit. Dei cap. 10. Item quia reddunt Deo sacrificium laudis, inquit Estius. Rursus quoniam sunt intimi Dei amici, exponit Natalis Alex. Neque vero de hostiarum immolatione ritu Judaico possumus ista accipere, quum sermo sit de animabus *Decollatorum*, non de hominibus in corpore viventibus, ut constat ex dictis.

Quamquam penitus dilutum est Millenariorum fundamentum, tamen juvat dicta singulis argumenti partibus applicare. Ad primum

To. I.

I i

nego

nego consequentiam, non enim versu 4. describitur iudicium faciendum post resurrectionem sanctorum Martyrum, cum nulla hactenus memorata sit resurrectio, & omnes simul tam boni, quam mali presentari debeant ante tribunal Christi, illis dexteram occupantibus, & his sinistram; ut aperte narratur Matth. xxv., & 2. ad Corinth. 5. Ad 2. nego nomine Resurrectionis primæ intelligendam esse corporum reviviscentiam, non animæ beatitudinem. Ad tertium dico post universalem resurrectionem consecuturam esse gloriam consummatam ac plenam, & vestiendos electos duplici stola, beatitudine nimirum animæ & corporis, quum ii sola anima nunc Deo fruuntur. Ad 4. nego Sacerdotes eos tantum dici, qui juxta legem Moysi immolant hostias, & cruenta peragunt sacrificia: nam de omnibus prædestinatis legitur Apocalyp. 1. 6. *Et fecit nos regnum, & Sacerdotes Deo, & patri suo.*

Hactenus dicta vera sunt, & apud Sacrarum literarum interpretes vulgatissima. Grotius Apocalypsim nova quadam, & ingeniosa methodo exponit. Ait Sanctos regnare cum Christo per dona sanationum, quæ conspiciuntur apud ipsorum Memorias, & per honores, quem illis Ecclesiæ palam habuerunt. Ante tempora autem Constantini neque tutum erat ad martyrum monumenta concurrere, & vigente Paganismo merui debebat ne honores martyrum a Paganis in superstitionis suæ defensionem abriperentur. Constantinus pro Christianismi libertate edictum vulgavit anno cccxi. Mille post annis orta est Domus Ottomanica, quam condidit Othmen Ciliciæ præfectus, qui primam imperii sedem, occupata Bythinia, posuit circa annum 1302. Quoniam vero Ottomanii in Asiam, & Græciam Mahumetis invexerunt impietatem, & inde mala innumera & Ecclesiæ & religioni evenerunt; dicitur quod consummatis mille annis solvendus erat satanas, & seducturus gentes terræ Gog, & Magog. Quo nomine designatas ait Asiam, & Siriam, ubi Domus Ottomanica cœpit primum dominari. De ea consequenter dictum est, quod debebat circuire castra Sanctorum, & civitatem dilectam; quoniam in ejus ditione inclusæ sunt omnes septem Ecclesiæ, quibus conscripta est Apocalypsis; & tenet nedum civitatem Jerusalem, sed & Constantinopolim, quam *novam Sion* appellant Græci. Hanc debellavit, fecitque Imperii Turcici sedem Mahomet II. Ottomanicæ stirpis princeps, anno 1453. Igitur juxta Grotium vere regnum Martyrum mille annorum spatium duravit, quod modo inter eos coarctatum est, qui illorum servant religiosissimum cultum. Ita hæc dicta sunt, ut nullatenus a priori Patrum explicatione sit recedendum. Dignus est tamen mihi visus Grotius, ut illius quoque interpretationem adferrem & propter literalem sensum, cui Catholicorum sententia non omnino repugnat, & propter egregium de cultu Martyrum testimonium; in gratiam solummodo Novatorum, qui hominem pluris faciunt, quam Romanæ Communionis Interpretes universos.

C A P U T IX.

*Sequitur questio de presenti statu Animarum
sanctarum.*

ALTER autem error a Millenariorum fabulis, ut diximus, longe
diversus, & quo implicatos novimus nonnullos priorum seculo-
rum Patres, erat, quem sequenti explodimus assertionem.

PROPOSITIO: Nec ad minimum tempus exutis corporibus ani-
mabus Dei visio & gloria differtur, si nulla conspersa sint macula.

Hanc definitionem Fidei, de qua extat Decretum Benedicti XII. in
Extravaganti *Benedictus Deus*, Florentini Concilii Sess. ult. in Decre-
to unionis, & Tridentini Sess. xxv. Scripturis, Patribus, ac rationi-
bus comprobamus. Scripturarum quidem momenta sunt. Ps. 126.
Cum dederit dilectis suis somnum, ecce hereditas Domini. Nam dor-
mire ac somnum capere corporalem mortem significat passim, sed apud
Psalmistam frequentissime, in 111. 6. 14. 9. x1. 9. LXXV. 6. &c. Eccles.
x1. 28. *Facile est coram Deo in die obitus retribuere unicuique secun-
dum vias suas.* Retribuere est bonis, malisve dare quod æquum est.
Consonat Ecclesiastico illud vulgatissimum:

Pascitur in vivis livor; post fata quiescit.

Tunc suus ex merito quemque tnetur bonos.

Rursus 2. ad Corinth. v. 1. *Scimus enim, quoniam si terrestris domus
nostra huius habitationis dissolvatur, quod adificationem ex Deo habe-
mus domum non manufactam, æternam in calis.* Nam & in hoc inge-
miscimus, habitationem nostram, quæ de cælo est superindui cupientes:
& v. 8. *Audemus autem, & bonam voluntatem habemus magis pere-
grinari a corpore, & præsentem esse ad Dominum.* Item ad Philipp. 1.
23. *Coartor autem in duobus desiderium habens dissolvi & esse cum
Christo, multo magis melius: permanere autem in carne necessarium
propter vos.* Dissolvi animæ de corporeo carcere notat discessum: &
græce habetur *ἀναίρειναι*, quod proprie est *redire*, nempe ad Deum,
de quo Eccles. x1. 7. *Revertatur pulvis in terram suam, unde erat,
& spiritus redeat ad Deum, qui dedit illum.* Actorum quoque 7. Ste-
phanus *Intendens in cælum vidit gloriam Dei.* Et in divino officio ad-
dit Ecclesia: *Vidit & introivit.* Demum in Apocalypsi vii. 9. & 15:
dicitur Sanctos amictos stolis albis stare ante thronum, & in conspectu
agni; non *procul* sed *prope* & *juxta*, quod in Græcis demonstrat pro-
positio *ἐν* cum genitivo, quæ etiam idem est ac *super*. Et cap. xiv.
13. *Opera enim illorum sequuntur illos.* Habet hic Vulgata *Amodo*,
Græci, *ἀπ'αυτοῦ*, quod valet, *Jam nunc*, hoc ipso tempore requie-
scent, quoniam merces illos consequitur. Ita per metonymiam opera

& virtutes dicuntur iustos persequi, & anteire, quod donetur corona, si merita decedentium præeant. Addunt nonnulli verba Christi ad latronem: *Hodie mecum eris in Paradiso*. Ea satis ambigua demonstrat Petavius lib. VII. cap. 14. & Iuenin. dissert. IV. art. 2. Paradisus equidem generale est nomen, ubi feliciter vivitur; neque hinc definire possumus, ubinam recepta fuerit latronis anima, an in cælis, an in sinu Abraham, an in aliquo alio receptaculo voluptatis. Hoc tamen loco utuntur ad rem nostram eruditi Theologi, Estius, Habert, Tournely, Gotti, Henno, alii. Ego medium incedo iter, & cum Petavio arbitror incertum esse, quo loco statim post mortem latronis anima fuerit recepta, cum aliis puto ex tunc fuisse beatam, & consortem regni, quod petierat dicens: *Memento mei, Domine, dum veneris in regnum tuum*. Cum enim Deus ubique sit, nullum dubium est, quin Paradisi felicitas habeatur, ubicumque se videndum exhibeat. Vide Bellarminum lib. 1. De Sanct. Beatitud. cap. 3. & Janfenium, æ Maldonatum in cap. 23. Lucæ. Ex præmissis autem Sanctorum Bibliorum testimoniis argumentatio ista confurgit: Statim ac dormiunt iusti, & illorum domus corporea dissolvitur, sunt præsentés ad Dominum, redeunt ad Creatorem suum, aperiuntur eis cæli, ingrediuntur illuc, consequitur suorum operum merces, & retributio laborum: Hæc omnia Dei visionem, & sempiternam præferunt beatitudinem: Ergo Iustorum animæ statim post mortem vident Deum, optatissimamque beatitudinem adipiscuntur.

Accedit perpetua Sanctorum Patrum traditio. Primo enim Ecclesiæ sæculo, ex quo nullum hæretici pro sua poterunt sententiâ proferre, Hermas antiquissimus Scriptor in vulgatissimo Pastoris Opere, quod ut Canonicum divinumque veteres nonnulli laudarunt, lib. 3. simil. 8. docet omnes, qui pie obeunt, pœnitentibus exceptis, jam in cælis coronari, ut videre potes Tom. 1. PP. Apostolic. Cotelieri. Clemens in Epist. ad Corinth., quam sine dubio genuinam scribit & Clericus ad annum 1XIX. 6. de Petro ait: *Martyr effectus discessit ad debitum gloria locum*. Ignatius, cujus Epistolas editas ab Isacio Vossio omnes recipiunt, & contra Dallæum defendunt Dupin, Alexander, & Armachanus, ad Roman. scribit: *Sinite me ferarum escam fieri, per quas licet Deum adipisci*. *Sinite me purum lumen haurire*, &c. Occubuit autem Ignatius anno CVII.

Altero quoque sæculo, si Papiam excepias, de quo recole dicta superiori capite, & Justinum, qui hac in parte alternavit, diserte veritatem Catholicam tradiderunt Polycarpus Epist. ad Philipp., & Ecclesia ejus Smyrnenfis apud Eusebium lib. IV. H. Eccl. cap. 15., ubi de beatissimo Antistite ait: *Per tolerantiam devicto injusto præside, immortalitatis corona recepta, cum omnibus Apostolis omnibusque iustis exultans Deum glorificat*. De Cajo Romanæ Ecclesiæ presbytero dictum est

est supra. Extat in Apologia Athenagoræ apertissimum hujus traditionis argumentum, videlicet: *Persuasi sumus, nos hac mortali defunctos vita, alteram hac terrestri longe meliorem esse victuros, ut apud Deum, & cum ipso simus.* In vetustissimis quoque Act. S. Symphorose apud doctissimum Ruinart p. 20. ita Martyr sanctissima de viro suo Getulio, & Amantio fratre compellavit Hadrianum: *Elegerunt enim magis decollari quàm vinci, passi mortem, quæ pro nomine Christi suscepta inter homines terrenos quidem ignominiam eis peperit temporalem, inter angelos vero decus & gloriam sempiternam: inter quos nunc gradientes & tropæa passionum suarum dantes cum aeterno rege vita aeterna fruuntur in cælis.* Passa est anno Christi 120. Lucius martyr, qui pro Christi nomine sanguinem fudit anno 162., dum ad supplicium duceretur, ait: *Se Urbicio magnam gratiam debere, quippe qui hujusmodi malis Dominis liberatus ad optimum patrem, regemque esset migraturus.* Solus ergo Justinus in hac quæstione fluctuare videtur: sed in Dialogo cum Tryphone fatetur contra se stare multos: *Qui puræ, piæque Christianorum sunt sententiæ.* Ubi contra omnium exemplarium fidem novi Chiliastræ particulam negantem inseruerunt. Enim vero cum quæssisset Trypho, an profiterentur Christiani instauratum iri Jerosolymam, ibique Christianos una cum Judæis ac Profelytis beatam vitam ducturos, *Fusus sum, inquit, & prius me & plures alios hoc sentire, quemadmodum etiam vos omnes scitis futurum: sed multos, qui puræ piæque sunt Christianorum sententiæ addicti, hoc non agnoscere tibi significavi.* Neque obstat, quod in priori parte Dialogi nihil tale reperitur, nam pag. 300. postquam dixit Jesum suscitatum a mortuis, sequuntur verba, quæ cum superioribus minime connexa sunt, & lacunam ibidem docti viri observarunt, etiam Græbius in Spicilegio PP. sæculi II. & Joannes Clericus in Historia duorum sæcul. ad annum cxi. n. xv. 111. Nec pariter obest, quæ Justinus subjicit: *Se, & si qui recte per omnia sententiæ Christiani sunt, & carnis resurrectionem futuram nosse, & mille annis in instaurata, exornata & aucta Jerusalem pios victuros.* Hic enim invehitur in Gnosticos, qui Christiani vocabantur, sed corporum negabant resurrectionem. Ex quibus colligere juvat & Justinum nimis fuisse liberalem Tryphoni dando Christum venturum, ut regnet in instaurata Jerusalem, & sincere oppositam multorum Christianorum traditionem fateri.

Ex tertio sæculo numerantur a Novatoribus Tertullianus & Irenæus: at Apostolicæ Traditionis assertores habemus Clementem Alexandrinum lib. v. Stromatum, Dionysium Alexandrinum, qui scripsit adversus Irenæum & Nepotem Aegypti Episcopum, Origenem lib. 2. Perilarchon, in 6. contra Celsum, & Hom. v. in diversos, Methodium martyrem, & alios, præsertim Beatissimum Cyprianum. Qui in exhortatione martyrii cap. ultimo: *Quanta est, inquit, & quanta securitas*

ritas exire hinc latum, exire inter pressuras & angustias gloriosum, claudere in momento oculos, quibus homines videbantur, & mundus, & aperire eos statim, ut Deus videatur, & Christus? Tam feliciter migrandi quanta velocitas? Terris repente subtraheris, ut in regnis caelestibus reponaris. Similia repetit in lib. de immortalitate Animæ, & alibi. Hortatur etiam Mosem, & Maximum Epist. xv. alias xxxv. 11. his verbis: *Beati satis, qui ex vobis per hæc gloriarum vestigia commeantes jam de sæculo recesserunt, confecto itinere virtutis ac fidei ad complexum, & osculum Domini, Domino ipso gaudente, venerunt.* Irenæum itaque Millenariorum imbutum errore fatemur cum doctissimo Petavio lib. vii. cap. xiv. Natali Alex. sæculi 2. dissert. vii., aliisque ingenuis Scriptoribus. At Irenæus lib. v. adversus hæreses cap. ult. non diffitetur esse plures, qui Sanctorum animas statim ab hominis morte in cælos recipi contenderent. Neque obstat, quod hi, auctore Irenæo, *Supergrediantur ordinem promotionis justorum*; nec enim hæreticam putat istam esse sententiam, sed in aliquo tantùm cum Gnosticis conspirare, ut supra diximus de Justino. Estius in iv. sentent. Dist. 45. §. 3. laudat pro sententia nostra Irenæum lib. i. contra hæres. cap. 2., & §. 4. respondet ad ea quæ in contrarium obijciuntur, sed Irenæus satis aperit mentem suam lib. v. cap. 5., ubi affirmat Justorum animas recipi quidem in Paradisum post mortem, sed hunc non alium esse, quam illum, in quo Deus ab initio posuit hominem, quem plasmavit: illuc translatos Justos, illuc Paulum asportatum, ibi susceptam Latronis animam, ibi manere Sanctorum animas usque ad consummationem coaspicientes incorruptelam. Quapropter justos translatos in cælum revera non existimat Irenæus.

Possimus tamen hunc, aliosque omnes etiam Justinum, ac Tertullianum, qui tamen libros de Anima scripsit jam Montanista, ad aliquam concordiam cum ceteris revocare. Etenim Patres illi, qui Sanctorum animas ad inferos dicunt descendere, qui recipi in Paradisum terrestrem, qui in loco invisibili quiescere putant, non eas in aliquem pœnarum locum abijciunt, neque aperte negant apud Deum, qui ubique est, vivere, & æterna gaudia degustare. Quapropter de statu dissentire non videntur, tametsi minimè convenient de loco. Hæc conciliatæ ratio non fugit sapientes viros, ut dicemus infra disputantes de mente Augustini. Hanc nedum amplectitur, sed etiam erudite propugnant Joannes Vossius disput. vi. de statu animarum quæst. 2. Errat tamen fortasse Vossius, dum scribit idem sentire Calvinum, quod lib. iv. institut. cap. xxv. commate vi. statuat certò animas Deo vivere, & nihil definiendum esse de loco. Nam lib. i. ejusdem Operis cap. xxv. pag. 365. Calvinus ait: *Stultum ac temerarium esse inquirere, quo in loco sint animæ justorum, & an gloria fruantur, nec ne. Interea cum scriptura ubique jubeat pendere ab expectatione adventus Christi, &*
glorie

glorie coronam eo usque differat, contenti simus bis finibus divinitus nobis præscriptis: animas piorum militia labore perfunctus in beatam quietem confedere, ubi cum felici latitia fruitionem promissa gloria expectant. Ergo Calvinus non ita credit Iustorum animas vivere, ut Dei visionem, & gaudia sempiterna possideant. Porro si animabus Sanctorum adversarii gloriosam concederent beatitudinem; *Non essemus*, inquit Bellarminus lib. 1. de Beatit. SS. c. 6. *multum solliciti de Cælo illo corporeo.* Sed redeo ad institutum.

A quarto sæculo, si Lactantium exceperis virum quidem Grammaticum ac Rhetorem eloquentissimum, non autem Theologicis doctrinis valde eruditum, ejusque generis paucissimos; omnes in hanc nostram positionem conspiraverunt. Docet id Athanasius, qui in vita Antonii narrat Ammonis Monachi animam visam in Cælum deferri. D. Basilus orat. de Gordio Martyre: *Erat enim affectus, inquit, non ut qui in lictoris manus deventurus esset, sed velut Angelorum manibus seipsum commissurus, qui statim ipsum recens mactatum, assumptum ad beatam vitam translaturi essent.* Lege & orat. in 40. Martyres, & de laudibus Julithæ. Gregorius Nyssenus orat. funebri in Pulcheriam filiolum Theodosii: *Si a te, ait, puella migravit, attamen ad Dominum recurrit. Tibi oculum clausit: verum sempiterno luminari aperuit. A tua mensa discessit, sed ad Angelicam adjuncta est. Hinc est avulsa planta: verum in Paradiso consita est. Purpura florem exiit: at cælestis regni amictum induit.* Vide & orationem 2. in XL. Martyres. Nazianzenus pariter orat. xx. precatur Basilium, ut sese post obitum excipiat, & simul Beatam Trinitatem valeant contemplari. Clarius Sanctorum beatitudinem indicat xi. orat. in Gorgonium sororem suam, & in x. quam scripsit in fratrem Cæsarium. Chrysostomus in posteriore Epistolam ad Corinth. ait: *Beati, & ter Beati qui illis bonis fruuntur, &c.* & in orat. de S. Philogonio: *Hinc abieus, & Civitatem suam relinquens, in alteram quæ est Dei Civitatem ascendit, & hanc Ecclesiam deferens in illam conscriptus est, quæ est primogenitorum descriptorum in Cælis, & festis istis relictis ad celebrem Angelorum conventum translatus est.* Prætermitto S. Ephrem, Hieronymum lib. contra Vigilantium, & Epist. ad Marcellum, Cyrillum Alexandrinum in lib. ad Reginas, Monologium Græcorum, hymnos Prudentii, & quotquot in Thesauro Cocci, & apud Controversiarum Fidei Tractatores, collectos invenias.

Jam vero ex dictis istud promittit argumentum. Illud certa fide tenendum est, ut commonet Vincentius Lirinensis n. 2. & Aug. lib. 2. de Baptismo cap. 7. quod per universam custoditur Ecclesiam, & semper, ubique, & ab omnibus traditum est; quamquam unus, vel alter extiterit aut imperitus, aut ingenii pertenuis, aut imbutus erroribus, qui in adversantem sententiam declinaverit, & maximè si & hic

hic doctrinam oppositam puram & catholicam fateatur . At ab exordio nascentis Ecclesiæ ad hæc tempora omnes Ecclesiæ Patres tradiderunt Beatorum animas Deo vivere , & Majestatis divinæ lumine collustrari , & qui ejusmodi traditioni adversantur , judicio præclarissimorum viro-
rum , sive homines exigui ingenii fuerunt , ut Papias ; sive sola profana eruditione , & literarum cultura celebres , ut Lactantius ; sive nullatenus ausi sunt opinioni detrahere contrariorum , ut Justinus & Irenæus : Ergo quod animæ justorum certamine expleto coronatæ perpetua felicitate triumphant , erit certa , inconcussa , & firmissima fide tenendum .

Denique probatur ratione . Ac primò : Impiorum animæ post mortem ad inferna descendunt , ibique maxima torquentur pœna ; id enim catholica tenet fides , & probat exemplum divitis Evangelici Lucæ xvi . Atqui Deus non minus ad puniendum , quam ad premiandum , pronus est , imo misericordia ejus superexaltat judicium , tantumque reddendæ mercedis suamet obstringitur lege , ut Joelis ultimo dicat : *Cito velociter reddam vicissitudinem vobis* . Si ergo statim post mortem punit , statim post mortem reddit proculdubio coronam . Deinde : Pium ac sanctum desiderium quod a superna caritate excitatur , & in dies augetur exercitamento virtutum , non est dicendum inane , & a proprio fine alienum . Tale desiderium habent justī , dum vivunt , ut coronam immarcescibilis gloriæ percipiant , dicentes cum Apostolo 1. ad Philipp. *Desiderium habemus dissolvi , & esse cum Christo* , atque ab hac lacrymarum valle in cœlestem Jerusalem transferri ardentissimè cupiant . Ergo inane ac frustraneum credendum non est desiderium hujusmodi . Postremo si ad extremum Judicium singulis reservetur corona , quænam erit melior conditio Fidelium post Christum passum , præ veteribus Patribus , qui in sinu Abraham usque ad redemptionis tempora detinebantur ? Quid præstitit his descensus Christi , si de tenebris , ubi tanquam in refrigerii loco morabantur , eos non vocavit ad lucem ? Cur olim expetebatur temporum plenitudo , ut Deus fervili indutus conditione plebis suæ relaxaret facinora , cœlestis Jerusalem construeret ædificia ? Quare post Christi mortem Martyrum obitus natalis dies appellatur , solemnique ritu , precibus , hymnis , & universæ Ecclesiæ colitur plausu , & lætitia ? Verum hæc non est opus longa oratione suadere .

SATISFIT ADVERSANTIS SENTENTIÆ ARGUMENTIS .

His argumentis adversarii ducuntur . 1. Matth. xx. v. 8. legitur : *Cum sero factum esset , dicit Dominus vineæ procuratori suo : Voca operarios , & redde illis mercedem , incipiens a novissimis usque ad primos* . Ergo sub vespere , idest , in fine mundi , merces unicuique tribuitur .

Com-

Communis responsio est, per ea verba, *Cum sero esset*, non finem mundi, sed terminum vitæ designari, vel si ad extrema mundi referantur, accipienda esse de beatitudine completa, & corporum simul & animæ glorificatione. Possumus tamen parabolam non incongrue intelligere de Ecclesia, quam vineam & regnum Dei vocari supra monui. Ad Ecclesiam suam quosdam vocavit Deus primo mane, idest ab exordio mundi per legem naturæ: quosdam circa horam tertiam, & media mundi ætate per legem Moysi; quosdam denique *Cum sero esset*, & finis legis, captivitatis, & culpæ, per legem Evangelicam. Hinc de primis ac secundis dicitur quod *Convenit ex denario diurno*, & præstitutam mercedem spondit; quoniam sub dispensatione fœderis Sinaitici merces proposita erat definita, ac sensibus obvia, nempe naturalium bonorum affluentia, longæva vita, & terræ Chanaan possessio. Nil tale dictum ultimis, quoniam merces in lege Evangelica repromissa talis est, quam nec oculus vidit, nec auris audivit. *Qui* primi hanc amplexi sunt, fuerunt Gentiles, legi Moysi non addisti, neque ullam habentes repromissionem; ideoque responderunt Patrifamilias: *Nemo nos conduxit*. Neque inusitatum est comparationibus hujus generis vocationem gentium, & regnum Dei designari. Hæc mea sententia est. Propterea nego consequentiam. Scopus enim parabolæ est, Gentiles ultimo ad fidem, & Ecclesiam adscitos, non minorem accepturos mercedem, quàm Judæi, qui Deo cultum exhibuerunt sub servitute legis, & in eorum comparatione portaverunt *Pondus diei & æstus*. Atque hæc merces dicitur rependi sub vesperam, quia neque vigente priori lege, neque durante Mosaica, sed tantum in postrema, idest, post institutionem Evangelii, referatum fuit cælum. Possset quoque parabola interpretari de variis justorum generibus: quorum aliqui ab incunte ætate Deo servierunt, aliqui in vitæ decursu severius vitæ amplexi sunt institutum, aliqui jam senio confecti respicientes prioris vitæ rationem deplorant: qui tamen si in pari caritatis perfectione decedant, singuli denarium, idemque præmium a Deo remunerato recipient.

Alter locus promittit ex eodem Matth. cap. xxv. v. 34. *Tunc dicit Rex his, qui a dextris ejus erant: Venite benedicti Patris mei, possidete paratum vobis regnum a constitutione mundi*. Ergo electi ante Judicis adventum Regnum non possident.

Sed hæc verba non animabus separatis, sed in corpore viventibus dicuntur: unde distinguo conf. Regnum non possident degentes in corpore, & completa beatitudine concedo: gloriosi anima sola, & nondum consummata felicitate, nego. Neque alium esse Evangelicorum verborum sensum constat ex sequentibus. Impii enim proculdubio cruciantur in gehenna, & tamen resuscitatis dicitur: *Discedite a me maledicti in ignem æternum*.

Tertio objicitur celebre testimonium Pauli ad Hebræos x. 39. ubi
Tu. l. *K k* *de*

de Sanctis veteris legis ait : *Hi omnes testimonio fidei probati , non acceperunt repromissionem : Deo pro nobis melius aliquid providente , ut non sine nobis consummarentur .* Duo ibi affirmat Apostolus , unum veteres Patriarchas non habuisse repromissionem ; alterum non esse felicitates sempiterna donandos sine nobis . Omnes ergo uno , eodemque tempore debent Iusti in cælestem patriam assumi .

Respondeo Paulum ibidem commendare virtutem fidei , & veterum Sanctorum exemplo nos ad patientiam hortari . Veterum autem Patriarcharum duas veluti classes distinguit , unam eorum qui , ut ait v. 33. *Adepti sunt repromissionem* , aliam illorum , qui ut scribit v. 39. *Repromissionem non acceperunt .* Qui repromissionem adepti sunt , ut ibidem ait Apostolus , sunt Gedeon , David , Samuel , Barac , Jephte , Samson , & Prophetæ . Qui repromissionem non acceperunt , sunt omnes testimonio fidei probati , quos memoraverat , Abel , Henoch , Noe , Abraham , Jacob , Ioseph , Moyses , alique experti ludibria , verbera , vincula , & carceres . Ex tanta ergo nube testium , idest qui sperandarum substantiarum nobis exhibuerunt promissionem , hortatur Paulus , ut nos per patientiam curramus ad propositum nobis certamen . Nego itaque consequentiam , non enim Apostolus per repromissionem intelligit cælestem gloriam , sed solam possessionem terræ Chanaan , primis quidem Patriarchis repromissam , sed datam eorum posteris . Alias si repromissionis nomine intelligit gloriam conferendam post diem iudicii , quare de Davide , Samuele , ceterisque habitatoribus Chanaan , dixit , *Adepti sunt repromissiones ?* At inquit Paulus , *Ne sine nobis consummarentur .* Utique non fuerunt sine nobis , & ante Christi redemptionem participes æternorum bonorum , pro quibus fide certarunt , & non erunt sine nobis , & ante Christi iudicium donandi immortalitate corporis , pro qua lapidati sunt , scæti sunt , tentati sunt , in occisione gladii mortui sunt . Recte iccirco ait S. Paulus : *Deo pro nobis melius aliquid providente :* non solum more humano , & quia censentur honoratiores qui expectantur , quàm qui expectant , veluti in conviviis , ut exponit Chrysostomus ; verum etiam quia ad tolerantiam passionum præter fidem & rerum sperandarum substantiam , datum est nobis exemplum Christi , uberior gratia , neque oportet ut alios expectemus ad habendam repromissionem , quemadmodum Patriarchæ nos expectarunt . Alioquin si in novo quoque testamento expectanda est retributio , quomodo verum erit , nobis melius Deum providisse ? Si objicias verba Apostoli dicentis ibidem v. 16. *Nunc autem meliorem appetunt* , idest cælestem , patriam ; dico particulam *nunc* referri ad tempus , quo vivebant in terra , & tenere locum adversativæ , vel illativæ , ut animadvertunt Theologi : quorum responsonem confirmant verba præcedentia : *Consistentes quia peregrini & hospites sunt super terram . Qui enim hæc dicunt , significant se patriam inquirere .*

vere. Nunc oppositionis est supra cap. 1x. v. 26. & præfens pro præterito, hoc eodem capite v. 14. & 16., quorum collatione sensus Apostoli satis redditur manifestus.

Opp. 4. In 2. ad Timoth. 1v. 8. ait Apostolus: *Reposita est mihi corona justitiæ, quam reddet mihi Dominus in illa die justus Judex*. Corona justitiæ est gloria cælorum: Ergo cælorum gloria confertur tantum in die illa, idest, in die judicii finalis.

Quidam respondent diem illam, de qua Apostolus, esse diem resolutionis corporis, ac mortis, quam instare ac prope esse, ait ibidem v. 6. Sed quia *illam diem* ubique Apostolus appellat diem judicii, ut in hac eadem Epist. cap. 1. v. 12. *Potens est depositum meum servare*, idest corpus custodire, *in illum diem*, & 2. ad Thessalon. cap. 1. v. 10.; ideo respondeo, Coronæ vocabulo perfectam beatitudinem corporis & animæ significari, & solemnem publicamque assumptionem. Sic dicimus potitos regno, nondum tamen corona circumdatos, qui tamen si vere principantur, non referunt spectante universo senatu, ac plaudente populo, regium diadema.

Rursus objiciunt. In 1. ad Corinth. cap. xv. 16. hæc leguntur: *Si mortui non resurgunt, neque Christus resurrexit. Quod si Christus non resurrexit, vana est fides vestra, adhuc enim estis in peccatis vestris; Ergo & qui dormierunt in Christo perierunt*. Rejicienda est igitur ad resurrectionis tempus omnis fides nostra, omnis spes.

At futilis sane illatio. Apostoli, ut evincerent verum esse Christi dogma, hoc præcipue usi sunt argumento, quod si falsa docuisset, non resurrexisset a mortuis. Hinc prædicta omnia constataria necesse est evenire: Si non resurrexit, falsa nos docuit: si falsa nos docuit, falsa est fides nostra: si falsa fides nostra, nondum a peccatis redempti sumus: si nondum a peccatis redempti sumus & fallax est fides nostra, perierunt qui dormierunt in Christo, uti Stephanus qui causa Evangelii lapidibus obrutus est. E contra si Christus resurrexit, & veram fidem nos docuit; certissima spes manet, ut per ipsum justificati resurgamus & nos, & seminato corpore animali resurgat corpus spiritale, & corruptibile hoc induat incorruptionem. Patens est sola lectione Paulinæ Epistolæ sensus.

Arguitur 6. 1. Joannis 111. v. 2. legitur *Scimus quoniam eum apparuerit, similes ei erimus; quoniam videbimus eum sicuti est*. Non ergo videtur, antequam appareat, & veniat judicaturus vivos ac mortuos.

Duplex est horum verborum significatio. Prima literalis ac plana: Nondum apparuit quod erimus, idest quomodo futuri sumus in meliore illo seculo, cujus in eo, qui sanctificat nos, spem habemus. Sed si apparuerit, tunc erit, quando similes ei erimus non sanctitate tantum, sed & beatitudinis æternitate. Juxta hunc sensum nego consequen-

tiam ; quandoquidem ea verba *Cum apparuerit* referenda sunt ad præcedentia , *Nondum apparuit quid erimus* : & de Christi adventu nec verbum quidem hoc loco . Altera est , *Cum apparuerit Christus* , & hac explicatione admissa , dico quod similes ei erimus corpore & anima , juxta similitudinem Christi Capitis nostri . Ut enim docet S.P. Augustinus in Epist. ad Dioscorum , & norunt Theologi omnes , ex visione beatifica etiam in corpora Sanctorum gloria immortalitatis splendorisque redundat . Prior responsio etiam quorundam Sectariorum sensu probatur , ut constat ex Criticis Sacris in hunc textum , præsertim ex Commentariis Hugonis Grotii .

Præterea ita argutantur . Apocalypseo v. 9. hæc occurrunt : *Vidi subtus altare animas interfectorum propter verbum Dei* : & v. 10. *Clamabant voce magna dicentes : usquequo Domine , non judicas & vindicas sanguinem nostrum de iis qui habitant in terra . Quis autem dixerit animas subtus altare positas & judicium ac vindictam postulantes sempiterna perfrui beatitudine ?*

Verum nil juvat Heterodoxos liber Apocalypsis , in quo cap. sequenti v. 15. dicitur hujusmodi animas stare ante thronum Dei ; & hoc eodem loco , qui objectatur , v. 11. additur , *Et datae sunt illis singula stolae albæ , & dictum est illis , ut requiescerent adhuc modicum tempus , &c.* Nonnulli vetustissimi Codices habent : *Καὶ ἐδόθη αὐτοῖς ἱμάσιον ἑκάστη ἑνὴν* *Et data est illis singulis stola una*, idest , ut Bernardus interpretatur , gloria animæ . Nomine igitur altaris intelligenda est humanitas Christi : & quia Sanctorum animæ nondum resumptis corporibus sunt infra conditionem gloriosi corporis Christi , ideo dicuntur esse subtus altare . Quod si ibidem clamant voce magna , non ergo dormiunt , neque veluti alto sopore pressæ jacent usque ad extremum judicium . Istud vero expetere dicuntur , & quia magnum habent resumendi corpora desiderium , & quia divinæ voluntati conformes non solum caritate flagrant , sed etiam zelo justitiæ . Ne valida videatur hæreticorum argumentatio , pauca addam . Utitur Joannes juxta consuetudinem scripturarum rerum sensibilibus exemplo . Cælum assimilari templo neminem latet , cum de cælesti Jerusalem eodem libro cap. xxi. 22. scriptum sit : *Dominus Deus omnipotens templum illius est* : & cap. xxi. 19. *Et apertum est templum Dei in cælo* . Ita victimæ respondent Justis ac Martyribus , dicente Paulo ad Philipp. 2. 17. *Immolor supra sacrificium* , & 2. ad Timoth. iv. 6. *Ego enim jam delibor* . Ergo hunc arbitror habere sensum Apocalypsim . Quemadmodum victimarum sanguis ad limen fundebatur altaris , non extra , sed intra Templum , ut in conspectu Sanctuarii Sacrificium præstitum exhiberetur ; ita martiræ pro Christo animæ ad ejus pedes procumbunt non extra cardines cæli , sed intra ; habentes testimonium Dei , & characterem martyrii sui , quod præstat Deo sacrificium laudis , & æquitatem poscit vindictæ .

Insur-

Insurgunt 8. In 11. Machab. cap. xii. 44. habetur : *Nisi enim eos qui ceciderant resurrecturos speraret, superfluum videretur & vanum orare pro mortuis*. Ergo nisi sit Resurrectio, nullum defunctorum animæ habebunt levamen, nullam felicitatem.

Resp. dist. consequens : non habebunt felicitatem, nisi sit resurrectio prima, qua solvantur a peccatis, & donec consummentur dies sæculi regnent cum Christo, conc. Nisi sit resurrectio secunda, qua resumptis corporibus judicentur ; subdistinguo, non habebunt felicitatem plenissimam, ac stolam duplicem, concedo : felicitatem animæ, ac stolam unam, nego. Resurrectionem quamfrequenter sumi pro migratione ad æternam vitam, etiam Drusus in xx. Lucæ 36. & Glassius Traët. de Synedochæ generis ostenderunt. De qua resurrectione dixi in Resp. ad ult. præcedentis : & de ea Apost. 1. ad Corinth. 15. *Miserabiliores sumus omnibus hominibus, si resurrectio non est*. Lucas cit. loco : *Filii sunt Dei, cum sint filii resurrectionis* ; & Psal. 1. *Non resurgent impij in judicio*. De hac igitur resurrectione, quæ est spei nostræ objectum, sermo fit in libro Machab., ubi consulto dictum est : *Nisi resurrecturos speraret* ; Resurrectio namque corporalis potius creditur, quàm speratur : neque de ea oramus pro mortuis ; nec omnibus, qui surgent e monumentis, salubres sunt nostræ oblationes ac preces.

Opp. 9. In pluribus Liturgiis Jacobi, Basilii, Cyrilli, aliisque Græcorum ac Syrorum sunt supplicationes pro Sanctis, ut eos beata retributio comitetur, ut illi sacrificia prosint ad gloriam, ut ipsorum animabus donetur requies. Similia recitavit olim Romana Ecclesia in Festo S. Leonis, ut habetur in Extravaganti de Celebrat. Missarum c. *Cum Martha*, & in Festo S. Marcelli, ut constat ex Sacramentario Gelasii. Plura etiamnum extant id genus in Missali Romano, ut in Secreta S. Leonis, quæ non fuit cum priore Oratione immutata. Quotidie etiam in Canone Missæ deprecamur, ut omnibus in Christo quiescentibus, & dormientibus in somno pacis detur locus lucis ac refrigerii. Non ergo gloria & beatitudine modo fruuntur, quamvis in pace dormiant, electi.

Resp. in his, aliisque Liturgiis peti gloriam accidentalem, nempe majorem in Ecclesia cultum, nominis exaltationem, rerum gestarum præconia, imitationemque virtutum. Est enim gloria, ut eam definiit Augustinus, frequens de aliquo fama cum laude : & jure vocant Græci *Δῖξω*, quasi existimationem & opinionem, a *δυναμις*, quod est, *videor*, pto. Hinc de manifestatione sui nominis ait Christus Joan. xvi. 1. 5. *Clarifica me tu Pater*. Istam ergo claritatem, istam frequentem laudem, istam gloriam Martyribus deprecamur : imo & beatissimæ Trinitati dicimus : *Gloria tibi Trinitas*, idest, Gloria laudis. Deprecamur & aliquando Sanctis requiem, dum indiscriminatim pro omnibus victis sanctis oramus, cum in horum complexu sint animæ Purgatorii. Clarissimi;

rissimum inter alta occurrit exemplum orationis Villelmi Abbatis, qui pro Divo Parente Augustino, quem inter Caelites venerabatur, & indiscriminatim pro illius genitoribus Patricio, & Monnica ita precabatur: *Memento, Domine, anima famuli tui Patricii, & famula tua Monnica; & si quid pro Anima filii ipsorum Domini mei Augustini Confessoris tui mihi misero peccatori licet vel intimo cordis affectu desiderare.* De qua PP. Ben. in notis ad lib. 1x. Confess. Aug. cap. 13. Si vero etiam Sanctis precatur Ecclesia requiem, (quæ orationis forma jam pene exolevit) petit gloriam corporis, cujus resurrectionem animæ separata ita vehementer expetunt, ut non omnino quiescant: quod proximo capite declarabo.

Opp. 10. Hilarius Pictaviensis in Ps. 120. scribit *Iustorum animas in sinu Abrahae locari & nondum recipi in regno Dei*, & in Ps. 130. *Humana lex necessitatis est*, inquit, *ut sepultis corporibus animæ ad inferos descendant.* Et Chrysostomus Hom. 39. in priorem Epistolam ad Corinth. *Sine carne*, ait, *anima admirandis illis bonis non fruetur.* Ergo dogma, quod propugnamus, Ecclesiæ Patribus adversatur.

Resp. nego consequentiam. Et quod spectat ad Hilarium, ipse aperte distinguit regnum Christi a regno Dei, illud in quo animæ permanent usque ad sæculi consummationem; istud vero in quo mors omnino perimitur, quod fiet per gloriosam resurrectionem, & corporum claritatem. At gloriam & visionem Dei a Regno Christi nequam sejungit, neque sinum Abrahamæ separat a superna Jerusalem: sed in Psalm. 65. *Martyres*, inquit, *in cælestis domicilii habitaculum introierunt.* Commentario in Psalm. 130. loqui Hilarium de Sanctis veteris Testamenti arbitratur Juenin; sed alii melius respondent, Hilarium existimasse, quod quisquis moritur, exemplo Christi debet ad inferos descendere, & ea loca lustrare, quæ Christus consummationem veri hominis non recusans dignatus est visitare. Quod & docuit lib. de Anima cap. lv. Tertullianus. At illic animas detineri Hilarius non credidit, sed aperte affirmavit in Psalmum 141. *Transire in caelestem Hierusalem, in terram viventium, in Paradisi incolatum, in regnum bæreditatis.* Ad auctoritatem vero Chrysostomi, constat illum negare gloriam animarum in hypothesi quod corpora non resurgant, non quia sine corpore Anima coronari non possit; sed, quia si una pars æterna mercede frustretur, consequenter incoronata jacebit etiam altera: quo sensu ait Apostolus 1. ad Corinth. xv. *Nam si mortui non resurgunt, vana est fides nostra.* Lege in hunc locum Apostoli Theophilactum, & de mente Chrysostomi vide Velloxillum in Advert. Sixtum Senensem in vi. Biblioth. an. 264. Petavium lib. vii. cap. xiiii. num. iv. & Estium in iv. sent. dist. 45. §. 6. &c.

Opp. ultimo: Anima sine corpore non meretur; Ergo sine corpore non coronatur.

Resp.

Resp. nego ant. quippe non omnia bona opera exercentur per corpus, sed plura sola animi cogitatione, & voluntate. Præterea anima meriti causa princeps est, & corpus instrumentalis. Ad hæc, anima separata a corpore felicitatis capax est; corpus anima expertus, nequaquam. Rursus: necesse est, ut corpus in pulverem comminutum putrescat, & in eo culpæ originalis pœna impleatur; quemadmodum eandem pœnam experta est anima in ergastulo carnis. Quæ obijciuntur de Animabus veterum Patriarcharum, & de ipso Christo, qui statim post mortem non ascendit in cælum; quum illis expectandus esset Redemptoris adventus, is vero pro Fidei confirmatione aliquandiu in terris fuerit commoratus, non opus est contra protervos ac repugnantes minutissime repellamus.

C A P U T X.

Quid senserint Ambrosius, Augustinus, ac Bernardus de præsentî Animarum Sanctarum statu.

IN tertia hujus controversiæ parte pollicitus sum me demonstraturum quid fuerint opinati Ecclesiæ præclarissimi Patres Ambrosius, Augustinus, & Bernardus, quorum data opera superiori capite non memini, ut id exequerer diligentius. Ambrosius quidem in lib. de Bono mortis animarum memorat nescio quæ *promptuaria*, ubi novissimum putat eas expectare judicium. Quem librum scriptum, ut traditur anno 387., difficulter conciliari cum dogmate Catholico, si crude, & ad litteram legatur, ait Tournely tom. 1. pag. 293. Contra optimæ notæ, refertum sententiis utilibus & solidis, necnon ratiociniis certis, rei que convenientissimis, inquit lib. 2. Bibl. Dupinius. At Augustinus olim & ante Episcopatum se Millenariis consensisse, fatetur lib. de Civit. Dei cap. vii., ex qua tamen confessione apparet se priorem abjecisse sententiam. Commemorat tamen sæpissime animarum secreta receptacula, quæ ubi consistant, dubius huc, illucque trahitur. Loquitur de iis in Ench. ad Laur. cap. 109. xii. de Civitate Dei cap. 9. in xii. de Genes. ad lit. & alibi. De Bernardo ait Durandus haud recte Joannis Apocalypsin intelligentia affectum.

Duo notanda sunt pro genuino horum PP. sensu capeffendo. Primum, quæstionem de statu animarum discrepare a quæst. de loco: unde Vives comment. in lib. xii. de Civit. Dei cap. 9. *Non dubitat, inquit, de earum gloria etiam ante judicium, sed de loco gloriæ. Nam ubique possunt beatæ esse, cum ubique sit Deus, cujus fruitione fiunt beatæ.* Persuasum equidem nobis est Beatorum animas in cælos recipi, quod jam constat ex Lugdunensi Concilio ii. in profess. Fidei, ex Trid. sess.

sefs. 25., ex pluribus fidei formulis, ex Bullis Canonizationis Sanctorum, ex communibus Ecclesiæ precibus, ex universorum Fidelium sensu; sed nondum accedente tanto lumine, prudentissime dicebantur versari Iustorum animæ in abditis receptaculis, propter ambiguum, & tunc valde fluctuantem de loco animarum opinionem.

Alterum notatione dignum est, quod animæ plene purgatæ, quamquam Deum vident, non tamen toto impetu, & nulla alia inclinatione affectæ illum intuentur. Sunt enim natura sua formæ corporum & mediam stationem tenentes superne reguntur a Deo, inferne materiam regunt; & si alterutro fraudulentur, ægrescunt quodammodo & languent. Sollicitat ergo eas naturale desiderium suorum corporum: idque penitissima ipsarum natura petit, & æquitatis iudicium. *Quo appetitu* (ait magnus Augustinus lib. xi. de Gen. ad lit. cap. 35.) *retardatur quodammodo anima, ne tota intentione pergat in illud summum cælum, quandiu non subest corpus, cujus administratione appetitus ille conquiescat.* Plura illic ad hanc rem illustrandam proloquitur S. Pater. His adnotationibus tota conflictatio sedari potest. Sit igitur

PROPOSITIO I. Catholico dogmati de Animarum Beatitudine non adversatur Sanctissimus Mediolanensium Antistes.

Ipse enim lib. x. in Lucam ait: *Unde te evocem, Petre, ut doceas me, quid stens cogitaveris? unde te, inquam, evocem? De cælo, ubi jam choro insertus es Angelorum.* Epist. 54. de SS. Gervasio, & Protasio: *Æthere anima in cælo, corpus in terra.* Epist. 59. Thessalon. *Archolus superiorum incolæ, possessor civitatis æternæ, illius Jerusalem, quæ in cælo est, videt illic urbis ejus mensuram immensam, parum aurum, lapidem pretiosum, lumen sine sole perpetuum, & hæc omnia jamdudum sibi comperta, sed nunc facie ad faciem.* In ipso libro de Bono mortis cap. xi. *Hanc remunerationem, inquit, habent, ut videant faciem Dei, & lumen illud quod illuminat omnem hominem.* Atque hunc librum absolvit sic fideles hortando, ut impavidi mortem subeant: *Intrepide pergamus ad Redemptorem nostrum Jesum, intrepide ad Patriarcharum Concilium, intrepide ad Abraham patrem nostrum, cum dies advenerit, proficiscamur. Sed nunc Pater etiam atque etiam extende ad suscipiendum hinc pauperem manus tuas, aperi gremium tuum, expande sinus tuos, ut plures suscipias, quia plurimi in Deum crediderunt. Ibimus eo, ubi servulis suis Dominus Jesus mansiones paravit. Sequimur te, Domine Jesu, sed ut sequamur accersi, quia sine te nullus ascendit. Tu enim via es, veritas, vita, possibilitas, fides, præmium. Suscipe nos quasi vin, confirma quasi veritas, vivifica quasi vita. Pande illud tuum bonum, quod videre desiderabat David. Demonstra nobis illud bonum, quod est simile tui, semper indissolubile atque immutabile, in quo simus æterni.* Ambrosius ergo censet Iustorum animas corpore solutas assumi in cælos, videre,

dere facie ad faciem pulchritudinem cœlestis Jerusalem, eisque lumen sempiternum splendescere: Qui id sentit non anceps est de præfenti gloria Sanctorum: Ergo jam nunc justos gloria circumdatos tradidit beatus Ambrosius.

Opp. 1. Ambrosius in lib. de Bono mortis cap. x. affirmat Justorum animas receptas esse in quibusdam promptuariis, ibique expectare extremum judicii diem, ut coronentur.

Resp. Ambrosium per hæc Promptuaria designare diversas mansiones, quæ sunt in domo Patris, & per coronam consummatam beatitudinem, cujus propter inditam inclinationem ad corpus animæ afficiuntur desiderio; nam in eodem libro Justorum animas sublimæ ad Deum evolare pluries repetit, ut constat ex dictis.

Opp. 2. Eodem lib. cap. x. commendat illorum sententiam, qui tenebant Justorum animas ad inferna descendere citans 1v. librum Esdræ cap. 7.

Respondeo cum Estio eam commendare ut veram pro eo tempore quo dicta fuit, idest ante Christi mortem ac Redemptionem; nam infra, ut vidimus, diserte significat rapi electorum animas in superiora habitacula. Quamvis & extra cœlum possent frui gloria, ut dixi in 1. adnotatione. Vide etiam quæ dixi Capit. præcedenti ad x. de sententia aliquorum Patrum, quod omnes animæ debeant exemplo Christi descendere ad Inferos. Quare demum non possumus hæc explicare de Animabus non plene purgatis?

Opp. 3. Ibidem Ambrosius cap. xi. statuit septem ordines lætitiæ Animarum Sanctarum, quorum nullus Dei visionem complectitur: imo ait animas gloriæ suam prævidere, & sine trepidatione ad vul-tum Dei festinare.

Resp. falsum esse, quod a prædictis septem ordinibus Ambrosius Dei visionem excludat; ait namque: *Quintus ordo exultationis uber-rima habet suavitatem, quod ex hoc corruptibilis corporis carcere in lucem libertatemque pervenerint, & repromissam sibi possideant hereditatem.* Et infra eodem cap. num. 49. *Hanc remunerationem habent, ut videant faciem Dei.* Prævident ergo gloriæ consummatam, in qua Deum impetu intuebuntur vehementiori.

Opp. ult. In 2. de Abel & Cain cap. 2. *Solvitur, inquit, corpore anima; & post finem vitæ hujus adhuc tamen futuri ambigui suspenditur. Ita finis nullus, ubi finis putatur.*

Resp. Ubique sit anima, ante Judicii diem in ambiguo suspenditur. Dum solvitur corpore, antequam perveniat ad locum tormentorum aut gloriæ, angitur trepidatione animi, & expectatione sententiæ. Quæ commorabantur in Limbo, suspensæ erant de tempore exilii, & Reparatoris adventu. Quæ in Purgatorio, non sunt quidem de certitudine salutis sollicitæ, at sunt tamen de duratione pœnarum.

rum . Regnantes in cœlis expetunt duplici stola vestiri , & pendent adhuc ab extrema die : de qua Matth. xxiv. 36. *De die autem illo , & hora nemo scit , neque Angeli cœlorum .*

PROPOSITIO II. Quod Augustinus fluatet de secretis Receptaculis Animarum est summæ ejus perspicacitatis indicium ; verumtamen de gloria & felicitate non dubitat .

Ante Augustini tempora de loco Animarum non explorata erat traditio . Quidam asseriebant tam pios , quam impios *in sinu* infernum descendere , ut fuse docent Irenæus lib. v. capite ult. Tertulianus de Anima cap. lv. & Origenes non uno loco . Nomen autem inferni ambiguum erat ; nam aliquando accipiebatur prout solis convenit damnatis : & aliquando pro recondito loco , in quem mortuorum animæ inferuntur , vel a quo extrahuntur , sive pœnarum sit , sive quietis . Hoc secundo sensu Patres illi loquebantur ; quietem enim dabant justis , impiis supplicium . De situ quoque inferni plerisque dissentire , auctor est in cap. xxiv. Matthæi B. Chrysostomus . In sinu Abraham-
piorum animas requiescere plurimi asseruerunt . Ambrosius caute illarum mansiones appellavit , ut vidimus , promptuaria , & observatione altera in Mich. videtur paradisum a cœlorum regno distinguere . Hieronymus & Cyprianus docent justos cœlestem inhabitare Jerusalem . Jam priorem propositionis partem sic probo : Nondum explorata Traditione de situ animarum , cautus est ac summe perspicax qui asserit eas versari in abditis receptaculis , aut in sinu Abraham , aut in secreto Patris , aut in Paradiso , neque audet definire ubi sint ejusmodi habitacula : At ætate Augustini certi nihil compertum erat in quo definito loco Justorum animæ consisterent : Ergo rectissimum jure meritoque visum est Augustino illas in secretis receptaculis collocare .

Constantior tamen est S. Pater in illorum opinione , qui Justorum animas statim a morte in cœlos recipi contendebant . Etenim lib. xx. de Civitate Dei cap. 15. pro certo habet non descendere ad inferos , neque una cum impiis detineri custodia , ut crediderunt Novatianus de Trinit. capite 1. & Lactantius lib. vii. cap. xx1. Et lib. 2. quæst. Evangelicarum cap. 28. in Psal. 119. & lib. iv. contra Julianum cap. 3. sinum Abraham , requiem Animarum , & regnum cœlorum indiscriminatim pro una , eademque re usurpat . Unde aliqui putant cum Estio in iv. dist. 45. §. neque S. Patrem ancipitem fuisse de loco , ac diversis vocabulis unum designasse habitaculum , in quo interim videtur Deus , sed nondum perfectæ gaudii propter inclinationem animæ ad corpus .

Pars altera propositionis ostenditur primo , quoniam S. P. redarguens commentum Pelagianorum , qui asseriebant parvulos sine baptismo morientes æternam vitam consequi , sed non regnum cœlorum , utrumque illos adipisci si post baptismum decedant , utroque privari si fungantur vita non baptizati , constantissime docet lib. iv. contra Julian.

Julian. cap. viii. ferm. xiv. de Verbis Apostoli cap. 3. & in 1. de Prædest. SS. cap. 13. Regnum autem cælorum & vitam æternam per Augustinum nihil est aliud quam Deum videre, ut constat ex Tract. 21. in Joannem. Ergo animæ solutæ corporibus, nulloque obnoxio peccato per Augustinum vita æterna, cælorum regno, & Dei visione fruuntur. Præterea libro 9. Confess. cap. viii. de Nebridio ait: *Et nunc ille vivit in sinu Abrahe, quidquid illud est quod illo significatur sinu, ibi Nebridius meus vivit. . . . Jam non ponit aurem ad os meum; sed spiritale os ad fontem suum, & bibit quantum potest sapientiam pro aviditate sua felix.* Tractatu item 124. in Joan. hunc discipulum, quem Jesus præ ceteris diligebat, non in sepulcro dormire scribit, ut quidam falso opinabantur, sed onere solutum corporis ad summam perfectamque pervenisse felicitatem, de qua Apost. Paulus agebat, *Cupio dissolvi & esse cum Christo.* Lege & librum xi. de Genes. ad lit. capite 34. in Psalm. 119. & xx. de Civit. Dei cap. 7. Laudant aliqui librum Meditat. cap. 22., sed an sit Augustini inter eruditos non convenit.

Argues 1. Augustinus ferm. 259. scribit post diei Judicii ventilationem celebrandum esse sabbatissimum in terra: & 12. de Civitate Dei cap. ix. in secretis receptaculis piorum animas locat.

Resp. præfato sermone teneri Augustinum Millenariorum errore, a quo postea resipuit, quamvis forte ea verba *in terra* genuina non sunt, utpote quæ ex uno ms. Vaticano fuere suppleta. At lib. xii. de Civit. Dei, ut Vives & Coquæus observarunt, de loco anceps est, non de gloria: & fortassis abditas sedes intelligit mansiones cælestes.

Argues 2. Enarrat. in Ps. 43. in Epist. ad Fortun. & tract. 49. in Joannem ait reservari singulis gloriam post resurrectionem, quando Christum apparuerit, & cum in Angelos profecerimus.

Resp. Hæc Augustinum docere de universa Prædestinatorum Ecclesia, quæ solum post diem judicii plene triumphos aget: vel si in particulari loquitur de piorum Animabus, de gloria corporis est explicandus: si alicubi, ut in Epist. 148., de visione Dei verba facit, intelligendus est de visione expedita & vehementi, quam non retardet naturalis ad corpora inclinatio, ut contingit in Angelis. Quæ omnia constant cum ex dictis, tum ex Epist. 119. ad Januarium cap. 13. ubi ait: *Anima quippe omnium Sanctorum ante resurrectionem sunt quiescentem in requie, sed in ea non sunt actiōne, qua corpora recepta vegetantur.* Plura vide apud Hieronymum Torrent. in Confess. Augustiniana cap. 2.

PROPOSITIO III. Immerito carpitur a Durando beatus Bernardus; nam neque is a Catholico recedit dogmate.

Notavi Durandum, propterea quod paullo durius Doctorem eximium insectatus est, eum magnæ devotionis virum, non magnæ auctoritatis compellans; sed alii quoque modestius scribunt, Bernardum

afferere Iustorum felicitatem ante diem Iudicii suspensam: imo Petavius, *De Bernardo*, inquit lib. vii. cap. ult. n. ix., *notissima res est, hunc in opinione illa fuisse*. Falluntur tamen. Etenim Doctor mellissus Sermon. xix. de diversis ait. *Hauriunt aquas in gaudio de fontibus Salvatoris, & nudis, ut ita dicam, oculis divinitatis intuentur essentiam*. Lib. de diligendo Deo cap. 10. *Immersas* (Martyrum animas) *ex toto credimus immenso illi pelago aeterni luminis, & luminosa aternitatis*. In vita S. Malach. cap. ultimo: *Pro huiusmodi ergo delectus a Deo & hominibus non immerito hodie Malachias in consortium Angelorum recipitur, re adeptus, quod nomine dicebatur*. Et quidem ante Angelus erat non minus puritate quam nomine: sed nunc felicius gloriosi in eo interpretatio nominis adimpletur, quando pari cum Angelis gloria, & felicitate letatur.... *Exultat in Domino spiritus Malachia, quod levatus pondere corporis, nulla jam faculenta vel terrena materia praegravatur, quominus tota alacritate ac vivacitate corpoream omnem & incorpoream transiens creaturam pergat totus in Deum, & adhaerens illi, unius sit cum eo spiritus in aeternum*. Sermon. 5. de dedicat. SS. *Post multos agones jam nunc triumphant in caelis coronati*. Sermon. 2. in Sanctum Victorem: *Jam caelos ingressus vere nunc revelata facie speculatur gloriam Dei*. Leg. & Epistol. 266. Sermon. 6. in Cantica, & de Obitu Umberti. Ex quibus sequens efficitur ratiocinium; Non adstruit suspensam Iustorum beatitatem qui affirmat Iustos nunc intueri divinitatis essentiam, aeterno lumine circumfundi, letari eadem gloria cum Angelis, & triumphare coronatos in caelis: Haec disertissime tradit Divus Bernardus: Ergo non putat ad extremam diem Sanctorum gloriam suspendi.

Obijcies 1. Sermon. 2. de omnibus SS. scribit Bernardus quod Sanctorum animae ante Iudicii diem non convertentur in requiem suam.

Resp. requiem esse plenitudinem gaudii, & gloriam nedum animae sed etiam corporis. Ait enim ibi: *Jam vero consummato militiae tempore gaudium habent Sancti in spiritu suo, donec adveniat dies illa, qua introire mereantur in gaudium Domini sui, gaudium habituri & in ipso corpore suo, &, licet non plenam, habent tamen latitiam multam*.

Obijcies 2. Sermon. 3. distinguit tres animarum status, primum in corpore corruptibili, secundum sine corpore, tertium in beatitudine consummata: primum in tabernaculis: secundum in atriis: tertium in domo Dei; & aperte asserit neminem in beatissimam domum introire, nisi post diem iudicii.

Resp. per domum Bernardum intelligere beatitudinem consummatam, ut constat & ex dictis, & ex sequentibus in eodem sermone: *Acceperunt jam singuli stolas suas, sed non vestientur duplicibus donec vestiamur & nos. Stola enim prima ipsa est felicitas & requies animarum, secunda vero immortalitas & gloria corporum*. Sunt itaque

Iusto-

Iustorum animæ adhuc in atriis, quod una tantum stola exornatæ nequeant altera sine nobis vestiri .

Opp. 3. Ibi Bernardus ait separatas animas, quantumvis iustas, aliquam habere rugam, & consequenter non posse ante resurrectionem recipi in triumphantem Ecclesiam, quæ maculam rugamve non habet.

Resp. per rugam nihil Bernardum designare præter naturalem inclinationem ad corpus, quæ plenam lætitiā retardat quodammodo. *Sed unde tibi* (ait ibidem S. Doctor), *o misera caro? unde tibi hoc? Anima sancta, quas propria Deus insignivit imagine, te desiderant! quas redemit proprio sanguine, te expectant! & ipsarum sine te compleri lætitiā, perfici gloria, consummari beatitudo non potest. Adeo si quidem viget in eis desiderium hoc naturale, ut nec dum tota eorum affectio libere pergat in Deum, sed contrahatur quodammodo, ut rugam faciat, dum inclinatur desiderio tui, &c.* Vide notat. supra ex Augustino lib. xi. de Genes. ad lit. cap. 35.

Ob. 4. Serm. 4. Scribit Bernardus Piorum animas ante corporum resurrectionem stare subtus Altare Dei .

Resp. dici Altare humanitatem Christi, cujus corporis expetunt similitudinem: *Altare ipsum*, ait, *nihil aliud arbitror esse, quàm Corpus ipsum Domini Salvatoris*. Vide quæ dixi cap. antecedenti ad vii.

Obijcies 5. Eo loco inquit Bernardus exaltandos electos visione & contemplatione non humanitatis Christi, sed ejus divinitatis; quando post diem extremam super Altare collocabuntur .

Resp. Sanctorum animas resumptis corporibus juxta Bernardi doctrinam exaltandas contemplatione & visione, quod expleto naturali suorum corporum desiderio nullam habebunt rugam, quæ illas inclinet, & visionem Dei consequentur uberiores; ut constat ex resp. ad 3.

Ob. ultimo. Cælestis Beatitudo ea est, de qua in Ps. xxv. 9. *Inebriabuntur ab ubertate domus tuæ*: At Bernardus Serm. lxi. inter parvos, nunc lxxxv. de diversis, negat id ante reviviscentiam corporum evenire: Ergo, &c.

Resp. hoc postremo loco S. Bernardum denegare Iustorum animabus solam completam beatitatem. *Comedite*, ait, *amici & bibite, & inebriamini*. Prius comedunt, dum in carne adhuc corruptibili degunt. Postmodum vero corpore exuti, & in calum translati jam bibere dicuntur eadem quæ prius comederant: quia jam per speciem contemplantur, quæ prius fide crediderant. Perspicue his verbis fatetur D. Bernardus jam animas iustorum Deum videre. Sequitur autem. *In hoc ergo statu positi Sancti bibere quidem possunt, sed inebriari non possunt: quoniam a perfectissima contemplatione divinitatis quodammodo retardantur, dum adhuc resurrectionem sui corporis in fine sæculi præstolantur*. Quia facta ita corpus menti, & Deo mens inhaerebit, ut jam deinceps nihil sit, quo ab interna christate contemplationis revocari possit. Videntur mihi hæc

hæc verba ad intelligentiam eorum, quæ obscuriora sunt in Sermonibus de Omnibus Sanctis, aurea clavis. Mihi quidem nulla manet hæsitatio, quod futurum spero de illis, qui absque mentis præoccupatio-
ne ista legerint.

C A P U T XI.

De Joannis XXII. circa Sanctorum gloriam doctrina.

TANQUAM privatum doctorem Joannem Papam XXII. docuisse quod animæ beatam vitam non haurient, antequam corpora reviviscant, non tamen id definivisse ex Cathedra, fere omnium Scholasticorum responsio est, ubi de hujus mente Pontificis disceptatur. Tutâ quidem pro Catholici dogmatis, & Apostolicæ Sedis infallibilitate judicii conciliatio. Joannem illius fuisse opinionis, eamque libellis & Constitutionibus confirmasse quidam contendunt, ut Ockamus, Gerson, alique perpauci. Re tamen penitus inspecta videtur mihi a vulgari opinione recedendum, & Pontificem esse a nota erroris omnimode vindicandum. Quapropter fit

PROPOSITIO: Joannes XXII. neque ut privatus Doctor assertive docuit piorum animas ante corporum resurrectionem Deum non videre.

Historiam narro, ac simul propositionem demonstro: Anno reparatæ salutis 1331. hæc quæstio acerrime ventilabatur, quam non Joannes, sed alii exagitare cœperunt, ut observat Raynaldus ad ann. 1333. n. 45. Plures quidem affirmativam sententiam valide propugnabant scripturis, Patribus, argumentis, asserentes hanc esse Catholicæ fidem Ecclesiæ. Pontifex rem diligentius excutiendam affirmabat, quod gravissima essent pro utraque parte momenta; cumque pro una magno numero producerentur, ipse reliqua pro negantium opinione collegit. Quæstionem in Procerum conventu proposuit habitis in Ecclesia sermonibus in Festo omnium SS., Dominica 111. Adventus, & in Vigilia Epiph. proximi anni 1332. Recitavit ergo quæ ad definiendum dogma videbantur ob stare, idest quæ collegerat a Theologis excutienda. Malevoli, quorum habebat plures, fortasse nimium additi Pseudo-Pontifici Petro de Corbaria, Michael Cæsenas, Guilelmus Ockamus, & alii, ut constat ex ms. Vatic. 4009. p. 180. objecerunt, quod Joannes in his tribus sermonibus, *Dogmatizatus est, quod Sancti in calo non vident, nec videbunt usque ad diem generalis judicii & futuram corporum Resurrectionem faciem Dei*. At contra calumniatores Pontificis scripsit insignis doctor Germanus Ulricus demonstrans Papam Scholasticorum more collecta a se recitasse, & dubia proposuisse quæ expenderent eruditi, ut constat ex eodem Raynaldo ad annum 1331. n. 45.

Sparfi

Sparſi interim de errore Joannis rumores, & controverſia acerrime diſputata Pariſiis, traducentibus Joannem calumniatoribus. At præclariffimæ Univerſitati compertum eſt quid dixerit, quid hac in re præſtiterit Summus Pontifex. Nam anno 1332. in data ad illum Epiſtola hæc habet: *Vestra beatitudini cum qua poſſumus humilitate, & reverentia totis cordis præcordiis ſupplicamus, quatenus prædictæ quæſtioni, in qua pro una parte veſtra Sanctitas pulcherrime & ſubtiliſſime allegavit, & quamplures auctoritates adduxit, imo tot, quod non recordamur nos legiſſe doctorem aliquem, quas ad unum propoſitum adduxit tot, & tantas, ſemper tamen recitando, & nihil determinando, aſſerendo, ſeu etiam opinando, ſicut audivimus; dignetur veſtra Sanctitas finem dare, partem illam, qua nutrita fuit hæcenus devotio totius populi Chriſtiani veſtro regimini crediti, veram eſſe determinatione Apoſtolica confirmando.* Vide hanc Epiſtolam Tom. 1. Theſauri Anecdotorum Martene pag. 1384.

Poſtero anno 1333. Joannes ſcripſit xiv. Kal. Decembris ad Philippum Francorum regem hanc Epiſtolam: *Quia, amantiſſime fili, ſcimus, quod in his vel aliis ut elucidetur veritas intendis, rogamus benevolentiam regiam, ut per fidelem, ſeu fideles nuncios Magiſtris in Theologia, & Baccalariis Pariſiis legentibus & degentibus facias nunciari, quod talibus minis illatis non obſtantibus quilibet dicere & diſputare, & prædicare valeat, quod ſibi juxta doctrinam Evangelicam & Apoſtolicam diſputandum videbitur, aut etiam prædicandum, donec aliud ordinatum per ſedem fuerit Apoſtolicam, aut etiam declaratum.* Sic etiam ad veritatem quæſtionis prædictæ poterit promptius perveniri. Ex quibus apparet Pontificem primum indixiſſe ne affirmativa ſententia in publicis concionibus exponeretur tanquam definita ab Eccleſia, cum adhuc eſſet dubia & ventilanda, ſed veritatis ſtudio poſtea mandaviſſe, ut unusquiſque rem diligentius inquireret; quod proſecto indicium eſt, ſe valde ancipitem pendere, & velle quæſtionem diligentiffime dirimi.

Hujusmodi ſtudio magis præſetulit proximo anno 1334. Tunc enim pro utraque parte ſumma cura collegit momenta, præcepit etiam ſub Eccleſiaſticis cenſuris, ut ſingula revocarentur ad trutinam, atque iv. Kal. Martii Petro Rothomagenſi Archiepiſcopo, & Francorum Reginæ has dedit literas: *Quid circa quæſtionem viſionis animarum ordinaverimus ad regalem notiſſiam credimus, diu eſt, perveniſſe. Injunximus quidem Fratribus noſtris S. R. E. Cardinalibus, ac Prælatiſ aliis, & Doctõribus Theologia, ac juris Canonici præſentibus in curia, ut ſuper illa cum diligentia ſtudeant, nobiſque quid eis videtur exponant. Quod ut promptius poſſint facere multarum auctoritatum tam Canonis, quam Originalium Sanctorum pro utraque parte collectorum copiam fecimus. Et ut hæc diligentius ſtuderent facere ſententiam excommuni-*

municationis ipsos volumus incurrere, qui præmissa non adimplerent, absolutione nobis, nostrisque successoribus reservata.

Cum adhuc obloquerentur Pontificis detractores, eodem anno 1334. die 3. Januarii in Consistorio Apostolico ipse coram S. Romanæ Ecclesiæ Cardinalibus declaravit, se nihil unquam de hac Quæst. determinasse, & si quid a se prolatum fuisset, in quæstionis propositione, sive auctoritatum allegatione, quod scripturæ sacræ videretur adversum, præter intentionem sibi excidisse: qua publica confessione nihil sincerius, nihil humilius. De qua testem habemus Benedictum XII. in suo diplomate *Benedictus Deus*, Ptolemæum Lucensem lib. 24. Hist. cap. 42. ms. Vaticanum n. 4008. p. 172. Imo ante mortem, quæ contigit Avenione die xiv. Decembris ejusdem anni 1334. coram S. R. Eccl. Cardinalibus, quorum nomina in laudato nuper ms. referuntur, & coram Tabellionibus hac de causâ vocatis, præcepit ut legeretur sequens Scriptura: *Fatemur & credimus, quod animæ purgatae sunt in calo, calorum regno, & paradiso, & cum Christo, in consortio Angelorum congregatae, & vident Deum & divinam essentiam facie ad faciem clare in quantum status & conditio compatitur animæ separatae.* Hujus declarationis meminit Joannes Villanus in Hist. Florent. cap. 19. lib. xi.

Demum Theologi Parisienses interrogati a Rege quænam revera esset Joannis Pontificis opinio, in Autographo quod etiamnum servatur Parisiis in Arch. FF. Prædicatorum, & recitatur a Bullæo Tom. 4. Hist. univ. inquit: *Quidquid in hac materia Sanctitas sua dixit, non asserendo seu opinando protulit, sed solummodo recitando.* Prætermitto Fidei Confessionem, quam Joannes ad Armenios, Tartaros, Persas & Lithuanos transmisit; quam vide apud Rayn. ad annum 1331. necnon Bullas Canoniz. SS. Thomæ Aquinatis, Ludovici Tolosani, & Thomæ Herfordiensis: de quibus vide Emin. Gotti Tom. 2. Th. p. 179.

Jam vero ex dictis hoc argumentum conflatur: Ille neque ut privatus Doctör assertive docuit purgatas animas ante reassumpta corpora beatifica carere visione, qui hujus opinionis fundamenta conscripsit & recitavit historicæ tantum, eo animo ut a Theologis ventilarentur, & quæstio, in qua veteres non convenerant, matura discussione innotesceret, ipse interim nihil asserens, nihil definiens, nihil vel opinando scriptitans. Atqui Joannes XXII. auctoritates Canonum ac Patrum, quibus Millenariorum videbatur probari error, collegit eo animo, ut illas Theologi expenderent, jussitque & publicis concionibus, & Epistolis, indicta quoque excommunicatione, ut sedulo discuterentur, neque interim pro ulla parte sententiam dixit, nihil declaravit, nihil asseruit. Ergo Joannes XXII. neque ut privatus doctör circa eam sententiam erravit, de qua præsens instituitur disputatio. Præterea Doctissimi Galliarum Theologi, Juenin, Toarnely, J. Herminier, alii, expensa protestatione Parisiensium Theologorum, quam memoravi superius,

rius, & cui addere possunt Epistolam a me laudatam ex Edmundo Martene, ingenue fatentur Pontificem nihil circa hanc quæstionem ex Cathedra definiisse, in falsam tamen sententiam, ut Tournely ait, inclinasse; atque, ut ceteri loquuntur, ut privatum Doctorem erravisse: Atqui in ea Parisienfium Theologorum declaratione, sicuti & in memorata Epistola, non solum habetur Joannem XXII. nihil ex Cathedra & aliquo Pontificio diplomate declarasse, sed etiam quidquid aut scripsit, aut dixit, scripsisse & dixisse non asserendo, non opinando, sed solummodo recitando: Ergo neque ut privatus doctor a dogmate recessit Catholicorum, opinative saltem & assertive. Denique Joannes tametsi recitavit & collegit speciali cura momenta pro una parte, quod pro affirmante omnia vulgata essent ac proferrentur; incubuit tamen animo, ut constat ex Epistola ad Reginam, & ad Rothomagensem Antistitem, ut pro utraque parte colligerentur, & huic muneri ipsemet insudavit, omnium copiam fecit, omniaque ex æquo ventilari mandavit: Ergo incertus erat cui adhereret, & in utramque fluctuans, veritatem, quam tandem affectus est, inquirebat.

SOLVUNTUR OBJECTIONES.

Opponent 1. L'Herminier, & Tournely. Raynaldus ad annum 1331. n. 44. refert Joannem XXII. conquisitis undequaque testimoniis pro negativa sententia in publicis concionibus pro eadem fuisse dogmatizatum. Resp. Raynaldum asserere, quod *Ita calumniabantur hostes Pontificis*, ut demonstrat num. 45. ex Ulrico, & ex ms. Vaticano Codice 4005. & 4009.

Opp. 2. Joannes omni favore & gratia prosequeretur quos stare noverat pro sententia negante, præsertim Gerardum Generalem Minorum. Contra qui dissidebant dure a Pontifice excipiebantur, ut constat de Thoma Valleio, qui in carcerem conjectus est, quod opinionem Joannis publica confutasset concione. Resp. Thomam Valleium non a Joanne XXII. sed a Quæstitoribus Fidei Avenione damnatum carceri, non quod pro SS. vindicanda gloria solemnem habuisset concionem, id enim permiserat Pontifex, ut apparet ex Epist. ad Galliarum Regem Philippum; sed quoniam e suggestu in Assertores adversantis sententiæ divinam maledictionem est imprecatus, ut narrat Bzovius ad annum 1331. n. x1. quod vertente controversia, maxime privato homini, audaciæ, quamvis forte zelus fuerit, imputabatur. Gerardo autem quidnam Papa præstitit, quod amplissimum ordinem moderantis merito, ac dignitati esset impar?

Opp. 3. Durandus Meldensis Episcopus, cum dogma Catholicum propugnasset, a Fidei Censoribus in jus vocatus est, etsi Regis patrocinio judicium declinavit Quæstitorum. At hæc annuente Pontifice fuere

T. I.

M m

pera-

peracta. Resp. Durandi causam aliam esse ab ea, quam eruditi narrant Theologi. Pontifex Durandi Tractatum nulla permotus indignatione, & quamlibenter excepit, pluribusque Theologis præbuit examinandum; ut constet ex ms. Jacobi Cardinalis S. Priscæ in Bibl. Vatic. n. 208. In Durandi autem Scripto in ea, quam probabat propositione, nil censura dignum notatum est. In argumentationibus vero aliqua videbantur absurda: inter quæ erat, quod nisi animæ expiatæ videant divinitatem Christi, mori nulla ratione sit lucrum: unde videbatur consequi, quod ex contemplatione humanitatis nullum resulset gaudium, aut lucrum. Tum alia novem asserta, quorum alia probata fuerunt, alia confutata. Ergo propter Assertum de actuali visione Dei, ut constet ex ms. Vat. n. 4004., nihil actum contra Durandum, sed propter doctrinas infertas, & non satis apte expositas, aut non bene intellectas. Vide Raynaldum ad annum 1333. num. 58.

Opp. 4. Pontificem assertive præfatum tradidisse errorem innumerum propemodum scribunt Auctores. Gobelinus in Cosmodromii Aetate vl. cap. 71. Albertus Krantzius lib. v. 111. Vandalie cap. 16. Bzovius ad annum 1331. Ciacconius in Vita Joannis XXII. Ptol. Lucensis ad an. 1335. Adrianus in 1v. Sent. de Sacram. Confirmat. Gerson sermone in die Paschatis, &c. Resp. Hos omnes, & si qui sunt alii, falso rumore deceptos. Nam multæ fuerunt contra Joannem linguæ *malignantium*, ut in suo diplomate testatur Benedictus XII. Sed his opposimus omnium Theologorum Parisiensium testimonium, qui, *Multorum fide dignorum relatione audita*, declararunt quod Sanctitas Sua nihil asserendo, sive opinando protulit, sed solummodo recitando. Quamquam non omnes, qui ab adversariis citantur, revera Pontifici errorem affricant. Bzovius cit. loco ait: *Eodem tempore ipse idem Pontifex alios adversariorum adversum se excitavit, cum antiquorum Doctorum ... de clara Dei visione opinionem nondum ab Ecclesia damnatam recitasset; & in partem quorundam FF. Minorum asserentium animas a corpore separatas non statim beata visione divina essentia frui, sed eam usque ad diem judicii expectare, differenda quidem, non autem asserendo, neque decernendo inclinavit.* Et Alphonsus Ciacconius: *Ipse, inquit, omnibus Theologis jussit, ut quid de ea sentirent diligenter inquirerent, & sibi assererent, affirmans se nihil nisi disputandi gratia asserere, & nihil adhuc se determinasse.* Hi nimirum de mente Joannis tantummodo dubitant. Idem dico de Ptolemæo Lucensi, qui lib. 24. cap. 43. ait: *De hoc dubium fecerat.* Idem de Adriano, qui utitur his verbis, *Fertur, dicitur.* Gersonis sermo genuinum non esse plures affirmant: si est, Universitatis Parisiensis testimonio, & Epistolis redarguitur.

Opp. ultimo. Joannes morti proximus pœnitentia ductus errorem suum revocavit. Ergo erraverat. Resp. nego antec. Non enim proprie revocatio & retractatio dicenda est Joannis omologia. Declarat in ea, se plu-

se plura in hac quæstione allegavisse = *Non intendens aliquid determinare, vel decidere* = Et si forsan in sermonibus aut collationibus suis aliqua viderentur a veritate aliena = *Ipsa præter intentionem a se fuisse prolata* = . Quam declarationem a se fieri protestatur = *Ne quis finistre interpretari possit sensisse aliquid, aut sentire quod Scripturæ Sacræ obviet, aut fidei orthodoxæ*. Voluit ergo ea declaratione Joannes linguis malignantium obviare = , ut scribit in suo diplomate Benedictus; neque enim necesse erat, ut dicta revocaret, & caneret palinodiam.

Verum etiamsi Pontifex ut privatus Theologus in quæstione ad solvendum perdifficili, utrinque validissime propugnata, dubia eo tempore, nec definita, in falsam inclinasset opinionem; nullum inde aut illius existimationi, aut Apostolicæ Cathedræ infallibilitati posset consequi præjudicium. Etenim nulla Constitutione quid fide tenendum esset definita sententia pronunciavit: quod ex dictis fati arbitror manifestum. Guilelmi autem Ockami, quod fuerit Romanorum Pontificum infensus hostis, & ultro fateatur se referre quæ ex aliorum acceperat narratione, nemo est qui pili faciat auctoritatem.

C A P U T XII.

De inæqualitate beatificæ visionis, ac sempiternæ Justorum felicitatis.

JOVINIANUS Stoico infectus contagio, quemadmodum nullam in meritis discrepantiam, ita nullam agnovit inæqualitatem retributionis. Adversus hunc duos libros conscripsit circa annum 392. beatus Hieronymus; in quorum postrema parte istum impugnat excucullati errorem hæretici. Novatores, qui putant homines justificari per eandem Christi Sanctitatem singulis imputatam, in eisdem ferme inciderunt casus. Oportet nunc perversum dogma insectemur, ostendentes rependendam non esse singulis justis parem omnino mercedem: & pauca superaddamus de Scholarum dissidio, unde inæqualis beatitudinis ratio sit repetenda.

PROPOSITIO I. Inæqualis gloria meritis inæqualibus reservatur.

Hæc est scripturarum sanctarum doctrina. Nam in Evangelio Joannis cap. XIV. 2. legitur: *In domo Patris mei mansiones multe sunt*. De quo loco Tertullianus Scorpiaco: *Quomodo multe mansiones, si non pro varietate meritorum?* Paulus I. ad Corinth. III. 8. *Unusquisque propriam mercedem accipiet, secundum suum laborem*. Cap. XV. 41. *Stella enim a stella differt in claritate: sic & resurrectio mortuorum*. Et 2. ad Corinth. 9. *Qui parce seminat, parce & metet*. Idem probant

M m 2

textus,

textus, quibus meritorum asseritur inæqualitas; ut parabola de semine apud Matth. 19. 8., quod fructum dedit *aliud centesimum, aliud sexagesimum, aliud trigesimum*; egregie exposita eo versu, *Serta terdenis, &c.* in hymno D. Joannis Baptistæ: necnon alia de quinque talentis cap. xxv., & de decem minis apud Lucam cap. xix. Accedit definitio Sacrosanctæ Tridentinæ Synodi Sess. vi. cap. 16.

Eadem est SS. PP. assertio: Chrysostomus hom. 41. in 1. ad Corinth. *Tametsi in regno caelesti sint omnes, non omnes tamen iisdem potiri præmiis significatur illa similitudine stellarum: uti nec in gebenna peccatores omnes eadem tormenta patientur*. Ambros. lib. 5. in Lucam: *Esti unum regnum, diversa tamen merita sunt in regno eorum*. Gregorius Nazianz. Orat. 34. *Prout illorum est ordo, plus, minusve Deum cernunt*. S. P. Augustinus Tract. 67. in Joannem. *Multæ mansiones diversas meritorum in una vita æterna significant dignitates*. Fulgentius de Fide ad Petrum: *Diversa erit Sanctorum gloria*. Prosper in sent. 360. *Ut Deus omnia in omnibus erit, sic etiam in dispari claritate par gaudium*. Gregorius lib. 4. Moralium cap. 31. *Quia in hac vita nobis est discretio operum, erit in illa proculdubio discretio dignitatum, &c.*

Argumenta a ratione æquum est ab illo præclarissimo Ecclesiæ Doctore depromantur, qui Jovinianum singulari certamine prostravit. Quorum primum sic necti potest: Ordo, qui est in visibili Ecclesia etiam in caelesti servatur Jerusalem, & militans refert imaginem triumphantis; hæc enim, quæ per fidem ambulat, plurimas habet mansiones, & alium tenent gradum Pontifices, alium Sacerdotes, alium Levitæ, alium Aeditui, alium fidelis plebs; illa, quæ sursum est Ecclesia continet Archangelos, Angelos, Thronos, Dominationes, Potestates, Cherubim, Seraphim, variasque Sanctorum classes: Atqui in visibili Ecclesia diversitas nominum denotat graduum, munus, ac dignitatum discrepantiam: Ergo diversam potestatem dignitatemque designat pariter varietas nominum, quibus appellantur supernæ Jerusalem incolæ. II. Consilium est Evangelicum Matth. xx. ut *Qui vult major esse sit omnium minimus*; & idcirco pauperes spiritu sese abjiciunt, ut exaltentur, novissimoque recumbunt loco, ut superius ascendant: Consilio isto exercitamentum humilitatis frustra suaderetur, nisi in cælis unus esset altero major: Est ergo illic majoris, minorisve præmii distributio. III. Gloria caelestis est merces, & redditur unicuique secundum proprium laborem: Inter Verbi Dei Præcones plus sustulit laboris D. Paulus, qui prædicavit Evangelium, & ne quem gravaret, manibus suis illis quoque qui secum erant ministravit, quam ferant alii, qui prædicant, & de Evangelio vivunt. Igitur contentancum est, ut Paulus plus mercedis recipiat, quam ceteri Evangelii Concionatores. Hæc ex Hieronymo in 2. adv. Jovinianum. Quartum addo ex D. Gregorio lib. ix. Moral. cap. 39. Impares sunt reproborum poenæ: quod

quod probatur ex damnatione Babylonis Apocalyp. xviii. *Quantum exaltavit se & in deliciis fuit, tantum date illi tormentum, & luctum; & ex parabola zizaniz in fasciculos alligatz, Matth. xiii., ut quos similis culpa iniquitat, par etiam poena constringat. Ergo etiam juxta modum meriti sequitur retributio beatitudinis.*

ARGUMENTA OPPOSITA REFELLUNTUR.

Prima obiectio est hujusmodi: Operarii, de quibus Matth. xx., acceperunt sub vespem singuli denarium, ita ut qui portaverant pondus diei, & æstus, murmuraverint adversus Patrem familias quod pares sibi fecisset qui novissimi una hora laborarunt: Hæc parabola diversitatem meritorum designat, & æqualitatem retributionis: Ergo diversis operibus eadem merces ac retributio rependitur.

Resp. 1. dist. minorem: hæc parabola designat æqualitatem retributionis quantum spectat ad vitam æternam, in qua eadem est in æternitate mensura, concedo: quantum ad intensiorem gaudii, & perennis gloriæ splendorem, nego. *Unus denarius, inquit 2. lib. cit. S. Hieronymus, non unum est præmium, sed una vita, & una de gehenna liberatio.* S. P. Augustinus serm. 59. de Verb. D. cap. 4. *Denarius ille vita æterna est, & in vita omnes æquales erunt. Quamvis enim meritorum diversitate fulgebunt, alius magis, alius minus, quod tamen ad vitam æternam pertinet, æqualis erit omnibus. Non enim alteri eris longius, alteri brevius, quod pariter sempiternum est.* Vide & Gregorium lib. iv. Moralium cap. xxxi. Resp. 2. nego singulos illos operarios non esse æquales in merito: sive enim intelligas parabolam de Sanctis veteris, ac novi testamenti, sive de diversis Justorum generibus, fieri potest ut plures qui novissime venerunt ad fidem ad antiquorum Patriarcharum meritum gloriamque pertingant, & etiam ampliorem referant laborum mercedem, & qui post multa scelera resipiscunt caritatis fervore dolorisque acrimonia illorum coronam adipiscantur, qui ab ineunte ætate vitam incontaminatam duxerunt: atque ita, ut ait Gregorius Naz. Ora. 40. *Ad laboris modum plus contulerint qui priores ingressi sunt, non tamen quantum ad voluntatis ardorem.* Pro qua responsione vide quæ diximus ad 1. cap. ix. Resp. 3. non opus esse ut comparationes ac parabolas tam anxie persequamur; nam non omnia in his semper congruunt cum re, quam significant: quod asserendum est de præsentibus, alias in regno cælorum essent murmura & querimoniz, uti fuerunt in operariis, qui accipientes denarium adversus Patrem familias murmurabant.

Ob. 2. Gloriæ inæqualitas parere posset invidentiam, ac desiderium amplioris felicitatis.

Resp. invidiam acceri a perfectissima caritate, quæ non æmulari, & qua

& qua beatæ mentes ita uniuntur, ut non minus de propria, quam de aliorum felicitate latentur. *Quantum enim quisque diligit aliquem, tantum de bono ejus gaudet*, inquit Anselmus in Profolog. 25. Lege & Cassiodori librum de Amic. Desiderium autem expellit summa ac perfecta satietas, quam explet quisque in *torrente volaptatis* pro modulo sitis suæ. *Sicut enim corporalis saturitas omnes futuros equaliter habet, quamvis singuli cibum non equaliter, sed pro possibilitate perciperint; ita omnes sancti etsi fuerint aliqua graduum suorum diversitate distincti, una beatitudine perfecti erant*, &c. ait lib. 1. de Vita contemplat. cap. 4. Julianus Pomerius Afer, cujus opus passim sub Prosperi nomine laudatur. Vide etiam aptissimum exemplum corporis, in quo oculus non vult esse digitus, neque digitus oculus, apud Augustinum lib. xxii. de Civit. Dei cap. 30., conferens quæ habet Apostolus ad Ephesios iv. 16.

Opp. 3. Dammati eadem pœna damni afficiuntur, quæ est privatio, ideoque non suscipit magis & minus. Ergo eadem gloria coronantur electi.

Resp. dist. ant. Pœna damni non habet magis & minus ratione sui, concedo: ratione adjuncti, nempe inimicitiae Dei, & ex consequenti cruciati, quo plus minusve impii contristantur dum percipiunt se divinæ essentiae contemplatione privari, nego. Vide Abulensem quæst. 640. in cap. 25. Matth. Hoc autem est discrimen inter visionem, privationemque visionis; quod hæc, cum sit carentia, æqualis est in omnibus reprobis ratione sui, & inæqualem infligit pœnam ratione apprehensionis, & causati inde mœroris; at visio, cum sit ipsa mentis apprehensio, per se piorum animas exhilarat, & gaudium parit.

Opp. ult. Beati vident Deum sicuti est.

Resp. vident quidem eundem Deum, sed ut capiunt; & gloriam specie unam possident ejusdem objecti contemplatione & dilectione: at non omnes illud contemplantur eadem vi intelligentiæ, neque diligunt eodem caritatis ardore. Satiantur tamen singuli, quia vident ut capiunt, amant ut possunt, fruuntur ut capiunt, inebriantur ut sitiunt; & gloriæ discrimen non a Deo, sed a propria uniuscujusque capacitate repetitur.

PROPOSITIO II. Causa moralis inæqualitatis beatitudinis est meritum, effectrix vero est lumen gloriæ, quod pro meritorum ratione illustrat mentem, inflamatque corda Sanctorum.

Quod spectat ad causam moralem constat ex dictis; nam merces meritum consequitur, & virtutes suam petunt remunerationem. Hinc recte Fulgentius in lib. de Trinit. *Tanto amplius alius alio in illa vita Deum videbit, quanto amplius in hac vita eum dilexit*. Et S. P. Augustinus serm. 59. de Verbis Domini: *Meritorum diversitate fulgebunt, alius magis, alius minus*.

De causâ autem effectrice probatur. Ea est indoles causarum secundarum, ut quando ad agendum nativam virtutem non habent, sed aliena corroborantur, ab hac unice pendeat major effectus perfectio. Idque & in naturalibus & in supernaturalibus valet: nam si aqua calefit, receptoque calore injectam ustulat manum, adustio non aquæ principaliter tribuitur, sed calori; neque quod sit validior ab elementi particulis oritur, sed ab istarum agitatione & qualificatione. Pariter in actibus supernaturalium virtutum, si sapientior ardenti caritate Deum diligit, aut robustiori fide credat, caritas fidesque a sola gratia perficiuntur; neque naturali scientia exornatus, suffultus eadem gratia, quam habet ignarus, isto perfectius credit aut diligit, neque ullus ab alio naturali mentis perspicacia discernitur, sed sola voluntate moventis, & beneficia gratiæ largientis. Quæ ad probandam propositionem suppeditant duo argumenta. Ac primum: Beati Deum vident facie ad faciem, & ei firmissime adhærent non vi intellectiōis & amoris nativi, sed facultate luminis gloriæ divinitus ipsos illuminantis, & inflammantis: Quotiescunque secunda causâ operatur non sibi naturaliter indita, sed supernaturali virtute ab hac tantummodo exoritur inæqualitas, & major aut minor excellentia operationis: Ergo contuitus & amor beatorum spirituum, non ab intellectu aut voluntate eorundem, sed a luminis gloriæ diversitate suam habet inæqualitatem. Deinde: Doctissimi Scoti discipuli, quibus etiam subscribunt ex nostris Aegidius Lusitanus & Landon, & e Schola Thomistica Eminentissimus Cajetanus, docent inæqualitatem visionis repetendam esse etiam ab inæqualitate intellectus, quod hic sit potentia activa, & cum lumine gloriæ unam totalem causam constituat: Videtur autem hæc ratio infirma: Ergo & sententia, quæ huic rationi nititur. Prob. minor. Perfectior actus E. G. fidei, etsi proveniat ab intellectu & a gratia, nullo pacto suam perfectionem nanciscitur a naturali acumine intellectiōis, sed a sola motione divinæ gratiæ, quia licet intellectus una cum gratia eliciat fidei actum, non id præstat naturali virtute, sed gratiæ: Ergo visio Dei intensior, tametsi efficiatur ab intellectu & a lumine gloriæ, majorem ab intellectu nequit habere intensiōem, quoniam ille non virtute nativa Deum videt, sed ea, quam ipsi lumen gloriæ largitur. Hinc est quod Guilelmus Parisiensis Antistes anno 1240. & iterum Stephanus Parisiensis ann. 1267. proscripserunt hanc propositionem: *Cui meliora fuerint naturalia, necessario major erit gratia & gloria*. Denique ex sententia opposita consequitur meritis non semper gloriam respondere; nam si aliquis habeat idem meritum, sed vim intellectivam hebetiorem, minori potiretur beatitate quam alter, qui esset par meritis, & ingenio ac mente pollentior.

REFUTANTUR OBJECTIONES.

Ob. 1. Cum æquali gratia unus altero intensius diligit Deum : Ergo cum æquali lumine unus Deum videt alio perfectius .

Resp. dist. ant. & perfectio dilectionis pendet a gratia , non a viribus naturalibus , conc. secus , nego . Habet utique humana voluntas , ut possit gratiæ resistere , vel reddere illam otiosam , non enim Dei munera liberum tollunt arbitrium , sed ei opitulantur . At si liberum arbitrium bona opera exerceat , tota perfectio meriti est a gratia , neque operis excellentia potest unquam motionem ac vim auxilii superexcedere . Ceterum in hoc infirmitatis statu datur etiam gratiæ inæqualitas , & qui intensius operatur , majori efficacia divinorum auxiliorum trahitur ac præmovetur : Ad hæc : lumen gloriæ non subest arbitrio , sed necessario mentem rapit beatorum ; & eam ob rem hi videre nequeunt nisi ad luminis divini mensuram .

Ob. 2. Si duæ causæ ad aliquem effectum concurrant , & una sit efficacior , est etiam effectus perfectior : Intellectus & lumen gloriæ sunt duæ causæ , quæ influunt in eandem visionem : Ergo si intellectus sit efficacior , erit etiam visio vividior .

Resp. dist. majorem : si fuerint duæ causæ ejusdem ordinis , ut duo equi eandem rhedam trahentes , conc. Si diversi ordinis , ut sunt arbitrium & gratia , intellectus & lumen gloriæ , & una insuper causæ agat virtute alterius , nego .

Ob. 3. Vegetior oculus cum eodem lumine videt perspicacius . Ergo perfectior intellectus cum eodem lumine spiritali percipiet lucidius .

Resp. nego consequentiam ; quippe oculus & lumen sunt ejusdem ordinis , mens autem , & fulgor divinæ gloriæ , diversi . Et præterea : lux corporalis oculi supponit expeditam completamque potentiam : quam spiritale lumen non invenit in intellectu , sed efficit .

Ob. 4. Non proprio Marte , sed divino spiritu affante scripsit E. G. Paulus & Lucas , & prophetarunt Amos , & Isaias , at quoniam Paulus erat naturalibus scientiis imbutus , Isaias Hebraicarum , Chaldaearumque literarum cultu & delectu , antecellit scriptura Pauli libros Lucæ , & Isaiæ vaticinium prophetias ceterorum . Ergo etsi videant Beati divinitatem superno lumine gloriæ , quo magis tamen pollent naturali vi intellectu , Dei speciem magis magisque contemplabuntur .

Resp. dist. antec. Pauli scripta & Isaiæ vaticinia ceterorum præcellunt libros styli venustate & orationis ornatu , conc. veritatis oraculo & arcanorum intelligentia , nego ; & retorqueo argumentum . Quamquam Paulus in lege eruditus & cultus eloquio politiori stylo conscripserit , quod facultatis est naturalis ; arcanorum tamen penetratione non superavit Scriptores alios divinorum librorum , nisi ad mensuram
fu-

sublimioris raptus, aut validioris afflatus divinitatis. Quod si verborum quoque splendorem ac stylum effici velis superna spiritus concitatione, & afflatu; dicam hunc sese Prophetarum indoli attemperare, eosque congrua quadam motione ad prophetandum fortiter æque ac suaviter urgere; ita, ut occultarum rerum vaticinationes, nec non flos ornatuque verborum exigi tantum debeant ad mensuram impetus flaminisque divini. Atque ita ad luminis gloriæ excitationem & modum pensanda est beatæ visionis vehementia.

C A P U T XIII.

De beatæ visionis objecto.

QUIN Beati in Deo videant in hujus libri complemento dicendum. supereft. Ac primo constat ex dictis, videre unitatis ac Trinitatis mysterium. Illud namque revelandum nobis est quod fide credimus, & contemplandum in specie quod nunc videmus per *speculum & in enigmate*. Vident consequenter perfectiones divinitatis, scientiam, omnipotentiam, immensitatem, & alias, de quibus libro disputavimus præcedenti. Hæc cum sint a Deo penitus indistincta, dici solent in Scholis *objectum primarium*.

Deinde vident creaturas per Verbum conditas, terram, cælum, reliqua. Spestant enim omnia ad ordinem Universi, cujus ipsi Beati sunt partes; & nonnulla naturali cognitione attigerunt, plura noscere appetierunt. In illa ergo *Arte*, in qua immutabiliter continentur, omnia divini luminis participatione cognoscunt. Vident quoque sese invicem, ut postulat unius Civitatis, regnique societas: Unde ait Augustinus Epist. 6. *Tunc nihil latebit proximum in proximo; nec erit quod suis quisque aperiat, abscondat alienis, ubi nullus erit alienus*. Et Bern. Serm. 1. in Dedicatione Eccles. *Nec ulla separare eos ab invicem suspicio potest; ubi nihil omnino quod in altero sit, alterum latere patitur penetrans omnia radius veritatis*. Quamobrem etiam cogitationes & affectus sibi invicem sponte revelant, ut solent domestici, & sincera dilectione conjuncti. In supernorum civium numero agnoscunt & illos, quos nunquam noverunt in terris, & ex notitia rerum præclare gestarum proficiunt in cognitionem virorum. Vide Magnum Gregorium lib. 14. Dialog. cap. xxxiii.

Rerum, quæ in terris sunt, illæ Beatis spiritibus innotescunt, quæ propius ad eos spectant; Pontifices Ecclesiæ statum, Reges vicissitudines regnorum, Parentes familiæ suæ conditionem, singuli vident suorum preces clientum. Nota sunt exempla Eliæ 11. Paralip. cap. 21. v. 12., & Jeremiæ, & Oniæ 11. Macchab. cap. xv. Recte id summi Numis

To. I.

N n

minis

minis providentia institutum, ut pro nobis intercedant ejus amici, re-
gnique consortes, ut definit Conc. Senonense in Decr. Fidei cap. xiiii.
probantque Ecclesiæ Patres, Ambrosius in Orat. de obitu Theodosii,
Augustinus Epist. 259. ad Cornelium, & Gregorius lib. xii. Moralium
cap. 17. Vident & damnatorum pœnas, non ut misereantur, sed ut
gaudeant uberius, animadvertentes quanta evaserint mala; quod ex-
plicat idem Gregorius Hom. 40. in Evangel. aptissima comparatione
picturæ, in qua *Niger color substernitur, ut albus vel rubeus clarior
videatur*. Futura omnia, & possibilia, & contingentia minime noscunt,
præsertim diem judicii, & secreta cordium; nisi ea sibi manifestent, ut
amici solent, alterutrum, aut a Deo revelentur qui *scrutatur renes &
corda*. Hæc omnia distincta a Deo beatificæ visionis *objectum* sunt *secundarium*.

Circa princeps objectum quæritur num divinitus fieri possit, ut
videatur una Persona sine alia, aut sine attributis essentia. Affirmati-
vam sententiam propugnant Scotistæ, Paludanus, Alarcon, L' Her-
minier, in eamque propendet noster Lusitanus. Stant ex adverso Au-
gustiniani ac Thomistæ, Sylvius, Habert, Tournely, Juenin, Gotti,
Piette, Florez, & alii. De objecto autem secundario visionis variæ
instituantur quæstiones, quæ ex dictis facillime resolvuntur.

PROPOSITIO: Neque per absolutam potentiam Dei fieri potest, ut
videatur divina Essentia sine attributis, aut una Persona sine alia.

Probat 1. ex Scripturis. Joannis xiv. 9. habetur: *Philippe, qui videt me, videt & Patrem*. Quem locum eludunt Henno & Fraf-
sen dicendo exponi a PP. de cognitione per Fidem, cujus sufficiens moti-
vum erant opera a Christo patrata: vel reponunt valere quidem de
ordinaria potentia, non de absoluta. Nolo priorem interpretationem
rejicere; quum de visione per fidem satis apposite accipiantur verba
immediate sequentia: *Verba, quæ ego loquor vobis, a me ipso non lo-
quor. Pater autem in me manens ipse facit opera*. Neque me latet il-
lam explicationem admitti a Chrysostomo Hom. lxx. in Joannem, a
Cyrillo lib. 9. cap. 37. a Tertull. cap. 24. contra Praxeam, & breviter
sic exprimi a Nonno;

Nimirum mecum esse Patrem: sum namque Parenti

Connexus: mea vox sonat; at res efficit ille.

Ea itaque interpretatione admissa sic arguo: Quoniam eadem sunt ope-
ra Patris & opera Filii, qui credit in Filium necesse est ut credat etiam
in Patrem: Ergo quia eadem est veritas & lux Patris & Filii, opus est
ut videns Patrem videat quoque Filium.

Eadem est S. P. Augustini sententia: qui in Pl. 85. in ea verba,
Joannis: *Nescitis quia ego in Patre & Pater in me est?* inquit: *Me
viso videtur & Pater, & patre viso videtur & Filius; Patris & Filii
separari non potest visio. Vbi non unius separatur natura & substantia,
viso*

visio separari non potest. Tract. 70. in Joannem : *Cur inseparabilia separari desideras nosse ?* & in 2. de Trinit. cap. 8. *Neuter sine altero potest ostendi. Unum quippe sunt, sicut ipse ait : Ergo & Pater unum sumus.* Quæ profecto etiam de absoluta tenent potentia, quum nullatenus dividi possit ac separari in qualicumque hypothesi divinarum Personarum substantia, veritas, & visibilitas.

Hinc multiplex depromitur ratio. Ac prima : Quæ divinis Personis, aut proprietatibus conveniunt ratione naturæ, sunt prorsus inseparabilia ; neque enim Mundum E. G. condere potuit Pater absque Filio, cum sit utriusque eadem virtus creatrix, quæ essentiam consequitur, non relationem. Atqui divinarum Personarum una est veritas & intelligibilitas, quæ ratione substantiæ ex æquo in singulis reperitur : Ergo divinarum Personarum visio est penitus inseparabilis. Deinde Scottistarum sententia supponit in Deo formalem distinctionem, ob quam cum sit liberrimus se videndum exhibeat secundum unam *formalitatem*, non secundum aliam : Hæc distinctio commentitia est, ut vidimus lib. 2. cap. 3. prop. 2. Igitur & ruit opinio de separatione visionis. Rursus ad visionem intuitivam necesse est, ut videatur plenitudo divinitatis tota simul, & non partiliter ; quod exemplis & rationibus ostendi cap. 1. hujus libri in Resp. ad 3. Sed dum videretur una persona sine alia, non inspiceretur tota simul plenitudo divinitatis : Ergo non videretur Deus visione intuitiva. Demum si divina natura in sola persona Patris subsisteret, quisquis videret essentiam absque Patre, non eam videret intuitive & prout *est in se* ; etenim *in se* non esset essentia nulla terminata hypostasi, sed singulari individuata *supposito*. Igitur cum sit in tribus personis, non videbitur ut est in se, nisi tres Personæ videantur simul. Atque hæc omnia militant de Attributis, sive cum divina substantia, sive inter se comparentur.

ARGUMENTA OPPOSITA DILUUNTUR.

Opp. 1. Potest una Persona sine alia incarnari : Ergo potest una Persona sine alia videri.

Resp. nego consequ. tum quia incarnatio sive extraneæ naturæ assumptionis fit hypostasi, quæ non est in divina essentia unius generis, sed multiplicis ; constituitur enim relatione, non absoluta aliqua proprietate : at e contra visio habetur ratione summæ & indistinctæ cognoscibilitatis, quæ non alia est divinæ substantiæ ac relationum, sed eadem, unica, inseparabilis. Tum quia Incarnatio est unio divinæ & humanæ naturæ in eodem supposito, non prout natura divina est in se, sed prout est in Verbo, scilicet ut refertur ad Patrem : visio autem intuitiva est unio intentionalis mentis nostræ cum Deo, quatenus *est in se* : id enim postulat ratio visionis intuitivæ. Ceterum hoc argumento nostra cor-

roboratur sententia . Primo quia licet natura humana uniatur hypostatice Verbo , non Patri , propter diversam hypostasim utriusque ; opus Incarnationis efficienter est a tota Trinitate , quoniam trium personarum una est potentia & virtus effectrix . Ad hæc si Patris & Filii , quemadmodum est una natura , ita esset eadem subsistentia ; Filius absque Patre incarnari non posset : sicuti nequit incarnari Filius , nisi incarnetur Deus sapiens , immensus , omnipotens , & quidquid est a Persona Filii indistinctum : Igitur cum in ratione visibilitatis nullum discrimen in Deo inveniatur , non erit visio ratione aliqua separabilis .

Opp. 2. Potest divino Verbo communicari Essentia non communicata paternitate . Ergo pariter essentia videri potest paternitate non visa .

Resp. Essentiam ac paternitatem rem unam esse , quæ si in se absolute consideratur , vocatur essentia , si connotative & secundum relationem , nuncupatur persona : quæ juxta hanc ideam accepta nedum non communicatur , sed neque communicari potest , cum repugnet inter relativa indistinctio . Quare nego consequentiam : paternitas enim communicatur *essentialiter* , & non communicatur *personaliter* , quoniam repugnat communicari quod dicit ratione sua distinctionem ab alio : at non repugnat essentiam sine personis videri ; quinimo si videatur *in se* , videri debet utrumque , eo quod utrumque *in se* est una eademque impartibilis veritas & substantia . Ea propter urgetur contra adversarios argumentum ; quandoquidem Filio communicatur essentia , & omne quod communicabile est , omnipotentia , sapientia , immensitas & quidquid habet Pater , hoc excepto quo Pater est , quia Essentia communicatur *ut est in se* : Igitur si videatur divina Essentia prout est *in se* , videri debet quidquid est visibile , & ab ea penitus inseparabile .

Opp. 3. In illo priori , in quo Pater Filium generat , perfectam habet beatitudinem , & tamen nondum Filium videt .

Resp. talem esse beatitudinem , quale est illud *prius* , scilicet cogitationis nostræ figmentum . Cum enim dicitur *Filius a Patre genitus* , ostenditur ordo , non quo alter sit prior altero , sed quo alter sit ex altero ; ait S. P. lib. 3. contra Maxim. cap. 14. Quamquam si per impossibile in aliquo instanti non esset Filius , videretur tamen a Patre eo modo , quo esset , nempe quamprimum a se generandus .

Opp. 4. Divina Essentia sufficiens est beatitudinis objectum : Essent ergo plene beati qui eam tantummodo intuerentur . Ant. probatur , quandoquidem si divina substantia non esset se sola plenum beatitudinis objectum , non esset summum bonum & undequaque perfectum : Est summum , maximum , & undequaque perfectum bonum : Est igitur beatitudinis sufficiens , plenumque objectum sola divina essentia .

Resp. dist. ant. Divina essentia est beatitudinis sufficiens objectum , & una

& una res simplicissima cum divinis proprietatibus ac personis; concedo: ab his quoquo modo secreta & separabilis; nego ant. Ad cujus probationem nego majorem: quod enim videri non possit essentia Dei absque relationibus non provenit ex ejus imperfectione, quasi non sit plenissimum maximumque bonum, sed ex perfectione ac simplicitate ejusdem essentiae a relationibus & proprietatibus prorsus indistinctae. Quod illustratur creationis exemplo: nam Pater omnipotens est, & tamen absque Filio & Spiritu Sancto Mundum creare non potuit. Id vero non aliunde, nisi quod efficientia & virtus est in tribus personis una & indivisa: atque ut legimus in Symbolo, quod tribuitur Athanasio, est quidem *Omnipotens Pater, omnipotens Filius, omnipotens Spiritus Sanctus: Et tamen non tres omnipotentes, sed unus omnipotens*. Ab eo quod omnes Personae sint una res summa, simplex & impartibilis, oritur inseparabilitas beatæ visionis, dicente Augustino: *Neuter sine altero potest ostendi, unum quippe sunt*.

Opp. 5. Absoluta absque relativis cognosci possunt, etiam visione, quam appellant intuitivam; videtur enim in pariete color, & non videtur quomodo parieti inhæreat: videtur in Eucharistia quantitas, & non videtur quomodo existat: videbatur humanitas Christi, & non videbatur illius subsistentia.

Resp. Absoluta absque relativis videri posse quotiescunque non sunt una, eademque simplicissima res, ut in exemplis productis. Nam color inhærens connotat subjectum a quo est separabilis, quantitas panis in Eucharistia Christi corpus a quo distinguitur, natura humana Verbi personam a qua assumitur. Color ergo, extensio, humanitas Salvatoris videri possunt absolute, etiamsi non videantur connotative, idest quatenus referuntur ad aliquid a se distinctum. Quod non valet de summa perfectissimaque Dei natura; in qua absoluta & relativa sunt eadem indivisibilis veritas. Præterea nulla est horum exemplorum convenientia, quam neque inhærentia coloris, neque existentia quantitatis in Eucharistiæ Sacramento, neque Verbi Divini subsistentia sint objectum visibile: cum e contra omnis divina perfectio objectum intelligibile sit. Insuper retunditur telum istud. Nam videre nemo potest colorem in se nisi circumstantem videat figuram & magnitudinem, & quisquis hominem aspicit ut est in se, intuetur formam vultus, corporis proceritatem, membrorum aptitudinem, vestimentorum qualitatem, & quidquid oculis objicitur. Similiter itaque divinitatem videns facie ad faciem videre debet Personas, attributa, & quidquid est inseparatum a Deo, & beatorum menti repræsentatur.

Sed forte Peripateticorum improbata sententia, repones nullam esse coloris & quantitatis naturam quæ alia sit a corporea substantia, & fictitiam esse accidentium, qualitatumque inhærentiam, & tamen unum & idem corpus præcise videri ac tangi. Verum minus urget in
recen-

recentiorum Philosophorum systemate argumentatio : Defendunt hi lumen in certa particularum corporis lucidi situm esse motione , & nihil esse præterquam vis in nobis vividum sensum excitandi : corpus autem pellucidum illud esse , quod meatibus undique perviis instructum est ; opacum contra , quod transversariis perviisque meatibus caret . Sic alborem in his corporibus ajunt esse , quæ asperitate scabrisque incidentes luminis radios reperiunt ; nigrorem vero in iis , quorum particula attritæ admodum & concisæ exceptos radios luminis non reflectunt . Ita ergo diversi videntur colores , aut idem majori , seu minori intensione conspicitur , si minutæ particula corporum , vel sint atomi Gassendi , vel subtilis materia Cartesii diverso pacto concutiantur ; ac propterea docent flammæ , quæ admodum lucet , summam celebritatem esse , & vividas scintillas videri in silicis & chalybis collisione . Quantitatem pariter tangi inquirunt , dum tendinum fibræ recipiunt ab externis corporibus impressionem : quæ fibræ cum alicujus sint magnitudinis nequeunt ab exiguis corporibus agitari , unde solida tangimus , non aerem vel halitum . Sed plura de his Rohaultius , Ca telsius , Le-Grand , aliique Optices , ac Physiologiæ studiosi . Ex quorum placitis nequit demonstrari visio præcisiva in summa ac simplicissima re , in qua nullæ sunt partes , quæ excitari possint , vel concuti ; neque plures unius spiritus formæ , secundum quas partim sit manifestus , partim reconditus .

Opp. 6. Indistincta est ab Omnipotentia Dei creaturarum possibilitum continentia : & tamen videns omnipotentiam non videt creaturas omnes possibiles . Potest ergo ejusdem rei summæ & inseparabilis separari contuitus .

Resp. dist. antecedens : Et beati vident omnipotentiam absolute , in se , scilicet ipsam divinam substantiam potentem omnia producere , concedo : vident omnipotentiam connotative , nimirum ipsas creaturas separatas a divina substantia , & ab ea producibiles , nego . Re- cole a me dicta cap. 11. Prop. 2. in resp. ad ult.

Opp. ultimo : Deus est Beatorum speculum voluntarium : Potest ergo Beatis pro suo lubitu unam personam manifestare absque altera .

Resp. dist. ant. Est speculum voluntarium absolute , eo quod gloria beneficium sit gratiæ & divinæ liberalitatis ; concedo : in hypothesi quod gloriam conferat , & sese manifestet , subdistinguo , est speculum voluntarium in exhibendo visioni beatorum perfectiones a se indistinctas , quæ sunt *primarium* beatitudinis objectum ; nego : Est speculum voluntarium in manifestando creaturas a se diversas , quæ sempiternæ gloriæ objectum sunt *secundarium* ; concedo . De hoc *secundario* objecto dictum supra . Quæ autem aliqui hic inferunt de cognitione possibilitum in Verbo constant ex his , quæ supra differuimus de Comprehensione cap. 12. hujus libri . In quo si plura obscuro dicendi

genere fuere quaesita, manifestabuntur in Ecclesia Sanctorum, & in caelesti Jerusaleme, cujus fundamenta in montibus altis. Utinam eo pervenire mereamur virtute duce, de qua Hesiodus:

*Et longa hac & celsa simul via ducit euntem,
Ardua principio; sed ubi est ad culmina ventum,
Incipiet molli sese submittere clivo.*





DE THEOLOGICIS DISCIPLINIS LIBER QUARTUS

*In quo agitur de altitudine divitiarum
sapientiæ & scientiæ Dei.*



Quomodo mundi corde ex rebus aspectabilibus, ex incommutabili lumine veritatis, ac tandem prope & revelata facie Deum videant, superioribus libris declaravimus: Inquirendum nunc est, quomodo Deus universalium creaturarum suarum existentiam, affectiones, motum, vicissitudinem, intimasque percipiat cogitationes. Qua in re nobis videtur jure exclamandum: *O altitudo divitiarum sapientiæ & scientiæ Dei!*

cum Apostolo ad Romanos xi. 33. est enim abyssus multa, & impenetrabilis Dei scientia. Cum tamen *divitiarum* thesaurique notetur appellatione, quod ipsa illuminet abscondita tenebrarum, differtas reddat linguas infantium, disponat omnia suaviter, & per eam erumpant fontes, nubesque rore concrecant; cumque ipsa clamitet in plateis, in foribus, in capite turbarum, ut si quis sitit, veniat ad illam, & bibat: humiliter quidem ad ipsam Dei scientiam nobis est accedendum propter abyssi profunditatem, alacri tamen animo ob affluentiam thesauri, & uberrimam copiam divitiarum. Accedamus itaque confestantes vestigia illius, qui Sap. viii. 9. agebat: *Proposui hanc adducere mihi ad convivendum, sciens quoniam mecum communicabit de bonis, & erit allocutio cogitationis, & tædii mei.*

CA-

C A P U T I.

Ostenditur in Deo esse plenitudinem scientiæ, quam a divina substantia sola ratio humana distinguit, dum illam ad varia comparat objecta.

SCIENTIÆ vocabulo non venit hoc loco constans notitia sensuum ope, aut ratiocinio parta, quæ cum menti accedat, illamque perficiat, non debet in summa perfectissimaque substantia Dei cogitari: sed venit permanens absque hæsitazione cognitio, cui neque error subesse valeat, nec fluctuatio. Quam cognitionem soli negare audent athei, qui superiores terrenarum rerum regimen, curam, prævidentiam & cogitationem habere negant,

Djs indigna putando; alienaque pacis eorum;
Ut scribit lib. vi. Lucretius. Nos vero qui omnia sapientia Dei regi, & providentia gubernari firmissima fide tenemus, Theologicis de scientia Dei disquisitionibus dare operam constituimus.

PROPOSITIO I. Est in Deo omnis plenitudo Scientiæ.

Ita divinæ Scripturæ, Patres, ratio, & Gentium quoque Sapientes demonstrant. Ex scripturis hæc sunt apertissima: 1. Regum ii. 3. *Deus scientiarum Dominus est.* Job. xii. 3. *Apud ipsum est sapientia & fortitudo: ipse habet consilium, & intelligentiam:* & xxviii. 12. *Sapientia vero ubi invenitur? Et quis est locus intelligentiæ? . . . Deus intelligit viam ejus, & ipse novit locum illius.* Psalmo cxxxviii. 5. *Ecce Domine tu cognovisti omnia novissima & antiqua.* Esther. xiv. 14. *Domine, qui habes omnem scientiam.* Sap. vii. 15. *Ipse sapientiæ dux est, & sapientum emendator.* Plura sunt hujus generis in eodem, & seq. cap. Eccl. xlii. 19. *Cognovit Dominus omnium scientiam.* Ad Rom. xi. *O altitudo divitiarum sapientiæ, & scientiæ Dei!* Et ad Colos. ii. 3. de Christo, *In quo sunt omnes thesauri sapientiæ, & scientiæ Dei absconditi.* Idem docent PP. sequenti proposit. laudandi.

Ratione probatur propositio: Nemo inveniri potest, qui ignoret Deum esse quo melius cogitari non potest. Ergo nemo inveniri potest qui ignoret Deum omnia scientem ac sapientissimum esse; cum sapientia præcipua sit rerum perfectio. Deinde quidquid perfectionis reperitur in rebus conditis, eminenter existit in Deo: In Angelis & hominibus a Deo productis reperitur scientia: Ergo scientia modo eminenti, scilicet absque sensu & discursu, reperitur in Deo. Præterea Deus est substantia vivens materia & corpore expertis: Vita substantiæ expertis corporali materia est intelligendi facultas: Ergo facultas intelligendi est in Deo; & consequenter scientia, cum in Deo actus & operatio a facultate seu potentia nequeat sejungi.

To. I.

O o

Faten-

Fatentur hoc idem Ethnici scriptores. Plato in Parmenide, Proclus cap. 21., Iamblicus Segment. 1. cap. 15. Simplicius in Epist., Arrianus qui de hoc argumento egregiam instituit disputationem, Menander qui apud Clem. Alex. lib. 5. Strom. Deum vocat oculum omnia cernentem. Cujus rectæ appellationis indicium quoque est etymologia hujus nominis *Deus*, quod derivatum diximus lib. 11. cap. 1. a *δαίμων*, *specio*, *cognosco*. Pervulgatum quoque est etymon nominis *Daimon*, quo veteres Divos appellant, quasi *δαίμονες*, *scientes* a themate *δαίω*, *scio*. Aegyptii denique fingentes auream oculi imaginem in templis appendebant, in symbolum providæ, quæ omnia circumspicit, divinitatis.

Oppones: Hæc omnia nihil efficiunt; non textus Scripturarum, nam hi tribuunt etiam Deo humana membra, pœnitudinem, & iram; quæ tamen non sunt in Deo nisi metaphorice: non Patres, quum Augustinus Quæst. 2. ad Simplic. asserat scientiam *pertinere ad ea, quæ sensibus corporis experimur*: non ratio, quoniam scientia est quidem perfectio, sed per demonstrationem & per causam comparata, quæ duo in Deo locum non habent: Falsum est ergo Deum optimum maximum cuncta cognoscere.

Resp. nego ant. Et ad probationem dico pœnitentiam, iram, & cetera istiusmodi significare animi perturbationem ac motum, sicut & corporalia membra materiæ extensionem, quæ substantiæ spirituali, & immutabili repugnant, quod affirmari non debet de sapientia: quamvis pœnitendo & ira si possint percipi sine hac animi turbatione miro & ineffabili quodam modo in Deo esse dicantur apud Augustinum. Is ad Simpl. Quæst. 2. negat in Deo scientiam, quæ sensa & intellecta memoria retineamus, quum neque Deus sentiat, neque in eum subrepat mutabilitas longe ab ipsius substantia removenda. Ceterum S. Pater ibi scientiam Dei esse docet *vivacitatem certæ atque inconcussæ veritatis, unæ atque æterna contemplatione cuncta cernentis*. Porro humana scientia mutabilitatem habet, ac transitus quosdam a cogitatione in cogitationem, cum recolimus, ut cernamus animo quod in ejus contuitu paullo ante non erat; ideoque comparatur demonstratione, & causam agnoscit. Quæ si dempsero de humana scientia, *insinuat mihi utnunquæ scientia Dei*, ait S. Pater.

PROPOSITIO II. Divina scientia est eadem Dei substantia connotans intelligibilia objecta, ex quorum diversitate varia sortitur nomina, unam rem significantia, distinctam vero sola terminorum ratione.

Astruitur hæc propositio primum divinis literis, quæ Dei sapientiam quasi rem subsistentem describunt sæpenumero, præsertim Prov. VIII. 2. *Nondum erant abyssi, & ego jam concepta eram . . . Ante colles ego parturiebar . . . Delectabar per singulos dies ludens coram eo omni tempore . . .* &c. unde rectissime divini Verbi probatur cum Pa-
tre

tre indivisa substantia. Et Sap. vii. 22. sapientia appellatur *Spiritus intelligentiæ sanctus, unicus, multiplex, subtilis, &c.* Secundo SS. Patrum auctoritate: Augustinus Tract. 99. in Joannem ait: *Ideo non est ista substantia, cui hoc non est esse quod nosse: potest enim esse nec nosse. Ac illa divina non potest; quia id quod habet est. Ac per hoc non sic habet scientiam, ut aliud sit illi scientia qua scit, aliud essentia qua est, sed utrumque unum est: nec utrumque dicendum est, quod simpliciter unum est.* Cyrillus lib. xxxi. Thef. *Quum confessione omnium simplex sit, non est aliquid ab eo diversum ipsius cognitio.* Bern. lib. v. de Considerat. cap. 5. *Dicimur amare, & Deus, dicimur nosse; & Deus: sed Deus amat ut caritas, novit ut veritas.* Circumfertur & Synesii sententia in lib. de Insomniis: *Intelligentia est ipsa Dei substantia.* Ratione idem probatur; nam si Deus foret sapiens participatione veritatis, non perfectione substantiæ, esset & compositus & mutabilis: Deo compositio & mutabilitas quæque repugnat: Ergo Deus substantialiter sapiens est, non veritatis, ut D. Bernardus loquitur, *participio.*

Consequitur ex dictis sapientiæ Dei omnia convenire attributa, quæ de natura divina enunciantur. Quare Sap. vii. dicitur spiritus intelligentiæ *Sanctus*, nulla mentis contagione inquinatus; *Unicus & multiplex*, simplicissimus ex parte Dei, & late se per omnia genera rerum diffusdens: *certus*, & nulli obnoxius errori; *subtilis*, & cuncta pervadens: *omnibus mobilibus mobilior*, & rebus omnibus motum tribuens ac directionem: *Candor lucis æternæ & speculum sine macula*, absque concretionem terrena, & nube corporei sensus: *omnia potens*, energia & virtute: *in se permanens*, immutabilitate perpetua: *omnia innovans* multiplici efficientia.

Quæ cum ita sint; variæ, quas tradunt Theologi scientiæ divini partitiones, nos in ordine ad diversa objecta & connotata explicabimus. Ac primo dicenda erit *sapientia*, quatenus pertinet ad scrutationem rerum æternarum, in quibus tanquam in causis etiam mutabiles creaturæ præcontinentur: *Scientia* vero dicitur, prout alia a se Deus contemplatur, & intuetur. Dicitur *speculativa*, quatenus est cognitio objecti non operabilis, ut scientia sui ipsius, rerum possibilium, malorum culpæ: *Practica* e contra, quatenus est cognitio objecti operabilis, ut scientia mundi e nihilo producendi, bonorumque operum divino auxilio perficiendorum. Distinguunt præterea Theologi divinam scientiam in *liberam*, & *necessariam*; quarum prima est, quæ pro objecto habet quidquid pendet a libero decreto Dei; & talis est scientia creaturarum existentium: Altera est, quæ omne decretum Dei antecedit, & habet pro objecto creaturas tantum possibiles. Postremo alia est scientia *simplicis intelligentiæ*, alia *scientia visionis*. *Scientia simplicis intelligentiæ* est ea, quæ versatur circa res, quæ non existunt, neque extituri sunt, ut cognitio rerum possibilium, quæ

abstrahunt ab omni *futuritione*, & ab omni existentia. Scientia *visio-*
nis est illa, quæ versatur circa res in aliqua temporis differentia exi-
 stentes, ut cognitio rerum præsentium, futurarum, præteritarum. Inter scientiam *visionis*, & *simplicis intelligentiæ* statuunt aliqui scientiam futurorum conditionatorum, quæ a nullo dependent efficaci & absoluto decreto: & hæc est celeberrima *Scientia media*, de qua postmodum. Nam hic de scientiæ Dei a divina substantia indistinctione tractandum erat.

C A P U T II.

An aliquid sit, quod scientiam Dei subterfugiat.

QUÆRUNT Theologi num Deus omnia revera cognoscat, semetipsum, creaturas possibles, præteritas, existentes, futuras, peccata, cordium cogitationes, & humanæ mentis figmenta: atque de his omnibus disputationem instituo.

PROPOSITIO I. Deus semetipsum cognoscit, atque comprehendit.

Cognoscere semetipsum probatur ex sacris literis: Joannis x. 15. *Sicut novit me Pater, & ego agnosco Patrem.* 1. ad Corinth. ii. 10. *Spiritus Dei scrutatur omnia, etiam profunda Dei.* Probatur auctoritate Augustini lib. xv. de Trinit. cap. 14. *Novit omnia Deus Pater in seipso, novit in Filio, sed in seipso tanquam seipsum, in Filio tanquam Verbum suum, &c.* Probatur ratione: Necessè est ut primæ Menti propositum sit præstantissimum intelligibile: Deus est prima mens: Ergo propositum est illi præstantissimum intelligibile: At nihil seipsa præstantius habet: Ergo semetipsam intelligit. Ex quo argumento illud infertur, quod Deus est scientiæ suæ objectum, ut Scholastici appellare consueverunt, *primarium, ac specificativum.*

Se autem Deum comprehendere sic ostendo. Comprehensio est infinita cognitio, in qua nihil latet videntem: Spiritum, qui scrutatur etiam profunda Dei, nihil latet: Ergo Dei Spiritus Deum comprehendit. Rursus *Sapientiæ Dei non est numerus*, ut habetur in Psalm. 146. Igitur nulla terminatione sapientiæ Dei circumscribitur. Præterea in eo sita est natura comprehensionis ut præter essentiam rei tota ejus percipiatur essentia, ut dixi lib. 111. cap. 11. Prop. 2. Deus videt seipsum, ut probatum est nuper, & quidquid ad ejus efficientiam attinet, ut mox dicetur: Semetipsum ergo comprehendit. Et denique Divina scientia nequit cogitari præstantior: At posset, nisi propriam divinitatem comprehenderet: Comprehendit igitur.

Opp. 1. Scientia & omnipotentia idem sunt: Nequit omnipotentia habere pro objecto ipsum Deum: Ergo istiusmodi objectum nequit habere scientia.

Resp.

Resp. Nullum discrimen esse inter scire & posse Dei. Ratione nostra feceruntur, quod substantiam intelligentem & connotantem cognoscibilia vocamus scientiam: & substantiam potentem creaturas producere appellamus omnipotentiam. Igitur distinguo majorem. Idem sunt substantialiter & in re, concedo: ratione objecti & connotati, nego. Alii respondent hanc esse disparitatem, quoniam scientia est actio immanens, omnipotentia transiens, ideoque objectum scientiæ potest esse intrinsecum cognoscenti.

Opp. 2. Quidquid comprehenditur scientiæ comprehensione finitur, ait S. P. lib. 12. de Civit. Dei cap. 18. Deus nulla ratione finitur: Ergo Deus nulla ratione comprehenditur.

Resp. dist. ma. Finitur negative, nempe nihil penitus superest quod lateat videntem, concedo: Finitur positive, scilicet attingitur ultimus terminus visibilis, subdistinguo: dum comprehenditur objectum numero ac termino circumscriptum, con. nulla limitatione coarctatum, nego.

PROPOZITIO II. Nulla est creatura sive possibilis, sive futura, sive præterita, sive extans nunc, quæ Dei subterfugiat scientiam.

Prob. 1. ex Scripturis. Eccl. xxi. 29. *Domino enim antequam crearentur, omnia sunt agnita; sic & post perfectum respicit omnia.* In Epist. ad Hebr. iv. 3. *Non est ulla creatura invisibilis in conspectu ejus: omnia autem nuda & aperta sunt oculis ejus.* Huc spectant quæ Prop. 1. Cap. præcedentis commemoravi. II. Ex PP. Clemens Alexandrinus lib. vi. Strom. Deus, inquit, omnia novit non solum, quæ sunt, sed etiam futura, & quemadmodum erit unumquodque, ac particulares motiones providens, &c. S. P. Aug. lib. xii. de Civit. Dei cap. 20. *In una Dei sapientia esse immensos quosdam atque infinitos thesauros rerum intelligibilium, in quibus sunt omnes invisibiles atque incommutabiles rationes rerum etiam visibilium, & mutabilium, &c.* III. Probatur ratione: Deus videt quæ a sua voluntate dependent, quæ ad ipsius quoquo modo spectant efficientiam, quæ in ejus aut arte, aut idea, aut decreto quomodolibet continentur: Nihil fuit unquam, nihil erit, nihil esse potest, quod non pertineat ad vim effectricem Dei, ad ejus artem, voluntatemque: Ergo nihil est quod divinam possit latere scientiam.

Opp. 1. Beatus Hieronymus in 1. Caput Habacuc ait: *Ceterum absurdum est ad hoc Dei deducere majestatem, ut sciat per momenta singula quot nascantur calices, quotve moriantur: quæ civicum, & publicum & muscarum sit in terra multitudo, quanti pisces in aqua natent, & qui de minoribus majorum præda cedere debeant.* Non ergo Deus habet rerum minimarum cognitionem.

Resp. dist. conf. Non habet rerum minimarum cognitionem simplicem, nego: cognitionem providam, subdist. cum amore studioque parti-

particulari conjunctam, qualem habet de nobis conc. universalem, quam postulat singularum creaturarum conditio, nego. D. Hieronymum denegare solam specialem curam, providamque ac solertissimam rerum minimarum inspectionem, qualem Deus habet hominum, quibus & angelorum custodiam deputat, & innumera gratiarum dona largitur, non vero detrahare generalem dispositionem, ac ordinem, ex verbis paret, quæ immediate præcedunt & subsequuntur. Subdit namque: *Non sumus tam fatui adulatorum Dei, ut dum potentiam ejus etiam ad ima detrabimus, in nos ipsos injuriosissimus, eandem rationabilium, quam irrationabilium providentiam esse dicentes.* Atque hæc præmiserat: *Sicut igitur in hominibus etiam per singulos Dei currit providentia; sic in ceteris animalibus generalem quidem dispositionem, & ordinem cursumque rerum intelligere possumus.* Neque Hieronymus aliter sentire potuit, qui Epist. 111. miratur Creatoris solertiam in minutis quoque animalibus formicæ, calicæ, vermiculis, & istiusmodi generis, quorum magis scimus corpora, quam nomina.

Opp. 2. Futuram rerum cognitio dicitur præscientia: In Deo nulla præscientia est, ut docet S. P. Augustinus in lib. II. quæst. ad Simplicianum q. 2., Greg. Magn. lib. XX. Moralium cap. 23. alique apud Petavium lib. IV. Theol. Dogm. cap. VI. Ergo in Deo nulla est rerum futurarum cognitio.

Resp. dist. minorem: In Deo non est præscientia, quæ rerum accessione perficitur, & qua objecta his innotescunt, & prænoscendo antequam sint, & cognoscendo cum jam sunt, conc. In Deo non est præscientia, qua immutabiliter omnia, quasi nunc gerantur, in sua simplici cognitione considerat, nego minorem. *Nam & confiteri esse Deum, & negare præscium futurorum apertissima insania est,* inquit S. P. Aug. in v. de Civit. Dei cap. 9.

Opp. 3. Paritur cognitio a potentia & objecto: Igitur si Deus cognoscat creaturas, istæ erunt causa divinæ scientiæ.

Resp. dist. ant. Paritur cognitio ex objecto, tanquam termino, conc. tanquam vi effectrice, nego.

PROPOSITIO III. Neque latent divinam scientiam futura quælibet contingentia & conditionata.

Futura contingentia ea sunt, quæ certam non habent & imperturbatam connexionem cum causis, sed vel libere pendent ab hominum voluntate, ut peccata; vel extra ordinem rerum eveniunt, ut monstra & ostenta. Conditionata vero sunt, quæ non erunt reapse, essent tamen, si certa poneretur conditio, ut Tyriorum pœnitentia, si Christi vidisset miracula: vel reipsa erunt certa conditione posita, ut negatio Petri si ab ancilla tentabitur.

Probatur assertum de futuris contingentibus contra Crellium, Wolzogenium, aliosque Socinianos, 1. Scripturarum oraculo. *Quæ*
finxit

fixit sigillatim corda eorum, qui intelligit omnia opera eorum, legitur in Pl. xxxi. 15. Signa & monstra scit antequam fiant & eventus temporum & seculorum, Sap. vii. 8. Isaiæ 48. 8. Scio quia pravaricant pravaricaberis. Et cap. xli. 23. Annuntiaste quæ ventura sunt in futurum, & sciemus quia Dii estis vos. ii. Probatur ex PP. Augustinus lib. v. de Civit. Dei cap. 9. & 10. ubi Ciceronem Dei præscientiam negantem refellit, inter plurima hæc habet: Deo certus est omnium ordo causarum &c. Origenes apud Euseb. in iii. de Prep. Evangelica: Quid quid aliquando futurum est, id Deum multo ante futurum prænovisse; ut scriptura abesses auctoritas, vel ipsamet ex Dei notione is profecto deum intelligat, qui probe vim illam & excellentiam divinæ mentis intelligit. Cyrillus Alex. lib. iv. in Isaiam, Deo natura convenit omnem habere & jam præteritorum & futurorum notitiam &c. iii. Probatur ratione; ac primum Deus non semel huiusmodi futura prædixit, ut regnorum everfionem, Messie adventum, vocationem Gentium, infidelitatem Judæorum, templi abominationem, & his longe plura: Ergo prænoverat; atque ut scribit Tertullianus lib. 2. contra Marcionem cap. v. divinæ præscientiæ tantos habemus testes, quantos ipse fecit Prophetas. Rursus sapientissimus artifex optime noscit quidquid elaboratis a se operibus potest contingere: Deus omnia in sapientia constituit: Novit ergo, ut scribit Ambros. lib. v. de Fide, suorum operum virtutem, causam, efficientiam, & quidquid potest inde prodire. Huc spectant argumenta, quæ petuntur ex idea comprehensionis, & omnia superiorum Propositionum.

De futuris, quæ talia sunt, si certa ponatur conditio, exhibet nobis argumenta Dei verbum lib. Sap. cap. iv. 11. *Raptus est ne malitia mutaret intellectum ejus, aut ne scilicet deciperet animam illius.* Præcivit ergo Deus quosdam, quos ex hac vita immatura morte subtrahit, crimina, si diutius viverent, patraturos. Legimus quoque i. Regum cap. xxi. 11. ii. Davidi dum consuleret Dominum *Si tradens me viri Ceila in manus ejus, idest Saul, respondisse Dominum, Tradent.* Pervulgata est etiam prædictio futuræ poenitentiae Tyrionum & Sydoniorum, si Christi opera ac virtutes vidissent, Matth. xi. 21. *Va tibi Corozain, va tibi Bethsaida, quia si in Tyro & Sidone factæ essent virtutes quæ factæ sunt in vobis, olim in cilicio & cinere poenitentiam egissent.*

Multa sunt Augustini loca contra Pelagianos disputantis, quæ egregie hanc veritatem confirmant, veluti in lib. De dono perseverantiæ cap. xi. *His quos prævidit, si apud eos factæ essent, suis miraculis credituros, quibus noluit subvenire, non subvenisse: de quibus in sua prædestinatione occulte quidem, sed aliter judicavit.* Et lib. de Corrupt. & Gratia cap. vi. 11. *Respondeant si possunt, cur illos Deus cum fideliter & pie viverent, non tunc de vitæ hujus periculis rapuit, ne-*

ma-

malitia mutaret intellectum eorum, & ne scilicet deciperet animam eorum? Utrum hoc in potestate non habuit, an eorum mala futura nesciret? nempe nihil horum nisi perversissime atque insanissime dicitur. Idem docet Prosper in Responsione viii. ad Excerpta Genuesium, Cyrillus lib. iiii. contra Julianum, Gregorius Magnus lib. xxxiii. Moral. cap. 17. nunc 19. Bernardus serm. de Innocentibus, Chrysostomus lib. i. ad Stagirium, Gregorius Nyssenus orat. de Infantibus, qui morte rapiuntur acerba, Magnus Leo serm. xvi. de Pass. cap. 2. Ratramnus Monachus lib. 2. de Prædestinat., & alii unanimiter.

Quædam circa divinarum prædictionum veracitatem, quæ a Socinianis obijciuntur vide lib. ii. cap. vii. Proposit. unica. Præter ea rursus oppones. Futura libera quæ ab hominibus pendent arbitrio quamfrequenter Deus cum dubitatione prænunciat, ut Jeremia xxvi. 3. *Si forte audiant, & convertantur unusquisque a via sua mala.* Ezech. ii. 5. *Si forte vel ipsi audiant, & si forte quiescant.* Joel ii. 14. *Quis scit, si convertatur & ignoscat:* Matth. xxi. 37. *Verebuntur filium meum.* Joan. viii. 19. *Si me sciretis, forsitan & Patrem meum sciretis, &c.*

Resp. hæc & similia humano more dicta esse, scilicet ut homines loqui solent monita, doctrinamque adhibentes, atque ad probandum liberum hominis arbitrium: unde Hieronymus in locum cit. Matth. Nostro, inquit, loquitur affectu, ut liberum homini servetur arbitrium. Et in Ezech. Loquitur autem hæc Deus ambigentis affectu. Adverte, quandoquidem iste incidit sermo, adverbium dubitandi non semper importare incertitudinem. Ostendunt aliquando sollicitudinem, & spem erigunt, ut Exodi xxxi. 30. Moyses, qui tamen firmissime volebat orare pro populo, ait: *Ascendam ad Dominum, si quomodo quivero eum deprecari pro scelere vestro.* Et hoc sensu ait Deus per Joëlem: *Quis scit si convertatur, & ignoscat?* Quandoque expletivæ particulae sunt, quasi utique, sane, præsertim ubi in Græco respondet cum aoristo indicativi *ἔστι*, *ἔστι*, ut docet Priscianus: quod locum habet Joannis viii. 19. quorum verborum sensus est: *Si me sciretis, atque Patrem meum sciretis*, ut adnotavit Salmeron tom. i. pag. 320. Sæpenumero non dubitationem, sed rei difficultatem designant, ut Paulus ad Philip. iii. 15. *Si quo modo occurram ad resurrectionem.* Nam numquam de mortuorum resurrectione Paulus dubitavit. Hæc tamen valent potissimum ex parte Dei, sive ejus certissima revelatione supposita: & recte Augustinus tract. xxxvii. in Joannem: *Dubitationis, inquit, verbum est, quando dicitur ab homine, ideo dubitante quia nesciente: cum vero dicitur a Deo verbum dubitationis, cum Deum nihil lateat, illa dubitatione arguitur infidelitas, non opinatur divinitas.*

Opp. 2. Quæ contingenter futura sunt determinatam veritatem non habent: Nequeunt ergo a Deo prævideri.

Resp.

Resp. dist. ant. Veritatem non habent determinatam in mente Dei, in qua immutabili æternitate consistunt quæcunque in tempore mutabili contingentia prætereunt, nego: in secundis causis mutabilibus subdistinguo, pro futuro tempore, quo dubio procul aut evenient, aut non, nego; pro tempore præfenti, quo apud homines futurorum ignaros manent suspensa, concedo. Contingentia esse determinata, ut inquirunt, in *actu signato*, sive pro tempore, quo eveniunt, demonstrant argumentis pluribus Dialectici. Nolo ea repetere. Alterum addo apertissimum. *Nullum arbitror esse dicturum, quod quæ nunc fiunt, antequam fierent eventura non fuerint*; inquit lib. v. de Consolatione Boetius. Quæcunque autem nunc fiunt, nunc determinate sunt vera. Atqui plura fiunt nunc contingenter, ita ut potuerint non fieri: Ergo antequam fierent, & quando contingentia futura erant, habebant determinatam veritatem in *actu signato*, & pro tempore præfenti, quo jam actu sunt. Vide nostrum Ariminensem Dist. xxxviii. Quest. 1. art. 2. concl. 1. & Quest. 2. art. 1.

Infites. Non alia ratione probant Dialectici futuris contingentibus determinatam veritatem inesse, nisi disjunctive, scilicet demonstrando quod vel non erunt, vel erunt, cum necesse sit ex duabus propositionibus contradictorie oppositis unam esse veram, alteram falsam. Ergo, inquit antiquus Theologus Aureolus, cognosci possunt a Deo futura contingentia tantummodo disjunctive; nempe id tantum noscitur Deus, quod vel erunt, vel non erunt.

Resp. Ratiocinari Dialecticos de veritate quatenus apprehenditur a mente creata, quam latet nexus causarum, ac temporum fluctuatio; non ut percipitur a mente divina minime obnoxia falsitati, & certos rerum eventus firmiter intuente. Alioquin erit nullum inter Dei, hominumque scientiam discrimen; ut bene ac sapienter in v. de Consol. Prof. 111. Boetius: *Quæ est hæc præscientia, quæ nihil certum, nihil stabile comprehendis? Aut quid hoc refert vaticinio illo ridiculo Tiresiæ? Quidquid dicam, aut erit, aut non. Quid etiam divina providentia humana opinione præstiterit, si, uti homines, incerta judicat quorum est incertus eventus?*

Opp. 3. S. P. Augustinus, Prosper, & Fulgentius scientiam conditionatorum rejiciunt.

Resp. dist. ant. Rejiciunt in sententia Pelagianorum, qui electionem Dei commentitiis meritis subiciebant asserentes homines prædestinari ex præscientia bonorum operum naturæ viribus, non gratiæ auxilio perficiendorum, & in sensu Semipelagianorum, qui affirmabant ex duobus parvulis unum non alterum consequi gratiam baptismatis, quod præficeret Deus illum non istum, si vixissent, fore sibi obtemperaturum; concedo: Rejiciunt hi Patres scientiam conditionatorum in sententia Catholica, quæ docet præscire Deum futura conditionata, si certa po-

To.I.

P p

natur

natur conditio, quam nos in operibus naturalibus liberis contendimus esse determinationem voluntatis sese ad agendum applicantis, & in supernaturalibus auxilium divinæ gratiæ; nego antecedens.

PROPOSITIO IV. Deus intimas cujusque creaturæ rationalis scrutatur cogitationes, & quæcunque peccata.

Sequitur ex enucleatis hucusque; & hæc possunt addi: Ps. LXV. 11. 6. *Deus tu scis insipientiam meam, & delicta mea a te non sunt abscondita.* Et CXXXV. 11. 3. *Intellexisti cogitationes meas de longe.* Job. xxx. 4. *Nonne ipse considerat vias meas, & cunctos gressus meos dinumerat?* Jerem. xvi. 1. 10. *Ego Dominus scrutans cor, & probans renes, &c.* Vide & Ephrem Syrum Tractatu de vita spirituali, Ambrosium lib. 1. de Off. cap. 14. Hilarium in Psalm. 137. Bern. Epist. 42. Prosperum Sent. 379. qui omnes subscribunt Augustino dicenti lib. 111. de lib. arb. cap. 4. *Deus prævidet eos qui propria voluntate peccabunt, &c.* Suffragatur & ratio: nam cordium cogitationes vel ad bonum sunt, vel ad malum: si ad bonum, ab ipso Deo præmovente efficiuntur; si ad malum, permittuntur, sinente Deo ut mutabilis creatura sponte ab incommutabili bonitate desceat: At novit Deus quidquid misericorditer operatur, providoque consilio permittit: Ergo, &c.

Opp. 1. Habacuc 1. 13. legitur: *Mundi sunt oculi tui ne videant malum, & respicere ad iniquitatem non poteris.* Et Matth. xxv. 12. factis vinejaribus respondetur a sponso: *Amen dico vobis, nescio vos.* Igitur reprobi eorumque mala opera a Deo minime cognoscuntur.

Resp. diff. conf. Mala reproborum opera non cognoscuntur a Deo scientia practica, & approbationis, concedo: Scientia simplici, & speculativa, nego. Prophetam Habacuc de priori scientia loqui satis constat; miratur enim cur Deus patiatur Chaldaeos tanta perpetrare flagitia, & victorias suis idolis referre. Addit propterea: *Quare respicis super iniqua agentes, & taces devorante impio justiore se?* id est, cur pateris, cur hæc permittis? Legebatur ante Sixtinam correctionem: *Quare non respicis?* & idem sensus est, scilicet, quare non punis, non vindicas? In Evangelio pariter ea verba, *nescio vos*, æquivalent his, *vos pro meis non habeo.* Frequens est in sacris Bibliis hæc phrasis, & scientia approbationis designatur Psalm. 1. 6. *Novit Dominus viam justorum.* 2. ad Timoth. 11. 19. *Cognovit Dominus qui sunt ejus,* & alibi, Hebræorum more, qui hac significatione usurpant verbum וָיָד, *novit.*

Infurges. Genes. xx. 11. 12. ait Dominus ad Abraham: *Nunc cognovi quod times Deum.* Ergo ante immolationem Isaac de ejus fide & obedientia anceps erat.

Resp. nego conseq. Sensus enim prædictorum verborum est, nunc experimento comprobatum feci quod Deum timeas. Primo quoniam consueta est phrasis hæc in Scripturis, ut Jeremiæ xxiv. 5. *Si cognoscam*

scam transmigrationem Juda, quam emisit de loco isto in terram Chaldeorum, in bonum. Deinde quia antea Gen. xvi 11. 19. dixerat Deus se optime Abrahami probitatem novisse. Demum, quia ita hunc locum intelligunt S. P. Augustinus lib. 1. de Trinit. cap. 12. & lib. lxxxiii. quæst. Q. lx. Ambrosius lib. v. de Fide ad Gratianum cap. vii. & viii. Hilarius lib. ix. de Trinitate, alique plurimi, qui nobis in obscurioribus Scripturæ locis facem præferunt.

Opp. 2. Peccata nihil sunt; ergo omni carent cognoscibilitate.

Resp. dist. consequens, carent cognoscibilitate intrinseca, quæ cognoscantur tanquam aliquid positivum a causa efficiente productum; conc. carent cognoscibilitate extrinseca, quæ videantur tanquam aliquid privativum in causa a veritate ac bonitate deficiente, nego. Diximus lib. 1. cap. viii. Prop. 2. disputantes adversus Manichæos malum non esse substantiam aliquam, sed secundæ causæ a recta ratione deficientiam. Quare ut malum cognoscatur, sufficit si videatur causa secunda a justitiæ tramite, & regula veritatis deficiente. Vide quæ illic differuimus, & clarissimum Aegidium in 1. dist. 36. quæst. 1v.

Eadem ratione cognoscuntur a Deo impossibilia, idola mentis, quæ dicimus *entia rationis*, & privationes quæcumque. De his Scripturæ de Divinis nominibus cap. 2. ait dignosci formis oppositis, ut per ideam lucis notescunt tenebræ: quod Scholæ dicunt cognosci *indirecte & oblique*. Nolumus hic quæstionem miscere, quo in medio hæc omnia videantur a Deo. Jam cuncta ab illo cerni liquido comperimus, & cum Boetio lib. v. Metro 11. fidelissime profitemur:

Uno mentis cernit in actu

Quæ sint, quæ fuerint, veniantque.

Quem, quia respicit omnia solus,

Verum possis dicere Solem.

C A P U T III.

Num Dei præscientia cum animorum libertate consistat.

TERRIMA ex opinione Democriti portenta errorum exorta, norunt quotquot veterum scita legerunt. Cum enim ille censeret a causis antecedentibus pendere omnia, & tali colligatione conserte fieri, ut nec quidquam esset penes nos, & cuncta necessitate contingerent; jecit femina inevitabilis dispositionis & fati, quod vertente quarto sæculo in siderum impulsu statuit Priscillianus Hispanus genere, & Manichæorum & Gnosticorum dogmate imbutus. Ex quo fonte Joannes Us, & qui post illum ausi sunt inficiari libertatem arbitrii, quod

everti putant ex certa supernarum caussarum ratione, p̄us venenumque biberunt. Ubi de antiquis Philosophorum placitis, p̄sertim Hæracliti & Democriti differuit ornatissime Marcus Cicero in lib. de Divinatione & de Fato; ne fatalem illorum fateretur necessitatem, satius esse existimavit si superiorum caussarum diathesin, divinamque p̄scientiam negaret. Atque ita, *ut homines faceret liberos*, inquit S. P. lib. v. de Civit. Dei cap. 9., *fecit sacrilegos*, idest incaute subtulit summi Dei cognitionem & cultum: quandoquidem non est Deus, qui universorum ordinem non comprehendit. Jam vero vindicata nuper Scientiæ Dei plenitudine, rejicienda est Gnosticorum & Hussitarum mala consecutio, quod ex p̄scientia confurgat contingentium necessitas, & interitus libertatis.

PROPOSITIO: Ex divina p̄scientia non consequitur inevitabilis contingentium eventus.

Dogma istud Fidei probatur 1. In Dei scientia nihil est p̄teritum; vel futurum, sed sola incommutabilis æternitas, in qua nihil mutatur, nihil succedit; est autem successio quælibet & mutatio in rebus temporalibus & creatis. Quare Deus unico & indivisibili intuitu videt p̄terita futura ac p̄sëntia, neque illi est aliquid futurum aut p̄teritum, sed p̄sëntia sunt omnia, ut videbimus cap. sequenti. Atqui scientia qua cognoscitur aliquid p̄sëns, sive p̄teritum nullam infert rebus necessitatem: Ergo nullam necessitatem infert P̄scientia, qua Deus cognoscit futura. Hoc argumento utitur S. Anselmus in libro de Concordia P̄scientiæ Dei cum libertate, Boetius lib. v. de Consolat. Prosa 4. & S. P. Augustinus lib. 111. de lib. arbitrio cap. 4.

Secundo: Si p̄scientia tolleretur libertatem, hoc esset quoniam. Deo infallibiliter certus est ordo omnium caussarum: At ex quo Deo infallibiliter certus sit ordo omnium caussarum, non infertur libertatis exitum: Ergo non tollit libertatem Dei p̄scientia. Prob. min. In serie & ordine omnium caussarum sunt causæ libere, & hominum voluntates: Ergo ex quo cognoscat Deus ordinem omnium caussarum, cognoscit quoque multa fieri a caussis liberis & ab hominum voluntate. Argumentum est S. P. Augustini lib. v. de Civit. Dei cap. x.

P̄terea: Deus proculdubio videt quidquid est ipse facturus, & hæc scientia non affert Dei operibus necessitatem; Si enim necessitatem inferret non esset in Deo libertas, forent omnia opera ejus æterna, & nihil operaretur in tempore: Ergo pariter scientia Dei non aufert operum caussarum secundarum indifferentiam. Ita ratiocinatur S. Pater lib. 111. de lib. arbitrio cap. 3.

Rursus: Plura fieri possunt, quæ tamen non fient; Ergo multa fient, quæ possent non fieri; aut saltem id non repugnat. Atqui si non repugnat quod fiant multa, quæ possent non fieri, non repugnat fieri aliquid esse contingentem futurum, id enim quod ita fiet ut possit non fieri,

fieri,

fieri, nihil est aliud quàm futurum contingens : Igitur non repugnat præfieri aliquid futurum, quod tamen possit non fieri. Quod argumentum confirmatur sequenti : Non pugnant invicem hæ duæ enunciationes : *Judas traditurus est Magistrum*, & , *Judas poterit Magistrum non tradere* : Ergo nec repugnantes sunt istæ, *Prævidet Deus Judam traditurum esse Magistrum*, & , *Judas poterit Magistrum non tradere*; & consequenter nec implicat quod Deus prævideat futuram Judæ proditionem, & tamen Judas libere & contingenter tradat Magistrum. Prob. ant. Hæ duæ propositiones, *Judas potest Magistrum tradere*, & , *Judas potest Magistrum non tradere*, sunt ambæ veræ, quoniam sunt, ut loquuntur dialectici, in materia possibili. Istæ vero, *Judas tradet Magistrum*, & , *Judas non tradet*, nequeunt esse simul veræ; est tamen vera una vel altera determinate, cum sint contradictoriæ : Ergo aut veræ erunt istæ duæ, *Judas tradet Magistrum*, & , *Judas potest Magistrum non tradere* : aut hæ, *Judas Magistrum non tradet*, & , *Judas Magistrum tradere potest*. Vide plura hujus generis apud Gregorium Ariminensem Dist. xxxv. 111. Quæst. 11. art. 3. lege & Boetium lib. v. Prosa vi.

Postremo : Constat ex dictis cap. 1. prop. 2. Scientiam Dei esse eandem incommutabilem divinam substantiam, quæ dicitur *præscientia* connotative ad futuros eventus. Quare licet scientia sit Deo necessaria, præscientia tamen potuit non esse : quæ enim relative dicuntur, sublati terminis immutantur, non quidem ratione sui, sed respectu connotatorum : Ergo præscientia, quatenus hoc nomine exprimitur, & dicitur connotative ad futura, est variabilis. Quod autem variabile est nullam inferre valet contingentibus rebus necessitatem. De quo argumento vide Guilelmum Estium Dist. xxxv. libri primi §. 2.

OPPOSITIONES REFELLUNTUR.

Oppon. 1. Si Deus futura prænoscat, evenient omnia infallibiliter & necessario : Ergo aut non prænoscit, aut infertur inevitabilis eorum necessitas. Prob. Antecedens primum auctoritate, deinde ratione : auctoritate quidem, dicente Augustino in 111. de Libero arbitrio cap. 4. & lib. vi. super Genes. cap. 22. *Aliter fieri non potest quod Deus præscivit*. Et Anselmo de Concordia præscientiæ ac libertatis : *Illud quod Deus præscit, necesse est esse futurum*. Ratione autem, quoniam nisi fiat quicquid a Deo præscitum est, fallitur Dei præscientia : Dei præscientia nequaquam falli potest ; Ergo quicquid a Deo est præscitum, illud fit immutabili necessitate.

Resp. cum Gregorio dist. xxxv. 111. quæst. 2. art. 111. Futurum comparari posse & ad causam primam æternam & immutabilem, & ad causas proximas obnoxias mutationi & temporales. Si referatur ad primam

primam æternamque causam, quæ est divina scientia, necessario evenire, si ad causas secundas ac proximas, contingenter. Quam responsionem tradit Boetius lib. v. de Cons. Prosa ult. dicens: *Hæc si ad divinam notitiam referantur, necessaria; si per se considerentur, necessitatis nexibus sunt absoluta*. Similia docet noster Aegidius in 1. Sententiarum dist. xxxviii. quæst. ult. necnon eodem loco S. Thomas. Ex quibus obiter noto, & hos Scholarum Principes ad contradicentes enunciationes solvendas aliquando ad nostram distinctionem connotatorum confugere. Quapropter dist. antecedens: Si Deus futura prævideat, necesse est ut eveniant reapse, connotative ad scientiam Dei, & primam causam immutabilem, concedo: compare ad causas proximas mutabilitate permixtas, nego. Neque vero minimum pugnat eandem rem si ad diversa referatur dici necessariam & contingentem. Atque distinguo eadem ratione consequens postremæ argumentationis. Idem est sensus verborum Augustini & Anselmi. Quum enim hi Patres animadverterent Deum unico simplicissimo intuitu cuncta pervadere, & præscientiam improprie de illo enunciari, cum compare ad æternitatem nihil sit futurum; optime docuerunt fieri non posse, quin eveniant quæ Deus prævidet. Quemadmodum vero si rem præsentem intueamur, necessario ea præsens est, nec tamen causarum suarum deprehenditur libertas; ita de divina scientia ratiocinandum est, cui nil advenit, nisi ratione nostra, & compare ad causas mutabiles. Proinde Augustinus lib. v. de Civit. Dei cap. x. demonstrat non ideo peccare hominem, quia Deus illum peccaturum esse præcivit, sed quia ille, cujus præscientia non fallitur, si homo peccare noluerit, etiam hoc ipse præcivit: & quia in serie omnium causarum etiam voluntates liberas in æternitate comprehendit. Et Anselmus præfato loco vocat hanc *necessitatem sequentem positionem rei*. Quam Theologi e Schola appellant *necessitatem consequentiæ, & in sensu composito*.

Opp. 2. Præscientia Dei est certa, necessaria, immutabilis: At posita Dei præscientia exempli causa peccati futuri, sequitur ex dictis necessitate consequentiæ peccatum: Ergo peccatum consequitur certo, necessario, & immutabiliter. Prob. min. ex vulgatissimo axiomate, *Quod sequitur ex antecedenti necessario, necessarium est*.

Resp. nego maiorem; divina namque scientia, quatenus exprimitur hoc nomine præscientiæ non dicitur absolute, sed connotative, ideoque mutabilis est & contingens, ut supra diximus. Distinguendum est tamen inter certitudinem & necessitatem futurorum eventuum; qui dicuntur certi & infallibiles compare ad scientiam, necessarii relative ad causam secundam & proximam: dicit enim infallibilitas & certitudo relationem ad mentem cognoscentis; quare non repugnat futura esse certa & infallibilia supposita Dei præscientia; quamvis minime sint necessaria si ad causas proximas comparentur. De præfato
axio-

axiomate non una est eruditorum virorum opinio. Archiepiscopus Tra-
nensis in libello de origine hæresis Pelagianæ & Joan. Gonzalez de Grat.
suff. & efficaci art. 3. putant damnatum a Sixto IV. in propositionibus
Petri de Rivo, & ab eo revocatum, proferentes autographum testi-
monium Universitatis Lovanienfis. Negant id permulti, sed haud ve-
reor quin absolute prolatum de quocunque antecedenti necessario sit fal-
sum; præsertim de antecedenti quod necessarium est necessitate acci-
dentali, & ex suppositione, quo pacto necessaria quoque est præscien-
tia. S. Thomas 1. part. quæst. 14. art. 13. respondet argumento *quod*
quando in antecedente ponitur aliquid pertineens ad actum animæ, con-
sequens est accipiendum non secundum esse quod in se est, sed secundum
quod est in anima, unde infert futurum contingens necessarium esse,
prout subest divinæ scientiæ, non quatenus est in se. Quam Angelici
Doctores responsionem pluribus exagitat Ariminenfis, ab eaque rece-
dit Estius quamquam in D. Thomam obsequentissimus. Et quidem in-
fallibilis est consecutio ista: Scit Deus lapidem esse extensum; ergo
lapis extensus est: & in antecedenti ponitur scientia quæ est actus ani-
mæ; nec tamen lapis extensus est secundum esse quod habet in anima.
Quapropter tritissima est via, si negaveris hujus argumenti, Deus præ-
scit Petrum E. G. peccaturum; ergo peccabit, antecedens esse necessa-
rium absolute.

Insurgens: Dei præscientia est æterna, & si comparetur ad futura
est præterita: Quod est æternum ac præteritum, est absolute necessa-
rium: Ergo absolute necessaria est Dei præscientia.

Resp. dist. priorem partem majoris, Dei præscientia est æterna si
referatur ad id quod importat in recto, nempe ad divinam substantiam
omnia prævidentem, concedo: est æterna, idest, æterna sunt quæ
prævidentur, nego. Quotiescunque sermo instituitur de attributis
divinis, quæ comparantur ad extrinseca connotata, nunquam ex æter-
nitate infertur absoluta necessitas. Acterna est creatio si ad divinam
referatur substantiam, & tamen libera: æterna voluntas, & libera:
æterna supernaturalium auxiliorum præparatio, sed libera. Distinguo
& alteram partem minoris. Quod est præteritum, est absolute necessa-
rium, idest necessario positum fuit, nego: scilicet ex suppositione
quod fuerit, jam necessario præterit, concedo. Futurum contingens
quidnam est? quod poterit non esse, ut futurum Petri peccatum.
Quidnam contingens præsens? quod potest non esse, ut præsens Pe-
tri ambulatio. Illud ergo quod ita præteritum est ut potuerit non
esse, erit præteritum quidem, sed contingens. Atqui præscientia, ut
ostendimus potuit non esse: Ergo quamvis dicatur præcristisse, est
nihilominus contingens. *Præscientia Dei*, inquit Estius, *quatenus*
essentia Dei est, & æterna est & necessaria; sed quatenus connotat re-
spectum ad futura, proprie non est æterna, cum sit tantum ens ratio-
nis:

nis: improprie tamen aeterna dicitur, quia ab aeterno fuit Essentia Dei cum hoc rationis respectu ad rem in tempore futuram.

Opp. 3. Dei praescientia est causa futurorum: posita causa consequitur necessario effectus: Ergo posita praescientia necessario evenient futura.

Resp. dist. maj. Dei praescientia est causa futurorum, ut praescientia est, nego: ut idem est ac voluntas, aut providentia, directio & regimen supremi Numinis, subdistinguo, causa necessitatis adstricta legi, nego: plenissima operans libertate, concedo. Porro non omnem praescientiam esse causam rerum, indubitatum mihi videtur: legi enim apud S. Protoparentem in tertio de Libero arbitrio cap. 4. *Sicut tu quaedam quae fecisti meministi; nec tamen quae meministi omnia fecisti: ita Deus omnia quorum ipse auctor est, praescit, nec tamen omnium, quae praescit, ipse auctor est.* Quando ergo Theologi affirmant scientiam Dei esse causam rerum, id de scientia practica debet intelligi, quam priori capite definivi.

Opp. ultimo: Divina praescientia supposita non potest res non evenire: Ergo evenit necessitate.

Resp. dist. ant. Non potest res non evenire necessitate simplici & absoluta, nego: necessitate conditionis & consequentiae, concedo. *Duae sunt necessitates, ait Boetius Prosa ultima, simplex una, veluti quod necesse est omnes homines esse mortales; altera conditionis, ut si aliquem ambulare scias, eum ambulare necesse est. Quod enim quisque movit, id esse aliter ac notum est, nequit. Sed haec conditio minime secum illam simplicem trahit. Hanc enim necessitatem non propria facit natura, sed conditionis adjectio. Nulla enim necessitas cogit incedere voluntarie gradientem, quamvis eum tamen cum graditur incedere necessarium sit. Eodem igitur modo si quid providentia praesens videt, id esse necesse est, tametsi nullam habeat necessitatem. Atqui Deus ea futura, quae ex arbitrii libertate proveniunt, praesentia contuetur. Haec igitur ad intuitum relata divinum, necessariis fuit per conditionem divinae notionis: per se vero considerata ab absoluta naturae suae libertate non desinunt. Salvantur ergo huiusmodi repugnantiae notionis Dei praesentariae, ut diximus priori argumento:*

Nam quod ubique agitur, quod gestum est, quodque gerendum est, Ante oculos Domini puncto subsistit in uno:
inquit Auctor Carminis de Providentia apud Prosperum. Vel respondetur, ut ad primum, futura evenire simul necessitate, & contingenter diversa connotatione.



C A P U T IV.

*De creaturarum omnium in immutabili aeternitate
præsentia.*

PROXIMO sequitur limine perplexa quæstio de sempiterna rerum creaturarum, ut D. Thomas appellat, *præsentialitate*, qua supra futurorum contingentiam eventuum defendere conabamur. Verum tametsi distrahuntur Theologi, etiam qui de nomine beati Thomæ nuncupantur, quorum plerique præsentiam illam physicam esse contendunt, ut Cajetanus, Gonet, & major pars florentissimæ Scholæ; alii objectivam tantum propugnant, ut Silvester, Bancel, Hervæus; arbitror tamen posse dissidium componi si ad rectas animi perceptiones a personantibus *mensurarum* voculis retrahamur. Itaque aliquam rem esse in æternitate multiplicem sensum complectitur. Res dicitur in æternitate consistere, quod interminabilis æternitas omnia simul comprehendat, & quæcunque vario tempore peraguntur, dum sunt immensæ ejus durationi respondeant, veluti omnia ædificia amplissimæ urbis continentur intra mœnia, & singulæ lineæ circuli reducuntur ad centrum. Rursus esse in æternitate ita accipi potest, ut ante omnia sæcula nedum in causâ, verum etiam in se res extiterint, quemadmodum præsentis extant creaturæ: quod forte melius dixeris ab æterno, quàm in æternitate, consistere. Denique dicuntur a D. Thomæ discipulis creaturæ Deo in æternitate præsentis, quoniam existunt quidem in propria ipsarum natura, non comparate ad ipsas, quatenus sunt in aliqua temporis differentia, sed ad æternitatem, in qua nulla temporum successio præterlabitur.

PROPOSITIO I. Primo modo explicato creaturæ omnes sunt in æternitate præsentis.

Auctoritate Sanctorum Patrum, & ratione probatur. Ambrosius lib. 1. de Fide cap. 7. *Deo, inquit, quæ sunt futura præsentia sunt; & ei, cui præcognita sunt omnia, ventura perfectæ sunt, sicut scriptum est: Qui fecit quæ ventura sunt.* S. P. Augustinus in xv. de Trinit. cap. 7. *Quis ergo hominum potest istam sapientiam qua novit Deus omnia; ita ut nec ea quæ dicuntur futura, quasi desint expectentur ut veniant, sed & præterita & futura cum præsentibus sint cuncta præsentia.* Et lib. 2. ad Simplic. probat Dei præscientiam non esse, si proprie loquamur, præscientiam, sed scientiam, quod præscientia non sit nisi scientia futurorum: *Quid autem, ait, futurum est Deo, qui omnia supergreditur tempora?* Et Magnus Gregorius lib. xx. Moralium cap. 23. *Quomodo est præscius dum nulla quæ futura sunt præsciuntur? Scimus quia*
T. I. Q q Deo

Deo futurum nihil est, ante cujus oculos praterita nulla sunt, praesentia non transeunt, futura non veniunt.

Prob. 2. ratione. Hanc dotem habet aeternitas, ut comprehendat simul universa: Si aeternitati non essent omnia praesentia, aeternitas non simul universa comprehenderet: Igitur aeternitati praesentia sunt omnia. Præterea nulla sunt intervallo locorum, quæ non respondeant immensitati. Ergo neque ullæ temporum differentiae, quæ non coexistant aeternitati.

PROPOSITIO II. Nulla creatura cognoscitur a Deo in aeternitate secundo modo, videlicet ut ab æterno consistens.

Fatentur id omnes Theologi, & probatur. Nulla creatura producta est ab æterno: Deus eo modo videt creaturas quo productæ sunt: Ergo Deus nullo modo videt creaturas productas & extra suas causas positas ab æterno.

PROPOSITIO III. Creaturae non videntur ab æterno in propria consistentes natura neque comparate ad aeternitatem, & in *mensura*, ut inquirunt, superiori, neque *mensura* propria, atque relate ad se.

Ostenditur auctoritate Augustini: qui v. de Genes. ad litteram cap. 18. ait: *Quomodo ergo Deo nota erant, quæ non erant? Et rursus quomodo ea faceret, quæ sibi nota non erant? non enim quidquam fecit ignorans. Nota enim fecit, non facta cognovit. Proinde antequam fierent & erant, & non erant. Erant in Dei scientia; non erant in sua natura.* Probatur ratione: Nullo modo creatura existit in sua natura, nisi ponatur extra suas causas: Sed ponitur extra suas causas tantummodo in aliqua temporis differentia: Igitur creatura nullo pacto videtur ab æterno existens in sua natura. Ulterius existere in sua natura, & esse praesens solum in superiori *mensura* aperta est repugnantia: Creaturae in aeternitate praesentes sunt solummodo in *mensura* superiori: Minime ergo sunt praesentes in sua natura. Prob. ma. Existere in superiori tantum *mensura* est existere in arte Conditoris, & in virtute effectrice causarum: At implicat rem aliquam in propria natura consistere, & esse tantum in arte Conditoris & in virtute causarum: Ergo implicat esse in propria natura praesens, & existere solum in superiori *mensura*. Prob. minor; etenim quæ existunt solummodo in arte Conditoris, sunt ipsa vita artificis, & eadem Dei substantia & effectrix omnipotentia, ut demonstrat S. Pater in verba illa Joannis: *Quod factum est, in ipso vita erat. Quæ vero esse habent in propria natura, quamplura vita carent & animæ.* Atqui repugnat carere vita, & esse virtutem ac vitam supremi Artificis: Igitur repugnat creaturam aliquam in propria esse natura, & existere in arte Conditoris tantummodo.



OBJECTA DELUUNTUR.

Opp. 1. Postrema hæc propositio pugnat cum priori. Deus enim omnia intuetur præsentia, & omnia æternitati coexistunt; ergo sunt omnia Deo physice coexistentia ab æterno.

Resp. nego consequentiam; aliud quippe est cernere omnia præsentia, aliud coexistere æternitati, aliud physice præsens esse ab æterno. Videre omnia præsentia est præsentaria notione omnia sive sint, sive non sint, adæquare: unde S. Thomas 1. de Veritate Art. v. ad 10. ait: *Quamvis res non fuerint ab æterno in propria natura, intellectus tamen divinus fuit adequatus rebus in propria natura futuris in tempore, & ideo veram cognitionem habuit ab æterno de rebus etiam in propria natura, quamvis rerum veritates ab æterno non fuerint.* Coexistere æternitati est inter creaturam & æternitatem nullum versari interval- lum; quemadmodum coexistere loco est inter unum & alterum nullum intercipi spatium: quare æternitas quæ ab universis rebus nulla temporis intercapedine sejungitur, vere futuris rebus coexistit, sicuti cuilibet loco divina immensitas. At existere ab æterno in propria natura, est semper in se fuisse etiam extra ideam, artemque omnipotentis Opificis.

Opp. 2. Videre rem præsentem est illam videre, ut est nunc: Si ergo Deus omnia videt in æternitate præsentia, omnia penes Deum in æternitate actu sunt.

Resp. dist. ma. Videre rem præsentem in propria natura concedo: rem præsentem in sempiterna scientia, nego. Vide quæ supra ex Augustino lib. v. de Gen. ad litteram recitavimus. Vel dist. minorem: Deus omnia videt in æternitate præsentia, scilicet videt res omnes ab æterno existere, nego: videt immutabili cognitione, ac præsentaria notitia singulas res, prout in aliqua differentia temporis eventura sunt, concedo. Si quis ex altissima specula videat copias militum servato ordine, accedentes ad arcem, & successivis lineis gradientes, uno conspectu cernit proximiores & remotissimos, quod non contingit exercitum in planitie spectanti. Ergo ne milites omnes jam accesserunt ad mœnia? Ita Deus in prætereunte creaturarum serie tam præsentem, quàm futuras prope suisque oculis proximas intuetur; neque tamen consequitur jam universas ad temporis differentiam, sine qua nequeunt existere, perenni veluti cursu accessisse.

Opp. 3. Divina scientia est immutabilis: Ergo habet semper ob- jecta præsentia.

Resp. dist. antecedens, est immutabilis comparate ad divinam sub- stantiam omnia videntem, concedo: relative ad rem videntem Deo sub- jectam, nego. Juxta doctrinam Aegidii dist. xxxviii. q. 1. art. 2. ne- gatur consequentia; Scientia enim dicitur mutabilis, vel immutabilis a principali objecto, quod in Deo est ars omnipotentis plena omnium

rationum incommutabilium. *Ibi*, inquit S. P. 6. de Genes. ad lit. cap. ultimo, *novit omnia Deus quæ fecit per ipsam, & ideo cum decedant & succedant tempora, non decedit aliquid, vel succedit scientia Dei.* Si quid vero remanet dilucendum, facile ex dictis convellitur.

C A P U T V.

*Deum in suis ideis, & etiam immediate universas
conspicere creaturas.*

SUBJECTUM nunc quatum caput de medio, in quo Deus creaturas intuetur, disquisitionem. Non ambigitur quin cuncta in ideis suis introspiciat; sed quid sint istiusmodi *ideæ*, Theologi inquirunt. At cum plura, quæ huc attinent, priori libro sint expedita, satis est animadvertere idearum nomine nos nequaquam intelligere *formas* rerum abstractas, quales invexit Platoniorum Physiologia, sed *incommutabiles rationes rerum intelligibilium*; ut eas describit in xii. de Civit. Dei cap. 20. Magnus Augustinus. Sunt vero ideæ a Dei sapientia penitus indistinctæ; & multiplices dicuntur sola rerum faciendarum comparatione, veluti plures illæ domus, quæ sunt in una arte ac mente Architecti. Quoniam autem hæc exempla & imagines non exhibent res ut futuras, nisi accedat Artificis propositum & voluntas; ideæ rerum etiam præfinitionem complecti debent, ut ideæ sint non possibilium, sed futurorum. Atque hinc est quod græci Patres *ideas* definiunt *παράδειγμα*, sive exempla, rationesque substantiarum efficientes. Num vero præfinitio ista, ac prædestinatio voluntatis in rebus futuris cujusque generis sit præfinitio voluntatis Dei, an sola effectio creaturarum se libere determinantium, magna dissensio est in sequentibus dirimenda. Quamobrem ideas modo ab his præfinitionibus ratione nostra secernimus, quasi sint imagines divini intellectus, non placita voluntatis; seu formæ intelligibiles possibilium, non futurorum. Inquiritur consequenter, an possibilia, quæ divinarum idearum notione videntur, dici recte valeant in se cognita immediate.

Videre autem objecta in se ipsis potest duplici sensu accipi: quo distincto videtur mihi posse sententias oppositas facile conciliari. S. Thomas Quæst. xii. art. v. ait: *In seipso quidem cognoscitur aliquid, quando cognoscitur per speciem propriam adæquatam ipsi cognoscibili: sicut cum oculus videt hominem per speciem hominis: in alio autem videtur id quod videtur per speciem continentis, sicut cum pars videtur in toto per speciem totius, vel cum homo videtur in speculo per speciem speculi; vel quocunque alio modo contingat aliquid in alio videri.* At Gregorius Ariminensis Dist. xxxv. l. i. Q. i. prope finem ait videri immediate in se

se ipso quidquid videtur nullo vertente medio inter facultatem intellectivam & objectum, quemadmodum videntur in mente rationes intelligibiles & veritates intime affulgentes, & ab oculo interius exarata corporalium rerum imagines.

PROPOSITIO I. Deus videt omnia in se ipso, & in incommutabili rerum intelligibilium ratione.

Certissima est hæc propositio, & probatur ex Augustino dicente lib. xv. de Trinit. cap. 14. *Novit omnia Deus in se ipso*. Confirmatur ratione, nam, ut constat ex dictis, in Dei sapientia sunt infiniti thesauri rerum intelligibilium. Explicatur exemplo; etenim expertus artifex assequitur mente quidquid elaborate potest efficere.

PROPOSITIO II. Non videt Deus creaturas in seipsis priori sensu juxta D. Thomam delibato.

Ita Theologi innumeri, nostrique instituti Aegidius, Argentinas, Gerardus, Paulus Venetus, Brunus, & alii. Probatur: Videre creaturas in seipsis in sensu D. Thomæ est videre per species & imagines creaturarum: Deus non videt creaturas per species & imagines creaturarum: Ergo Deus non videt creaturas in seipsis. Major est D. Thomæ art. v. citato; & minor revocari nequit in dubium, cum Deus omnia videat per essentiam suam, & per immutabiles rationes rerum intelligibilium a se penitus indistinctas. Vide S. Patrem Augustinum in v. 1. de Trinitate cap. x.

PROPOSITIO III. Deus videt creaturas in seipsis immediate in sensu Ariminenfis nuper exposito.

Facillime hac argumentatione suadet; Quotiescunque inter potentiam videntem & objectum nullum intercedit medium distinctum, videtur objectum in se immediate: Inter Deum & creaturas nullum medium distinctum intercedit: Ergo Deus videt creaturas in seipsis immediate. Probatur minor. Si aliquod intercederet distinctum medium, esset illud vel notitia ipsa, vel species: Deus non cognoscit creaturas per notitiam vel speciem a se distinctam, cum in Deo intellectus, notitia, & species sint unum; Ergo, &c.

SOLVUNTUR CONTRARIA ARGUMENTA.

Opp. 1. Nullatenus Deus creaturas in seipsis introspicit: Falsa est igitur postrema propositio. Prob. ant. S. P. Augustinus in iv. de Genes. ad litteram cap. 23. distinguens duplicem cognitionem creaturarum in Verbo, & in seipsis, illam matutinam, hanc vespertinam appellat, unam luci comparat, alteram nocti. *Omnis cognitio, inquit, quæ creaturam quamlibet in seipsa novimus, non immerito nec dici potest*. Similiter lib. xi. de Civit. Dei cap. 7. *Cognitio, inquit, creatura in se ipsa decolorator est, ut ita dicam, quàm cum in Dei sapientia cognoscitur*.

fecit, *velut in arte, qua facta est*. At a Deo omnis notitia decolorata, ac vespertina est removenda.

Resp. Deum condidisse naturam Angelicam participem incommutabilis lucis, in qua sunt rerum omnium quæ temporaliter sunt sempternæ rationes. In hac luce, quam nos ideam anticipatam & ingentam non incongrue appellamus, accidentaliter creaturarum prædicata extantia, loci, aliorumque hujusmodi adjunctorum nequeunt splendescere. Ut ergo Angeli hæc videant, idea illa ingenta exhibens rationes æternas duntaxat universaliter contrahi debuit, & quodammodo determinari a rerum creaturarum existentia & loco factis sibi objectivè præsentibus. Ita ergo positis creaturis extra causam eas in propria natura agnoverunt, accedente modificatione quadam ac determinatione idearum illarum non per corporalem sensationem, qua carent, sed per objecti præsentiam. Deinde Angeli ex creaturis in propria natura inspectis assurgentes in laudem & honorem Creatoris majori claritate eas in luce incommutabili perceperunt, & cognitio facta est matutina. Hæc vero lib. x. cap. viii. & ix. redduntur ex ipso Augustino manifesta. Duplici ergo ex capite cognitio creaturæ in seipsa dicitur ab Augustino decolorata; primo quia accipit determinationem a re creata ac mutabili: deinde quia nondum relata est sancta delectatione in laudem, & amorem Creatoris. Quæ duo in cognitione, qua Deus videt creaturas in seipsis locum non habent; quoniam neque advenit ei cognitio accidentaria per earum præsentiam, neque potest delectari nisi de sua bonitate; ideoque non est in Deo cognitio aliqua decolorata, seu vespertina.

Opp. 2. Idem S. P. Augustinus lib. 83. quæst. 46. ait: *Non enim extra se quidquam intuetur Deus: hoc autem opinari sacrilegum est.*

Resp. dist. ant. Deus non intuetur quidquam extra se, nimirum omnia videt sapientia sua, a qua indistinctæ sunt ideæ rerum intelligibilium, concedo. Nihil intuetur extra se, scilicet non percipit immediate res omnes a se distinctas secundum proprias ipsarum rationes, nego. Platonicæ existimabant rerum ideæ esse formas quasdam abstractas, quibus constitutum arbitrabantur mundum archetypum; ita ut illum extra se productum Deus in creaturarum molitione contempleretur. Merito illos S. Pater redarguit, dicens: *Has autem rationes ubi arbitrandum est esse, nisi in ipsa mente Creatoris? Non enim extra se quidquam positum intuetur, ut secundum id constitueret quod constituebat: nam hoc opinari sacrilegum est. Quod si hæc rerum creandarum creaturarumque rationes in divina mente continentur, neque in divina mente quidquam, nisi æternum, atque incommutabile esse potest; atque hæc rerum rationes principales appellat ideæ Plato: non solum sunt ideæ, sed ipse veræ sunt, quia æternæ sunt, & ejusmodi atque incommutabiles manent, &c.* Ex quibus apparet Augustini verba haud fideliter

deliter ab Adversariis recitari, ac diversum habere sensum, ac ipsi contendant. Hac divinarum idearum incommutabilitate pervia sunt cetera testimonia Augustini quamfrequenter affirmantis Deo semper universa eodem modo innotuisse.

Opp. 3. Quod cognoscitur in se immediate est objectum scientiæ princeps, &, ut vocant, *motivum*: Creaturæ esse nequeunt objectum *motivum* scientiæ Dei: Ergo a Deo creaturæ non cognoscuntur in se immediate.

Resp. dist. majorem: Quod cognoscitur in se immediate est objectum *motivum*, dummodo videatur per speciem propriamque ideam sui, idest per speciem partam ex ipsomet objecto, concedo: Si cognoscatur per speciem, ideamque alienam, nego. Constat responsio ex II. Propositione, atque ex definitione objecti *motivi*, quod est illud, *quod a potentia attingitur ratione sui*. At Deum res creatas intueri per ideas adscititias, & per species creaturarum nemo, qui sit compos sui, unquam dixerit.

Opp. ultimo. Perfec̃te continentur creaturæ in Dei omnipotentia, nec tamen in ea continentur ut sunt in seipsis: Ergo perfect̃e videbuntur in Dei Verbo & essentia, quamvis immediate in seipsis non videantur.

Resp. nego consequentiam. Nam continere est aliquid habere in se: Deus vero cum sit infinitus ac simplex, nequit in se habere res compositas & limitatas; ideoque non potest illas, ut in se sunt, *formaliter* continere. Perfec̃te autem rem cognoscere non est illam in se continere *formaliter*, sed *objective*, idest eam percipere quocunque modo percipi potest. Sum quidem ego corporeus quod in hominis structura contineatur materies: non tamen sum lapis quod aspiciam saxa, quæ non viderem, si & ipse *formaliter* essem lapis. Atque ita continere *formaliter* creaturas repugnat Deo, non repugnat illas undequaque cognoscere. Quod si eadem esset ratio utriusque; Deus, quia nequit habere malitiam, non judicaret peccata; neque spiritualis corporalia videret, aut infinitus finita.

C A P U T VI.

*Non prænocere Deum futura libera naturalis
ordinis in præfinitionibus & decretis
prædeterminantibus.*

D. THOMÆ discipuli prædeterminationis physicæ assertores ac vindices strenuissimi illam in unaquaque caussarum secundarum operatione necessariam esse defendunt. Ab ea pendere putant, ut cuiusque generis

neris effectus ad naturam pertranseant futurorum : talem esse ajunt conditionem causarum secundarum , ut nihil valeant peragere nisi inflexibili Dei præmotione : nullum indifferens posse solis viribus nativis in certum actum prodire ; & tamen creaturarum dependentiam a Deo , earumque libertatem his limitibus contineri . Clamant ex adverso Societatis Jesu Theologi futura omnia talia esse independenter ab istiusmodi præfinitionibus : has primum a Bannes inductas ad implacabile Scholasticorum dissidium : veteribus Theologis fuisse incompetas : ad Jansenianorum & Calvinianorum dogmata accedere ; præstantissimum Conditoris beneficium , arbitrii scilicet libertatem , evertere . Nos librata undequaque absque ullo partium studio veritate a multis annis medium iter arripuimus , quod calcasse comperimus etiam veteres Instituti nostri Magistros . Ergo cum Thomistis efficaces præmotiones propugnamus in operibus supernaturalibus status naturæ lapsæ , quæ efficiuntur ab hominum arbitrio victrice gratia suffulto ; ab operibus naturalibus , & statu naturæ nullo vulneratæ peccato , tanquam minus necessarias rejicimus . Has quæstiones pertractant Theologi in disputationibus de Voluntate ac Providentia Dei ; & revera decreta & præfinitiones attinent ad voluntatem : quare agentes de scientia Dei eas tantummodo explicant , ut divinæ cognitionis medium constituent . Verum visum est singulas , quandoquidem necesse est ut jam telam ordiamur , hoc eodem libro expedire .

Acturis ergo de divina prædeterminatione in operibus naturalibus , præmittendum est neminem nostrum negare præmotionem Dei generalem , qua Deus humanam mentem incessanter illuminat rerum ideas exhibendo , & voluntatem inclinât generatim in bonum ; ut fusc demonstrent Philosophi . Quamobrem exoritur contentio de motione speciali , & ad certum actum spectante , quatenus mens in hujus veritatis judicio sistit , & voluntas flectitur in hujus boni deliberatam electionem . Nam generalem illam motionem nullus inficiabitur , qui animadvertat creaturam nihil habere a seipsa , neque mentem esse causam sui luminis , sui que nisus & propensionis principium . Concursum quoque simultaneum , quo Deus causas a se productas regit conservatque unanimi sensu defendimus . Quare ad solam illam specialem ac prædeterminantem motionem præsens controversia devolvitur .

Secundo præmittendum est Physicam prædeterminationem nequam a nobis rejici ob vocabuli novitatem , ut in eam debacchatur Auctor libri , qui inscribitur : *Calvinismus bestiarum* . Quælibet enim hæresis novas quæstiones , & inusitata vocabula in Ecclesiam inexit , quibus & diligentius veritas custoditur , & falsitas exploditur manifestius . Ita Ephesina Synodus Virginem Mariam nominavit *Theotocon* , & Florentina docet rectissime ad Symbolum Nicænum additam novam particulam , *Filioque* . Insigne quoque habemus exemplum in vobis

Homon-

Homonisi, & *Transubstantiationis*; quarum primam contra Arianos, alteram contra Novatores usus consecravit Ecclesiæ. Non est quidem hujus generis nomen physicæ prædeterminationis, neque Sacrorum Canonum definitione probatum; sed jam in ore omnium versatur, & ubi specialem motionem juxta Augustiniana scita interesse arbitramur, absque profanæ novitatis piaculo illud sæpissime pronuntiabimus.

Abstineat vero ut vel suspicione levissima existimemus Calvinii aut Jansenii notam juste inuri Thomistarum sententiæ. *Quem enim invenient Janseniani inter Thomistas, qui concedat ita necessarium consensum, quem voluntas præbet motioni gratia quamdiu illa inberet, quemadmodum necessarius est amor beatificus quamdiu durat visio? Quem invenient qui dixerit voluntatem divina gratia prædeterminatam carere proxima ad dissentendum potentia?* Ita temperato calamo scribit libro de Libertate incoacta prædeterminationis physicæ impugnator Annatus.

Pariter Scientiæ mediæ defensores, illos nempe, qui defendunt futura libera independentem a decretis prædeterminantibus videri a Deo, nulla possumus censura perstringere. Nam in celebri Congregatione de Auxiliis habita coram Summis Pontificibus Clem.VIII. & Paulo V. causæ acerrime pertractata, nihil Magistra veritatis Ecclesiæ rata est definire, ut possis interim pro lubitu seu Molinæ, seu Thomistarum sententiam in Scholis tenere. Commemoratur quidem decretum Pontificis, quo scientia illa media proscribitur, pictisque tabellis in Historia de auxiliis conspiciuntur ad genua provoluti hinc Prædicatores promulgationem flagitantes, illinc vero supplices Jesuitæ postulantes ne publicetur peremptoria Sedis Apostolicæ definitio. At assertæ istiusmodi Constitutioni nullam omnino fidem esse adhibendam Innoc.X. ann. 1654. die 23. Aprilis publico decreto sancivit, quod revera non fuerit ex præscripto juris promulgata. Vetitum autem a Paulo V., Urbano VIII. & præfato Innoc. ne hanc quæstionem agitantem Adversarios suos diæteris, ac censuris proscindant; quod nedum a nobis postulat Sancta Mater Ecclesiæ, sed etiam mutæ caritatis necessitudo, & amor investigandæ veritatis ingenuus. *Quæ an fervent aut invidiosas Pelagianismi notas, aut nefaria Calvinii placita adversariis objicientes, ipsi viderint.*

Tandem neque illos laudare possumus, qui D. Thomam omnium approbatione clarissimum, tanquam vulgarem Scriptorem contemnunt. Hunc Scholarum principem ducemque reverentur celeberrios Academicæ, Salmanticensis, Duacensis, Lovaniensis, Patavina, aureaque tabula universæ Ecclesiæ lumen præfulgidum, clarissimumque Universalitatis speculum appellat Parisiensis. Præ ceteris Regularium Ordinum Statutis, illius doctrinam approbant quoque Constitutiones nostræ P. V. cap. 2. Ex tanta autem erga D. Thomam existimatione nostra nemo jure a nobis contenderit, ut nunquam ab ipsius placitis recedamus, quod neque Augustino vellem ego concedere, si alicubi errasse

To.I.

Rf

depre-

deprehenderem. At neque Doctorem Anglicum a nobis dissentire in his controversiis dicturi sumus, quod erit magnum reverentiæ nostræ argumentum. Quod si ægre ferant Prædicatores doctissimi; non proinde minor nobis erit sive Thomæ, sive Scholæ, quæ de ejus nomine dicitur, existimatio.

PROPOSITIO I. Deus non prædeterminat actiones liberas naturales; & consequenter neque ea prævidet in efficaci suæ voluntatis præfinitione.

Ita unanimiter recentiores Theologi contra Thomistas, nedum Jesuitæ, sed etiam alii, Tournely, Habert, L' Herminier, Henno, Thomassinus, Witaſſe, &c. Laudant pro se Thomistæ aliqui Claudium Frassen & fideiiores Scotistas. Verum hi præfinitionem a prædeterminatione fecerunt, & ab intrinseca præmotione decretum; ita ut in vocabulo isto *præfinitio*, particula *præ* nullam anteceſſionem causalitatis designet, sed præordinationis & præſcientiæ mediorum ad actum. Ex quo igitur Scotistæ decreta, & præfinitiones fateantur, non conſequitur quod etiam physicam statuunt prædeterminationem. Recte Joannes Gonzales diſert. de Grat. ſuffic. art. 2. *Scoti discipuli*, inquit, *admittunt prædeſinitionem, & negant præmotionem physicam intrinsece receptam in voluntate*. Nostri vero, præſertim Itali, unanimiter hanc propositionem defendunt, Adeodatus Summanticus Episcopus S. Severi, Fulgentius Bellelli Ordinis Exgeneralis, Felix Leoni ExProcurator Generalis, eruditissimi & clarissimi viri ac præceptores mei ſapientiſſimi Benediſtus Gattini Procurator Generalis, Hieronymus Zazzeri Ex-Aſſiſtens Italiæ, & in Romanæ Sapientiæ Archigymnaſio publicus Sacrarum literarum Profeſſor, & Congregationis Sacrorum Rituum Conſultor, Joannes Jacobus ipſius Frater, necnon Silveſter Merani in Urbe Regens, qui omnes de naturæ viribus, & gratia in hoc tantum ſtatu victrice præclara volumina conſcripſerunt: & quos hoc tantum loco honoris cauſſa nominavi. Ex veteribus vero prædeterminationem physicam negant Martinus Albiz, Aegidius a Præſent., Leonardus Coquæus, Petrus de Aragonia, Brunus, Antonilez, Gavar-di, & alii.

Probatur 1. propositio. Futura libera ordinis naturalis minime efficiuntur a Deo eadem efficaciter prædeterminante. Ergo in efficaci præfinitione a Deo non videntur. Conſequentia ſequitur, nos enim præfinitionem ac prædeterminationem Indiscriminatim accipimus de præſato Scotiſtarum diſcrimine minus ſolliciti. Probatur ant. Hanc Dei prædeterminationem propugnant Thomiſtæ vel ad ſalvandam dependentiam cauſſæ ſecundæ a ſuprema, vel ut virtus indifferens creaturarum determinetur ad actum: At neutro ex capite hæc prædeterminationis requiritur. Non ad ſalvandam dependentiam creaturarum a Deo, primum quia ſtat perfectæ hujusmodi dependentia ſi creatura inceſſan-

ter

ter illuminetur a Deo & ab ipso nata sit inclinationem in bonum ; quæ duo constituunt præmotionem generalem ; et si Deus simultaneo concursu creaturam suam regat . Tunc enim sequitur causam secundam, nil penitus operari, nisi adjuvante suprema . Atqui generalis illa præmotio , & conservatio causarum secundarum non sunt physica prædeterminatio , quoniam requiruntur ex parte potentie , non actus , & virtutem perficiunt , non prædeterminant . Salvatur ergo perfectæ creaturarum a Deo dependentia absque physica illa præfinitione . Præterea ita secundæ causæ subordinantur suprema , ut hæc ad earum actus concurrat juxta uniuscujusque exigentiam : Causæ necessariæ , cum ad unum specie effectum sint suapte natura ordinatæ , in illud a Deo necessitate impelluntur : Ergo liberæ , & ad utrumlibet indifferentes versatili tantum indigent præmotione . Rursus essentialis dependentia ita intrinseca est creaturæ , ut quidquid hoc titulo convenit , essentiali conveniat necessitate : Igitur si titulo dependentiæ statuenda sit physica prædefinitio ; essentialiter & ex necessitate erunt prædeterminata quæcunque efficiuntur a creatura . Insuper quod requiritur ratione essentialis dependentiæ requiritur quoque ex parte facultatis & actus primi , quum etiam facultas , & actus primus essentialiter a prima causâ depeudeant : Atqui ex parte actus primi non datur prædeterminatio : Ergo hæc prædeterminatio ratione illa dependentiæ nequaquam requiritur .

Advertas tamen , quod cum dicimus prædeterminationem physicam non exigi ratione essentialis dependentiæ & vix componi posse cum secundarum causarum indifferentia ; non dicimus Dominum universorum non posse creaturam liberam in quocunque statu prædeterminare , si velit . Magis quippe ipse habet in sua potestate voluntates nostras , quam ipsi nostras : & quomodo creaturam rationalem post Adæ culpam efficienter ad opera supernaturalia prædeterminat , sic potuisset prædeterminare innocentem , & potest nunc , si ita ei videatur , ad naturales effectus determinare creaturam quamcunque liberam . Fate-mur quoque , si id Deus efficiat , non consequi necessario libertatis interitum , cum ille intimior nobis intimo nostro non solam voluntatem , sed etiam modum agendi prædefiniret , & contingenter fierent , quemadmodum fiunt dum voluntas libere determinat semetipsam . Quod explicabimus cap. xii. Regula ii.

Sed non arbitramur concedendum esse , hoc quod potest Deus , ita unicuique operi inesse , ut nisi divina accedat prædeterminatio , nequeat creata libertas prodire in actum , eo quod talem habeat a suprema causa dependentiam , ut essentia sua petat ad omnia opera prædefiniri . Hanc dependentiam in hoc sitam esse contendimus , ut creatura moveatur a Deo secundum rationem proprietatis suæ , & indifferenter , si indifferens sit , neque habeat in se contrariam atque ad oppositum tra-

hentem inclinationem, qualis est in ordine ad opera supernaturalium virtutum liberum hominis arbitrium sub pondere, & lucta concupiscentiæ. Quod proximo capite VII. demonstrabitur enucleatius. Verumtamen si ita causa secunda pendeat a prima, ut nihil omnino, nisi ab hac prædeterminetur, valeat perficere, videtur eandem esse conditionem causæ liberæ, ac necessariæ, cujus duntaxat proprietas est esse ad unum essentialiter determinatam. Atque nisi hæc probentur, & qualiscunque prædeterminatio videatur cum indifferentia consistere, ut docent docti viri complures, saltem ex alio capite arbitror esse rejiciendam, quod in operibus naturalis ordinis necessaria non sit, in malis vero etiam noxia.

Quod vero minime sit necessaria, ut causa secunda indifferens prodeat in actum, probatur: Indifferentia quæ ab alia causa exigit determinari, est indifferentia passiva, qualis est materiæ quæ determinatur per formam, & corporis vita expertis, quod ab extrinseco agente movetur. Atqui causarum liberarum indifferentia activa est, non passiva. Ergo causæ liberæ, tametsi indifferentes, nequaquam exigunt ab alia causa determinari.

Probatur 2. Ad infallibilitatem divinæ scientiæ necessaria non est certa futurorum prædestinatio: Ergo frustra ponitur decretum efficax ac prædeterminans, ut Deus certo futura libera præcognoscat. Prob. antec. Stat sine prædestinatione præscientia, dicente Augustino de Prædest. SS. cap. x. *Prædestinatio sine præscientia esse non potest; potest autem esse sine prædestinatione præscientia*. Ergo ad scientiæ certitudinem non requiritur prædestinatio.

Confirmatur: Patres, qui de futurorum contingentium præscientia loquuntur, nullibi, nisi ubi sermo occurrit de operibus salutariibus, divinæ efficientiæ meminerunt; sed ideo cognosci docent, quod Deus unico simplici actu universa comprehendat, omniaque sint ei in æternitate præsentia. Quorum verba protulimus Prop. I. cap. IV. Imo sunt qui diserte asserunt non propterea Deum aliqua prænoscere, quia prædestinata sunt; sed e contra quia futura erant, ideo fuisse præscita, ita ut non præscientia futuris vim inferat, sed futura causa sint præscientiæ: quod potissimum valet de operibus naturalibus, atque de malis culpæ. Si ergo Deo sunt omnia in æternitate præsentia, præsens est & humana voluntas, præsens libera voluntatis determinatio, præsens omnis actus ab ista libera determinatione proficiens. Quare ergo Thomistæ, qui illam physicam præsentiam majori, quàm faciant alii, contentione propugnant, aliud divinæ cognitionis medium existimant necessarium?

Postremo videri a Deo actus liberos ordinis naturalis in ideis rerum, quibus præconcepta est dispositio universi, in qua exhibetur cujusque creaturæ potestas, motus, affectio, & passio omnis intimior; & nul-

& nullam videntis interesse præfinitionem, etiam idoneis demonstratur exemplis. Si enim ferocem equum fræna mordentem, & fessorem minime tolerantem a longe prospiciam; an non appropinquantem præcipitio casurum prænosco? aut si quem evaginato gladio in proximum, furentem videro, nonne occidendum præsentio? Et tamen neque habenas equi moderor, neque iracundum provoco ad necem. Igitur multo magis plura videt Deus absque efficaci præmotione, dum a futuris eventibus nullo temporis intervallo sejungitur, atque volentis & currentis naturam condidit, facultatem conservat, intuetur inclinationem, cordis cogitationes comprehendit.

PROPOSITIO II. Non videtur alienus a præfata assertione Doctor Angelicus.

Principio diximus physicam prædeterminationem necessariam non esse ad salvandam causarum secundarum dependentiam a prima, & hanc sola generali præmotione illas adjuvare, quam præmotionem creata voluntas pro suo lubitu determinet. At hæc videntur consentanea doctrinæ D. Thomæ: qui 1. 2. Q. 1x. art. 6. ad 3. *Deus*, inquit, *movet voluntatem hominis, sicut universalis motor ad universale objectum voluntatis quod est bonum; & sine hac universali motione homo non potest aliquid velle: sed homo per rationem determinat se ad volendum, hoc vel illud, quod est vere bonum, vel apparens bonum. Sed interdum specialiter Deus movet ad aliquid determinate volendum, quod est bonum; sicut in his, quos movet per gratiam.* Docet ergo S. Thomas in operibus naturalibus voluntatem creatam determinare seipsam.

Reponent Thomistæ, Angelicum Præceptorem *motionem universalem* appellare prædeterminationem naturaliter secundis causis applicatam, *motionem vero specialem* esse Gratiam victricem supernaturali beneficentia collatam. At Gratia est quidem specialis motio, & interdum quoque prædeterminans. Verum beatus Thomas huic tantum, speciali motioni tribuit, quod moveat ad aliquid determinate volendum, in motione autem universali asserit tantum hominem per rationem determinare seipsum. Igitur per D. Thomam sola specialis motio, quæ est gratiæ, actum aliquem prædeterminat. Præterea veteres D. Thomæ Commentatores, inter quos Cajetanus, quem sui ceterorum principem esse fatentur, ita hunc locum interpretantur, ut Deus conferat voluntati determinatam volitionem hujus, illiusve boni eo tantum sensu, quod indidit rationali creaturæ inclinationem ad bonum, in qua, veluti conclusio in principiis, continetur omnis determinata voluntas; hanc vero determinare seipsam, quoniam nihil omnino velle potest, nisi habeat a prima causa generalem illam volitionem. *Est hæc volitio*, ait Cajetanus, *est illa, ad quam dictum est oportere voluntatem moveri ab alio, etiam quoad exercitium actus: secundum hanc enim fertur actus in finem, & ex hac vult quidquid vult.* Quapropter,

propter, ut Deus sit prima causa cujusque motionis, sat est, si hæc determinata volitio ex inclinatione ad bonum procedat, absque ulla ætus præfinitione. Rursus S. Thomas Q. 1. de Potentia art. 4. ad 3. ait: *Dicendum, quod licet causa prima maxime influat in effectum; tamen ejus influentia per causam proximam determinatur.* Et Q. cix. 1. 2. art. 1. comparat Dei motionem illi, quam exercent in inferioribus cælestia corpora: quorum universalis motio, ut docet Quæst. 2. de ver. art. 4. ab inferioribus corporibus determinatur.

Secundo diximus non exigi physicam prædeterminationem a causarum secundarum indifferentia, cum ista activa sit, non passiva. Quæ non videntur doctrinæ Sancti Thomæ adversari. Nam ille in 1. contra Gentiles cap. 82. duplicem indifferentiam distinguit: unam quando potentia & virtus indifferens ad utrumlibet *Nondum consecuta est suam perfectionem, per quam ad unum possit determinari*; quam indifferentiam explicat exemplo intellectus dubitantis, qui nondum affectus est principiis, ex quibus ad alterum determinetur: altera est indifferentia ad utrumlibet, cum operans perfectam habet virtutem, sed a neutro dependet; quam indifferentiam declarat comparatione Artificis, qui pro lubitu diversis usitur instrumentis. Porro D. Thomas docet primam indifferentiam esse ab altera causa determinandam; & nequaquam alteram indifferentiam: ex quo infert Deum, tametsi indifferens sit ac liber, non determinari ab alia causa, quoniam habet in se infinitam, plenissimamque virtutem. Atqui per D. Thomam 1. 2. Q. cix. art. 2. habet rationalis creatura per sua naturalia *sufficientiam operativam virtutis* ad plures naturales actus efficiendos, in hoc etiam corruptæ naturæ statu: Non erit ergo necesse, ut hujus virtutis indifferentia ab alia causa determinetur. Deinde Franciscus Ferrariensis Sacri Prædicatorum Ordinis Generalis Magister, & librorum contra Gentes Commentator illustris, hæc in citatum locum proloquitur: *Si aliquid sit indeterminatum per modum materiæ, & potentia passivæ, & sit ad utrumlibet ex parte virtutis, oportet ut tale sit potentia, & ab aliquo extrinseco agente determinetur. Si autem sit indeterminatum per modum agentis liberi, & ad utrumlibet se habentis ex parte ejus ad quod dicitur, oportet tale sit in potentia, nec ab aliquo extrinseco determinari, sed ipsum se ratione suæ libertatis determinare potest.* Quo in loco indeterminatum ex parte virtutis. Non appellat doctissimus Ferrariensis agens liberum & indifferens, sed causam nondum consecutam virtutis suæ perfectionem, atque *indifferentem passivæ*. Id enim & ex productis verbis fit manifestum, & ex collatione eorum, quæ præmissa sunt ex Angelico: tum quod asserat indifferentiam activam, & quæ ad operationem refertur, posse a causa secunda ratione suæ libertatis determinari; ac tandem quod virtute determinata ad unum ex parte potentie non causæ liberæ polleant, sed necessarie.

Dixi-

Diximus tertio Patres, ubi sermo instituitur de futuris contingentibus ordinis naturalis, nunquam asserere quod prævideantur a Deo in decretis prædeterminantibus, sed prænosci vi simplicissimi contuitus, quo & voluntates & earum determinationes, & opera nullo temporis intervallo a se separata dignoscit, quemadmodum videmus hominem voluntarie incedentem. Et similia docet Angelicus: qui 1. P. Q. XIV. art. XII. demonstrat effectum contingentem non posse certo præsciri in sua causa, sed tantum conjecturaliter. Deum vero ideo illum cognoscere in sua causa, & prout est actu in seipso, quoniam Dei æternitas tota simul existens ambit totum tempus, & Dei intuitus fertur ab æterno super omnia, pro ut sunt ei præsentia. Quoniam autem Thomistæ hunc locum judicant pro sua prædeterminatione invictissimum; præstat illum exscribere. Ergo ait S. Thomas: *Et licet contingentia fiant in actu successive, non tamen Deus successive cognoscit contingentia, prout sunt in suo esse, sed simul: quia sua cognitio mensuratur æternitate, sicut etiam suum esse. Æternitas autem tota simul existens ambit totum tempus, ut supra dictum est. Unde omnia, quæ sunt in tempore, sunt Deo ab æterno præsentia, non solum ea ratione, quæ habet rationes rerum apud se præsentis, ut quidam dicunt: sed quia ejus intuitus fertur ab æterno super omnia prout sunt in sua præsentia. Ubi animadvertunt Thomistæ, & omnium novissimus tempore, primus autem eruditione ac sapientia Cardinalis Gotti Quæst. v. de scientia Dei Dub. 1. §. III. num. XII. D. Thomam præter modum cognoscendi futura ratione præsentialem physicam in æternitate, supponere alium modum certo ea cognoscendi, ut *objective præsentia* in ideis, non absolute sumptis, se adjuncto decreto de illis producendis. At non audio in verbis Thomæ decretum istiusmodi. Plana est profecto loci hujus interpretatio: Deo ratione æternitatis omnia sunt præsentia, non solum rationes rerum & ideæ, sed etiam voluntates creatæ, earumque liberæ determinationes: videt proinde contingentia tam in rationibus illis, quàm in seipsis; ut nos præcedenti diximus propositione. Atque hæc adeo vera sunt, ut ubicunque de futuris contingentibus occurrit sermo, nullibi decreta prædeterminantia commemoret, sed solam eorum præsentiam. Loca sunt insigniora 1. P. Q. LVII. art. III. & Q. LXXXVI. art. 4. quæ studiosi poterunt seipsis expendere.*

Triplex ergo via aperitur conciliandi textus Doctoris Angelici, in quibus asserit Deum futura cognoscere, quia ipse illorum est prima causa. Primo quia omnes causæ secundæ sese movent virtute universalis motionis, in qua Deus prænosci liberam earum determinationem, non quod hæc sit a prima causa efficaciter præmovente, sed quia nulla creatura determinat seipsam, nisi vi generalis motionis. Deinde quia interdum causas secundas prædeterminat, etiam liberæ, ac præsertim ad actus supernaturales hujusce status. Demum, quia
ut vi-

ut videantur contingentia in causâ, nulla alia determinatio requiritur præterquam causâ proximâ, si videnti nihil sit futurum; ut in incommutabili æternitate contingit.

AD ARGUMENTA, QUÆ IN CONTRARIUM OBJICIUNTUR.

Contra prædicta arguitur 1. Videtur hæc nostra assertio adversari Augustino, imo, quod caput est, sacris literis. Etenim S. P. lib. de Prædest. SS. cap. x. *Prædestinatione*, inquit, *Deus ea præscivit quæ fuerat ipse facturus*. At Deus omnia operatur in nobis, ut passim legitur in sacris literis. Omnia ergo novit Deus *Prædestinatione*, & in efficaci decreto. Accedit quod Augustinus lib. xxvi. contra Faustum affirmat illud esse sine dubio futurum, *Quod Deus vult*. Itaque absque divinæ voluntatis præfinitione nequit prænosci futurum. Rursus S. P. in lib. de Corrept. & gratia cap. xiv. ait: *Deus magis habet in potestate voluntates hominum, quàm ipsi nostras*. Quare si nos actus nostros liberos determinamus, potest eos prædefinire etiam Deus. Ulterius quod Israelitæ Saulem ac Davidem constituerint sibi reges, fuit naturalis actus in eorum positus voluntate; & tamen S. P. eodem loco asserit Deum Israelitarum corda inclinasse *Omnipotentissima sua potestate*. Tradidit ergo Augustinus etiam actus liberos naturales a Deo efficaciter prædefiniri.

Resp. nego ant. Et ad primum Augustini testimonium, dico utique videri a Deo in sua prædestinatione quæ ipse Deus operatur; sed quædam tamen præsciri, quæ ipse non facit. Nam ait ibidem S. Pater: *Potest autem esse sine prædestinatione præscientia*. Ergo quæ speciali indigent præmotione, prædestinantur, & in prædestinatione noscuntur. At quæ egent sola præmotione generali, non alia ratione prædestinantur, nisi prout fiunt: decernit scilicet Deus aptare causas tam necessarias, quàm liberas, & singulis vim, ac potestatem impertiri, illis determinatam, istis ad utrumlibet inclinabilem. Atque ea ratione Deus operatur omnia in nobis, quoniam necessariæ causæ determinantur ad unum, liberæ se determinant virtute sibi a supremo Conditor collata, omnesque ab auctore suo producantur, perficiuntur, reguntur. Quod scribit magnus Augustinus contra Faustum indubitatum est: at non omnis voluntas Dei est efficax & prædeterminans. Interdum a Deo prædeterminari actus naturales, si ei videatur expedire, ut de Israelitis asserit S. Doctor, fatentur nostri, & disertè sapientissimus P. Magister Bellelli in priori Opere, quod inscribitur *Mens Augustini*, P. 2. cap. xxvii. negant tantum physicam prædeterminationem in omnibus futuris indiscriminatim, & ex capite essentialis dependentiæ: aliud est enim quod Deus tanquam supremus Dominus possit salva quoque libertate prædeterminare causam secundam; aliud causam secundam ita.

Deo

Deo subijci, & ab eo dependere, ut nequeat prodire in actum, nisi prædeterminetur. Quomodo autem consistat libertas cum prædeterminatione explicabimus, Deo dante, in sequentibus. Verum respondere, quoque possumus, Deum *Omnipotentissimam potestate* inclinasse corda Israelitarum, non ut subderent se Regibus, quod poterant ex libertate, ac nativa virtute; sed ut subderent se cum bona voluntate & cum merito. *Non enim*, inquit ibi eximius Ecclesiæ Doctor, *non ex animo, aut non ex bona voluntate fecerunt, quod fecerunt corde pacifico.* Et nos quidem ad bonam voluntatem, ac meritum post Adæ culpam, esse necessariam prædeterminationem contendimus.

Opp. 2. Deus est cujusque effectus creati prima causa: Sed non, est causa nisi per efficacem prævisionem: Ergo evenit efficaci divina prævisione quicunque effectus. Confirmatur hæc, quam Thomistæ palmarem putant, argumentatio. Principio exigit ratio primæ causæ, ut sit primum movens: Ergo & illud jure suo petit, ut sit primum determinans. Deinde sine præmotione prædeterminante non salvatur perfectissima dependentia causarum secundarum a prima; hæc enim debet esse major, & perfectior quam possit excogitari. Magis autem ab alio dependet quod ab eo necessario prædeterminatur, quam id, quod versatili agitur universalique motione. Tertio postulat supremum dominium Dei, ut specialem in creaturis suis potestatem exerceat; Ergo supremi domini titulo debet Deus prædeterminare creaturas suas. Rursus si præmotio Dei universalis determinetur a voluntate, voluntas erit prima causa determinationis comparate ad motionem divinam; quod valde videtur absurdum: Ergo causa secunda & proxima minime determinat universalem Dei præmotionem. Postremo causæ secundæ sunt universalis ac primæ instrumenta: Instrumenta a primario agente prædeterminantur: Ergo causæ secundæ prædeterminantur a prima & universali.

Resp. nego minorem. Salvatur enim, ut diximus, absque physica prædeterminatione, in Deo ratio supremæ causæ, & quia ipse contulit causis liberis facultatem, easque dominas constituit operationum suarum: & quia eas præmovet generaliter, incessanter illuminando, & inclinationem in bonum illis inspirando; quod etiam eas regat, servet, & simultaneo concursu ipsis individuus auxiliator afflatur. Hac ratione semper Deus est prima causa, quamvis liberos actus causarum secundarum non prædefiniat: Ad primam confirmationem dico, in nostra quoque sententia Deum esse primum prædeterminantem, cum ille voluntatem creatam antecederet ad qualemcunque motionem ipsius determinet ad bonum in communi; & virtute hujus prædeterminationis rationalis creatura plenam facultatem, potestatemque recipiens facta domina suorum actuum semetipsam ad bonum in particulari determinet.

Ad alteram confirmationem dico in eo sitam esse perfectissimam secundarum causarum dependentiam, ut prodire nequeant in actum, nisi a causa suprema existentiam, regimen, atque facultatem recipiant. Habet autem hæc dependentia quamdam extensionem & amplitudinem. Causæ enim necessariæ ita dependent a prima, ut expertes sint indifferentiæ, neque valcant Deo præmovente contrahiti. At liberæ ita Deo subduntur, ut accepta virtute adhuc indifferentes sint ad utrumlibet. Quæ libertas nullatenus dependentiæ adversatur; ea namque & voluntate Conditoris donatæ sunt, & possent pro ejus arbitratu expoliari. Quamobrem constituta hac causarum secundarum diversitate, si quæ liberæ factæ sunt egent sola universali motione, nullum inferitur supremo dominio Dei præjudicium, sed in ea libertate commendatur consilium, placitum, & liberalitas Auctoris. Alioqui si omnes res creatæ eodem pacto subditæ fiant universorum Motori, erunt omnes necessariæ, nec resistere poterunt præmoventi: nam hæc est major dependentia, quàm si derelinquantur a Deo in manu consilii sui. Sed horrent Christianæ aures hanc Calvinianam blasphemiam.

Quod ajunt causas secundas in nostra sententia determinare concursus Dei, perinde est ac si dicant voluntatem creatam uti vel abuti pro sua libertate concursu Dei, qui illius non prædeterminat indifferentiam. Ex quo nihil Deo indignum consequitur. Etenim non reddit creatura efficacem Dei concursus, sed ipsa virtute concursus Dei propriam exercet efficientiam, exeritque vires suas in opus, non in Dei præmotionem. Manifesta hæc sunt ex conditione supernaturalium habituum, qui non sunt ad actus determinati; & si eis voluntas utitur, recipit, non dat eis efficiendi virtutem. Falsum quoque est determinationem creaturarum esse divina determinatione priorem; nam efficitur opus ab utraque indivisum; & alias creatura determinat sese virtute præmotionis divinæ: quod satis arbitror repetitum.

In postrema confirmatione non opus est morari diutius. Nam aliud est instrumentum inanime & vita carens, aliud vitale, activum, & dominio ac libertate donatum. Hujus generis sunt creaturæ rationales respectu Dei: quæ cum sint constitutæ essentialiter indifferentes, non opus est ut a causa prædeterminante ad instar mallei, ferræ, runcinæque applicentur.

Opp. 3. Qui ad nostras partes trahere student Doctorem Angelicum, nimium se demonstrant in ejus lectione peregrinos. Innumera sunt testimonia quæ de ejus mente reddunt nos certiores. Reduci ea possunt ad quatuor capita. Docet primo omnes causas secundas moveri a prima, & voluntates nostras ejusque effectus a Deo cognosci per hoc quod sit nobis causa volendi, ut 1. P. q. cv. art. 4. & iii. contra Gentes cap. 56. Affirmat 2. Deum causas secundas inclinare, ut 1. P. q. 60. art. 2. & q. 116. art. 1. Tertio asserit omnem causam contin-
gen-

gentem determinari ad effectum ab aliquo exteriori , ut 2. Physicorum textu 48. & v1. Metaph. lēst. 3. Quarto ait voluntate Dei non solum res produci , sed etiam modum , quo producantur prædeterminari , ut 1. ad Annib. dist. 47. art. 1v. Exemit omnes scrupulos circa D. Thomæ doctrinam in suo erudito Opere de divina motione Antoninus Maf-soulie .

Resp. posse hæc omnia facillime cum hac sententia conciliari . Nam auctore D. Thoma Deus est caussa prima omnium effectuum etiam contingentium , duplici titulo , 1. quia fiunt omnia ex præmotione ejus universali , ut docet 1. 2. Q. 1x. art. 6. 3. , deinde quia sicut motus gravium & levium tribuuntur generanti , qui dedit formam , ita omnis operatio tribuitur Deo , qui dedit virtutem ; ut explicat in 3. contra Gentes cap. 67. Similiter docet primum agens subditas sibi causas inclinare , in quantum *inclinatio naturalis est indita ab Autore naturæ* , ut explicat 1. p. q. 1x. art. 1. ad 2. , non autem præordinare fatali necessitate , de qua disputat citata Quæst. cxv1. art. 1. Præterea sapientissime in 2. Physic. scribit causam contingentem determinari ab exteriori principio , quum ibidem assignet discrimen inter causam secundam & primam , quæ non habet ab alia causa inclinationem ad bonum in communi , qua voluntas se determinat ad bonum in particulari , ut supra ostendimus ex lib. 1. contra Gent. cap. 82. Explicabimus ergo hæc , aliaque id genus de præmotione universali , & determinatione ad illam volitionem , in qua , ut ille ait , tanquam conclusiones in principiis , ceteræ continentur . Tandem per D. Thomam Deus in rebus producendis modum determinavit , quia decrevit alias condere necessarias , & alias liberas ; & quibusdam effectibus aptavit causas quæ deficere possunt , quibusdam autem defectibiles , ut inquit 1. Parte Q. xix. art. 8. Atque hæc malumus respondere , quàm D. Thomam , ut quidam fecerunt , tanquam vulgarem scriptorem dimittere . Quanta autem probabilitate id præstiterimus constat & ex dictis , & ex Opere edito in defensionem . S. Thomæ ab erudito viro Petro a S. Joseph Monacho Fulienfi .

Opp. ultimo : In principio indifferenti videri nequeunt certo & infallibiliter res futuræ .

Resp. dist. proposit. In principio indifferenti *passive* , concedo : in principio indifferenti *active* , subdist. videri nequeunt infallibiliter ab homine vel ab Angelo , quibus præsens non est determinatio causæ liberæ , & opus inde proveniens , concedo : videri nequeunt a Deo , cuius sempiternæ menti & simplicissimo aspectui sunt omnia *objective* præsentia , nego . Sed hujus argumenti levitas satis ex antecedentibus patet deprehendi .



C A P U T VII.

Deum non prævidere mala culpæ in decreto efficaciter prædeterminante materiale peccati.

ET in hoc capite, quod confectarium est præcedentis, ab Assertoribus physicæ prædeterminationis est recedendum. Distinguunt hi, ne faciant Deum auctorem peccati, in operibus malis actionem, ac deficientiam secundæ causæ: est enim peccatum *factum*, vel *dictum*, vel *concupitum contra legem æternam*. Quod sit *factum*, vel *dictum*, vel *concupitum*, pertinet ad substantiam actus, & dicitur *materiale peccati*; quod vero sit dissonum a lege æterna, est in peccato, ut inquirunt, *formale*. Itaque cum doceant prædeterminationem exigi a dependentia causarum secundarum, coguntur asserere prædefiniri a Deo peccatum ut actio est; & ne ad Calvinianum dogma declinent, negant a Deo prædeterminari illius actionis malitiam. Sentiunt id Thomistæ doctissimi Alvarez, Lemos, Ledesma, Joannes a S. Thoma, Gonetus, Salmanticensis, Gotti, alii. Nonnulli tamen, qui etiam sequuntur doctrinam Angelici, negant Deum prædeterminare entitatem & substantiam actus mali, licet fateantur ad eam immediate concurrere: quod refert Alvarez lib. 3. de Auxiliis disp. xxiv. & Ledesma Q. de Aux. art. 18. ubi laudat sapientissimum Magistrum Zumel. Commemorant Salmanticensis Tract. 4. de Volunt. Dei disp. 10. etiam Gonzales. Addimus Ludovicum Bancel, qui media incedens via contendit Deum prædeterminare actum malum sufficienter, non *positive efficaciter*. Auctore ergo Ledesma, & Alvarez, iudicio aliquorum Thomistarum prædeterminationem necessaria non est eo titulo, quo illam plures propugnant; neque omnes, qui sequuntur Angelici Doctoris placita, de ejus mente concordant. Extra Thomistarum castra vix invenies, qui hanc prædeterminationem ad actus malos approbent de mente D. Thomæ parum solliciti. At nos dum istorum opinioni plenius votis subscribimus, ut fecimus hæcenus, etiam beato Thomæ erimus obsequentissimi.

PROPOSITIO I. Non videt Deus mala culpæ in decreto, seu prædeterminatione actus, cui adnectitur peccati malitia.

Augustini, aliorumque Patrum auctoritate hæc propositio probatur. Ait S. P. de Prædest. SS. cap. x. *Prædestinatio sine præscientia esse non potest; potest autem esse sine prædestinatione præscientia. Prædestinatione quippe Deus ea præscivit quæ fuerat ipse facturus; præscire autem potens est etiam quæ ipse non facit; sicut quæcumque peccata*. Et lib. 3. de lib. arbitrio cap. 1v. *Omnia quorum Deus est auctor, præscit; non tamen omnium, quæ præscit, ipse auctor est. Quorum autem non est auctor, justus est ultor*. Eadem est doctrina Prosperi in Resp. ad cap.

Gallo.

Gallorum cap. 12. & 13. Fulgentii libro ad Monimum i. cap. 19. & fere omnium Patrum.

Communis est Adversariorum responsio, Augustinum, ejusque Asselas docere Deum non prædestinare peccata quantum attinet ad malitiam, ac privationem debitæ rectitudinis, sed ea tantum prædefinire, quatenus sunt actiones physicæ, cum quibus illa privatio connectitur.

Nolo cum Thomassino respondere hanc esse puerilem ineptiam, & distinctiunculam abhorrentem a mente & gravitate Augustini. Abeant hinc rigidi ac superciliosi censoris. At assero S. Patrem nunquam existimasse dari actus mali indeclinabilem præmotionem. In primis negat peccata præciri prædestinatione; quod esset falsum si prædestinaret actionem physicam, cui indivulse adhæret privatio rectitudinis & malitia; prævideret enim Deus deficientiam actioni conglutinatam in hujus præfinitione, nec verum esset dari aliquando sine prædestinatione præcipientiam. Deinde absolute S. Pater affirmat Deum non prædestinare opera mala, malas voluntates, peccata, quæ non solum privationem significant, sed etiam actum; neque ullibi unum secernit ab altero. Præterea per Augustinum Deus permittit quidem peccata, sed non facit; at fortassis non est auctor peccati, qui est auctor actionis, qua posita peccatum impediri non potest? Rursus ait Augustinus Deum non prædestinare opera, quorum justus est ultor: Deus autem nedum ulciscitur in peccato aversionem a bono & malitiam pœna damni, sed etiam punit conversionem ad bonum apparens, & actionem physicam pœna sensus. Hujus vero actionis quomodo potest esse justus ultor, si est auctor? Denique & Augustinus, & alii PP. ubi explicant Scripturæ textus, quibus videtur insinuari Deum mala facere, affirmant Deum ea permittere efficacem gratiam subtrahendo, & nullibi commemorant prædefinitionem actus; quod fuisset longe facilius, si Thomistarum probavissent opinionem.

Probatur 2. Argumentis a ratione petitis. Horum primum est, prædeterminationem non requiri ad bona opera naturalia, ut supra diximus; & consequenter multo minus ad mala. Sed pressius arguitur Thomistæ: Deus non est auctor peccati: Atqui esset, si prædeterminaret physicum peccati actum: Ergo illum non prædeterminat. Minorem pluribus momentis demonstro. 1. Nulla efficacior causa peccati potest adinveniri, quàm illa ex qua peccatum sequitur indeclinabiliter: Ex physica prædeterminatione peccatum indeclinabiliter consequitur: Ergo peccati causa efficacior physica prædeterminatione nequit inveniri. 11. Potiori jure est auctor peccati qui ad peccatum impellit definita præmotione, quàm ad peccatum trahens suggestionem ac suasionem nihil intrinsecum operando in hominum voluntate: Diabolus qui trahit ad peccatum suggestionem ac suasionem, est auctor peccati: Ergo potiori jure crit auctor peccati Deus, si ad illud certa prædestinatione præmoveat.

veat. III. Posita lege prohibente E. G. homicidium, si Deus illius actum efficaciter prædestinaret, quisquis occideret, conformaret se divinæ voluntatis decreto: Igitur aut non peccaret, aut peccatum divina voluntate committeretur.

Repetunt eandem cantilenam Adversarii, Deum non esse causam peccati, quia vult actionem, non malitiam: Diabolum ex adverso malitiam intendere, non actionem: prædestinari a prima causa substantiam actus, non rectitudinis privationem.

Insurgerent Maurus libro 2. quæst. LXXXI. & Tournely Tom. 1. pag. 387. neque Calvinum affirmasse Deum prædeterminare voluntatem malam quatenus mala est; lib. enim 1. Institut. cap. 18. n. 4. loquens de defectione Tribuum a Filio Salomonis ait: *Videmus ut Deus perfidiam nolendo, defectionem tamen alio sine iuste velit*. Sed non sunt hoc libramento ponderanda Catholicorum scita virorum. Calvinus enim, ait ex divina præfinitione consequi peccata necessitate; quod non affirmant Thomistæ. Refutantur tamen; quisquis enim vult opus malum etiam malitiam velit necesse est: alias posset quisque voluntarie oculos effodere, vulneribus hostem configere, amputare caput, & nihilominus non esse causam cæcitatæ ac mortis. Quod in agentibus consilio ac libertate infanum est judicare. Ad hæc malitia peccati, & privatio debitæ rectitudinis, cum non sint entitates, non efficiuntur per se & directe, sed tantum ratione actus positivi: Igitur quisquis actum positivum causat, causa est saltem indirecta malitiæ. Uterius nec voluntas creata vult malum qua malum, sed solum actum cui est annexa malitia, & nihilominus est mali causa effectrix. Diabolus autem intendit quidem malitiam, sed hæc sæpenumero præscindi nequit a materiale peccati; & si ratione nostra se jungitur, inseparabilis tamen est ab hac numero actione in his rerum circumstantiis patrata, E. G. ab homicidio, prohibente lege, a privato homine voluntarie commissio. Quapropter ad hanc individuum actionem concurrere nequit Deus prædeterminante concursu.

Possint itaque nonnullis videri Thomistarum evasiones coherentes doctrinæ Chryssippi; quod paucis explicabo, cum nullus hætenus, ut arbitror, id animadvertit. Nota est opinio Democriti, qui opinabatur omnia ab antecedentibus causis necessitate pendere. Hinc, ut diximus cap. 111., originem habuit sententia quorundam existimantium omnia provenire ex fatali siderum constitutione; de qua Manilius lib. 1v.

Fata regunt orbem: certa stant omnia lege.

Longaque per certos signantur tempora casus.

Nascentes morimur, finisque ab origine pendet.

Hi arbitrium servum plane statuerunt. Chryssippus Cleanthis in Schola Zenonis successor, voluit, ut ait Cicero in lib. de Fato, *tamquam ho-*
nora-

notarius arbitrum medium ferire. Affirmavit itaque revera omnia fato evenire, indeclinabilem esse præmotionem caussarum secundarum, malum tamentribuendum esse caussis proximis, non supremis ac principalibus; quoniam ab his est solus actus, ab illis vero defectus. Hanc rem illustrabat sequenti similitudine: *Us qui protrusit cylindrum*, ait Cicero, *dedit ei principium motus, volubilitatem autem non dedit*. Legite Eusebium lib.vi. de Præp. Evangel. cap.vi. Alexandrum Aphrodisensem libro de Fato, & Justum Lipsium lib. i. Stoicæ Philosoph. differt. xiv. hunc tamen caute. Nos quidem a nomine Fati abhorrentes dispositionem certam divinæ providentiæ fatemur, qua causas necessarias & liberas Deus disponit ac regit, illas prædeterminando, has indifferenter præmovendo, & singularum determinationes immutabili præscientia prævidendo. Impius Calvinus vult causam primam prædestinare actus malos, & istos absoluta necessitate evenire: Thomistæ defendunt prædestinationem actus, sed non malitiæ, quam in causam proximam refundendam esse propugnant. Toto igitur calo distant ab hæresi Calviniana; & qui eos audent insimulare, sunt, me iudice, iniquissimi obtrektatores. Verum (quod absque livore dictum sit, & absque præiudicio Scholæ Thomisticæ) videtur Calvinus alter Democritus, & assertor prædeterminationis actus mali alter Chrysippus.

PROPOSITIO II. Nec D. Thomas certo adstruit prædeterminationem Physicam ad materiale peccati.

Ad loca Doctoris Angelici præcedenti capite producta hæc accedunt. Primo Quæst. lxxx. 1. 2. art. 1. ait. *Peccatum actus quidam est, unde hoc modo potest esse aliquid directe causis peccati per quem modum aliquis directe est causis alicujus actus, quod quidem non contingit nisi per hoc quod proprium principium illius actus movet ad agendum*. Ex quibus infert voluntatem esse directe causam peccati, quia seipsam interior movet ad actum, Diabolum vero causam indirectam, quia, exterius suadet & allicit. Igitur si Deus ad agendum moveat intrinsece efficaciter præmovendo, uti facit seipsam determinando voluntas, erit per D. Thomam auctor & causa peccati. Præterea Q. xl. ix. 1. p. art. 1. demonstrat quod agens produciens aliquam formam est causa per accidens corruptionis alterius, quoniam etsi agens tantummodo intendat formam producere, *ad formam intentam ab agente sequitur ex necessitate alterius forme privatio*. Itaque etiam si Deus solam physicam actionem prædestinaret, cum ex ea consequatur malitia & privatio debitiæ rectitudinis, erit istius privationis causa saltem per accidens. Ulterius S. Thomas 1. P. Q. xix. art. ix. distinguit malum culpæ a malo pænæ, & a malo naturalis defectus, docens Deum prædeterminare mala posterioris generis ratione boni cui sunt conjuncta, & mala culpæ nullo modo velle neque ratione sui, neque ratione alicujus boni cui ipsa adhærescant: *Malum culpæ, inquit, quod privat ordine ad bonum divi-*

divinum, Deus nullo modo vult, sed malum naturalis defectus, vel malum pœna vult volendo aliquod bonum, cui conjungitur tale malum. Igitur Deus non vult mala culpæ, nec etiam prædefiniendo physicam actionem, atque entitatem ipsis conjunctam. Postremo S. Thomas exponens quomodo Deus ad peccatum inclinet, Comm. in cap. ix. ad Roman. ait Deum causare malitiam tantum permissive quia scilicet ex suo justo judicio permittit ruere in peccatum ob præcedentes iniquitates. Paulo infra ait moveri a Deo homines ad bonum & malum: ad bonum quidem directe & per se; ad malum autem occasionaliter in quantum scilicet Deus homini aliquid proponit vel interius, vel exterius, quod quantum est de se, inducivum est ad bonum. Sed homo propter suam malitiam perverse utitur ad malum. Quæstione pariter v. de Veritate docet circa mala non dari aliam providentiam, quàm concessionis, seu permissionis. Negat igitur S. Thomas physicam prædeterminationem ad malum.

Clamant sapientes viri quamplures, Angelicum Doctorem negare divinam prædeterminationem ad malitiam, non ad actionem: asserere in 2. dist. 37. q. 2. art. 2. opinionem, quæ docet actus peccatorum, nec etiam in quantum actus sunt a Deo esse, a paucis teneri: nil frequentius legi in aureis Thomæ libris, quam Deum esse primam causam cujusque actionis, non solum permittendo, sed etiam movendo, ut q. 3. de malo art. 2. & 111. contra Gentes cap. 89. Ab eo memorari etiam prædeterminationem in 1. dist. 36. quæst. 2. art. 3. & q. 3. de Verit. art. 1., falli demum, qui negant hanc vocem in scriptis ipsius reperiri.

At fas sit mihi reponere, hæc omnia nullius esse momenti. Falsum est enim beatissimum Thomam in locis a me productis non denegare prædeterminationem ad actionem peccati. Part. 2. quæst. 80. art. 1. docet esse causam peccati, qui directe movet ad actum, quemadmodum est virtus creata, quæ tamen non intendit malitiam. Idem evincit allatum exemplum agentis, qui dum formam producit, causa est privationis alterius. Neque poterat S. Thomas expressius loqui, quam asserendo Deum *nullo modo* velle peccata, & hæc spectare ad solam providentiam *concessionis*. Rectissime autem scribit actus peccatorum esse a Deo, nec aliquam dari actionem, quæ non proveniat a prima causa: at necesse non est, ut hæc vera esse dicantur, quod actus omnes prædestinentur; quandoquidem sufficit, si voluntas determetur se virtute universalis præmotionis, & Deus immediate ad omnes ejus concurrat operationes. Quod præcedenti cap. dictum est; & colligitur quoque ex animadversionibus Ferrariensis in lib. 3. contra Gent. cap. 89. dicentis salvari quod Deus sit primum movens, si homo per ejus motionem ad ultimum finem convertatur. Plura ad hæc illustranda attulimus supra. Denique beatum Thomam nullibi prædeterminationis meminisse imperiti scripserunt. Meminit in 1. dist. 36. præde-

prædeterminationis rerum faciendarum juxta ideam vel rationem in Deo existentem ; & hæc prædeterminatio est decretum producendi cum res liberas , tum necessarias : meminit quæst. 3. de Verit. art. 1. prædeterminationis efficientis substantias rerum ; & hæc prædeterminatio est ordo cujusque creaturæ in suum finem . Ceterum prædeterminationis ad materiale peccati ubi meminit ? Si quis apertissimum locum , proderit , dabo me victum : malo enim subigi veritate , quam pertinaciter disputare .

EXPEDIUNTUR OBJECTIONES.

Opp. 1. Prædeterminare Deum peccata , eaque prævidere in definito consilio voluntatis suæ colligitur ex sacris literis . Est ergo verissima opinio hætenus impugnata . Prob. ant. ex cap. 11. Act. v. 2. ubi legimus Jesum *Definito consilio , & præscientia Dei traditum* . Et cap. 1v. 27. de Pontio Pilato & Herode scribitur convenisse *facere quæ manus & consilium Dei decreverunt fieri* . Item habetur Lucæ xxi 1. 22. *Filius hominis , secundum quod definitum est , vadit* . At occisio Christi terribilissimum horrendissimumque scelus fuit . Igitur etiam peccata definiuntur ac prædeterminantur a Deo .

Resp. nego ant. ad prob. dico utique Deum prædeterminasse passionem Christi , maximum caritatis suæ opus , & ad redemptionem humani generis ex infinita ejus misericordia præordinatum , at Judæorum perfidiam , licitorum executionem , impietatem crucifixorum Deum , prædefinisse , etiam quantum ad actum physicum spectat , non potest ex præfatis Scripturarum locis evinci . Verissima est eorumdem expositio , decrevisse Deum mundi reparationem , & cum præscientia sua intueretur in æternitate voluntatem Judæorum qui aspernabantur Christi doctrinam , eumque maximo odio insectabantur , hæc veluti oblata occasione Redemptionem hominum perfici voluisse . Hæc ratione ex parte Dei & prædeterminatio passionis Christi , & permissio culpæ Judæorum eodem momento statuta sunt : nostra autem cogitatione prædefinitio passionis permissionem peccati præcedit . Hæc interpretatio ex locis quæ obijciuntur , ex Patribus , & ex ratione firmatur . Act. 11. simul ponitur *definitum consilium & præscientia* , quod non fuerit citra perfidiam Judaicæ præscientiam decretum crucifixionis : sed Deus , cui notissima sunt quæ infallibiliter , & quæ contingenter sunt futura , decrevit ut quod a sua voluntate pendebat compleretur actionibus improborum , quæ illorum arbitrio decernerentur . Sequenti cap. 1v. apposite dictum est , *Quæ manus tua & consilium tuum decreverunt fieri* : non , *decreverunt illos facere* ; ut animadvertamus decretam a Deo passionem Christi , non actionem Judæ , non Herodis , non Hebræorum , non Pilati : atque hanc permisisse liberam eorum determinationem su-

To. I.

T t

per-

percomprehendendo. Hæc respondent Justinus adversus Tryphonem, Origenes in Genes., & S. Leo serm. xiv. de Passione Domini. Hujus, quem merito dixeris Latinum Chrysostomum, hæc sunt verba: *Multum diversum, multumque contrarium est id quod in malignitate factorum est præcognitum, & quod in Christi est passione dispositum.* Non inde processit voluntas interficiendi, unde moriendi, nec de uno extitit spiritu atrocitas sceleris & tolerantia Redemptoris. Non enim impias furentium manus in se immisit Dominus, sed admisit: nec præcedendo quid faciendum esset coegit ut fieret, cum tamen ad hoc carnem suscepisset ut fieret. Ratio autem est, quia fiunt Deo prædeterminante opera, ad quæ hominis vires non suppetunt: & Augustinus inquit in lib. de corrept. & grat. cap. xi. *liberum arbitrium ad malum sufficit.* Prætermitto etiam Calvinum uti præfato argumento, ut probet Deum auctorem esse peccati: & firmiter pronuncio cum Prospero ad Ob. Vincentianas: *Non casus mentium, nec malignitatem iniquorum, neque cupiditates peccantium prædestinatio Dei aut excitavit, aut suavit, aut impulit.*

Opp. 2. Falsum est Deum, si prædefiniat actiones malas, fore causam peccati. Ergo non est rejicienda ex isto capite physica ad actum malum prædeterminatio. Antecedens pluribus suadet momentis. i. Quotiescunque plures causæ concurrunt ad eundem effectum, vitium non in causam remotam refunditur, sed in proximam. Si puer inlegantes efformet apices, non Magistri dirigentis, sed pueri brachio tribuitur conscribillatio. Citharam pulsante experto Fidicine, si qua sit dissonantia, instrumento tantum adscribitur. Nunquam solem, sed terrena corpora causam dicimus, si aliquando monstra gignantur; neque dum claudus ambulat moventem animam reprehendimus, sed tibiam. Quomodo ergo erit Deus causa peccati, dum prædeterminat actiones malas; si est causa universalis, non proxima? ii. Quamquam actionem, qua Deus infundit corpori animam post Adæ lapsum, consequatur peccatum originale, non tamen est Deus causa originalis peccati: Igitur neque erit causa peccati actualis, etiam si prædefiniat actionem, cui tale peccatum conglutinatur. iii. Dum impius Minister Sacramenta conficit aut dispensat, quorum Deus causa est effectrix aut princeps, irretitur crimine sacrilegii, cujus reatum nemo tribuerit Deo Auctori Sacramentorum. Cur vero si causset physicam actionem peccati, divinæ sanctitati derogari censendum est? iv. Fatemur Deum universaliter præmovere, & immediate concurrere ad actus malos, neque tamen esse auctorem malitiæ; & quare malitiæ causam arbitramur, si actionem peccati physicam prædeterminet?

His omnibus ex ordine respondemus. Atque ad i. dist. ant. Refunditur vitium in causam proximam, non in remotam, dummodo causa proxima sit ante determinationem causæ remotæ alias ad vitium

tium determinata, ut in allatis exemplis, concedo: nisi sit aliunde causa proxima determinata, & prædeterminetur a causa remota nego: & retorqueo argumentum. Quum cithara E. G. jam sit ad sonum asymphonum ex tensione fidium composita, aut claudus ex ligamento fibrarum prædeditus, non est lyristes causa dissonantiæ, neque anima inæqualis gressus: at si ipse pullator cytharæ chordas nimium laxet aut tendat, vel sibi quispiam nervum scindat; soni, & gressus non recti ipse citharædux, & ipse incedens auctores dicendi sunt. Ita si Deus ad peccati actum concurrat cum voluntate creata, quæ non a Deo, sed a seipsa determinetur, malitiæ quidem causa non erit; secus autem, si ipsemet actum malum prædeterminet ac prædefiniat. Discrimen præterea est maximum inter viciū physicū & morale; illud namque tribuitur ut plurimum instrumento, istud causæ determinanti.

Ad 2. nego consequentiam. Disparitas satis est obvia; nam creatio rationalis animæ non est actio per se connexa cum originali peccato, neque istud ex creatione animæ consequitur, sed ex infectione corporis determinata voluntate Protoparentis & carnali concupiscentia polluti. Contra malicia peccati ex actione prohibita promanant, & idcirco patrat peccatum, quia ponitur actio divino præcepto vetita. Revera productionem animæ non esse per se causam originalis culpæ sit manifestum, ex quo si anima uniatur corpori nulla affectu contagione, ut fuit corpus primorum parentum, nulla macula contrahatur peccati. At prohibitiæ actioni privatio rectitudinis est suapte natura permixta; & reus est E. G. homicidii qui privata auctoritate vulnera infigit. Possumus etiam argumentum in Adversarios retorquere. Non est quidem Deus auctor labis originalis, at esset si ipse pollueret corpus, & seminalem inficeret propagationem, qua animæ reatus traducitur: Ergo & esset causa culpæ actualis, si prædefiniret actionem, unde consequitur privatio iustitiæ.

Quod sequitur eodem pacto diluitur, quippe Consecrationi non est per se connexum crimen sacrilegii, sed oritur istud ex indignitate ministri; quam dedecet sanctitatem Dei quoquo modo prædefinire. Deinde quomodo demonstrant Adversarii, Deum prædeterminare ministros improbos ad proferenda Sacrosancta consecrationis verba, aut cetera, quæ Sacramentorum formæ dicuntur? Nego isthæc Deo prædeterminante proferri. Præterea debemus actum Sacramenti ab actu sacrilegii secernere: illius minister impius est causa instrumentalis, huius vero causa est principalis. At non repugnat Deum uti malis pravisque hominibus ad opera supernaturalia perficienda, tanquam instrumentis. Ita scelestissimos homines aliquando prophetaffe didicimus, ut fecit Caiphas; in quo, aliisque huius generis, prædefiniit Deus sapiens veritatis oracula, non prædestinavit Deus iustus opera iniquitatis.

Ad 1v. Resp. fore Deum causam peccati si ad actionem prohibitam physice prædeterminet, non esse si præmoveat universaliter, & immediate concurrat, quoniam vitium ac malitia tribuitur causæ determinanti. Manifestum id est exemplis priori momento prolatis. Cum enim corpora sublunaria determinent motionem cælestium, non soli tribuitur generatio hominis, ut hominis, sed parentibus: & quia tibia determinat motum animæ, non huic, sed illi obliquus imputatur incessus. Succurret aperta ratio; si quis animadvertat motionem universalem indifferentem esse, & ab indifferenti: qua tali neque bonum, determinate fieri, neque malum. Si tamen voluntas universali præmotione sese inclinet ad bonum, istud etiam a causa præmovente dependet, quoniam se determinat virtute universalis agentis, & indita sibi ad bonum inclinatione. Quod si flectatur ad malum, nullo modo istud, prout malum est, adscribitur præmoventi; quia malum non est a causa movente, sed tantum a deficiente. Concursum vero simultaneous neque præcedit determinationem voluntatis, neque aliud est quam ejus regimen & conservatio. Hanc conservationem statuta lege providentia nequit Deus creaturis subtrahere, quin abeat in nihilum: & propterea cum velit mala permittere ut bona eveniant, ad omnia opera creaturarum suarum absque malorum prædeterminatione concurrat.

Opp. 3. Etiam mala præordinantur a Deo: Quæ præordinantur definiuntur: Ergo prædefiniuntur & mala.

Resp. explicando majorem. Deus præordinat mala 1. quia finit homines quandoque in ea labi, ut propriam infirmitatem humiliter fateantur, & virtutem gratiæ supervenientem ex alto suppliciter flagitent: vide Gregorium lib. 2. Moralium cap. 26. 11. quia non permittit impios in omnia ruere flagitia, & bonos pro mala voluntate vexare; vide Augustinum de Prædest. SS. cap. 16. 111. quia vult, ut improbi qui in donis suis misericordiam contemnunt, in suppliciis experiantur justitiam: vide lib. de Sp. & lit. cap. 33. Itaque propositionem dist. mala præordinantur a Deo permittente, cohibente, ulciscente, concedo: præordinantur a Deo prædeterminante atque impellente, nego majorem.

Opp. ult. Etiam peccatorum, quatenus actiones sunt, Deus est prima causa; nam quidquid est, in quantum est, bonum est. S. Augustinus in III. de Trinit. cap. 4. ait Deum esse primam causam omnium corporalium & spiritualium motionum. Et D. Anselmus sæpe idem repetit in lib. de casu diaboli cap. 20. & de concordia præsc. & lib. cap. 2. ubi ait Deum in malis prædestinare quod sunt essentialiter, non quod mala sunt. Eadem repetit S. Thomas Q. xx. 1. P. art. 4. Nisi id asseratur, non est quomodo salvari possit certa præscientia malorum.

Habes horum omnium solutionem cap. vi. in quo ostendimus salvari rationem primæ causæ absque prædeterminatione ad actus liberos, Adam aliqua. Proloquium illud: *Omne quod est, in quantum est,*

est, bonum est, valet in actionibus liberis, quantum spectat ad potestatem, non ad voluntatem, dicente Augustino lib. de Sp. & lit. cap. xxxi. Apostolus dicit, non est potestas nisi a Deo. Nusquam autem legitur, non est voluntas nisi a Deo. Et recte non scriptum est, quia verum non est; alioquin etiam peccatorum, quod absit, auctor est Deus; si non est voluntas, nisi ab illo. Ulterius etiam mala voluntas a Deo est, quatenus ad eam inclinatur arbitrium Deo universaliter prae-movente.

De auctoritate Anselmi non est cur exultent Thomistæ, quippe eodem libro, eodemque cap. 20. ait: *Cum ergo diabolus conversit voluntatem ad quod non debuit, & ipsum velle & ipsa conversio fuit aliquid; & tamen non nisi a Deo, & de Dei voluntate aliquid habuit. Quoniam nec velle aliquid, nec movere potuit voluntatem, nisi illo permittente, qui fecit illas naturas substantiales & accidentales, universales & individuales.* Docet coherentem actiones malas prædestinari essentialiter; quod a Deo prædefinitum sit essentiam creaturæ rationalis esse liberam, ac talis conditionis, ut ipso pernente, & subtrahente efficax auxilium, si velit peccet, si nolit peccare in iustitia permaneat, non possit tamen velle bonum absque speciali motione gratiæ, aut versatilis pro statu innocentiae, aut victricis post prævaricationem Adami. De D. autem Thoma scripsit olim Campanella Dominicanus a suis in sententiam prædestinationis necessariæ ex titulo dependentiæ trahi invitum, quod & plures affirmant etiam ex Thomistis apud Joannem Marinum Tract. vii. 1. de Lib. arbitrio disp. ii. sect. v. Quam facile exponi possint ejus testimonia, quæ videntur contraria, puto satis a me declaratum.

Consequens est ergo, ut peccata videantur a Deo in ideis rerum, in quantum idæ exhibent perfectionem, a qua peccata deficiunt, ut in 1. sent. dist. xxxvi. docet Aegidius, & nos statuimus Cap. v. Neque vero obstat quod opponit Frassen in ideis non representari res determinatas; quippe id falsum est de ideis in Dei sempiterna mente-existentibus, cui nihil futurum est, quemadmodum cap. iv. explicavi. *Nihil igitur vetat, inquit vir eruditus Joannes Baptista Du-Hamelius lib. iv. de Scientia cap. v. quominus cum Aegidio Romano statuamus Deum futura omnia in suis ideis, in sua essentia, ut in causa libera continere.*



C A P U T VIII.

*Neque futura ordinis supernaturalis, status naturæ innocentis
a Deo prævideri in Decreto absoluto
ac prædeterminante.*

TERTIUM dissidium inter nos, & D. Thomæ discipulos est de operibus supernaturalibus ad statum naturæ integræ pertinentibus; in quibus illi gratiam per se efficacem propugnant, nos unius versatilis asserimus necessitatem; & consequenter arbitramur bonorum Angelorum perseverantiam in nullo prædeterminante decreto fuisse prævisam. Facit autem inter Augustinenses ac Thomistas discrepantiam, verborum Augustini, quem utrique pari studio prosequimur, multiplex sensus, atque ob disputantium ambages perplexus. Inter eos qui SS. Angelorum gratiam contendunt fuisse victricem ceteros eruditione ac doctrina antecellunt Antoninus Reginaldus, Estius, Sylvius, Thomas Angelus, Contensonius, Gotti, & qui de hoc argumento edidit librum, qui inscribitur, *Divus Augustinus Divo Thomæ conciliatus*, Hyacinthus Serry in Patavina Academia Professor Primarius. Scripsit & de hac quæstione fusiori calamo Stephanus Vicentinus Congregationis Oratorii Præbyter eruditus. Nulla alia gratia, quam indifferenti creaturam innocentem indiguisset ex nostris, qui posteriori floruerunt ætate, docent Christianus Lupus, Cardinalis Norisius, Fulgentius Bellelli, Basilius Poncius, Lafosse, Vanroy, Piette, Joannes Schuveitzerus, aliique numero & eruditione præcipui. Efficacem gratiam Angelis quoque stantibus collatam scripserunt Casalius, Coquæus, Gavardi, & Girkén, quos nobis Serrius opponit, & alii etiam numero longe plures; sed neque hi efficacem gratiam, saltem omnes, volunt esse prædeterminantem, & toto cælo a Thomistis recedunt. Argentinam haud recte a viro clarissimo citari, poterit quisque proprio otio videre: nam in II. dist. IV. & V. art. I. solum ait, non fuisse Angelis necessariam ad merendum gratiam habitualement, sed sufficientem fuisse motum factum in mente specialiter ab ipso Deo: ubi neque motionem prædeterminantem commemorat, neque voluntatis victricem inclinationem, in qua potissimum sita est gratia efficax. De Aegidio Romano, & de D. Thoma quædam dicturus sum paullo infra.

Vindicat sibi hæc quæstio locum parte horum librorum secundæ; sed cum videatur necessaria ad percipiendum Theologiæ nostræ systema, in illam inquirendum est modo; & alibi si quæ residua erunt, opportunius colligenda. Exponam autem sententiam, quam puto Augustini, alloquens adolescentes, non pugnantem adversus viros doctissimos:

Quid

Quid enim contendat hirundo

Cycnis ? aut quidnam tremulis facere artubus bædi

Consimile in cursu possint , ac fortis equi vis ?

Itaque hæc nostra sententia est . Adam & Angeli non opus habebant adiutorio gratiæ efficacis : beati spiritus , qui steterunt , sese gratia versatili ad perseverandum libero arbitrio inflexerunt : supernaturalis gratiæ auxilium , & specialis Dei motio in utroque statu requiritur ; sed ut sit per se efficax , & prædeterminans exigit infirmitatis conditio , & vulnus naturæ ; verbo dicam : perseverantia creaturæ innocentis conditioni annexa fuit non inferenti , sed indifferenti , sub qua Deus illam in æternitate præviderat .

Quoniam vero Adversarii nos suppresso nomine Janfenianos appellant , quod de hoc argumento scripserit etiam Iprensis Episcopus , Antonius Arnaldus , Vincentius Lenis , & quidam alii Janfenismi nota traducti , atque novitatis vocabulo opinionem nostram designant , quo in vulgus Theologorum sparsa erroris excipiatur execratione ; præmittendum duxi , neque novam esse , neque characterem vel minimum dogmatis Janfeniani , quod recto iudicio , providoque consilio Romana Ecclesia damnavit . Fuit ergo opinio veterum Theologorum , quatuor esse gratiarum genera , habitualem quæ perficit naturam , conservationem ipsius habitus , cooperationem Dei ac præmotionem universalem in operibus naturalibus , & specialem in supernaturalibus , & demum motionem quamdam per auxilium excitans , quod faciat hominem velle , & prioribus donis bene uti : nos post Adæ lapsum vitiatos omnibus hisce donis muniri : at creaturam innocentem , cum esset condita cum bona voluntate & amore casto , neque ullis concupiscentiæ fluctibus jactaretur , dummodo haberet illam præmotionem indifferentem , potuisse perseverare absque gratia voluntatem efficaciter excitante . Hæc docuerunt Gregorius Ariminensis in 2. dist. 29. quæst. 1. concl. 2. & 3. Joan. Major eodem loco , Driedo libro de Conc. libertatis & Prædest. cap. 3. Alphonsus Curiel in 1. 2. quæst. 19. art. 10. dub. 2. §. 4. Quid singulos percenseo ? Etiam Bellarminus lib. 1. de Gratia 1. Hominis cap. 4. Hæc est nostra de Gratia creaturæ innocentis tradita ab antiquis opinio . Addidit Janfenius gratiam etiam delectationis & voluntatis , non efficaciter excitantem , sed arbitrii pedisequam . Stephanus Dechamps lib. 3. de Hæresi Janfeniana cap. xv. & seq. illud tantum in Janfenio reprehendit quod præter gratiam habitualementem , etiam motionem voluntatis in statu innocentis existimet necessariam ; cum gratia Adami hanc motionem minime , ut ille putat , amplecteretur . Hæc opinio Janfenii nullatenus ad nostram cum Thomistis pertinet controversiam . Sive enim dicamus potuisse Adam perseverare cum sola gratia habituali , sive necessariam ei fuisse gratiam actualem indifferenter moventem ; semper stat in illo felicitatis statu non fuisse collatam , nec

nec necessariam ad perseverandum gratiam videricem. Profecto in quo fuerit constituta gratia creaturæ innocentis dicam alibi: nunc tantum contendo non fuisse etiam permanentium Angelorum auxilium natura sua prædeterminans; neque facem nobis prætulisse Janfenium; sed vetustos, maximosque Theologos, quorum invalescens recentiorum cavillatio sensim induxerat oblivionem. At, auspice Deo, tanta Theologorum approbatione Augustiniana sententia restituta est, ut in publicum absque larva possit incedere. Tuentur illam Patres Benedictini; Thomassinus, Witasse, Franciscus Macedo, Habert, L'Hérminier, Le Cocq, Juenin, & ne singulos recenscam, satis est Hennum tract. de Principiis act. human. disp. 2. quæst. v. art. 3. & Bellarminum loco citato asserere illam esse communem. Hæc ad retundendas oppugnantium calumnias opus erat præfari; quas tamen incautis arbitrandum est excidisse: vel saltem eorum censura illos tantum perstringit, qui ex præfato statu discrimine inferunt fallaci consecutione non dari modo nisi adiutorium quo, & gratiam efficacem, aut alia in absurda prorumpunt, quæ ex fonte puro Janfeniani summa cum cæcitate nequitia arbitrantur effluere.

PROPOSITIO I. Innocens creatura auxilio prædeterminantis gratiæ non indigebat, & consequenter minime novit Deus perseverantiam Angelorum in efficaci suæ voluntatis decreto.

Traditur hæc propositio a S. P. Augustino lib. de Corrupt. & gratia cap. x. xi. & xi. Ex quibus hæc eruantur argumenta. Sit primum. Cum Aduemetini Monasterii quidam Monachi, lecta in Augustini libro de gratia & lib. arbitrio sententia de gratia efficaci & de gratuita electione, (quem librum illuc S. P. direxerat, ut erumpentia inde Scimpelagianismi germine evellet) contra Augustinianam doctrinam insurgerent, asserentes neminem esse corripiendum si divinæ non obtemperet legi, quum excusari possit quod destitutus sit illa gratia, sine qua opus non perficitur salutare, & quæ non omnibus præparatur; provide Augustinus gliscienti occurrens errori librum de Correctione & gratia conscripsit: quem S. Prosper plenum vocat auctoritatis divinæ, & Cardinalis Norisius, PP. S. Mauri, Boudartius, & alii appellant ceterorum S. Augustini librorum contra inimicos gratiæ Dei auream clavem. Hoc in Opere S. Pater objectionem Aduemetinorum solvit, quoniam ita constituit Deus rationalem creaturam, ut simul naturam conderet, & elargiretur gratiam, qua opitulante posset in accepta iustitia perseverare si vellet; atque ut vellet in ejus reliquo arbitrio. Ait tali gratia in prima conditione donatos Angelos, & aliquos per liberum arbitrium stetitisse, aliquos vero per liberum arbitrium cecidisse; ac potuisse perseverare etiam Adam eodem adiutorio sussultum, & ideo recte esse corripiendos qui gratia ad perseverandum necessaria destituantur, quoniam illam in protoparente receperunt; is vero accep-
ceptis

ceptis donis libertate sua male ufus reddidit fecum pofteros omnes infirmos . Huic per peccatum contractæ infirmitati fubventum eſſe uberiori gratia , quæ non ſolum dat poſſe , fed etiam velle : hanc tamen divina miſericordia uni , non alteri , inſcrutabili Dei iudicio , parari . Quapropter qui non habet donum perfeverantiæ eo caret in poenam peccati , & juſte corripitur : qui habet , habet ex dono miſericordiæ , & illi divino beneplacito præparatur . Hæc eſt ſumma Auguſtinianæ doctriinæ . Atqui ſi neceſſaria fuiſſet creaturæ innocenti gratia prædeterminans , inanem Auguſtinus luſiſſet operam , neque Monachorum ſatiſfecifſet argutationibus . Non ergo creaturæ innocenti fuit neceſſaria efficax iſtud , ac prædeterminans gratiæ auxilium . Probatur minor; nam ſi vera eſt Thomiſtarum ſententia , non ob aliam cauſſam Deus Adamo gratiam victricem non eſt elargitus , niſi quia eſt donorum ſuorum ſupremus Dominus , neque aliud reſpondendum eſt juxta horum Theologorum principia A drumetinum objectioni . Quam profeſſo obviam , vulgatiffimamque reſponſionem nunquam S. Pater adhibuit .

Quoniam vero futilem hanc noſtram , ſpuriamque confeſſionem putant Thomiſtæ , trahunt enim perdifficiles quæſtiones in diverſa judicia etiam aſſiduos veri amatores , lubeat illam enucleatius exponere . Principio S. P. cap. x. ait : *Saluberrime conſitemur , quod rectiſſime credimus Deum Dominumque verum omnium . . . ſic ordinariſſe Angelorum & hominum vitam , ut in ea prius oſtenderet , quid eorum poſſet liberum arbitrium , deinde quid poſſet ſuæ gratiæ beneficium , juſtitiaque judicium .* Intellige arbitrium ſuſſultum gratia aliqua , & auxilio ſine quo ; quippe ſi iſtud primo homini vel Angelis , cum primum facti ſunt , deſuiſſet , non utique ſua culpa cecidiſſent . Atqui ſi Angeli , & primus homo indiguifſent ad perfeverandum gratia victrice , nequaquam ſuſſisteret allatum diſcrimen , nequaquam experti eſſemus quid poſſet ſanum arbitrium cum ſufficienti adjutorio , & deinde quanto ſit robuſtius beneficium gratiæ ſanantis . Ergo creatura innocens non opus habebat victricis gratiæ adjutorio .

Reſp. Thomiſtæ hæc dici ab Auguſtino abſque efficaci gratiæ excluſione : tam ſanum arbitrium , quàm infirmum & ſtare & cadere ſua libertate , bene agere & perfeverare a Deo præmotum ; nullum inde peti utriuſque ſtatus diſcrimen : oſtenſum fuiſſe in Adæ lapſu , quid poſſit arbitrium ſibi relictum , in perfeverantia Angelorum quid valeat arbitrium efficaci auxilio ſuſſultum .

Verum , eſſi rectiſſime dicunt in utroque ſtatu libertate ſua hominem & peccare & mereri , non tamen ſi utrobique neceſſaria ſit gratia efficax , quid valeant arbitrii vires poterimus experiri . Si enim duo E. G. æquali luce indigeant ad videndum corpus coloratum , aut pari auxilio ad ferendum pondus ; quomodo diſtingui poteſt , quiſnam ſit acie oculi præpollentior , aut vi prævaleat membrorum ? Nullus equidem id po-

terit judicare. At si unus eodem lumine obiectum eminus cernat, quod alter nequit nisi cominus intueri; tunc recte apparet unum esse altero oculis vividioribus. Ita si tam creatura innocens, quam fluctibus concupiscentiæ jactata ad standum debeat prædeterminante gratia fulciri; qua ratione dignosci potest quid valeat una præ alia? Sed patens est, apertumque discrimen, si dicatur, illa stare potest cum auxilio versatili; hæc non stat, nisi cum adjutorio victrici & per se efficaci.

Amplius dilucidabitur mens Augustini ex sequentibus. Proximo cap. x1. Gratiam Adamo collatam sic describit: *Tale erat adjutorium, quod desereret cum vellet, & in quo permaneret si vellet, non quo fieret, ut vellet.* Quo in loco sermonem institui de gratia prædeterminante, quæ dat ipsum velle, nemo unus dixerit. Paucis interjectis ita Augustinus proloquitur: *Dederat & adjutorium sine quo non posset in ea permanere, si vellet; ut autem vellet in eas libero reliquit arbitrio. Posset ergo permanere si vellet, quia non deerat adjutorium per quod posset, & sine quo non posset perseveranter bonum tenere quod vellet. Sed quia noluit permanere, profecto ejus culpa est, cujus meritum fuisset, si permanere voluisset. Sicut fecerunt Angeli Sancti, qui cadentibus aliis per liberum arbitrium, per idem liberum arbitrium steterunt ipsi: &c.* Ergo per Augustinum Adam non habuit nisi adjutorium sine quo: Atqui cum tali adjutorio sine quo poterat permanere: Igitur ad permanendum non opus habebat alio validiori adjutorio.

Occurrunt Thomistæ asserentes utique Adamo collatam duntaxat gratiam inefficacem: hujus fulcimento potuisse quidem perseverare; neminem id vertere in dubium. Ceterum agi nunc controversiam de gratia necessaria Adamo, non ut perseverare posset, sed ut perseveraret reipsa.

Ad nutum excogitata est hæc Thomistarum responsio; primo quia Augustinus ita statuit discrimen inter hominem innocentem ac lapsum, ut asserat illum *in eo bono, quo factus fuerat rectus, accepisse posse non peccare, posse non mori, posse ipsum bonum non deserere.* Sanctis vero, ad quos pertinet gratia liberationis, dari etiam ipsam perseverantiam, ipsum adjutorium quo, ipsum velle, propterea quod *in malis sunt, ex quibus clamant ad Deum, Libera nos & non habent tranquillam felicitatem, in qua constituerat primum hominem, qui fecerat illum rectum.* Ergo adjutorium actualis perseverantiæ, quod non solum dat posse, sed etiam velle, non erat homini recto ullatenus necessarium. Deinde affirmat S. Pater potuisse Adam per liberum arbitrium perseverare, quemadmodum per idem liberum arbitrium angeli boni steterunt: non per liberum arbitrium sola nativa vi operantem, sed adjutorio sine quo in sui conditione donatum: At stare per liberum arbitrium in Augustiniano sensu, est stare per arbitrium sanum, vegetum, nulla cupiditatum pugna circumiectum; quale arbitrium peccati primi

primi hominis granditate perdidimus, non quod extincta sit per Adæ culpam libertas, sed quoniam adjacent nobis ejus causa carnalis appetitus illecebræ, atque sanitas: primæva privati sumus. Quamobrem perseverantia non dicitur in hoc statu ab Augustino opus arbitrii, sed gratiæ: idque hoc eodem loco, ubi ait: Quæ quidem merita potuit habere, sed perdidit: & per quod habere potuit, perdidit, hoc est per liberum arbitrium: propter quod non restat liberandis, nisi gratia liberantis. Quid ergo? Per Augustinum potuit Adam perseverare cum solo adjutorio versatili: atque cum solo adjutorio versatili Angeli Sancti per liberum steterunt arbitrium.

Pergit rotundis verbis Magnus Augustinus systema Gratiæ sic exponere: *Ille, inquit cap. xi. de primo homine, ille in bonis erat, quæ bonitate sui Conditoris acceperat. Neque enim ea bona & ille suis meritis comparaverat, in quibus prorsus nullum patiebatur malum. Sanctis vero in hac vita, ad quos pertinet liberationis hæc gratia, in malis sunt, ex quibus clamant ad Deum, Libera nos a malo. Ille in illis bonis Christi morte non eguit: istos a reatu hereditario & proprio illius Agni sanguis absolvit. Ille non opus habebat eo adjutorio, quod implorant isti cum dicunt, video aliam legem in membris meis repugnantem legi mentis meæ, & captivantem me in lege peccati, quæ est in membris meis.... Ille vero nulla tali rixa a seipso adversus seipsum tentatus atque turbatus in illo beatitudinis loco sua secum pace fruebatur. Proinde etsi non interim latiore nunc, veruntamen potentior gratia indigent isti. Viden S. Patrem luculentissime asserere primum hominem nulla adversum se rixa turbatum, nullo carnis adversus spiritum certamine laborantem, nullatenus indignisse ea gratia potentior, quæ dari sibi poscunt homines, ad quos pertinet beneficium liberationis, pugnandi vincendique virtutem? Id profecto nemo est qui non videat. Atqui gratia liberationis per Augustinum non est adjutorium in quo Adam permaneret si vellet, non quo fieret ut vellet, sed est gratia potentior, quæ etiam fit ut velit, nimirum adjutorium quo, & gratia efficax: Igitur per Augustinum Adam gratia efficaci ac prædeterminante minime ad perseverandum egebat.*

Ait Reginaldus utique potentior gratiam post Adæ lapsum requiri; nam homini innocenti necessaria erat, ut sese applicaret ad actum, nunc vero est necessaria etiam ad vincendam concupiscentiam: fuisse in statu innocentie victricem unico titulo dependentiæ a primæ causa; at jam talem esse duplici capite, dependentiæ, & infirmitatis. Exemplum addit Hyacinthus Serry scalæ, quæ ut in locum ascendant prominentem egent tam ægrotus, quam bene valens, sed de isto dicimus sat virum habere seipso, quod illi scala adminiculum duntaxat adferat, ut arduo operi valeat vires suas applicare.

Non reponam hæc subterfugia Thomistarum, ut in nos eruat

ipse P. Serry vir quidem fervidior ingenii, *gerras esse, gerras, easque vanissimas*. Absit. Sunt tamen inventa ab Augustini sensu remotissima. Medicinalem Salvatoris gratiam vulnera sanare concupiscentiæ, & etiam facere ut homo velit & actu operetur, quis Augustini discipulus inficiari audebit? Non hæc a viris doctissimis nos divellunt. Dicimus Adam in statu innocentie non indiguisse neque auxilio sanante cum non esset infirmus, neque prædeterminante cum velle & non velle in ejus esset arbitrio. Jam constat Adamum adhuc in bonis Creatoris sui permanentem, non opus habuisse potentiori gratia, quæ confertur hominibus periclitantibus in corpore mortis hujus: At Augustinus huic tantum gratiæ potentiori, quæ est gratia per Christum, gratia medicinalis, gratia concupiscentiæ victrix, tribuit quod operetur in nobis *velle*: Ergo Adam si ad perseverandum non opus habebat hoc potentiori auxilio, neque indigebat gratia, quæ dat, *velle*, seu prædeterminante. Minor est ipsius Augustini dicentis: *Hæc est prima Gratia, qua data est primo Adam: sed hæc potentior est in secundo Adam. Prima est enim, qua fit, ut habeat homo justitiam si velit. Secunda ergo plus potest, qua etiam fit, ut velit, & tantum velit, tantoque ardore diligat, ut carnis voluptatem contraria concupiscentem voluntate spiritus vincat*. Ex quibus fit manifestum, nisi tenebras luci velimus offundere, gratiam, qua fit ut velimus, esse gratiam in secundo Adam, nimirum gratiam medicinalem tantummodo.

Præterea sive indiget homo gratia unico titulo, sive duplici, dummodo sit efficax trahatque secum opus certa consecutione, id non reddit gratiam potentiolem, sed solam indigentiam in subiecto majorem, minoremve demonstrat. Quid enim arguit discriminis ex parte baptismatis si in puero maculam abstergat originale, in adulto diluat & originale & actuale? In Eucharistia, si in uno producat tantum, augmentum gratiæ, in altero deleat quoque peccatorum reliquias? Quenam discrepantia in corporis alimento, si pubescentes augeat & nutriat, grandævos aliat nutriatque, non augeat? Quid accidit baculo, si via incedens lubrica eo eget ne labatur pede, & alius aut ætate gravis, aut valetudine, illo utitur & ne labatur, & ut regatur? Ergo non recte dixeris auxilium secundi Adam potentius auxilio Adam primi, si fuisset utrumque efficax, & suapte natura ipsam donans perseverantiam; etiam si in statu innocentie fuerit ex uno capite necessarium, sit vero post Adæ lapsum multiplici. Id enim non gratiam potentiolem ostendit, sed majorem hominum lapsum necessitatem. Imo in Thomistarum sententia illa gratia prædeterminans in statu innocentie fuisset vere ac proprie medicinalis, quoniam licet non mederetur vulneribus, esset tamen medicamentum, si vulnera adefsent: nam medicinalis est herba etiam si impositis plagis non applicetur, & vireseat adhuc in horto, aut fervetur vasculis pharmacopolæ. Igitur a vi effectri-

efficace, non a sanitate actualiter præstita appellanda est gratia efficax, & potentior. Exemplum Hyacinthi Serry videtur explicandæ sententiæ nostræ aptissimum. Eget sanus, ut murum conscendat, adminiculo scalæ; eget ægrotus. Gratia homini innocenti, hominique infirmo necessaria est. Vir sanus sua manu scalam apat muro: Gratiam homo innocens arbitrio suo applicat & determinat. Aegrotus habet scalam, sed nequit ob virium imbecillitatem illam e terra elevare, neque muro admove. Infirmitas gratiam habet sufficientem, sed alia indiget validiori, qua determinetur ad opus. Quare homo innocens non indigebat prædeterminante auxilio, sed poterat illud per liberum arbitrium determinare; quemadmodum vir bene valens propriis viribus admoveit muro scalam.

In confirmationem Augustinianæ doctrinæ illud etiam accedit, quod sententia de gratia efficaci & de prædestinatione gratuita taliter connectuntur invicem, ut nequeat una absque altera substineri. Atqui per Augustinum in statu solius naturæ lapsæ prædestinatio gratuita est: Ergo in solo statu naturæ lapsæ admittenda est gratia efficax. Minor probatur ex eodem lib. cap. xi. ubi ait: *Nunc autem per peccatum perdit bono merito, in his qui liberantur, factum est donum gratiæ, quæ merces meriti futura erat.* Et lib. 14. de Civit. Dei cap. 28. *Non eos jam meritis discernens, quandoquidem universa massa tanquam in vitiata radice damnata est, sed gratia discernens.* Fateamur itaque post casum hominis pertinere ad gratiam, ut quisque accedat ad Deum: subventum esse infirmitati voluntatis humanæ, ut divina gratia indeclinabiliter & insuperabiliter ageretur: homini innocenti ac fortissimo permisisse Deum facere quod vellet: datam huic perseverantiæ potestatem, & bonum posse non deserere: non opus habuisse adjutorio, quod plus potest, & facit ut homo velit: istud pertinere ad gratiam Christi medicinalem;

*Nam si nunc etiam illasus vigor ille maneret,
In quo insons natura fuit, sua quemque voluntas
Conciliare Deo, pænæque absolvere posset.*

Inquit Carm. de Ingratis cap. 42. Sanctus Prosper.

PROPOSITIO II. Non recedit a superiori sententia Doctor Angelicus.

S. Thomam Aquinatem, quem ipse Janſenius appellat Augustinum contractum potius nobis, quam Thomistis suffragari, quamquam hi nullam vel minimam de Præceptoris sui mente conceperint suspitionem, ut certum credo, aut saltem arbitror probabilius. Nam liquet primo, D. Thomam nullibi statuiffe prædeterminationem necessariam ex capite dependentiæ, quo unico titulo gratia efficax in statu naturæ innocentis asseritur necessaria. Deinde utriusque status diversitatem, cum Augustino non uno tradit in loco, ac præsertim 1. 2. quæst. 109. art. 9. in corpore, art. 7. ad 3. art. 8. & 9. in corp. quæst. 3. de malo art. 1. ad 9. ubi proculdubio ex contracta per peccatum originale infirmitate

mitate specialis divinæ motionis necessitatem inculcat; ut falsi sint, & a veritate recedant, qui asserunt beatum Thomam nullum inter utrumque statum agnovisse discrimen. Quæ cum fateantur Thomistæ, non est cur Angelici Doctoris verba exscribamus. At isti eo sensu Magistrum interpretantur, quod homini stanti necessaria fuerit gratia efficax titulo dependentiæ, nunc vero necessaria sit etiam causa infirmitatis: quod ego donec videam, audiamque, & librata lance expendam clarissima testimonia, non possum, quantum ad rationem dependentiæ attinet, profiteri. Nam hanc salvari per universalem præmotionem & concursum immediatum verissima sententia est, ut demonstratum est supra, etiam non admisa prædeterminante motione.

Sed accedit quoque speciale argumentum. Disputat S. Thomas prima 2. quæst. c. x. art. x. Utrum homo in gratia constitutus indigeat auxilio gratiæ ad perseverandum; & tertio loco proponit hoc argumentum: *Præterea sicut Apostolus dicit ad Romanos v., plus restitutum est homini per donum Christi, quam amisit per peccatum Adæ. Sed Adæ accepit unde posset perseverare: Ergo multo magis nobis restituitur per gratiam Christi, ut perseverare possimus; & ita homo non indiget gratia ad perseverandum.* Quæstionem pertractat, ut constat ex corpore, de homine constituto in gratia habituali, & respondet præter hanc gratiam habitualement hominem indigere *Divino auxilio ipsum dirigente contra tentationum impulsus.* Respondet ne argumento etiam Adamo necessarium fuisse ad perseverandum auxilium gratiæ prædeterminantis, non quidem ad superandos tentationum impulsus, sed ad salvandam ejus dependentiam a prima causa? Minime gentium. Respondet latissimam esse disparitatem, Adamum in bonis positum. Creatoris virtutis ad perseverandum inopem non fuisse; conferri nobis actualement perseverantiam meritis Redemptoris: & tamen primum hominem hoc munere destitutum facilius potuisse perseverare, quam nunc possumus. *Ad tertium, inquit, dicendum, quod sicut Augustinus dicit, homo in primo statu accepit donum, per quod perseverare posset, non autem accepit ut perseveraret: nunc autem per gratiam Christi multi accipiunt, & donum gratiæ, quo perseverare possunt, & alterius eis datur quod perseverent. Et sic donum Christi est majus quam delictum Adæ. Es tamen facilius homo per gratiæ dona perseverare poterat in statu innocentia, in quo nulla erat rebellio carnis ad spiritum, quam nunc possumus, quando reparatio gratiæ Christi etsi sic inchoata quantum ad mentem, nondum tamen est consummata quantum ad carnem, quod erit in patria.* Similia, & longe his clariora habet S. Thomas 2. 2. quæst. cxxxv. art. 4. *Ad secundum (inquit) dicendum, quod sicut Augustinus dicit in lib. de Corrept. & Grat. primo homini datum est, non ut perseveraret, sed ut perseverare posset per liberum arbitrium: quia nulla corruptio tunc erat in humana natura, quæ*

quæ perseverandi difficultatem præberet. Sed nunc prædestinatis per gratiam Christi non solum datur ut perseverare possint, sed ut perseverent. Unde primus homo nullo terrente contra Dei terrentis imperium libero usus arbitrio, non stetit in tanta felicitate cum tanta non peccandi facilitate. Isti autem saviente mundo ne starent, steterunt in fide. Quæ verba adeo clara sunt, ut nulla indigeant explicatione.

Nobilissimi Thomistæ ajunt de mente Angelici Doctoris non esse ambigendum, ipsum requirere pro statu naturæ integræ auxilium gratiæ efficacis 1. part. quæst. 109. art. 2. & art. 3. & 9. seqq. esse ejus verba luce clariora meridiei. Vide Card. Gotti tom. 3. quæst. vi. de scientia condit. dub. viii. §. 2.

Qui præmotionem universalem adstruunt, qualem nos explicavimus, indefinentem scilicet illuminationem mentis, & inclinationem voluntatis ad bonum generatim sumptum, quam Deus imprimat voluntati, servatque per jugem conservationem; hi non habent Sanctum Thoniam sibi adversantem. Priori loco citato: *In utroque statu*, inquit, *indiget homo auxilio divino, ut ab ipso moveatur ad bene agendum.* Audio Auxilium gratiæ moventis, non audio prædeterminantis. Secundo loco habet Angelicus: *Homo in statu naturæ integræ non indigebat dono gratiæ superadditæ naturalibus bonis ad diligendum Deum naturaliter super omnia, licet indigeret auxilio Dei ad hoc eum moventis: sed in statu naturæ corruptæ indiget homo etiam ad hoc auxilio gratiæ naturam sanantis.* Moventis dixit, non efficaciter præmoventis, qualis est gratia sanans, qua non solum datur hominibus ut perseverare possint, sed ut perseverent. Postremo loco: *Nulla*, inquit, *res creata potest in quemcumque actum prodire, nisi virtute motionis divinæ.* Ex qua generali ratione probat necessitatem gratiæ etiam in primo homine, additque statim pro natura infirma specialem rationem, idest servitutem legis peccati. Bene habet. Inveni rursus nomen *motionis* universalis, & gratiæ *sanantis*; & nihil ultra. Hi sunt firmissimi Adversariorum nostrorum recessus, & summorum virorum invictissima propugnacula.

PROPOSITIO III. Consentit hætenus dictis Aegidius Romanus.

Nobis quidem solemne non est jurare in verba alicujus Magistri, præsertim si latum unguem discedat ab Augustino; nam ubi cautum est Aegidio nomen dare ad servandam in Scholis uniformitatem doctrinæ Const. nostrarum part. v. cap. 2., ibidem est severiori lege sanctum, ne S. Patris, in his præcipue controversiis, quæ ad gratiam spectant, a semitis desectamus; datumque humaniter de aliorum placitis pro libito disputare. Sed quoniam Thomistæ, & qui inter nos de Aegidii nomine nuncupantur, clamitant Eremitanos Italos, Flandrosque Aegidianæ Scholæ nuncium misisse; pugnaciter pygmæus cum Hercule contendo illos Aegidium deferuisse, nos vero hæc in parte, quæ

una

una inter nos paries est divisionis, Doctoris placita consecrari :

Aegidius dist. iv. in 2. sent. art. 4. ait . *Adhærere Deo amore casto in statu naturæ corruptæ non potest esse sine gratia, sed in statu naturæ institutæ potuit hoc esse per puritatem & innocentiam* . Fulgentius Bellelli vir cum dignitate , tum doctrina conspicuus lib. 2. de Mente Augustini cap. 19. arbitratur sentire Aegidium , quod Creatura innocens potuerit absque ulla gratia actuali bonum agere , atque ita pro sententia nostra ratiocinatur : *Si bene agere potuit nudum sine ulla gratia arbitrium ; quanto magis id poterit cum supernaturali adiutorio , etsi versatili ?* Aliter ego interpretor verba Aegidii , atque idem infero manifestius . Placuit illi Angelos & Adam conditos cum iustitia originali , quæ tamen non esset gratia gratum faciens , sed solum subiectio inferiorum partium superioribus , quæ , ut observat Eftius in 2. dist. 25. , & idem Bellelli capite laudati Operis primo , fuit plurium Antiquiorum opinio . Quapropter quando Aegidius ait Angelos & Adam conditos absque gratia , intelligendus est absque gratia habituali , ut animadvertit idem Doctor dist. xxix. dub. v. laterali : *Cum loquimur absolute de gratia , intelligimus de gratia gratum faciente* . Porro juxta Aegidium Deus simul cum natura contulit gratiam , & inclinationem , quam appellat amorem naturalem , quod simul cum natura fuerit primitus inspirata . Deus , inquit , *simul dedit angelis naturam & inclinationem* . Et hæc inclinatio licet esset consequens naturam , poterat tamen dici gratia , quia erat quid additum naturæ ; non enim fuit parvum donum simul cum natura dare angelis hujusmodi inclinationem . Quæ inclinatio , & amor naturalis dici potest , & gratia : naturalis , quia simul cum natura inspiratus ; gratia , quia fuit donum naturæ superadditum . Neque poterat Aegidius melius doctrinam suam contra futuros errores Baji communitare ; neque manifestius asserere creaturam innocentem non habuisse nudum absque ulla gratia arbitrium adversus interpretationem Bellelli . Illa autem inclinatio , ille amor , illa gratia naturæ superaddita fuit per Aegidium æque in singulis Angelis : *Ipsæ amor , addit , naturalis prout erat innocens & purus , quo omnes Angeli in instanti suæ creationis Deum dilexerunt , quædam gratia dici potest* . Cum vero omnes Angeli non permanferint in ea dilectione , consequens est non fuisse delectationem victricem , prædeterminantem atque efficacem . Lege clarissimum sui interpretem Aegidium .

Jam vero sic argumentor . Juxta Aegidium in statu naturæ corruptæ non potest homo adhærere Deo sine gratia ; at in statu innocentie id potuit per solum amorem naturalem , purum & innocentem : Atqui per Aegidium amor naturalis purus & innocens est illa inclinatio naturæ superaddita , sive gratia omnibus angelis collata , quæ profecto non fuit prædeterminans , nam alias angeli omnes steterunt : Ergo juxta Aegidium in statu innocentie poterat homo vel angelus adhærere

Deo

Deo atque perseverare absque ulla gratia prædeterminante, & cum sola inclinatione ac dilectione singulis ex æquo collata. Major est ejusdem Aegidii, & minor constat ex dictis.

Rursus Aegidius dist. xxix. art. 2. dub. 1. lat. docet Adam per solam originalem justitiam, quæ importat subjectionem partium inferiorum ad superiora, potuisse stare & evitare peccata, non tamen potuisse proficere & mereri: quod repetit seq. art. 3. affirmans quod idcirco non potuisset mereri, quoniam, ut diximus, supponit non habuisse gratiam gratum facientem: Atqui per Aegidium justitia originalis non importat gratiam prædeterminantem, sed solam creaturam puram conditam cum subordinatione carnis ad spiritum, & cum inclinatione gratiæ superaddita naturæ: Ergo per Aegidium potuit primus homo stare & evitare peccata absque ulla gratia prædeterminante. Confirmatur ex seq. art. 111. Si Adam quemadmodum habuit originalem justitiam habuisset etiam gratiam habitualement, nedum potuisset stare & evitare peccatum, sed etiam mereri & proficere; & ideo potuit stare, sed non potuit mereri, quia habuit originalem justitiam, sed non gratiam habitualement. Igitur juxta Aegidium in statu innocentie ut possit homo perseverare & mereri nil ultra requiritur, quàm justitia originalis & gratia gratum faciens. Omnes hæ argumentationes sunt verbis Aegidii compactæ.

Uterius eadem distinct. dub. iv. probat naturam integram non potuisse sese præservare a peccato sine originali justitia, *VEL sine ulteriori gratia*: quod demonstrat, quia ut homo præservet se a peccato, habeatque veram justitiam & æquitatem, requiritur inferiorum subiectio, quam innocentia præstat originalis; & quæ nisi sit, necessaria est ulterior gratia ut comprimat motus, qui insurgunt in sensualitate repugnantes rationi: Igitur ubi sit justitia originalis, ut natura integra possit se præservare a peccato, non est juxta Aegidium necessaria *ulterior gratia*. Et nota quod per ulteriorem gratiam non potest Aegidius intelligere gratiam habitualement, nam ut constat ex præcedenti dub. 1. sine gratia habituali poterat creatura innocens sese præservare a peccato cum sola originali justitia. Miror neminem ex nostris, qui profiteretur se Aegidianos nunquam hæc observasse.

Magister Gavardi, & Hyacinthus Serry citant Aegidium pro eâ quam tenent sententia P. 1. Hexam. cap. xv. & P. 2. cap. 111. & xxxi. Nullum alium locum commendant. Sed in his locis Aegidius solum docet Angelos primum fuisse productos, postea distinctos: primo naturam angelicam significatam fuisse per cælum, deinde per lucem. Vellem audire Aegidium asserentem Angelos bonos fuisse distinctos uberiori efficacia gratiæ adjutorio. At frustra id citatis locis requireres. Quid sibi velit Aegidius ex ejus verbis satis superque intelligimus. Eo loci, & etiam dist. 1v. in 2. sent. docet inter creationem angelorum & gratiam

tiam habitualem fuisse aliquam moram, ac principio collatam illis originalem iustitiam, postea gratiam gratum facientem. En quomodo Angeli prius fuerunt producti, postea distincti: primo fuerunt cælum, deinde lux. Fuerunt producti cum originali iustitia, distincti per gratiam habitualement: facti cælum per conditionem naturæ, lux per gratiam, lux autem a tenebris divisa per confirmationem in gratia, & per conversionem bonorum, malorumque aversionem. Imo num Angeli distincti fuerint a Deo, vel a seipsis, præterit Aegidius alto silentio: quantum utrumque verum est, nempe distinctos a Deo per confirmationem in gratia, distinctos seipsis per conversionem ad Deum. Ergo nos utique ab Aegidio recedimus, uti nonnulli ex nostris conqueruntur.

C A P U T IX.

Argumenta opposita refutantur.

O PP. 1. S. P. Aug. lib. xii. de Civ. Dei cap. 9. ait: *Aut minorem Angeli mali acceperunt amoris divini gratiam, quàm illi qui in ea persisterunt; aut si utrique boni creati sunt, istis mala voluntate cadentibus, illi amplius adjuti ad eam beatitudinis plenitudinem, unde se nunquam casuros certissimi fierent, pervenerunt.* Ergo per Augustinum Angeli qui perseveraverunt majori gratiæ suffulti sunt auxilio.

Non una est Theologorum ad hoc potissimum Thomistarum argumentum responsio. Affirmant quidam, S. Patrem hanc sub vitæ finem, in libro scilicet de Corrept. & Gratia retractasse sententiam; ita sentit, sed ut arbitror nulla ductus ratione Franciscus Henno. Putant alii Angelos, qui perseveraverunt, adjutos fuisse validiori gratia, non tamen efficaci, sed in eodem gratiæ genere, versatili nimirum atque ab Angelorum pendula arbitrio, ut censet Macedo. Quidam asserunt Angelos permanentes fuisse magis adjutos eo sensu, quod usi sunt adjutorio dato sibi divinitus, dum alii otiosum illud cassumque reddiderunt. Sed vera est, & Augustino conformior responsio Angelos qui perseveraverunt, cum possent a Deo in ancipiti statione relinqui, in præmium perseverantiæ cumulosos fuisse tanta mentis illustratione, tantaque plenitudine caritatis, ut certissime noverint se in posterum nunquam ab originali iustitia fore casuros. Quod apertissime explicat S. P. de Corrept. & grat. cap. x. dicens: *Diabolus vero & Angeli ejus etsi beati erant, erat tamen quod adhuc eorum adderetur beatitudini, si per liberum arbitrium in veritate stetissent; donec istam summam beatitudinis plenitudinem tanquam præmium ipsius permanens acciperent: id est ut magna per Spiritum Sanctum data abundantia caritatis, cadere ulterius omnino non possent, & de se hoc certissime scirent.* Itaque illud prius amplius adjuti ad beatitudinis plenitudinem pervenerunt & istud postea

posterius, *magna per Spiritum Sanctum data abundantia caritatis, &c.* unum idemque sunt. Igitur dist. conseq. Angeli, qui perseveraverunt, fuerunt magis adjuti, & hoc adjutorium est adjutorium perseverantiæ, nego; est major abundantia caritatis accepta posteaquam per liberum arbitrium in veritate steterunt, concedo.

Atque ut omnis præcludatur aditus adversariis; notandum est, omnes fere ex nostris, hujusmodi majus adjutorium appellare adjutorium *patriæ*, non *viæ*. Quod oppugnatoribus præbet ansum insurgendi: Quomodo Angeli Sancti fuerunt magis adjuti auxilio patriæ, ut pervenirent ad patriam? Certe, inquit P. Serry, atque ante illum Guilelmus Estius, quod non habetur nisi in termino, medium non est quo perveniatur ad terminum; at lumen gloriæ non habetur nisi in termino: ideoque non potest esse medium, quo perveniatur ad gloriam. Itaque Augustinus non ait, Sanctos Angelos fuisse magis adjutos ut pervenirent ad gloriam, & beatitudinem. Mimine. Scribit magis adjutos pervenisse ad plenitudinem beatitudinis. Jam erant beati, erat tamen quod eorum adderetur beatitudini: deerat illis major abundantia caritatis: deerat certitudo, qua scirent se amplius non esse casuros. En plenitudo beatitudinis: id superadditum est, posteaquam per liberum arbitrium in veritate steterunt. Quam beatitudinis plenitudinem, majoremque abundantiam caritatis ideo dicimus auxilium patriæ, quod secum trahat certitudinem & inamissibilitatem beatitudinis, non quod auxilio isto Angeli Sancti perseverarent, & pervenirent ad patriam. Accessit enim adjutorium istud postquam perseveraverunt, non antea. Attende num id verum sit. Quando angeli mali ceciderunt boni perseverarunt: sed Angeli Sancti receperunt per Augustinum majorem divini amoris gratiam, certamque suæ beatitudinis scientiam postquam angeli mali ceciderant: Ergo donati sunt majori gratia postquam perseveraverant, non, ut adversarii comminiscuntur, ut perseverarent reipsa. Minor propositio est ejusdem Augustini lib. xi. præcedenti de Civit. Dei cap. xiii. *Si pares fuerunt, POST ISTORUM RUINAM illis certa scientia sua sempiterna felicitatis accessit.* Quapropter ea propositio, *Fuerunt adjuti auxilio Patriæ ut pervenirent ad patriam*, falsa est, neque a nobis perfertur: hæc vero, *Postquam in veritate steterunt, fuerunt adjuti pleniori caritate & scientia, quæ secum trahit beatitudinem inamissibilem patriæ*, & vera est, & Augustiniana est, & frustra sophismatum impetitur machinamentis.

Denique cum multi diversa instantia in Angelorum via distinguant, & in angelis malis multa demerita, quod facit etiam Doctor Subtilis; cur affirmare non possumus Angelos malos in primo instanti superbia tumidos corruisse, bonos autem humili conditionis creatæ consideratione stantes uberiorem gratiam postulasse: in altero instanti superbos

angelos fuisse a Deo relictos, bonos vero confirmatos in gratia, & majori abundantia caritatis donatos: ac demum in tertio apostatas angelos sempiternis suppliciis addictos, perseverantes gloria beatitudinis coronatos; & consequenter gratiæ confirmationem, vegetioremque caritatem fuisse adjutorium *viæ*, non necessarium ad perseverandum, sed datum, in præmium perseverantiæ, ut facilius ad beatitudinem pervenirent? Hæc quidem rationi consentanea sunt; nam si diutius in propriæ libertatis relictis essent indifferentia cum sola gratia versatili, deficere & ipsi angeli boni potuissent; ideoque cadentibus aliis steterunt ipsi, sed propriæ conscii imbecillitatis, & facti aliorum, qui ruebant, timidiore exemplo, majorem gratiam postularunt, habuerunt, tantoque ardore dilexerunt Creatorem suum, ut statim ei perpetuæ felicitatis copularentur consortio. Sed de priori argumento satis: reliqua persequamur.

Opp. 2. Angeli boni non poterant se reddere meliores, & ab aliis discerni seipsis: Atqui si perseverassent cum solo adjutorio gratiæ versatilis, seipsis facti fuissent meliores: Ergo non poterant cum solo adjutorio gratiæ versatilis perseverare. Prob. major ex Aug. eodem loco dicente: *Si autem Angeli boni fuerunt prius sine bona voluntate, eamque in seipsis Deo non operante fecerunt, ergo meliores a seipso, quam ab illo facti sunt? Absit.*

Resp. dist. min. Facti meliores fuissent seipsis, idest solo naturali arbitrio, & nullo adjutorio gratiæ præventi, nego: idest arbitrio suo cum gratia Conditoris in bona voluntate permanentes, concedo. Id solum Augustinus docet, bonos Angelos non fecisse sese meliores angelis malis, quoniam utrique conditi in bona voluntate, & in gratia habituali fuerunt, in qua illi non virtute arbitrii nativa, sed gratiæ beneficio steterunt, quod cujus generis fuerit, an efficax, an indifferens ad Augustini scopum definire minime pertinebat. Qualecunque enim fuerit, semper gratia Dei effecti sunt meliores, cum gratia fuerit bona voluntas primordio eis inspirata, gratia illustratio mentis superna, gratia auxilium *sine quo* non poterant in accepta persistere sanctitate. Explicat semet Augustinus, dicens ibidem: *Neque enim Angeli seipsis meliores fecerunt, quando a Deo facti sunt, sed in eadem bona voluntate permanserunt, in qua primum conditi sunt.*

Opp. 3. Pertinet etiam ad angelos dictum illud Apost. in 1. ad Corinth. *Quid habes quod non accepisti? Si autem accepisti, quid gloriaris quasi non acceperis?* At Augustinus ex eo principio demonstrat contra Pelagianos necessitatem gratiæ viatricis in statu naturæ lapsæ: Ergo istiusmodi gratia erat etiam in statu innocentiae ad perseverandum necessaria. Profecto monitum Apostolicum etiam ad Angelos pertinere affirmat S. P. lib. x1. de Civit. Dei cap. 19.

Resp. conc. majorem. Etenim etiam Angeli a Deo virtutem acceperunt

perunt perseverantiæ, sed non eodem modo, quo filii Adam; in illis enim supernaturalis virtus dabat ut possent perseverare; in his præstat ulterius ut actualiter perseverent. Atque dist. minor. Ex præfato Apostolico testimonio probat Augustinus contra Pelagianos necessitatem gratiæ victricis, ita ut necessitas gratiæ, prout contradistinguitur a donis naturalibus, eruatur inde invictissime, concedo: ita ut necessitas gratiæ victricis, quatenus a gratia indifferenti secernitur, ex verbis Apostolicis evineatur sine suppositione vulneratæ per originale peccatum naturæ, nego. Quidquid creatura habet, desursum est, ac beneficium liberalissimum Largitoris, neque ullatenus gloriari illa potest, nisi in Domino. Si Angeli absque ulla gratia creati essent, sibi que sola naturali virtute sanctitatem & iustitiam comparassent, gloriari utique potuissent se habere quod a Domino non acceperunt; & si homo fractis viribus, ignarus, pugna sensuum suorum laeessitus cum sola gratia versatili posset bonum agere; posset gloriari se infirmum debilemque tantum perficere, quantum Angeli præstiterunt, & quantum primus homo non fecit. Itaque ex Apostoli textu nulla facta statuum comparatione probatur necessitas gratiæ, prout gratia est donum naturæ superadditum, præscindendo an gratia istiusmodi indifferens sit, an prædeterminans, idque in unoquoque statu magnum est argumenti pondus: at si circumstantiæ superaddantur infirmitatis, demonstratur inde validioris gratiæ adminiculum, quod non spectat naturæ conditionem, sed lapsum. Nequit homo sive infirmus sit, sive sanus vivere absque alimentis, quæ Conditoris providentia ministrat: Si desint hæc, necesse est moriatur: si quis absque Conditoris munere fata conderet, pararetque alimonia, superbire posset, quod se propria industria servaret. Hæc ratio communis est tam homini infirmo, quam sano. At mala valetudine affectus nedum eget alimentis quæcunque sint, sed talibus, quibus & vita servari possit, & vires deperditæ reparentur. Aliunde repetitur necessitas alimentorum; aliunde talium alimentorum: prima est necessitas orta ex conditione naturæ; hæc vero necessitas proveniens ex contracta virium infirmitate. Hoc allato exemplo de gratiæ necessitate loquitur S. P. lib. de Corrept. & Grat. cap. xii. & lib. xiv. de Civ. Dei cap. 27.

Opp. 4. Debit creatura innoeens ut perseveraret suppliciter orare Deum, & auxilium gratiæ humiliter postulare: Ergo gratiam, quæ ad actualem requiritur perseverantiam, non habuit; cum oratio imperatoria sit, & nihil petatur, nisi quod ab aliena liberalitate conceditur. Atque hinc est quod ex Orationibus Ecclesiæ probat Augustinus efficaciam gratiæ necessitatem. Prob. ant. ex Libello Gelasii adversus Pelagianos, qui habetur Tom. iv. Conciliorum Philippi Labbei, ubi Romanus Pontifex ait: *Illam primam conditionis integritatem, dum ita de se fidei, tanquam ipso qui considerat non egeret; nec de perceptis agit gra-*

gratias, quod nusquam fecisse memoratur, nec pro conservandis quæ jussu fuerat poscit auxilium, nec ad eum etiam pulsata tentatoris accessu devota concurrit, & consulit, suæque se credit inter prospera voluntati, facile sine præsidio Creatoris patuit insidiis deceptoris; & in pravavicationem tracta consequenter illiciti, conditionem præfixæ mortis invenit.

Resp. dist. antec. Debit creatura innocens Deum orare oratione, gemitus, nego: oratione laudis, concedo. Appello orationem gemitus illam, qua petitur auxilium nondum collatum: orationem laudis, qua de accepto auxilio gratiæ Deo referuntur. Sic pauper stipem postulat gemitu dum percellitur fame: sed accepta elemosyna laudat divitem misericordem, petitque ne se in posterum derelinquat. Ergo creatura innocens, quoniam originalem justitiam ac bonam voluntatem acceperat ex liberalitate Creatoris, tenebatur animadvertere se divini muneris conservatione indigere: atque in hoc erravit magnopere Adam, & malus angelus; quod prioribus verbis significat Gelasius Papa, dicens: *Dum ita de se fidit, tanquam ipso, qui considerat, non egeret.* Tenebatur insuper omnium donorum largitori humiles gratias rependere; nam beneficiorum oblivisci vitium est ingratitudeinis detestabile: quod damnans Gelasius subdit: *Nec de perceptis agit gratias, quod nusquam fecisse memoratur.* Tenebatur quoque pulsante tentatione orare ne divino destitueretur auxilio, quod, etsi presto aderat, poterat illud Altissimus, qui donorum suorum est Dominus, subtrahere: & ideo addit Romanus Pontifex: *Nec ad eum pulsata tentatoris accessu devota concurrit.* Quod autem creatura innocens teneretur petere gemebunda uberius victricis gratiæ adjutorium, frustra Adversarii ex verbis Gelasii conabuntur nobis insinuare. Persisterent non voluerunt Angeli & Adam, quod Dei gratiam in vacuum receperint, *nec de perceptis gratias referendo, nec ut eadem intemperate durarent, suppliciter implorando,* ut repetit S. Gelasius paulo infra. Itaque si orasent oratione laudis, & implorassent ut accepta dona intemperate conservarentur, absque prædeterminante gratia perseverassent. Quo argumenti genere utitur Gelasius contra Pelagianos, quasi diceret: Fuit necessaria gratia creaturæ innocenti, ergo a fortiori indiget illa homo lapsus: si illa superbiendo, ac nimium de se fidens in veritate non stetit; quomodo nunc stare præsumat viribus confracta, ac vulnere sauciata lethali? Atque argumentum istud est etiam in Augustini libris usitatissimum. Hæc malo respondere, quam reponere, Gelasium diversa ab Augustino sentire.

Opp. 5. In Augustini libro de Cantico novo cap. 8. habetur: *Quid valeat liberum arbitrium non adjutum, in ipso Adamo monstratum est.*

Resp. (quamvis citatum librum non esse Augustini communiter cen-

confeant Critici, quod neque in libris Retraët. neque in indiculo Possidii memoretur, id verum esse absque ullo gratiæ versatilis præjudicio. Primo monstratum est in Adamo cum sola gratia indifferente hominem esse in manu consilii sui, & posse sive ad ignem sive ad aquam porrigere manum; quum per efficacem gratiam Salvatoris regatur omnipotenti dextera Dei, & quamvis infirmus non tamen deficiat, neque aduersitate aliqua superetur. Deinde in Adamo monstratum est, arbitrium non adjutum, scilicet virium suarum confidentia Dei munera, pefsumdans ac sponte abjiciens, & sic propriis viribus relictum, posse tantum peccare; veluti in claudo, qui projiciat omne sustentaculum & cadat, apparet non posse baculo destitutum incedere. Hanc interpretationem tradit apertissime S. P. serm. xi. de Verbis Apostoli, dicens: *Regebat eum ipse qui fecerat; voluit deferere eum a quo factus est: permisit Deus tanquam dicens, deferat me & inueniat se, & miseria sua probeat, quia nihil potest sine me. Hoc modo ergo ostendere, voluit Deus, quid liberum arbitrium valeat sine Deo.* Perperam igitur exponunt Thomistæ verba Augustini, quasi in Adam monstratum sit, quod sine gratia efficaci non poterat permanere: cum ibi intelligatur arbitrium nedum destitutum gratia efficaci, verum etiam deferens eum a quo factus est, relictum propriis viribus, abjiciens munera Conditoris, fidens sibi ipsi, & parvipendens adjutorium, sine quo non poterat perseverare, potuisset tamen nisi superbiendo sibi metipsi maluisset blandiri.

Opp. 6. In statu quoque innocentiae juxta Augustini placita adstrui debet gratuita prædestinatio; Igitur & gratia victrix ac prædeterminans. Probatur ant. exemplo Christi, qui absque ulla meritum prævisione electus est: unde Augustinus in lib. de Prædest. SS. cap. xv. inquit: *Est etiam præclarissimum lumen prædestinationis & gratiæ ipse Salvator, ipse mediator Dei, & hominum Christus Jesus.*

Resp. nego ant. Ostendimus enim sup. capite in statu innocentiae prædestinationem fuisse arbitrii mercedem, nunc vero gratiam liberationis, quod accipiendum est de arbitrio gratia Dei suffulto, & de mercede reddenda meritis gratia comparatis, sed gratia versatili ac propria illius status; nam merita naturalia etiam hominis integri commentitia sunt, ut definitum est a Summis Pontif. Pio V. & Gregorio XIII. Ad probat. dico non eandem esse de Christo, & de simplici creatura rationem. Nam Christus primogenitus multorum fratrum & caput prædestinatorum spectat ad Ecclesiam istam, quam acquisivit sanguine suo: & in unoquoque corpore eadem est vita capitis & membrorum, in unaquaque Ecclesia eadem gratia Capitis & Fidelium, qui spirituales vitam ex eo hauriunt ac participant. Propterea cum nos efficacibus indigeamus adiutoriis, etiam Redemptori nostro collata sunt, non ob ejus necessitatem, sed propter Ecclesiæ sponsæ suæ participationem

tionem atque ornamentum. Quamquam Augustinus qualem gratiam habuerit Christus expresse non meminit; videtur autem talem esse ejusdem sensum verborum: Sicut Christus ut esset hominum Redemptor, & unionem haberet hypostaticam, nullis præcedentibus meritis creditur prædestinatus; ita nos ad initium fidei & ad gratiam, atque in hac perditionis massa etiam ad gloriam, nullo meritorum intuitu fuimus præordinati. *Sicut ergo prædestinatus est ille unus, ut caput nostrum esset, ita multi prædestinati sumus, ut membra ejus essemus. Humana hic merita conticescant, quæ perierunt per Adam, & regnet quæ regnat Dei gratia, per Jesum Christum Dominum nostrum:* ait ibidem S. Pater.

Opp. 7. Adversantur traditæ statuum divisioni præclarissimi Ecclesiæ Patres: Fulgentius, qui lib. II. ad Trasimundum. cap. 2. scribit eandem gratiam custodisse angelum a ruina & reparasse hominem lapsum: Gregorius, qui lib. XV. Moralium cap. XXXI. ad occulta judicia Dei, non ad merita refert, quod ex angelis aliquos sempiterna beatitudine donaverit, alios æternis addiderit cruciatibus: universa demum Ecclesia, quæ vetat anathemate, ne asseramus bonis angelis, & primo homini, si ad ultimum vitæ perseverasset, felicitatem futuram fuisse mercedem, non gratiam.

Resp. Fulgentium gratiam Conditoris & gratiam Reparatoris eandem appellavisse non quantum ad vim effectricem, sed quantum ad principium, & virtutem Dei omnipotentis, qui eam impertitur. Constat ex eodem Fulgentio, cujus hæc sunt verba: *Una est in utroque gratia operata, in hoc ut surgeret, in illo ne caderet: in illo ne vulneraretur, in isto ut sanaretur: ab hoc infirmitatem repulit, hunc infirmari non sinit. Illius esca, istius medicina. Hunc autem quisquis sanum supit, Filium Dei esse non ambigit, qui est virtus & sapientia Patris, sapientia immutabilis, virtus inseparabilis.* Quo trahunt, quæso, Thomistæ hunc locum, ex quo contra Arianos probatur Unigenitum Dei Filium, nedum hominem factum fuisse humani generis Salvatorem, sed etiam, ut Virtus & Sapientia Patris est, servatorem fuisse angelorum, & consequenter immutabilem Deum, & Patri consubstantialem? Hæc sunt egregia pro efficaci gratia testimonia? Si ita est; si eadem gratia quantum ad vim effectricem in utroque statu requiritur, quomodo erit potentior quæ sanat vulnera, & reprimit perduellam concupiscentiam? Et si validior est; quomodo est eadem? Sed lege Fulgentium in lib. de Fide ad Petrum cap. 3. diserte cum Augustino docentem angelos sanctos non fuisse a Deo majori gratia sanctæ dilectionis cumulatos, nisi postquam aliis cadentibus ipsi propria voluntate steterunt.

Gregorius vero ad inscrutabilia judicia Dei refert, non quod angeli boni steterint, aut mali ceciderint, sed quod Deus noluerit istis igno-

ignoscere, atque ad resipiscendum gratiam largiri: quod cum esset omnipotens, poterat si voluisset, & quare noluerit latet in altitudine divitiarum scientiæ suæ. Habet similia S. P. Augustinus lib. xi. de Gen. ad lit. cap. 10. quæ perperam ad se trahunt Adversarii. Quid enim ad illorum causam accedet, si fateamur Deum potuisse angelos desertores convertere, & cur noluerit penes ipsum esse, ut scribunt Gregorius & Augustinus? Id nullus ratione præditus negat: cur autem uni, non alteri donetur perseverantia; pertinet ad inscrutabilia, judicia Dei in hoc tantum statu, in quo uni misericorditer confertur, alteri juste denegatur; & quare huic conferatur, non illi, cum omnes in massa fuerint perditionis, causa nulla est, præter Dei beneplacitum. Hæc ad illum statum non pertinent, in quo perseverare aut non perseverare in libero erat arbitrio. Sed age, quandoquidem Magnum Gregorium laudavimus, audias illum hæc lib. v. Moral. cap. 28. scribentem: *Mire autem omnipotens Deus naturam summorum spirituum bonam sed mutabilem condidit, ut & qui permanere vellent, ruerent, & qui in conditione persisterent, tanto in ea jam dignius, quanto ex arbitrio starent; & eo majoris apud Deum meriti fierent, quo mutabilitatis suæ motum voluntatis statione fixissent.* Quidnam pro sententia nostra desideras manifestius? Porro & nos fateamur merita bonorum angelorum fuisse ex gratia; sed negamus fuisse ex gratia prædeterminante: unde quod ultimo loco opponebatur, urget Bajum, non Augustini discipulos.

Sunt quædam alia apud Hyacinthum Serry; sed ex dictis prorsus corrumpunt. Accusat nos antilogiæ, quod gratiæ prædestinationis simus propugnatores: sed angelos gratis prædestinatos quis hujus nostræ sententiæ assertor putavit unquam? Aut providentiam certam esse infallibilitate mediorum: at quis ex nobis in hac providentia, quæ infirmos spectat, naturam quoque integram comprehendit? Inquit nos statuere scientiam Dei esse causam rerum omnium: verum quis nostrum de omni penitus scientia, atque de æquali in omni eventu causalitate id fatetur? Hæc, & similia eadem exsufflantur, qua proferuntur, facilitate. Istius generis sunt, quæ afferuntur ex historia Congr. de Auxiliis, in qua Molinianus Orator die 22. Novemb. 1605. curavit evertere necessitatem gratiæ efficacis ex lib. de Corrept. & Grat. S. Augustini; nam quod Jesuita affirmaverit auxilium prædeterminans non esse necessarium ex dependentia causæ secundæ a prima, verum est: quod ex eo principio asseruerit non opus esse in hoc statu auxilio prædeterminante, falsum est: cum ex eodem Augustini libro demonstretur hujus auxilii necessitas ex capite infirmitatis. Quæ vero objiciunt alii Thomistæ ex ratione primi moventis, & indifferentiæ creaturarum, fuerunt omnia superius refutata: neque opus est reculantur hoc capite, in quo nimis forte ob Adversariorum meorum dignitatem lectores defatigavi.

C A P U T X.

*Sit ne scientia futurorum contingentium, de quibus
pertractatum est, appellanda juxta
consuetudinem Scholasticorum
Scientia Media.*

Primo hujus libri cap. diximus scientiam Dei comparate ad possibilia appellari in Scholis scientiam *simplicis intelligentiæ*, seu, ut vocant aliqui, naturalem: connotative vero ad res in aliqua temporis differentia existentes, *scientiam visionis*. Inter res possibiles atque existentes sunt aliquæ, inquit Ludovicus Molina in Concordia quæst. xxiii. art. 4., quæ non sunt quidem absolute futuræ, essent tamen, si aliqua poneretur conditio, V. G. si Tyrri ac Sidonii Christi virtutes ac signa vidissent, ad illum fuissent conversi: Si Deus in tali circumstantia peccantem ad resipiscentiam vocabit, aget is certocertius poenitentiam: quæ dicuntur futura conditionata, & a Deo certissime prævidentur, ut vidimus in cap. ii. prop. 3. Ergo quemadmodum inter possibilia & absolute futura mediant conditionata; ita inter scientiam *simplicis intelligentiæ* quæ spectat ad possibilia, & scientiam *visionis* quæ refertur ad res existentes & absolute futuras, mediat scientia conditionatorum, quæ appellatur *scientia media*. Rejiciunt hanc Thomistæ, quod nulla res percipi possit futura, nisi a Deo causæ secundæ prædeterminentur; & prædeterminatione supposita non possint non evenire; & consequenter affirmant quælibet futura a Deo cognosci per scientiam *visionis*. Quod si quæras, quomodo dari possit decretum efficax ac prædeterminans, & nihilominus res non sint absolute futuræ; respondent id esse, quoniam circa futura conditionata datur decretum efficax & absolutum ex parte Dei, sed conditionatum ex parte objecti.

Neque aliter sentiunt circa decretum Scotistæ, sed physicam prædeterminationem negant tamen, cum decretum divinum a præmotione sejungant; nam licet antecedens, extrinsecum voluntati creatæ censent omnino. Nostrates vero, qui gratiam prædeterminantem in hoc statu defendunt, sed necessariam non putant pro statu innocentie, neque prædeterminationem admittunt ad opera naturalia, neque ad *materiale* peccati, in his omnibus scientiam mediam profitentur, eam duntaxat relegantes ab operibus supernaturalibus status naturæ lapsæ: de quibus postmodum. Quidam arbitrantur futura conditionata, neque ad scientiam *visionis* pertinere, quod nullum extet de his decretum; neque ad scientiam *mediam*, quod istiusmodi futura, non sint diversa

a re-

a rebus possibilibus, nisi rationis nostræ figmento, ac nomine tenus; ideoque spectent ad scientiam naturalem, sive *simplicis intelligentiæ*. Atque hæc sententia & Thomistis, & Molinianis adversatur, & sive prædeterminationem defendas, sive rejicias, a vocabulo scientiæ *mediæ* semper abhorret: ut præ ceteris præstat in Promptuario divinæ Providentiæ vir eximius, & apud Hispanos Augustinenses celeberrimus Joseph a Villanova. Vides, ut arbitror, ab explicatione hujusce vocabuli *scientiæ mediæ* quæstionem istam pendere, ideoque de nomine, non de re disceptari. Sed meam de hac re sententiam excipias.

PROPOSITIO I. Si accipias *scientiam mediam* pro certa præscientiâ futurorum ordinis naturalis, sive supernaturalis in statu naturæ innocentis, necnon operum malorum ejusdem status absque ullo prædeterminante decreto, admitto vocabulum *scientiæ mediæ*.

Assentiuntur huic propositioni quotquot pro diversitate auxiliorum in utroque statu nobiscum pugnant. Et prob. Neque ad opera naturalia, neque ad supernaturalia naturæ integræ, neque ad peccata debet admitti decretum prædeterminans: Ergo, hæc non in decreto prædeterminante, sed tantum per scientiam mediam præcognoscuntur.

PROPOSITIO II. Præscientia peccatorum in statu naturæ lapsæ spectat ad scientiam *visionis*, non ad scientiam, quam vocant *mediam*.

Negant id qui nobiscum prædeterminationem ad *materiale* peccati rejiciunt, dicentes, Deus non prædefinit *materiale* peccati, ergo non prævidet peccata in decreto prædeterminante, sed per scientiam *mediam*. Verum peccata non sunt objectum *scientiæ mediæ*, quoniam non prædefiniuntur, sed alio ex capite. Necessaria est in hoc statu, ut actu vitentur peccata, gratia ab intrinseco efficax: hanc Deus aliquibus elargitur, aliquibus denegat: qui hac gratia privantur, possunt quidem per auxilia indifferenter moventia sese continere a peccatis, sed ob prædominantem cupiditatem, nisi efficaciter adjuventur, libere in scelera prolabantur. Jam vero sic arguuntur: Quod prævidetur a Deo sub conditione inferente, non est objectum *scientiæ mediæ*, sed scientiæ *visionis*: Peccata in statu naturæ lapsæ prævidentur sub conditione inferente: Igitur non sunt objectum *scientiæ mediæ*, sed scientiæ *visionis*. Negant minorem quidam ex nostris, propterea quod denegatio gratiæ efficacis non est conditio inferens peccatum, cum ideo quisquis peccet quia vult, non quia denegatur illi beneficium indebitum: & id quidem verum est; sed ego non constituo conditionem inferentem peccatum in denegatione gratiæ efficacis; sed illam conditionem statuo in ipsa libera voluntate affecta prædominantibus cupiditatibus, & tali pondere concupiscentiæ, ut sola gratia victrice possit molliiri. Quare ita minorem illam sic probo. Peccati vulnus, vesana cupiditas, perduellis concupiscentia est conditio inferens peccatum, ut sancta delectatio, & gratia victrix est conditio inferens meritum,

tametsi voluntas peccat quia vult, & meretur, quia gratia illi dat velle: sed in statu naturæ lapsæ præscientia meritorum pertinet ad scientiam *visionis*, quia prævidetur sub conditione gratiæ prædeterminantis: Ergo in statu naturæ lapsæ præscientia peccatorum spectat ad scientiam visionis, quoniam in hoc statu peccata prænoscentur sub conditione voluntatis ad malum cupiditate vehementi inclinatæ, & quæ libere quidem, sed certissime labitur, nisi gratia prædeterminante adjuvetur.

PROPOSITIO III. Si accipiatur *scientia media* pro cognitione conditionatorum, quæ non sit neque scientia *visionis*, neque scientia *simplicis intelligentiæ*, neque in præsentī statu, neque in statu innocentie locum habet.

Ita Joseph a Villanova disp. 11. dub. x. cap. 4. & dub. xi. cap. v. & dub. xiii. & probatur. Futura quæ reipsa non erunt, sed forent aliqua posita conditione, non sunt futura, sed possibilia: Possibilia sunt objectum scientiæ naturalis sive *simplicis intelligentiæ*: Sunt ergo objectum hujus scientiæ etiam futura, quæ non erunt reapse, sed forent hac, aut illa posita conditione. Probatur major: S. P. Augustinus lib. xxvi. contra Faustum cap. 4. ait: *Omnia quæ vere futura sunt sine dubio fient: si autem facta non fuerint, futura non erant*. Atqui futura Conditionata non erunt: Ergo non sunt vere futura, sed possibilia duntaxat.

Respondent Adversarii ex hoc evinci tantummodo quod non sint futura absoluta, non autem quod non sint futura conditionata. At sic persisto. Futura conditionata non sunt absolute futura, sed tantum dependenter a conditione: Conditiō non est futura, sed tantum possibilis: Ergo futura conditionata non sunt futura, sed possibilia. Rursus aut ponetur illa conditio, aut solummodo potest poni: Ex quo conditio aliqua ponenda sit actu, redditur res futura absolute: Igitur ex eo quod poni quidem possit, sed ponenda non sit; remanet res conditionata, tantum possibilis. Item ut transeat res futura de statu possibilitatis ad statum *futuritionis* non sufficit conditio tantum possibilis: quomodo enim quod in se *futuritionem* non habet, illam potest rebus tribuere? Tandem in idea ac perceptione rei futuræ venit id quod aliquando erit: Conditionata aliquando non erunt; ergo nequeunt appellari vere ac proprie futura.

Thomistæ, qui putant cognitionem futurorum conditionatorum, spectare ad scientiam *visionis*, respondent eadem evadere futura per decretum absolutum ex parte Dei, conditionatum ex parte objecti. Moliniani contra, qui arbitrantur pertinere ad scientiam *mediam*, inquirunt transire de statu possibilitatis ad statum futurorum per potestatem causæ liberæ, cui præsto sint omnia requisita ad agendum, aut *transitu*, ut quidam dicunt, *objectivo*, sed non reali.

Verum gratis ista dicuntur. Ut enim omittam, quæ contra ejusmodi

scemodi decreta partim absoluta, partim vero conditionata, quamplures opponunt; nos lib. 2. cap. 3. & hoc rursus, in quo versamur, cap. 1., ostendimus decreta, aliaque divina attributa dici tantum connotative, & comparate ad objecta: quare nullum decretum ex parte objecti conditionatum potest excogitari, & absolutum ex parte Dei; sed quaecunque decretum, quum sit aliquid connotativum, aut absolutum, aut conditionatum est undequaque. Accedit, esse quidem in Deo decretum causas liberas, & necessarias juxta singularum conditionem præmovendi; sed liberas Deus nequaquam prædefinit, nisi in ordine ad opera supernaturalia hujus status, sed præmovet tantum universaliter; quæ præmotio non infert certam rerum *futuritionem*, sed complet tantum, perficitque potentiam, ut pro suo arbitratu prodire valeat in actum.

Minus vera est opinio aliorum, qui docent conditionata fieri in suo genere futura per possibilitatem causæ liberæ; in qua, donec manet indifferens, nihil certo potest comprehendi, nisi facultas agendi vel non agendi. At hæc indifferens potentia non potest esse medium cognoscendi aliquid, præterquam possibilitatem eventuum: in causa quippe indifferenti, nisi aliud addatur medium, nihil, omnium confessione, dignosci potest infallibiliter. Esse autem objectivum in mente Dei nihil addit rebus, nisi cognitionem illarum, prout sunt in se. Quod si dicant aliqui extrahi futura conditionata a statu possibilitatis per decretum quod non est, sed potest esse; facile mihi erit reponere, Decretum quod potest esse, constituere rem possibilem, sed non futuram: alias enim quæcunque possibilia essent futura conditionata, cum non repugnet horum prædefinitio ac decretum.

Habes ex dictis posse etiam negari scientiam *mediam* ab iis, qui rejiciunt prædeterminationem. Nam futura absoluta possunt a Deo videri in determinatione libera voluntatis, ut diximus cap. vi., & conditionata in comprehensione omnium possibilem: quarum prima est scientia *visionis*, altera *simplicis intelligentiæ*. Neque his repugnant, quæ definivimus cap. 11. Prop. 3. Deum conditionata prævidere ac prænunciare, ut constat exemplis eo loco productis: quandoquidem prævidentur per scientiam naturalem, & prænunciantur sub aliqua conditione; quæ cum sit possibilis, & non futura, non extrahit eventum a genere possibilem. Quamquam si absolute conditionata futura prænunciantur, complectitur divina prædictio, præter eorum possibilitatem, etiam aliquid actu existens. In exemplo sit: Si David commorabitur in urbe Ceila, tradent eum cives. Duo istic divinæ scientiæ objecta occurrunt, proditio David, quæ possibilis est, & cognoscitur per scientiam *simplicis intelligentiæ*: & pravus Cellitarum animus, quem Deus comprehendit per scientiam *visionis*.

At nonnihil ingerit difficultatis genus aliud prædictionum, quæ
in

in sacris literis occurrunt, in quibus aliquid prænunciatur, nec tamen intercedit aliqua conditio inferens, cujus causa possint ad scientiam *visionis* quodammodo pertinere. Dum enim Elifeus Regi Israel ait: *Si percussisses quinquies, aut sexies, sive septies, percussisses Syriam usque ad consumptionem*; ut habetur lib. IV. Regum cap. XII. 19., liquet conditionem illam percussione terre esse prorsus indifferentem ac disparatam, & nullatenus cum Syriæ everfione connecti. Quare verificari nequit divinum effatum, nisi ad scientiam, quam dicunt *mediam*, confugiamus.

Verum etiam in his illa duo, quæ diximus, reperiuntur, idest, pravus affectus Regis Joas spectans ad scientiam *visionis*, & everfio Syrorum pertinens ad *simplicem intelligentiam*. Mandans enim Propheta, ut Joas percuteret jaculo terram, ostendit hoc signo, nequaquam Deum velle extremam Syriæ everfionem, quod Joas non declinans a peccatis Jeroboam parum fideret in virtute Domini Dei sui. Principio enim Elifeus ait: *Sagitta salutis Domini, & sagitta salutis contra Syriam* demonstrans Deum quidem ad redigendos in potestatem Israelis Syros omnes futurum fuisse paratum, si Rex Joas nullum malum fecisset in conspectu Domini, fidenterque pugnasset. Mox ostendens diffidentiam torporemque Regis ait: *Percute jaculo terram*. At Joas leviori ictu, tribusque tantum vicibus terram percussit, stetitque illico. Quod si non in eum diffidentia fractusque animus irrepsisset, incessanter, fortiterque jaculando perstitisset ad nutum saltem Prophetæ. Qui propterea contra Regem iratus inquit, quod si pluribus ictibus terram concussisset, subacta omnino, ac everfa esset Regio Syrorum. Itaque Elifei prædictio parabola quædam fuit, qua Regis Joas redargueret inertiam, pravumque animi temperamentum: quod proinde fuit scientiæ *visionis* objectum.

Præterea, ut ad principia sua revertatur disputatio, si futuram Syriæ everfionem ad naturalem rerum ordinem dixeris pertinere, fautor absque decreto ullo prædeterminante fuisse præcognitam, ut priori propositione dictum est. Si vero reponenda sit inter futura ordinis supernaturalis, quod Syria bello vastata foret in Dei cultum ac religionem captivanda; necesse erat, ut Regis Joas prædefinirentur actiones, eique gratia victrix daretur, qualem forte habuisset, nisi se omnibus peccatis Jeroboam coinquinasset; ut dicam proximo cap. XII. de habitatoribus Corozain & Bethsaidæ.



C A P U T XI.

*Futura supernaturalis ordinis ad statum naturæ lapsæ
pertinentia prævidet Deus in absoluta illorum
prædestinatione.*

EST itaque scientia *Media*, missis vocabulorum ambagibus, præscientia futurorum independenter ab omni decreto prædeterminante: cumque plures Societatis Jesu Theologi decretum istud etiam ab infirmitatis statu amoveant, quod putent omne antecedens absolutum, & necessarium humanam evertere libertatem, propugnant acerrime scientiam *mediam* contra omnes Augustinianos, ac Thomistas, qui junctis tandem dexteris contra Molinianam scita fœdes ineunt.

Adeo sibi de Scientiæ *Mediæ* inventionem complacuit Molina, ut in sua Concordia membro ult., minime veritus sit affirmare se omnium mortalium primum veram conciliandi cum Gratia libertatem adinventisse rationem, quæ latuit Augustinum summum illum divinx gratiæ Magistrum, ac defensorem. *Quæ si tradita fuisset*, inquit, *tempore Augustini, aut ab eo fuisset exposita, itum fuisset obviam hæresibus Pelagianorum & Lutherianorum, nec tam multi ex Massiliensibus & Gallorum Episcopis ad hæresim defecissent.* Ipsi tamen auctori suo hæc scientia *media* visa est principio suspecta, timebatque editas de illa elucubrationes publici juris facere, ut scribit 1. p. disp. v. 1. cap. 1. Herice, quod & ingenue de seipso fatetur Fonseca lib. v. 1. Metaphys. cap. 2. q. 4. At Franciscus Suarez, ne Molinianum Commentum damnetur a veterum studiosis prætextu novitatis, lib. 2. de Scientia cap. 3. ait Scientiam *mediam* ab antiquioribus Scholasticis fuisse traditam sub nomine scientiæ *simplicis*, & *visionis*, atque pro eadem stare Sanctissimos Ecclesiæ Patres. Quamobrem in Schola Medistarum primum aperte dogmata Sancti Augustini rejici, deinde ad Molinæ sensa detorqueri ceperunt, quamcitius, si siperis placet, se tantum Augustini mentem affecturos jactitabunt:

Illud itaque extra dubium est Scientiam *Mediam* fuisse traditam a Semipelagianis, & ab Augustino improbatam; quod constat ex Epistolis SS. Prosperi & Hilarii. Nam asseriebant Pelagiani, inquit Prosper, *tales perdi, talesque salvari, quales futuros illos, si ad longiorum servarentur ætatem, scientia divinâ præviderit*, & parvulos absque baptismate morte abripi, quod Deo cognitum sit, *fuisse si diutius viverent, peccaturos*: voluisse etiam Christum apparere, & prædicari hominibus Scientiam suam, *quando sciebat, & ubi sciebat esse qui in eum fuerant credituri.* Quibus victi testimoniis Jesuitæ in rescripto publicato Romæ, dum gravissima agitaretur controversia, hæc inge-

ingenue confessi sunt: *Verum est quod Patres Prædicatores evulgarunt, videlicet etiam ipsos Massilienses Semipelagianos hanc scientiam mediam docuisse quod bene inferunt ex illis verbis Hilarii Epistola ad Sanctum Augustinum: Cum autem dicitur eis, quare aliis vel alicui prædicetur, quod aliquando pene omnibus, sicut nunc aliquibus prædicatum non sit, dicant id præscientiæ esse divinæ, ut eo tempore, & ibi veritas annuntiaretur, quando & ubi prænunciabatur esse credenda.* Idem nomine Societatis confessus est P. Cobos anno 1601. in responsione ad quandam Propositionem xiv. apud Censores a Sede Apostolica deputatos. De quibus consule erudita scripta Joannis Gonzales, Thomæ de Lemos, Hyacinthi Serry, & qui omnia collegit, & Historiæ Congregationis de Auxiliis amplissimam suppeditavit materiam, Gregorii Nunnez Coronel Augustiniani præfatæ celeberrimæ Congregationis Consultoris & Secretarii, cujus autographa servantur in Bibliotheca Angelica urbis, & in Cænobijs Montis Georgii.

Neque Pelagiani Scientiam *Mediam* adinvenerunt, sed acceperunt a superiorum sæculorum hæreticis Arianis. Qui, ut refert Alexander Episcopus Alexandriæ in Epist. quæ habetur in Actis Nicænæ Synodi, & Theodoretus lib. 1. Ecclesiasticæ Historiæ cap. iv., asserbant Christum Dominum ex omnibus fuisse præelectum, quod Deus, *eum præscientia & præfensione prænovisset neutiquam ipsum aspernaturum.* His reciprocam reddidit echum Molina 1. P. Conc. q. 23. art. 1v. ut evidentissime demonstrat Cardinalis Gotti Quæst. v1. de Scient. futur. Cond. Dub. 3. §. 1. & Didacus Alvarez disp. v11. de Aux. n. x.

Hæc non ideo dicta sunt, ut in Semipelagianis Scientiam *Mediam* damnatam esse quisquam suspicetur. Non sum tali ingenio erga Theologos de Ecclesia optime meritos: neque immemor sum eorum, quæ scripsi sexto cap. præcedenti. Imo duplex oppono Medistas inter, ac Semipelagianos discrimen. Primum est, Semipelagianos affirmavisse, initium fidei esse ex nobis, neque veram Christi gratiam ad primum conatum fideique primordia credidisse necessariam: cum Medistæ gratiam Christi, licet non prædeterminantem, etiam ad primum bonæ voluntatis motum requirant. Alterum vero est, quod Semipelagiani causam prædestinationis ad gratiam contendebant esse illa opera parvulorum, quæ nunquam futura erant, quod Catholici defensores Scientiæ *Mediæ* nusquam aut ore, aut calamo tradiderunt.

Quamvis hæc vera sint, & de Scientia *Media*, donec accedat iudicium Ecclesiæ, nihil possumus temere definire; distinguenda est tamen in Semipelagianis duplex causa, cur illam scientiam adstruebant. Prima causa est, ne videretur Deus iniquus, & personarum acceptator, si ex duobus parvulis pariter originali obnoxiiis peccato unum, non alterum prædestinaret: quod ne sequeretur, asserbant unum non alterum eligi intuitu meritorum, quæ facturi essent, si vixissent: id

vero

Verò de prædeterminatione saltem ad gratiam Moliniani non audent proferre. Secunda causa est, ne prædeterminatione antecederet efficaci fatalis induceretur necessitas: & propter hanc causam non solum Mediæ Scientiam Mediam tuentur, verum etiam in dies veteres Semipelagianorum repetunt querimonias, quod prædeterminatione beneplaciti, & gratia victrice liberum tollatur arbitrium.

S. P. Augustini in hac controversia quanti facienda sit auctoritas, manifestum est ex decretis Pontificum, & Sanctorum Patrum testimoniis, qui ejus doctrinam plenis calculis probaverunt, ut dicam in Protheoria libri vi. Sed quantum ad questionem hanc propius accedit, cum in Congregatione de Auxiliis ageretur, præcepit Clemens VIII. ut ad mentem Augustini discuteretur, quod is viginti annorum spatio pro Gratia Dei contra Pelagianos dimicaverit, & eo Duce egerit acies Catholicæ Ecclesiæ triumphum: & nihil prætermiserit eorum, quæ ad præsentem pertinent controversiam. Quæ in Historia Congreg. de Aux. lib. v. cap. 1. P. Meyer, sive personatus cognomine Theodori Eleuterii ingentæ fatetur. Atque hinc est, quod Scientia *Media*, ut a Molina, traditur, cum repugnet Augustino, teste eodem Molina Q. xxiii. Conc. etiam decreto Claudii Aquavivæ Præpositi Generalis amplissimæ Societatis Jesu anno 1613. fuit improbata: eamque rejiciunt Azorius & Henriquez, alique ejusdem Societatis viri docti: ut dicam agens de Gratia efficaci. Pertinet vero ad præsens institutum hanc Scientiam *Mediam* refutare, & ea resolvere, quæ in ejus munimentum congestere Moliniani.

PROPOSITIO: Deus videt futura libera ordinis supernaturalis, quæ spectant ad statum naturæ lapsæ, dependenter ab efficaci decreto, non per Scientiam *Mediam*.

Non iisdem principiis nos hanc *Mediam* Scientiam depellimus, quibus utuntur Thomistæ, sed hoc uno, quod & ipsi approbant, ducto ex necessitate gratiæ efficaci, quam in hoc statu ad omne opus salutare credimus necessariam. Itaque Propositio hac ratione fulcitur. Eatenus prænosceret Deus futura ordinis supernaturalis per Scientiam *Mediam* & independentem ab omni decreto efficaci, quatenus non statuisset hominibus lapsis conferre efficacem gratiam, sed quamdam generalem & arbitrii pedisequam, cujus efficientia ab humana voluntate ipsam gratiam determinante penderet: Atqui Deus hominibus lapsis decrevit misericorditer largiri gratiam victricem, sine qua nunquam vulnerata per culpam Adæ libertas opus efficeret salutare: Ergo Deus prævidet futura supernaturalia hujus status, non per Scientiam *Mediam*, sed in absoluto & efficaci suæ voluntatis decreto. Major propositio certa est: quando enim aliquid cognoscitur sub conditione inferente, & ad unum determinat, certum est ad Scientiam *visionis*, non ad *mediam* spectare: quemadmodum veritates istæ; Si lumen fulgeat, si dies elucescat,

To. I.

Z z

Si ape

si aperiantur fenestræ, illuminabitur aula, si gravi vulnere hominis præcordia confodiantur, corruet mortuus, si aeris nubes valido aquilone perdantur, cessabunt pluvie, & alia effata istiusmodi. Efficax autem Decretum, gratia victrix, ac prædeterminans est conditio inferens: & consequenter objectum aufert Scientiæ mediæ.

At minorem propositionem probaturi sumus ubi de Gratia disputabitur efficaci. Nunc quædam, ne in primo limine Candidati vacillent, accuratius postmodum expendenda subieciæ. Appellatur itaque Dei Gratia supernaturalis quædam vis nobis Dei liberalitate collata, unde omnes sanctæ cogitationes, & omnes motus bonæ voluntatis proveniunt: quæ definiri potest verbis Augustini lib. 4. contra duas Epist. Pelagianor. cap. 5. *Gratia est inspiratio dilectionis, ut cognita sancto amore faciamus*. Hæc vero, quantum ad præsens institutum attinet, absolute efficax est, quando vincit ac superat omnem cordis obdurationem, & facit ut faciamus præbendo vires efficacissimas voluntati. De qua sane gratia inquit S. P. Aug. de Prædest. SS. cap. viii. *Hæc itaque gratia, quæ occulte humanis cordibus divina largitate tribuitur, a nullo duro corde respuitur. Ideo quippe tribuitur, ut cordis duritia primitus auferatur*. Præstat vero hanc appellare absolute efficacem, quoniam tam valida delectatione trahit, ut contranitens concupiscentia superetur, & voluntas infallibiliter, libere tamen & cum indifferencia potentiæ ad oppositum sequatur vocantem; & quoniam tali gratiæ, quæ ex nolentibus volentes facit, nunquam liberum resistit arbitrium. Est tamen aliud genus gratiæ, quæ allicit quidem quantum in se est, tribuitque potestatem recte sanctæque operandi, si tamen obex prævæ affectionis removeatur, quam placet appellare efficacem relative; quoniam hæc comparate ad varias hominum affectiones & efficax, & sufficiens tantum nuncupatur. Nam si carnalis delectatio, cui humana voluntas obstringitur, illius gratiæ delectatione prævaleat, frustratur hæc suo effectu, & redditur inefficax; & hæc est gratia sufficiens, cui liberum arbitrium quamfrequenter resistit. Quod si sancta delectatio carnalem superat concupiscentiam, reapse effectum sortitur, & victrix est, ut dicitur ab Augustino. Non enim peccator minori concupiscentiæ pondere pressus indiget vividissima illa inspiratione dilectionis, quæ a nullo duro corde respuitur, sed satis est si talem habeat, quæ pugnantis concupiscentiæ motus retundat. Quamobrem hanc gratiæ arbitramur esse Oeconomiam; ut primo homini tale collatum fuerit adiutorium, quod generali quadam delectatione integram ejus mentem alliciendo daret posse non peccare, posse non mori, posse bonum non deserere; ut docet cap. xii. de Corrept. & Grat. S. P. Augustinus. Nunc vero gratia determinatam quoque delectationem inspirat, quæ si fortis sit admodum, & tam vivida ut quælibet cordis duritia auferatur, est gratia efficax absolute: si non sit tantæ vividitatis arque inten-

intentionis pro varia affectione voluntatis, cui confertur, modo effectum consequetur, eritque efficax, modo effectum frustrabitur, eritque inefficax; quamquam inspiret sanctam delectationem ad bonum in particulari, & sit ex suis intrinsicis sufficiens ad producendum opus salutare.

Ergo necessitatem victricis gratiæ, quæ talis sit saltem comparate ad cordis nostri duritiem, ostendit primum divina Scriptura; quæ non ab humana voluntate, neque a divini auxilii cum ipsa voluntate temperamento, sed ex modo operandi ejusdem gratiæ repetit efficaciam. Hujusmodi sunt verba Apostoli ad Philippenses II. *Deus est qui operatur in vobis velle & perficere pro bona voluntate.* Et Ezech. 36. *Faciam, ut in præceptis meis ambuletis, & judicia mea custodiatis & operemini.* Quæ postrema verba exponens S. P. Augustinus in lib. de Grat. & lib. arbitrio cap. 16. ait: *Ille facit, ut faciamus præbendo vires efficacissimas voluntati.*

Idem probant Orationes Ecclesiæ, quibus non auxilium solum, sine quo agere non valeamus, sed illud etiam continuo imploramus, quo actu velimus, & quod possumus exequamur. His enim supplicationibus orat Sancta Mater Ecclesia: *Fac nos, quesumus Domine, semper tuis obedire mandatis: Fac nos amare quod præcipis: Quod immerito contulisti, propitius exequaris: Tribue quesumus, ut ad promissiones tuas sine offensione curramus: Tua medicinalis operatio tuis semper faciat inherere mandatis, &c.* Hæc frustra a Deo peterentur, si mandatis inherere, currere, exequi, amare a determinatione nostra penderet. *Prorsus in hac re,* inquit S. P. lib. de Dono Persev. cap. 7., *Non operosus disputationes expectet Ecclesia, sed attendat quotidianas orationes suas. Orat ut increduli credant; Deus ergo convertit eos ad fidem: orat ut credentes perseverent; Deus ergo donat perseverantiam usque in finem.*

Si vero Augustiniana Scripta volvamus, testimonia occurrent ad rem nostram innumera. *Quæstio, quæ inter nos agitur,* ait S. P. in Epist. ad Vitalem, *est utrum hæc gratia, quoad effectum, præcedat, an subsequatur hominis voluntatem; hoc est, ut plenius id eloquar, utrum ideo nobis detur quia volumus, an per ipsam etiam Deus efficiat, ut velimus.* Et de Corrept. & Grat. cap. XII. *Subventum est igitur infirmitati voluntatis humanæ, ut indeclinabiliter, & insuperabiliter ageretur, & ideo quamvis infirma, non tamen deficeret.* At pluræ alibi excribam, & ab Adversariorum circumventionibus tutabor.

Advertendum est interim complures Patronos Scientiæ Mediæ repetere gratiæ efficaciam ex eo, quod illam misericors Deus largiatur in aliquibus circumstantiis, in quibus prævidet humanam voluntatem sibi vocanti & excitanti obtemperaturam: & hac ratione per Scientiam mediæ dirigi putant absque gratia victrice totius prædestinationis no-

stræ negotium : Illam gratiam in his loci , ac temporis circumstantiis collatam *Congruam* appellant , eamque fatentur nunquam effectu proprio frustrari . Hi nimirum præter sufficiens auxilium , quod adsit omnibus , istud speciale addunt , quo Molinianam Sententiam liniunt pigmento , & veluti arte gladiatoria nobiscum ludunt . At perperam . Etenim S. P. Augustinus Hom. xxiii. inter L. docet , efficaciam gratiæ minime a circumstantiis naturalibus esse petendam ; sed gratiæ donum esse , si improbis meditantibus scelera deest locus ac tempus , si non adest suasor malorum , si præsto sit qui ad bona opera hortetur . Hoc utique modo , vocat ille qui disponit omnia suaviter , prout videt unicuique congruere : hanc gratiam , si lubet , *Congruam* dicamus : sed in omnibus circumstantiis divinam fateamur præordinationem , qua Deus pro suo beneplacito definivit ita vocare , & hominum voluntates allicere , ut infallibiliter sequantur vocantem ; itaut opportuna hujus , illiusve circumstantiæ occasio non sit divinæ prædefinitionis causa , sed effectus . Et quod maximum est , in lib. de Prædest. SS. cap. 2. S. P. exemplo Pauli longiori oratione demonstrat etiam in oppositis circumstantiis Deum quandoque gratiam largiri : ille enim alienus a fide , *quam vastabat , eique vehementer aversus repente est ad illam gratia potentiore conversus , convertente illo , cui hoc ipsum facturo per Prophetam dictum est : Tu conversus vivificabis nos : ut non solum ex nolente fieret volens , verum etiam ex persecutore , persecutionem in ejus fidei , quam persequebatur , defensionis pateretur* . Ex quibus efficacis gratiæ necessitas , quantum ad præsens assertum necesse est , comprobatur . Omnia vero , quæ hucusque diximus ad hanc reducuntur synopsis . Eget homo lapsus auxilio ab intrinseco efficaci : istud a decreto absoluto atque a divino beneplacito in nos derivatur : quidquid ab hujusmodi pendet decreto non est objectum Scientiæ mediæ : Ergo opera supernaturalia hominis lapsi per Scientiam mediam non prænoscentur .

Addam aliqua ex Augustino momenta , in quibus expresse de futurorum agit præscientia . Ac primum sit : Prævidet Deus peccatorum conversionem , & cetera opera meritoria , tanquam dona sua , & veluti opera a se principaliter facienda : sed dona sua , & opera a se facienda prævidet Deus in sua prædestinatione , sive absoluto decreto : Ergo in sua prædestinatione , in suo decreto videt Deus conversionem peccatorum , & cetera opera meritoria . Ita S. P. lib. de Præd. SS. cap. x. *Prædestinatione quippe ea præscivit , quæ fuerat ipse facturus* . Et de Dono Persev. cap. xvi. *Si nulla est prædestinatio quam defendimus , non præsciuntur a Deo Dei dona* : Et ibidem : *Quod si dantur , & ea se daturum esse præscivit , profecto prædestinavit* .

Præterea Semipelagiani contendebant , ut constât ex Epist. Hilarii , præscientiam conditionum independentem a divina prædestinatione

tione traditam quoque fuisse ab Augustino Epist. ad Porph. 42. n. 102. ubi scripserat : *Si tanta potestatis fuisset Pythagoras, ut ubi vellet, & quando vellet, sua dogmata predicaret, & si haberet etiam cum ea potestate summam rerum præscientiam, nusquam, & nunquam appareret, nisi ubi & quando sibi homines credituros esse prævoheret* : Et infra : *hoc solum eis brevitatis gratia in huiusmodi questionis disputatione dicamus, tunc voluisse hominibus apparere Christum, & apud eos predicari doctrinam suam, quando sciebat, & ubi sciebat esse qui in eum fuerant credituri*. Quem locum in patrocinium scientiæ mediæ produxerunt Patres Societatis Jesu in disputatione xxxi. habita coram SS. D. N. Clemente VIII., eumque ad Scientiam hanc mediā confirmandam validissimum putat Franc. Suarez lib. 1. de Gratia Prolog. 2. cap. 3. At S. P. lib. de Prædest. SS. cap. 9. hæc ex adverso respondet : *Cernitisne me sine præiudicio latentis consilii Dei aliarumque caussarum hoc de præscientia Christi dicere voluisse, quod convincende paganorum infidelitati, qui hanc objecerant questionem sufficere videretur ? Quid enim est verius, quam præscivisse Christum qui, & quando, & quibus locis in eum fuerant credituri ? Sed utrum predicato sibi Christo, a seipsis habituri essent fidem, an Deo donante sumpturi, idest, utrum tantummodo eos præscierit, an etiam prædestinaverit Deus, quævere atque differere tunc necessarium non putavi*. His autem docet Augustinus se utique tradidisse scientiam conditionatorum, sed absque præiudicio latentis consilii Dei, sive in prædestinatione ad fidem, & in proposito voluntatis suæ ante mundi constitutionem. Quod scientiæ mediæ omnino est peremptorium.

Neque ullius momenti est, quod ait citato loco Suarezius, S. Patrem priorem sententiam de Præscientia Dei antecedente decretum potius confirmasse, dicens : *Possent etiam sic dici, tunc voluisse hominibus apparere Christum, & apud eos predicari doctrinam suam, quando sciebat, & ubi sciebat qui electi fuerant in ipso ante mundi constitutionem*, eo vel maxime quod Augustinus cit. Epist. 502. scribit noluisse Christum apparere infidelibus, *quos nec verbis, nec miraculis suis credituros esse præscivit* : quæ verba accipi non possunt de præscientiâ consequente decretum, cum Deus neminem eligat ad non credendum. Non, inquam, hæc dici possunt. Quis enim non videat ea verba. *Possent etiam sic dici, &c.* completi electionem eorum, qui prædestinati sunt ante mundi constitutionem ? Quis non percipit referenda esse ad ea, quæ S. P. scripserat citata Epist. nulla tunc facta mentione prædestinationis, quam exorta Pelagiana hæresi laboriosius explicare oportebat ? Quis non acquiescat, posteaquam Augustinus admonuit se loquutum absque præiudicio latentis consilii Dei ? Quis non miretur Suarezium non advertisse ea, quæ sequuntur : *Tunc satis erat breviter esse dicendum excepta altitudine sapientiæ & scientiæ Dei, & sine præiudicio*

dicio aliarum caussarum? Quis non sentiat refutari ab Augustino Semipelagianorum objecta, non confirmari? De infidelitate autem plurimorum, non eadem ratio est, ac de fide: illius causa est sola voluntas; hujus voluntas & gratia: de illa stat sine prædestinatione præscientia, in ista prævidet Deus quidquid est ipse factururus. Sed & infidelitas, si Deus subtrahat auxilium efficax, videtur absque ulla scientia media, ut dixi cap. præc. propof. 2. Quapropter futilis est Suaresii argumentatio, & contra eum retorquetur.

Tandem S. P. Augustinus, cum illi a Semipelagianis objicerentur quædam testimonia veterum Patrum, qui operum præscientiam independentem a prædestinatione, & efficaci divinæ voluntatis proposito videbantur tradidisse; libro de Dono Persev. cap. 18. respondet illos præscientiæ nomine designasse prædestinationem: *Quid ergo*, inquit, *nos prohibet, quando apud aliquos verbi Dei Tractatores legimus Dei præscientiam, & agitur de vocatione electorum, eandem prædestinationem intelligere?* Sed præscientia prædestinationi subnixæ, non est illa, quam appellant scientiam *mediam*, hæc enim prædestinationem antevertit, & nullum decretum supponit, nisi conferendi omnibus & singulis gratiam versatilem, in qua nil potest certo præsciri, neque discretio aliqua unius præ alio contineri: Igitur rejicit Augustinus scientiam conditionatorum, qualem propugnant Medistæ.

C A P U T XII.

Solvuntur ea, quæ obtrudunt Defensores scientiæ mediæ.

PRIMO ita arguunt adversarii. Deus prævidit futuram conversionem Tyriorum ac Sidoniorum independentem ab omni conditione inferente: Ergo vidit per scientiam *mediam*. Probat. antec. Math. xi. 21. ita Christus increpat Corozaitas & Bethsaitas: *Vae tibi Corozain, vae tibi Bethsaida: quia si in Tyro & Sidone factæ essent virtutes quæ factæ sunt in vobis, olim in cinere, & cilicio penitentiam egissent.* Itaque vidit Deus futuram conversionem Tyriorum ac Sidoniorum sub ea gratia, quam habuerunt Corozaitæ ac Bethsaitæ: Sed gratia, quam habuerunt Corozaitæ, & Bethsaitæ non fuit efficax, & conditio inferens: Ergo Deus non prævidit futuram conversionem Tyriorum ac Sidoniorum, dependentem a conditione inferente, & a decreto, auxilique efficaci.

Resp. nego consequentiam: futura quippe conversio Tyriorum ac Sidoniorum, cum sit conditionata, spectat, ut diximus cap. x. prop. III. ad scientiam *simplicis intelligentiæ*, qua Deus vidit possibilem conversionem ad fidem in Tyriis & Sidonlis, si apud eos facta essent si-
gna

igna ac prodigia, quæ patrata fuerant apud Corozaim & Bethsaidam. Harum autem urbium cives idcirco Christus increpat, quoniam obstinati erant, pervicaces, obdurati, & resistebant Spiritui Sancto, cui Tyri ac Sidonii nulla tali obduratione obcæcati obtemperassent vocanti. Et hanc Judæorum obdurationem Christus scientia *visionis* comprehendebat. Quapropter eorum increpatio in comparatione Tyriorum, quatenus spectat ad conditionatam istorum conversionem infert in Christo scientiam *simplicis intelligentiæ*, & prout spectat ad pervicaciam & cæcitatem Judæorum demonstrat scientiam *visionis*. Illa enim conversio erat possibilis: ista obduratio existens. Ad probat. ant. dist. majorem: Vidit Deus futuram conversionem Tyriorum ac Sidoniorum sub ea gratia, quam habuerunt Corozaitæ & Bethsaidæ, & hæc gratia in Tyriis & Sidoniis fuisset ab intrinseco efficax, quæ in Corozaitis & Bethsaidis talis non fuit ob eorum duritiem, concedo: fuisset in utrisque tantum versatilis, nego. Habet gratia Christi, quæ convertit corda hominum, gradus suos, & in uno est efficax, in altero otiosa redditur ob pervicaciam arbitrii. Quapropter credidissent Tyrii & Sidonii, si æqualia signa vidissent, quia *non erant sic excæcati oculi, nec sic induratum cor Tyriorum & Sidoniorum*, sicut erant obdurati & excæcati Corozaitæ, inquit S. P. lib. de Dono Persev. cap. 14.

Sed dices, Non erit ergo Gratia ab intrinseco efficax, sed tantum ex liberi arbitrii affectione, ut contendunt Moliniani.

Resp. hanc propositionem falsam esse. Aliud enim ponere impedimentum ne gratia Dei effectum suum sortiatur; aliud reddere illam efficacem. Ponit utique liberum hominis arbitrium impedimenta, quibus gratia aliquando effectum suum non consequitur: & hæc impedimenta sunt peccata quæ præcedunt, pravi habitus, honorum ambitio, odii atque invidentiæ nutrimenta: quæ in se habebant arbitrii vitio Corozaitæ; digni proinde gravissima increpatione, quoniam cur non crederent ipsi ponebant remoram, veluti splendentissimo Soli clausos sponte oculos objicientes. Vide S. Thomam in 111. contra Gent. cap. 159. At cur gratia sit efficax, cur unum discernat, non alterum, cur in illo omnia validissimo impulsu superet impedimenta, trahatque renitentem hominum voluntatem, non ex nobis, sed ex Dei munere, venit. Interdum enim Deus, qui sanat contritos corde, & erigit omnes elisos, talem elargitur gratiam, quæ agit de omni mala cupiditate triumphum: sed hanc, quæ speciali titulo efficax dicitur, misericordia Dei non omnibus impertitur. Communior est gratia alia, quæ in se valida quidem est, sed ei, nisi adsit specialis illa victrix & magna, liberum arbitrium culpabili voluntate resistit. Habet in se virtutem fanitatis medicamentum, neque est ab ægrotantis conatu morbi cura, & corporis valetudo. Si autem infirmus velit comedere quicquid appetit, aerem respirare malignum, surgere e strato, spernere medentis con-

consilium, nunquam medicinæ poterit experiri in se beneficium. Est pariformiter gratiæ efficientia a Deo, impedimentum ex nobis.

Insurgens. Si gratia sit ab intrinseco efficax, poterant Corozaitæ Christo increpanti respondere, se ideo non credere, quoniam non largiebatur illis efficax adjutorium: injuste corripi, & nullam esse sui cum Tyriis & Sidoniis comparationem: his adfuturam in hypothesi gratiam, qua ipsi carebant, potentiorum ac victricem: deesse sibi voluntatem, quæ præparatur a Domino: hanc daret, & nisi credant, corripiantur.

Hæ sunt vetustissimæ Semipelagianorum querimonie; quibus tenentur quoque respondere qui defendunt gratiæ congruæ necessitatem. Etenim in horum sententia poterant reponere Corozaitæ, se non vocari ad Christi fidem in talibus circumstantiis, in quibus positi Tyrii ac Sidonii fuissent, ut assensum præberent vocanti. Itaque recurrendum est ad ea quæ respondit S. Pater Adrumetinis, videlicet, merito corripitur Corozaitas, quia fidei impedimentum, excæcatio, pervicacia, resistentia non ex Deo erat, sed ex ipsis. In hoc iuste increpari comparatione Tyrriorum, quod hi minus essent obdurati, minus invidi, minus dediti cupiditatibus. Si ad habendam actualem fidem efficax gratia requiritur, id esse post Adæ culpam, a qua proficiscitur humani arbitrii imbecillitas. Parare tamen Deum, qui vult omnes homines salvos fieri, auxilia singulis sufficientia. Si adjutorium quo efficitur in nobis bona voluntas, non omnibus ex æquo conceditur, esse inscrutabile Dei judicium. Is cujus vult miseretur, & quem vult indurat: negat beneficium indebitum, exercet debitum judicium. *Tu quis es*, ait Apost. 5. ad Rom., *qui respondeas Deo?* Uno verbo: culpanda est in infidelitate mala hominis voluntas, laudanda in fide credentium misericordia liberatoris. *Sed alii credunt, alii contradicunt: volunt ergo isti credere, nolunt autem illi. Quis hoc ignorat? Quis hoc neget? Sed cum aliis præparetur, aliis non præparetur voluntas a Domino; discernendum est utique quid veniat de misericordia ejus, quid de judicio:* ait S. P. lib. de Præd. SS. cap. vi. Addam præclarissimam sententiam S. Prosperi resp. viii. ad Excerpta Genuensium. *Quare autem*, inquit, *hoc eis negatum fuerit, dicant, si possunt, qui calumniantur: & ostendant cur apud eos Dominus mirabilia, quibus profutura non erant, fecerit; & apud eos, quibus erant profutura, non fecerit? Si rationem facti, & profunditatem judicii ejus penetrare non possumus; manifestissime tamen scimus, & verum esse quod dixit; & justum esse quod fecit, & non solum Tyrios & Sidonios, sed etiam Corozaim, & Bethsaida potuisse converti, & fideles ex infidelibus fieri, si hoc in eis Dominus voluisset operari.* Refunditur autem ab Augustino & Prospero in inscrutabile judicium Dei, quod uni, non alteri donetur efficax gratia; quia nulli debetur; & cum pares sint malis meritis, qui eligitur

gitur misericorditer liberatur: qui derelinquitur iustissimo reprobatum iudicio.

Ex dictis constat quid sit respondendum similibus Scripturarum divinarum testimoniis, V.G. 1. Regum 23. ubi Davidi querenti, *Si viri Ceila tradent me in manus Saul?* ait Dominus, *Tradent.* Jeremia xxxviii. 17. *Si profectus exieris ad Principes Regis Babylonis, vivet anima tua.* Matth. xxiv. 22. *Nisi brevius fuissent dies illi, non fieret salva omnis caro, &c.* Hæc enim omnia pertinent ad Scientiam simplicis intelligentiæ, quatenus noscitur possibilis proditio Davidis, vita. Sedeciz, prævaricatio Iustorum: & ad Scientiam visionis, in quantum videtur conspiratio Celeitarum, indoles principum Babylonis, infirmitas Iustorum qui nunc stant, sed in consilio malignantium, in circumvenientium fraude, in persecutione impiorum eaderent, nisi gratia juvenentur potentiore. Vide cap. præced. prop. 3.

Conantur secundo Scientiam mediam comprobare auctoritatibus Augustini. Primo quia lib. xi. de Civit. Dei cap. 6. docet aliquos duos æqualiter affectos esse, & tamen unum ad impudicam voluptatem percelli, alterum in castitatis amore permanere: *Si aliqui duo, inquit, æqualiter affecti animo & corpore videant unius corporis pulchritudinem, qua visa unus eorum ad illicita perfruendum moveatur, alter in voluntate pudica stabilis perseveret: si eadem tentatione ambo tententur, & unus ei cedat, atque consentiat; alter idem qui fuerat perseveret: quid aliud apparet, nisi unum voluisse, alterum noluisse a castitate deficere?* Quo in loco S. P. non ad gratiam victricem, non ad prædestinationem, non ad divinum propositum, sed ad solam voluntatem æqualiter affectam, eademque gratia suffultam tam impudicitiam refert, quam continentiam & castitatem. II. In lib. de Dono Persev. cap. 14. scribit: *Habere quosdam in ipso ingenio divinum naturaliter munus intelligentiæ, quo moveantur ad fidem, si congrua suis mentibus vel audiant verba, vel signa conspiciant.* Ubi manifestissime gratiam congruam audimus commendari. III. In lib. de Spi. & lit. aperte testatur non omnem voluntatem nostram ex Deo esse. IV. de Prædestination. cap. x. ait: *Potest autem esse sine prædestinatione præscientia: & consequenter non omnia, quæ certissime Deus prævidet, fuerunt ab eo definita.* V. In Exposit. Epist. ad Romanos Prop. lv. *Non omnes, inquit, qui vocati sunt, secundum propositum vocati sunt: hoc enim propositum ad præscientiam & prædestinationem pertinet; nec prædestinavit aliquem, nisi quem præscivit crediturum, & secuturum vocationem suam, quos & electos dicit.* En Scientia media literis cusa cubitalibus. VI. lib. 1. ad Simplic. quæst. 2., *Nullius, inquit, frustra miseretur, cuius autem miseretur, sic eum vocat, quomodo scit ei congruere, ut vocantem non respuat.* Plura sunt ibidem pro gratia congrua fatis per via legentibus.

Generalis responsio est, S. Patrem hæc & similia pronunciaſſe abſque præjudicio latentis conſilii Dei, aliarumque cauſarum, ut ipſemet Auguſtinus inimicis gratiæ Dei reſpondet lib. de Prædeſt. SS. cap. 9. Atque ſi aliquando ante Epiſcopatum Scientiam *mediam* propugnauerat; *Nondum diligenter quaſierat, nec adhuc invenerat, qualis ſit electio gratiæ*: ut proſitetur lib. 1. Retractat. cap. 23. Reſp. tamen ad ſingula. Et primo quod proferunt ex lib. xii. de Civit. Dei etiam ab iis, qui gratiam congruam defendunt, ſolvendum eſt. Non ſunt enim æqualiter affecti corpore & animo, qui in diverſis poſiti ſunt loci ac temporis circumſtantiis, Deinde S. P. quærit ibidem cauſam mali, non boni, ut apparet ex illis verbis: *Quid putamus eſſe cauſæ, ut in illo fiat, in iſto non fiat voluntas mala?* Profecto mala voluntas habet cauſam deficientem, & provenit a ſolo homine; ſed voluntas bona excitatur principaliter a Dei gratia. Hinc S. P. probans in libris de Civit. Dei contra Manichæos malum non eſſe a Deo, affirmat unice oriri ab hominum voluntate: ſed in libro de Dono perſev. cap. 3. diſputans contra Pelagianos de origine meriti probat conſimili exemplo non a voluntate, ſed ab inſcrutabili iudicio provenire, cur ex duobus, tametiſ æqualiter ſint affecti, *uni donetur perſeverantia, non alteri*. Lege in utroque loco Sanctum Doctorem.

Ad 2. conſtat ex ſupradictis habere homines in ſeipſis vim ingenii, ac naturalem indolem, & comparata etiam virtutum officia, quibus ſi congrue vocentur, vocantem non reſpuant. At naturales affectiones naturæ non diſponunt ad gratiam; id enim afferere eſt Semipelagianum, & hæreticum: ſed removennt tantum gratiæ obicem & impedimentum: neque ullatenus recte operantur qui naturaliter habent divinum munus intelligentiæ, *Si Dei altiori iudicio* (nota quæ ſtatim intonat Auguſtinus) *a perditionis maſſa non ſunt gratiæ prædeſtinatione diſcreti*. Atque hæc eſt gratia congrua Auguſtini, non qualem fingunt Moliniani.

Ad tertium & quartum dicendum non omnem voluntatem eſſe a Deo prædeterminante, ſi ſermo ſit de operibus naturalibus, & peccatis, quorum eſt in Deo præſcientia abſque prædeſtinatione: ſed plura de his cap. v. 11. præcedenti.

Quintum locum retractat S. P. lib. 1. cap. 23. affirmans ſe adhuc Presbyterum ea verba ſcripiſſe, cum nondum ſciret etiam fidem inter munera Dei reperiri: unde vellem ab his adverſarios noſtros abſtinere, ne fateri cogantur S. Patrem Scientiam *mediam* revocaviſſe.

Ad ultimum reſpondeo quidquid Auguſtinus exornavit præſato libro 1. ad Simpl. exponendum eſſe juxta ea, quæ de hoc libro ſcribit in 2. Retract. cap. 1. dicens: *In cujus quaſtione ſolutione laboratum eſt quidem pro libero arbitrio voluntatis humana: ſed viciit Dei gratia, nec niſi ad illud potuit perveniri, ut liquidiffima veritate dixiſſe intelligatur Apoſtolus: Quis enim te diſcernit? quid autem habet, quod non acc-*

accepisti? Deinde non sic appellat S. P. gratiam congruam, quasi ipsius efficacia sita sit in rerum circumstantiis, & naturalium affectuum cum divinis auxiliis temperamento: sed quod Deus omnia tali congruentia disponat & aptet, ut ubi, & quando sibi videtur, alliciat, trahatque indeclinabiliter hominum voluntatem. Et hoc apparet ex his quæ sequuntur: *Cum ergo nos ea delectant, quibus proficimus ad Deum, inspiratur hoc, & præbetur gratia Dei, non nutu nostro, & industria, aut operum meritis comparatur: quia ut sit nutus voluntatis, ut sit industria studii, ut sint opera caritate ferventia, ille tribuit, ille largitur.* Quid plura? recurrit tandem maximus Gratæ Vindex etiam hoc loco ad inscrutabilia judicia Dei, qui cujus vult miseretur, quem vult indurat.

Adoriuntur denique nos adversarii depromptis a ratione argumentis: quorum primum est, scientiam *mediam* post innumeras oppugnantium argutationes, veluti igne probatam in Congregatione de auxiliis immunem ab omni errore emeruisse. Deinde per eam componi facile dissidia, & liberum arbitrium contra Jansenianos & Calvinistas defendi: decreta et contra prædeterminantia ex quo fuerunt intrusa, fuisse scissionum seminaria, & Aduermetinos, Massilienses, plurimosque viros turbasse pietate, ac doctrina conspicuos. Ulterius necessariam esse scientiam *mediam* ut Dei voluntas dirigatur in suis decretis circa supernaturalia opera status naturæ lapsæ, cui antequam Deus conferat gratiam, qualem ei videt congruere, explorare debet quidquid possit humana voluntas cum adiutorio versatili, si in tali rerum constituitur circumstantia. Præterea nunquam in una tantum causa videri effectum, qui producit a duabus, & consequenter bona opera, quæ efficiuntur a gratia simul & voluntate, non posse in prædestinatione gratiæ infallibiliter prævideri. Tandem frustra conari Augustinianos, ut gratiam victricem cum libertate componant: nam omnis suppositio antecedens, absoluta & impedibilis destruit indifferentiam libertatis: Decreta, prædestinatio, gratia victrix sunt aliquid antecedens, absolutum, & impedibile: Tollunt ergo libertatis indifferentiam.

Quidam ad 1. respondent sub Paulo V. jam exaratum diploma, quo prohibebatur sententia Ludovici Molinæ, sed sic Deo disponente non fuisse publicatum: verum si promulgatum non est, nullum suppletat adversus scita Molinæ argumentum. Addunt aliqui proscriptam scientiam *mediam* die xv. Jul. ann. 1697. decreto Caroli Mauritiæ Letellier Remensis Archiepiscopi: sed nihil nos movere debent privata judicia contra statuta Pontificum. Ergo dicimus scientiam *mediam* in Congreg. de Auxiliis non esse neque damnatam, neque improbatam; tolerari, non commendari; judicium de ea suspensum, non definitum: servandam inter nos caritatis vicissitudinem, non veritatis deferendam

inquisitionem; abstinendum a puerili rixarum pruriginē, & a criticis intemperantia, non a sectandis magni Augustini vestigiis. Hæc ad primum.

Ad secundum vero dicimus hanc rationem adeo facilem conciliandi libertatem, cum gratia nunquam ab ortu Pelagianismi ad Molinam, usque five ab Augustino, five ab Ecclesia fuisse probatam: incredibile esse tanto annorum intervallo Christianam Fidem Moliniano Magisterio, si ad veritatem accederet, fuisse privatam: affirmandum esse iis, qui congrua jactant adjutoria, Deum optimum maximum revelasse, veritatem Augustino pugnanti adversus hæreticos, & constituto in circumstantiis rerum gravissimis, non Molinæ scribenti tranquilla pace, debellatis hæreticis, & finita causa Pelagianorum. Augustinianam vero doctrinam turbasse horum hæreticorum reliquias, & prostratorum cinerem ventilantes: consecratam ad hæc tempora Summorum Pontificum laudibus splendidissimis: gloriæ characterem esse, si ea concitati fuerunt ingrati: flocci faciunda Launoji dicteria confossa, a Clementis XI. vigilantissimis curis fulmine Vaticano. Moliniana dogmata e contra non a Semipelagianis, & gloriosis Defensoribus libertatis refelli, sed ab Augustini ac D. Thomæ catervis pugnantibus præ Christi gratia, pro arbitrii facultate, pro imperturbata Patrum suorum traditione.

Ad tertium dico, universas vias Domini esse misericordiam & veritatem, sive justitiam & pacem. Iis dirigitur Deus in hoc miseriarum statu absque *media* scientia. Videt omnes posteros Adæ originali coinquinatos peccato, & ex una luti massa pro sua potestate fingit sibi vasa honoris, & permittit coagmentari vasa contumeliæ. Quos eligit ad honorem, trahit ad se omnipotentissima gratia, præmover efficaciter, adjuvat infirmos, erigit elisos, convertit rebelles: hæc est via misericordiæ. Et quotquot reprobat ad contumeliam, relinquit inhiantes cupiditatibus, sinit dari sponte præcipites, spernit sanie voluntaria, confectos: hæc est via veritatis, & via justitiæ. Ut ergo omnia a fine usque ad finem disponat suaviter, ac fortiter, sufficit scientia *simplicis intelligentia*, qua comprehendit quidquid ejus subditur potestati; nec non *scientia visionis*, qua in posteris Adæ cernit miseriam, & culpam, hanc objectum justitiæ, illam misericordiæ.

Ad quartum vera est responsio, in una causa cognosci effectum alterius, si hæc ab illa recipiat virtutem, motum, & determinationem ad actum: quod præstat divinum adjutorium hominum voluntati. Ut postremam aufugas muscipulam, faciam oppido.



C A P U T XIII.

*Quonam pacto divinis prædefinitionibus libertas
cohereat humana.*

EX Augustiniana doctrina circa prædestinationem & gratiam con-
sequi libertatis exitum querebantur olim Semipelagiani, ut constat
ex Epistolis Hilarii & Prosperi: nec novum est, sed in tali officina elabo-
ratum propositum ultimo loco argumentum. Pro cuius solutione
advertendum est, modum conciliandi cum gratia prædeterminante li-
bertatem visum Sanctissimo Protoparenti Augustino perdifficilem, ut
fatetur lib. iv. contra Julianum cap. viii. *Ista quaestio, ubi de arbitrio
libertatis & Dei gratia disputatur, ita est ad discernendum difficilis,
ut quando defenditur liberum arbitrium negari Dei gratia videatur:
quando autem asseritur Dei gratia, liberum arbitrium putetur anser-
ri.* Habet similia S. P. Epist. cv. & lib. de Sp. & Litera cap. 39. Hinc
merito suspecta nobis redditur concordia per scientiam *mediam*, quæ
cum sit facillima & obvia, nunquam tamen probari potuit Gratiae Ma-
gistro ac Propugnatori Augustino. Dabo in hac re clarissimum.
Theologorum qui scientiam *mediam* rejiciunt non unam hujus concili-
ationis methodum, & quæ planior videbitur, erit nobis eligenda.

P R I M A R E G U L A.

Thomistis familiare est recurrere ad sensum *compositum*, ac *divi-
sum*, seu, quod idem est, ad potentiam *possibilitatis*, & potentiam
positionis. Sensus horum est, salvari hominis libertatem, quoniam
non potest quidem non agere supposita divina prædeterminatione, sed
potest absolute & si ab ea præcindatur. Quemadmodum dum ambulo
non possum non moveri, at possum tamen desistens ab exercitamento
ambulationis. Hanc autem prædeterminationem ponunt ad actum, &
respectu operationis, non quantum spectat ad potentiam: scilicet,
Deus determinat E. G. actum caritatis, sed relinquit liberam potesta-
tem ad odium: in quo longe recedunt a sententia Calvini, qui impie
asseruit non remanere sub efficaci decreto Dei indifferentiam ad opposi-
tum, quod jure damnatum est a Tridentino sess. vi. can. 4. Statutum
est enim *liberum hominis arbitrium a Deo excitatum posse dissentire
si velit*. Quod non eo sensu definitum est, quasi efficax Dei motio ad
opus salutare non trahat: sed quod ita trahat, ut voluntas possit resi-
stere, licet efficaciter præmota nunquam resistat.

Ad-

Addunt aliqui distinguendam esse triplicem necessitatem : *absolutam*, qua aliquid ita est, ut non possit non esse; quo sensu necesse est Deum esse : *naturalem*, qua aliquid ita est, ut virtute naturali aliter se habere non valeat : quo sensu necesse est cælum moveri : & necessitatem *consequentiam*, quo aliquid aliter se non potest habere ob rerum connexionem & cohærentiam ; quo sensu necesse est hominem moveri dum currit .

In horum itaque Theologorum principiis negandum est quaecumque suppositionem antecedentem evertere libertatem : & si adversarii insurgant dicentes fieri non posse, ut stante efficaci prædeterminatione non eveniat necessario res præfinita ; recurrendum est ad traditam distinctionem, in sensu *diviso*, & necessitate *absoluta* vel *naturali*, nego : in sensu *composito*, & necessitate duntaxat *consequentia*, concedo .

SECUNDA REGULA.

Quidam, atque, ut arbitror, longe melius distinguunt inter causas quæ extrinsecus movent, atque impellunt, neque illarum quas præmovent, *formam* penetrant, aut *modum* attingunt ; & inter Deum, qui nobis intimus nedum secundam causam movet, sed etiam efficit voluntatem, & cum libera operatione determinat quoque modum agendi contingenter . Imprimis, inquiunt, summam habet Deus potestatem inclinandi hominum corda quocumque velit, ut scribit Augustinus de Corrept. & Grat. cap. xiv. *Magis habet in potestate voluntates hominum, quam ipsi suas*. Deinde decrevit Deus quædam fieri necessario, & quædam libere, & quibusdam effectibus aptavit causas necessarias, quæ deficere non possunt, ex quibus effectus ex necessitate proveniant; quibusdam autem aptavit causas contingentes & defectibiles, ex quibus effectus eveniant contingenter ; ut ait S. Thomas 1. P. q. 20. art. viii. Addunt hi Theologi contingentiam semper in causam proximam esse refundendam ; *Sicut germinatio plantæ est contingens propter causam proximam contingentem, licet motus solis qui est causa prima, sit necessarius* : ait idem S. Thomas 1. P. q. xiv. art. 13.

Juxta horum principia dicendum est inferri quidem necessitatem, ex suppositione antecedente causæ extrinsecæ, quæ impellit ad actum, & ex necessitate causæ proximæ, quæ substantia sua fit determinata ad unum : non vero ex suppositione causæ primæ, quæ non solum infert actum, verum etiam naturam causat, & modum attingit . Quod si dicas : Necesse est ut quidquid Deus prædefiniit, eveniat infallibiliter ; respondendum est, etiam prædefinitum fuisse ut mediis liberis futurum sit : quæ si necessario ponerentur, falleretur divina præscientia, & frusteretur definitio, quum Deus præsciat ac definiat fore ut fiant libere & contingenter . Si rursus insistas, quod possibili posito in actu, nullum,

nullum, ut fert commune proloquium, sequitur inconveniens; ideoque si potest homo sub efficaci decreto dissentire, supponi potest quod actu dissentiat, & frustretur decretum; pariter dicendum est, verum esse Scholasticum axioma, si possibile ponatur in actu eo modo, quo possibile est: non est autem possibile, ut ponatur dissensus nisi ea libertate, quæ fuit a Deo præfinita. Quamobrem si res est futura, id Deus & præcivit & definivit; & nisi futura esset, etiam hoc a Deo prævisum esset ac definitum.

Hæ duæ rationes conciliandi cum divinis prædefinitionibus humanam libertatem sunt principiis Thomistarum valde affines. Quibus si nos uti velimus, possumus percommode; dummodo decreta absoluta, gratiam victricem, prædeterminationem non adstruamus ex capite essentialis dependentiæ. Arduum est enim percipere, quod modus sit contingens ac liber, qui suapte natura postulat ad unum determinatum, actum prædefiniri.

TERTIA REGULA.

Sunt ex Augustinianis nonnulli, qui efficacem gratiam etiam in utroque statu propugnant, negant tamen esse prædeterminantem. Nam S. P. Augustinus, inquit, in hoc efficaciam gratiæ constituit, quod operetur Deus in nobis bonam voluntatem, & agat motum ejusdem: quod illam stupentem suscitet: quod ex indignatione transferat ad lenitatem; neque aliud est gratia Christi, quam caritas diffusa in cordibus nostris per Spiritum Sanctum, qui datus est nobis. At impossibile est hominem velle, diligere, fieri ex nolente volentem ante motum liberum voluntatis. Non ergo præcedit, inquit, gratia Christi, neque prædeterminat liberum voluntatis arbitrium. Hi propterea, negant gratiam efficacem esse aliquid antecedens & necessarium: negant præcedere actum liberum; negant consequi ex gratia necessitatem operationis.

Mihi vero tam plana & expedita via, quæ nunquam Augustino succurrit, videtur tortilis & obliqua. Distinguendum enim est inter actus voluntatis indeliberatos, & deliberatos. Gratiam efficacem esse sanctam delectationem indeliberatam, a Deo excitatam in corde hominis, ultro fateor. Sed deliberatam ac volitam, de cujus libertate agimus, quis appellaverit Christi gratiam? quis non dixerit gratiam in voluntate supponere? Certo per dilectionem deliberatam meremur: & meritum subsequitur gratiam, quemadmodum effectus quilibet suam causam. Igitur sicut actus indeliberatus præcedit deliberatum, ita gratia Christi antecedit actum liberum voluntatis.

QUARTA REGULA.

Nonnulli, qui admittunt statutum supra discrimen inter statum creaturæ innocentis & per peccatum corruptæ, tenent, quod suppositio antecedens si necessaria sit ex capite dependentiæ, & requisita a rerum creaturarum conditione & essentia, fortassis libertatem interimat; at si contingens sit, accidentalis & ex capite infirmitatis, atque necessaria duntaxat non propter rerum essentiam, sed propter status circumstantias, non libertatem cogere, sed sanare. Quod sequentibus exponunt exemplis. Concupiscentia etiamsi pondus sit ad malum inclinans, & adeo grave, ut Apostolus illam dicat legem repugnantem rationi, & captivantem in lege peccati: attamen, ut fides Christiana docet, vulnerat quidem libertatem, sed non interimit, eo quod adventitia sit, accidentalis, & præsupponat in arbitrio indifferentiam, quæ essentialiter constituit libertatem. Nam nullum accidentale, qualecunque sit, essentiam rerum immutat; velut quod homo sit albus, aut niger nullam infert essentiæ hominis variationem. Itaque cum decretum efficacæ, gratia victrix, & absoluta prædefinitio non sint creaturæ libertati essentialia, sed exigantur ob vulnus peccato Adæ contractum, non poterunt evertere libertatis naturam. Imo quemadmodum concupiscentia, quæ ad malum inclinat minuit voluntarium, non tollit: ita gratia Christi, quæ bonam excitat voluntatem, arbitrium perscit, non perimit.

Rursus divina præscientia est aliquid antecedens, & nihilominus nullam infert necessitatem. Quare? attulimus cap. 3. causam multiplicem. Sed fautores Scientiæ mediæ respondent præscientiam non tollere libertatem, quia nihil ponit in rebus, & objectum supponit, non facit: quod universaliter falsum est, multa enim præsciuntur prædestinatione, & multorum ipsa præscientia est causa, cum Scientia Dei respectu plurium rerum sit practica. Sed detur adversariis quod ipsi contendunt. Præscientia, quæ supponit objectum & non facit, non infert necessitatem: Ergo neque necessitatem infert prædestinatio accidentalis, quæ præsupponit arbitrium in sua essentiali constitutum indifferentia. Simile quidpiam proferre possumus ex gratia congrua, quæ antecedit actum, & infallibiliter sortitur effectum; nec tamen officit libertati, quoniam supponit arbitrium in sua essentiali indifferentia.

Præterea explicatur hæc Sententia singulari quadam opinione Suaresii. Disputatur a Theologis de Christi libertate supposito præcepto Patris. Thomassinus docet fuisse tantummodo liberum libertate a coactione, sive lubentia. Maurus censet non fuisse liberum ad transgredienda præcepta, sed solum ad illa adimplenda per hunc actum, vel alium. Quamplures affirmant non fuisse illi impositum præceptum rigorosum. Multi dicunt fuisse liberum non quantum spectat ad substantiam

tiam mortis, sed quatenus pertinet ad circumstantias. Quid Suarezius? Is Tom. 1. in II. P. dist. xxxv. 1. sect. 3. ait posse voluntatem Christi considerari dupliciter: 1. ut voluntas creata est. 2. ut unita Personæ divinæ ipsam regenti; salvari autem in Christo libertatem propterea, quod licet peccare non possit humana Christi voluntas quatenus unita Verbo, potest tamen secundum se inspecta; non enim unio cum Verbo ad humanæ voluntatis essentiam pertinet. *Voluntas*, inquit, *Christi secundum se potest dici potentia peccandi, seu capax peccati, non tamen ut est voluntas Christi, quia jam componitur cum illa voluntate conjunctio cum potentia divina*. Bene habet. Quomodo salvatur libertas in Christo, quia ejus voluntas secundum se est essentialiter capax peccati, quamvis peccare non valeat prout unita personæ Verbi: salvatur licet libertas in voluntate nostra ex quo essentialiter sit indifferens; licet prædeterminetur accidentaliter, exigente gratiam indeclinabilem fauciata liberi arbitrii natura.

Itaque ex dictis ita difficultatem resolvunt: Suppositio antecedens, & inimpedibilis tollit libertatem si essentialis sit, & exigita titulo dependentiæ, transeat: si accidentalis sit, & requisita ex capite infirmitatis, nego.

Si dicas: Ad veram libertatem in statu naturæ lapsæ requiritur non solum libertas a coactione, verum etiam libertas a necessitate; est enim contraria propositio damnata in Janzenio: Atqui ex antecedenti necessario, quamvis accidentali, tollitur libertas a necessitate: Ergo, &c. Respondent dist. majorem. Requiritur libertas a necessitate essentiali, concedo: a necessitate accidentali, nego. Existimavit Janenius libertatis essentiam constitui per solam immunitatem a coactione, offendens plura in Augustino testimonia, quibus non semel arbitrii libertas per lubendam & spontaneitatem describitur. At aliter Augustinus loquitur de libero arbitrio disputans contra Stoicos Fati assertores, & contra Manichæos facientes Deum auctorem peccati; aliter contra Pelagianos inimicos prædestinationis & gratiæ. Agenti enim contra Manichæos & Gentiles Philosophos, sat erat asserere malam voluntatem, esse ex nobis, neque ad hanc arbitrium cogi aliqua constitutione fatali. At contra Pelagium disputanti necesse fuit demonstrare humanam voluntatem præveniri gratiæ muneribus eo majoris efficientiæ, quo sanandum est vulnus arbitrii, & regenda validis præsidii infirmitas. Hæc Janenius, quamquam in Augustiniana lectione aliquandiu versatus, sub inversusque permiscens, agens de Gratia definitionem arbitrii contra Stoicos traditam unice usurpavit. Illud liberrime patrari dixit, quod non sit coactæ, etiamsi eveniat necessitate aliqua essentiali. Afferuit proinde amorem Beatorum in patria esse undequaque liberum, quia, amant summum bonum voluptate ac lubentia; cum tamen necessarius sit necessitate essentiali, neque relinquat potentiam ad oppositum.

26. I.

B b b

QUIN-

Q U I N T A R E G U L A .

Doctrinam nuper traditam, quod Theologorum illorum pace dixerim, verbo tenus, non re a Janseniano errore discrepare arbitramur. Quippe Jansenius non adeo desipuit, ut crederet beatitudinem esse homini essentialem, quinimo in beatis veram libertatem, eandemque ac in viatoribus gratia præventis assernit, propterea quod, ut gratia victrix, ita Dei visio ad creaturæ rationalis essentialiam non spectat. Et quidem toto libro III. de Statu naturæ lapsæ nititur Jansenius monstrare victam vitio naturam libertate carere propter ignorantiam & concupiscentiam, quæ humanam voluntatem captivant in lege peccati, & carnalibus desideriis obstringunt: veram autem libertatem restitui per gratiam liberantem, & liberum facientem; & tam concupiscentiam, quam gratiam ita dominari, ut ablata indifferentia ad bonum, & malum agendi inducant necessitatem. Ut ergo concupiscentia non est natura, sed vitium, & gratia non est homini lapsæ perfectio essentialis, sed donum, ita per Jansenium, peccandi necessitas & dominatus concupiscentiæ accidentalis est, quomodo & accidentalis necessitas recte agendi quam infert gratia liberatrix. Tantummodo in sensu Jansenii sub dominatu concupiscentiæ, aut gratiæ consistit libertas a coactione, quoniam homo peccat culpabili cupiditate, & recte agit victrici delectatione: neque cogit arbitrium cupiditas, vel delectatio. Hæc est perversa doctrina Jansenii: quare non video quo jure Theologi quidam affirmant Jansenium necessitatem essentialem, non accidentalem asserere, & hoc inani præsidio studcant gratiam cum Dei prædeterminatione componere. Quartam ergo regulam reprobo substituta sequenti, quæ est Jansenianis principiis opposita.

Igitur creatura rationalis duabus facultatibus prædita est, intellectu, & voluntate: intellectus objectum est verum, & objectum voluntatis est bonum. Mens non est indifferens ad verum in communi, quia non potest cognoscere quod non est verum; neque voluntas est indifferens ad bonum in communi, quia non potest amare quod non est bonum. Ergo ad verum in communi naturaliter determinatus est intellectus, & ad bonum in communi est naturaliter determinata voluntas. Non ita res se habet circa hoc particulare verum, & circa hoc particulare bonum. Si hoc particulare verum sit per se evidenter clarum, nec videatur per aliud, cujusmodi sunt veritates; quæ appellantur prima principia, E. G. omne totum majus est sua parte, in quibus nulla interesse potest species falsi, naturaliter intellectus determinatur ad assentiendum, nec remanet libertas & indifferentia judicii. Si autem hoc particulare verum non sit per se evidenter notum, & videatur per aliud, cujusmodi sunt veritates, quibus permisceri potest species falsi, E. G. hæc proposito, Sol circa terram movetur, potest mens assentiri, vel dissen-

disfentiri, & five assentiat, five non, remanet semper indifferentia iudicii ac vera libertas. Pariter si hoc particulare bonum ita proponatur voluntati, ut non possit apprehendi sub specie mali, & sit per se, evidenter, & omnimode bonum, ut Deus visus per lumen gloriæ facie ad faciē, voluntas in hoc bonum tendit eadem necessitate, qua fertur in bonum in communi, in quo nequit apprehendi aliqua ratio mali, & consequenter non remanet in voluntate vera indifferentia ac libertas: at si hoc particulare bonum non proponatur, ut omnimode bonum, neque evidenter & tale apprehendatur, uti in hac vita fides, caritas, martyrium, quæ ita voluntati proponuntur, ut ea possit fugere & nolle, cum possit intellectus apprehendere, & proponere aliquam speciem mali in mundi contemptu, in sui abnegatione, in mortis supplicio; tunc quidem remanet in voluntate vera libertas, vera indifferentia, & vera potentia ad oppositum.

Ex quibus inferitur primo contra Janfenium, Beatos cum Deum videant intuitive, non esse in amore beatifico liberos, cum ad amandum Deum clare visum sint naturaliter determinati: unde S. Thomas 1. p. q. 1x. art. v. ait: *Cum in Deo sit unum & idem ejus substantia, & bonum commune, omnes qui vident ipsam Dei essentiam, eodem motu dilectionis moventur in ipsam Dei essentiam, prout est ab aliis distincta, & secundum quod est quoddam bonum commune. Et quia in quantum est bonum commune naturaliter amatur ab omnibus, impossibile est, quin diligant ipsam.* Sequitur secundo, quandiu in hac mortali vita degemus, posse Deum libere odio haberi; quia licet per ideam summi boni, & ex rebus aspectabilibus illum cognoscamus existere; tamen per plures effectus apprehenditur sub quadam specie, qua inordinatæ voluntati proponitur tanquam malum, E. G. tanquam prohibens peccata, & pœnam infligens: quod expressis terminis docet idem Sanctus Thomas. II. 2. quæst. xxxiv. art. 1. in corpore. Sequitur tertio non ideo concupiscentiam non evertere libertatem, quia accidit ex Adæ peccato, & essentia humani arbitrii pravam inclinationem non exigit, ut fatetur quoque Janfenius hac eadem ratione adstruens veram peccandi libertatem in damnatis ac dæmonibus: Sed quia concupiscentia non ita flectit ad malum, ut non possit proponi voluntati aliquod bonum illi contrarium, quod concupiscitur. Sequitur quarto gratiam prædeterminantem & victricem stare cum libertate, non quod necessaria sit duntaxat titulo infirmitatis, sed quia ita mentem illustrat, & voluntatem incendit, ut excitari possint contrariæ cogitationes & affectus: veluti quando Martyr per efficacem gratiam determinatur ad mortem, subeundam, potest timere mortem ipsam & formidare supplicia. Sequitur ultimo tolli veram libertatem a necessitate etiam per determinationem accidentalem, si talis sit ut non relinquat potentiam ad oppositum; quomodo vincula licet adventitia & accidentalia tollunt libertatem a

coactione, si tam vehementer constringant, ut non remaneat aliqua potestas arctissimos nodos solvendi. Sed hæc alibi accuratius.

SEXTA REGULA.

Postrema regula conciliandi cum divinis præfinitionibus libertatem est, quam plurimi probant Recentiores: qui docent efficaciam gratiæ non consistere in mortua aliqua qualitate physice prædeterminante, sed in blanda intimaque delectatione, quæ superat determinatione morali omnem adversam cupiditatem. Atque hi putant se facile nodum solvere, dicentes indifferentiam physicam non tolli nisi prædeterminatione physica, & recte componi cum prædeterminatione morali. Utuntur idoneis quibusdam exemplis. Dum (inquiunt) vir compos sui amore tenetur propriæ vitæ servandæ, nunquam in se convertet gladium, nunquam bibit sponte venenum, nunquam ex præalta turri defiliat; quod physicæ tamen potest, & faciet reipsa si naturali rationis lumine destituatur. Quis etiam, (addunt) dixerit disertissimum oratorem cogere illos quibus, verbis, ac propositis rerum agendarum exemplis ita alicujus rei describit utilitatem, ut non valeant abjicere exhortationes? Ita non cogit, neque affert necessitatem Christi gratiæ, quæ efficaciter præmoveret blanda, suavique caritatis delectatione.

Tria sunt, ut opinor, in hac regula: unum aperte falsum, unum verum, unum dubium. Verum est, gratiam in mentis illuminatione, & sancta delectatione consistere, ut ex nostris docent Cardinalis Norisius, Augustinus Burgensis, Basilius Poncius, Manso, alique plurimi; necnon Macedo, Lauria, Isambertus, Habert, Gradin, & infiniti propemodum, quibus nec dissentit Hyacinthus Serry in suo D. Thoma conciliato; quamquam communior sit Thomistarum sententia, gratiæ naturam sitam esse in qualitate, quæ hanc illuminationem & sanctam delectationem præcedit. Sed hæc quæstio alibi pertractabitur. Falsum est autem hanc illuminationem, & delectationem moraliter, & non physice prædeterminare liberum hominis arbitrium; illa enim celestis illuminatio & casta dilectio, non allicit duntaxat suadetque, veluti dum nuces ostendis puero, & trahis illum, sed vere ac proprie efficit ut faciamus: quare exemplum oratoris non est ad rem; & vereor quin istud nimis ardeat Pelagianis, qui minime negant gratiam, trahentem voluntatem sola propositione objecti. Dubium tandem in hac sententia remanet, quomodo hæc prædeterminans delectatio libertatem non tollat; ideoque recurrendum est ad regulam præcedentem: quam confirmat ipsum exemplum hominis deliri occidentis seipsum; qui non peccat, propterea quod mente captus, & nullius consilii, caret indifferentia judicii: & ex adverso homo sanæ mentis sub determinatione naturalis amoris libere servat propriam vitam, quoniam cum tali

tali amore stat iudicii indifferentia, ea nempe, quæ apprehendere potest in ipsamet vitæ propriæ conservatione aliquam speciem mali.

Sed quoniam ad cupiditatem & delectationem recurrunt etiam Janseniani, ut sententiam hæreticam Sanctorum verbis incrustatam reddant quodammodo speciosam: observandum est liberum arbitrium comparari aliquando a SS. Patribus stateræ, quæ hinc, indeque ab imposito pondere flectitur: unde ab Augustino in lib. de Spiritu, & litera definitur cap. 33. *Media illa vis, quæ vel intendi ad fidem, vel inclinari ad infidelitatem potest.* Trahit autem sua quemque voluptas, & pondus animæ est ejus amor; ideoque media illa vis inclinatur in bonum delectatione justitiæ, in malum vero perversa flectitur cupiditate. Ergo Janseniani in hoc turpissime errant, quod liberum arbitrium, quasi mortua esset bilanx, non vis, seu activa facultas, positum inter cupiditatis & gratiæ æqualia pondera opinentur nihil posse operari, ita ut necessario agat quod amplius delectat, uti statera a graviore pondere necessitate dejicitur; ut scribit lib. 1v. de Grat. Christi cap. 9. malus Augustini Interpres Jansenius. Hæc profecto sententia hæretica est; non enim liberum arbitrium est indifferens ad instar stateræ: non est potentia passiva, sed activa; neque post Adæ lapsum periit, & est titulus sine re, sed vivit adhuc, agit, & dum trahitur sive concupiscentia, sive sancta delectatione, habet indifferentiam potentiæ a nobis superiori Regula expositam. Quapropter æquilibrium Jansenianum, sive æqualem, alternamque concupiscentiæ & gratiæ pugnam, quæ sopiri non potest, nisi altera alteram superet delectando, & coque, ut Jansenius inquit, totum vergat pondus, nec non comparisonem stateræ, quam alio plane sensu, & ad significandam liberi arbitrii indifferentiam activam Patres tradiderunt, perinde ac Calvinii dogma, rejicimus & damnamus. Neque tamen admittre possumus æquilibrium aliud virium arbitrii, quasi tantum valeat ad peccandum, quantum ad non peccandum æqua penitus lance: sed firmiter confitemur illud invalidum esse, donec per gratiam Christi sanentur omnes languores animæ, ut Epist. 186. ad Paulinum docet S. Pater. Unde qui tale æquilibrium propugnant, *Videntur esse peccati originalis obliti*, inquit gravissimi Theologi Ludovicus Gotti de Grat. Actuali q. 2. dub. 5. §. 3. & Benitez disp. 111. dub. 1. cap. 1. ambo ex claro S. Dominici Ordine, & Angelici Doctoris magna Schola.

His, quantum vires ingenii mei poterant, explicatis, quintam Regulam ceteris præfero, & hujus ope reliquas ad Catholicum sensum, in quo ab Auctoribus suis traduntur, existimo revocandas. Itaque affirmo sub efficaci gratia, in sensu composito ac diviso Thomistarum, priori regula explanato, manere veram indifferentiam potentiæ cum determinatione actus, quoniam perseverat cum tali determinatione indifferentia iudicii. Idem assero de modo illo intrinseco contingenter ope-

382 De Theologicis Disciplinis L.IV. Cap.XIII.

operandi, quem modum suprema caussa in inferioribus attingit, ut dixi secunda regula. Hoc idem de prædeterminante gratia, cujus necessitas repetitur ex hominum infirmitate. Idem pariter de sancta delectatione, in qua Christi gratiam collocandam esse fatemur. Ex quibus etiam apparet, cur tam sensus compositus & divisus Thomistarum, quam aliæ omnes regulæ locum non habeant in visione beatifica; quod scilicet non remaneat potentia ad oppositum, ubi summum bonum ita videtur, ut nequeat in eo apprehendi species aliqua mali. Atque hæc est ratio conciliandi decreta absoluta, gratiam, ac prædestinationem Dei cum libertate humana, absque ulla Scientia media. In quibus si nondum lectores acquiescant, oro, ut animadvertant, quod principio monui, hanc perdifficilem esse quæstionem. Ego enim in exitu libri sum, ubi cum Augustino de Spiritu & lit. cap. xxxiv. tantum dixerō: *Cui responsio ista displicet, quærat doctiores, sed caveat ne inveniat præsumptiores.*





DE THEOLOGICIS DISCIPLINIS LIBER QUINTUS

*In quo differtur cur Dei voluntas dicatur
ab Apostolo bona, beneplacens
& perfecta.*



PROPOSITUM est hoc libro de divina Voluntate differere : de qua pertractatis iis, quæ ad prædefinitiones secundarum causarum spectant, & quæ potissimum in hoc argumento ingenia exercent Scholasticorum, minus prolixa superest disputatio. Ergo videndum primo quomodo hæc Dei voluntas sit *bona ac beneplacens*, idest, non delectetur morte peccatoris, neque ulla sint opera manuum suarum, quæ despiciat, & in quibus perpeti providoque regimine ordinem rectum fixumque non servet. De *perfectiōe* quoque Voluntatis, quæ est persistens cum immutabilitate libertas, agendum erit. Atque ita fiet, ut paucis liber iste absolvatur : nam de divino erga electos beneplacito, in libro, qui ad istum consequetur, paullo operosior instituenda erit dissertatio.

CA-

CAPUT I.

An divinum beneplacitum erga singulorum hominum salutem versetur.

DART in Deo Voluntatem constat Theologorum omnium consensio-
ne: non enim hanc negare potest, quisquis cœlestem Patrem
quotidie orat, dicens: *Fiat voluntas tua*: aut eundem cum Psal-
mista adloquitur, Pl. 113. v. 10. *Super misericordia tua & veritate tua*:
nequando dicant Gentes: Ubi est Deus eorum? Deus autem noster in
cœlo, omnia quaecunque voluit, fecit. Consequitur autem voluntas na-
tura sua intellectionem: neque aliud est quam in aliquod objectum con-
iuncta cum perceptione propensio. Quisquis ergo substantiam absque
voluntatis potentia persistentem excogitet, is non Deum percipiet,
sed rem corpoream spiritu ac ratione carentem. Ex his vero, quæ di-
ximus de divina simplicitate compertum est Dei substantiam, intelli-
gentiam, ac voluntatem nullatenus ab invicem discrepare, diversam-
que cum nominum, tum idearum fortiri rationem, cum ad plures ter-
minos comparantur. Quod enim de sapientia dictum est supra, debe-
mus affirmare, ut scribit Augustinus in v. de Trinitate cap. x. *De om-*
nibus omnino, quæ de Deo possunt pronunciari.

Quoniam ergo voluntas dicitur comparative ad bonum, atque
ipsamet Dei substantia bonum est per se subsistens, & per se diligendum,
cetera vero omnia bona sunt quadam participatione ac dependentia:
certum omnino est solam bonitatem divinam esse voluntatis Dei obje-
ctum *terminativum* ac *motivum*, & bonitatem creaturarum objectum,
ut vocant, *terminativum materiale*, atque *secundarium*. Quæ cum
sola vocabulorum explicatione facillime intelligantur; sufficit præfatas
dictiones enuciavisse.

Ex diverso quoque respectu varia emerfit in Scholis divinæ volun-
tatis partitio. Alia enim est voluntas *signi*, alia *beneplaciti*: illa est ma-
nifestatio aut declaratio exterior, qua Deus nobis significat se aliquid
velle; hæc vero est ipsamet interior volitio aliquid tanquam sibi gra-
tum decernens. Porro signa voluntatis divinæ sunt præceptum ali-
quid jubens, aut prohibens, consilium, permissio, & operatio. Hanc
voluntatem improprie & metaphorice dici est manifestum; nam vo-
luntas est actus immanens, signum vero externa manifestatio. Quem-
admodum ergo exterior pronunciatio verborum non est intima mentis
contemplatio, sed signum ejusdem, ita præceptum, divinumque
consilium sunt duntaxat interioris voluntatis significationes, non ipse
met latens atque interna volitio. Signa vero, quæ nobis Deus exhibet,
cum falsa nequeant esse, semper internam aliquam voluntatem suppo-

supponunt: at non semper illam, quam nos ex primo signi contuitu possumus conjicere. Ita cum Deus præcepit Abrahamo immolationem Isaac, apparebat hoc signo velle Deum mortem ipsius, sed intendebat solummodo experiri fidem & obedientiam Abrahami, & promissi Reparatoris atque Unigeniti sui præsignare crucifixionem. Ita permissiones peccatorum latentis alicujus consilii certissima signa sunt, sed nunquam mortis atque interitus peccatoris, quum velit misericordissimus pater, ut convertatur & vivat. Eapropter cum docent Theologi voluntatem *signi* sæpenumero non impleri, hoc sensu debent intelligi, quod non semper ea complentur, quæ nos arbitramur hisce signis subesse: sed aliquando alia eveniunt longe præstantiora; quorum causa Deus præscius futurorum præcedentia signa præmiserat. Atque hæc de voluntate, quam *signi* appellant.

At voluntatem beneplaciti, de qua exquisitior habenda est discussio, dividunt Theologi in *antecedentem*, & *consequentem*. Fautores Scientiæ mediæ voluntatem antecedentem illam dicunt, quæ antecedit voluntatis humanæ consensum, ejusque præscientiam: consequentem e contra, quæ talem consensum consequitur. At nos, qui totis lacertis contendimus dari absolutam voluntatem aliquos salvandi ante prævisa merita, & independentem a voluntatis humanæ prævisione, non possumus in hoc statu illam probare sententiam, neque futurum credere bonæ voluntatis actum aliquem, ante divinum liberalissimum beneplacitum, quo præparetur ipsa bona voluntas a Domino. Itaque voluntatem antecedentem Thomistæ illam dicunt, quæ connotat homines secundum se spectatos, ut conditos ad imaginem ac similitudinem Dei, & pretio passionis Christi redemptos: & voluntatem consequentem illam, quæ comparatur ad creaturas rationales in certis constitutis circumstantiis, quibus spectatis vult Deus aliquid simpliciter & absolute. Quemadmodum ergo justissimus princeps vult omnium civium ac totius Reipublicæ incolumitatem ac vitam, & mercator mercimoniorum suorum conservationem; & ille tamen furem & homicidam damnat mortis, is vero tempestate jactatus arcas mercesque projicit in mare: ita Deus quemque ad salutem invitat, & tota die expandit manus suas ad populum contradicentem, ut omnes ad illum accedant, capiantque hæreditatem salutis; sed quosdam sceleribus inquinatos, propter gloriam justitiæ suæ, rejicit, reprobatque. Quibus exemplis utitur D. Thomas 1. p. q. xix. art. 6.

Nos, non repudiata hac Thomistarum doctrina, cum sit hæc duplex hominum consideratio, secundum se, & in genere, atque in certis quibusdam circumstantiis, distinctio rationis nostræ, cumque vere ac proprie, & præcisè etiam consideratione mentis humanæ Deus sincere voluntate antecedenti velit omnium hominum salutem, duo alia connotata paullulum diversa spectamus, unde sumitur duplicis vo-

Tb.I.

C c c

Junta-

Iuntatis, antecedentis & consequentis distinctio. Attendendus est ergo ordo a Deo impositus, in quo omnes homines tam iusti, quam impii, donec vivunt, in via, qua ad salutem pervenire possunt, collocantur; omnes jus habent accedendi ad Ecclesiam, petendi Sacramenta, & obtinendi gratiam, quam hæc efficiunt: omnibus prædicatum est Evangelium, exhibita misericordia, præparata divinorum beneficiorum munera: pro omnibus Christus abunde comulateque satisfecit, & pretium redemptionis exhibuit, *non solum pro peccatoribus passus* (ut ait Cathech. Rom. p. p. cap. 5. n. 11.) *sed etiam pro illis, qui pœnarum omnium, quas pertulit, auctores, & ministri fuerunt.* Hujus ordinis impositio est objectum voluntatis antecedentis; unde Janfeniani, alii-que hæretici, qui affirmant neque Ecclesiam pro omnibus institutam esse, neque pro omnibus oblatam passionem Christi, neque pro omnibus satisfactum, nefarie impieque negant Deum velle omnium salutem antecedenti voluntate. Deinde attendendum est hujus impositi ordinis complementum & executio, qua hominum plurimi perducuntur ad salutis terminum, accipiunt donum perseverantiæ, percipiuntque reapse fructus passionis Christi: de quibus præfatus Cathechismus Rom. P. 2. cap. 4. n. 24. inquit: *Si vero fructum, quem homines ex eo perceperint cogitemus, non ad omnes, sed ad multos tantum eam utilitatem pervenire facile intelligemus.* Atque secundum hanc postremam rationem non pro universis, sed pro multis suum fudisse sanguinem, & rogasse Christum Cathechismus ipse declarat. Igitur voluntatem antecedentem illam dicimus esse, quæ spectat ad ordinis impositionem; & consequentem eam, quæ executionem respicit hujus ordinis: utramque vero esse voluntatem beneplaciti, & effectum sortiri, ad quem primario ordinatur.

Pluribus vocabulis hanc duplicem voluntatem veteres designarunt. Tradidit voluntatis utriusque discrimen Damasc. lib. 11. de Fide Orthodox. cap. xxix. his verbis: *Voluntas antecedens est, quod quis a seipso vult. Consequens, quod ex eorum quæ fiunt causa proficiscitur. Nam præcedente voluntate vult Deus omnes salvos fieri, & ad agnitionem veritatis pervenire: verum nobis peccantibus vult nos castigari prout conducit.* Ibidem appellat Damascenus voluntatem antecedentem voluntatem bonitatis, sequentem vero voluntatem justitiæ. Beatus Prosper in fine Respons. ad Ob. Vincent. priorem voluntatem vocat *invitantem*, alteram *judicantem*. S. Anselmus in cap. vi. Matth. primam nominat *voluntatem misericordiæ & de rerum possibilitate*: secundam *voluntatem justitiæ, & de effectibus rerum.* Itaque voluntas antecedens, bonitatis, misericordiæ, & possibilitatis rerum efficit ut omnes salvari possint, & constituantur in via salutis, eamque consequantur, si velint. Voluntas consequens, justitiæ, & de rerum effectibus præstat, ut omnes reipsa salventur, & ponantur in termino salutis. Hæc

Patres:

Patres : in quibus animadvertendum est voluntatem consequentem, dici voluntatem *justitiæ* comparate ad iudicium ac retributionem ; nam quatenus electis suis media elargitur particularium gratiarum, etiam voluntas consequens & effectrix appellanda est voluntas misericordiæ .

Quod nunc quæritur est, num detur in Deo voluntas antecedens salvandi omnes : nam de voluntate sequenti manifestum est in ea singulos non comprehendere . Videndum etiam, an hæc voluntas antecedens in Deo sit vere ac proprie, an vero metaphorice tantum, quemadmodum est in Deo ira, poenitudo, commiseratio. Negant primum Iansenius, Quenellus, Trickius, & ejusmodi pestes, qui contendunt, omnes, quos Deus vult salvare per Christum, salvari infallibiliter, quod damnatum est in Propositione xxx. Paschasii Quenelli : & consequenter docent velle Deum salvos fieri solos prædestinatos, atque pro istorum salute tantum fuisse Redemptorem suffixum cruci . Negant voluntatem antecedentem proprie in Deo esse Thomistæ præclarissimi, Bannez, Zumel, Bancel ; quibus subscribunt Sylvius & Estius, necnon ex nostris Basilii Legionensis, Florez, & alii contra longe plures, quos tamen ego arbitror posse facili negotio simul conciliari .

PROPOSITIO I. Deus voluntate antecedenti vult omnes homines, nemine prorsus excepto, salvari .

Demonstratur hæc propositio 1. Divinarum Scripturarum auctoritate . Nam illam beneficam voluntatem Dei testatur Ezech. xxxiii. 11. 32. his verbis : *Quare moriemini domus Israel ? dicit Dominus . Vivo ego . Nolo mortem impii, sed ut convertatur, & vivat .* Quibus verbis Deus non contentus dixisse se velle impiorum conversionem, id etiam juramento confirmat . Istud vero quantum nos reddat de divina voluntate certiores colligitur ex Tertulliano lib. de Poenit. cap. iv., ex Hieronymo Epist. xlv. 1., imo ex eodem Apostolo ad Hebræos cap. vi. 16. dicente: *Homines enim per majorem sui jurant : & omnes controversia eorum finis, ad confirmationem est juramentum . In quo abundantius volens Deus ostendere pollicitationem hæc verbis immobilitatem consilii sui interposuit iusjurandum .* In quo enim possumus propositam spem continere, si neque firmam anchoram habeamus verbum Dei, & immobile ipsius iusjurandum ? Rursus idem Apostolus in 1. ad Timoth. 11. ait : *Obsecro igitur primum omnium fieri obsecrationes, orationes, postulationes, gratiarum actiones pro omnibus hominibus Hoc enim bonum est & acceptum coram Salvatore nostro Deo, qui omnes homines vult salvos fieri, & ad agnitionem veritatis venire . Unus enim Deus : unus & mediator Dei & hominum homo Christus Jesus, qui dedit redemptionem semetipsum pro omnibus .* Atqui pro omnibus quid est, ac pro omnibus passus est Christus, nemine prorsus excepto : Igitur & omnes homines, nemine excluso, vult Deus salvos fieri : alias ine-

pta foret, & minus cohæreret Apostolica exhortatio. Hinc S. Prosper ad 2. object. Vincentianam, quæ hujusmodi est: *Quod Deus nolit omnes salvare, etiamsi omnes salvari velint*: respondet: *Remota discretione, quam divina scientia intra secretum justitiæ suæ continet, sincerissime credendum atque profitendum est, Deum velle, ut omnes homines salvæ fiant: siquidem Apostolus, cujus ista sententia est, sollicitissime præcipit, quod in omnibus Ecclesiis piissime custoditur, ut Deo pro omnibus hominibus supplicetur ex quibus quod multi pereunt, pereuntium est meritum; quod multi salvantur, salvantis est donum.*

Respondent Janseniani productum Pauli testimonium referri ad homines status innocentie, non vero ad illos, quos originalis culpa devinxit. Quod ostendi potest etiam ex idea voluntatis antecedentis, quam supra tradidimus ex Thomistis: hæc enim respicit rationalem creaturam secundum se, & abstrahendo a superinductis circumstantiis peccati. Ubi ergo originalis culpa supponitur, voluntas antecedens non habet locum.

At inanis profecto elusio. Nam in primis Apostolus de his loquitur, pro quibus affirmat orandum esse: At præcepit ut oremus pro omnibus, etiam regibus improbis, quales tunc orbis terrarum dominabantur, & quos specialiter ibi commemorat: Ergo ad omnes homines Apostolica spectat sententia. Imo quemadmodum prior ille status innocentie primi parentis peccato deperit; ita nos beatus Apostolus non hortatur, ut pro hominibus status innocentie Deum exoremus: sed nostras præscribit supplicationes pro iis, quorum & vitiata est natura, & facilis est interitus, possibilis tamen Deo miserante conversio. Præterea Apostolus addit Christi mediationem, ac redemptionem. Omnes ergo, quicunque *Redempti* sunt, sub illa generali voluntate certissime comprehenduntur. Neque obstat, quod in hoc statu superinductæ sint circumstantie originalis peccati; tum quia etiam originali culpa, imo & actuali quacunque posita, spectant viatores omnes ad ordinis impositionem superius declaratam: tum etiam quoniam passioe Christi prioris damnationis chirographum deletum est, ac propterea subsistit adhuc generalis illa voluntas intuitu meritorum Christi: per quem *regenerati sumus in spem vivam*, quemadmodum testatur Apostolus.

Hinc validissime probatur propositio ex quo Christus pro omnibus hominibus mortem subierit. Id in libro de Hæresi Janseniana adversus quintam propositionem sumus demonstraturi. Nunc satis est Jansenii dogma brevissime refutare. Ac primo opponitur allato Pauli testimonio: *Unus est mediator Dei & hominum homo Christus Jesus, qui dedit redemptionem semetipsum pro omnibus*: quod de solis prædestinatis non potest intelligi; quum nos hortetur Apostolus, ut nuper diximus, ad orandum pro omnibus, etiam reprobis ac perditissimis.

Rur-

Rufius idem Apostolus 2. ad Corinth. cap. 5. v. 14. *Si unus*, inquit, *pro omnibus mortuus est, ergo omnes mortui sunt*. Probatur hoc Pauli testimonio omnes Adæ posteros originalem culpam contrahere, ut constat ex lib. v. 1. Augustini contra Julianum cap. 4. & ex xx. de Civit. Dei cap. 6. Igitur sicuti omnes in Adam mortui sunt, ita Christus pro omnibus mortuus est. Atqui in Adam mortui sunt omnes: Ergo pro omnibus omnino mortuus est Christus. Verum de hac gravissima controversia citato loco accuratius.

Possumus generalem illam voluntatem salvandi omnes auctoritate quoque Patrum corroborare. Nam D. Basilius Hom. in Psalm. xxix. *Pæna*, inquit, *secundum Dei judicium; vita vero est, quam ille vult*. *Quid ergo dicis? nempe velle hoc Deum, suæ ut vitæ participes omnes fiant*. Macarius Hom. 26. *Dominus in benignitatem, & misericordiam compositus unice desiderat quod toti prorsus ad eum convertamur, ab omni contrarietate nos eripientes*. Chrysostomus in 1. ad Timotheum cap. 2. *Imitare Deum tuum: si enim ille omnes vult salvos fieri, merito pro omnibus oportet orare: si omnes ille vult salvos fieri, velis & tu: si & tu vis, ora pro iis*. Ambrosius lib. 111. de Interpellat. David. cap. 2. *Pulchre itaque Apostolus, ut præmisimus, explanavit quia & omnibus bonus est Deus, qui vult omnes homines salvos fieri, &c.* Prosperum paullo superius laudavimus: & de S. P. Augustino dicendum est infra in respons. ad 1. Adde Concilium Arelatense tertium, Moguntinum, Valentinum, & Carisiacum: Theologos quoque celeberrimos cujusque ordinis, atque ætatis; quorum consensus invictum suppeditat argumentum.

Ex dictis eruitur quoque validissima ratio. Tenemur quippe omnes orare pro singulis, petere ac sperare regnum cælorum, ac Redemptorem nostrum ardentissima caritate diligere, propterea quod nos a perditione per mortem suam atrocissimam liberavit: Atqui tanta spei, & caritatis motiva prorsus evanescerent, si nos pulsare posset suspicio, quod divinum beneplacitum non se extenderet ad omnium hominum salutem: Ergo, &c.

PROPOSITIO II. Hæc voluntas salvandi omnes est in Deo vera, propria, atque sincera.

Sequitur ex dictis, & brevissime confirmatur. 1. Quidquid sacræ literæ de Deo affirmant, si maxime deceat ipsius bonitatem, misericordiam, ac providentiam, qua rationales creaturas dirigit in viam salutis; id absque ulla hæsitazione est asserendum de ipso Deo: Atqui in sacris libris legitur velle Deum, ut omnes homines salvi fiant; id vero magnopere decet infinitam ipsius caritatem, & directionem creaturarum in finem ultimum: Igitur absque ulla hæsitazione asserendum est, Deum proprie ac sincerissime velle salutem omnium. 2. Voluntas antecedens dicitur comparative ad institutionem mediorum, quibus omnes sal-

salvari possunt : Hoc autem est aliquod vere bonum , quod est obiectum voluntatis sinceræ ac propriæ : Ergo est in Deo sincera ac propria voluntas illa antecedens salvandi omnes . III. Vere Deus omnes ad agnitionem veritatis invitat , omnibus , si velint , Ecclesiæ Sacramenta dispensat , pro omnibus redemptionem dedit Unigenitum suum . Hæc sunt signa beneficentissimæ Dei voluntatis . Atqui istiusmodi signis non subest certa , & absoluta voluntas omnes efficaciter perducendi ad consecutionem salutis . Subest ergo saltem voluntas generalis , & antecedens , quæ versatur circa salutis possibilitatem , in qua singuli comprehenduntur .

Verum quidem est , complures Theologos affirmare voluntatem antecedentem , non esse in Deo propriam , quod S. Thomas scribat esse voluntatem inefficacem , conditionatam , ac suspensam ; eamque 1. P. q. xix. art. 6. ad 1. appellet *velleitatem* potius , quàm voluntatem ; quoniam non semper impletur : cum e contra illud semper compleatur , quod Deus vult *simpliciter* . Atque hinc est , quod Paulus Irenæus , aliique Janseniani dogmatis fautores a celeberrimis Theologis jactant se minime dissentire .

At pessime novæ hæreseos patroni aberrant . Scholasticorum enim dissidium facile componitur , atque a Pseudoaugustinianis illis toto distat cælo . Distinguendus est enim duplex divinæ voluntatis effectus . Unus est rationale creaturam ad finem supernaturalem ordinare , eamque in via locare salutis , necnon ei parare , exhibere , conferre quoque , nisi ea detrectet , auxilia gratiæ sufficientia . Alter effectus est creaturam rationalem ad salutem perducere , illam in termino collocare , & præter communia gratiarum dona , eidem specialissima & efficaciam , etiam finalis perseverantiæ , largiri . Horum diversitatem effectuum ex antiquioribus tradiderunt Aegidius Romanus in 1. dist. 46. q. 1. & Scotus , ac beatus Bonaventura eodem loco : ex recentioribus vero Bernardus Desirant lib. xxx. Aug. Vindicati , & alii quamplurimi . Dum ergo Theologi aliqui asserunt voluntatem antecedentem in Deo esse metaphoricè , id Catholico sensu pronuntiant . Ac primo , cum nulla sit intrinseca Deo distinctio , negant esse in Deo antecedentem voluntatem distinctam a consequente , quod totum discrimen petendum sit ex parte *volitorum* , ut inquit Durandus Quæst. 3. distinct. 47. Deinde si comparetur voluntas Dei antecedens ad actuale gloriæ consecutionem , atque ad seriem auxiliorum , quibus ad salutis terminum perducuntur electi , manifestum est hanc voluntatem in Deo non esse propriam ac veram , neque semper impleri ; quoniam reapse non omnes electi sunt , neque omnibus vult Deus talia media impertiri , quæ certissime cooperante libero arbitrio ad salutem perducant . Sed impletur tamen in aliquo ordine , & semper effectum proprium & immediatum consequitur ; primum scilicet , qui est ordinare creaturam in suum finem,

nem, eamque in via constituere salutis. Quæ doctrina Catholica est, vera; & ab omnibus, si Molinianos excipias, summa consensione defenditur. Janſenius vero voluntatem hanc generalem a statu naturæ lapsæ procul ablegat, nullam gratiam admittit, cui liberum arbitrium resistat, nullam sinceram voluntatem salvandi nisi prædestinatos, nullum præter electos a Christo Reparatore redemptum, & licet aliquando ad palliandum dogma perversitatis Veterum usurpet verba, longe tamen ab eorum sensu recedit. Ita voluntatem Dei antecedentem, quam inculpate Veteres impropriad ac metaphoricam appellaverunt, propterea quod illam comparaverint cum actuali consecutione salutis: adversus Janſenistarum cavillationes nos sinceram verissimamque esse contendimus, sed illam explicandam esse censemus connotative ad generalem ordinem creaturarum, non ad qualescunque rerum circumstantias: alioquin nullum foret discrimen inter duplicem Dei voluntatem, quod nemo consentit.

eorum, quæ obijciuntur, refutatio.

Opp. 1. Exponere Apostolicam sententiam *Deus vult omnes homines salvos fieri*, de generali voluntate antecedenti, in qua singuli homines complectantur, est falsa interpretatio, quam S. P. Augustinus rejicit tanquam doctrinæ prædestinationis & gratiæ hujus status aperitissime repugnantem. Ergo & rejicienda est ab Augustini discipulis ejusmodi commentatio. Prob. ant. Quadrifariam sanctissimus Antistes sententiam interpretatus est Apostolicam. Primum, ut dicatur Deus velle omnes salvos fieri, quia nullus fit salvus, nisi Deo volente ac prædestinante, quemadmodum de Ludimagistro dicimus: *Omnes pueros literas docet*, non quod gymnasium frequentent omnes omnino pueri; sed quia illo uno Magistro proficiunt quotquot literis impendunt operam. Ita S. P. Epist. ad Vitalem, in Enchirid. ad Laur. cap. cix. lib. de Prædest. SS. cap. vii. de Corrept. & Gratia cap. xiv. & lib. iv. contra Julianum cap. viii. Altera Augustiniana interpretatio est, ut omnes accipiantur distributive, & pro generibus singulorum, quomodo dicitur omne animal fuisse in arca Noe, idest, animal cujuscunque speciei; itaut sententia sit, Deum velle salvos fieri nonnullos ex omni genere & conditione, Judæos, Græcos, pueros, adultos, divites, pauperes, &c. Ita S. P. in Enchirid. cap. ciii. de Corrept. & Gratia cap. xiv. necnon Fulgentius, Anselmus, Beda, aliique. Tertia expositio est, ut afferatur velle Deum omnes salvari, quoniam *nos facit velle*: Nam sicut clamantem Spiritum, ad Romanos vii. recte dixit Scriptura, a quo efficitur ut clamemus; ita recte dicimus volentem Deum, a quo efficitur ut velimus. Ita S. P. de Corrept. & Gratia cap. xv. & lib. xxi. de Civit. Dei cap. i. Neque solum efficit Deus, ut electi

electi velint salvari, sed etiam ut pii homines magnopere desiderent omnium salutem, tametsi non omnes salvari velint, ut animadvertit ex Augustino Estius dist. XLVI. §. 17. & Sylvius quæst. XIX. art. 6. Postrema expositio est; Deum contulisse humano generi in universum auxilia quamplurima externa, quibus suam pro omnium salute curam ac sollicitudinem significavit, nimirum legem omnium menti inscriptam, exemplum ac redemptionem Christi, prædicationem Apostolorum, orationes Ecclesiæ, Sanctorum virorum merita ac labores, &c. Quam interpretationem affert fidelissimus Augustini Discipulus Prosper in Resp. ad 1. & 2. Ob. Vincent. Hæc omnia interpretamenta excludunt a Deo voluntatem antecedentem salvandi omnes, & admittunt duntaxat voluntatem consequentem pro electis, pro ceteris autem voluntatem *signi*, ac metaphoricam. Ergo juxta Augustini doctrinam non videtur generalis illa propria ac vera voluntas admittenda.

Resp. Vasquesius 1. p. disp. 83. cap. 2. beatissimum Patrem locum Pauli nullo ex illis modis recte exposuisse, & noluisse concedere voluntatem Dei antecedentem circa omnium salutem. Sed stant adversus Vasquesium Theologi præstantissimi, qui præfatas expositiones summo opere commendant, & ceteris quoque præferunt, S. Thomas q. XIX. art. 6. Estius dist. 46. §. 17. Sylvius q. 3. ad præcit. artic. beati Thomæ, S. Anselmus & Beda apud Gerardum Vossium lib. VII. Hist. Pelag. parte 1. Thesi 2. ut præmittam clarissimos Thomistas, & Augustinianos universos. Itaque respondendum est, allatas Augustini interpretationes, nequaquam cum voluntate antecedenti circa omnium salutem pugnare. Nam S. Pater de voluntate consequenti, absoluta, efficaci, & quæ est de rerum effectibus, non de antecedenti, quæ spectat homines in universum, accipiendus est. Ac primo id præmonuit Sanctus Thomas in 1. dist. 46. q. 1. art. 1. Deinde hæc eadem Vasquesii impostura post obitum S. Patris in Galliis spargi cæpit; eique occurrit beatus Prosper in Præfat. Resp. ad Object. Vincent. dicens: *Contrexunt ineptissimarum quarundam blasphemiarum prodigiosa mendacia, asserentes talia in nostro esse sensu, qualia diabolico continentur indiculo.* In illo vero prodigioforum mendaciorum indiculo, secunda contra Augustinianam doctrinam objectio erat: *Quod Deus nolit omnes salvare*: & consequenter Vasquesius ineptissimas Semipelagianorum querimonias ingeminat. Præterea Augustinus acerrime in libris laudatis propugnabat prædestinationem & gratiam, necnon voluntatem Dei trahentem validiori gratiæ adjumento unum præ alio, quod Pelagiani negabant, ideoque de voluntate efficiente & absoluta erat ei specialiter pertractandum. Rursus S. P. voluntatem antecedentem salvandi omnes apertissime admittit lib. de Spiritu & lit. ad Marcellinum cap. XXXIII. ubi hanc proponit quætionem: *Si voluntate quarimus, de hac queritur nude fit. Si natura, cur non omnibus, cum sit idem Deus*

Deus omnium creator . Si dono Dei , etiam hoc , quare non omnibus , cum omnes homines velit salvos fieri , & in agnitionem veritatis venire ? Ad istam vero questionem sic respondet : Vult Deus omnes homines salvos fieri , & in agnitionem veritatis venire : non sic tamen ut eis adimat liberum arbitrium , quo vel bene vel male utentes iustissime judicentur . Quod cum sit , infideles quidem contra voluntatem Dei faciunt , cum ejus Evangelio non credunt : nec ideo tamen eam vincunt , verum seipfos fraudant magno & summo bono , malisque pœnalibus implicant , experturi in suppliciis potestatem , cujus in donis misericordiam contempserunt . Ita voluntas Dei semper invicta est : vinceretur autem , si non inveniret quid de contemptoribus faceret , aut ullo modo possent evadere , quod de talibus ille constituit . Qui enim dicit , v. g. volo ut hi omnes servi mei operentur in vinea , & post laborem requiescentes epulentur , itaut quisquis eorum hoc noluerit , in pistrino semper molat ; videtur quidem quicumque contempserit , contra voluntatem Domini sui facere : sed tunc eam vincet , si & pistrinum contemnens effugerit : quod nullo modo fieri potest sub Dei voluntate . His verbis , exemplique satis liquet non rejici a S. Protoparente Augustino antecedentem voluntatem salvandi omnes , & ejus interpretationes supra recensitas de voluntate efficaci & absoluta accipiendas esse , quam præsertim nolebant admittere Pelagiani .

Opp. 2. Antiquiores Augustini Discipuli , & qui fidiiores habentur ejusdem Affectu , nullam in Deo voluntatem agnoscunt , nisi divinum erga prædestinatos beneplacitum . Fictitia est ergo voluntas antecedens salvandi omnes . Prob. ant. Auctor Hypognost. lib. vi. cap. ult. *Omne , inquit , quod Deus vult facere , potest , nec prorsus humana voluntate præpeditur , quod vult .* S. Fulgentius lib. de Incarnat. cap. xxxi. *Omnes ergo , quos Deus vult salvos fieri , sine dubitatione salvantur : nec possunt salvari , nisi quos Deus vult salvos fieri : nec est quisquam , quem Deus salvari velit , & non salvetur ; quia Deus noster omnia , quacunque voluit , fecit .* S. Prosper Carmine de Ingr. cap. 16.

*At vero omnipotens hominem cum gratia salvat ,
Ipsa suum consummat opus ; cui tempus agendi
Semper adest , quæ gesta velit ; non moribus illi
Fit mora ; non causis anceps suspenditur ullis .*

Quibus docet , nullam esse in Deo voluntatem , quæ suspensa sit , neque adimpleatur ; qualis est antecedens , conditionata , & inefficax . Patres denique Africani in Sardiniam relegati Epistola Synodica cap. xiv. *Omnes , inquit , prædestinati ipsi sunt , quos Deus vult salvos fieri , & ad agnitionem veritatis venire : qui propterea omnes dicuntur , quia in utroque sexu ex omni hominum genere , gradu , & conditione salvantur . Semper quippe voluntas Dei omnipotentis impletur , quia potestas ejus nullatenus vincitur .* Fidiiores ergo Augustini di-

Tol.

D d d

scipuli

scipuli voluntatem salvandi omnes ad solos referunt prædestinatos.

Resp. dist. ant. Fideliores Augustinianæ doctrinæ sectatores nullam in Deo voluntatem salvandi profitentur, nisi respectu prædestinatorum, & loquuntur de voluntate consequente, & quæ est de rerum effectu, conc. de voluntate antecedente, & quæ est de rerum possibilitate, nego. Prædictos Patres de voluntate consequente verba facere, liquet primum ex eorum scopo, & ex argumento quod tractant: quum toti sint in vindicanda adversus Pelagianos, horumque reliquias discretionem rejciendorum, atque eligendorum, præparationemque gratiarum, non qualiumcunque, sed quas Deus juxta propositum voluntatis suæ impertitur electis. Id namque obrectatores Augustinianæ doctrinæ negabant pugnaciter. Præterea horum Patrum sensus haud obscure ex recensitis libris, locisque deprehenditur. Etenim Auctor Hypognost. loquitur de voluntate salvandi *finaliter*, idest perducendi reipsa prædestinatos ad salutis consecutionem, ac terminum, ut ex sola lectione capitis ultimi manifeste colligitur. De hac eadem voluntate accipiendum esse beatum Fulgentium, quæ subsequuntur verba liquido manifestant. Nam scribit: *Ipse prædestinando præparavit gratiæ donum, qui gratiam donando implet prædestinationis effectum*. S. Prosperum loqui de voluntate absoluta, quæ suum consummat opus, & ex his carminibus eruitur, & ex Respons. ad 2. Ob. Vincent., de qua supra. Afros quoque Patres de consecutione salutis, non de ejusdem initio disputare ex eo constat, quod in laudata Epistola de Prædestinatione secundum Dei propositum agere instituant. Sed vide Desirantium lib. Aug. Vindicat. xii.

Opp. 3. Omnis Dei voluntas impletur; dicitur enim in Psal. 134. v. 6. *Omnia quæcunque voluit, fecit in celo, & in terra*: & cap. 46. Isaïæ v. 10. *Omnis voluntas mea fiet*; Atqui voluntas antecedens non impletur: Ergo voluntas antecedens in Deo minime reperitur.

Resp. 1. dist. min. Voluntas antecedens non impletur quantum ad effectum sibi proprium, qui est omnes in viâ constituere salutis, ac singulis præparare & exhibere auxilia communia, quibus consequi possunt salutem, si velint; nego: non impletur quantum ad effectum voluntatis consequentis, qui est perducere ad terminum salutis, & largiri specialissima gratiarum dona, quibus salus certissime comparetur, concedo. Resp. 2. dist. majorem: Omnis Dei voluntas impletur, si absoluta sit, & consequens, concedo: Si conditionata, & antecedens, subdistinguo: non impletur in individuo, & in singulis hominibus inspectis secundum peccatorum circumstantias, ipsomet Deo ita volente ac disponente in gloriam gratiæ, & manifestationem justitiæ suæ, concedo: non impletur comparate ad creaturas rationales spectatas secundum se in universum, & abstractivè a superinductis peccatorum circumstantiis, volente Deo creaturarum suarum perditionem, nego.

Utra-

Utraque responsio constat ex dictis, sed prior cum tradita a nobis notatione voluntatis antecedentis magis coheret.

Infistes: Si voluntas antecedens dicatur duntaxat connotative ad creaturam rationalem abstractive ab individuis aliqua circumstantia affectis; Ergo Deus voluntate antecedenti dicendus erit velle salutem etiam damnatorum hominum, ac dæmonum, neque minorem habebit curam reproborum adhuc permanentium in via, quàm dæmonum ac damnatorum.

Resp. transmissio antec. nego consequentiam; quum enim effectus voluntatis antecedentis sit locare rationales creaturas in via salutis, eisque communia gratiarum dona parare, ut valeant æternam sibi promereri beatitudinem, donec liberi arbitrii facultate ad bonum, malumve uti possunt: non potest ad hanc voluntatem pertinere quisquis jam constitutus in termino, neque merendi pollet libertate, neque priorum oratione juvatur, neque ulla interiori gratia excitatur, neque aliquod experiri potest divini beneplaciti beneficium.

Opp. 4. Non est voluntas antecedens propria ac sincera, quæ conjungitur cum voluntate consequente illi opposita: Voluntati salvandi omnes opponitur voluntas consequens damnandi quamplurimos: Igitur voluntas antecedens salvandi omnes in Deo propria, ac sincera non est. Prob. ma. Si enim in potestate esset mercatoris motus fluctus componere ac tempestatem sedare, & nihilominus in mare merces projiceret; hæc voluntas consequens & efficax quæ projicit merces evidentissime ostenderet non fuisse in eo sinceram, propriamque voluntatem merces conservandi. Cum ergo Deus possit omnes salvare; si plures damnat ac reprobat, manifesto ex hac damnandi, ac reprobandi voluntate inferitur, illam, quæ versatur circa omnium salutem, in Deo propriam sinceramque non esse.

Resp. dist. majorem: Si utraque voluntas antecedens & consequens connotent eundem finem, idemque objectum, conc. Si diversum, nego. Mercator, cum particularis persona sit, unicum sibi finem præfigit, nimirum negotiationem ac lucrum; & comparate ad finem unum non datur duplex voluntas opposita, sed unica. At Deus universalis rerum omnium provisor, ac rector non solum voluntate sua locat omnes in via salutis dum vivunt, & vult illos ad impositum ordinem pertinere, verum etiam illud definit, quod efflagitat particularis singularum rerum conditio, & impositi ordinis executio. Respicit ergo voluntate antecedenti rationalem creaturam universam, eamque visceribus misericordiæ & caritatis complectitur: consequenti verbò hæc, vel illa individua, quæ meritorum malorum præscientia damnat ad ostensionem justitiæ. Quum ergo in divina voluntate duplex sit connotatio, ac duplex finis; non implicat voluntatem antecedentem & consequentem invicem esse contrarias; sive, ut loquar rectius, unam

eandemque voluntatem, si ad diversa referatur connotata, aliquam dicere oppositionem; quæ, cum sit ex parte terminorum, nullam potest in Deo evincere discrepantiam.

Opp. 5. Ideo iudex voluntate antecedenti vult omnium civium incolumitatem, quoniam non intuetur futuram aliquorum flagitiosissimam conversationem, quos de patrato scelere accusatos voluntate consequente damnat ac punit; quorum pessimam vitam si antecederet novisset, nunquam de ipsorum salute fuisset sollicitus: Igitur Deus, qui omnium rerum præsentissimam habet cognitionem, de illorum quos voluntate iustitiæ reprobat, condemnatque, non potest habere voluntatem sinceram antecedentem misericordiæ, ac beneplaciti, ut salvi fiant.

Quidam respondent allatum exemplum non esse ad rem, nam si de improbo, ac pestifero cive loquamur, quemadmodum & de peccatore finaliter impenitente, comparatur voluntas ad personam in certis circumstantiis constitutam; & consequenter non remanet objectum voluntatis antecedentis, sed in his locum habet sola voluntas consequens: quæ responsio ex tradita definitione utriusque voluntatis in sententiâ Thomistarum, est manifesta. Alii docent Judicem non esse generalem provisorum, sicuti Deus est, ideoque ex voluntate antecedente, quæ vult homicidam vivere in quantum homo est, nulla ei præparare media, ut possit capitis penam vitare: Deum vero singulis hominibus, quantumvis scelestissimis, communia saltem media præbere: unde in Iudice voluntas antecedens est sterilis & otiosa; in Deo autem vera, benefica, & alicujus effectus operatrix. Sed respondemus exemplo Judicis nostram confirmari sententiam. Etenim etiamsi Iudex prævideret civis alicujus meditatam flagitium, quo patrato in reum pœna mortis animadverteret, non tamen civem illum prorsus defereret, sed monitis minisque a perpetrando scelere deterreret, impleretque omnia, quæ munus postulare Rectoris, ac Judicis. Ita Deus, quamquam ob multorum, quam prævidet, obdurationem futuramque impenitentiam, illos reprobet ac suppliciiis addicat, eos tamen generalibus adjumentis non deserit, sed misericordissima caritate hortatur, adjuvatque ne pereant.

Opp. ult. Voluntas antecedens de universorum salute effugium erat Semipelagianorum, quo Augustinianam de Electione aliquorum secundum Dei propositum doctrinam repudiabant.

Resp. Semipelagianos admisisse in Deo voluntatem antecedentem, quæ ex præscientia humani consensus, fideique sola naturali facultate elicite proprium consequeretur effectum, inipugnasse penitus voluntatem sequentem, qua Deus certos a massa perditionis ante mundi constitutionem liberare decrevit: excogitasse quoque, ut salutis initium in nobis statuerent, prævisionem meritorum, quæ nunquam futura

tura erunt, in parvulis, qui ante usum rationis rapiuntur. Quæ omnia sequenti libro sunt refutanda. Nos e contra dicimus nunquam ab humana divinam præveniri voluntatem, hanc omnium meritorum nostrorum causam esse ac principium; &, quo ab inimicis gratiæ Christi magis recedamus, etiam voluntatem consequentem & absolutam a divino proposito, non ab operum præscientia repetendam, esse defendimus. Distat ergo toto cælo voluntas antecedens in sensu Pelagianorum ab ea, quam hætenus propugnâvimus.

C A P U T II.

Nullam esse in ordine universorum Creaturam, quam Deus sui ipsius causa non amet, & cujus non habeat sedulam curam ac vigilantissimam providentiam.

PROXIMA est quæstio de Amore Dei erga creaturas suas, & de providentia, quam tenet rerum universarum. Pro qua dirimenda, illud tanquam certum supponimus, in Deo reperiri actum amoris, quo vult rebus a se aut productis, aut producendis aliquid bonum; etsi in eo non sit desiderium, neque odium, saltem inimicitia, proprietale. Desiderium enim est de bono tantum absente; quod nequit in Bono incommutabili, ac summa *entis* plenitudine excogitari. Odium quoque est velle alteri malum; quod repugnat Deo semper ad benefaciendum propenso. Nam & quando punit, cujusque malevolentia expers est; neque movetur animi perturbatione, sed amore justitiæ, & propriæ divinitatis, gloriæque motivo. Quare odisse dicitur impios, translata ab hominum indignatione proprietate sermonis.

PROPOSITIO I. Deus amat creaturas suas propter propriam sui ipsius bonitatem.

Duas hæc thesīs partes habet. Ac prima probatur ex *1. Genesios v. 31. Vidit Deus cuncta quæ fecerat, & erant valde bona: & Sap. x1. 25. Diligis omnia quæ sunt, & nihil odisti eorum, quæ fecisti.* Probatur quoque ratione. Deus namque creaturis suis aliquid largitur bonum, existentiam, conservationem, & quidquid ipsarum conditioni, & rerum ordini maxime congruit. Atque, si nondum fuerunt productæ, id illis sempiterna sua voluntate conferre decrevit. Vult ergo creaturis universis aliquid bonum, ideoque verò illas amore prosequitur.

Altera pars propositionis, scilicet quod Deus omnia diligit propter semetipsum, constat pariter ex Scripturis; legitur enim Proverbiorum xvi. 4. *Universi propter semetipsum operatus est Dominus.* Cui & ratio manifestissima accedit; & quod sola bonitas divina sit caritatis Dei

Dei objectum, ut inquirunt *specificativum* : & quod ita Deo conveniat ratio primi principii, quemadmodum finis ultimi. Quamobrem ut operari non potest, nisi ex se ipso; ita nequit, nisi propter se, aliquid velle, aut diligere.

Opp. 1. Divinus amor est indistinctus a Dei essentia : Deus non est aliud, quam ens a se : Ergo non amat aliud, quam se.

Resp. dist. maj. Divinus amor, & essentia idem sunt, si spectentur in se, conc. si comparate ad terminum, atque connotative, nego. Deo idem est esse ac velle, seu illud dicitur ad se, istud relative; quemadmodum de scientia, ceterisque attributis Dei alibi dictum est; unde nil mirum si scientiæ ac voluntatis divinæ assignari possit extrinsecum connotatum, tamen illud nequaquam *Essentia* idea ac nomine comprehendatur.

Opp. 2. Aliquem diligere propter se est amor concupiscentiæ : Talis amor Deo videtur indignus : Igitur Deus neminem diligit propter se.

Resp. aliqui non repugnare Deo amorem concupiscentiæ; non amorem illum, quo concupiscimus quod non habemus, sed quo concupiscimus aliquod bonum ei, quem diligimus. Sed resp. dist. maj. est amor concupiscentiæ, si inde aliqua diligenti proveniat utilitas ac delectatio, conc. secus, nego.

Opp. 3. Deus in creaturis suis vult sæpenumero mala : non ergo eas diligit.

Resp. dist. ant. mala culpæ, nego. Mala naturæ, idest monstra ac portenta, subdistinguo, vult directe, nego; indirecte, ac propter justitiæ ordinem, ac regimen universi, concedo.

Quæres quid asserendum sit de possibilibus.

Resp. non convenire circa amorem rerum possibilium Scholasticos. Tenent quidam amari a Deo, atque his momentis ducuntur. Primo: Possibilia bona sunt in suo genere, nempe non actu, sed *possibilibus*: Quidquid autem bonum est, a Deo proculdubio diligitur. Præterea: Possibilia a Deo cognoscuntur, ergo & amantur; si enim res possibiles, quæ non sunt, possunt esse divinæ cognitionis objectum, poterunt quoque objectum esse divini amoris; nam qualem veritatem habent, talem etiam habent in se bonitatem. Rursus salus omnium est possibilis, ut capite dictum est præcedenti, & tamen illam vult Deus sincero animo. Mundus ergo possibilis, licet nullam habeat, vel habere debeat existentiam, diligi potest a Deo, amore saltem simplicis complacentiæ.

Quidam ex adverbo creaturas posibles a Deo nulla ratione amari putant. Quod primo hac probant argumentatione: Nullam participant creaturæ posibles rationem boni; non enim habent existentiam, quæ prima est ceterarum perfectionum, nisi objectivam duntaxat, & a divina indistinctam omnipotentia: At illud quod nullam in se continet

net bonitatem , nequit esse objectum dilectionis , aut complacentiæ . Uterius : Amor Dei effectivus est , non affectivus , & semper rebus impertitur quicquid dignum videtur amore : creaturis autem possibilibus nihil bonitatis aut perfectionis largitur Deus , & consequenter minime ab eo diliguntur . Ad hæc : duo sunt caritatis , & amoris actus , uti , & frui . Utimur rebus , quas ad consecutionem finis præstantioris ordinamus : fruimur vero iis , in quibus animus voluptate ac dilectione quiescit . Hinc Magister Sent. in principio prioris libri docet rebus creatis utendum esse , Deo autem summo bono , atque ultimo fine fruendum . At possibilibus Deus neque utitur , neque fruitur . Non utitur : quoniam non eliguntur in usum propter aliquid obtinendum ; nec fruitur , quia nulla re creata Deus tanquam ultimo fine delectatur . Nullus ergo actus amoris erga possibilia existit in voluntate divina . Traditur hæc ratio a S. Patre Augustino lib. 1. Doctrina Christiana cap. xxxi. ubi postquam ostendit Deum nos diligere utendo , non fruendo , ait : *Nam si neque fruitur , neque utitur , non invenio quemadmodum diligit .*

In hac vero opinionum diversitate , duo nobis certa videntur ; primum non diligere Deum creaturas posibles amore aliquo efficaci : quod probant argumenta nuper producta . Secundum vero , quod si cuti bonitatem & essentiam possibilium constat non esse a parte rei , sed tantum in mente hominis abstrahentis ; ita amor ille divinus erga possibilia , non est in re , sed in nostra solummodo cogitatione . Non enim diligi possunt , nisi quomodo sunt , quæcunque amore rectissimo diliguntur .

PROPOSITIO II. Gubernat Deus providentia sua omnia etiam abjectissima , ac minima .

Adversus Stoicos & Epicureos , qui negaverunt supremi Numinis regimen , & Genethliacos , qui omnia fato & inevitabili fiderum constitutione arbitrabantur contingere , cap. 2. ac 3. primi libri propositionem firmavimus . Eandem sequentibus momentis communimus . Principio enim divinam hanc providentiam sacræ testantur literæ . Octavo Sap. cap. v. 1. legitur : *Attingit a fine ad finem , & disponit omnia suaviter* . Rursus seq. cap. xii. 13. *Non est alius Deus quam tu , cui cura est de omnibus* . Tum Matth. x. 29. *Nonne duo passeresset venenit : & unus ex illis non cadet super terram sine patre vestro ? Vestri autem capilli capitis omnes enumerati sunt* . Et cap. vi. 26. *Respiciet volatilia cæli , quoniam non serunt , neque metunt , neque congregant in horrea : & pater vester cælestis pascit illa* . De malis quoque , si ea sint pœnarum , ait Ilias xlv. *Ego Dominus faciens pacem & creans malum* : nimirum ad punitionem impiorum , & commendationem justitiæ suæ . Si vero sint mala culpæ , ab eo permitti , ut notam faciat potentiam suam , & ostendat divitias gloriæ suæ in vasa misericordiæ , inquit Apostolus ad Rom. ix. 23.

Hanc

Hanc Dei providentiam Patres communiter demonstrant. Joannes Damasc. lib. 2. de Fide cap. 29. eandem probat ex infinita Dei bonitate; nam & homines quoque ac bestię propriorum fetuum providentiam habent naturali instinctu: *& qui non providet, vituperari solet.* Utitur eadem ratione adversus Adimantum Manichæum S. P. Augustinus. Ambrosius in primo de Officiis cap. 13. idem evincit, quod nullus operator negligat operis sui curam. Theodoretus ac Salvianus de Divina Providentia elegantissima conscripserunt Opuscula. Eandem Paulinus, aliique metro celebraverunt. Neque soli Ecclesię Patres, etiam Gentiles Philosophi de summi Numinis providentia præclarissimas protulere sententias. Eminent inter ceteros Hierocles, qui scripsit in Stoicos de Fortuna & usu Deorum, Chalcidius ad Timæum Platonis, Jamblicus segmento viii. de Mysteriis Aegyptiorum, Alexander Aphrodisiensis in libro de Fato, Gellius Noctium Atticarum lib. vi. cap. 12. Diogenianus Peripateticus contra Chrysippum, & alii. Quorum unanimis sensus est dari seriem & nexum causarum omnium, quæ consilio & voluntate universalis motoris in suos quæque effectus diriguntur, salva semper contingentia eorum, quæ in nostra sunt potestate.

Eandem providentiam res singulæ contestantur. Primo certi celorum motus, ratique ordines astrorum, quibus anni tempora ac sæcula imperturbato nexu prætereunt: singulæ mundi regiones, mirabilium ac fatorum propagatio, Regnorum, etiam divinis oraculis prænuntiata vicissitudo, ut Græcorum, Chaldæorum, Medorum: hominum præsertim, inter animalia præstantissimi generis, artes, commercia, consuetudines. Quæ omnia, aliæque permulta non dubitamus quin opera sint rationis; ut in altero libro de natura Deorum disputat Marcus Cicero. Secundo apparet mirabilis hæc providentia, in his, quæ primo aspectu casu evenire creduntur, sed spectatis circumstantiis apparent mirabili dispositione contingere. Explicant id in libro ad Imperatores Aphrodisiensis exemplo Oedipi, quem Lajus exposuit, & a bubulco educatus obviis factus parenti ignarus ignarum occidit. Quod fato non evenisse constat ex præcedenti oraculo Apollinis Pythii,

Te namque perimet, si qua erit proles tibi,

Atque inde tota sanguine undabit domus.

Sed missa fabula, quis non fortuito, & sublata Numinis providentia accidisse existimasset, ut Moses in fiscella scirpea ad fluminis alveum exponeretur, Joseph ad Aegyptios duceretur captivus, David relicto pecore proficisceretur ad urbem, & afinis deperditis Saul ad Samuelis domum accederet? Et tamen hæc disponente Deo facta esse probavit eventus. Nam ex tam remotis causarum primordiis Joseph in Principem Aegypti, Moyses in populi Ductorem, David ac Saul in Reges maximos evaserunt. Plura Salvianus in 1. de Providentia, & Nemesius cap.

cap. 42. congefferunt . Cum ergo etiam ea , quæ temere nata videntur , ad aliarum rerum occasionem incidant oportune , dubitare non possumus quin contingant superiore aliqua ratione moderante . Postremo accedit & ratio : Si enim est Deus , is profecto sapientissimus est , rerumque univerfarum ideis repletus , tum principium , ac finis omnium creaturarum . Atqui nisi omnibus provideret , & ad se omnia ordinaret , non esset in eo ratio incommutabilis univerforum , neque summa potestas , & ultimi finis dignitas ac præstantia ; vel , quod non minus videtur absurdum , productis a se rebus invideret , & illas in pugnam ac distractionem fineret abripi . Est igitur in Deo ratio , dispositio , & regula univerforum . Atque hæc est providentia , quam Boetius lib. iv. de Consolat. Philosoph. Prosa sexta definit ; *Providentia est ipsa illa divina ratio in summo omnium principe constituta , quæ cuncta disponit.*

RESPONDETUR AD OBJECTIONES .

Opp. 1. In hac rerum universitate plura sunt , quæ a recto ordine defleſcunt , & cum suarum caussarum fine nequaquam coherent , ut monſtra & ofſenta : complura etiam , quæ univerſo nullam afferunt pulchritudinem , aut utilitatem , ut innumera insectilium , ac vermiculorum genera . Igitur erga hæc saltem non extat ratio divina , vel providentia .

Resp. nego ant. Quæcunque enim casualia & portentosa videntur , distant quidem ab intentione ac fine particularium caussarum , sed non a directione ac regula causæ primæ , & licet videantur noxia & inordinata , si comparentur ad causam proximam , sunt tamen magnopere utilia , & ordinatissima si referantur ad sempiternam rationem , & constitutam a Deo rerum seriem . Quippe & illud sapientissime a Deo æterna lege sancitum est , ut causæ secundæ natura sua mutabiles quandoque in rerum efficientia commutentur , ut in ipsa contingentium varietate unius summæ causæ immutata ratio persistat . At vide Resp. nostram ad 3. Cap. 111. lib. 1. Porro etiam minima & viliora ad præordinatum providentiæ finem maxime conducunt , & licet insipientibus superflua videantur , non sunt tamen Conditori , & artifice suo , qui omnibus utitur ad gubernationem universitatis , cui summa lege dominatur . Aptissimo exemplo id planum facit S. P. Augustinus lib. 1. de Genes. contra Manich. cap. xvi. *Si in alicujus opificis officinam (inquit) intraverit , videt ibi multa instrumenta , quorum causas ignorat : & si multum est insipiens , superflua putat . Jam vero si in fornacem incautus ceciderit , aut ferramento aliquo acuto , cum id male trahat , seipsum vulneraverit , etiam pernicioſa & noxia existimat ibi esse multa : Quorum tamen usum , quoniam novit artifex , insipientiam ejus irridet , & verba inepta non curans , officinam suam constanter*

To.I.

Ecc

exerc-

exercet. Et tamen tam stulti sunt homines, ut apud artificem hominem non audeant vituperare quæ ignorant, sed cum ea viderint, credant esse necessaria. In hoc autem mundo, cujus conditor, & administrator prædicatur Deus, audent multa reprehendere, quorum causas non vident, &c.

Insurgens : hanc de rebus vilioribus providentiam non habere. Deum affirmat Apostolus 1. ad Corinth. ix. 9. dicens : *Nunquid de bobus cura est Deo?* Consentit beatus Hieronymus in Caput 1. Abacuc. Videtur quoque divinæ indignum Majestati summum Deum rebus abjectissimis immisceri.

Resp. Significare Apostolum, quod præceptum Deut. xxv. 4. *Non alligabis os bovi trituranti*, specialiter datum fuit causa hominis ; nempe ut mercedem & alimoniam, quam jumentis largimur, magis in homines exerceamus. Probat enim ibi Paulus licitum sibi fuisse viduum accipere a Corinthiis, tanquam laborum suorum justum debitumque stipendium ; quoniam etiam qui plantat vineam edit, bibitque de ipsius fructu, qui pascit gregem, de lacte ejus manducat ; & Mosaicum præceptum non alligandi os bovi trituranti, propter Ecclesiæ ministros datum est, quibus, dum seminant spiritualia, licet carnalia metere, & dum in Sacrario operantur, ea quæ de Sacrario sunt comedere. Hieronymum asserere, quod non sit eadem providentia, eademque cura de hominibus, ac de ceteris rebus, non vero negare quod Deus omnia immediate dirigat, & gubernet, diximus, & apertissime ostendimus lib. iv. cap. 11. Prop. 2. ad 1. Id minime dedecet altissimam Dei majestatem. Ut enim ratiocinatur D. Ambrosius : *Si injuria est regere, nonne est major injuria fecisse? cum aliquid non fecisse nulla injustitia sit, non curare quod feceris summa inclementia. Quod si aut Deum Creatorem suum abnegant, aut ferarum & bestiarum se haberi numero censent, quid de illis dicamus, qui hac se condemnant injuria?* lib. 1. de Officiis cap. 13.

Dices : Atqui videtur congruum, ut Altissimus universorum Dominator ministerio creaturarum utens, quemadmodum Reges, terreneque principes, non immediate subiecta gubernet.

Resp. Falsum esse ant. quippe quod Reges per constitutos a se Vicarios remotas regant provincias, non tam dominii argumentum est, quam potestatis coarctatio. Contra Deus qui omnipotens est, & ubique præsens, singulis rebus tribuit efficaciam ; & omnia propria potestate disponit. Non deest illi dominationis magnificentia, cum per subiectam creaturam innumera operatur ; neque dum communicat creaturis dignitatem causalitatis, suæ prodit indigentiam virtutis. Quanto causis corporeis, quæ invicem separantur agendo, nobilior est anima quæ per membra omnia diffunditur, & opera vitæ per corporis organa exercet ; tanto, si aliquam fas est infinito addere comparationem, reges

reges a præpositis suis loci intervallo ac viribus separatos antecellit Altissimus , qui ubique præfens nunquam a creaturarum suarum operatione se jungitur .

Opp. 2. Dei providentia si esset , foret a iustitia inseparabilis : quod falsum est de præsentī providentia . Primo enim cur Deus innumera mala permittit si iustus est ? Deinde si homines mali sunt propria voluntate ; quare via impiorum prosperatur , quare florent iniqui ? Cur e contra bonis accidunt sæpissime mala ? Cur non perdit Deus improbos , & beneficiis non cumulat honestiores ?

Resp. Iustissimam esse præsentem Dei providentiam . Permittit mala , ut perfectiora & magis defacata fiant bona : sunt enim fructus suavissimi , dum folia & cortex acrioris sunt succi : modulatio vocis magis jucunda cum certa interpositione silentii ; & umbra in picturis eminentiora quæque distinguit . Vide has , aliasque elegantissimas similitudines apud August. de Genes. ad lit. Op. imperf. cap. 5. Permittit quoque Deus mala , ut eveniant bona , quemadmodum dixi lib. 1. cap. viii. Nam & peccatorum occasione manifestatus est ordo iustitiæ , & opera exercentur misericordiæ . Prosperatur via peccatorum , ut boni sese avertant a cupiditate temporalium : *Nec bona cupidius appetantur , quæ mali etiam habere cernuntur* : ait S. P. lib. 1. de Civit. Dei cap. viii. Tum , ut Deus iustus , si aliquid boni fecerunt , eis præsentis vitæ mercedem rependat . Non est tamen felicitas impiorum , ut creditur , maxima ac diuturna : sed interiori pace destituti innumeris sese immiscent calamitatibus . Præterea *Omnis malus aut ideo vivit ut corrigatur , aut ideo vivit , ut per illum bonus exerceatur* : inquit idem Augustinus in Psalmum lrv. Bonis adversitates adveniunt , ut terrena spernant ; & momentaneum hoc & leve tribulationis ipsorum æternum gloriæ pondus operetur . Non possumus denique injustam dicere providentiam , quæ in altero sæculo sempiterna supplicia , & beatissimam requiem paravit : nec semper in hac vita coronat merita , ut cum iustum noverimus , spe melioris substantiæ nutriantur studia virtutum .

Dices : Saltem perditissimorum hominum , quos finit in profundum prolabi peccatorum , nullam habet Deus providentiam .

Resp. Impios , quamquam de illis non habet Deus eandem curam , quam tenet de Electis , a divina tamen providentia non deseri , a qua destituti necesse foret , ut prorsus perirent , atque reducerentur in nihilum . Relucet vero in his providentiæ Dei relictio , quod ex moribus improborum apparet infirmitas ac libertas arbitrii , virtus misericordiæ & gratiæ in his qui præservantur , summa Dei potestas ac beneplacitum in discernendis Electis , & in domo magni patris familias ad omnem usum vasa tam aurea , quàm fictilia videntur disposita . Ut insuper piorum exempla nos ad imitationem hortantur ; ita impiorum

Ecc 2

flagi-

flagitia reddere debent timidiore, nobisque pavorem simul, ac sanctam incutere sollicitudinem. Si vero quæras qui fieri possit, ut peccata divinæ subijciantur providentiæ; respondendum est, quod non eo sensu providet Deus peccatis, ut ea curet ac prædefiniat; non enim causam habere possunt, nisi deficientem, cum sint privationes debitæ reſtitutionis. Sunt nihilominus subiectum providentiæ quantum ad ordinem, cum permittantur altissimo Dei consilio, ut inde majora bona proveniant. *Quadam ergo & facit Deus & ordinat: quadam vero tantum ordinat;* inquit S. P. Augustinus cit. lib. de Genes. cap. v.

Opp. ultimo. Videtur hæc providentia, quæ singulas res suis neſcit ordinibus, idem ac Fatum Stoicorum, quod ex Chrysippo Gellius ita describit lib. vi. cap. 2.: *Fatum est sempiterna quadam, & indeclinabilis series rerum, & catena volvens semetipsa sese, & implicans per æternos consequentia ordines, ex quibus apta, connexaque est.*

Resp. Quæſtionem de Fato, quam Cicero vocat obscurissimam & implicatissimam, non debere mentem pulsare Fidelium. Non enim datur Fatum, quod sit anticipata necessitas proveniens ex certa siderum dispositione: de quo nonnihil me scripsisse memini superiori libro cap. III. & VII. Tale Fatum invexit primus omnium Democritus, qui etiam humanarum actionum causam statuit naturam æternam materiæ, & antecedentium causarum colligationem, ut scribit lib. 1. de Placitis Philosophorum cap. xxv. Plutarchus: unde ex hoc Gentium fonte hauserunt errorem Hermogenes, ac Marcion; de quo lib. v. Tertull. ait: *Collocans cum Deo Creatore materiam de porticu Stoicorum.* Ab hac materia esse mala ac peccata asserbant; quæ tamen digna prædicabant execratione, quemadmodum virtutes, tametsi stellarum inclinatione & impulsu patratas, laudibus atque amore. *Quod apta comparatione sic exponit Manilius:*

Nam neque mortiferas quisquam minus oderit verbas,

Quod non arbitrio veniant, sed semine certo.

Gratia nec levior tribuetur dulcibus escais,

Quod natura dedit fruges, non ulla voluntas.

Cum ergo noverint hanc malitiosam materiæ vim Dei bonitati repugnare; facile fuit etiam cum Fato æternum principium malorum inducere, & Manichæorum hæresim ex Persarum, Magorumque cineribus suscitare. Hinc Priscillianus ex *Manichæorum & Gnosteorum dogmate* hæresim nominis sui condidit, inquit ad annum Christi 381. Eusebius: ad subsequenter annum 386. illam refert Sigebertus, propagationis magis, quam ortus rationis habens. Graſſabatur in partibus Hispaniarum, ubi primum emerſerat, ætate quoque Augustini & Orosii: quin ibidem exarſiſſe etiam vivente Leone Magno, constat ex ejus ad Turibium Epistola.

Fatum sic acceptum nemo est qui non damnet. Nam primo, ut
sa-

fatis liquet ex hujus origine, & scribit S. Leo elegantissima Epistola, quam nuper laudavi, quisquis fatum adstruit, *tenebris se etiam paganitatis immergit*: nimirum conatur asserere necessariam ac sempiternam malitiæ vim, naturæ summi Dei optimæ ac perfectissimæ repugnantem. Cultum quoque siderum per hanc amentiam necesse est instaurari. Deinde neque de bonis, neque de malis actibus ullum poterit esse judicium, si in utramque partem fatalis necessitas motum mentis impellit, & quidquid ab hominibus agitur, non est hominum, sed astrorum; ut arguunt citato loco S. Leo, hom. x. Gregorius Magnus, & in lib. ad Orosium S. P. Augustinus. De Fato sic accepto rectissime eo loco Gregorius: *Abstine a fidelium cordibus, ut fatum esse aliquid dicant.*

At si accipitur Fatum, ut illud definit Boetius, pro inbarente rebus mobilibus dispositione, per quam providentia suis quaque necesse ordinibus; dari fatum probatur iisdem argumentis, quibus divinam asseruimus providentiam. Quapropter S. Pater in v. de Civit. Dei cap. x. scribit: *Si propterea quisquam fato tribuit, quia ipsam voluntatem vel potestatem fati nomine appellat, sententiam teneat, & linguam corrigit.* Et jure merito monet a Fati nomine esse abstinendum; quod sermonis consuetudine videatur significare certam positionem siderum, ex qua casus eveniant inevitabiles. Ceterum providentia Dei rerum non tolli contingentiam constat ex quo in certa causarum omnium dispositione, etiam causæ contingentes ac liberæ contineantur; & prima causa nedum singulos effectus disponat, sed etiam rationem ac modum. Quare ex Dei providentia nulla consequi potest absoluta necessitas; ut dictum est præcedentis libri cap. 3., ac postremo. Atque hinc est, injustas esse expostulationes & querelas mortalium, qui Deo tribuunt molestias, & ægritudines, quibus plerunque in pœnam scelerum suorum afficiuntur. Quod non solum exprobat Augustinus Enarrat. in Psalm. 72. & libro 22. adversus Faustum, verum etiam sapientissimus, & antiquissimus Poetarum Homerus in hisce versibus latine redditus, & a Hierocle, & Gellio adversus nocentes recitatis, ne cum maleficio revicti sunt, ad Fati asylum confugiant:

*Djs facere invidiam mortalis turba laborans
Clamitat a nobis nasci mala; cum tamen ipsi
Per scelus accersunt supra sibi Fata dolores.*

C A P U T III.

Divinæ voluntati perfectionem libertatis nequaquam deesse.

RESTAT tertia voluntatis conditio, quam diximus esse plenitudinem libertatis. Hanc reperiri in Deo facile quisque conficiet: sed
ejus

ejus rationem exponere Theologi putant maxime arduum atque operosum. Nam Cajetanus Dei libertatem constituit in perfectione aliqua substantiæ diviniæ superaddita, ac pro lubitu variabili: quæ opinio videtur cum simplicitati, tum immutabilitati Divinæ naturæ repugnare. Quamquam si variationem illam dixeris duntaxat respectu terminorum, ut tenent primores Thomistæ, & credibilis est voluisse Cajetanum, multos habet opinio illa, gravissimosque Assertores. Sed sunt, qui tenent Dei libertatem non addere ad substantiam divinam necessariam ac immutabilem, nisi respectum rationis, itaut per nullam Deo intrinsicam perfectionem constituatur: quod post Aureolum antiquiorem Scholasticum noster quoque Legionensis, & Vasquesius cum nonnullis aliis docuerunt. Alii e contra Dei libertatem stare putant in intrinseca quadam *entitate*, variabili in se *virtualiter*, quatenus divini voluntatis actus perinde se habeat ac si possit non existere, ut satis ambigue explicant Herrera, alique complures. Nos vero cohærenter ad ea, quæ diximus secundo horum Opusculorum libro, scilicet, nihil esse in Deo aut mutabile, aut adventitium, aut quoquo modo a persistente natura diversum, nisi ratione connotatorum, dicimus consistere Dei libertatem ejusque actum in ipsamet Dei substantia intelligente ac volente, quatenus terminatur ad exteriora objecta: quod non solum docuit noster Gregorius, verum etiam Scotus, & ex recentioribus Theologis, Tournely, Habert, Frassen, Du-Hamelius, Juenin, alique viri clarissimi.

Pro hac autem resolvenda quæstione, supponimus agi nunc de libertate, quæ est potestas agendi vel non agendi; nam si liberum accipias pro eo quod necessarium est, & liberum tantum a *coactione*, seu libertate lubentiæ; certum est Deum esse liberum etiam comparate ad propriam bonitatem; quam licet necessario, lubentissime tamen, maximaque diligit voluptate. At est hæc libertas sola naturæ liberæ & sui juris haud completa proprietas: & quotquot de libertate scripserunt, ad hanc pertinere tradunt, ut sit plenissima potestas indifferens ad utrumlibet. Libertatem quoque *contrarietatis*, quæ est ad bonum & malum, Deo non convenire, liquet ex his, quæ disputavimus lib. II. cap. VI. de potentia peccandi: quam esse a Deo removen- dam demonstrat idea summi ac perfectissimi *entis*, quod nullatenus potest sive a bonitate, sive a recta agendi ratione defecere. Quamquam si referas hanc libertatem *contrarietatis* non ad bonum & malum patrandum a Deo, sed ad pœnam vel præmium rependendum hominibus; assentior ego Scotistis, qui in ipso Deo statuunt etiam libertatem *contrarietatis*, quandoquidem unum eligit, alterum reprobat, eandemque personam deferit peccantem, quam amplectitur pœnitentem. At in his, quemadmodum diversa intervenit connotatio ac terminorum affectio, ita nulla ostenditur *contrarietas* respectu Dei: de

de quo illud in præsentiarum inquirimus, num in rebus a se productis sese gerat libere itaut unum sic eligat, ut alterum valeat eligere, atque quidquid facit, eo pacto faciat, ut potuerit non facere: quam communissime vocant Scholæ libertatem *contradictionis*.

PROPOSITIO I. Est in Deo opposita necessitati libertas.

Oraculis Scripturarum contra Vorstium, Wiclefum, aliosque hujus farinae Refractarios hæc roboratur assertio. Psalmo enim 134. habetur: *Omnia quaecunque voluit, fecit.* 1. ad Corinth. 12. 11. *Hæc omnia operatur idem ac unus spiritus, dividens singulis prout vult.* Matth. xx. *An non licet mihi quod volo, facere?* &c. Ad Rom. 1x. 18. *Cujus vult miseretur, & quem vult indurat,* &c. Idem probatur ex PP. dicente Augustino xx11. de Civit. Dei cap. 3. *Non ideo quia Deus peccare non potest, liberum arbitrium habere negandum est.* Damascenus lib. 11. de Fide cap. 22. ita adversus Arianos scribit. *In tantum processistis impietatis, ut negetis quod Filius Dei libera voluntatis sit. Ac certe soletis etiam Spiritui Sancto derogare, & negare non potestis scriptum esse: Spiritus ubi vult spirat. Ergo si Spiritus ubi vult spirat, Filius quod vult non agit?* Omnia operatur unus atque idem spiritus, dividens singulis prout vult. Prout vult, hoc est pro libera voluntatis arbitrio, non pro necessitatis obsequio. Ac S. Bernard. de Grat. & lib. arbitrio: *Libertas a necessitate, ait, æque & indifferenter Deo, universæque tam malæ, quam bonæ rationali convenit creaturæ.* Vide & Basilium Hom. 1. in Hexam. Ambros. eodem loco lib. 1. cap. 5. Hieronymum in Epist. ad Philemonem cap. 1. 14. &c.

Probatur quoque ratione. Ac primo libertatem exigit ratio suppremi dominii. Deinde magnificentia ac liberalitas, quæ, auctore Seneca libro de beata vita cap. 24., ita nominatur quia *a libero animo proficiscitur*. Præterea divinitatis perfectio, quæ non exigua est posse de rebus universis pro suo arbitratu disponere. Ulterius summa ejus ratio ac sapientia, quæ postulat, ut omnia fiant a suprema causâ cum electione & consilio. His apud Scriptores vulgatissimis addo argumentum aliud apertissimum atque invictissimum. Possunt singulæ creaturæ a divina separari operatione; neque ulla cum Dei potestate junguntur lege necessitatis: Est ergo Deus in ordine ad creaturas essentialiter indifferens ac liberrimus. Antecedens probatur; si enim res creatæ a vi effectrice primæ causæ separari non possent, consequeretur omnes creaturas æternas esse, quemadmodum æterna est Dei virtus ac substantia: esse insuper Deum imperfectum, nisi operaretur ad extra; neque aliquid esse creatum, sed omnia sempiterna, & cum divinitate essentiali unitate connexa.

PROPOSITIO II. Constituitur Dei libertas per actum sempiternum ac necessarium divinæ voluntatis a substantia indistinctæ, prout connotat objectum creatum, & effectum contingentem & defectibilem.

Hæc

Hæc propositio duas habet partes. Ac prima sic probatur: Dei libertas perfectio intrinseca est, ejusque actus est immanens & vitalis: In Deo autem nihil intrinsecum ac imminens reperitur præter necessariam ac sempiternam substantiam intelligentem & volentem; alias foret Deus compositus atque imperfectus. Est ergo libertas divina idem ac necessaria & persistens substantia Dei intelligens ac volens. Altera pars sic ostenditur: Requiritur ad libertatem aliqua indifferentia; liberum enim opponitur necessario: Sed actus divinæ voluntatis non est indifferens prout comparatur ad bonitatem divinam, quæ perfecte cognita non potest cadere sub indifferentia iudicii; quum nullum sit bonum, quod cum summo Deo valeat æquiparari: Ergo hæc indifferentia attendi debet penes connotata, idest exteriora objecta, quæ contingenter, & ex libera Dei voluntate efficiuntur in tempore. Ex quibus sequitur, libertatem Dei esse ex genere illorum, quæ connotative, non absolute dicuntur; scilicet, unum significant, & aliud, ut inquit dialectici, consignificant. Primum est ipsamet Dei natura, quæ est & suum esse, & sua operatio; alterum vero quidquid in aliqua temporis efficitur differentia: quod pro solutione argumentorum est apprimè observandum. Lege quæ diximus de Dei immutabilitate lib. II. cap. IV. Prop. III.

RESPONDETUR OPPOSITIONIBUS.

Opp. 1. Libertas importat electionem; est enim deliberatio, sive dijudicatio animi, qua se aliquid facere, vel dimittere quisquam proponit: In Deo non reperitur Electio: Ergo in Deo non existit libertas. Ad hæc: Postulat libertas indifferentiam saltem activam; hæc autem repugnat Deo; quandoquidem, ubi datur indifferentia activa, datur potestas, quæ esse potest sine actu: Atqui in Deo nulla extat potentia, quæ possit esse sine actu: Ergo neque aliqua indifferentia. Rursus: Non consistit cum immutabilitate libertas: Deus est immutabilis: Igitur non est liber.

Resp. ad primum nego minorem; licet enim in Deo non sit electio cum permixta consultatione, quæ mutationem importat intelligentiæ, animique accipitem suspensionem; est tamen electio, quæ est unius optio præ alio, absque ulla animi hæsitacione. Nam illa voluntatis ante electionem indeliberatio ac suspensio, cum ex ignorantia proveniat, arbitrii defectus magis dicenda est, quam perfectio. Ad secundum dico esse quidem in Deo indifferentiam activam; sed cum hæc dicatur connotative, indifferens Deus est non comparate ad propriæ entitatem substantiæ, sed ad mutabilitatem effectuum: quamquam potestas etiam sine actu non semper dicat imperfectionem; non enim homine, qui actu loquitur, est semper imperfectior ille, qui, cum loquendi habeat

habeat potestatem, silentium servat. Verum in Deo nulla est potentia ab actu distincta, nisi prout actus accipitur terminative; exigente summa Dei perfectione, ut idem sit ejus potestas & operatio. Ad tertium nego majorem; quippe salvatur Dei immutabilitas cum indifferentia, actus liberi, dummodo iste contingens sit, quatenus connotat terminum, non pro eo, quod dicit in recto. Etenim creatio mundi est actus liber; & tamen ex quo Deus in tempore mundum condiderit, non est intrinsece mutatus. Libera fuit quoque Verbo divino humanæ naturæ assumptio; at non proinde aliquid Personæ Verbi putandum est accessisse: nimirum cum Deus sit actus purissimus, libere agit absque sui mutatione; alias foret in Deo potentia indeterminata ac suspensa, & ejus libertas creaturarum subjiceretur defectibus, quos de summo Deo differentes caute debemus ab omni ejus proprietate secernere.

Opp. 2. Cum Nicolao L'Herminier. Actus Dei liber constituendus est in actione voluntatis, quæ potuerit non esse; & discrimen aliquod assignari debet inter libertatem & actum. At discrimen nullum est, nisi quod libertas est quædam facultas pertinet ad Dei substantiam, actus vero operatio ejusdem facultatis, qui possit non esse. Deinde quæritur quid sit Dei libertas *formaliter* & in abstracto; atque huic quæstioni non bene satisfacit, dicendo, libertas Dei est ipsa divina substantia terminative accepta: sicuti quærenti quid sit æternitas, haud recte respondetur dicendo esse divinam substantiam principio ac fine carentem. Rursus etiam Dei scientia est *Entitas* divina connotans creaturas: Non ergo per hujusmodi connotationem propria ratio libertatis poterit explicari.

Resp. ad primum utique actum Dei liberum esse actionem, quæ potest non esse: at quoniam quidquid in Deo est, si spectetur secundum id quod importat in recto, est necessarium atque immutabile; opus est, ut hujus liberæ actionis indifferentia versetur tota penes extrinsecum connotatum. Discrimen vero inter facultatem & actum in Deo pariter nullum est; nisi hoc unum, quod facultas connotat terminum ut potest poni, actus illum respicit ut positum, vel ponendum in aliqua temporis differentia: atque hoc pacto libera potestas creandi connotat creaturam possibilem, decretum liberum creaturam futuram, creatio & conservatio actualis creaturam actu existentem. Ita Deus nulla ratione mutatus dicitur & potens, & volens; quemadmodum idem nuncius appellatur pretium, & arrha. Ad secundum nego hanc non esse optimam Aeternitatis definitionem: *Aeternitas est ipsa Dei substantia, prout caret fine ac principio*. Nam ait Augustinus in Psalmum, primum & centesimum: *Non enim aliud anni Dei, & aliud ipse Deus; sed anni Dei aeternitas est. Aeternitas ipsa Dei substantia est, quæ nihil habet mutabile*. Habet similia beatus Anselmus in Monologio cap. 26., ubi de divina substantia ait: *Aeternitas ejus nihil aliud est;*

To.I.

F ff

quàm

quàm ipse. Falsum est ergo quod censet L'Herminier, Aeternitatem Dei, aliaque divina attributa definienda esse tanquam *formas* divinitati inhærentes: cum potius similes definitiones repugnent Deo, qui substantialiter est sua æternitas, sua voluntas, sua libertas. Ad tertium, respondeo scientiam pariter ac libertatem sumptas in recto esse unam Dei, eandemque substantiam: distingui autem vicissim diversa connotatione; nam scientia terminatur ad creaturas, ut veritatem habent intelligibilem; libertas vero easdem respicit, quatenus existentiam habent contingentem, & prout sunt media libere ad ultimum finem ordinata.

Opp. 3. Actus liber Dei vitalis est; Ergo est illi prorsus intrinsecus.

Resp. dist. ant. Est actus vitalis connotans extrinsecum objectum; concedo. In eo tantum, non in perfectione intrinseca, quæ est ipsamet Dei substantia, consistens; nego. Multa sunt Dei intrinseca, quæ tamen ad objectum creatum comparantur, ut præscientia, virtus creatrix, prædestinatio, & cetera istiusmodi. Atque etiam *ab intra* personæ Patris intrinseca est generatio ac paternitas, quæ tamen absque ordine ad Filium a persona Patris distinctum nequeunt comprehendere.

Insurgens: Huiusmodi connotatio vel intrinseca est, vel extrinseca: Si istud dixeris, constituetur Dei libertas per aliquid externum, atque adventitium; Si primum, erit Deo intrinsecus ac necessarius respectus ad res creatas. Rursus si tali connotatione divina constat libertas, erit imperfectior libertate creata, quæ sine istiusmodi terminatione consistit. Insuper nulla divina perfectio etiam inadæquate constitui potest per aliquid extrinsecum, & creatum: Istiusmodi connotatio extrinseca est, & creata: Igitur nequit etiam inadæquate divinam constituere libertatem.

Resp. ad 1. Talem connotationem spectatam ex parte actus, atque secundum id quod supponit in recto intrinsecam esse, necessariam quoque, & sempiternam; contingentem autem esse, extrinsecam, ac variabilem ratione termini & objecti. Quod explicari potest exemplo relationis Dei Creatoris ad res creatas, aliisque supra productis. Est enim Deus in se revera Creator, & quæcunque ipsius operatio æterna est, neque a divinitate sejungitur; & tamen liberrima est ipsius omnipotentia: advenitque ei nova Creatoris denominatio per solam rerum creaturarum connotationem. Hoc ferme pacto nulla facta in *fundamento*, ut inquit, mutatione, nova illi ex accessione termini venit aut similitudinis, aut æqualitatis, aut coexistentiæ, relatio. Illud vero quod de libertate creata dictum est, nostram confirmat assertionem. Enim vero in libertate creata & indeterminatio, & volubilitas, & diversorum actuum variatio succedit, neque opus est, ut exterius contingentiam suam mutuetur. At Dei libertas, cum non sit suspensa ac
muta-

mutabilis; neque in se actus habere possit diversos, a terminis duntaxat suam accipit indifferentiam. Quapropter qui actum Dei liberum in ordine ad connotata nobiscum exponunt, nihil divinæ derogant perfectioni; sed loqui videntur de divina simplicitate, atque immutabilitate decentius. Sed & illud negari potest, voluntatem nostram nullatenus per extrinsecum objectum constitui. Constituitur enim, non quidem accepta secundum *formam*, pro qua supponit, sed comparate ad terminum, quem connotat. Hoc pacto constitui quoque divinam perfectionem, si ea sit de genere earum, quæ connotative dicuntur, non est indecens, sed per quam maxime congruum. Nam hac ratione, ut diximus, omnia fere attributa explicantur; quæ, tametsi connotent creaturas, non appellantur tamen Deo extrinseca, sed ab ejus natura ac substantia sunt penitus indistincta.

Opp. 4. Si idem esset actus Dei liber, ejusque substantia, quem admodum ista, ita ille æternus foret, & necessarius. Præterea eadem Dei perfectio esset simul immutabilis & contingens; immutabilis, quoniam talis est Dei natura; contingens vero, quoniam talis debet esse actus liber. At hæc valde repugnant sanæ, rectæque rationi. Male ergo a nobis Dei libertas, ejusque exercitium exponitur.

Resp. utique actum Dei liberum æternum ac necessarium esse, si spectetur in eo, quod importat *in se*, ut nuper diximus de hujus actus connotatione. At cum tali necessitate stat contingentia ratione termini & objecti. Neque pugnat eundem actum immutabilem, & contingentem esse respectu diversorum, quomodo eadem creatio æterna est si comparetur ad Deum, temporanea si referatur ad creaturas; eadem voluntas absoluta respectu prædestinationis Sanctorum, conditionata relative ad meritum retributionem; eadem denique scientia practica comparative ad objectum operabile, speculatrix in ordine ad ea quæ ab artifice univerforum non fiunt.

Quod si insistas: Actus Dei liber fuit ab æterno, neque tamen ab æterno extitit aliqua creatura; occurrit semper eadem responsio, scilicet, Actum Dei liberum fuisse ab æterno secundum substantiam suam, non quoad terminum. Et si rursus objicias, quod si ab æterno nulla erat res creata, neque etiam potuit esse connotatio, quam requirimus ad libertatem; respondemus ab æterno talem connotationem fuisse ad terminum futurum, quæ productis jam creaturis transit ad terminum existentem, quomodo ipsa creatio ac virtus omnipotentiae spectabat ab æternitate mundum producibilem, quem nunc connotat jam productum; & scientia, quæ erat futurorum, facta est scientia præsentium, nulla accedente ex parte Dei mutatione.

Opp. ultimo: Quælibet creatura dependet a libera Dei voluntate, & est effectus liberæ determinationis ipsius; ergo respectus ad creaturas non constituit, sed supponit actum liberum voluntatis divinæ.

412 De Theologicis Disciplinis L.V. Cap.III.

Resp. dist. ant. Creatura est effectus voluntatis Dei liberæ, inadæquate acceptæ & pro actu in Deo permanente, pro quo supponit, concedo: adæquate, & acceptæ etiam pro termino quem connotat, nego. Non sequitur creatura dependet a libera Dei voluntate, & est effectus determinationis ipsius; igitur non constituit ulla ratione actum Dei liberum. Constitutiva enim per modum termini & connotati possunt a re quam constituunt vere ac proprie produci; & sat est, si hæc præsupponatur absolute & in seipsa considerata vel tempore, vel natura, vel origine sola præcedens. Nam Pater constituitur in esse patris per relationem ad Filium, & tamen Filius a Patre procedit & generatur. Secus dicendum est de constitutivis per modum *formæ* inherēntis. Verum istud in Deo constitutivum nullum est præter incommutabilem ejus substantiam.

Ex quibus plura fas est ad rem Theologicam conjicere. Primum, quidem nullam esse in Deo intrinsecam indeterminationem; quæ cum sit irresoluti animi fluctuatio, & quædam suspensio nescientis quid sit eligendum, neque ad essentiam libertatis requiritur; neque potest cum perfectissima Dei scientia componi. Infertur secundo nullam esse causam Voluntatis divinæ, nisi prout causa accipitur lata quadam significatione pro suo termino, atque objecto; sicut nulla datur causa, nullumque principium divinitatis. Sequitur tertio non dari in Deo libertatem *contradictionis* in sensu, quo illam explicant complures Scholastici, idest voluntatem intrinsece suspensam ab omni actu *volitionis*, aut *volitionis*, quorum neuter potest de novo incommutabili Deo contingere; dari tamen *contradictionis* libertatem, ut est potestas indifferens ad agendum vel non agendum, indifferētia spectata ex parte connotatorum; quæ cum ex dictis satis comprobari posse videantur, persequar deinceps Librum de Electione Sanctorum, quæ divina Libertatis ac Providentiæ actus est singularis, atque præstantissimus.





DE THEOLOGICIS DISCIPLINIS LIBER SEXTUS

*In quo de Electione Justorum secundum
propositum voluntatis Dei,
Augustino ductore,
certatur.*



POPONDI quarto libro cap. xi. huic, Præfationis loco, præmittere Augustinianæ commendationem doctrinæ, quam tentarunt inofficiosi quidam Scriptores labefactare. Sed cum obtrectatoribus obsecuti sint, debitumque supernumeraverint Carolus Moreau, Fulgentius Lafosse, Cardinalis Norisius, alique viri doctissimi, ne videamur ferre ad sylvam ramusculos & ramenta, pauca ex iis, quæ ad Gratiæ ac prædestinationis causam attinent, colligenda breviter nobis erunt.

Itaque S. Augustini doctrinam Summi Catholicæ Ecclesiæ Pastores mirifice coluerunt. Innocentius asseruit, illam *integra ratione consistere*, se vero iis, quæ adversus Pelagium S. Pater elucubraverat, *parsi assensione* adhærere. Bonifacius, ut scribit contra Collatorem, cap. 21. S. Prosper, cum esset doctissimus, *adversus tamen libros Pelagianorum Augustini responsa poscebat*. Cælestinus comprimens Scimpelagianorum audaciam Epist. ad Galliarum Episcopos testatur, quod

quod Augustinum sanctæ recordationis virum *nunquam sinistra suspitionis rumor aspersit*. Hormidas vero in Epistola ad Possessorem ait : *De arbitrio tamen libero, & Gratia Dei quid Romana, hoc est Catholica sequatur & asseveret Ecclesia in variis libris beati Augustini, & maxime ad Prosperum & Hilarium*, posse cognosci, & contineri de his *in scriptis Ecclesiasticis expressa Capitula*. Prætermitto Felicem IV., Gelasium, Zosimum, de quibus lege Norisianas Vindicias cap. vi. Subscribunt Pontifices singuli Joanni XXII. Constitut. 2. data anno 1326. hæc asserenti : *Celeberrimus Pontifex Augustinus profligatis hæresibus, earumque radicibus extirpatis, Catholica Fidei veritatem in lucem produxit, eduxit in publicum, firmis ac invictis rationibus solidavit*. Optima hæc Augustini existimatio apud ceteros Ecclesie Pastores semper obtinuit. *Ducem Ecclesie* appellavit Clem. VIII., *Ecclesie auctoritatem* Paschalis II. *Ecclesie quietem* Leo X. *Ecclesie irrefragabile jubar* Innoc. XI. *Ecclesie fulgidissimum lumen* Clemens XI. *Quæ* in laudem Augustini vulgata sunt erroneis, pravisque dogmatibus emergentibus, coque tempore, quo proscriptis hæresibus Lutheri, Calvini, Quenelli, Janseii, plures Scientiæ mediæ assertores arrepta occasione coctam crambem recoxerunt, Augustinianum dogma, novum, libertati fatale, & excessu prolatum vaserrime traducentes. Quorum clamoribus aliquos timidiore defecerat animus, præsertim ubi Augustiniani sententiis fraudulenter intextas damnari viderunt Novatorum hominum propositiones : qui & Scripturis divinis, & maximorum virorum textibus munire satagunt falsitatem ; quemadmodum versipelles auctores mendacii Sacramentis, ut sibi captivæ humanam fidem, sæpenumero mentiuntur. At recreavit nos humanissimis Epistolis datis ad FF. Prædicatores Papa Beatissimus Benedictus XIII. quibus ita Augustini ac Thomæ discipulos alloquitur : *Magno animo contemnite, dilecti Filii, calumnias intentatas sententiis vestris de gratia præsertim per se & ab intrinseco efficaci, ac de gratuita prædeterminatione ad gloriam sine ulla prævisione meritorum, quas laudabiliter hætenus docuistis, & quas ab ipsis SS. Doctõribus, Augustino & Thoma, se hausisse, & verbis Dei, summorumque Pontificum, & Conciliorum decretis, & Patrum dictis consonas esse schola vestra commendabili studio gloriatur*. Ex quibus quanti fecerint Romani Antistites Augustiniana circa prædestinationem dogmata satis arbitror comprobatum.

Neque minorem Augustino Sacrosancta Concilia detulerunt honorem. Synodus enim Arauxicana celebrata v. Kal. Julias anno Christi 529. xxv. S. P. Augustini propositiones de Gratia veras in Canones consecravit, approbante Felice IV. Pontifice Maximo. Concilium v. Oecumenicum, *Sequimur*, inquit, *per omnia Sanctum Augustinum: & suscipimus omnia, quæ de recta fide, & condemnatione hæretico-*
tum

rum exposuit. Eundem Augustinum vocat Toletana x. Synodus *partem contra hæreticos munitionem*: ceteris illum præsentat sels. vii. Florentina hoc celeberrimo elogio: *Nunc Sanctorum Doctorum auctoritates in medium proferamus: ac in primis Augustini illustrissimi Latinorum Doctoris, quem Quinta Synodus consecravit.* Canones de justificatione, de gratia, & de peccato originali editos a Tridentina iisdem ferme Augustini verbis majori ex parte constructos demonstrat in Opere de Mente hujus Concilii circa Gratiam Antoninus Reginaldus. Veracissimam ac fidelissimam appellat Augustini doctrinam in lib. de Tribus Epist. cap. 35. Lugdunensis Ecclesia: eandem compendio descripserunt in Epistola Synodica Africani Patres in Sardinia insulam relegati.

Quid sentiant de Augustini libris Ecclesiæ Patres, neminem arbitror ignorare. Fulgentius lib. 1. ad Monimum cap. xxx. scribit ex libris Augustini, & Responſionibus Prosperi posse cunctos cognoscere, *quid debeant de prædestinatione Sanctorum, impiorumque sentire.* Rhemigius in lib. de tenenda veritate S. Script. affirmat Augustinianis de Gratia & libero arbitrio plenissimis clarissimisque definitionibus *quod Fidei Catholica necessarium est, contineri, & si quid inde subtrahatur, violari veritatis integritatem.* Hieronymus Epist. 25. inter Augustinianas, sic S. Patrem adloquitur: *Catholici te Conditorum antiquæ rursus fidei venerantur, atque suspiciunt.* Quæ de Gratia Christi, pro qua tanto animi ardore pugnavit, a Hieronymo dici, neminem latet. Paulini, Prosperi, Alipii, Thomæ Archiepiscopi Valentini, aliorumque Augustino sive amicitia, sive ratione instituti conjunctorum laudes præclarissimas non opus est recensere. Gravissimam Arnobii Junioris sententiam prætermitto, ut eam, aliorumque Patrum auream pro Augustino catenam legas majori cum voluptate in Vindiciis Norisii.

Quali vero reverentia Augustinum suspiciant Theologi, infinitus ero, si velim commemorare. Aliquos tantum numerabo ex venerabilissimo Ordine, quem professi sunt Adamus, Martinonus, Annatus, Bonartus, & quidam alii in carpendo Augustino liberiores, ex amplissima nempe Societate Jesu, qua neque majori æquitate ornatum judicem possum eligere, neque sapientia ac doctrina magis conspicuum. Dixi cap. xi. quarti libri Patrem Meyer, qui sub nomine Eleuterii vulgavit Historiam de Auxiliis adversus eam, quam scripsit Hyacinthus Serrey, ingenue fateri lib. v. cap. 1. Clementem VIII. in Prolusione disputationum præcepisse, ut ad normam doctrinæ Augustini, tanquam ad heraclium lapidem exorta circa Prædestinationem & Gratiam dissidia componerentur. Quare videant, qui sinistre judicant de Augustino, an maximis controversiis dirimendis regula soleat aptari non recte. Bellarminus de narratis supra decretis Synodi Araulicanæ lib. 2. de Grat.

Grat. & lib. arb. c. II. scribit: *Porro in illis Capitulis (ex libri S. Augustini verbatim excerptis) continentur omnia fundamenta sententiae de Prædestinatione gratuita, ut non possit ullus prædestinationem negare; nisi velit illis Capitulis contraire.* Suarefius, quo neminem temperatum magis ac modestum memini me legisse, Prolog. vi. de Grat. cap. vi. in quæstionibus de Prædestinatione ait: *auctoritatem Augustini maximam esse, & semper ceteris præferendam.* Et Vasquesius ipse ingenio ad criticem proniori: *Quamvis (inquit 1. 2. disp. 190., cap. 6.) nullus esset ex PP. commemoratis, quem pro hac sententia de gratia necessitate ad singula opera bona Moralia Scholastici Doctores allegare possent, in uno solo Augustino, ejusque schola sua opinionis præsidium libenter collocarent, eumque sibi sufficere merito arbitrantur, quod unicuique sit, qui dum agitur de gratia necessitate, sicut sol inter reliquos præfulget.* Claudius quoque Aquaviva Præpositus Generalis ann. 1584. consilio & opera clarissimorum Societatis virorum selegit sententias, quas tenerent ubique inclyti Sodalitii Præceptores: atque in opinionum delectu pag. 37. ista protulit: *Item definitum est prædestinationis nec rationem, nec conditionem esse ex parte nostra. Id ad pietatem parum pertinere dicit aliquis. At banc Augustini doctrinam non modo communiter Theologorum Schola jam recipit, sed & Ecclesiae Patres per mille, & ducentos circiter annos, &c.*

Unum est, quod inter Scripta summorum Virorum dolui aliquando vehementer, ornatissimum nempe Dionysium Petavium, quo nemo accuratius Augustinianam propugnavit sententiam, & a falsis interpretamentis Vasquesii, Lessii, aliorumque Sociorum studuit vindicare, mutata inopinato facie lib. x. Theol. g. dogmatum cap. 1. maluisse eam retractare, quàm pressis laudabiliter vestigiis insistere; ita, ut initio hujus capitis scripserit: *Jam pridem in utramque partem disputari capit in Scholis ista quæstio, neque pro aliquo præjudicio valere ad hanc controversiam credita est auctoritas Augustini.* At re maturius inspecta animadverti nulli hominum Augustini discipulos magis debere, quàm ipsi Petavio. Primo quia ubi viri aliqui docti Societatis conati sunt in sententiam oppositam, ut futores faciunt corum, Augustinianas trahere auctoritates, Petavius demonstravit interpretes esse non bonos. Deinde quia ubi plures illas falsitatis, antilogiæ, & affinitatis Calvinianæ damnaverunt; ostendit vir eximius esse a damnatis erroribus alienissimam, atque a multis summa cum doctrinæ ac pietatis commendatione defendi. Hæc a me eisdem Petavianis verbis sunt dicta, ut dum is laudat pro Sententia Molinæ Augustinum, dum ille S. Patrem erroris infirmat, duo hi Jesuitarum Arietes domestico propugnaculo reprimantur.

Vereor insuper, ne Petavius aliquid humani passus in gratiam Societatis contra propriam mentem librum illum decimum cogitaverit super-

superstruere. Quod & ex ejus Epistolis probat Auctor Historiæ Congregat. de Aux. pag. 104. & ex doctrina alibi ab ipso Petavio tradita potest inferri. Etenim lib. vii. cap. xi. num. v. exponens Evangelicæ parabolæ clausulam, *Multi enim sunt vocati, pauci vero electi*, scribit, *regni celestis & æternæ salutis adipiscenda modum ac rationem non ex humanis æstimari judiciis, neque ex eo, quod in usu hominum & consuetudine versatur, sed sola Dei gratuita voluntate, ac pro ejus arbitrio totum illud administrari: & infra, totum salutis regnique celestis negotium ex Dei arbitrio & voluntate pendere: quod ab Apostolo traditum sæpe adversus Pelagianos, & eorum reliquias inculcat Augustinus; &c.* Ex quibus apparet quænam sit Petavii sententia ubi ex libertate loquitur, non ex domesticorum impulsu. Nam si aliter est, & proprio loquitur sensu; necessaria consecutione possum inferre, Petavium, ipsomet judice, deteriori causæ patrocinari. Enim vero lib. ix. cap. vi. n. i. præmonet: *Cum de Gratia vel prædestinatione disputandum est, minorem haberi antiquorum Patrum rationem, qui extiterunt ante exortam hæresim Pelagianam, quàm eorum, qui postea sunt secuti. Latinorum vero multo majorem, quàm Græcorum etiam hæresi illa posteriorum, quoniam magis aliquanto Latinam Ecclesiam, quàm Orientalem exercuit hæresis Pelagiana; & Græci plerique intima Pelagianorum dogmata, vel ignorarint funditus, vel minus accurate perspexerint. Ac Latinorum omnium, quorum in hac controversia major est auctoritas, principem esse consensu Theologorum Augustinum.* Hæc & longe majora de Augustini sententia promit Petavius ille eloquentissimus. Quid ergo? Dum altero libro sententiam Augustini retractat, atque textus Apostoli cum nonnullis Græcorum in oppositum sensum detorquet; nonne illos sequitur, qui minorem habent in his controversiis, ipso Petavio judice, auctoritatem? Aut ergo Petavius Societati suæ contra compertam sibi veritatem morem gessit; aut contra majorem auctoritatem superba fronte pugnavit. Ipsi autem momenta quanti pendeant dicam infra: nam hæcenus ex Romanis Pontificibus, ex Conciliis, ex Patribus, ex Theologorum consensu, quæ sit in hac materia auctoritas Augustini probandum erat.

Pugnat adversus dicta, quod alii quoque Patres summorum Pontificum Constitutionibus laudantur; ex quo sequitur nullam esse Augustino præ ceteris auctoritatem. Rursus quod idem Augustinus Epist. ix. ad Hieronymum scribit solis Scripturarum libris Canonici auctoritatem certissimam esse deferendam. Tertio quod non possumus aliquam propositionem infallibilem existimare, propterea quod a solo tradita sit Augustino, ut definitum est ab Ecclesia. Tandem quod Augustinus in plurimos gravissimosque errores lapsus fuerit.

Sed hæc nubeculæ nequeunt splendidissimi Solis lucem obumbrare. Detur siquidem nullum esse in ceteris libris Augustinum inter aliosque

Patres discernen: detur non fuisse indutum virtute ex alto, ut abundantius omnibus laboraverit, quemadmodum testatur Fulgentius; attamen dum agitur de Prædestinatione & de Gratia Augustino nefas est refragari, si in ejus libris continetur quod asseverat Ecclesia, ut affirmant Pontifices; si antiquam fidem rursus condidit, ut narrant Patres; si ejus Sententiæ Canones evaserunt, ut colligitur ex Conciliis; si unicus sufficit, ubi disputatur de Gratia, ut fatentur Theologi. Habent etiam alii Patres in his, quæ data opera contra hæreses elaborarunt, suum cum Augustino honorem, si æquali ab Ecclesia exaltati fuerint præconio. Rectissime vero S. P. scribit Hieronymo privatis Scriptoribus non esse deferendam infallibilem auctoritatem: at quando quæ a privatis Doctoribus exarata sunt Ecclesia commendat, summa excipienda sunt reverentia. Neque credimus Augustino, quia scripsit hæc Augustinus; sed quoniam recte Augustinum scripsisse, superiori accipimus testimonio. Defendendum esse Augustinianum dogma non respiciendo ad aliquam Pontificum Bullam, non audent proferre nisi hæreticus ac seminator zizaniorum: qui ut eludant Ecclesiæ decreta, ululant: *Dixit Augustinus*, quando Augustinus non loquitur. Neque ullus mortalium, neque portæ inferi adversus Petram, supra quam fundata est Domus Domini, poterunt prævalere. Ego quidem, si Ecclesia Augustini scripta damnalet, omnium primus in ardentem rogam Magistri libros projicerem: sed celebratos universalis Ecclesiæ plausu Catholico exponam sensu, & filiali officio tutabor. Augustinianas antilogias, excessus, absurda fingunt homines aut invidi, aut improbi. Ubique se dederit occasio, & ego infirmissimus pro gloria tanti Patris certabo. Sed desistam proloqui, ne oratio mea limites excedat præfatiunculæ.

C A P U T I.

Dari aliquam prædestinationem electorum, eamque multiplicem: de qua agendum sit, & qua methodo: quomodo definiatur, & proprie sit explicanda.

COMPECTOR unico capite plures parvi momenti quæstiones, necessarias tamen tironibus, de Prædestinationis existentia, nomine, partitione ac natura.

PROPOSITIO I. Datur aliqua Electorum ad gloriam prædestinatio.

Probat 1. ex Epist. Pauli ad Rom. cap. viii. ubi hæc habentur: *Quos prædestinavit, hos & vocavit*. Deinde suadetur ratione: nam prædestinare est rationalem creaturam ad æternam vitam præeligere: Atqui

Atqui Deus plures ad æternam vitam prælegit; de fide enim est multos recipere a Deo in beatissimam requiem assumi: Ergo, &c.

Opp. 1. Si aliqui essent prædestinati, tollerentur orationum, jejuniorum, aliorumque bonorum operum merita, & sancta flaccesceret salutis æternæ sollicitudo, quum prædestinatio in nostra non sit potestate.

Resp. argumentum istud diluendum infra, ubi de Prædestinatione gratuita disputabitur. Modo dist. ant. Prædestinatio non est in nostra potestate quantum ad causam, conc. quantum ad terminum, atque sempiternæ vitæ consecutionem, nego. Si dicas Damascenum lib. 2. de Fide Orthodoxa cap. 30. asserere: *Prædestinationem esse earum rerum, quas Deus absolute vult, præscientiam vero illarum, quæ in nostra potestate sunt potestate*; Dico Damascenum velle, quod Deus prænoscat, non prædestinet ea ad quæ potestas nostra sola sufficit, ut opera naturalia & peccata: quæ vero etiam a Deo prædeterminante operantur, & præsciri & prædestinari; quamquam non omnia mediis necessariis perficiuntur, sed juxta causarum secundarum statutam ab ipso Deo conditionem; ut constat ex lib. 1v.

Opp. 2. Si Deus aliquos prædestinaret, forent omnes Electi; ideo enim prædestinantur aliqui, ut ostendatur in his divina bonitas ac liberalitas. At hæc magis manifestaretur, si prædestinatio extenderetur ad omnes.

Resp. & Dei misericordiam magis, magisque apparere in comparatione miseriæ, in quam sponte ruunt præcipites plurimi: atque ad divinam pertinere providentiam, ut manifestetur simul justitia in reprobis, & misericordia in Electis, eo vel maxime, quod nec impios ista deferit: ut dictum est libro præcedenti cap. 2.

PROPOSITIO II. Multiplex est prædestinatio, variisque vocabulis designatur.

Alia enim est ad bonum, alia ad malum, pœnæ scilicet, sed non culpæ: Ita Conc. Valentinum can. 3. *Fidenter confitemur prædestinationem electorum ad vitam, & prædestinationem impiorum ad mortem*. Idem affirmat S. P. Aug. in Enchirid. ad Laurent. cap. 100. Atque Fulgentius ad Monimum: *Non ergo, inquit, prædestinati sunt mali ad hoc, quod male operantur a concupiscentia sua abstracti, & illecti: sed ad hoc, quod juste patiuntur inviti*. Deinde prædestinatio ad bonum (jam enim usus invaluit, ut communiter in bonam partem Prædestinationis trahatur vocabulum) alia est ad finem, alia est ad media. Illa est divinum propositum conferendi rationalibus creaturis æternam gloriam; ista vero propositum largiendi gratiam, ac præsertim finalem perseverantiam. Porro prædestinatio ad gratiam vel est ad gratiam sufficientem ac versatilem, vel ad gratiam efficacem: De prima ait S. P. lib. de Prædest. SS. cap. 6. *Electio quippe ista gratia, non uti-*

que meritorum. De secunda inquit eodem lib. cap. x. *Prædestinatione Deus præcivit quæ fuerat ipse facturus*. Quas omnes divisiones constat diversa tantum connotata spectare.

Prædestinati ad gloriam, de quibus agendum specialiter, vocantur *Præfiniti* ac *Prædeterminati*, quod est prorsus idem. Appellantur quoque *Dilecti*, & *Electi*: unde Apostolus 2. ad Timotheum: *Omnia*, inquit, *sublineo propter electos*. Vocantur item *Cogniti* & *Præcogniti*: sic in altera ad Timoth. Epist. ait Apostolus: *Cognovit Dominus, qui sunt ejus*. Et Petrus Epist. 1. *Præcogniti ante mundi constitutionem*. Ulterius dicuntur *Probat*i, *præordinati in vitam æternam*, & *vocati secundum propositum*: idque apud eundem Paulum non semel. Etiam vocantur ab ipso met. Apostolo *vasa misericordiæ*, necnon *vasa in honorem*. Joannes cap. x. appellat *oves*: & cap. xi. *Filios Dei*: Matthæus denique cap. xxv. *Benedictos a Patre*.

Similiter Prædestinatio appellatur *Dilectio*, *Electio*, *Propositum*, *Discretio*, ac *Præparatio*. Quæ nomina, licet sapissime pro eadem significatione usurpentur, secundum tamen rationem nostram ordinem quemdam important. Cum enim Prædestinatio sit ordinatio creaturæ rationalis in finem, videtur supponere divinam scientiam: quoniam velle alicui finem ultimum est actus dilectionis; dilectio vero cognitionem præsupponit. Nullam hæc omnia præferunt difficultatem.

PROPOSITIO III. Prædestinatio ad gloriam definiri potest: *Præscientia & præparatio beneficiorum Dei, quibus certissime liberantur quicumque liberantur*.

Traditur hæc definitio a S. P. Augustino lib. de Dono Persev. cap. xiv. Non conveniunt Theologi in hujus definitionis explicatione. Fautores Scientiæ mediæ putant loqui Augustinum de Præscientia conditionata. Nos de Scientia absoluta, quæ ab efficaci pendet decreto, si loquamur de Prædestinatione hominum lapsorum; quam certum est S. Patrem potissimum definire. Supponit enim liberatio miseriam, miseria culpam. Et cum hominibus lapsis præparetur a Dei beneplacito donum finalis perseverantiæ, rectissime ait S. P. prædestinationem esse præparationem beneficiorum, quibus certissime liberantur, quicumque liberantur. Quapropter Augustinus de prædestinatione hominum post originale peccatum ratione quadam speciali locutus est. Si de statu innocentis sermo sit, erit prædestinatio præscientia quædam conditionata: sed non præparatio finalis perseverantiæ, quam Deus angelis & primo homini in viribus reliquit arbitrii. Manifesta sunt hæc ex cap. viii. & xi. lib. iv. Ergo Prædestinationem, prout utrumque statum complectitur, possumus cum D. Thoma 1. P. q. xxiii. art. 1. definire: *Est ratio transmissionis creaturæ rationalis in finem vitæ æternæ*.

PROPOSITIO IV. Prædestinatio pertinet ad mentem Dei simul, ac voluntatem.

Media

Media hac via inter Scholasticos incedo : & assero quod si prædestinatio accipitur pro sola ordinatione & directione creaturæ rationalis in finem æternæ vitæ, ut nuper diximus cum S. Thoma, prædestinatio est actus intellectus connotans actum voluntatis, ut docent Thomistæ : si vero accipitur pro divino proposito & decreto conferendi gratiam & gloriam, quo sensu ait S. P. Augustinus de Prædest. SS. cap. x. *Prædestinatio est præparatio gratiæ in præsentī, & gloriæ in futuro* : arbitror cum D. Bonaventura, Scoto, & doctissimo Ariminenſe Prædestinationem esse actum voluntatis supponens actum intellectus.

Atque sic probatur pars 1. Ordinare unum ad aliud est opus intelligentiæ, *sola enim ratio dirigit*, inquit 2. Metaphys. Arist. Ergo si accipiat prædestinatio prout dicit directionem & ordinationem creaturæ rationalis, ad munus spectat intelligentiæ. Hujusmodi autem ordinationem connotare actum aliquem voluntatis constat : nam eapropter Deus aliquos dirigit in vitam æternam, quia illos amat, cum amare, nihil sit aliud, quam velle alteri bonum. Igitur prædestinatio præsupponit, & connotat actum voluntatis, amoris, ac beneplaciti, ut dicebamus modò. Secunda propositionis pars certissima mihi videtur ; primo quia propositum, decretum, dilectio pertinent ad voluntatem : deinde quia S. P. lib. de Dono persever. cap. 22. apertissimè ad voluntatem Dei prædestinationem refert : & denique quia etiam Hilarius ac Prosper in Epist. ad Augustinum illam appellant *Divine voluntatis propositum*. Connotare autem actum intelligentiæ certissimum quoque est : nam voluntas supponit intellectum sibi proponentem quod beneplacito suo eligat, & prosequatur.

Opp. 1. Prædestinatio definitur ab Augustino : *Præscientia & præparatio mediorum*, &c. Præscientia est actus intellectus : Est ergo actus intellectus prædestinatio. Resp. nego consequentiam ; si enim præscientia pertinet ad intellectum, præparatio ac propositum spectat ad voluntatem : quare Augustinus exigit ad prædestinationem actum utriusque potentiæ, intellectus dirigentis, & voluntatis determinantis : Præterquamquod est opinio inter Philosophos valde probabilis etiam judicium directivum ac practicum non mentis esse, sed voluntatis operationem.

Opp. 2. Dirigere est actus liber & efficax : Libertas & efficacia spectat dumtaxat ad voluntatem : Ergo. Resp. directionem spectare ad voluntatem, prout importat propositum, ac decretum ; atque ad intellectum, si accipitur pro sola præscientia ac directione, ut dictum supra.

Opp. ultimo : Prædestinatio est pars providentiæ : Providentia per Boetium Prok. 6. libri 1v. ad solum pertinet intellectum : Ergo &c. Resp. nego minorem. Providentia enim attinet ad intellectum simul & voluntatem, quoniam intellectus non ordinat unum ad aliud, nisi voluntas velit unum propter aliud. Boetius ait : *Providentiam esse ipsum divi-*

nam rationem, quæ multa disponit. Atque id quidem recte; nam solæ causæ ratione uteates finem sibi ipsis aut subiectis sibi causis proponunt, & provident media: cetera in finem propositum ab auctore naturæ contendunt.

C A P U T II.

Refutatur Ambrosii Catharini palmaris error.

CATHARINUS non omnes, qui sempiternam adipiscuntur beatitudinem, voluit in numero prædestinatorum comprehendere: sed duplicem illorum, qui salvantur, proprio Marte constituens ordinem, in una parte locavit eximie sanctitatis electos, ut Deiparam virginem, Apostolos, ceterosque virtutibus ac miraculorum gloria conspicuos; in altera homines minoris meriti ac perfectionis, qui tamen redduntur regni cælorum participes. Sanctos prioris generis prædestinatos esse concedit, & uberiori gratiarum copia donari, ita ut infallibiliter paratam sibi gloriam obtineant. At homines postremi generis, ordinaria scilicet virtute exornatos negat prædestinari, aut efficaci aliquo adjutorio subtrahi a perditione; sed communibus auxiliis suffultos docet & ipsos ad beatitudinem pervenire. Pervertens quoque nominum significationes, noluit prædestinationem interpretari, quasi sit electio omnium salvandorum ante mundi constitutionem; sed particulam *Præ* in hoc nomine solummodo arbitratus est importare majorem cumulum meritorum, atque prioritatem dignitatis, non temporis. Quam Ambrosii Catharini sententiam *novum commentum* appellat Estius, & Dominicus Banez ejusdem instituti 1. p. q. 23. art. 7. *hæresim manifestam*. Et quidem videtur valde propinqua errori Pelagianorum, qui apud Auctorem Hypognostici lib. 6. prædestinationem in solis Apostolis asserabant: quamquam initium salutis esse ex nobis, quod proprie est hæresis Pelagiana, nunquam revera tradidit Catharinus; ut facile possit contra fratris sui accusationem defendi. Erravit tamen omnium judicio solemniter, ut mox demonstrabo.

PROPOSITIO I. In vocabulo *Prædestinationis* propositio *Præ* non dignitatis, sed temporis denotat præminentiam.

Demonstratur; nam 1. ad Corinth. cap. 11. habetur: *Prædestinavit Deus ante sæcula*. Et ad Ephes. 1. *Elegit nos ante mundi constitutionem*. Item Matth. xxv. *Possidete regnum, quod vobis paratum est a constitutione mundi*: idest, ut exponit S. P. Tract. 105. in Joannem: *Ante mundum, & ante omnia tempora*. Probatur etiam ratione: Prædestinatio est propositum divinæ voluntatis: Atqui propositum divinæ voluntatis æternum est, cum sit actio divina: Ergo &c.

Opp. Catharinus: Ait Apost. ad Rom. viii. *Quos prædestinavit*
 hos

hos & vocavit , & quos vocavit hos & justificavit : quos autem justificavit illos & glorificavit . Sed vocatio , justificatio , glorificatio , licet sint actus divini , sunt tamen in tempore : Igitur & prædestinatio . Resp. Disparem esse rationem inter prædestinationem , vocationem & justificationem : nam prædeterminatio , præscientia , decretum , & cetera , istiusmodi , sunt actiones immanentes , & dicuntur relative ad intelligentiam ac voluntatem divinam : at vocatio , justificatio , & glorificatio sunt actiones transeuntes , & dicuntur connotative ad effectum productum in tempore .

PROPOSITIO II. Soli prædestinati salutem consequuntur æternam .

Communem hanc assertionem tradunt Scripturæ , confirmant Patres , suadet ratio . Matth. xxi. dicitur , quod illi , qui non sunt ex numero Electorum , mittentur *in tenebras exteriores* . Item ex cap. xxi. manifestum est inter electos ac reprobos non dari medios . Rursus cap. xxv. Electis celeste regnum promittitur *paratum a mundi constitutione* . Salvantur ergo electi tantummodo .

Idem docet S. P. Augustinus , qui lib. iv. contra Julianum cap. 4. affirmat ex duobus parvulis ante mortem unum baptizari , alterum non baptizari eo quod unus sit prædestinatus , non alter : atque Juliano objicienti locum Apostoli : *Bonitas Dei ad penitentiam adducit* , respondit : *Verum esse constat , sed quem prædestinavit adducit* . Libro quoque de Corrupt. & Gr. cap. i. *Neque vos moveat* , inquit , *quod filiis suis quibusdam Deus non det perseverantiam . Absit enim ut ita esset , si de illis prædestinatis essent , & secundum propositum vocatis , qui vere Filii sunt promissionis* . Igitur Augustinus docet neminem esse perseveraturum , salvandum neminem , qui non sit de numero prædestinatorum . Neque aliud tradit lib. de Fide ad Petrum cap. 35. beatus Fulgentius , imo & Sacrosancta Tridentina Synodus Sess. 6. cap. xii .

Denique probatur ratione : Salvandi , qui non sunt prædestinati , aut perveniunt ad gloriam sola naturali virtute liberi arbitrii , aut adjutorio supernaturalis gratiæ : Si primum dicatur a Catharino , manifeste profitebitur , ut constat , hæresim Pelagianorum : si secundum , jam prædestinationem aliquam fatetur ; non enim conferuntur media , nisi ratione finis , neque gratia nisi ratione gloriæ . Non dico autem omnia gratiarum dona , quæcunque ea sint , conferri ex decreto efficaci dandi gloriam : minime : sed , quod sit est ad impugnandum Catharini assertum , dico quod prædestinatio importat seriem auxiliorum , quibus prædestinati æternam salutem consequuntur , sive sint efficacia , sive sufficientia duntaxat . Ergo si omnes adipiscuntur salutem per gratiam , jam salus erit prædefinita , tanquam per gratiam comparanda . At quænam gratia ex Dei prædestinatione conferatur , quemadmodum an prædestinatio gratuita sit , an ex præscientia meritorum , non est hujus loci definire .

Opp. i.

Opp. 1. Matth. xx. habetur: *Erunt novissimi primi, & primi novissimi*, idest postremum tenebunt locum, qui primum electi sunt: Ergo datur duplex salvandorum ordo, unus eorum, qui vocati sunt & non electi, alter eorum qui simul electi sunt, & vocati.

Resp. 1. cum Estio primos & novissimos dici & respectu hominum, & respectu Dei, ita ut Evangelicæ sententiæ sensus sit: *Multi qui iudicio hominum videntur primi, erunt Deo novissimi: & multi e contra qui iudicio hominum novissimi videntur, primi erunt iudicio Dei*. Homines enim ceteris præferunt divites, nobiles, sæculari gloria præclaros: at Deus humiles spiritu, pauperes, & qui persecutionem patiuntur propter iustitiam.

Resp. 2. in regno cælorum, quo nomine hujus temporis Ecclesia dicitur, primos esse novissimos, & novissimos primos, quoniam Judæi, qui primi ad Ecclesiam vocati sunt, nondum ad Christi fidem accesserunt, ad quam venerunt Gentiles, *novissimi*, & post illos Apostolica prædicatione invitati.

Opp. 2. Multi sunt prædestinati a constitutione mundi, ut legitur cap. xxv. Matth. Ergo non omnes qui salvantur ab æterno prædestinati fuerunt.

Resp. Idem esse a constitutione mundi, &, ante mundi constitutionem, quia Deus nihil disponit in tempore, quod non prædefinierit ab æterno; quare dicitur quidem in Evangelio Cælorum regnum paratum a mundi constitutione; sed ad Ephes. 1. ante mundi constitutionem, & in 1. ad Timoth. 6. ante tempora sæcularia.

Opp. 3. Vocati in vineam hora undecima non erant electi, & tamen receperunt mercedem: Consequuntur ergo salutem aliqui, qui non erant prædestinati.

Resp. Ut ad 1. in Evangelica parabola novissimos dici Gentiles, qui ad Christum conversi receperunt eandem mercedem cum Judæis, qui legis Mosaicæ servaverant instituta. Quamquam in parabolis scopus attendi debet, neque necesse est omnia omnibus respondere. Sed vide, quæ de hujusmodi parabola diximus ix. capite lib. 1. 1. 1. Adverte tamen, non in eo errasse Catharinum, quod aliquos eximie sanctos, & efficacissima vocatione electos esse affirmaverit; nam idem de Paulo scribit S. Pater lib. de Grat. & lib. arb. cap. v. sed ideo erravit, quia, erga salvandos inferioris ordinis nullam agnovit electionem, nullum propositum, nullam specialem Dei providentiam.



C A P U T III.

*Deum neminem eligere sive ad gratiam, sive ad gloriam
ex præscientia operum naturalium, neque
propter opera præcedentia moralium
virtutum.*

ORIGENES hydra hæreseon omnium, ut scribit lib. i. Hist. Pelagianæ Norisius, contendebat non una cum corpore animas procreatas, sed antequam carnalibus vinculis colligarentur, separatas omnino propriam sortem bonam, aut malam promeruisse. Ita ex naturalibus meritis comparatis ante unionem ad corpus placuit Origeni quamcunque præelectionem repetere. Pelagius vero, qui ex Rufino Origenista exitiosissimum hausit venenum, aliquos prædestinari voluit ad gloriam, alios ad supplicia, quia illos Deus prævidit pie sancteque victuros viribus arbitrii nullo indigentis gratiæ Salvatoris beneficio; hos e contra usque in finem novit in scelera prolapsuros. Is nimirum non utique præexistentiam animarum, sed præscientiam tamen naturalium meritum cum Origene adstruit. Temperarunt errorem aliquantisper Semipelagiani asserentes bona opera compleri per gratiam Christi, sed præcedere ex nobis initium fidei, & primum sanctæ cogitationis exordium: vel saltem, si etiam prima fides muneri divino inspiratur, pendere ex arbitrio solo illius acceptationem & usum; atque ita divinæ electionis esse causam meritum naturale fidei initialis, aut cælestium donorum acceptationis. Hæc omnia plenis Theologorum suffragiis reprobantur. Est tamen quorundam opinio, qui tenent prædestinationem ad primam gratiam pendere nonnunquam a prævisione operum virtutum moralium; non quod hæc opera *de condigno*, & ex rigoro debito Deum ad elargiendum gratiam obstringant; sed quoniam *de congruo*, & de decencia quadam Dei liberalitatem alliciunt ac trahunt. Sunt vero morales virtutes illæ, quæ naturaliter absque gratiæ auxilio exercentur: easque certum est de se peccata non esse, hominemque reddere pravis cupiditatibus minus addictum. At inesse illis aliquam rationem meriti titulo quoque decentiæ, negant Augustiniani Theologi. Sed ad ludum literarium jacienda jam alea.

PROPOSITIO I. Erronea est animarum præexistentia, quam finxit Origenes, & commentitium meritum Prædestinationis comparatum ante illarum unionem ad corpora.

Non est operosum Origenianam hæresim confutare. Primo impugnat ex Scripturis, nam constat ex Historia Geneseos universorum, Conditorum antea formasse corpus Adam ex limo terræ, deinde inspi-

Tò.I.

H h h

raffe

rasse in faciem ejus *spiraculum vite*, & hominem factum tunc esse in animam viventem. Non ergo anima corpori præexistebat. Secundo rejicitur ex Apostolo; qui Epist. ad Rom. cap. v. ait. *Per unum hominem peccatum intravit in mundum*. Nullum ergo datur peccatum antequam anima informet corpus; alias mors & peccatum non per Adam intrasset in mundum, sed per meritum Animæ antecederet prævaricationis. Et cap. 9. de Jacob, & Esau: *Cum nondum, inquit, nati essent, aut aliquid boni egissent aut mali*. Quæ verba nihil ad rem facerent, si animæ eorum priusquam in corporum carcerem detruderentur aliquid fuissent promeritæ. In 12. etiam ad Corinth. cap. v. scribit Apostolus, *Homines judicandos secundum ea, quæ gesserunt in corpore*. Tercio damnata est Origeniana Sententia Capite 1. Quinti Generalis Concilii his verbis: *Si quis dicit, aut sentis præexistere hominum animas, utpote quæ antea mentes fuerint, & sanctæ virtutes, satietatemque capisse divinæ contemplationis, & in deterius converfas esse, demissasque in corpora supplicii causa; anathema sit*. Denique apparet errorem Origenis principiis absurdissimis inniti, cujusmodi sunt fabulosa unio omnium creaturarum rationabilium, angelorum, dæmonum & hominum, atque singularum productio absque numero, & ordine: de quibus lege Scholion primum ad Capitula contra Origenem clarissimi nostri Christiani Lupi.

PROPOSITIO II. Non prædestinantur Electi ex prævisis meritis comparandis sola facultate liberi arbitrii.

Est definitio Fidei contra hæreticos Pelagianos. Et probatur 1. ex Apost. dicente ad Rom. cap. 11. *Si autem gratia, jam non ex operibus, alioquin gratia non est gratia: & infra. Quis prior dedit illi, & retribuetur ei?* 11. ex Augustino scribente ad Vitalem: *Scimus gratiam Dei nec parvulis nec majoribus secundum merita nostra dari*. 111. ex ratione Theologica, siquidem opus naturale non potest supernaturalia beneficia promereri: Gratia & vita æterna beneficia supernaturalia sunt: Ergo opus naturale nullum gratiæ, aut vitæ æternæ meritum habet.

PROPOSITIO III. Neque prædestinantur Electi ob præscientiam fidei aut bonæ voluntatis ex solo libero arbitrio naturaliter prodeuntis.

Ad fidem pariter hæc propositio pertinet, & contra Semipelagianos definita est a Synodo Arauxicana Canon. 12. & a Tridentina de Justificat. Canone v. Prob. 1. ex Apostolo 2. ad Corinth. 3. *Non quod sufficientes simus cogitare aliquid a nobis, quasi ex nobis*. 11. ex Augustino hæc verba in lib. de Prædest. SS. cap. 2. sic exponente: *Attendat hic, & verba ista perpendant, qui putant ex nobis esse fidei captum, & ex Deo fidei supplementum. Quis enim non videat prius esse cogitare, quam credere?* 111. ex ratione: Gratia enim est donum gratis collatum: Non ergo retribuitur fidei, aut cuivis operi solius liberi arbitrii facultate patrato.

Pro-

PROPOSITIO IV. Libera acceptatio, & bonus usus arbitrii prævisus antecedenter ad gratiam, non sunt causa prædestinationis.

Sequitur ex dictis; & probatur 1. quia sine gratia nemo opus aliquod bonum, quod revera sit meritum salutis æternæ, potest efficere; Igitur neque motivum prædestinationis esse potest acceptatio gratiæ, & usus arbitrii prævisus antecedenter ad gratiam. 2. quoniam plurimi prædestinantur, qui neque gratiam acceptaturi sunt, neque recte eadem usuri, ut sunt infantes qui Sacro tincti baptismate ante rationis usum decedunt. Quos non prædestinari propter merita Parentum, neque propter bona opera, quæ si diutius viverent facturi essent, certum est in Augustiniana sententia, ut ostendam in sequentibus. 111. Per Augustinum in lib. de Prædest. SS., de Dono Persev. de Corrept. & gratia, quod liberum arbitrium Deo vocanti consentiat, & bene utatur acceptis donis, est donum gratiæ descendens a Patre lumine. Igitur commentitia est præscientia acceptationis & recti usus arbitrii antecedenter ad gratiam. In his quatuor propositionibus Catholici omnes conveniunt.

PROPOSITIO V. Opera moralium virtutum a Deo prævisa nullo pacto prædestinationis nostræ causa sunt.

Loquimur etiam de merito condecientiæ, sive de congruo. Et probatur 1. Si opera moralium virtutum meritum aliquod haberent sive gratiæ, sive gloriæ, nostra sempiterna salus ab operibus naturalibus duceret initium: Atqui id falsum est: Ergo &c. Prob. minor: Initium nostræ salutis est fides supernaturalis; quæ est donum Dei: Nam Apostolus ad Ephes. cap. 2. ait: *Gratia salvati estis per fidem, & hoc non ex vobis, Dei enim donum est.* Quæ Apostoli verba exponens Tridentinum Concilium Sess. 6. cap. VIII. ait: *Perpetuus Ecclesiæ Catholicæ sensus tenuit, ut per fidem justificari dicantur, quia fides est humanæ salutis initium.*

Si dixeris Tridentinum explicandum esse de merito de condigno, non de congruo; dico id gratis omnino asseri, & contra Sacrosanctæ Synodi mentem. Nam eadem Sess. definitur, *Justificationis initium sumi a vocatione Dei, qua nullis eorum meritis præcedentibus vocantur*: Excluditur ergo quæcunque meritum etiam de congruo. Præterea Fides, quæ ab Apostolo, & a Concilio initium salutis appellatur, vitam æternam atque justificationem de congruo tantum promeretur, non de condigno: At libero arbitrio sine gratia virtutes morales exercenti, ut constat ex Augustiniana Epist. ad Xystum, non inest meritum, quale ex divino adiutorio tribuitur Fidei: Igitur eidem libero arbitrio sine gratia operanti nullum meritum salutis æternæ concedendum est, etiam solius congruitatis atque decentiæ.

Rursus demonstratur propositio; quippe si opera moralium virtutum nostram prædestinationem quomodolibet promererentur, gratia

non effet gratia, quoniam daretur secundum merita nostra: quod dam-
natum est in multis Conciliis Diospolitano, Arauxicano, aliisque om-
nibus post exortam hæresim Pelagianorum.

Probatum etiam auctoritate S. P. Augustini, qui lib. 1. ad Simplicium
quæst. 2. ait: *Non habeo quid intuear in eligendis hominibus ad gra-
tiam & salutem, nisi vel majus ingenium, vel minima peccata, vel
utrumque. Addamus etiam, si placet, utiles honestasque doctrinæ.*
*Sed cum hoc statuero, ita me ridebit ille, qui infirma mundi eligit ut
confundat fortia, ut eum intuens, & pudore correptus ego irrideam*
multos, & præ quibusdam peccatoribus castiores, & præ quibusdam
Piscatoribus Oratores. Et libro 1. de Peccatorum meritis & remissis. *Un-
de fit, inquit, ut homo ab ineunte pueritia modestior, ingeniosior, tem-
perantior, in eo loco sit, ubi ei prædicari gratia Christiana non possit:*
alius autem tardus ingenio, libidinibus deditus, flagitiis cooptus ita
gubernetur, ut audiat, credat, baptizetur, rapiatur? Hæc Augustinus,
qui manifestissimis exemplis demonstrat aliquando prædestinari quos-
dam moralibus virtutibus minus deditos, idque non a meritis naturalibus
pendere, sed a Dei beneplacito. Contrariæ opinionis censuram;
affert Ludovicus Habert de Prædestinat. Paragrapho v. & Jucnin cap. vi.
art. 1. Concl. 3.

His occurrunt quidam Theologi reponentes officii virtutum mo-
ralium gratiam rependi decentia quadam & congruitate, quæ non ope-
ribus naturalibus inest in se inspectis, sed vi conventionis, de qua com-
placuit Divino Patri cum Christo pacisci, se quidem *facienti quod in se
est* gratiam & gloriam minime denegaturum. At suppositum est & ad
libidinem fictum pactum istud Molinianum, nullius nixum Scripturæ
Sacræ auctoritati, & exemplis eorum qui inter Ethnicos relinquuntur,
productisque Augustinianis verbis oppositum; dissonum quoque ratio-
ni: non enim constituto pacto, quod retribuitur beneficium est, sed
justitia. Quare sequentem propositionem: *Quia opera viribus solius
naturæ elicitæ omnino sterilia sunt, atque incapacia merendi dona intrin-
sece & theologice supernaturalia, ideo dicimus obligationem quam Deus
habet conferendi gratiam facienti quod est in se viribus naturæ, seu vi-
ribus gratiæ pure naturalis, sive non theologice supernaturalis, non oriri
ex bonitate talium operum, aut ex ullo merito sive condigno, sive con-
gruo, quod inest illis operibus in ordine ad gratiam; sed ex pacto inter
Christum fidejussorem nostrum & Patrem inito, ad gratiam hominibus
conferendam propter Christi merita, respiciendo ea naturalia opera ut
purum terminum, non ut meritum ullum aut rigorosam conditionem:*
*Istam, inquam, Propositionem in Comitibus Generalibus Cleri Gallicani
die 4. Septembris anno 1700. habitis in Regio Palatio Sangermano no-
tatam hoc tetro commate invenimus: Pactum istud, quod inter Deum
& Christum assertum, commentum est temerarium, erroneum, nec so-
lum*

lum tacente, sed etiam adversante Scriptura, & SS. Patrum traditione prolatum.

Opp. 1. legitur in Evangelio: *Venite benedicti Patris mei. Esurivi enim & dedistis mihi manducare: sitiivi, & dedistis mihi bibere*: Igitur eleemosyna, aliaque moralia opera sunt causa salutis. Prob. conseq. nam opera nuper in Evangelio commemorata non sunt a caritate Christi & a fide: alias ibidem iusti non responderent: *Domine, quando vidimus te esurientem?* Ergo opera illa naturalia sunt, & viribus arbitrii patrata.

Resp. nego consequentiam; nam opera meritoria æternæ salutis referri debent in Deum, & in ejus obsequium exerceri, quod absque fide & caritate nemo præstat: & ideo opera quæ non proficiuntur a gratia veram rationem meriti nequeunt habere, sed abunde compensantur per temporalem aliquam mercedem, ut de naturalibus virtutibus Romanorum non semel asseruit Augustinus. Iusti ergo in extremo judicio mercedem ac præmium referent eleemosynarum, quas ob Christi amorem elargiti fuerint minimis ac pauperibus. Ad probationem consequentiæ dico capropter iustos dicturos esse: *Domine, quando te vidimus esurientem?* quoniam ipsi non viderunt Christum in carne pauperem & mendiculum: unde correpti admiratione, quando nam, inquier, vidimus te regem gloriæ more pauperum cibum, potum, atque indumenta petentem? Quam admirationem ab eis supremus Iudex removendo dicturus est: *Quod uni ex minimis meis fecistis, mihi fecistis.*

Opp. 2. In Actibus Apostolorum cap. x. Cornelius promeruit eleemosynis suis, ut instrueretur in fide. Lucæ x. Zachæus studio videndi Christum impetravit, ut ab eo videretur, & vocaretur. Lucæ xx. 11. Latro focium increpans & Christi prædicans innocentiam ab eo meruit audire: *Hodie mecum eris in Paradiso.*

Resp. Cornelium non sine aliqua fide eleemosynas erogasse, ut ait S.P. cap. vii. de Prædest. SS. ac probatur ex illo Pauli testimonio: *Quomodo invocabunt in quem non crediderunt?* Promeruit ergo, ut instrueretur in fide, quoniam orabat, & eleemosynam largiebatur ex fide aliqua, tamen nondum valida atque perfecta. Idem dicendum est de Zachæo & Latrone, in quibus ut ait Prosper cap. 13. & 14. adversus Collatorem: *Præcessit aliqua preparatio ex supernaturali fide*: quæ facile potuit in ipsis esse, quoniam ambo erant Judæi. Fidem præsertim Latronis, qua credidit in hominem crucifixum, agentem animam, plenum opprobriis, derelictum a suis, nullo prædicante, blasphemantibus omnibus, quis non credat maximum opus gratiæ, ac præstantissimum passionis Christi beneficium? Lege Homiliam S. Joannis Chrysostomi in Sanctum Latronem. At nihil nos debent movere istiusmodi exempla, quibus abutebantur etiam Semipelagiani.

Opp. 3.

Opp. 3. In multis Scripturæ locis asseritur Deum invenire bonos ; ac propterea illis gratiæ beneficia rependere ; ut Genes. 18. Job. 13. & alibi. Præterea Zacchariæ cap. 1. *Convertimini ad me*, ait Dominus, & *ego convertar ad vos* : & Prov. 16. *Hominis est præparare animam*, &c.

Resp. Deum invenire in bonis hominibus illud tantum, quod ipse facit ; Ita S. P. lib. 2. contra duas Epist. Pelagianorum : exhortationibus Scripturarum commendari liberum arbitrium, sed non excludi gratiam prævenientem, quemadmodum, ubi dictum est *Converte nos Deus salutaris noster*, *Converte nos Domine*, & *convertemur*, & *Præparatur voluntas a Domino*, commendatur gratiæ beneficium, non denegatur libertas ; ita S. P. lib. de Grat. & lib. arb. cap. 5.

Opp. 4. Augustinus de Dono Persev. cap. 14. scribit. *Habere quosdam in ipso ingenio divinum naturaliter munus intelligentiæ, quo moveantur ad fidem*.

Resp., ut diximus lib. IV. cap. XII., Augustini verba tantum probare, quosdam propter virtutum moralium exercitamenta habere minorem in se obdurationem, & facilius, si a Deo vocentur, moveri : non vero ex allatis verbis inferitur naturalia opera habere aliquod gratiæ meritum. Constat ex verbis quæ subsequuntur : *Si Dei*, inquit ibidem Augustinus, *altiori judicio a perditionis massa non sunt gratiæ prædestinatione discreti, nec ipsa eis adhibentur vel dicta divina, vel facta per quæ possent credere, si audirent talia, vel viderent. In eadem perditionis massa derelicti sunt etiam Judæi, qui non potuerunt credere factis in conspectu suo tam magnis, clarisque virtutibus*. Hæc S. P. Itaque si ab altiore judicio Dei descendit ut aliquis credat & salvetur, & quisquis tali judicio discretus non est, nequaquam credit ; profecto sola naturalia opera nullatenus supernaturalis fidei promerentur initia.

Opp. 5. Chrysostomus Hom. 45. in Genes. docet *Abrahamum se prius disposuisse, quam a Deo tam magna gratia acciperet beneficia*.

Resp. Propter grassantem hæresim Manichæorum, qui negabant liberum arbitrium S. Joannem Chrysostomum passim eam dicendi adhibuisse rationem, præsertim in Homiliis ad populum, ut illum ad bona opera inflammaret. De Chrysostomi sententia dicendum alibi. Immerito Vasquesius tantum Ecclesiæ Patrem Semipelagianis adnumerat. Possumus omnia loca Chrysostomi, ubi negat Deum prævenire hominum voluntatem, commode exponere, quod eam non præveniat libertatem evertens, ut commenti sunt Manichæi. Aperte sese explicat Sanctus Doctor Hom. XII. in Epist. ad Hebræos, ubi ait : *In Dei potestate sunt omnia, sed non ita, ut nostrum liberum ledatur arbitrium* : & infra : *Non prævenit nostras voluntates, ne perdat nostrum liberum arbitrium*.

Opp. 6.

Opp. 6. In Martyrologio Romano die Junii ultima legitur, Basilidem Ethnicum militem recepit mercedem quod sanctam virginem Potamienam visitasset dum ad supplicium duceretur, ejusque pudicitiam tutatus esset. Resp. vel mercedem ibidem dici orationem a Virgine factam pro Basilide, vel in isto aliquam fidem præcessisse ex supernaturali Dei beneficio; qua deinde Martyr occubuit, ut scribit Euseb. Hist. Eccl. lib. 6. cap. 5.

Opp. ultimo Scholasticum proloquium, *Facienti quod in se est, Deus non denegat gratiam*. Resp. sensum hujus axiomatis esse, quod qui facit ex viribus primæ gratiæ quod potest, gratiam a Deo habet uberiores ac pleniores. Explicatum alio sensu *mutatis tantum vocibus Semipelagianismum instaurat*, inquit in laudata Censura Clerus Gallicanus. De hoc Scholasticorum proloquio plura dicam in disputationibus de Gratia Christi: ubi propositiones hujus capituli novorum argumentorum accessione erunt confirmandæ. Sunt enim nunc pro necessitate hujus libri leviter delibatæ, atque labiis, ut inquirunt, extremis.

C A P U T IV.

*Prædestinationem ad gloriam priorem esse
prædestinationem ad gratiam.*

DE PRÆDESTINATIONE ad gratiam inquirendum restat, num electionem illam antecedit vel subsequatur quæ est ad gloriam. Sunt autem in divinis omnia simul, & sola ratione nostra unum præcedit alterum; ideoque de hac tantum *prioritate* præsens quæstio instituitur.

PROPOSITIO. Prædestinatio ad gloriam præcedit prædestinationem ad gratiam.

Breviter probatur 1. ex Scripturis; sic enim habetur Act. xiiii. *Et crediderunt quotquot erant præordinati ad vitam æternam*: Ergo præordinatio ad vitam causata est, cur Deus largiatur donum fidei, & consequenter gratia subsequitur prædestinationem ad gloriam, ut causam effectus. II. ex Fulgentio, qui lib. 1. ad Monim. cap. 13. scribit: *Illi cum Christo regnabunt, quos Deus gratuita sua bonitate prædestinavit ad regnum; quia enim tales prædestinando præparavit ut Regno digni essent, præparavit secundum propositum vocandos ut obediant; præparavit justificandos, ut accepta gratia recte credant, & bene vivant, &c.* Et S. P. Augustinus de Prædest. SS. cap. x. *Gratia*, inquit, *est prædestinationis effectus*. III. Probatur ratione: Finis est omnium causarum prima, quippe prior est finis in intentione, & ejus causa aguntur omnia, & media opportune parantur: Atqui gloria est finis, & gratia est

est medium consequendi ipsam gloriam : Ergo in Dei mente ac prædestinatione gloria prior est, quàm gratia.

Opp. 1. In re gratia præcedit gloriam : sed ordinem, quem res habent in se, habent etiam in divina prædestinatione : Ergo, &c.

Resp. nego minorem quoniam in executione media præcedunt finem, in intentione vero finis præcedit media. Constat id exemplis evidentissimis. Aegrotus prius intendit sanitatem & hujus gratia eligit medicamenta ; in executione vero medicamenta præcedunt sanitatem : & sanus prius decernit iter Romam versus habendum, & hujus causa parat equum aut rhedam ; & tamen prius hanc conscendit, quàm perveniat ad Urbem.

Opp. 2. Quinquam operans prius intendit mercedem quàm opus, qui tamen indicit operam prius intendit opus, quàm mercedem ; ita colonus primo vult denarium, deinde vineæ culturam ; sed Dominus vocans operarios vult primum culturam vineæ, deinde solutionem denarii. Ergo Deus, qui nos quasi operarios conducit in vineam suam, primo intendit opera nostra ac merita, postremo mercedem & gloriam.

Resp. conc. ant. nego conseq. ac paritatem. Homines præcipue in conducendis operariis spectant propriam utilitatem, ideoque prius volunt opus tanquam sibi utile ; & quia hanc utilitatem habere nequeunt nisi solvant operariis mercedem, ideo hanc mercedem intendunt secundo loco. Contra Deus, qui bonorum nostrorum non indiget, sed spectat gloriam suam, ac nostram utilitatem, primo vult nostram beatitudinem, in qua magnopere glorificatur ; & quoniam beatitudo haberi non potest absque gratia, ideo gratiam secundo loco intendit, Atque ita respondet Estius dist. xl. §. viii. Sed respondere quoque possumus majorem esse falsam, quando aliquid intenditur tanquam beneficium indebitum, antequam proponatur ut merces : quod planius erit in sequentibus dilucidandum.

C A P U T V.

Ex Sacris literis ostenditur Prædestinationem ad gloriam in hoc statu non esse ex præscientia meritorum.

QUÆSTIONEM aggredimur magna contentione inter Theologos agitatam. In qua jam non disputatur de meritis naturalibus, quæ comparate ad gratiam vel gloriam nulla sunt, sed de meritis Deo per gratiam auxiliante patratis. Hæc autem quæstio non versatur circa Prædestinationem quantum ad omnes ejus effectus ; sic enim accepta comprehendit gratiam, quam non esse ex operibus docet Catholica Fides : sed disputatur de gloria cujus intuitu divina beneficia, præfertim

fertim vero finalis perseverantia donantur. Neque dubium ullum est de meritis Christi, dicente Apostolo ad Ephesios 1. 5. *Prædestinavit nos in adoptionem filiorum per Jesum Christum*; sed de meritis personalibus ipsorum prædestinatorum. Inquiritur autem de hoc statu, in quo supponitur originale peccatum; nam de prædestinatione Angelorum nos quidem adversarii consentimus.

Sunt ergo duo inter se pugnancia Scholarum placita. Primum est eorum, qui tenent Deum æqualiter velle omnes salvos fieri, singulis conferre media ad salutem, & illos ad gloriam eligere, quos prævidet bene operaturos, & perseveraturos usque in finem. Alterum illorum, qui docent ex perditionis massa Deum pro suo beneplacito ante prævisionem futurorum operum alios prædestinare, alios relinquere: atque his, quos prædestinat, præter communia gratiarum dona, beneficia talia parare, quibus a perditione certissime liberentur. Tenent priorem Sententiam Henricus Gandavensis, Okamus, Gabriel, & cum aliis recentioribus Jesuitis Vasquesius, Lessius, Valentia. Stant pro opposita S. Thomas, Aegidius, Gregorius Ariminensis, Bellarminus, Searesius, Simonet, Abulensis, Estius, Sylvius, & alii. At discipuli Scoti dissident inter se, quod eorum Antesignanus 1. Sent. dist. 41. asserat utramque Sententiam esse probabilem; Matrius tamen, quem fere omnes sequuntur, gratuitam prædestinationem defendit; tenet contrariam Sententiam Claudius Frassen. Quoniam Medistæ complures Prædestinationem gratuitam nedum rejiciunt, sed et iam cum Joanne Adamo dicunt ab Augustino per excessum fuisse traditam, in eaque desiderari Catholicum aliquod temperamentum; non abs re erit meminisse decreti Claudii Aquavivæ, de quo diximus in Præfatione. Probatur illud fuisse votis Joannis Azorii, Gasparis Gonzalez, Jacobi Tyrrii, Petri Bufæi, Antonii Guisani, & Stephani Tucci, demonstrat Norisius in Vind. cap. 111. §. v11. Addimus Eminentissimum Bellarminum, ad quem nuper accessit Edmundus Simonet, lib. 2. de Grat. cap. x1. in fine hæc proferre: *Hæc sententia non quorumvis doctorum opinio, sed fides Ecclesiæ Catholicæ dici debet*. Neque Bellarminus ipse adduci unquam potuit ut assentiretur Sententiæ P. Caroli Faraonis Præceptoris sui, ut scribit in vita Bellarmini cap. vi. Jacobus Fuligatus. Quid plura? P. de Rhodes Jesuita disp. v. de Deo quæst. 2. sect. 5. hæc de Sententia nostra pronuntiat: *Tenent illam 1. Scripturarum interpretes nobilissimi Abulensis, Salmeron, Pererius, Toletus, Lyranus, & ad unum veteres omnes. 11. Controversarum Scriptores celeberrimi Bellarminus, Driedo, Ricardus, Castro, Estius, Horantius. 111. Scholastici fere omnes. Scripturas habent pro se apertissimas, ac multos Patres, rationes denique omnino efficaces*. Addit Sententiam oppositam a plerisque fuisse exceptam, quoniam ignari citius illi acquiescunt, neque in ea statim se prodit divinorum judiciorum abyssus.

To. I.

l i i

Distin-

Distinguendus est autem duplex ordo, *intentionis* scilicet, & *executionis*, qui diversum connotant terminum; quatenus Deus videns universam perditionis massam aliquos misericorditer voluit eripere & ad gloriam transferre: noluit tamen hanc largiri nisi tanquam coronam justitiæ, & bonis arbitrii meritis, ideoque specialia gratiarum dona electis suis præparavit, ut hæc merita ponerentur, quibus gloria rependenda esset tanquam merces ac præmium. Itaque *intentionis* ordo dicitur relative ad massam perditionis, in qua comprehenduntur aliqui nulla meritum prærogativa ab aliis secreti & sola misericordia prædestinati: & ordo *executionis* dicitur comparate ad opera meritoria, quibus divina promissione supposita gloria non tam beneficium est, quam retributio mercedis. Fatemur itaque omnes gloriam coronam esse, denarium, bravium, justamque retributionem. Idque negant solummodo Calvinus, Gomarus, & hujus furfuris pauci, dicentes bona opera Deo pluribus titulis deberi, ideoque non esse meritoria felicitatis æternæ. Sed frivola sunt hæc; nam qualiacunque sint bona opera creaturarum, si non merentur gloriam secundum absolutam æqualitatem, merentur tamen divina præsupposita ordinatione. His prænotatis de ordine divinæ intentionis, e Scripturarum, Patrumque doctrina repetimus discussionem.

PROPOSITIO: Ex Sacris literis demonstratur prædestinationem ad gloriam esse in statu naturæ lapsæ gratuitam.

Quamplurima sunt Scripturarum divinarum testimonia, quibus nostrum roboratur theorema. Primum sit Joan. xv. habetur: *Non vos me elegistis, sed ego elegeri vos, ut eatis, & fructum afferatis, & fructus vestri maneat.* Alterum desumi potest ex Epistola ad Ephes. cap. i. ubi Apostolus ait: *Elegit vos Deus in Christo ante mundi constitutionem, ut essemus sancti & immaculati in conspectu ejus in caritate:* & infra: *Prædestinavit nos in adoptionem filiorum secundum propositum voluntatis suæ, in laudem gloriæ gratiæ suæ.* Tertius locus sit ex Epist. ad Coloss. cap. 1. *Qui dignos nos facit in partem sortis Sanctorum:* ubi sortem appellat Apostolus Electionem ad gloriam, quod obtingat adinstar sortis præter hominum intentionem, ac studium. Accedunt verba ejusdem Apostoli ad Titum cap. 3. *Non ex operibus justitiæ, quæ fecimus nos, sed secundum suam misericordiam salvos nos fecit:* quo loco utitur potissimum S. Thomas. Afferri quoque possunt ex Epist. ad Corinth. loca omnia quibus docet solam Dei gratiam homines discernere, & nemini gloriandum esse, nisi in Domino; E. G. hæc verba: *Quis enim te discernit? quid autem habes, quod non acceperisti? si autem acceperisti, quid gloriaris quasi non acceperis?*

Neque dissimilia sunt quæ ex veteri testamento possunt proferri. Eligam perpauca. In Psalmo 17. legimus: *Salvum me fecit quoniam voluit me.* Apud Ezech. 38. promittens Deus Electis suis immutationem cordis,

cordis, aliaque spiritualia bona, quæ sunt effectus prædestinationis æternæ, ait: *Non propter vos ego faciam, sed propter nomen sanctum meum.* Et ne multus sim, 1. Regum, Psalm. 22. 78. 105. & Jerem. 14. implorant iusti gratiam, salutem, ac beatissimam æternitatem propter gloriam divini nominis. Constat ergo ex his, aliisque permultis Sacrarum Scripturarum textibus non propter merita hominum, sed secundum beneplacitum Dei fieri prædestinationem Sanctorum.

Adversarii respondent in his locis agi tantum de Electione ad fidem, ad Evangelium, ad gratiam, sive de prædestinatione ad gloriam complete & adæquate acceptam, prout etiam auxiliorum dona complectitur. Sed inaniter ludunt operam. Nam fructus qui manet, non est fides, non gratia; sed finalis perseverantia, consummata caritas, & sempiterna beatitudo. Neque eligi dicantur Sancti ad Sanctitatem & gratiam, sed e contra Sanctos & immaculatos fieri, quia sunt electi; ut observat in primum caput ad Ephes. Hieronymus. Sors quoque Sanctorum non potest esse sola fides aut gratia, quoniam hæc reprobi quamplures participant. In Epist. autem ad Titum expresse ex Dei misericordia repetitur consecutio salutis. Discernunt quidem fides & gratia inter incredulos & fideles, inter impios ac Sanctos; sed discretio ista est temporalis, non sempiterna; nam qui prædestinati non sunt partem habebunt cum infidelibus. Quid, ultra expetis? Ut dicatur cælorum regnum complacita Dei benignitate promissum? Id Lucas affirmat cap. 22. 32. *Nolite timere, pusillus grex, quia complacuit Patri vestro dare vobis regnum.* Et Christus Dominus de ovibus, quas dedit ei Pater, Joannis 10. 28. *Et ego, inquit, vitam æternam do eis: & non peribunt in æternum, & non rapiet eas quisquam de manu mea.* Quinam sunt autem nisi prædestinati ad gloriam, oves, quæ e manu pastoris rapi non poterunt? & quare non erunt oves hæc rapiendæ, nisi quia Pater eas elegit, & dedit Christo? Sed hæc omnia brevissime complexus sum, ut unicum D. Pauli testimonium accuratius expendam.

Est illud in Epist. ad Romanos cap. 11. ubi Apostolus ad demonstrandum adoptionem filiorum Dei ex carnali generatione, aut ex operibus prævisis nequaquam pendere, sed unicam habere causam in Dei beneplacito, affert exemplum duorum filiorum Isaac, Jacob, & Esau, & v. 11. ait: *Cum enim nondum nati fuissent, aut aliquid boni egissent aut mali, ut secundum electionem propositum Dei maneret, non ex operibus, sed ex vocante dictum est ei: Quia major serviet minori, sicut scriptum est: Jacob dilexi, Esau autem odio habui.* Hoc loco Apostolus pares fuisse demonstrat Jacobum & Esau quantum ad parentes quia ex uno concubitu eos genuit Rebecca; & quantum ad merita eorum, quia ex solo Dei proposito, extantibus adhuc puerulis in utero, prædictum est matri Genes. 25. 23. *Major serviet minori.* Et ne quis objiceret Deum esse iniquum, qui absque meritorum intuitu unum elegit,

non alterum; addit protinus: *Quid ergo dicemus? nunquid iniquitas apud Deum? Absit. Moysi enim dicit: Miserebor, cujus misereor, & misericordiam praelabo, cujus miserebor. Igitur non volentis, neque currentis, sed miserentis est Dei.* Rursus aptissimo exemplo coerces hominum querimonias. O homo, inquit, tu quis es, qui respondeas Deo? Nunquid dicit figmentum ei, qui se finxit: *Quid me fecisti sic? Annon habet potestatem figulus luti ex eadem massa facere aliud quidem vas in honorem, & aliud in contumeliam?* Deinceps ne quis reponeret Deum esse crudelem, qui odisset Esau; ait odium erga Esau fuisse ex iustitia, & amorem erga Jacob ex misericordia: *Quod si Deus volens ostendere iram, & notam facere potentiam suam, sustinuit in multa patientia vasa ira apta in interitum, ut ostenderet divitias gloriæ suæ in vasa misericordiæ quæ præparavit in gloriam.* Ex quibus apparet filios promissionis & adoptatos in hæreditatem Christi fuisse præfiguratos in Jacob: Atqui Jacob nullo meritorum suorum intuitu electus est, sed benevola voluntate Dei, qui miseretur cujus vult misereri: Ergo, &c.

Contra apertissimum testimonium Apostoli variis interpretamentis sese adversarii tutantur. Ac primo nonnulli respondent loqui Apostolum de prædestinatione ad Evangelicam legem, & ad gratiam, non vero de prædestinatione ad gloriam: sed refutantur quamfacillime. 1. quia vocati *secundum propositum* sunt juxta Apostolum prædestinati etiam ad gloriam. Scribit enim præcedenti cap. viii. *Scimus, quoniam diligentibus Deum omnia cooperantur in bonum, iis, qui secundum propositum vocati sunt Sancti.* At iis, qui electi sunt ad solam fidem vel gratiam, non omnia cooperantur in bonum, quia ex istis reprobi peccant, & plures nusquam a peccato resurgunt, & omnes pessima morte decedunt; & consequenter his neque mors, neque permissio peccati cooperantur in bonum. Deinde de prædestinatis ait ibidem Apostolus vocari, justificari, glorificari. *Quos autem prædestinavit, inquit, hos & vocavit, & quos vocavit hos & justificavit, quos autem justificavit illos, & glorificavit.* Qui ergo non glorificantur non sunt de numero illorum prædestinatorum, de quibus D. Paulus instituit sermonem. Rursus de his scribit non separari a caritate Christi, sed angustias, famem, nuditatem, gladium, & adversa omnia superare propter eum, qui dilexit nos. At qui fidem & gratiam recipiunt, sed non finalem perseverantiam, ab ea caritate morte perpetua separabuntur. Præterea Apostolus vocat prædestinatos vasa misericordiæ; & vasa honoris; honor autem electorum est vita æterna, qui enim hanc deperdunt, in opprobrium sempiternum tradendi erunt. Denique concludit Apostolus vasa misericordiæ præparata esse in gloriam; at quamplurimis confertur gratia, quibus tamen non est præparata gloriæ beatitudo. Quamvis ergo loquatur Apostolus de vocatione ad legem Evan-

gelicam & de prædestinatione ad gratiam, quod verum est; tamen non denegat electionem ad gloriam, sed contra ostendit ex hac electione conferri Electis a Deo & fidem & gratiam, & specialiter efficax auxilium, quo separari non possunt a caritate Dei, quo finaliter perfeverant, quo in vasis misericordiae gloriae suae divitiæ manifestantur.

Alii respondent loqui Apostolum de prædestinatione ad gloriam, & hanc non esse ex prævisione meritorum, quæ comparantur naturæ viribus, sed esse tamen ex præscientia operum, quæ perficiuntur auxilio gratiæ. Verum neque hæc responsio subsistit. Si enim Apostolus sola naturalia opera excluderet, frustra sibi objecisset Deum fore iniquum, & acceptatorem personarum. Immerito quoque recurrisset ad merum beneplacitum Dei, qui misericordiam impendit cui vult; atque nulla ratione ex his, quæ dixerat sequenti cap. xi. conclusisset prædestinationis mysterium & judicia Dei esse inscrutabilia. Etenim quilibet etiam ingenio rudis percipit quæ affirmat Apostolus locum non habere, si prædestinatio fiat ex prævisione meritorum etiam quæ comparentur per gratiam. Tunc enim non est respondendum: *Non volentis, neque currentis, sed miserentis est Dei, aut, Cujus vult miseretur, & quem vult indurat.* Non utique; sed respondendum esset, nullam apud Deum esse iniquitatem, nullamque personarum acceptationem, quia hunc prædestinavit, illum repulit non secundum propositum voluntatis suæ, sed secundum præscientiam meritorum. *Quis illum acutissimum sensum* (inquit S. P. Augustinus Epist. 194. alias 105.) *desuisse Apostolo non miretur? Hoc quippe ille non vidit, quando sibi velut adversantis objecti questione, non id potius tam breve, tam apertum, sicuti isti putant, verum absolutumque respondit. Cum enim rem stupendam proposuisset, quomodo de nondum natis, nec aliquid agentibus boni aut mali recte dici potuerit, quod unum Deus dilexerit, alium odio habuerit, ipse sibi objecta questione motum exprimens auditoris: Quid ergo dicemus, inquit, nunquid iniquitas apud Deum? absit. Hic ergo erat locus ut diceret quod isti sentiunt. Futura enim Deus opera prævidebat, quando majorem minori servitutum esse dicebat. Quæ Augustini responsio militat de præscientia operum, quæcunque sint, sive naturalia, sive comparata per gratiam unicuique communem. Accedit quod Apostolus ait: Antequam aliquid boni egissent aut mali, ut secundum electionem propositum Dei maneret, non ex operibus, sed ex vocante, &c. Vide non ad opera gratiæ, sed ad vocantis electionem ac propositum Jacobi prædestinationem referri? Tandem duo illi gemini Jacob & Esau, Cum nondum nati fuissent, neque naturalia, neque supernaturalia opera perpetraverant; & consequenter Apostolus utraque excludit.*

Respondet Beccanus ex nostra explicatione sequi etiam Esau fuisse reprobatum absque præscientia meritorum, quod est dogma Calvinianum.

num. At inepta consecutio; nostra enim sententia docet reprobationem negativam fieri propter originale peccatum, quod oderat Deus in Esau; positivam vero in adultis & baptizatis propter peccata actualia: & Deum gratis damnare homines, & prædestinare sine culpa ad supplicium, nemo Calvino concedit. De utraque reprobatione agam in fine hujus libri. Nunc adverte Apostolum appellare prædestinatos *vasa misericordiae, quæ præparavit in gloriam*: reprobos *vasa iræ apta in interitum*. Non prædestinat ergo istos ad malum, sed adinvenit aptos ad interitum.

Denique quidam reponunt non agere Apostolum de singulorum hominum prædestinatione, aut reprobatione, sed de sorte populi Judæorum & populi Gentilium, utriusque enim typum gerebant Jacob & Esau, ut habetur Genes. xxv. 23. & Malachiæ 1. 2. & 3. & consequenter designare prædestinationem Judæorum ad possessionem terræ Chanaan, Gentium ad hæreditatem in solitudine, & inter dracones deserti. Addunt non esse firmissimum argumentum a sensu literali, ad mysticum. Verum & hæc futilla sunt, & inania. Detur namque Jacobum prædestinatum ad possessionem terræ Israel typum fuisse Judaici populi, Esau præordinatum ad montium solitudinem figuram fuisse Gentilium, certe Paulus non de electione ad bona temporalia loquitur, sed de prædestinatione ad gloriam, ut supra vidimus. Hinc fatetur sibi esse iristitiam magnam & continuum dolorem cordis, quoniam Israelitæ, qui erant cognati ejus secundum carnem, & quorum erat adoptio filiorum, & testamentum, & legislatio, & promissa, a caritate Christi, & Sanctorum sorte deciderunt. Ait tamen non excidisse Dei verbum, quoniam veri Israelitæ sunt filii Dei, & filii promissionis æstimantur in semine. Sic a literali sensu ad mysticum transit Apostolus, & in Jacob prædestinatos, in terra Chanaan cælestis Jerusalem hæreditatem exponit: quasi dicat, *Quemadmodum nullis prævisis operibus Jacob prædestinatus fuit ad terram promissionis*; ita ante præscientiam meritorum ad cælestem patriam præordinantur electi. De sensu autem literali ad mysticum validissime argumentatur, si prior sensus, ut contingit in casu, sit in veteri Testamento, alter expressus in Novo.

OBJECTIONES SOLVUNTUR.

Primo opponunt locum Matth. cap. xxv. *Venite benedicti Patris mei: possidete paratum vobis regnum a constitutione mundi*; *esurivi enim, & dedistis mihi manducare*, &c. Ergo intuitu operum regnum cæleste paratum est.

Resp. dist. ant. & Evangelica verba simul explano: ita ut illo textu, *Esurivi, & dedistis mihi manducare*, significetur causa ac motivum possessionis regni, conc. causa ac motivum præparationis ac prædestinationis.

nationis, nego. Ea verba *Esurivi*, &c. non referuntur ad dictionem istam *paratum*; sed ad verba, *venite*, & *possidete*: & ideo non respiciunt regni præparationem, sed possessionem. Quod constat ex verbis quæ consequuntur. Dicturus est enim Christus reprobis: *Discedite a me in ignem æternum, qui paratus est diabolo & angelis ejus: esurivi enim, & non dedisti mihi manducare*. Porro hoc in loco causalis, *Esurivi enim, &c.* refertur ad verba *Discedite in ignem æternum*, non ad alia, *qui paratus est diabolo, & angelis ejus*. Diabolo enim non est paratus infernalis ignis eo quod homines facturi non essent opera misericordiæ. Sic itaque etiam prior sententia exponenda est.

Insurgit Frassen; Ex prædicto loco infertur reprobos damnari propter demerita; Ergo infertur electos prædestinari propter prævisa merita.

Resp. cum alio Scotista Francisco Henno retorquendo argumentum. Non infertur ex prædicto loco ignem inferni paratum diabolo propter carentiam eleemosynarum: Igitur neque inde infertur regnum cælorum paratum fuisse propter eleemosynarum distributionem. Resp. 2., ut supra, propter demerita reprobos in ignem sempiternum detrudi, ac propter merita electos regnum possidere: neque istic agi de prædestinatione, sed de judicio: præsertim cum etiam parvuli baptizati regnare debeant in cælis, qui nullam largiti sunt pauperibus eleemosynam.

Opp. 2. In Scripturis æterna vita appellatur *merces*, *denarium*, *bravium*, *corona justitiæ*, &c. Ergo propter bona opera prædestinantur electi.

Resp. dist. ant. & hæ appellationes concernunt ordinem *executionis*, conc. ordinem *intentionis*, nego.

At inquit: Nemo vult dare alicui mercedem ac præmium nisi ex meritis: Igitur si in Scripturis gloria appellatur merces ac præmium, Deus non intendit conferre gloriam nisi propter merita.

Resp. dist. ma. Nemo vult dare alicui mercedem ac præmium nisi ex meritis, ita ut merita sint motivum voluntatis dandi mercedem ac præmium, nego ma. ita ut qui vult dare mercedem comparandam ex meritis, præparet etiam ipsa merita, quibus merces comparetur, conc. ma. Utique Deus vult dare gloriam ut mercedem, atque ut præmium meritum: sed merita non sunt motivum divinæ voluntatis, qua primo intendit gloriam alicui. Quod explicatur exemplo. Si Rex audiens præclara alicujus viri facinora, eumque antecederet vix novit, & propter egregia ejus opera illum ad Reipublicæ munia, ac Magistratus honores promoveat, vult quidem honorem conferre meritis, & sunt hæc causa princeps regis voluntatis. At si Rex inter familiares suos aliquem summo opere diligens velit illum ad gradus ac dignitates promovere, sed quoniam conferuntur strenuis & qui infiora

riora munera obierint, idcirco electo familiari media ministret, quibus dignitatem promereatur, E. G. constituat ducem militiæ, exhibeat illi arma, committat regimen urbium, pecuniam atque indulta largiatur, expletiſque negociis ad præfixum honorem adſumat: tunc certe Rex confert dignitatem ex meritis; ſed *non ex meritis* non appellat beneplacitum Regis, ſed ſolam diſpenſationem mercedis; eo quod familiari ſuo primum liberalem impenderit dilectionem, deinde ex præconcepta intentione omnia illi prædicta media ſuppeditaverit. Hoc ſecundo modo de divina prædeſtinatione diſcurrendum eſſe contendimus. Adde ex Suareſio lib. 2. de Cauſſis Prædeſtin. cap. 23. non ſequi, datur meritum reſpectu gloriæ, quæ eſt effectus prædeſtinationis, ergo datur meritum reſpectu prædeſtinationis quæ eſt cauſſa gloriæ: multæ ſiquidem ſunt cauſſæ effectus prædeſtinationis, quæ non ſunt cauſſæ prædeſtinationis illorum effectuum. Prædicatio enim D. Ambroſii fuit cauſſa converſionis Auguſtini, & converſio Auguſtini eſt effectus prædeſtinationis ejuſdem. At prædicatio Ambroſii non eſt cauſſa prædeſtinationis Auguſtini, ſed eſt effectus ac medium ad converſionem. Eodem modo prædeſtinatio eſt cauſſa gloriæ, merita ſunt media ad gloriam, gloria eſt effectus prædeſtinationis ac meritorum, nec tamen ſequitur merita eſſe cauſſam prædeſtinationis. Denique Adverſarii nonne adſtruunt generalem voluntatem ſalvandi omnes antecedentem ad merita, & tamen docent gloriam meritis iſtis retribui? Nihil ergo nos dicimus de voluntate efficaci, niſi quod ipſi docent de voluntate conditionata.

Opp. 3. Apoſt. ad Rom. cap. 8. ait: *Quos præſcivit, & prædeſtinavit*: Ergo præſcientia meritorum eſt cauſſa prædeſtinationis.

Reſp. 1. diſt. ant. Et nomine præſcientiæ intelligitur actus dilectionis, conc. Intelligitur actus cognitionis bonorum operum, nego. In Sacris literis præſcientiæ nomen ſæpiſſime pro dilectione uſurpatur, ut ad Rom. x1. *Non repulit plebem ſuam, quam præſcivit*. Ad Tim. 2. *Cognovit Dominus qui ſunt ejus*. Mat. 25. *Non novi vos*. Joan. x. *Ego ſum paſtor bonus, & cognosco oves meas*. Hoc pacto in adducto textu nomen præſcientiæ uſurpatur. Primo quia abſolute ponitur nomen præſcientiæ, neque ulla mentio fit meritorum: non enim ait Apoſtolus *quos præſcivit bene viſſuros*: ſed tantum *quos præſcivit*. Deinde quia verbum *præſcivit* particula *Et* copulavit cum verbo *prædeſtinavit*; ita ut unum ſit alterius explicativum ac ſynonymum, ut in lib. 2. de Dono perſev. cap. xv11. aſſerit Auguſtinus. Uſurpant verbum *cognoscere* pro *diligere* etiam latini Scriptores, & Hebræi paſſim. Vide lib. rv. cap. 2. Præterea diſt. conf. Ergo præſcientia eſt cauſſa prædeſtinationis: *præſcientia* perſonæ, quæ opera meritoria factura eſt, conc. *præſcientia* meritorum illius perſonæ, nego. Si velis præſcientiæ nomen pro actu intellectionis accipere, dicam quod Deus præſcivit, id eſt præcognovit

gnovit personas, quas prædestinavit conformes fieri imaginis Filii sui: non quod ante prædestinationem novit earundem personarum merita; quoniam hæc ipse Deus *præparavit in Christo, ut in illis ambulemus*.

Opp. 4. II. ad Tim. 2. habetur: *Si quis emundaverit se, erit vas in honorem*: Vas honoris designat prædestinatum. Ergo ab emundatione vitæ prædestinatio dependet. Resp. dist. & explico textum Apostoli: *Si quis emundaverit se, erit vas in honorem*, quemadmodum ab æterno per gratuitam prædestinationem electus erat, conc. *Erit vas in honorem*, idest locabitur in prædestinatorum numero intuitu prævisæ emundationis, nego.

Opp. 5. Joannis xv. habetur: *Pater amat vos, quia vos me amatis*. Præcedit ergo amor hominum, & causa est amoris divini, atque electionis. Resp. explanando verba Joannis: *Pater vos amat*, idest, majoribus cumulat beneficiis, *quia vos me amatis & credidistis*, concedo: Pater ab æterno amavit vos, quia vos me amaturi eratis in tempore, nego. Istæ, & confimiles Scripturæ phrasæ tantum significant, quod gratia gratiam meretur, ut observat Ven. Beda Homil. super Evang. Domin. ante Ascensionem, & Estius dist. 41. §. vii. ad 7.

Opp. 6. Psalmo 18. legitur: *Intende ad visitandas omnes gentes, non miserearis omnibus, qui operantur iniquitatem*: Deus ergo priusquam misericordiam exerceat, expectat an homines operentur iniquitatem. Resp. dist. ant. Et loquitur Sanctus David de iustitia infligentæ pœnas, quas merentur iniqui, concedo: de misericordia, quæ iniquos prædestinat, nego. Obvius prædictorum verborum sensus est: *Intende ad visitandas omnes gentes*, iustissimis in eas suppliciis animadvertendo, *neque miserearis impiorum*, qui operantur iniquitatem, nisi peccatorum suorum egerint pœnitentiam.

Ultimo opponunt illud Pauli in 1. ad Timoth. 2. *Deus vult omnes homines salvos fieri*. Sed inde tantum consequitur neminem esse, quem Deus voluntate antecedenti nolit salvari: quæ voluntas antecedens respicit omnes, ut diximus libro præced. neque est voluntas illa efficax & absoluta, quæ refertur ad solos prædestinatos, & qua præparantur beneficia gratiarum, quibus electi a perditione certissime liberantur.

C A P U T VI.

Stet ne revera pro hac-Sententia Augustinus.

QUIDAM ex Adversariis fatentur Augustinum gratuitam quidem prædestinationem tradidisse, sed novam invenisse semitam, nova impressisse vestigia: multis ejus sententiam videri horridam atque asperissimam: ex ea multos fideles fuisse turbatos & ad Pelagianos
To. I. *K. k* *de-*

defecisse: ridiculos esse ejus nominis adoratores, qui illum credunt fidelissimum testem antiquitatis. Alii e contra, ne Augustini desertores habeantur, & ne tanti Doctoris videantur abjicere auctoritatem, illum nobis adversari propugnant. Et primis quidem debitam vicem rependit Norisius cap. ult. Vindictiarum; atque supra a me nonnulla quoque dicta fuerunt, unde possit redargui tanta verborum licentia. Nunc contra ceteros de vera Augustini mente disputandum.

PROPOSITIO: S. P. Augustinus docuit apertissime gratuitam prædestinationem ad gloriam.

ARGUMENTUM PRIMUM.

Cum assereret Pelagius prædestinari homines a Deo, quia illos sanctos & immaculatos fore prævidit, S. P. Augustinus ex adverso docuit sanctitatem ac meritum non esse causam prædestinationis, sed potius effectum: Ergo Augustinus tradidit homines ad gloriam gratis prædestinari. Prob. ant. verbis S. P. lib. de Prædest. SS. cap. xviii. *Præsciebat, ait Pelagianus, qui futuri essent sancti & immaculati per liberæ voluntatis arbitrium, & ideo eos ante mundi constitutionem in ipsa sua præscientia, qua tales futuros esse præscivit, elegit. Elegit, inquit, antequam essent, prædestinans filios, quos futuros sanctos, immaculatosque præscivit: utique ipse non fecit, nec se facturum, sed illos futuros esse prævidit.* Hæc est Pelagianorum doctrina. Intueamur ergo (sequitur Augustinus) verba Apostoli, atque videamus, utrum propterea nos elegerit ante mundi constitutionem, quia sancti, & immaculati futuri eramus, an ut essemus? *Benedictus, inquit, Deus & Pater Domini nostri Jesu Christi, qui nos benedixit in omni benedictione spirituali in celestibus in Christo; sicut elegit nos in ipso, ante mundi constitutionem, ut essemus sancti, & immaculati. Non ergo quia futuri eramus, sed ut essemus. Nempe certum est, nempe manifestum est; ideo quippe tales eramus futuri, quia elegit ipse, prædestinans ut tales per gratiam ejus essemus.* Ergo quod aliqui sint sancti & immaculati, atque tales a Deo prænoscantur, per Augustinum non est motivum, sed effectus prædestinationis divinæ.

Dices cum Vasquesio agere Augustinum de prædestinatione ad gratiam, quam negabant hæretici Pelagiani.

Resp. Vasquesium apertissime decipi. Nam Pelagius quadruplex genus gratiæ admittebat. Prima gratia est ipsum liberum arbitrium, ejusque possibilitas: de qua gratia non disputat Augustinus, quia omnibus hominibus communis est, neque ad illam unus præ altero eligitur. Secunda Pelagianorum gratia est remissio peccatorum, de qua pariter non instituitur disputatio, quia Pelagiani asseriebant remissionem peccatorum dari sine meritis, ut scribit S. P. lib. de Grat. & lib. ar.

arb. cap. 6. Tertia gratia Pelagianorum est lex & doctrina; neque de hac ab Augustino præfato loco differitur, quia hæc non minus confertur electis, quam reprobis. Quarta gratia est vita æterna. Gravitam ergo prædestinationem ad ipsam æternam vitam negabat Pelagius, dum affirmabat prædestinationem fieri ex præscientia meritorum; ideoque Augustinus contra hæreticum istum disputat de prædestinatione ad gloriam. Præterea Pelagius arbitrabatur hominem posse sine gratia justificari & salvari, & tamen fatebatur eligi ac prædestinari certos homines præ aliis; ergo dum aliquorum prædestinationem commemorat non de prædestinatione ad gratiam accipiendus est, sed de prædestinatione ad gloriam; & consequenter de hac redarguitur ab Augustino. Rursus Sanctus Pater probat quidem gratis homines prædestinari ad gratiam, sed inter eos qui vocantur gratis, & justificantur, duo distinguit genera, unum eorum qui non perseverant & non coronantur, alterum eorum, qui recipiunt gratiam perseverantiæ, & coronæ, & ait illos, qui secundum propositum vocati sunt, certissime gloriam consequi: *Electi sunt* (inquit proximo capite) *ea vocatione, qua Deus id quod prædestinavit implevit: quos enim prædestinavit, ipsos & vocavit, illa scilicet vocatione secundum propositum; non ergo alios; sed quos ita vocavit, ipsos & justificavit; nec alios, sed quos prædestinavit, vocavit, justificavit, illos & glorificavit: ubi perspicue appellat prædestinationem secundum propositum non prædestinationem ad gratiam, qua plures vocantur & justificantur, sed prædestinationem ad gloriam, qua vocati & justificati glorificantur. Quare utraque prædestinatio per Augustinum præcedit merita.*

Dices 2. Loqui Augustinum de prædestinatione ad initium Fidei contra Semipelagianos.

Resp. neque hanc stare interpretationem: siquidem prædestinatio ad fidem communis est tam electis, quam reprobis.

ARGUMENTUM II;

Augustiniana de prædestinatione secundum propositum evulgata, Sententia, adversus illam multi Massilienses concitati sunt, ut scribit Prosper data ad Augustinum Epistola: *Multi, inquit, servorum Christi, qui in Massiliensi urbe consistunt, in sanctitatis tua scriptis, qua adversus Pelagianos hæreticos condidisti, contrarium putant Patrum opinionem, & Ecclesiastico sensui, quidquid in eis de vocatione Electorum secundum Dei propositum disputasti. Dicebant enim Massilienses, Deum ante mundi constitutionem eos prædestinasse in regnum suum, quos gratis vocatos, dignos futuros electione, & de hac vita bono sine excessibus esse præviderit.* Vides apertissime ab his adstrui prædestina-

tionem ad regnum ex meritorum præscientia. *Hoc autem propositum* (inquiunt) *vocationis Dei, quo vel ante mundi initium, vel in ipsa conditione generis humani, eligendorum & rejiciendorum dicitur facta discretio, ut secundum quod placuerit Creatori, alii vasa honoris, alii vasa contumeliæ sint creati, & lapsis curam resurgendi adimere, & sanctis occasionem torporis adferre: eo quod utraque parte superfluis labor sit, si neque reiectus ulla industria possit intrare, neque electus ulla negligentia possit excidere.* Aiebant quoque removeri omnem industriam, tollique virtutes, si Dei constitutio humanas præveniat voluntates, & sub hoc prædestinationis nomine fatalem quamdam induci necessitatem. Itaque Sanctus Augustinus illam tradidit prædestinationem, ex qua Semipelagiani opponebant consequi libertatis exitum, omnemque removeri humanam industriam: Sed opponebant id consequi ex prædestinatione ad regnum secundum propositum, atque antecederet ad præscientiam meritorum: Ergo Sanctus Augustinus hanc secundum propositum prædestinationem aperte tradidit.

Respondent aliqui Semipelagianos improbasse in Augustino gratuitam prædestinationem ad gratiam, & ad fidei initium, & non prædestinationem ad gloriam.

Verum hi sola lectione Prosperi refutantur. Etenim Massilienses dicebant eos Deum prædestinasse in regnum suum, quos bene operaturos præviderit; dicebant quantum ad Deum pertinet, omnibus paratam vitam æternam; quantum autem ad arbitrii libertatem, ab his eam apprehendi, qui sponte crediderint: dicebant occasionem negligentiae exhiberi per hanc prædicationem propositi Dei, quo fideles fiunt, qui præordinati sunt ad vitam æternam. Atqui prædestinare in regnum, & præordinare in vitam æternam, est prædestinare ad gloriam, non ad gratiam, vel ad initium Fidei: Reprehendebant ergo Semipelagiani in Augustino prædestinationem ad gloriam. Ad hæc reprobabant Massilienses illam prædestinationem, qua ante prævisionem meritorum, est eligendorum atque rejiciendorum facta discretio, & qua alii vasa honoris, alii vasa contumeliæ creati sunt, prout placuerit Creatori: Atqui, ut mox ostendam, non sunt per Augustinum vasa honoris, neque a massa perditionis discreti, nisi qui prædestinantur ad gloriam: Igitur prædestinationem ad gloriam reprobabant in Augustino Massilienses. Demum contendebant Semipelagiani illos prædestinari ad regnum, quos Deus credituros esse præcivit; Augustinus e contra asserbat credituros esse, ac perseveraturos usque in finem, quos Deus secundum propositum prædestinaverat. Igitur Semipelagiani negabant in electis fidem ac perseverantiam esse effectum prædestinationis ad gloriam.

Alii reponunt improbari a Semipelagianis in Augustino prædestinationem ad gloriam, quæ sit ex prævisione meritorum; volebant enim

enim acquiescere, inquit S. Prosper, *Prædestinatum Electorum numerum nec augeri posse, nec minui.*

Sed perperam id reponitur: nam Semipelagiani eam prædestinationem improbabant, ex qua eis videbatur auferri liberum arbitrium, & fatalem necessitatem induci: Atqui hæc absurda Semipelagiani consequi putabant ex gratuita prædestinatione ad gloriam, quæ exercitium antecederet libertatis: Igitur Semipelagiani hanc prædestinationem ad gloriam in Augustino improbabant. Rursus constat ex eodem Prospero Semipelagianos admisisse prædestinationem ex meritis: non ergo reprehendebant in Augustino quod & ipsi probabant. Ulterius dum asserbant numerum electorum posse augeri, & minui, loquebantur de numero electorum ante præscientiam bonorum operum, quæ erant facturi; nam post hanc præscientiam quemadmodum determinata sunt merita, ita determinatus est numerus electorum: Ergo dum negabant prædestinatum electorum numerum nec augeri posse nec minui, loquebantur de sola prædestinatione ante meritum præscientiam.

ARGUMENTUM III.

Illam prædestinationem tradidit Augustinus, qua unus a massa perditionis discernitur, alter in eadem massa relinquitur: At docuit unum discerni a massa perditionis, alterum in eadem massa relinqui per gratuitam prædestinationem ad gloriam: Igitur istam gratuitam prædestinationem tradidit Augustinus. Prob. minor. ex lib. de Corrept. & gratia cap. vii. ubi hæc habentur: *Ab illa perditionis massa, quæ facta est per primum Adam, debemus intelligere neminem posse discerni, nisi quod hoc donum habet quisquis habet, quod gratia Salvatoris accepit.*

Et ne Adversarii respondeant S. Patrem loqui de prædestinatione ad gratiam, qua ex divina liberalitate accepta ex meritum præscientia fit Electorum discretio, operæ pretium est demonstrare, nullo pacto in Augustiniana sententia dici discretos ac prædestinatos, nisi qui æternam salutem infallibiliter consequuntur. Quod probo 1. ex eodem capite, ubi S. Pater docet illos qui non acceperunt perseverantiam finalem, etiam si gratiæ participes facti fuerint, ab illa tamen massa perditionis non esse discretos: *Qui Evangelium, inquit, non audierunt, & qui eo audito in melius commutati perseverantiam non acceperunt... non sunt ab illa conspersione discreti, quam constat esse damnatam, euntibus omnibus ex uno in condemnationem.* Hæc Augustinus. Sane qui in melius commutantur, prædestinati sunt ad gratiam, & tamen de his affirmat S. Pater, non esse prædestinatos, nisi illis donetur perseverantia. Perpicuum est igitur loqui Augustinum de sola prædestinatione gratuita ad gloriam, quæ sola dicitur in ejus libris discretio, De

De hoc Augustiniano testimonio scribit Petavius lib. IX. cap. VI. n. 10. *Dirimenda controversia sufficere potest, si quis minime studio partium obsecutus, sed æquus veritatis arbiter esse velit.*

Sed etiam clariora sunt verba S. Patris in fine ejusdem Capituli, ubi ait: *Qui vero perseveraturi non sunt, ac sic a fide Christiana & conversatione lapsuri sunt, ut tales eos vite hujus finis inveniat; proculdubio nec illo tempore, quo bene pieque vivunt, in isto numero computandi sunt. Non enim sunt a massa illa perditionis præscientia Dei & prædestinatione discreti, & ideo nec secundum propositum vocati, ac per hoc nec electi; sed in eis vocati, de quibus dictum est, multi vocati: & non in eis, de quibus dictum est, Pauci vero electi.* Eadem repetit capite IX. & cap. XII. ubi disertissime docet non pertinere ad numerum prædestinatorum qui aut jacent sub peccato, quod originaliter contraxerunt, aut voluntur per diversas noxias cupiditates, aut gratiam Dei suscipiunt, sed non perseverant, & deserunt ac deseruntur. Demum in hanc gravissimam sententiam prorumpit: *Numerus ergo Sanctorum per Dei gratiam Dei regno prædestinatus, donata sibi etiam usque in finem perseverantia, illuc integer perducetur, & illic integerrimus jam sue sine beatissimus servabitur, adbarente sibi misericordia Salvatoris, sive cum convertuntur, sive cum præliantur, sive cum coronantur.* Omnia verbo dicam. Non sunt per Augustinum prædestinati & electi secundum propositum nisi prædestinati & electi ad perseverantiam & ad gloriam; ita ut qui credunt, baptizantur, & Deo vivunt, sed non habent donum perseverantiæ, Electi non dicantur nisi a nesciis futurorum. Si ergo Sanctus Pater tradidit prædestinationem, & electionem gratuitam; de prædestinatione & electione ad regnum est certissime accipiendus.

ARGUMENTUM IV.

Prædestinatio parvulorum, qui sacro tincti lavacro assumuntur in gloriam gratuita est, & ex nullo meritum intuitu: sed Augustinus ejusdem generis esse contendit prædestinationem parvulorum & adultorum: Igitur gratuitam utrorumque electionem S. Pater asseruit. *Ex duobus itaque parvulis (inquit de Dono Persev. cap. IX.) originali peccato pariter obstrictis, cur iste assumatur, ille relinquatur: & ex duobus etate jam grandibus impiis cur iste ita vocetur ut vocantem sequatur, ille autem aut non vocetur, aut non ita vocetur ut vocantem sequatur, inscrutabilia sunt judicia Dei. Ex duobus autem piis, cur huic donetur perseverantia usque in finem, illi autem non donetur, inscrutabilia sunt judicia Dei. Illud autem fidelibus debet esse certissimum, hunc esse ex prædestinatis, illum non esse.* Hoc loco manifestissimum est S. P. Augustinum loqui de prædestinatione parvulorum qui assumun-

assumuntur in gloriam , & de prædestinatione adulatorum quibus donatur finalis perseverantia ; & consequenter non de quacunque electione ad gratiam , sed de electione ad vitam æternam instituire sermonem. Sed & illud manifestissimum est excludi ab Augustino præscientiam meritum , etiam comparatum per gratiam , tum quod merita ac perseverantiam repetat ex divina prædestinatione , tum quod recurrat cum Apostolo ad inscrutabilia judicia Dei , nunquam vero ad futurorum operum præscientiam .

Pelagiani , qui hoc argumento Augustini magnopere premebantur , ne in parvulis assumptis veritatem faterentur prædestinationis , in reprobatis vero maculam originalis peccati , dicebant illos eligi , istos rejici præscientia operum , quæ facturi erant , si pervenissem ad usum rationis . At S. Pater hanc eorum responsionem pluribus rejicit . i. Quoniam tribuitur Sap. 4. divinæ misericordiæ si rapiat pueros antequam malitia pervertat intellectum eorum ; ideoque peccata quæ prævidentur futura , si diutius viverent , divino non puniuntur iudicio . ii. Quia unusquisque , ut scribit Apostolus in 2. ad Corinth. , ante tribunal Christi stabit , ut referat secundum ea quæ gessit in corpore , non , secundum ea quæ fuerat patraturus , si ultra vixisset . iii. Quod non remittantur per baptismum peccata quæ prævidentur futura : non ergo istiusmodi peccata iudicio Dei puniuntur . *Abhorret ergo* , (ut Augustini utar verbis lib. de Dono Persev. cap. 1x.) *ea Pelagianorum responsio ita a sensibus Christianis , aut prorsus humanis , ut id etiam refellere pudeat* . Legite S. P. & de Prædest. SS. cap. xi 1. & Serm. 26. de Verbis Apost. cap. 12.

Uterius Pelagiani asseriebant parvulos prædestinari ac reprobari propter parentum suorum merita : quod falsum esse pluribus deprehenditur . i. Quia plerunque festinantibus ac paratis ministris , ut baptismus parvulo detur , Deo sic disponente non baptizatus decedit . ii. Quia experientia compertum est ex bonis parentibus improbos gigni filios , ut Absalon ex David ; ex malis procreari bonos , ut Enoch ex Cain , atque ex eodem femore bonos ac malos , ut ex Abraham Ismael , & Isaac . iii. Quoniam contingit aliquando , ut eadem mater alium natum portet ad gratiam , alium invita suffocet : quod merito S. Pater in Dei repperit potestatem , & in altitudinem divinorum iudiciorum .

Reponant rursus hæretici Deum velle quidem omnium parvulorum salutem , sed secundas causas impedire ne ad gratiam perveniant baptismatis . At S. P. Augustinus hæc subterfugia sequentibus verbis retundit : *Neque enim fato cogitur Deus illis infantibus subvenire , illis autem non subvenire , cum sit utriusque causa communis : aut res humanas in parvulis non divina providentia , sed fortuitis agi casibus opinabimur , cum rationales vel damnandæ , vel liberandæ sint animæ , quandoquidem nec passer cadit in terra sine voluntate patris nostri , qui*
in

in cælis est. Cap. xii. de Dono Persev. Ita parvulorum exemplo non solum refutatur hæresis Pelagiana, sed roboratur etiam sententia gratuita ad gloriam prædeterminationis.

Si dixeris prædeterminationem parvulorum gratuitam esse etiam in ordine *executionis*, ideoque non esse normam electionis qua prædestinantur adulti; Resp. *in intentione* & parvulos & adultos prædestinari secundum propositum divinæ voluntatis, & utrisque præparari beneficia certissimæ liberationis, quæ judicio Dei inscrutabili reprobis denegantur: & in hoc eadem est causa parvulorum & adultorum. At media, quæ electos ad beatam vitam perducunt, non sunt prorsus eadem. Parvulis præparatus est baptismus & raptus ante usum rationis: adultis vero baptismus & finalis perseverantia. Ergo illi rapiuntur nondum capaces merendi: isti assumuntur post meritum. Hæc est ratio cur regnum cælorum est corona iustitiæ adultis, non parvulis; licet prædestinatio ad regnum sit gratia tam parvulis, quam adultis.

ARGUMENTUM V.

Hoc est discrimen, ut diximus lib. iv. cap. 8. inter prædeterminationem Angelorum, & filiorum Adæ, quod illis beatitudinis plenitudo fuit *merces meriti*; istis vero est *gratiæ beneficium*. Id ex eo probatur, quoniam contulit Deus creaturæ innocentæ adiutorium, *quo permaneret si vellet*; sed ipsam perseverantiam in ejus reliquit arbitrio. Infirmi autem voluntatis humanæ taliter subventum est, ut per gratiam Salvatoris non solum detur illi *posse perseverare*, sed etiam *perseverantia ipsa donetur*. Hæc capite laudato satis videor mihi demonstravisse. Percipiuntur vero, ut docent Theologi, divina decreta ex qualitate mediorum; & erga eos, quibus conferuntur media indifferentia, datur divina antecedens electio conditionata tantummodo: sed erga illos, quibus donantur auxilia ab intrinseco efficacia & infallibilia, datur prædestinatio absoluta, & a nulla conditione dependens. Igitur quemadmodum prædestinatio Angelorum fuit conditionata & ex præscientia meritorum, quia illis datum est solum *posse perseverare*: ita hominum lapsorum prædestinatio est absoluta & antecedens quæcunque merita, quia istis donatur etiam actualis *perseverantia*. Atque hæc sententia, inquit Ludovicus Habert cap. xix. Paragr. 111. Q. 2., est communis inter Theologos post S. Augustinum lib. de Corrupt. & Grat. cap. x. Quare non videntur cohærere principiis, qui negant in Angelis necessitatem gratiæ efficaciæ, & adstruunt gratuitam eorundem prædestinationem, ut fecit noster Lafosse: sed aut Thomistis, aut Medistis, aut nobis assentiendum est; & in utroque statu debet admitti prædestinatio gratuita cum gratia efficaci, aut conditionata cum gratia versatili; sive in statu innocentie prædestinatio ex præscientia meritorum

torum cum adiutorio *sine quo* , & in statu infirmitatis cum adiutorio *quo* prædestinatio gratuita . Itaque Augustinus , qui in hoc statu efficacem gratiam propugnat , etiam absolutam electionem asserere tenebatur . Sed lege capita 8. & 11. libri IV.

A R G U M E N T U M VI.

Postremo Magnus Augustinus , ut cetera prætermittam , lib. de Prædest. SS. cap. xv. affirmat prædestinationem Christi esse nostræ prædestinationis exemplar : Sed prædestinatio Christi ad unionem hypostaticam , ad sanctitatem , & ad gloriam fuit omnino gratuita : Ergo & talis est Sanctorum hominum prædestinatio : *Est etiam (inquit S. Pater) præclarissimum lumen prædestinationis & gratiæ , ipse Salvator , ipse mediator Dei & hominum , homo Christus Jesus , qui ut hoc esset , quibus tandem suis vel operum , vel fidei præcedentibus meritis natura humana , quæ in illo est , comparavit ? Respondeatur , quæso , ille homo ut a Verbo Patri coæterno in unitatem Personæ assumptus filius Dei unigenitus esset , unde hoc meruit ? quod ejus bonum qualecunque præcessit ? Quid egit ante , quid credidit , quid petivit , ut ad hanc ineffabilem excellentiam perveniret ?*

Adversarii respondent etiam hoc loco Augustinum loqui de prædestinatione ad fidem & ad gratiam : quod probant hoc argumento : Augustinus appellat Christum præclarissimum lumen nostræ prædestinationis & gratiæ : *gratiæ* , inquit , non *gloriæ* . De prædestinatione ergo ad gratiam sermonem habet .

Verum haud operosum erit responsum illam refutare ; cum Augustinus ex prædestinatione Christi inferat eos , qui prædestinati sunt , gratis eligi ad fidem , gratis ad regenerationem , gratis ad finalem perseverantiam ; ita ut ideo credant , ideo speciali vocatione trahantur , ideo in fide ac sanctitate permaneant quia fuerint electi secundum propositum , conformes fieri imaginis Christi , ideoque in electis , & fides , & regeneratio , & perseverantia sint effecta prædestinationis ad Gloriam , non causa . Posteaquam enim S. Pater Exemplum Christi proposuit , enucleate recenset quid Deus Electis suis impertiat , atque primum de Fide inquit : *Sicut ergo prædestinatus est ille unus , ut caput nostrum esset ; ita multi prædestinati sumus , ut membra ejus essemus . Humana hic merita conticescant , quæ perierunt per Adam , & regnet , quæ regnat Dei gratia per Jesum Christum Dominum nostrum* . Posthac de speciali vocatione , qua trahuntur Electi , S. Doctor hæc profert : *Vocat enim Deus prædestinatos multos filios suos , ut eos faciat membra prædestinati unici Filii sui , non ea vocatione , qua vocati sunt , qui noluerunt venire ad nuptias : illa quippe vocatione & Judæi vocati sunt , quibus Christus crucifixus scandalum*

est, & Gentes, quibus Christus crucifixus stultitia est: sed ea vocatione prædestinatos vocat, quam distinxit Apostolus dicens ipsis vocatis Judæis, & Græcis prædicare se Christum Dei virtutem, & Dei sapientiam, sciens esse quamdam vocationem eorum, qui secundum propositum vocati sunt, quos præscivit, & prædestinavit conformes imaginis Filii sui. Insuper de iis, qui hac peculiari vocatione trahuntur, ait Augustinus: *Ad hanc vocationem qui pertinent, omnes sunt docibiles Dei, nec potest eorum quisquam dicere, credidi ut sic vocarer: prævenit eum quippe misericordia Dei, quia sic vocatus est ut crederet. Omnes enim docibiles Dei veniunt ad filium, quoniam audierunt, & didicerunt a Patre per Filium, qui evidentissime dicit, Omnis, qui audit a Patre, & didicit, venit ad me. Istorum autem nemo perit, quia omne, quod dedit ei Pater, non perdet ex eo quidquam. Quisquis ergo inde est omnino non perit, nec erit inde qui pereat.*

Itaque Augustini argumentum erat, Christum Dominum esse prædestinationis & gratiæ exemplum præclarissimum, quoniam sicut ille, nullis præcedentibus meritis prædestinatus fuit ut esset caput nostrum, atque ex hac prædestinatione natus est *de spiritu & virgine absque ullo peccato*; ita qui prædestinati sunt a Deo ut sint membra Christi, non quidem uti sunt fideles reprobi, sed membra, quæ non pereant, nec dividantur a corpore, certa vocatione trahuntur, credunt, regenerantur, ac perseverant, cisque quodlibet peccatum dimittitur. Hunc Augustini sensum aperte exhibent vetustæ sententiæ ante annos 800. ex ejus libris collectæ, & editæ a Sirmondo Tom. 2. pag. 944. Quamobrem S. Pater propugnat, traditque gratuitam prædestinationem ad fidem & ad gratiam, neque id quisquam negat: sed commonstrat simul & fidem & gratiam & vocationem Electorum esse effecta gratitiæ prædestinationis ad gloriam; quomodo nativitas & gratia Christi effectus fuit illius prædestinationis, qua prædestinatus est ut fieret Caput nostrum: atque ex ipsa gratuita prædestinatione ad gloriam probat Augustinus fidem non esse ex nobis, quoniam si ex nobis, nemo prædestinatus esset ad gloriam *secundum propositum*.

Becanus argumento respondet nihil eo concludi, quoniam Christus consecutus est gloriam sine meritis, & nos illam per merita comparare debemus; ideoque de Christo ad homines non valet illatio. Sed Becanus suamet doct. a revincitur. Si enim exemplum Christi allatum ab Augustino non tenet de consecutione gloriæ, quæ nobis repperitur propter merita; accipiendum ergo est de ordine intentionis, in quo ad gloriam prædestinentur electi absque meritorum præscientia. Deinde neque Christus absque meritis omnem gloriam consecutus est, illam præsertim, qua constitutus est Caput prædestinatorum, & Sponsus Ecclesiæ. Etenim legimus in Evangelio: *Nonne oportuit pati Christum, & ita intrare in gloriam suam?* Et de Ecclesia scribit Apostolus,

Quam

Quam acquisivit sanguine suo. Habuit itaque Christus a primo instanti beatitudinem, eamque præcedentem quæcunque merita: sed non habuit omnem gloriæ extensionem, quam sibi promeruit morte, teterimoque Crucis supplicio.

Quod si dicas nonne debet esse discrimen inter prædestinationem Capitis ac membrorum? Imo & maximum: at non situm est in eo quod Christus prædestinatus sit gratis ad gloriam, & nos ad gratiam. Non, inquam, istud intercedit inter nos & Christum discrimen: sed ille ex nullius meritis, nos ex meritis ejus fuimus prædestinati: idque pertinet ad gloriam Capitis, atque ad conditionem membrorum.

SOLUTIO EORUM, QUÆ OBJICIUNTUR.

Opp. 1. S. P. Augustinus lib. 1. ad Simpl. Q. 2. explicans verba Apost. ad Rom. ix. *Ut secundum electionem propositum Dei maneret, ait: Non secundum electionem propositum Dei manet, sed ex proposito electio, id est non quia invenit Deus opera bona in hominibus quæ eligeret, ideo manet propositum justificationis ipsius: sed quia illud manet, ideo invenit opera, quæ jam eligeret ad regnum cælorum: nam nisi esset electio, non essent electi; nec recte diceretur: Quis accusabit adversus Electos Dei? Non tamen electio præcedit justificationem, sed electionem justificationis: nemo enim eligitur, nisi jam distans ab illo qui rejicitur. Unde quod dictum est, Quia elegit nos Deus ante mundi constitutionem, non video quomodo sit dictum nisi præscientia.* Atqui ex his verbis constat electionem a bonis operibus, non a Dei beneplacito petendam esse: Ergo, &c.

Huic argumento non una responsione Theologi occurrunt. Quidam cum Bellarmino respondent Augustinum, dum hæc scripsit, *Non-dam diligentius quæsisse quam sit electio gratiæ, de qua dicit Apostolus: Reliquiæ per electionem gratiæ salvæ factæ sunt:* ut ipse profiteatur lib. 1. Retract. cap. 23. Neque officit quod opponunt Lessius & Vasquez, S. Patrem, in 2. Retract. lib. cap. 2. & de Prædest. SS. cap. 4. affirmare se in libris ad Simplicianum tradidisse veram de gratiæ sententiam: hoc namque perleve est; approbat enim duntaxat quæ scribens ad Simplicianum specialiter pertractaverat, scilicet gratiæ necessitatem, non vero vocabulum *electionis*, quod a se minus recte acceptum testatur. Alii respondent verba Augustini hunc sensum reddere: *Non quia Deus invenit opera bona in hominibus ideo manet propositum, quia hæc bona opera disponuntur ex vi ejusdem propositi, unde non sunt causa ipsius, sed effectus:* ideoque ex hoc loco Augustiniana sententia potius corroboratur: & hac responsione utuntur communiter nostrates. Henricus Florez plurium rationum complexu nititur ostendere præfata verba non ex mente Augustini proferri, sed ex sententia adversario-

rum, quam in sequentibus rejicit, dicens: *Non igitur ex præscientia voluit intelligi factam electionem minoris, ut major ei serviret.* Sunt qui reponant omnem quidem electionem importare distantiam inter eum, qui eligitur & eum qui rejicitur, ut advertit Sanctus Pater; sed necesse non est talem distantiam præsupponi, cum sæpenumero ab ipsa electione caussetur. Nam electio ad gratiam, ut fateri debent adversarii, non supponit in electis distantiam, sed facit; & amor, quo Deus prosequitur creaturam, non præsupponit in ea bonitatem antecedenter ad Dei amorem, sed ipse amor bonitatem creaturæ impertitur. Hæc omnia probabilia sunt, & sufficiunt ad argumenti propositi solutionem.

Sed ego aliter respondendum esse arbitror. Docuit Sanctus Pater duplicem esse electionem, ut demonstrat adversus Vasquesium P. Petavius. Alia est electio antecedens & gratiæ: alia est electio consequens & justitiæ. De priori electione loquitur Augustinus lib. v. adversus Jul. cap. 3. dicens: *Nullum elegit dignum, sed eligendo effecit dignum:* de secunda lib. de Prædest. Sanctorum cap. 17. *Intelligamus ergo vocationem, qua fiunt Electi.* Electio illa præcedit vocationem ac meritum: electio ista meritum & vocationem consequitur: una est causa cur præparentur electis gratiæ beneficia; altera est hujusmodi beneficiorum effectus: per illam electi discernuntur in mente Dei ab æterno; per istam separantur in tempore.

Resp. itaque nullum esse adversus nos propositum argumentum; nam in 1. ad Simplicianum Q. 2. loquitur Augustinus de electione consequenti, non antecedenti. Et constat, quandoquidem S. Pater ait: *Electio non præcedit justificationem, sed electionem justificatio.* Igitur electio, de qua loquitur Augustinus est temporalis assumptio ad gloriam, quæ subsequitur justificationem. Deinde ait: *Nemo enim eligitur nisi distans ab illo qui rejicitur:* in electione autem æterna nullus distabat ab alio, sed omnes in eadem eramus perdicionis massa. Tertio dixerat paullo ante non esse electionem ex præscientia: *Non igitur ex præscientia voluit intelligi Apostolus factam electionem;* igitur dum ait electionem esse ex præscientia, de diverso electionis genere est exponendus. Si autem quæras, cur Augustinus *Electiois* nomen, quo proprie significatur æterna prædestinatio, usurpet ad demonstrandum prædestinationis effectum; tunc respondeo adhuc fuisse ambiguum, num daretur vera Electio inter pares, & nondum diligentius distinxisse inter *Electio-nem* gratiæ, & *Electio-nem* justitiæ, ut animadvertit citato lib. Retract. 1. cap. xxiii. qua distinctione posita araneorum telæ sufflamine dissipantur.

Nota obiter Vasquesium, qui hoc argumento potissimum utitur, exponere Augustinum in aliis omnibus testimoniis de Electione ad gratiam, non ad gloriam. Quare ergo hoc loco de prædestinatione ad gloriam Augustinum interpretatur? Ait Augustinus eadem *Questione* ad

ad Simplicianum, paucis interjectis, prædestinatum fuisse Jacobum liberalitate donorum Dei, non electione meritorum. De qua disputat prædestinatione? Si de Prædestinatione ad gratiam, quare Vasquez detorquet verba Augustini ad solam gloriæ electionem? Si de Prædestinatione ad gloriam, cur non fatetur hanc fieri citra omnem præscientiam meritorum? Sed lege Dionysium Petavium adversus Vasquez differentem lib. IX. cap. XIV.

Opp. 2. Augustinus lib. de Prædest. SS. cap. XIX. asserit prædestinationem; de qua tractat, ad fidem pertinere: *Hoc scio*, inquit, *meminem contra istam prædestinationem, quam secundum Scripturas Sacras defendimus, nisi errando disputare potuisse*: Gratuita prædestinatio ad gloriam non spectat ad fidem: Igitur Augustinus non disputat de gratuita ad gloriam prædestinatione.

Resp. non deesse qui censent Augustinianam de Prædestinatione ad Gloriam sententiam pertinere ad fidem. Nam Patres Synodi Sardinienfis in fine libri de Incarnat. & Grat. id aperte testantur. Claudius Aquaviva in delectu quætionum, de quibus scripsi pag. 416. affirmat hanc doctrinam communiter recipi in Scholis, tradi ab Ecclesiæ Patribus, & semper hujus prædestinationis oppugnatores male audivisse. Ab hac de Prædestinatione sententia Recentiores non sine periculo recedere, scribit ad annum 490. Baronius. De Bellarmino & Simoneto dictum supra. Posset ergo negari minor propositio. Responderi etiam posset spectare ad fidem, in quantum ex veritate irrefragabili, quod finalis perseverantia sit speciale donum gratiæ, ipsa prædestinatio gratuita ad regnum necessaria illatione consequitur. Sed ut nullum de alienis placitis proferamus judicium, dicimus spectare utique ad fidem gratuitam prædestinationem ad gratiam, & de hac etiam pertractare Augustinum; sed illam invictissime comprobare ex divino proposito dandi gloriam, ex quo series omnis gratiarum præparatur Electis; ut argumentis præcedentibus demonstravi. Addunt quidam Augustinum scripisse traditam a se doctrinam pertinere ad fidem, quoniam eo tempore illam oppugnabant foli Semipelagiani.

Prætermitto quæ opponi solent ex libro VI. Hypognosticon, ex quæstione 68. inter LXXXIII. atque ex Propositione LV. in Exposit. Epist. ad Rom. Liber enim Hypognosticon falso tribuitur Augustino. Quæstiones LXXXIII. conscriptæ sunt ante Episcopatum, cum adhuc Semipelagianorum detineretur errore. Quæ vero traduntur laudata Prop. LV. retractantur lib. I. Retract. cap. XXIII.



CAPUT VII.

*Utrum alii ab Augustino Patres hanc sententiam
secuti fuerint.*

UT de aliorum Patrum sententia certum proferatur iudicium, nec non ad ipsorum intelligentiam latissima sternatur via; non abs re factum puto, si pluribus, brevissimis tamen theorematibus quaestionem istam resolvo.

PROPOSITIO I. De Patribus, qui scripserunt ante exortam Pelagianorum hæresim, minus debemus esse solliciti.

Prob. verbis S. Patris lib. de Prædest. SS. cap. xiv. *Quid opus est, ut eorum scrutemur opuscula, qui priusquam ista hæresis oriretur, non habuerunt necessitatem in hac difficili ad solvendum quaestione versari, quod proculdubio facerent, si respondere talibus cogerentur?* Confirmatur hæc ratio exemplo ipsiusmet Augustini, qui antequam cum Pelagianis gloriosum iniret certamen, de prædestinatione non tam exquisitè scripserat, ut vidimus capite superiori. Comprobatur etiam, nam Patres præcedentium sæculorum aut de gratia Dei quid sentirent breviter ac transseunter attigerunt, aut immorabantur disputando adversus alios inimicos Ecclesiæ, aut populum sacris concionibus ad virtutes & orationis frequentiam simpliciter hortabantur; ut scribit citato loco Augustinus.

PROP. II. Si de Græcis loquamur Patribus, non debemus excipere auctoritatem Origenis.

Probatur: nam Origenes Pelagianam doctrinam in libris Periarchon aperte prædocuit: unde Hieronymus in Epist. ad Ctesiphontem: *Doctrina tua, inquit, Origenis ramusculus est.* Deinde Origenis opera, dato gratis, quod olim extiterint pura, ut aliqui autumant, interpolata tamen fuerunt a Rufino Presbytero Pelagianorum, ut appellant, Choriphæo. De S. autem Joanne Chrysostomo putat Vasquez Semipelagianis adhæsisse; sed tanti Patris doctrinam alibi ab erroris suspitione vindicabimus.

PROPOSITIO III. Veteres Patres, qui verbis ambiguis de SS. prædestinatione tractarunt possumus commode exponere, quamquam videantur alicubi a meritum præscientia illam repetere.

Et quidem primo accipere possumus præscientiam operum pro ipsa prædestinatione, ac præparatione divina, sine qua nequeunt merita cogitari. Hinc S. P. lib. 2. de Prædest. SS. cap. xix. ait: *Quid ergo nos prohibet, quando apud aliquos verbi Dei tractatores legimus Dei præscientiam, & agitur de vocatione electorum, eandem prædestinationem intelli-*

intelligere? Maluerunt autem usurpare nomen præscientiæ; quod & facilius intelligatur, & non repugnet veritati; & ne viderentur evertere libertatem, & sentire cum Manichæis, quorum tunc temporis nefaria hæresis grassabatur. Secundo modo possumus PP. exponere de prædestinatione considerata secundum ultimum ac principale effectum, idest quantum ad executionem: uti explicavimus verba Evangelica: *Percipite regnum, quod vobis paratum est ab origine mundi: esurivi enim, &c.* Rursus possumus illos Patres accipere de Electione ac prædestinatione, qua Deus intendit conferre gloriam tanquam mercedem ac præmium meritis comparandis per gratiam præparatam electis ex vi antecedentis propositi, ut diximus in solutione argumentorum, quæ adversus nos obijciuntur ex sacris literis. Denique exponere eos possumus dicendo merita & gratiæ usum habere rationem causæ comparate ad nostram prædestinationem, sed causæ finalis, non efficientis ac meritorie, prout docet S. Thomas *Quæst. xxiii. art. v. dicens: Usus gratiæ prævisus non est ratio collationis gratiæ, nisi secundum rationem causæ finalis*; quia nimirum ad hoc gratia confertur, ut ea bene utamur, quemadmodum scribit Apostolus, Deum nos elegisse ante mundi constitutionem, *ut essemus Sancti & immaculati*. Ad Ephes. cap. 1. 4.

PROPOSITIO IV. Patres, qui floruerunt post Augustinum, gratuitam Prædestinationem apertissime tradiderunt.

Recensebo nonnullos. S. Prosper ad object. Vinc. cap. 2., *Illi, inquit, cum Christo regnabunt, quos Deus gratuita bonitate sua prædestinavit ad gloriam*. Fulgentius ad Monimum lib. 1. cap. 13. *Potuit sicut voluit prædestinare quosdam ad gloriam, quosdam ad pœnam. Sed quos prædestinavit ad gloriam, prædestinavit ad iustitiam; quos autem prædestinavit ad pœnam, non prædestinavit ad culpam*. Gregorius Magnus lib. 1. Dialogor. cap. 8. *Ipsa quoque perennis regni prædestinatio ita est ab omnipotente Deo disposita, ut ab hoc electi pro labore perveniant, quatenus postulando merentur accipere, quod eis omnipotens Deus ante secula disposuit dare*. Bernardus Serm. 78. n. 3. *Intuere nunc mecum in hoc tam magnifico opere nostræ salutis tria esse quædam, quæ sibi vindicat auctor Deus, prævenitque in illis auxiliares & cooperatores suos, prædestinationem, creationem, inspirationem*. S. Thomas Q. citat. ad 3. *Quare hos elegit in gloriam, & illos reprobavit non habet rationem, nisi divinam voluntatem*. Idem docet Petrus Diaconus in lib. de Incarnat. & Grat. cap. 1. Primasius Episcop. Africanus in Epistolam ad Romanos cap. 5. Gregorius VII. in Psalmos Penit. S. Thom. de Villanov. Conc. iiii. de S. Joanne Baptista. Et alii apud Bellarminum lib. 2. de Grat. & lib. arb. cap. x1. Petavium lib. ix. cap. xv1. & Thomassinum lib. vii. cap. 8. Idem tenent Gallicani Antislites in Concilio Valentino iiii. & præsertim Ecclesia Lugdunensis in libro de tribus Epist., & quotquot Augustinianam probavere Sententiam, de quibus dixi in Præf.

Resol-

Resolvitur ex dictis quæstio proposita. Etenim Patres qui floruerunt post hæresim Pelagianam gratuitam prædestinationem eliquatissime tradunt: Alii autem vetustiores vel parem non habent in hac materia auctoritatem, vel possunt commodè exponi. Communi ergo traditione veritas hujus asserti firmatur.

R E S P O N S I O A D O B J E C T A.

Opp. 1. Veteres PP. exponentes verba Apostoli: *Jacob dilexi, Esau autem odio habui*, &c. asserunt id esse dictum ex futurorum operum præscientia. Subscribunt ergo sententiæ repetenti prædestinationem ex meritis. Prob. ant. 1. ex Irenæo lib. iv. adversus hæres. cap. 38. ubi ait: *Ex futurorum præscientia dictum fuit, Jacob dilexi, &c. ii. ex Hieronymo in cap. i. Malach. ubi pariter docet dilectionem & odium Dei ex præscientia operum proficisci. iii. Ex Chrysostomo, qui Hom. xv. in Epist. ad Rom. cap. 8. scribit: Qua igitur de causa hic amor, ille autem odio habendus erat? Quoniam quidem hic malus, ille autem bonus erat.*

Resp. nego ant. si de prædestinatione quantum spectat ad intentionem solummodo proferatur. Et ad primam probat. dico utique ex præscientia futurorum dictum fuisse, *Jacob dilexi, &c.* ut scribit Irenæus, quandoquidem Deus præsciebat quid erat ipse facturus in Jacob per auxilium gratiæ suæ. Hieronymi super Malach. scribentis sensus est: *Deum diligere illum qui odit vitia, sed ut vitium odio habeat efficit Deus ipse potentissimis Auxiliis.* Chrysostomus exponendus est de prædestinatione ad gloriam considerata sub ratione mercedis ac præmii, quo sensu utique meritorum prævisionem importat: sed hæc merita nusquam. Chrysostomus negat præparari a Domino; imo id luculenter affirmat lib. 1. de Provid. & Hom. xii. super illud ad Corinth. vii. *Quid habes quod non accepisti?* Itaque frequentissimam illam propositionem, *Gloria confertur ex præscientia meritorum*, ita distinguimus, ex præscientia meritorum, quæ inducant divinum propositum, nego: quæ ex divino proposito deducantur, concedo. Merita comparantur per gratiam: gratia confertur ex intentione dandi gloriam: gloria præparatur Dei beneplacito, ideoque hinc inferuntur merita, non merita Dei propositum anteverunt. Vide Resp. ad 1. cap. iv.

Opp. 2. Joannes Damasc. exponens ea verba Apost. ad Roman. ix. *An non habet potestatem figulus, &c.* inquit: *Non ipse Deus honorabilia, aut ignominiosa struit vasa, sed propria uniuscujusque electio.* Et lib. 2. de Fide scribit: *Secundum præscientiam suam præjudicavit omnia Deus.*

Resp. priori loco Damascenum non agere de æterna prædestinatione, sed de præsentī merito bonorum operum, per quæ reddit quisque semet-

femetipsum vas honorabile Electione voluntatis suæ: sed hæc voluntas debet a Domino præparari, quod Damascenus minime negat. Alterum testimonium accipiendum est de prædestinatione in ordine executionis; nam paucis interjectis ait *Deum prædestinare aliis præmium secundum bonitatem suam, aliis supplicium secundum justitiam suam*. Adde Joannem Damascenum eodem lib. 11. cap. 30. docere *προγνωσιν*, idest præscientiam esse eorum, quæ libere a nobis fiunt, etiam si hiant divina præordinatione: *προγνωσιν* vero, idest prædestinationem non liberam Electionem finis per Damascenum significat, sed *τὴν ἐν τῷ προγνωσµῷ*, Electionem & opus præscientis: ac propterea prædestinationis nomine Damascenus significat prædestinationem in executione, & nomine præscientiæ prædestinationem in intentione.

Opp. 3. S. Hilarius in Psalm. 64. hæc scribit: *Non res indiscreti iudicii Electio est, sed ex meriti delectu facta discretio est*.

Resp. beatum Hilarium Electionis & discretionis vocabulo non intelligere propositum æternum Dei, sed temporalem assumptionem, qua homo ad uberiores gratiam, vel gloriam eligitur, ut diximus Cap. præced. de Augustino scribente ad Simplicianum. Nam eligere secundum vocis etymon non est præordinare, sed ex pluribus unum legere atque actu carpere. Exponit autem Hilarius versum illum Psalmi: *Beatus, quem elegisti & assumpsisti, inhabitabit in atriis tuis*. Hæc utique assumptio, hæc electio supponit merita; sed hæc merita ab omnium gratiarum largitore pro suo beneplacito præparantur.

Opp. 4. S. Prosper ad xii. Object. Vincent. ait: *Quia præcisi sunt casuri, non sunt prædestinati: essent autem prædestinati, si essent reversuri*.

Resp. prædestinationem dupliciter accipi. 1. Quantum ad Divinum propositum, ut in illis Apostoli verbis: *Quos præcivit & prædestinavit, &c.* 2. Quantum ad manifestationem & signum; ut de Christo Domino apud eundem Apost. *qui prædestinatus est filius Dei, scilicet, manifestatus*. Itaque distingo & explico verba D. Prosperi: Et Sanctus Doctor accipiendus est de prædest. quatenus est electio, & præordinatio divina, nego: quatenus est signum ac manifestatio divinæ præordinationis, concedo. Eodem modo exponendum est vulgare illud prologium, quod circumfertur tanquam Augustinianum: *Si non es prædestinatus, fac ut prædestineris*; nempe, si malis operibus ostendis impium ac reprobum temetipsum, fatage ut te manifestes conversione & exemplo electum ac sanctum. Ceterum Prosperum gratuitam prædestinationem fateri constat ex 1. Resp. ad Ob. Gallorum, & ex universis ejus operibus, ubi Augustini insitens vestigiis, docet quomodo spectet ad inscrutabile Dei iudicium quod unus, non alter eligatur,

Nec discernantur merito qui munere distant, ut inquit in Carmine de Ingratis.

26.J.

M m m

Opp.

Opp. ultimo : S. Fulgentius lib. 1. ad Maximum cap. 24. sic loquitur : *Prædestinavit ad supplicium quos a se præscivit voluntatis male vitio discessuros : prædestinavit ad regnum quos ad se præscivit misericordia prævenientis auxilio redituros* : Ex quibus verbis sic arguitur : Ex Fulgentio prædestinatio ad gloriam se habet quemadmodum prædestinatio ad pœnam : Prædestinatio ad pœnam supponit prævisionem meritorum : Igitur & prædestinatio ad gloriam.

Resp. dist. ma. Prædestinatio ad gloriam se habet quemadmodum prædestinatio ad pœnam, in ordine *executionis*, conc. in ordine *intentionis*, nego. Responsio constat ex dictis. Certe Fulgentius prædestinationem ratione intentionis præcedere docet præscientiam meritorum, cum alibi, tum libro de Fide ad Petrum cap. 3. ubi ait : *Illi cum Christo regnabunt, quos Deus gratuita bonitate sua prædestinavit ad REGNUM.*

C A P U T VIII.

Esse gratuitam prædestinationem rationibus quoque Theologicis consentaneam.

NE quis dicat Augustinianam doctrinam solummodo auctoritate niti, accedit sequens

PROPOSITIO : Gratuita prædestinatio rationibus comprobatur :

Ex plurimis, quæ possent produci, quatuor tantum argumenta, eaque ex dictis notissima, nunc proponam. Sit primum : Divina voluntas homines in perditionis massâ existentes ad gloriam prædeterminans est voluntas absoluta, efficax, & omne meritum antecedens : Ergo prædestinatio est pro hoc statu gratuita. Probo ant. Voluntas conferendi media quæ efficaciter perducant ad finem, supponit voluntatem efficacem & absolutam ejusdem finis : Media quæ Deus hominibus lapsis largitur, ut consequantur salutem, sunt ab intrinseco efficacia, & infallibiliter ad salutem perducunt : Ergo supponunt absolutam & efficacem voluntatem ejusdem salutis. Minor propositio certa supponitur, & probanda est de Gratia Christi, quam pro hoc statu omnes Augustini discipuli efficacem propugnant, & præsertim ad perseverantiam finalem, quæ non donatur nisi prædestinatis : vide interim Arg. 111. Cap. v. 11. Merita quibus ad gloriam pervenitur sunt prædestinationis effectus, efficiuntur namque per gratiam, quæ prædestinatis confertur eo fine ut gloriam adipiscantur : Ergo hæc merita nequeunt habere rationem causæ respectu prædestinationis. 111. Prædestinationis mysterium inscrutabile est, & in altitudinem refunditur divinorum judiciorum. Non ergo pendet ex meritorum præscientia, & ex libero humanæ voluntatis arbitrio.

bitrio . iv. Deus prædestinat quamplures , qui si illorum spectentur merita , criminibus obnoxii sunt atrocissimis , quales fuerunt olim vas Electionis Paulus Apostolus , Maria Magdalena , felix Latro , magnus Augustinus , Joannes Mantuanus , Francus Senensis , Margharita de Cortona , aliique permulti . Igitur non attendit Deus , *qui mel producit de petra , oleumque de saxo durissimo* , merita hominum , ut inferat oleastrum in bonam olivam , & fingat ex Into vasa honoris : sed ipse futura bona opera præparat , ut in illis ambulemus ; &c.

AD CONTRARIA ARGUMENTA RESPONSEO.

Opp. 1. Potest quis efficaciter velle finem , etiamsi ponat talia media , quæ sufficiant ad finem consequendum , nisi aliunde impediatur ; siue postea sequatur effectus , siue non sequatur . Aegrotus enim & medicus volunt efficaciter sanitatem dum ponunt media , quæ illam præstare valent , tamen si quandoque sanitas non habeatur . Potest ergo etiam Deus velle nobis gloriam per modum finis , licet media conferat non efficacia , sed duntaxat sufficientia , talia nimirum , quibus si bene utamur , gloriam consequi possimus .

Resp. nego ant. Etenim voluntas finis non est efficax , quando media ad consecutionem finis necessaria efficacia non sunt . Atque exemplum medici & ægroti in adversarios retorquetur : nam si medicus certo cognosceret medicinam talem esse efficacem , eamque in sua haberet potestate , illam proculdubio exhiberet infirmo , quem efficaciter vellet sanum fieri . Igitur si Deus velit efficaciter gloriam prædestinatis , neque defunt ei certissima remedia liberationis , scilicet gratia victrix , ac perseverantia finalis , media istiusmodi Electis nequaquam denegat .

Opp. 2. Merita hominis lapsi , excepta finali perseverantia , non sunt medium efficax ad gloriam : Ergo etsi Deus operetur in nobis merita nostra per auxilium efficacia gratiæ , non sequitur esse eadem merita prædestinationis effectum .

Resp. quod eo ipso quod finalis perseverantia effectus est prædestinationis , ipsa prædestinatio non fit ex præscientia meritum : siquidem prædestinare ex præscientia meritum , est prædestinare præsertim ex præscientia finalis perseverantiæ . Nam nisi quis prævideatur perseveraturus usque in finem , quomodo meritum intuitu eligeretur ad gloriam ? At perseverantia finalis effectus est prædestinationis ad gloriam ; & consequenter prius est ratione nostra hominem esse prædestinatum , quam prævideri perseveraturum usque in finem . Ergo concedo totum argumentum ; quum sæpenumero multi sint vocati , & iustificati , in quibus nisi sit præparatum donum perseverantiæ , neque vocatio , neque justificatio sunt effectus prædestinationis ; & illis tantum qui sunt prædestinati datur donum perseverantiæ : *Hæc utique dona Dei , quæ*

dantur electis secundum Dei propositum vocatis (in quibus donis est & incipere credere, & in fide usque ad vitę hujus terminum perseverare) hæc inquam Dei dona, si nulla est prædestinatio quam defendimus, non præsciuntur a Deo: præsciuntur autem; hæc est igitur prædestinatio, quam defendimus; S. P. de dono Persev. cap. xvi i. vide Cap. v. Arg. iii.

Opp. 3. Qui prædestinationem gratuitam afferunt, incidunt necessario in illud dilemma, ex quo nunquam sese expedient: Aut prædestinatus sum, aut reprobatus: Si prædestinatus, consequar, quidquid fecero, præparatam beatitudinem: si autem sim reprobatus, damnabor certissime. Quod incommodum in adversariorum sententia vitatur: quapropter verior hæc est, atque rationabilior.

Resp. nego. ant. Nam, ut diximus, quamquam Deus homines gratis eligit, non vult tamen dare gloriam adultis nisi ut mercedem & coronam justitię: gratis enim eligit ad gloriam obtinendam per merita; itaut merita connotent prædestinationis *objectum*, non *motivum*; Quare Prædestinationis actus gratuitus quidem est, sed *objectum*, ut inquirunt, *onerosum*. Neque dicas fieri non posse, ut actus prædestinationis sit liberalis intentio, complementum vero non exigit meritorum conditionem. Cum enim hæc merita comparentur per gratiam beneplacito divino collatam, non tollunt liberalitatem prioris intentionis, ut explicatum est Cap. iv. in Resp. ad 1. Hujusmodi argumentum ex Semipelagianorum latebris erupit, ut scribit in Epist. ad Augustinum beatus Prosper. At S. P. lib. de Dono Persev. cap. xv. sic illud in Adversarios contorquet: *Nonne si Deus illos bonos futuros esse præscivit, boni erunt, in quantalibet nunc malignitate versentur: si autem malos, mali erunt in quantalibet nunc bonitate cernantur? Nunquid ergo propter hujusmodi causas ea, quę de præscientia Dei vera dicuntur, vel neganda sunt, vel tacenda: tunc scilicet, quando si non dicantur, in alios itur errores? Nimirum tenentur adversarii eidem respondere argumento, cum tam sit certa & invariabilis Dei præscientia quam ipsi negare non audent, quàm Dei prædestinatio, quam nolunt fateri. Ac multo magis retorquetur argumentum de gratia congrua, quam recentiores excogitarunt.*

Appellatur præfatum argumentum *Rustici*, cui rudibus quoque exemplis est respondendum, E. G. aut hac infirmitate morieris, aut non: cur ergo ad sanitatem uteris medicamentis? Certa est futuri anni segetum copia: quare seris & occas? Vel manus afferent fures, vel parcent tabernę foribus; & quid invigilas mercimoniis? Tentanti diabolo simplicem quoque anachoretam feruat respondisse: sum aut Electus, aut reprobus; frustra ergo mib. ad peccandum sollicitas, insidiasque moliris. Vide Cæsarium lib. 1. c. 27. Itaque operibus bonis incumbendum est: nam Deus misericors est simul, ac justus; & licet nos præveniat ut misericors Pater, reddet tamen coronam ut justus Iudex.

Opp. 4.

Opp. 4. Non est Dei voluntas irrationalis : debemus ergo aliquam ipsius causam assignare .

Resp. seclusa consideratione meritorum dari causam prædestinationis , si consideretur absolute , & hanc esse , *ut ostendat divitiar glorie suæ in vasa misericordie* : at si prædestinatio accipiatur comparative , idest , si quæras cur ex eadem massa unum eligat , non alterum , quam causam inquiris præter divinam voluntatem ac potestatem ? *An non habet potestatem figulus lutum ex eadem massa facere aliud quidem vas in honorem , aliud vero in contumeliam ?* Ita respondet Apostolus ad Rom. ix. *Contra istam veritatis tam claram tubam quis homo sobrie vigilantisque fidei voces ullas admittat humanas ?* S. P. Augustinus De Dono Persev. cap. vii.

Addo argumentum , si quid habet roboris , evertere etiam prædestinationem ad gratiam .

Opp. 5. Si Deus unum præ alio eligeret absque meritorum intuitu esset personarum acceptator : Ergo . &c. Prob. ant. Acceptator personarum ille dicitur , qui æqualibus inæqualia dispensat : At Deus in sententia hac nostra æqualibus , nempe in eadem massa constitutis , inæqualia præberet ac præpararet , uni scilicet gratiam finalis perseverantiæ , alteri auxilium tantum sufficiens ; illi gloriam , huic gehennam . Igitur esset acceptator personarum .

Resp. nego seq. ad prob. dist. ma. Acceptator personarum ille est , qui æqualibus inæqualia largitur , & alicui debitum fraudat , concedo : Si nulli fraudet debitum , sed ex misericordia det uni quod ei non debetur , & ex iustitia reddat alteri quod debetur ; nego quod sit personarum acceptator . *Acceptio personarum* (ait S. P. lib. 2. ad Bonif. cap. 7.) *ibi recte dicitur , ubi ille qui judicat relinquens causam meritorum , de qua judicat alteri , contra alterum suffragatur , quia invenit aliquid in persona quod bonore vel miseratione dignum sit . Vbi autem est commune delictum & nullum meritum , acceptio personarum nequit esse .* Affert ibidem S. Pater exemplum duorum debitorum , quorum uni creditor remittit debitum , ab altero autem exigit : idque absque ulla iniquitate & acceptione personarum . Videte in lib. de Dono Persev. cap. vii. explicationem parabolæ Matth. xx. ubi pater familias querulo cuidam operario dixit : *Nonne ex denario convenisti mecum ? Tolle quod tuum est , & vade : volo autem & huic novissimo dare sicut & tibi . Aut non licet mihi quod volo facere ? an oculus tuus nequam est , quia ego bonus sum ?* Legite & in Epist. ad Sixtum exemplum parvulorum , in quibus Pelagiani hujus argumentationis vires perdunt . Sciscitamini demum , an sit acceptatio aliqua personarum uni gratiam congruam largiri , & illam alteri denegare ?

Opp. 6. Prædestinatio juvatur precibus & orationibus Sanctorum : Aliquam ergo habet causam .

Resp.

Resp. dist. ant. Juvatur Sanctorum precibus quantum ad *consecutionem* effectus, conc. quantum ad *intentionem* conferendi gloriam, nego.

Opp. ultimo: Gratuita prædestinatio destruit libertatem: non est igitur defendenda. Prob. ant. Si prædestinatio est gratuita, decretum divinum antecedit omnem actum voluntatis creatæ, eam prædeterminat, & salus consequitur infallibiliter & ex necessitate: neque obistere potest voluntas, alias posset frustrari ipsum divinum decretum, quod est omnino immutabile.

Ad argumentum istud cūsum, ut constat ex dictis cap. 5. arg. 11.; in officinis Massiliensium, respondeo nego ant. ad prob. dist. antecedens. Decretum divinum antecedit ac prædeterminat voluntatem creatam, prædeterminatione, qua inspirando Sanctam delectationem vehementem quidem, & corda trahentem, sed nullum necessitatis vinculum imponentem libertati, Deus facit ut faciamus, ut in præceptis ejus ambulemus, ut vitemus peccata, a quibus liberum est abstinere; concedo antecedens. Decretum divinum antecedit, ac prædeterminat voluntatem creatam, prædeterminatione, qua aut se facit ad faciem manifestando, aut plenissima boni delectatione trahendo, aut externa vi compellendo reluctantes, Deus liberum arbitrium necessitate constringat; nego antecedens. Doctrina est Adversariorum nostrorum, præscientiam, quamquam antecedens est, non tollere libertatem, quia nihil efficaciter in hominum arbitrio operatur: & constans est assertio nostra, Prædestinationem & decretum Dei efficax libertatem non evertere, sed perficere, quia ita efficaciter per inspirationem caritatis operatur, ut cum indifferentia, & potestate ad oppositum eidem liberum arbitrium cooperetur; quemadmodum explicavi postremo capite lib. iv. & repetam differens de libero arbitrio, & exagitando Hæresim Pelagianam.

C A P U T IX.

Argumenta, quibus permotus Petavius Augustinianam retractavit sententiam, eodem Auctore solvantur.

GRAVISSENUM clarissimumque Theologum Petavium decimo Theologicorum Dogmatum libro Augustinianam de prædestinatione retractavisse sententiam, quam præcedenti egregie propugnaverat, jam in præfatione præmonui. Ne quis id factum arbitretur rationibus invictissimis, quamquam muni vi satis Scholarum nostrarum assertum, ad uberiorem noticiam argumenta Petavii referam quam brevissime, neque alio Magistro, quam Petavio ipso, refellam.

I. Libro x. cap. 1. num. 3. ait verbum *ἐξέλεον*, significare aliquando prædestinationem citra merita, & usum voluntatis: unde eo verbo utitur Apostolus ad Rom. cum de Christo loquens dicit, *prædestinatum esse*

esse filium Dei in virtute . At verbum *ἐκλογισθῆναι* non absolutam Dei voluntatem designat , sed eam , quæ supponit singulorum merita ; nam in 1v. Aët. Apost. ubi legitur de nefario Judæorum facinore : *manns tua & consilium tuum decreverunt fieri* ; ibi est verbum *ἐκλογισθῆναι* : idem scilicet cum priori sola addita propositione . Nullus igitur sanus ac sobrius ex illis verbis potest liquido iudicare , qualis sit Sanctorum prædestinatio .

Resp. lib. ix. cap. i. num. 2. ait Petavius : *Itaque quod ἐκλογισθῆναι scriptum est in loco illo primi ad Romanos Capitis ; Qui prædestinatus est filius Dei in virtute , Latinus noster vertit , quasi esset ἀπολογισθῆναι ut est in nono capite , Quos præscivit & prædestinavit* . Atqui loco illo primi capitis significatur prædestinatio citra præscientiam meritorum : igitur verbum *ἐκλογισθῆναι* , non significat decretum , cujus causa pendeat ex hominum voluntate , atque ex humano arbitrio rationem , & originem habeat sui . Præterea , ut seq. num. dicam , juxta Petavium Apostolus verbo illo *ἐκλογισθῆναι* significat prædestinationem ad legem atque Evangelium : quæ proculdubio est citra humanorum meritorum præscientiam : itaque eodem verbo designatur sola gratuita prædestinatio . Neque contrarium evincunt verba Aët. 1v. 27. , cum referantur ad Redemptionem humani generis sola Dei voluntate prædefinitam , non ad Judæorum , vel Gentilium nefarium facinus ; ut vidimus lib. 1v. cap. 7. Sed hæc perlevia sunt , & tam verbum , *ἐκλογισθῆναι* , quàm *ἐκλογισθῆναι* solum prædestinationem significare concedimus : sed Apostolus loquitur de prædestinatione *κατὰ πρόβλεπον* , secundum propositum , versu præcedenti ; & de ea , per quam : *cujus vult miseretur , & quem vult indurat* , seq. cap. ix. v. 18. .

II. Observat Petavius Apostolum in Epist. ad Romanos exemplo Jacob & Esau velle tantum ostendere vocationem ad legem & Evangelicam gratiam , quæ utique est ex sola voluntate Dei . Sed minime sequitur , ex solo Dei proposito homines eliguntur ad gratiam ; ergo & gratis prædestinantur ad gloriam : quemadmodum non sequitur , Judas electus est ad Apostolatam : igitur est etiam prædestinatus ad regnum . Ita ratiocinatur Lib. x. cap. i. n. v. .

Resp. lib. ix. cap. xii. n. 3. ait Petavius : *Quod ad Romanos scribens Apostolus breviter accurateque verbis istis explicat* : Nam quos præscivit , & prædestinavit conformes fieri imaginis filii sui . Hoc vero non minus in iustitia , quàm æterna gloria consistit . Et paucis interjectis , *Elegisse Deum asserit suos , ut Sancti sint & immaculati ; tam ut adoptivi sint per Christum filii , non qualicunque modo , sed ut perfectam in se Dei , ac Christi similitudinem referant* . Id enim filiorum natura postulat . Quod Petavius probat non ex solo Augustino , sed luculentissimis Scripturis , & Veterum testimoniis : & concludit prædestinationem , de qua loquitur Apostolus , perinde Sanctitatem & gratiam ,

ac salutem & gloriam importare. *Nam utraque nos Deo similes facit : utraque simul a massa damnata liberat.* Hæc Petavius. Loquitur ergo Apostolus de prædestinatione ad legem, & gratiam Evangelicam, & simul ad gloriam; & ex una infertur alia, non in singulis qui credunt & vocantur, sed in his qui sunt prædestinati *conformes fieri imaginis filii Dei.* In qua prædestinatione non comprehenditur Judas: & ideo non sequitur, Electus fuit ad Apostolatam; Ergo & ad regnum. In prædestinatione enim gratia & æterna felicitas colligantur; quoniam illa, confertur electis ex certo Dei consilio & proposito dandi æternam felicitatem. At proditoris Judæ vocatio nullum habuit ad æternam gloriam ex divino proposito ordinem ac respectum: ut erudite Petavius sequenti num. 1v.

III. Ex consuetudine, inquit, Scripturarum odium Esau nonnisi minorem significat dilectionem. Neque Dei propositum quod commemoravit Apostolus absoluto suffragatur decreto. Aliorū enim trahuntur hæc verba etiam ab ipsomet Augustino lib. 1. Q. 2. ad Simplic.; antequam ad alteram descisceret opinionem. Explicandum est ergo Dei propositum cum prævisione voluntatis ejus, qui eligitur. Ita lib. x. cap. 1. num. vii.

Resp. Scripserat ibidem paullo ante Petavius: *Vti Jacob nullis suis meritis divinum illum favorem obtinuit, fratri ut suo anteponeretur: quo ex favore & gratia promissam Palestina regionem pinguem & uberem est adeptus: Esau vero nullis item meritis suis hocfortunio percussus est, ut sterilem & incultam solitudinem possideret. Sic & Judæorum olim populus nullis suis officiis hanc a Deo gratiam emeruit, ut legis, Sacramentorum, ac regni Dei compos & hæres esset.* Igitur etiam si Esau, ac reprobi a Deo aliquo diligantur amore; nam & ipsis plurium gratiarum dona impertitur: etiam si dicas Esau probabiliter saluum cum Estio, Platelio, aliisque, parum id refert. Ratiocinatur Apostolus procedens de literalis sensu ad mysticum: Jacob nullis meritorum officiis electus fuit ad uberrimam regionem Palestinæ; Nulla ergo prævisione meritorum prædestinantur electi ad cælestis Jerusalem possessionem, cujus typum gerebat terra Chanaan. Augustinum in lib. 1. ad Simplic. loqui de sola electione consequente demonstrat Petavius lib. 1x. cap. xiv. probatque eo loco gratuitam prædestinationem, magnopere adjuvari. *Quæ ergo fronte scribit Augustinum ab opinione, quam tenebat descivisse, notata in margine questione ad Simplic. 2. Illa duplici electione, quam Petavius maxime probat lib. 1x. cap. xii. n. vii. Græcorum Patrum, & Augustini ad Simplic. sensa explicantur. De Vasquesio hujus loci præsidium sibi advocante, Quid aliud scribit Petavius citato cap. xiv. n. xi. quàm non expendisse verba illa Augustini, Vasquesiam, aliosque putandum est? Vide num istorum albo sese præclarissimus Scriptor accenseat.*

IV. Massam

IV. Massam luti, ex qua figulus pro sua potestate fingit vasa honoris & contumeliæ, Augustinus absoluti decreti propugnator accipit pro multitudinc hominum peccato contaminata, sed ex adverso stat Chrysostomus Hom. 16. in Epist. ad Rom. pag. 142. Hieronymus in Epist. 150. ad Hedibiam. Ita Commentator Ambrosii, Origenes, Tertullianus, Methodius, Theodoretus, & alii, qui docent totum inter vasa discrimen petendum ex hominum voluntate. Ita lib. x. cap. 1. num. 1x. & seq.

Resp. Affirmat Petavius lib. 1x. cap. vi. n. 1., cum de gratia, vel electione ac prædestinatione disputandum est, majorem haberi rationem Latinorum Patrum, quam Græcorum, atque inter illos principem consensu Theologorum esse Augustinum, propterea quod hæresis Pelagiana magis aliquanto Latinam, quam Orientalem exercuit Ecclesiam, & adversus illam acerrime Augustinus pro Catholica Fide pugnavit. Cur ergo Augustino ceteros præfert? Cap. xvi. num. 11. ait Hieronymum in Epist. ad Hedibiam *Apostoli verba minus commode interpretatum*. Sed manifestum est loqui Hieronymum de electione consequente, & de prædestinatione *quæ liberum servat arbitrium*. Eodem cap. num. 1. demonstrat Petavius Ambrosium sententiæ Augustini minime refragari; quod eodem momento Deus prædestinatos elegerit, & decreverit pro meritorum magnitudine majorem, minoremve mercedem. Addit, quod eruditis omnibus compertum est, præcitatō Commentarios non esse Ambrosii. Divum Joannem Chrysostomum nobis adversari revera arbitratur Petavius: sed tamen hunc alioque debemus accipere de electione, qua unus præ alio assumitur, præsertim cum Chrysostomus rejiciat scientiam, quam vocant conditionatam, auctore ipso Petavio cap. 11. num. 1x. Sed de Patrum cum Augustino consensu dixi superiori cap. vii.

V. Quæ scribit Apostolus ad Ephes. 1. v. 4. *Elegit nos in ipso ante mundi constitutionem, ut essemus Sancti & immaculati in conspectu ejus in caritate*; Augustinus ad prædestinationem retulit. Sed Paulus de sola electione intelligendus est, quam ipse declarat, dicens, *ut essemus Sancti*; quod facit & in cap. 8. ad Romanos scribens: *Nam quos præcivit, & prædestinavit conformes fieri imaginis Filii sui*: quæ verba de sola electione ad fidem prolata frustra pro absoluto decreto, quo & gratia & gloria nectuntur, solent obtendi. Ita lib. x. cap. 1. n. xiv.

Resp. Hæc sunt verba Petavii lib. 1x. cap. xii. n. 3. *Hinc ab eodem Apostolo scriptum est alibi*: Sicut elegit nos in ipso ante mundi constitutionem, ut essemus Sancti & immaculati in conspectu ejus in caritate: *Mox vero*: Qui prædestinavit nos in adoptionem filiorum, per Jesum Christum, in ipsum, secundum propositum voluntatis suæ. *Elegisse Deum asserit suos, ut Sancti sint, & immaculati: tum ut adoptivi sint per Christum filii, non qualicumque modo, sed ut perfectam*

To. I.

N n n

in

in se Dei ac Christi similitudinem referant. Id enim filiorum natura postulat Joannes vero perfectam cum Deo similitudinem (quam filiorum naturam conditionemque propriam esse dixi) sic in futura vita pollicetur, ut in hac interim esse nos Dei filios asseveret: *Carissimi, nunc filii Dei sumus: & nondum apparuit quod erimus. Scimus quoniam cum apparuerit similes ei erimus; quoniam videbimus eum sicuti est.* Hactenus Petavius. Itaque electio, de qua Apostolus ad Ephes. 1. & ad Rom. viii., ex mente Petavii est gratuita: Hæc electio est ad perfectam Christi similitudinem, quam nobis Joannes pollicetur in futura vita: Ergo electio ad perfectam similitudinem Christi in futura vita obtinendam est gratuita.

VI. Apostolus electionem refert ad incomprehensibilia judicia Dei, ad Rom. xi. 33. Electio autem ad gloriam non spectat ad incomprehensibilia judicia Dei, in Scripturis enim Deus patefecit, quod pro eo ac quisque gessit in corpore recepturus est in iudicio. Igitur de electione ad fidem, & ad Christi notitiam intelligendus est D. Paulus: nam hujus electionis causa nemini comperta est.

Resp. Hæc habet Petavius lib. ix. cap. viii. num. iv. *Sit enim verior illa sententia, quæ Deum mortales omnes salvos esse velle definit, ex eoque decreto sufficientem omnibus ad illam adipiscendam vim & auxilium sufficere: postea, ut quisque concessis sibi adjumentis uti voluerit, aut noluerit, ita eligi vel reprobari: tum profecto si quis iniquum id esse Dei arbitrium censuri vellet, non exceptione ac per-
scriptione illa summovendus esset adversarius, quæ usus est Apostolus, nec arcanorum Dei judiciorum altitudo commovenda: sed recta & facilis esset illa defensio, ac communibus hominum sensibus aptior; ideo justam esse Dei in utramque partem sententiam, quod & illos qui invitati paruerint ad cæleste convivium admiserit, & eos qui perinde vocati renuerint excludendos censuerit.* Salvatur ergo in Augustiniana Sententia, auctore Petavio, arcanorum judiciorum impenetrabilis altitudo. Vide cap. viii. in Resp. ad iv.

VII. Universæ viæ Domini sunt, ut habetur in Ps. 24., *miseri-
cordia, & veritas.* Ubi de misericordia agitur, non est locus inquisitioni meritorum, nec repetuntur rationes; quod ex Sacris literis accepimus pertinere ad vocationem & gratiam: sed vicissim Scripturæ ipsæ nos docent, gloriam meritis Sanctorum ex justitia deberi. Id nos admonet Paulus 2. ad Corinth. 9. & 2. ad Timot. 4. Id Parabolæ patrisfamilias conducentis operarios in vineam, & illius qui peregre abiturus pecuniam servis distribuit. Id forma judicii a Matthæo cap. xxv. descripta, & alia fere innumera, quæ studiose collegit Lessius. Ita. lib. x. cap. 11.

Resp. Legimus apud Petavium lib. ix. cap. xi. num. 2. *Deum itaque putandum est selectis illis & eximiiis, quos ex infestis primi pa-
rentis*

ventis scelere massa liberavit, æternam salutem band absolute destinasse; sed modo quodam ac via comparandam. Non enim gratis, ac tanquam liberale aliquod munus hanc illis decrevit dare; sed ut bravium ac merces bonorum esset operum iis, quibus per ætatem sic assequi liceret. Nam de parvulis, quos ante usum rationis

Abstulit atra dies, & funere merfit acerbo,
Aliter existimandum est. Docet consequenter per Augustinum gloriam esse coronam justitiæ, & tamen prædestinationem ad gloriam Dei esse ex beneplacito; quoniam divina voluntas non est de salute electorum simpliciter, sed simul & pro indiviso gloriam & gratiam dare constituit, ita ut adjumentorum series, quibus ad merita & Sanctitatem adducimur, nobis ex divino proposito conferantur. Addit n.vi. adversarios nostros in quadam latebra captionis versari, & gratuiti vocabulum ab objecto ad Deum agentem transferre. Quare ambæ viæ Domini, misericordia & veritas, in Augustiniana doctrina late patent; & aurea quadam catena beneficia connectuntur misericordiæ, & retributiones justitiæ. Misericordia Domini est, quod nulla ex nobis occasione captata aliquos eligat, & omnem seriem præparet adjumentorum: justitia vero quod meritis vitam æternam rependat. Sed de his actum a nobis quinto Capite. Transfit deinde Petavius ad probandam generalem in Deo voluntatem salvandi omnes, & Salvatoris nostri pro singulis hominibus mortem: quæ duo nos absque præjudicio gratitiæ prædestinationis fatemur esse certissima.

Prætermittendum non est Augustini a veteribus Patribus dissonantiam objectasse primum Semipelagianos, deinde eam afferuisse in Annalibus Belgicis Hugonem Grotium, & lib. vii. Historiæ Pelagianæ Gerardum Vossium, postea solemnissimum incensorem Joannem Launium. At omnium jacula retundit ipsemet Augustinus in lib. de Prædest. SS. cap. xiv.; & cuique horum respondet in vulgatissimo Epigrammate beatus Prosper:

*Te stylus iste
 Conficit, & verbis perderis ipse tuis.*

C A P U T X.

Christi merita nostræ prædestinationis esse causam.

SALVARI omnes prædestinatos beneficio mortis Christi nemo Catholicorum in dubium vertit. Solus enim propter salutem nostram. Crucis patibulum subiit

*Eripienti quidquid veteris migraverat hostis
 In jus, per nostrum facinus, cum femina prima*

N n n 2

Præc-

Præceptum solvens culpa nos perpetue vincit.

Inquit Carmine xvi. Apollinaris Sidonius. Illud tantum quaeritur, an Electionis Sanctorum, merita Christi causa fuerint, an vero illam sint subsecuta, ut diximus de illorum auxiliorum complexu, quibus pervenitur ad gloriam, & quæ causa sunt meritorum, sed electionem ac propositum Dei consequuntur.

PROPOSITIO: Fit ex Christi meritis prædestinatorum electio.

Tradit hanc propositionem Apostolus, qui in Epist. ad Ephes. cap. i. ait: *Benedictus Deus, & Pater Domini nostri Jesu Christi, qui benedixit nos in omni benedictione spirituali in caelestibus, sicut elegit nos in ipso ante mundi constitutionem, ut essemus Sancti & immaculati in conspectu ejus in caritate. Qui prædestinavit nos in adoptionem filiorum per Jesum Christum, in ipsum, secundum propositum voluntatis suæ.* Constat etiam ratione: nam Christus nobis promeruit omnes prædestinationis effectus, idest gratiam, justificationem, ac finalem perseverantiam, dicente eodem Apostolo: *Creati sumus in Christo in operibus bonis, ut in illis ambulemus.*

Opp. 1. Ipse Salvator est prædestinationis nostræ exemplar lumenque præclarissimum, ex Augustino cap. xv. de Prædest. SS. Sed prædestinatio Christi est omnino gratuita & respectu sui ipsius, & respectu alterius: Ergo & nostra.

Resp. dist. majorem Prædestinatio Christi est exemplar prædestinationis nostræ, ita ut ille sit mediator Dei & hominum, primogenitus prædestinatorum & Caput Ecclesiæ, nos vero filii adoptivi, palmites, & membra; conc. Ita ut pares simus dignitate, neque nos ab illo redemptionem, gratiam, ac spiritualem vitam participemus, nego. Sed vide cap. vi. arg. ult.

Opp. 2. Mors Christi & meritum ipsius medium est, quo salutem consequimur: Sed, ut dictum supra, Deus, ratione saltem nostræ, prius vult finem, quam media: Voluit ergo prius salutem hominum, quam mortem Christi, & consequenter hæc nequit esse prædestinationis nostræ causa ac motivum.

Resp. Principio Deum prædestinasse numerum Electorum etiam permanente statu innocentie, ut scribit S. P. lib. xiv. de Civit. Dei cap. x. Deinde quantum spectat ad creaturam innocentem, quoniam hæc indigebat sola gratia versatili, decretum tulit Angelos hominesque salvandi conditionatum, non efficax. Ad hæc cum prius vellet ostendere quid posset liberum arbitrium, deinde beneficium gratiæ suæ; permittit innocentem creaturam delinquere. Definivit postmodum Incarnationem æterni Verbi ad reparandum humanum genus, oblatumque pretium mortis suæ pro universorum redemptione suscepit. Voluit denique ex redemptis hominibus, & in jus hæreditatis misericorditer restituitis, instaurare numerum prædestinatorum, a quo per libe-

rum

rum arbitrium homo prævaricator exciderat : atque ut superabundaret gratia ubi abundavit delictum , non solum voluit quod possint omnes salvari , sed certos statuit liberandos a perditione , quibus beneficia specialissima præparavit . Ita mors Christi , ejusque meritum est causa nostræ prædestinationis , non quidem quatenus Deus determinavit numerum Electorum , sed quatenus hunc numerum ex hominibus a Christo redemptis voluit efficaciter instaurare . Igitur distingo consequens : Deus prius voluit mortem Christi , quàm numerum prædestinatorum , nego consequentiam : quàm instaurationem hujus numeri , concedo .

Resp. 2. Deum voluisse hominum redemptionem , & propter hanc decrevisse Incarnationem Verbi : deinde vero ex redemptis hominibus aliquos prædestinasse , & intuitu passionis Christi his auxilia efficacia , præparavisse . Habent ergo Christi merita rationem medii si comparentur ad redemptionem humani generis : & rationem causæ , si referantur ad absolutam electionem aliquorum ex numero Redemptorum .

C A P U T XI.

De Sanctorum pro Electis intercessione .

QUÆRITUR nunc utrum Sanctorum precibus Prædestinati juvari possint , non quantum ad divinum propositum , sed quantum spectat ad consecutionem salutis .

PROPOSITIO : Utiles sunt prædestinatis Orationes Sanctorum .

Id cum Scripturis , tum exemplis probatur . Scripturis quidem ; nam in Canonica Epistola Jacobi legimus : *Orate pro invicem , ut salvemini* . Exemplis autem ; nam propter orationes beati Stephani Saulus Ecclesiæ persecutor in vas Electionis , Fideique Præconem , & propter lacrymas precesque piissimæ Matris Monicæ S. Pater Augustinus de servitute Babylonis in civem fidelissimum supernæ civitatis Jerusalem , vocati sunt . Hæc vero non ita dicta sunt , quasi orationes Sanctorum promereantur nobis omnes omnino prædestinationis effectus ; quandoquidem & ipsa Oratio Sanctorum inter istiusmodi effectus connumeratur : quatenus E. G. ex proposito salvandi Saulum & Augustinum , decrevit Deus ut pro illo positis genibus clamaret beatissimus Protomartyr ; pro isto piissima parens assiduis fletibus ingemisceret .

Ob. 1. Oratio SS. vel est pro aliquo particulari , vel pro omnibus in communi , vel pro aliquo indeterminate : At nullo ex his modis confert ad nostram prædestinationem : Ergo , &c. Prob. min. nam cur Deus in particulari hunc , non illum trahat , nullam habet causam , nisi voluntatis suæ beneplacitum : ideoque oratio Sanctorum pro aliquo in particulari inutilis est , & frustranea . Rursus frustranea est , & inutilis pro

pro omnibus in communi, cum non salventur omnes, sed plurimi reprobentur; quod spectare ad perfectionem universi, multi Theologi affirmant. Postremo oratio pro aliquo indeterminate nullam requirit efficacem intentionem conferendi gloriam. Igitur, &c.

Resp. Juvvari orationibus Sanctorum prædestinationem nostram, non quod per eam divinum immutari possit decretum: sed quoniam prædefinita est tanquam medium, quo comparatur prædestinationis effectus, scilicet detestatio peccatorum, justificatio, ac finalis perseverantia. Sive ergo pro aliquo in particulari, sive indeterminate Sancti orent atque intercedant, non agunt frustraneæ; est enim illorum oratio, non ad divinum propositum ordinata, sed ad consecutionem finis, quem Deus mediis causis obtinendum esse decrevit.

Opp. 2. Illud, quo posito, vel non posito sequitur nihilominus effectus, nihil confert ad eundem effectum: Sed prædestinatio consequitur effectum suum, sive Sancti pro nobis orent, sive non orent; quippe quæ impediri nullatenus potest: Ergo, &c.

Resp. Divinam prædestinationem esse quidem infallibilem, neque impediri posse; quia proculdubio evenit in tempore quod prædefinitivus Deus ab æterno: sed evenit eo modo, quo Deus ipse disposuit, & mediis causis secundis, idest, Sanctorum intercessionibus, rectisque ipsorum prædestinatorum operibus.

Opp. ultimo: Electio E. G. Augustini præcessit prævisionem lacrymarum & orationum piæ Matris Monnicæ, alias non fuisset electio gratuita. Igitur licet Monnica non orasset, Augustinus salutem & gloriam consequutus fuisset.

Resp. dist. ant. Electio Augustini præcessit prævisionem precum ac gemituum Monnicæ, ordine intentionis, conc. ordine executionis, nego: *Si aliqui nondum sunt vocati* (inquit S. Pater lib. de Dono Persev. cap. 2.) *pro eis oremus, ut vocentur. Fortassis enim sic prædestinati sunt, ut nostris orationibus & accipiant gratiam, & efficiantur electi.* Erat ergo ita prædestinatus Augustinus, ut orante ac flente uberrimis lacrymis pia Matre gratiam consequeretur, & beatissimi Ambrosii cederet hortationibus.

C A P U T XII.

Effectus prædestinationis connumerantur.

PRÆDESTINATIONIS effectus sunt beneficia, quæ Deus optimus maximus confert Electis ex efficaci intentione illos ad vitam æternam perducendi. Ut vero aliquod donum dicatur effectus prædestinationis, tria requiruntur: ac primum, quod bonum sit, & Deo auctore efficiatur,

ciatur, nam moralis malitia, cum sit averſio a Deo; nequit ad vitam æternam ſuapte natura ordinari. Neceſſe eſt deinde, ut proficiſcatur ex intentione conferendi gloriam; ſiquidem qualecunque medium ad ſuam referri debet: ideoque gratiarum munera, quantumvis præclara, collata reprobis non ſunt appellanda effectus prædeſtinationis ad gloriam. Requiritur denique, ut cum effectū ad gloriam perducatur: eſt enim prædeſtinatio præparatio mediſſimorum, quibus certiffime liberantur quotquot liberantur. Sequentibus autem poſitionibus quinam ſint huiusmodi effectus demonſtrabo.

PROPOSITIO I. Effectus prædeſtinationis primarii ſunt Vocatio, Juſtificatio, & glorificatio.

Apoſtolus ad Rom. VIII. 30. ait: *Quos autem prædeſtinavit, hos & vocavit: & quos vocavit, hos & juſtificavit: quos autem juſtificavit, illos & glorificavit.* Hæc omnia a divina prædeſtinatione, tanquam a cauſa oriuntur; Ergo ſunt ejuſdem prædeſtinationis effectus. Prob. mi. etenim, ut nuper dicebamus, prædeſtinatio eſt præparatio auxiliorum, quæ certam trahunt eorum, qui eliguntur, liberationem. At glorificatio a corporis animique miſeriis perpetuo liberat: vocatio autem, & juſtificatio ipſam glorificationem præcedunt. Hinc beatiffimus Pater pauperum Thomas a Villanova Conc. 3. de S. Jo. Bapt. docet, *Catena indiſſolubili hæc omnia ex prima illa origine gratuita emanare.*

Opp. 1. Vocatio & juſtificatio conferuntur ſæpenumero etiam reprobis: impium enim eſt, damnatumque Calvinianum dogma, nunquam dari reprobos vere juſtos.

Reſp. diſt. propoſitionem: Deus impertitur gratiam vocationis, & juſtificationis etiam reprobis, ex efficaci intentione hos perducendi ad gloriæ conſecutionem, nego. Ex voluntate, qua vult hos quoque credere, obtemperare vocanti, atque ad tempus ſervare juſtitiam, deferendos tamen juſtiſſimo Dei judicio, nec finaliter perfeveraturos, concedo. Jam diximus requiri ad prædeſtinationis effectum, ut deſcendat ex efficaci divinæ voluntatis propoſito largiendi beatitudinem, quod ſane propoſitum ad nullum reprobum attinet.

Rurſus objicies: Deſerunt aliquando prædeſtinati vocationem, excidunt a juſtitia, & etiam in Apoſtatiæ crimen prolabantur: quomodo erit ergo in his gratia, quam conculcant ac proterunt, medium ad beatitudinem obtinendam?

Reſp. Etiam. Reviviſcunt enim præcedentia merita per ſubſequentem pœnitentiam, atque ex recordatione prioris vocationis magis Eleſtus trahitur ad aſſentiendum præſenti: ex præterito etiam lapſu timorem, & humilitatem concipit: reliſcens majorem erga ſe Liberatoris miſericordiam experitur: conteritur animo quod fuerit quidem immemor beneficii: gratificantem ſibi diligit vehementius: atque verba Davidis repetit: *Priusquam humiliarer, ego deliqui; propterea*

pterea Eloquentiam tuam custodivi. Psalm. cxviii. vers. 67.

Tertio sic argumentaberis : Glorificatio non est medium , sed finis : non est ergo prædestinationis effectus .

Resp. effectum prædestinationis esse quodcumque beneficium eo fine collatum ut electi a massa perditionis liberentur , sive liberentur per modum medii , sive per modum termini . Quare glorificatio , qua Electi ab illa massa penitus subtrahuntur , non solum prædestinationis effectus est , sed etiam maximus , ac præcipuus .

Denique oppones : Gratia collata Adam in statu Innocentiæ , quamquam restituta per ejus poenitentiam , non fuit effectus prædestinationis Adami : Igitur neque prædestinationis effectus erit gratia , quam alii Electi receperunt , perdiderunt autem propter culpam , tametsi superveniente poenitentia reviviscat .

Resp. conc. ant. nego conf. Gratia enim , & reliqua dona status originalis innocentiae nequaquam provenerunt ex intentione efficaci largiendi gloriam ; hæc enim efficax intentio originalem noxam supponit : ut ubi abundavit delictum , ibi superabundet & gratia .

PROPOSITIO II. Substantia quoque prædestinati , aliaque naturalia dona inter prædestinationis effectus possunt aliquo sensu connumerari .

Hanc conclusionem ita temperandam esse putamus : quoniam si substantia prædestinati spectetur absolute , nimirum , ut pendet a solo creationis decreto , certum est non esse prædestinationis effectum : quippe decretum creandi homines præcedit ratione nostra præscientiam originalis peccati ; ideoque in hac parte nos consentimus Vasquezio , ceterisque Societatis Jesu Theologis . Itaque substantiam prædestinati dinumeramus inter effectus prædestinationis , in quantum servata misericorditer post peccatum præordinatur ad gloriam . Substantia enim prædestinati servata est post originale peccatum propter merita Redemptoris : Ergo est prædestinationis effectus . Consequentia videtur evidens ; nam si substantia prædestinati servata est non vi prioris decreti spectantis ad creationem , sed intuitu meritorum Christi , apparet posse & ipsam ad gloriam efficaciter præordinari . Probatur ergo ant. Propter Adæ peccatum non solum expoliatum fuit humanum genus supernaturalibus donis , sed ulterius quoque promeruit , ut redigeretur in nihilum , ideoque beneficio misericordiae præservatum est . Igitur propter Christi merita huic malo subventum est : unde Augustinus Serm. 11. de Verbis Apost. c. 5. docet Electos *per Jesum Christum esse creatos* .

Opp. 1. Voluit Deus hominum redemptionem , & ejus causa Unigenitum Filium misit in Mundum : præsupponitur ergo ad Christi merita substantia prædestinatorum , qui redimendi erant , & ex numero redemptorum prælegendi .

Resp. distinguendam esse ratione nostra duplicem in Deo voluntatem :

tatem: unam redimendi humanum genus per Christi incarnationem; alteram instaurandi numerum Electorum ex hominibus per Christum redemptis. Falsum est igitur substantiam prædestinati servatam Christi merito non esse posteriorem Incarnatione, quatenus præordinatur ad numerum illum instaurandum. Quare dist. consequ. Substantia prædestinati præsupponitur ad Christi merita, idest, voluntas redimendi humanum genus antecedit ratione nostra decretum Incarnationis, concedo: voluntas implendi statutum prædestinatorum numerum, & quosdam præ ceteris ad hunc finem præordinandi præsupponitur ad Christi merita, nego. Vide cap. x. ad 2.

Opp. 2. Prædestinatio facta est post prævisionem originalis peccati: Atqui peccatum originale supponit substantiam prædestinati: Ergo substantia hæc præsupponitur ad prædestinationem.

Resp. dist. mi. Peccatum originale supponit substantiam prædestinati spectatam absolute, prout creata & producta est; co. Spectatam, quatenus misericorditer præservata ordinatur ad instaurandum numerum Electorum, nego minorem.

Opp. 3. Si humana substantia modo explicato prædestinationis effectus est; erit etiam effectus prædestinationis substantia reproborum; quoniam & hæc meritis Christi servatur. Adde non posse numerari inter prædestinationis effectus quod est commune tam Electis, quam reprobis: Sed substantia etiam ut conservata post peccatum communis est tam Electis, quam reprobis: Ergo hæc numerari non potest inter prædestinationis effectus.

Resp. nego sequelam: & ad probat. dico esse quidem reproborum substantiam effectum meritorum Christi, nec tamen dici posse effectum prædestinationis: quia non omne beneficium meritis Christi collatum prædestinationis effectus est, sed illud quod habet conjunctum propositum conferendi etiam gloriam; ut diximus supra de vocatione & justificatione. Quapropter illud etiam, quod Electis reprobisque commune est, in illis, in quibus omnia ordinantur ad gloriam, censetur inter prædestinationis effecta: tametsi non est tale in filiis perditionis & gehennæ, quibus non confertur eo fine, ut perducantur ad gloriam.

Quæ diximus de substantia prædestinati, valent etiam de naturalibus donis. Et si opponas istiusmodi dona minime pertinere ad gloriam, quam supernaturalis gratiæ auxilio tantummodo comparamus; Respondeo utique naturalia, E. G. voluntas, liberum arbitrium, ingenium, &c. se solis ad æternam salutem, imo ad fidei, aut cujusque meriti initium non sufficere; ut adversus dogmata Pelagiana quique Catholicorum fatetur; ad illam tamen gloriam conducere virtute supernaturalium auxiliorum. Firmiter quippe tenendum est contra nefariam Calvinianorum hæresim etiam naturalem arbitrii facultatem active ad opera pietatis concurrere, dummodo gratiæ beneficio adjuvetur. Atque

que hoc duntaxat sensu naturales potentias inter effectus prædestinationis ad gloriam percensemus.

PROPOSITIO III. Etiam permissio peccati est aliquo pacto prædestinationis effectus.

Non loquimur de peccato finali, quod per poenitentiam non deletur, & sempiternam perditionem secum trahit; tale enim peccatum in prædestinatis nullum est, quibus paratum est perseverantiæ donum ex liberalitate Creatoris. Neque sermo est de effectu, qui immediate & per se ad gloriam conferat, & quem consueverunt Scholastici appellare effectum *elicatum*; cum revera permissio peccati per se videatur magis pœna, quam donum, neque ad comparandam beatitudinem immediate conducat: sed de effectu remote, & mediate ad gloriam perducente, & quem dicunt Scholæ *imperatum*. Atque sic explicatam thesim demonstro 1. testimonio Apostoli dicentis ad Rom. vi. 11. 28. *Diligentibus Deum omnia cooperantur in bonum, iis, qui secundum propositum vocati sunt Sancti*. Quæ verba expendens Augustinus de Corrupt. & Grat. cap. 9. ait: *Diligentibus eum omnia cooperantur in bonum: usque adeo prorsus omnia, ut etiam si qui eorum deviant, & exorbitant, etiam hoc ipsum eis faciat proficere in bonum, quia humiliores redeunt, atque doctiores*. Idem Augustinus lib. xiv. de Civit. Dei cap. 13. *Audeo dicere, inquit, superbis esse utile cadere in aliquod apertum, manifestumque peccatum, unde sibi displiceant qui jam sibi placendo ceciderant. Salubrius enim Petrus sibi displicuit quando stetit, quàm sibi placuit quando presumpsit. Hoc dicit & Sacer psalmus: Imple facies eorum ignominia, & quærent nomen tuum, Domine*. Similiter beatus Gregorius lib. ii. Moralium cap. 26. *Fis ut aliquando se hæc gratia utiliter subtrahat, & presumendi quantum infirmatur, ostendat: tunc enim vere cognoscimus bona nostra unde sint, quando hæc quasi amittendo sentimus, quia a nobis servari non possunt*. Ex his vero conficitur ratio Theologica: Quod ex divina ordinatione conducit ad bonum spirituale prædestinati, effectus est prædestinationis saltem *imperatus*: Permissio peccati ex divina ordinatione conducit ad spirituale bonum prædestinati, idest, ad humilitatem, & æquiorum beneficiorum divinorum exultationem: Ergo permissio peccati est prædestinationis effectus saltem *imperatus*. Vide Proposit. 1. ad secundam objectionem.

Opp. 1. Permissio peccati non est Dei beneficium, non confertur ex meritis Christi, non est actus misericordiæ largientis dona, sed opus iustitiæ aut punientis culpam, aut derelinquentis hominem in manu consilii sui, non denique liberalis distributio, sed æqua denegatio victricis gratiæ: Ergo non est cum prædestinationis effectibus dinumeranda.

Resp. permissionem peccati posse duplici ratione considerari, idest, in

in se, & prout divinæ providentiæ subest ordinationi. In se quidem spectata importat divinorum auxiliorum justam denegationem, & poena est hominis præsumptis, non gratia Domini liberantis: at in intentione illius, qui, ut ait Augustinus de Corrept. & Grat. cap. x. *Melius judicavit de malis bona facere, quàm mala nulla esse permittere*, habet & ipsa permissio peccati quamdam rationem beneficii, quatenus scilicet trahit ad majorem humilitatem, pœnitentiam, sollicitudinem, & gloriam prædestinati. Distinguenda est ergo illa propositio. Permissio peccati non est beneficium, &c. spectata in se, & solitarie, concedo: ut subest proposito, consilioque Liberatoris, nego antecedens.

Opp. 2. Prudens rerum univèrsarum Provisor permittere non debet maximum malum, quale est peccatum, ex intentione largiendi majorem humilitatem, aut gradum gloriæ sublimiorem: quomodo non est sapientissimi Medici morbum permittere, ut conferat sanitatem ægroto. Nam infirmitas est animæ, & etiam deplorandus interitus, si mortali crimine maculatur.

Resp. Deum sapientissime peccata permittere, ut assequatur finem in quo magis magisque justitia, misericordia, atque incomprehensibilis providentiæ ratio deprehenditur. Ut enim in Sententia Adversariorum nostrorum vult Deus negativam reprobationem multorum ad manifestandam justitiæ rectitudinem erga reprobos, & amplitudinem misericordiæ erga Electos: ita prudentissime peccatum permittit, ut demonstretur necessitas gratiæ, infirmitas arbitrii, poena superbiorum, virtus pœnitentiæ, misericordia Liberatoris, ac præmium denique humilitatis. Quæ licet comparanda non essent peccato, quod maximum malum est, si considerentur ratione sui, sunt tamen longe meliora si in his spectentur Redemptoris merita, & glorificationis majestas. Alioqui nunquam Deus permisisset peccata absque nota imprudentiæ: quod irreligiosum, horrendumque est cogitare. Ad exemplum vero Medici dico non permitti ab eo morbum, ut simpliciter conferat sanitatem; permitti tamen interdum, ut sanitatem conferat robustiorem. Atque consimili ratione non permittit Deus in prædestinato peccata, ut simpliciter eum justificet; sed ut justificet firmiori sanctificatione, in qua humilior perseveret. Præclare & considerate Bernardus in Psalmum 90. *Nonne cooperatur nobis ille casus in bonum, unde & humiliores efficimur, & cautiores?* At quæ hoc loco tractanda erant, absolvimus.



CAPUT XIII.

*Quomodo Electorum prædestinatio fixa sit, certissima,
& immutabilis.*

DUOBUS modis considerari posse prædestinationem Sanctorum, hoc est, in intentione Dei, & in rerum executione, sæpe hoc eodem libro dictum est. Utroque modo spectatur, dum quæritur, sit ne infallibilis & certa: nimirum an talis sit comparate ad Deum eligentem, & ad hominem quoque libere præcepta observantem ut æternam vitam consequi valeat.

PROPOSITIO: Prædestinatio tam respectu Dei, quàm hominum Electorum est omnino immutabilis: ex parte tamen Dei certa est, ex parte hominum prorsus incerta.

Quantum spectat ad primam partem probatur: Decreta Dei efficacia & absoluta sunt omnino immutabilia, non enim Deus voluntatem habet similem humanæ, quæ haud semel propositum mutat, neque volenti efficaciter salvum facere hominum resistit arbitrium. Ergo ex parte Dei Prædestinatio immutabilis omnino est. Talem quoque esse respectu hominum, probatur; nam supposito divino decreto prædestinatus infallibiliter gloriam consequitur: Ergo prædestinatio etiam ex parte hominis prædestinati immutabilis dicenda est. Quomodo autem stet cum hac immutabilitate libertas humana, explicatum est libro quarto.

Secunda pars demonstratur; nam respectu Dei prædestinationem esse certam docet Apostolus 2. ad Tim. 1. 19. dicens: *Cognovit Dominus qui sunt ejus.* Et Augustinus lib. de Corrupt. & Grat. cap. 7. *Nemo eorum perit, quia non fallitur Deus.* Hominibus autem incertam esse colligitur ex Eccles. 1x. 1. *Nescit homo utrum amore, an odio dignus sit: sed omnia in futurum servantur incerta.* Ex Trident. Sess. 6. cap. 12. *Nemo, quandiu in hac mortalitate vivitur, de arcano divine prædestinationis mysterio usque adeo presumere debet, ut certo statuat se omnino esse in numero prædestinatorum.* Quæ sunt verba Augustini lib. de Corrupt. & Grat. cap. 13. Accedit & congruens ratio: decebat enim hominibus talem spem futuræ felicitatis præcipi, quæ simul anxietatem & timorem incuteret; ut cum metu ac tremore salutem propriam operarentur, & gratiæ dona non superbiendo parvipenderent, sed extimescendo custodirent.

Obijcies 1. Vulgatissimum est Augustinianum illud proloquium: *Si non es prædestinatus, fac ut prædestineris.* Serm. etiam 102. de Temp. ait S. P. *Utinam tam cito peccator homo resurgat ad penitentiam, quantum cito Deus vult definitam mutare sententiam.* Ecclesia pariter orat,

ut liber vitæ: *prædestinatorum nomina adscripta retineat*. Atqui ex his liquet prædestinationem esse mutabilem. Ergo, &c.

Resp. accipi prædestinationem dupliciter, *adequate* secundum omnes effectus, qui catena quadam indissolubili in Electis colligantur, ut sunt vocatio, fides, justificatio, incrementa virtutum, perseverantia, & corona: *inadequate*, secundum aliquos tantum effectus, quas aliquando in prædestinato certum est deperdi atque intermitteri, ut justificatio, devotionis fervor, rigidusque modus vivendi. Itaque prædestinatio accepta *adequate*, ut effecta omnia complectitur, præsertim vero finalem perseverantiam, & retributionem mercedis, aut considerata in se, ut est Dei propositum, & firma stabilisque voluntas eam omnia præordinans, immutabilis dicenda est: sumpta vero *inadequate*, nempe pro justificatione, sive effectu alio intermedio, est omnino mutabilis. Igitur dist. minorem: liquet prædestinationem esse mutabilem, quantum spectat ad effectum aliquem medium, idest, ad justificationem, & opera prædestinati, concedo: quantum attinet ad divinum propositum, perseverantiam finalem, & gloriæ coronam, nego. Proloquium illud vulgare, *Si non es prædestinatus, fac ut prædestineris*, inter Augustiniana scripta non inveniri plures affirmant; & videtur derivatum ex consimili sententia Tract. 26. in Joannem, *Si non traheris, ora ut traharis*. Sermonem quoque 102. de Tempore non esse Augustinianum scribit Estius. At dato, quod utrumque genuinum sit, dico prædestinationem illic sumi *inadequate*, pro justificationis gratia, aut pro signis prædestinationis, ut dixi cap. VII. ad 4. Eadem est ratio verborum Ambrosii dicentis; *Novit Dominus mutare sententiam*, si tu noveris *mutare delictum*: & orationis Ecclesiæ, in qua luit operam nobilis quidam Orator. Nam hæc, & similia de prædestinationis effectu medio, aut de exterioribus signis sunt exponenda.

Resp. 2. Præfatas Sanctorum auctoritates explicandas esse de prædestinatione, non comparata ad efficacem Dei voluntatem, & absolutam beneplaciti sui præfinitionem, quæ immutabilis est, atque efficit reapse quicquid decernit ac prædeterminat; sed de prædestinatione relate ad legem a Deo promulgatam, in qua statuitur peccatoribus, nisi resipiscant, sempiternum supplicium; sed poenitentiam agentibus deletur damnationis chirographum, scelerumque poena remittitur. Quæ responsio longe facilior est, & germanior.

Objicies 2. Prædestinatio idem est, ac liber vitæ, in quo Electi descripti sunt: Ab hoc vitæ libro deleri possunt Electi: Ergo prædestinatio non est revera immutabilis. Probat minor ex verbis Moysis ita Deum alloquentis Exodi xxxi. 1. 31. 32. *Aut dimitte eis hanc noxam: aut si non facis, dele me de libro tuo, quem scripsisti*.

Resp. nego minorem. Et ad probationem dico Sacrarum Scripturarum Interpretes verba Moysis non eodem modo explicare. Nam aliqui

conten-

contendunt exponenda esse de libro vitæ temporalis, quomodo Num.xi. 35. *Obsecro*, inquit idem Moyses, *ut interficiat me*. Quare optabat potius mortem, quam videre divinam ultionem in populum, quem in manu forti eduxerat de Aegypto. At sunt qui etiam de libro prædestinatorum hæc acceperunt, dicentes Mosen rem petendo, quam noverrat impossibilem, voluisse exprimere vehementissimum cordis sui desiderium de Hebræorum incolumitate, & salute.

Ob.3. Paulus ad Corinth.1. cap.9. *Castigo*, inquit, *corpus meum; & in servitutem redigo: ne forte cum aliis prædicaverim, ipse reprobatus efficiar*. Potest ergo reprobari etiam Electus.

Resp. Apostolum nomine reprobationis, nequaquam intelligere Dei propositum, aut divinæ voluntatis actum, sed privationem gratiæ, ac reprobationis effectum, ut dictum est supra.

Ob. ultimo: Si prædestinatio esset immutabilis, qualiacunque forent opera prædestinati, hic semper salutem consequeretur: ideoque vulgato dilemmate uti posset; vel sum prædestinatus, vel reprobus; Si prædestinatus, etiamsi quodcunque crimen patravero, salvus ero; Si autem reprobus, quid bonis operibus infudo?

Respondeo locum non habere præfatum dilemma, quoniam est quidem prædestinatio immutabilis: sed executioni mandanda liberis meritis prædestinati, ut dictum est cap.v111. In Resp. ad 3. Argumenta autem hæreticorum de certitudine justificationis, quæ possent adversus postremam thesif partem afferri, excutienda sunt alibi. Sufficit nunc animadvertere, neminem scire certitudine fidei, cui non potest subesse falsum, se gratiam Dei esse consecutum, ut definit Tridentinum Sess.6. cap.9., & loca quædam Apostoli, quibus abutuntur inimici veritatis, vividam spem, non certitudinem, nisi moralem, manifestissime demonstrare.

C A P U T XIV.

Historiam hæresis Prædestinatianæ fabulam esse, cui fidem nullam debemus.

INTER extremos circa Prædestinationem, & Gratiam errores connumerandi duo sunt, Pelagianorum, & Prædestinatorum. Pelagiani asserbant prædestinationem haberi ex prævisione operum moralium, & necessitatem gratiæ negabant; quam hæresim aliqui temperantes putarunt initium fidei esse ex nobis, atque hinc salutis primordia pendere, in ceteris supernaturalia auxilia minime denegantes. Hi sunt, quos ob doctrinæ cum Pelagii dogmatibus affinitatem Semipelagianos appellaverunt. Prædestinatiani e contra gratiam etiam vietricem, & præ-

& prædestinationem *secundum propositum* gloriantur se cum Augustino defendere: quæ duo cum Semipelagiani noluerint admittere reijcientes Augustinianam doctrinam, ex qua videbatur eis consequi libertatis interitum, tanta pertinacia Prædestinatiani defendunt, ut liberum arbitrium tolli, & speciosum esse titulum sine re, pugnaciter fateantur. Atque ita Semipelagiani pro defensione libertatis, Prædestinatiani pro absoluta prædestinatione decertant, ac se mutuo conviciis dilacerant, utrique malæ causæ patroni. Illi enim de Christi Gratia pessime, & de Augustino irreverenter locuti sunt: hi de libertate hominis ultraquam impudenter, de Augustino autem plusquam imperite. Constans enim est ac certissima S. Patris doctrina quod neque prædestinatio deneganda est, neque humana libertas evertenda.

Prædestinianos ergo postremis sæculis extitisse, & nunc etiam vigere in Secta Calviniana & quantum ad aliqua dogmata etiam in Janſeniana Catholici omnes norunt. Sunt enim dogmata prædestinatiana, Deum ad vitam & ad mortem eadem ratione prædestinare, divinam præscientiam hominem violenter compellere, perire Dei voluntate quicumque pereunt, trahi etiam invitos ad salutem, nullam esse in Deo voluntatem salvandi omnes, & Christum pro solis Electis mortem optulisse: quæ omnia opponebantur a Semipelagianis, tanquam consecraria Augustinianæ doctrinæ, & talia esse pessimi Augustini Interpretes, idest, iidem Prædestinatiani non diffitentur. Exortam hanc hæresim circa annum 424. apud Monachos Adrumeti Byzacenæ Provinciæ Metropolis, iterumque emeruisse in Galliis circa annum 429., renovatam insuper a Gothescalco Monacho Orbacensi sæculo 11. & anno 847. affirmant Tyro Prosper, Sigebertus, Baronius, Spondanus, Alvarez, & post editum a Sirmondo Viro Clarissimo librum Prædestinati alii Scriptores plurimi. Sed hæc esse commentitia tradunt viri alii doctissimi, ut Usserius, Maguinus, Norisius, Cabassutius, Macedo, Contensonius, Natalis Alexander, & propemodum infiniti: qui observant traductos fuisse a Semipelagianis odioso nomine Prædestinatorum Cultores Augustinianæ doctrinæ, & hos sub corio scititiæ hæreseos immerito vapulasse.

Hæc, ut patitur instituti mei ratio, suscepturus examinanda, ad coercendam obtruncatorum nostrorum (si tamen sunt aliqui) præcipitem loquentiam, præmoneo nullum inferri doctrinæ magni Augustini præjudicium, etiamsi concedatur emeruisse adhuc eo vivente Prædestinatorum sectam, & hujus gregales sese tanti Doctoris auctoritate præclarissimoque nomine circumvallasse. Ut enim scite ait Facundus Hermienſis lib. 6. contra Motianum, *Melius loqui non potuit Augustinus, quàm Prophetæ, quàm Apostoli & Evangelistæ: quorum verbis male intellectis, & incongrue adhibitis tam multi sui defendere conantur errores.* Imo quisquis sedulo animadvertat Adrumetianorum

tinorum controversias opera Augustini fuisse sopitas, excitatis autem Semipelagianorum clamoribus, Augustinianam doctrinam nedum immunem evasisse, sed Cælestini Romani Pontificis fuisse insigni approbatione condecoratam; causam quoque Gothescalchi undecim annis hinc inde ventilatam ab ipso Hincmaro ceterisque infelicis Monachi adversariis ad Augustiniana scripta, tanquam ad lydiū lapidem revocatum, ut contra Joan. Launojum probat Hyacinthus Serry cap. 14. Vindictiarum: quisquis, inquam, hæc animadvertat, necesse est fateatur Augustinianam sententiam magnis subortis tempestatibus emerxisse e vado scopulos prætervectam. Jam vero quæ præfabar hunc habeant terminum.

PROPOSITIO I. Nulla fuit in Monasterio Adrumeti, Augustino superstitē, hæresis Prædestiniana.

Demonstratur primo. Etsi Augustinianæ doctrinæ defensores passim a Semipelagianis appellati sunt Prædestinatiani; nihilo tamen minus nulla fuit in re horum hominum secta, ut doctissimi viri tradiderunt. Sanctus enim Prudentius Trecentis Episcopus in lib. contra Joannem Erigenam cap. 4. ait: *Tertiam vero hæresim, quam Pelagianis contrariam asseritis, qua ita donum gratiæ prædicatur, ut libertas arbitrii funditus auferatur, nec legimus, nec audimus*. S. quoque Rhemigius adversus eundem Erigenam, *Quæ est, inquit, ista secunda hæresis tam incognita, tam inaudita, qua libero arbitrio denegato solius gratiæ sit prædicatrix, nisi, ut nobis videtur, disputator iste vel beatum Augustinum latenter quasi hæreticum accusat?* Quæ probant universaliter hæresim Prædestinarianam neque ab Adrumetinis exortam, neque inter Massilienses iterum erupisse, neque suscitatum fuisse per Gothescalcum. Sed ne a maritimis Africæ, septisque Adrumetinis discedam; an non Augustinus scripsit librum de Hæresibus ad Quodvultdeum circa annum 428. exortis jam, sedatisque in Adrumetino Monasterio dissidiis? Quomodo ergo Prædestinarianam hæresim nuperrime natam, & a se ipso, ut inquirunt, opportune præfocatum silentio prætermisit, dum obscuriores quasque commemoravit? Quo præterea jure prope finem libri potuit asserere hæresim Pelagianam esse *omnium recentissimam*, si alteram ipse jugulaverat juniorem Pelagianam, eidemque directè contrariam? Verum ad alia accedamus.

Probatur 2. Explicatione disceptationis Adrumetinorum, brevique rerum gestarum narratione. Scripserat Augustinus celeberrimam Epistolam 105. ad Sixtum, quæ Sententiæ gratuitæ prædestinationis, & gratiæ per se efficaciæ munimentum est singulare. Cum hæc per Florum Adrumetum delata esset, & avidè inter Monachos legeretur; quibusdam imperitis visum est, vocationem secundum propositum & gratiam victricem tollere libertatem humanam, ipsis adeo liberum arbitrium propugnantibus ut tollerent Dei gratiam. At Valentinus Abbas,

bas,

bas, & Florus, alique pro doctrina S. Patris acerrime steterunt. Hinc obortæ contentiones, quas Felix & Cresconius inconsulto Monasterii Præside, nec satis causâ perspecta ad Augustinum profecti ambiguerunt, admodum retulerunt. Ac principio Florum accusarunt, tanquam arbitrium negasset: sed interpellati ab Augustino, se minime in his questionibus versatos esse prodiderunt. Deprehendit nempe S. Pater, Adrumeti Pelagianæ hæreseos cineres excitari, & sub prætextu salvandi libertatem novum bellum adversus Christi gratiam cieri. Quare ad extirpanda pravitatis semina librum scripsit de gratia & libero arbitrio, de quo in 2. Retract. cap. 66. hæc habet: *Propter eos, qui cum defenditur Dei gratia putantes negari liberum arbitrium, sic ipsi defendunt liberum arbitrium, ut negent Dei gratiam, asserentes eam secundum merita nostra dari, scripsi librum, cujus titulus est de gratia & libero arbitrio. Ad eos autem scripsi Monachos Adrumetinos, in quorum Monasterio ceperat esse contentio.* Nondum autem Adrumetinis acquiescentibus, & rursus opponentibus non esse corripandos legis transgressores, si divina constitutio humanam prævenire debeat libertatem, quandoquidem deest illis auxilium ex Dei beneplacito præparatum; addidit librum de Correptione & gratia plenissimum, ut ait in Epist. ad Augustinum beatus Prosper, *divina auctoritatis.* Atque hæc origo, hic finis dissidiorum, quæ moverunt Adrumetini.

Ex his manifeste evincitur inde Semipelagianorum quidem, non Prædestinatariorum hæresim erupisse. Etenim qui opinabantur gratiam dari secundum merita nostra, & negabant Electionem secundum propositum eo quod videretur asserre exitium libero arbitrio, ac proinde recedebant ab Augustino; hi Semipelagiani erant, non Prædestinatiani: quippe Prædestinatiani & Electionem secundum propositum agnoscunt, & Augustini doctrinam sequi magnifice de se prædicant, quamquam turpiter in errorem rapiuntur in iis, quæ spectant ad libertatem. Sed in Monasterio Adrumeti erant qui ita negarent Dei gratiam, ut defenderent liberum arbitrium, & ideo recedebant a doctrina Augustini. Igitur inter Adrumetinos Semipelagiani quidam nonnulli erant, sed non Prædestinatiani.

Quod argumentum corroboratur testimonio Prosperi in Epist. ad Augustinum: in qua narratis Semipelagianorum adversus Electionem, secundum propositum Dei oppositionibus, *Evenit, inquit, ex dispositione misericordiæ Dei, ut cum quosdam intra Africam similia movisset, librum de correptione & Gratia plenum divine auctoritatis emitteret.* Consimilis ergo fuit adversus Augustinianam Sententiam Semipelagianorum Massiliensium, & Adrumetinariorum Monachorum expositio.

Comprobatur denique Assertum, & simul ostenditur præter Semipelagianos, non fuisse alios prave sentientes apud Adrumetum.

To. I.

P p p

Cre-

Cresconius & Felix qui ad Augustinum venientes retulerunt obortas inter Cœnobitas dissensiones, accusarunt Florum tanquam prædestinatum, idest, hostem infensissimum libertatis. At liquet ex Epistola Valentini ad S. Patrem, duos illos Monachos falsâ narrasse, ac Florum solum gratiam omnia præcedentem merita Catholice propugnasse. *Servi tui Flori*, inquit Abbas, *fides est, Pater, non sicut fratres illi locuti sunt: in præsentiarum audierunt ab eo dictum non juxta merita nostra dari donum pietatis, sed per gratiam Redemptoris*. Itaque rumor exortæ in Adrumetino monasterio Prædestinarianæ hæreseos ex falsa relatione Felicis & Cresconii excitatus est: neque ullus Prædestinarianus fuit reapse inter Monachos Africanos. Quis enim talis fingi potest? Valentinus? At de hujus fide nullus dubitat. Florus? liquet hunc fuisse falso accusatum. Cresconius & Felix? Hi vero accusatores erant erroris, quem imperite suspicabantur in Floro. Reliqui Monachi, qui ita defendebant liberum arbitrium, ut negarent Dei gratiam? Isti quidem Prædestinariani a nemine, qui sit sui compos, appellabuntur. Lege autem cum Valentini Epistolam, tum Augustini responsionem; neque alium Adrumetinum inveniatis, qui de hæresi possit esse suspectus.

Opp. 1. Fuerunt in Monasterio Adrumeti, qui ita gratiam asserabant, ut arbitrium everterent: Hi erant Prædestinariani: Ergo, &c. Probatur ma. S. P. Augustinus in Epist. ad Valentinum; *Retulerunt*, inquit, *Monasterium vestrum nonnulla dissensione turbatum, eo quod quidam in vobis sic gratiam prædicent, ut negent hominis esse liberum arbitrium*.

Resp. nego ma. Et ad prob. dico Felicem & Cresconium falsa narrasse. Ut hi ad S. Patrem pervenerunt; statim advertit eos infcios esse, & circa controversias gratiæ parum versatos. Eos propterea penes se aliquanto diutius retinuit Augustinus, ut scribit in Epistola ad Valentinum, *quo instructiores redirent adversus novos hereticos Pelagianos*. Optime quippe novit in Adrumeto recentissimam Pelagii hæresim suscitari, postquam pluries imperitos relatores interrogaverat. Hinc redeuntibus illis Adrumetum cum libro de Gratia & libero arbitrio, sic Monachos adhortatus est: *Neque negetis Dei gratiam, neque liberum arbitrium sic defendatis, ut a Dei gratia separetis*. Rescripsit quoque Valentinus, non esse in suo Monasterio, qui liberum arbitrium negarent. Enimverò sic generaliter loquitur: *Liberum arbitrium Dei gratia non negamus*. Flori quoque fidem commendat, & Felicis & Cresconii, qui ad Augustinum proficiscentes nil Abbati communicaverant, imprudens consilium redarguit. Sanctus autem Augustinus initio libri de Corrupt. & Gratia ita Monachis gratulatur: *Hanc fidem, quæ sine dubio vera & Prophetica & Apostolica fides est, etiam in fratre nostro Floro invenisse me gaudeo: unde hi potius corrigendi sunt, qui eam non intelligebant*. Concedo itaque Felicem & Cresconium retulisse Augustino

gustino quod Adrumeti essent qui negarent arbitrium : sed nego verum narrasse .

Opp. 2. S. P. Augustinus in libro de Gratia & libero arbitrio non solum gratiam defendit, sed liberum arbitrium deprædicat ; quod vel solo libri titulo satis liquet . Sed ex quo defendat gratiam, sequitur extitisse in Adrumeto qui gratiam negarent . Ergo ex quo liberum prædicet arbitrium, inferitur etiam fuisse, qui negarent idem arbitrium ; ideoque Monasterium in duas factiones, Pelagianorum unam, & alteram Prædestinatariorum fuisse divisum .

Resp. hoc argumentum, quod Adversarii putant validissimum, nullum omnino esse . Primo enim quid probat, si dicamus Augustinum principio credidisse Felici & Cresconio, adeoque adversus Prædestinatos, quos extare audiebat, scripsisse ; quum tamen nulli essent, & illi duo Monachi mentirentur, ut reapse mentitos esse declaravit apertissime Valentinus ? An non bene S. Pater se gessit una cum erumpente Semipelagianismi hæresi evellens etiam fidei erroris radices, quas noverat olim insitas a Manichæis ? Deinde si attentius librum de Gratia & libero arbitrio legas : percipies totum in hoc versari, ut probet gratiam nulla merita nostra supponere, neque tamen liberum perimi arbitrium ; propterea quod Pelagiani affirmabant gratiam dari secundum merita, & ex Augustiniana sententia consequi interitum libertatis . Sed rem clarius expediam . Hæc propositio, *Non datur sub gratia efficaci liberum arbitrium*, enunciatur a Pelagianis, & a Prædestinatis æqualiter, sed sensu prorsus contrario . Pelagiani ut tollant Dei gratiam, ita argumentantur : Gratia efficax tollit arbitrium, ergo non datur : quo telo etiam nos impetunt Catholici, clarissimique viri, qui nullatenus Pelagianis adhærescunt, gratiam tamen per se efficacem rejiciunt . Contra Prædestinatos illam propositionem efferunt, ut negent arbitrium, atque ita pessime arguantur : Datur gratia efficax ; Ergo non datur libertas . Debet ergo quisquis sentit cum Augustino pugnare pro libertate, sive contra Pelagianos disputet, sive contra Prædestinatos . Et contra Pelagianos quidem, ut retundat quod hi opponunt adversus Gratiam viatricem, & Electionem secundum propositum : adversus Prædestinatos autem, ut repellat horrendam, consecutionem, quam Augustiniana circa gratiam doctrina obvallare perperam moliantur . Quare distinguo propositionem majorem : Augustinus non solum gratiam propugnat, sed etiam liberum arbitrium, retundens criminationem Pelagianorum, conc. repellens assertionem Prædestinatariorum, nego .

Opp. ultimo . Erupisse hæresim Prædestinatariam circa ann. 415. scribit in Chronico Sigebertus . Ortam sub Honorio, qui imperium obtinuit circa annum 417. tradit in suo Chronico Prosper Tiro . Eiusdem meminit & Arnobius, qui circa eadem tempora floruit, in .

Psalmi. 147. Posteriores Historicos quis posset singulos recensere ?

Resp. nil mirum si hi, aliqui plurimi commemorarunt hæresim Prædestinatorum, cum hoc nomine a Semipelagianis traducerentur veri Augustini discipuli. Crediderunt nempe nonnulli impostoribus: falsaque crimina aut malevolentia, aut bona fide pro veris historiis venditarunt. Ac Sigebertus fabulam imbibit a Fausto Rejensi, qui cum Semipelagianus fuerit, non ex veritate, sed ex livore Prædestinianos appellavit quotquot doctrinam Augustinianam sectabantur: de quo Fausto mox dicam. Arnobium etiam Semipelagianum fuisse demonstrat Norisius lib. 2. Hist. Pelag. cap. xv. Sed fuerit frugis melioris: quis demonstraturus est, illum, & ceteros qui Prædestinianos commemoraverunt, non fuisse deceptos publica voce, quam spargebant Semipelagiani, extare Prædestinianos, qui tollerent libertatem? Nec fidem promeretur Prosper Tyro, qui potuit fabulam ex eodem fonte haurire, & in historia hospes omnino est, & anacronismus plenissimus. Quod, ut plura alia prætermittam, apparet ex anno, cui initium hæresis Prædestinantiæ alligavit, idest 417. quo nondum coeperat Augustinus pertractare de prædestinatione electorum, nec Epistolam ad Sixtum adhuc scripserat. Atque, ut prorupisset commentitia hæresis apud Adrumetinos, non tamen ante annum 424. habuisset natalia: unde Tiro etiam peccat in Chronotaxi, eoque pejus Sigebertus; qui vulgi opinione decepti errores erroribus implicarunt.

PROPOSITIO II. Neque sub Cælestino I. erupit in Galliis secta Prædestinatorum.

Qui hanc apud Massilienses suscitata tradunt, putant adversus eam Hilarium & Prosperum Augustini primum, deinde Cælestini imploravisse auxilium. At non ita se res habuit. Hilarius & Prosper non contra Prædestinianos, sed contra Semipelagianos ad Augustinum confugerunt. Quod probatur ex Epistola Prosperi, cujus verba superior cap. vi. fuerunt producta. Ex quibus constat Massilienses non probasse prædestinationem in regnum Dei, & propositum eligendorum ac rejiciendorum, quo ante mundi constitutionem facta dicitur ab Augustino electorum reproborumque discretio. Consimilia scripsit Hilarius. Prædestinati autem & gratuitam prædestinationem dicuntur asseruisse, & Augustini sibi addixisse patrocinium. Obortæ itaque inter Massilienses controversiæ, non Prædestinantiæ hæreseos seminarium fuerunt, sed Semipelagianismi incrementum. Præterea S. P. Augustinus acceptis literis Prosperi & Hilarii, occurrit gliscenti malo editis libris de Prædestinatione Sanctorum, & de Dono perseverantiæ. Hos vero libros, quis non videt contra hostes gratiæ Dei, & reprehensores Augustiniani doctrinæ fuisse conscriptos? Sat est oculos in prioris libri initia conjicere: ubi Massilienses, quorum Hilarius & Prosper piam curam gerebatur, adhuc in quæstionibus de prædestinatione, & de

de gratia caligare dicuntur : Pelagianæ favere opinioni ; cavendum , ne teneant poeticam sententiam , *Spes sibi quisque , &c.* Quæ dicta sint salva Massiliensium pietate ac Sanctitate , qui nondum damnato Semipelagianismo , nulla fuerunt hæresis labe polluti . Semipelagiani tamen habendi sunt : & consequenter in his malleus hæreticorum Augustinus Pelagianorum compressit , contrivitque reliquias .

Opp. 1. Irrupisse Cælestino Pontifice hæresim Prædestinatianam , & Prosperum & Hilarium de hac hæresi consuluisse Augustinum , testatur antiquissimus Auctor Prædestinati , quem Sirmondus ex vetustissimo Codice luce donavit , & insertus est Tomo Bibl. PP. vicesimo octavo .

Respondet vir summus Norisius , Sirmondum effecta jam ætate , & post annum 80. hunc librum publici juris fecisse , indulgendumque esse plenæ viri alioqui doctissimi senectuti , si a veritate deflexit : ejus historiam nuncupari fabulam a Maguino viro omnigena literatura ornatissimo : constare ex Epistolis Hilarii & Prosperi longe distare ab erroribus Prædestinatianorum dogmata Massiliensium . Addunt viri alii clarissimi Auctorem Prædestinati se manifesto prodere Pelagianum . Docet enim concupiscentiam esse a Creatore , quomodo ab illo sunt singula membra corporis ; ac perduelles motus libidinis non poenam originalis peccati , sed legem esse naturæ . Quæ fuisse dogmata Pelagiana constat ex libris Augustini contra Julianum . Cum ergo Pelagiani appellarent Prædestinatianos omnes propugnatores Augustinianæ doctrinæ ; mirum non est , si Auctor Prædestinati meminerit commentitiæ hæreseos , de qua Augustini discipuli postulabantur . Quidquid sit ; liber Prædestinati ex literis Prosperi & Hilarii fallax undequaque deprehenditur .

Opp. 2. Prosper & Hilarius in suis ad August. Epistolis referunt apud Massilienses multos esse , affirmantes *divina constitutione virtutes removeri , tolli libertatem , & sub nomine Prædestinationis fatalem necessitatem induci* . Atqui soli Prædestinatiani hæc mendaciorum portenta effutiebant . Igitur , &c.

Resp. Sirmondum , qui hoc utitur argumento , caligantibus senio oculis haud recte Prosperi verba legisse . Etenim non absolute scripsit Prosper , multos Servorum Dei in Massiliensi urbe consistentes denegare libertatem , & divinæ constitutioni concedere ut homines violenter compellat : sed ait hæc a Massiliensibus dicta fuisse conditionate , illative , & contra ea , quæ S. Pater Augustinus de vocatione Electorum secundum Dei propositum disputaverat . Vide testimonia beati Prosperi supra Capite vi. Prosperum contra Prædestinatianos scripsisse putavit etiam magnus Annalium Ecclesiasticorum Auctor Baronius : cui nequaquam consentire possumus tum propter hætenus discussa , cum propter auctoritatem Fulgentii , qui lib. 1. ad Monimum cap. 30. testatur Prosperum in singulis Opusculis , quæ tunc elucubravit , respondere iis , quæ a Semipelagianis *Divi Augu-*

Augustini dictis non ex veritate, sed ex livore objiciebantur.

Opp. 3. Saltem circa annum 470. Prædestinianos extitisse negari non potest. Colligitur ex libris Fausti, ex Synodo Arelatenſi, & Lugdunenſi, quæ hæc hæreſim proſcripſerunt: ex Epist. ad Lucidum, & ipsius Lucidi palinodia, in qua ore proprio se Prædestinianiſ ad hæſiſſe fatetur.

Resp. dato vera eſſe quæ narrat Faustus, neque Synodus Arelatenſem & Lugdunenſem eſſe ab illo conſtitas, quod non ſoli affirmant Apo-
logiſtæ Janſenii, ut ſcribit Tournely de Gratia Chriſti pag. edit. Venet. 118., ſed etiam Gilbertus Maguinius, quem idem Tournely ſupra pag. 112. condigna laudatione memoravit: dato, inquam, hæc vera eſſe, conſtat Fauſtum fuiſſe Semipelagianum; Semipelagianos vero ob-
jectiſſe Auguſtiniſ eadem paradoxa, quæ devorant veri Prædeſtina-
tiani. Cum ergo Fauſtus referret in Synodiſ eſſe nonnullos erroribus Prædeſtinationorum imbutos, idque confirmarent alii Semipelagiani, provide Galliarum Antiſtites, inter quos aliqui erant piſſimi doctiſſi-
mique, ſex illas propoſitiones a Fauſto exhibitas condemnarunt, ut ſi qui eas proferrent, ab horrendis blaſphemiis in poſterum abſtinerent. Duo enim extra controverſiam poſita ſunt, & paradoxa illa in ſe hære-
tica eſſe, & a Semipelagianis adverſus ſententiam de gratuita prædeſtinatione olim objecta, ut execrabilem illam redderent, ac traherent in invidiam. Ergo merito damnata ſunt, & damnata dicuntur a Fau-
ſto, & Gennadio; cum impia ſint & hæretica; atque hæc in parte oberrant miſerrimi Janſeniani, qui negant eſſe damnata. At non hinc ſequitur extitiſſe revera ſectam Prædeſtinationam: ſed hoc unum, vi-
delicet, damnata fuiſſe dogmata, quæ Semipelagiani falſo Auguſtini diſcipulis imponebant. De Lucido autem, dato pariter quod vera ſint, quæ narrantur a Fauſto, veramque recantatam ab eo palinodiam, tametſi non tenemur hæc etiam concedere Scriptori pice Semipelagianif-
mi inquinato: dico Semipelagianos acutos fuiſſe, acerrimos, atque, uti ab Auguſtino appellantur, *ingenia bona*. His ergo impugnantibus Electionem ſecundum propoſitum, quaſi evertat libertatem, cum quæ-
ſtio fit ad ſolvendum difficilis, ab Auguſtiniana doctrina nonnullos mi-
nus exercitatos pertraxerunt facile remove, compellentes ſubtiliori-
bus ſophiſmatibus ad credendum ſe in antecellum erraſſe, quamquam ſenſiſſent peroptime: quod ſæpenumero experimur in hominibus pin-
guioris minervæ, qui cum Adverſariis verſutis, loquentibuſque con-
grediuntur. Id forte contigit Lucido. Verum hoc etiam dato Lu-
cidum fuiſſe pravi dogmatis aſſertorem, quomodo legimus de Mo-
nimo apud Fulgentium lib. 1. cap. 3. nulla ratione ſit conſequens extitiſſe Sectam Prædeſtinationam, & veram eſſe hiftoriam, quæ nar-
ratur in libro Prædeſtinati: ſed ad ſummum, ut contendit noſter Norſius, prava ea dogmata a quibuſdam obſcuri nominis tradita,
nun-

nunquam vero five a Massiliensibus, five a Monachis Adrumetinis.

PROPOSITIO III. Gothescalcus Prædestinatus non fuit, licet veram causam imprudenter susceperit defendendam.

Ita censent eruditissimi viri Gilbertus Maguinus, Christianus Lupus in Notis ad 1. Conc. Romanum, Cardinalis Norisius in Hist. Gothescalchi, aliique plures: & quamquam sententiam oppositam propugnent multi celebres æque, & eruditi Theologi, nostra tamen & præsidia habet validissima, & horum argumentationibus minime quætitur. Probatur autem 1. testimonio Sanctorum Prudentii, & Rhemigii, necnon universæ Lugdunensis Ecclesiæ, recitato Prop. 1. *Quam Ecclesiam errasse errore facti scribit Pagius ad annum 849. ob apertissima monumenta, quæ extant apud Hincmarum, Annalistam Bertinianum, aliosque ejusdem ætatis Chronologos, quæ collegit etiam ex Historia Ludovici Cellotii Natalis Alexander Dissert. v. sæculi ix. Honoratus Tournely de Hæresi prædestinatiana, aliique. Sed hæc omnia neque Prudentii & Rhemigii elevare possunt auctoritatem, neque Gothescalcum aperte hæreticum demonstrare. Id vero probatur singula breviter excutiendo.*

Primo, inquit, Gothescalcum anno 847. docuisse duplicem Prædestinationem ad vitam, & ad interitum sempiternum in collatione quam habuit apud Insuabres cum Eberardo religiosissimo Comite, & in colloquio cum Episcopo Brixienfi Nothingo. Hunc certiorum reddidisse Rabanum Archiepiscopum Moguntinum, illumque sollicitasse ad confutandum Gothescalcum. Id clarissimum Archiepiscopum abunde præstasse, & insequenti anno 848. damnassee Gothescalcum in Synodo Moguntina. Verum hæc infirma sunt; primo quia non constat Gothescalcum asseruisse prædestinationem ad malum culpæ, quam tradunt Prædestinatiani, sed e contra liquet ex ipsius Confessione solam propugnasse prædestinationem ad pœnam ob prævisa demerita infligendam; unde etiam Vossius, qui de causâ Gothescalchi disputat libro vii. Historiæ Pelagianæ P. iv. dubitat, ne causâ tanta contentione agitata vere fuerit Logomachia. Qui vero reponunt Gothescalcum in gemina Confessione errorum simulasse, repugnant sibi ipsis, dum miserrimum Monachum usque ad extremum fuisse pertinacissimum, & perfricatæ in defensione errore frontis, continuis clamoribus conqueruntur. Præterea ipse Rabanus & Hincmarus fatentur Gothescalcum Augustinianæ doctrinæ fuisse studiosissimum: quod etiam si hæretico Prædestinatiano convenire possit, Monachus tamen Orbacensis non ideo se jactabat adhærere Augustino, ut negaret liberum voluntatis arbitrium: sed, ut de ipso libero arbitrio teneretur *quicquid a beato Augustino, & ceteris Catholicis PP. inculcatum est, non juxta perniciosissimum dogma Gennadii Massiliensis*: ut fatetur idem Hincmarus lib. de Prædest. cap. 21. Nothingus vero parum, ut Norisius inquit, in Augustiniana palestra exerci-

exercitatus, non is erat, qui posset Rabanum circa altissimam quæstionem informare: unde iste *non necessariam, & ad rem non pertinentem disputationem assumpsit*, quomodo in libro de tribus Epistolis affirmat S. Rhemigius. Neque tamen ego de Rabano viro doctissimo sinistram fero iudicium: sed errores prædestinarianos rectissime damnatos pronuncio; at nego a Gothescalco vere fuisse prolatos, tametsi aliquam causam damnationi, & quidem specie tenus iustam dederit postulatio Nothingi, & intemperans ingenium Gothescalchi: de quo dicam in fine disputationis.

Secundo proferunt adversus Gothescalcum luculentissima testimonia Hincmari, & Annalista Bertiniani, nec non Synodum Carisiacam, quæ anno 849. edidit contra Gothescalcum quatuor anathematis Capitula, in quibus sunt proculdubio Prædestinarianorum dogmata fulgurita. Verum neque hæc valida sunt, ut videntur. Nam quod pertinet ad Hincmarum, *fuit illi fallere & falli proclive*, inquit Cl. Sirmondus dissert. de 2. Dionysii cap. 4., *Camaleonti* a Nicolao Pontifice comparatus; & coacta ab illo Concilia ab eodem Romano Pontifice appellata sunt in Ep. 46. *Conventicula de Sanguinibus*. Præcipientem fuisse in ferendis sententiis constat ex eadem causa, in qua ipse accusator, ipse testis, ipse iudex Gothescalcum damnavit, & casum virginis inaudito irreligiositatis & crudelitatis exemplo vi compulsi ad projiciendam in ignem Apologeticam Scripturam, quam Concilio offerendam in sui defensionem paraverat. Constat & ex altera causa circa Trinam unitatem, in qua Gothescalcum veram traditionem propugnasse nemo jure negabit, cum universalis Ecclesia Trinam deitatem affirmet; & nihilominus Hincmarus etiam in hac causa Gothescalcum blasphemum, & hæreticum declaravit, temere mutilatis Ecclesiasticis hymnis, editisque de hoc etiam argumento fallacibus lucubrationibus. Constat etiam ex causa Rothadi, quem violentissima oppressione tentavit compellere, ut in propriam damnationem ipse subscriberet, quem tandem Romanus Pontifex, ut causæ meritum postulabat, absolvit, & Hincmaro exprobrauit Epist. 41. atrocissimum scelus, imitationemque Dioscori.

Licet ex his appareat Synodum Carisiacam conventiculum fuisse Hincmaro auctore coactum, neque certum sit damnasse Gothescalcum, ut demonstrat Norisius Tom. 4. pag. 686. respondeo tamen quatuor illius Synodi Capitula, sive anathematisimos immerito contra Gothescalcum urgeri. Enim vero hæc eadem capitula explosa sunt a Synodo Valentina celebrata anno 855. canone quarto his verbis: *Porro Capitula quatuor, quæ a Concilio Fratrum nostrorum minus prospecte suscepta sunt propter inutilitatem, vel etiam noxietatem, & errorem contrarium veritati, a pio auditu fidelium penitus explodimus, & ut talia & similia caveantur per omnia auctoritate Spiritus Sancti interdicimus*. Acquum est autem, ut potius Concilii Valentini, quam Carisiaci auctori-

etoritas teneatur . In hoc enim convenerunt omnes Episcopi trium provinciarum Lugdunensis , Viennensis , & Arelatenfis , at in Carisiaco sola factio Hincmari interfuit . Deinde Valentinae Synodi Canones anno 859. a Concilio Lingonensi firmati sunt , iterumque a pleno xii. Provinciarum Tullenfi habito eodem anno praesente Carolo Principe . Fuerat ergo injusta Sententia Synodi Carisiacae adversus miserum Gothescalcum .

Me non fugit doctissimum Alexandrum laudata dissert. v. §. xi. contendere decreta Valentinae Synodi non pugnare cum Capitulis Carisiacis . Possem insistere , quod aliter judicarunt Valentini Patres , qui in his Capitulis expresse fatentur contineri errorem contrarium veritati . Possem & appellare ad Hincmarum , qui in i. Opere de Praedestinatione miratur eadem Capitula , quorum fuerat ipse architectus , & tantis ac talibus viris , & Episcoporum primoribus fuisse damnata . Verum docebor , ut decet , ab Alexandro gravi ac perinsigni Scriptore . Valentinae Synodi Patres , inquit ille , errore facti putarunt Carisiacorum Auctores Capitulorum asseruisse Christum eadem ratione , eodemque sensu esse mortuum pro iis , qui pereunt , ac pro illis , qui per Christi gratiam perseverant ac salvantur . Id verissimum esse fateor , non enim Synodus Valentina probavit Christum non esse mortuum pro omnibus , ut sibi persuadent Janenistae . Dabo etiam Natali Alexandro , Canones Valentinos fuisse scriptos ab Ebbone Gratianopolitano Episcopo , qui occultas gerebat cum Hincmaro similtates ; Ebbonem etiam pannum aliquod quarto Canoni assuissse , quo expoliatur in Synodo Lingonensi & Tullenfi : tametsi genuinum esse praefatum Canonem , constet ex citata praefatione ipsius Hincmari , imo etiam probatum a Nicolao Papa Epist. 24. affirmet S. Prudentius : nec non idem testentur Annales Bertiniani ad annum 859. & Sirmondus ipse in Hist. Praedestinat. cap. 12. neque conjecturae Natalis Alexandri de assuto panno ab Ebbone quicquam probent , cum laudatus Canon fuerit paululum immutatus opera S. Rhemigii , ut consuleret dignitati Hincmari , & Caroli Regis , quorum auctoritate conscripta fuerant Capitula Carisiaca . Verum , ut dixi , omnia Alexandro concedantur .

Sed vicissim jure postulo , ut mihi Adversarii Gothescalchi similia concedant , maxime quod in mea sententia salvabitur a nota haereseos infelix ille Monachus , & demonstrabitur evidentius praedamnata haeresis Janeniana : cujus fautores , si opponamus dogmata Gothescalchi , habebunt fortassis rimulas mille . Quid ergo ? Erravit , inquis , Synodus Valentina errore facti , & Canone illo quarto proscripsit haeresim Semipelagianam , aut , si mavis hoc dicere , confirmavit Augustinianam doctrinam de morte Christi sufficienter pro omnibus , efficaciter tantum pro Electis , etiamsi hanc negasse Patres Carisiacos nulla ratione probetur , ut opinati sunt per errorem facti Patres Synodi Valen-

To.I.

Q q q

tinæ.

tinæ . Ergo a pari errare potuit Synodus Carisiaca errore facti , & quatuor Capitulis damnare hæresim Prædestinarianam de morte Christi pro solis prædestinatis , etiam si hanc hæresim propugnari a Gothescalco crederet Hincmarus deceptus errore facti . Hujus argumenti fulcrum est , quod dogma de Christi morte assertum a Gothescalco , quemadmodum & alia capita sensum Catholicum patiuntur . Nam Christum efficaciter pro solis prædestinatis mortuum esse , sicuti & dari prædestinationem impiorum ad sempiternum supplicium , non solum Gothescalcus affirmavit , sed Augustinus , Prosper , Fulgentius , & Theologi complures , qui tamen Prædestinatiani non sunt . Addis : Forte Ebbo Canoni Valentino assuit laciniam ob similitudines cum Hincmaro . Et istud licet falsum gratis iterum concedatur : sed mihi fas sit reponere ; Ergo & Hincmarus ad fallendum Ebbone proclivior potuit ornare fimbriis Capitula Carisiaca propter iratum , aversumque animum . ab homine dura crudelique fortuna jactato .

Videamus modo quare tam humaniter sentiamus de Gothescalco : Prima ratio est , quod digniores fide videantur Rhemigius , Prudentius , Lupus Ferrariensis , Lugdunensis Ecclesia , & Synodus Valentina , quam Hincmarus ; ut liquet ex dictis . Deinde quia revera dogmata Gothescalchi Catholicum habent sensum , & toto cælo distant ab errore Calvinii , & Janseii . Præterea quoniam ex ipsomet Hincmaro colligitur Gothescalcum Catholicum , non hæretico sensu ea dogmata propugnasse . Primo enim accusatur dixisse quosdam esse prædestinatos ad mortem æternam ; quod de malo pœnæ accipiendum , liquet ex ejus Confessione , & ex ipso Hincmaro : in illa quippe ait , Deum prædestinasse reprobos ad interitum : *Propter præscita certissime ipsorum propria merita* : & apud Hincmarum de Prædest. cap. 21. *Præscivit eos pessimum habituros ortum , pejorem obitum : prædestinavit autem eos ad luendum perenne tormentum , & sempiternum interitum* . Accusatur secundo loco dixisse non esse in Deo voluntatem salvandi omnes : quæ assertio de voluntate efficaci vera est , & traditur ab Augustino cap. 96. Enchiridii , & eadem ferme sunt verba Gothescalchi apud Hincmarum in Epist. ad Rom. Pontificem Nicolaum . Accusatur tertio dixisse Christum non esse mortuum pro totius mundi Redemptione : quæ horrenda quidem , & recte anathemate proscripta assertio est : sed Gothescalcus ait Christum non esse mortuum pro reprobis , ut scribit de Prædest. cap. 29. idem Hincmarus , *perpetualiter* , idest , absoluta & efficaci voluntate donandi illis perseverantiam , & coronam . Rursus benigne de Gothescalco sentimus , propterea quod hæc tria capita accusationis sunt omnino eadem cum objectis Gallorum , ut constat ex libro Prosperi adversus Collatorem , & ex Responsione ad Objectiones Vincentianas . Quare Gothescalco idem contigit quod assertoribus Augustinianæ doctrinæ , siveque de iisdem commentitiis erroribus accusatus . Ulterius Hincmarus

marus ubique accusat Gothescalcum quod eandem prorsus teneat pravitatem doctrinæ cum Monachis Adrumetinis, aliisque veteribus Prædestinarianis. At hæresim Prædestinarianam non fuisse apud Adrumetinos, neque anathematizata a Prospero, demonstratum est supra; neque oppositum docent Tournely, Pagius, & Alexander. Fatemur itaque Gothescalcum audisse tanquam Prædestinarianum, erroresque ei tributos jure fuisse proscriptos: sed ab eo defensatos pravo sensu, & servata undequaque æquitate actum cum eo ab Hincmaro affirmare non possumus. Concedimus denique Gothescalco claros fuisse adversarios, inter quos Joannes Erigena, qui a Floro Diacono egregie confutatus est: sed non defuerunt ei Defensores inculpatae vitæ, ac famæ celebrioris, quos paullo supra commemoravi.

Demum in hoc Gothescalcum reprehensione dignissimum cenfeo, quod verum dogma imprudenter defendit, atque, ut ait Christianus Lupus, non ex charismate. Prædestinationem enim ad mortem in aures vulgi non sine offensione & scandalo prædicavit, ita ut multi in desperationem perducti dicerent: *Quid mihi necesse est pro salute mea, & vita æterna laborare? quia si bonum fecero, & prædestinatus ad vitam non sum, nihil mihi prodest*: inquit Rabanus in literis ad Eberardum. Meminisse debuerat Gothescalcus etiam Massiliensibus sanctissimis doctissimisque viris apparuisse Augustinianam doctrinam primo aspectu perdifficilem & asperrimam, ac talem multo magis videri hominibus rudioribus, quibus altissimæ quæstiones non sunt, nisi caute, proponendæ. Imo prædestinationem ad mortem, quæ non potest nisi verbis admodum crudis explicari, nunquam apud imperitam plebem prædicandam esse arbitramur: prædestinationem vero ad vitam diverso plane modo, quàm soleant quidam ex Cathedra transeuntes ad pulpita, qui ut habeantur doctiores prædicandi officium legitime non observant. Talis fuit Gothescalcus: qui prædestinationem ad mortem inter vulgi catervas, prohibentibus etiam Episcopis, pertinacissime dogmatizavit, cum tamen nihil interesset rei Christianæ, quomodo scribit Præf. 2. in Sæculum IV. Benedictinum Eruditissimus Mabillonius, incumbere in vocabulum Prædestinationis ad interitum, si modo aliis verbis Catholica Sententia teneretur. Neque Augustinianam doctrinam satis superque munitam necessum fuit Gothescalco a Prædestinarianæ hæresis suspitione purgare, cum damnatis Semipelagianis tranquilla pace, regnoque suo potiretur. In hac ergo parte Gothescalchi ingenium laudare non possumus, eumque propriæ famæ pessime consuluisse putamus, ita ut neque in ipso maculam hæreticæ pravitatis inveniamus, neque optimi Theologi temperamentum.

CAPUT XV.

*An opportunum sit Populis prædicare Augustinianam
de Prædestinatione Sententiam.*

HISTORIA Gothescalchi demonstrat posse etiam veræ doctrinæ in aures vulgi effusione magnam cieri tempestatem : cumque nonnulli, qui forte has nostras disquisitiones perlegunt, suggestum debeant conscendere, ut vitent contentionum pericula, consulantque honori Ordinis sui, & Christianæ plebis utilitati, hanc etiam quæstionem instituo, num, & quo pacto possint de prædestinatione Sanctorum haberi conciones; quam monitionibus præceptisque, non argumentationum textura juxta Augustini sensa resolvam.

M O N I T U M I.

Quamquam verissimum est dari prædestinationem Electorum ad vitam, & impiorum ad mortem, illa autem fiat ex Dei beneplacito, hæc ex præscientia meritum, atque omnis prædestinatus salutem, confecturus sit, omnis reprobis sempiternum supplicium; imprudenter se gereret Orator, qui tantummodo exponeret divinorum decretorum immutabilitatem : E. G. si demonstrandum proponeret, non posse prædestinatum excidere a vita æterna, aut reprobum esse immutabiliter damnandum; atque in his duntaxat assertionibus tota versaretur oratio. Probat 1. Scripturarum Sanctorum auctoritate, quæ nobis æternam vitam tanquam mercedem & coronam justitiæ proponunt, & nos ad observantiam præceptorum proposita retributione exhortantur, eamque apprehendendam esse declarant a perseverantibus usque in finem. Contra ignem æternum legis transgressoribus minitantur : quibus spei, timorisque incitamenti remouentur vitia, virtutesque foveantur; unde hæc monita exitiosissimum est prætermittere. Accedit malitia hominis & ad torporem proclivitas, quæ duo percellunt improbos ut nil quærant præterquam patrocina peccandi : quos etiam tentat supplantator in desperationem inducere. Atque hoc primum præceptum traditur ab Augustino in lib. de Dono Persev. cap. xx. i. his verbis : *Quæ tamen prædestinatio non ita populis prædicanda est, ut apud imperitam vel tardioris intelligentia multitudinem redargui quodammodo ipsa sua prædicatione videatur; sicut redargui videtur & præscientia Dei, quam certe negare non possumus, si dicatur hominibus, sive curratis, sive dormiatis, quod vos præsciuit qui falli non potest, hoc eritis. Dolosi autem vel imperiti medici est etiam utile medicamentum sic alligare ut aut non prosit, aut obfit.*

M O N I T U M II.

Præsertim, ne offendat conscientiam infirmam, abstinere debet Concionator a prædicanda prædestinatione ad interitum & ad mortem. Quod probatur præclarissimis Scripturarum exemplis, quibus ubique declarantur summa Dei misericordia, longanimitas, patientia, humanitas, voluntas salvandi omnes, alia plurima, quibus ad veniam petendam facile obdurati trahuntur. Cavendum est enim, ne ipsa veritas fiat occasio scandali mulierculis ad desperandum pronis, ac si mus imitatores Gothescalchi, cujus rationem, ingeniumque reprehendimus. Ergo a vocabulis, quæ imperitos turbare possunt, abstinendum est penitus. Atque hoc etiam præceptum docet nos S. Pater eodem lib. cap. 16. dicens: *Facile est enim, imo & utile, ut taceatur aliquid verum propter incapaces, maxime si timendum inde sit, ne peiores faciamus eos qui non intelligunt, dum volumus eos, qui intelligunt, facere doctiores.*

M O N I T U M III.

Haud recte se gereret, qui prædicante Catholico viro prædestinationem ex meritis, adversus sacram concionem obloqueretur. Primo enim, ut diximus lib. IV. capite 6. & 11. Medistarum doctrina nulla, perstringi debet censura. Deinde Concionatores illi non Theologicas quæstiones in rostris pertractant, neque divinorum decretorum altitudinem tunc inquirunt; sed moribus formandis incumbunt: & quidquid proferunt, si intelligantur de prædestinatione in ordine executionis, verissima sunt. Quare cum in habendis Concionibus hunc sibi scopum proponant erudiendi plebem, viamque demonstrandi, quæ perducatur ad gloriam, debemus illorum doctrinam probare; neque apud multitudinem redarguere, quæ nullatenus pertinent ad exercitamenta Scholarum.

M O N I T U M IV.

Esti hæc vera sunt: debemus tamen gratuitam prædestinationem ad gloriam prædicare; quod licitum est, si prudenter fiat, simulque bonorum operum onera, quorum beatitudo merces est, & corona, Apostolica hortatione ingerantur, neque dissensiones Scholasticæ è suggestu profiliant. Hoc monet Augustinus citato libro cap. XX. dicens: *Quid est, quod invicta conclusi violentia veritatis recte se isti dicere existimant, Esti verum est quod dicitur de prædestinatione, non est tamen populis prædicandum? Prædicandum est prorsus, ut qui habet aures audiendi, audiat.* Id vero S. Pater etiam ratione confirmat; si enim recte

recte prædicatur pudicitia, pietas, aut quæcunque alia virtus, ut Deus recte colatur, & diligatur proximus: ergo & recte prædicatur prædestinatio gratuita, ut nemo mortalium glorietur in seipso, sed tantum in Domino.

MONITUM V.

Rationem, quam Augustinianus in prædicanda prædestinatione servare debet, est excitare in unoquoque spem, & ad sedulam legis observantiam vehementer hortari. Quæ profecto consecuturus est, si E. G. asserat prædestinationis nostræ causam esse Dei misericordiam & infinita merita Redemptoris, qui regeneravit nos in spem vivam: petendam esse assiduis precibus perseverantiam a Domino, cum omnem donum perfectum descendat a Patre luminum: operandum esse cuicunque salutem suam, cum timore ac tremore, servandumque diligenter præcepta legis; quia licet prædestinatio beneplacitum sit Dei, ejus tamen consecutio meritis liberi arbitrii alligatur: fugiendum denique peccatum tanquam a facie colubri, propterea quod quisquis damnatur ad gehennam, propter sola peccata damnatur. Porro Augustinianam doctrinam tali cautione proponere videtur valde proficuum: quippe ex consideratione divinæ misericordiæ quæ gratiam & gloriam gratis præparat, nemo est quantumvis sceleratissimus, qui sperare non debeat, cum plus donare possit Dei misericordia, quam hominum demereri malitia. Ex consideratione autem infirmitatis humanæ, & incertitudinis finis, quem nemini Deus revelat, ut simus semper parati, & nescientes diem, neque horam vigilemus tanquam ad adventum furis, fatalis timor incutitur, sanctæque bonorum operum sollicitudo. Audiatur eodem lib. cap. XXI I. Sanctus Pater hæc præmonens. *Non existimo, inquit, debere sufficere, nisi hoc, vel hujusmodi aliquid addat, ut dicat, vos itaque obediendi perseverantiam a Patre luminum sperare debetis, & quotidianis orationibus poscere, atque hoc faciendo confidere non vos esse a prædestinatione alienos, quia etiam hoc ut faciatis, ipse largitur. Absit autem a vobis ideo desperare de vobis, quoniam spem vestram in ipso habere jubemini, non in vobis. Maledictus enim omnis, qui spem habet in homine, & bonum est confidere in Domino, quam confidere in homine, quia Beati omnes qui confidunt in eum. Hanc spem tenentes servite Domino in timore, & exultate ei cum tremore.* Ita Augustinus; ac subinde: *Hæc atque hujusmodi cum dicuntur sive paucis, sive multitudini Ecclesiæ, cur metuimus Sanctorum prædestinationem prædicare?*

MONITUM VI.

Quoniam in contrariis opinionibus exercitati credunt ex doctrina Augustini removeri virtutes, & ad studia operum bonorum torporem indu-

induci , quod falsum omnino est , atque ut satis constat perantiquum Semipelagianorum convicium : quo iis quoque oratio possit esse jucunda , neque præjudicatis eorum opinationibus collineet : in hunc finem dirigendus sermo est , ut ad pietatis officia audientium corda inflammantur , maxime quod legitimum Concionatoris sit munus non aures tantum sonare & numeris permulcere , sed opportune , importune arguere , obsecrare , plantare , evellere in omni patientia & doctrina . Hunc vero finem ex Augustiniana Theologia satis percommode assequetur orator . Humilitas enim E. G. , quæ virtutum fundamentum est ceterarum , sive cognitio , qua homo sibi ipsi vilescit , facile excitatur , si quis animadvertat neminem discerni ab altero ex semetipso , sed divinorum liberalitate donorum ; quod præsertim suadetur Augustiniana sententia . Ad spem trahit meditatio divinæ omnipotentis & misericordis , quoniam his magis confidimus , qui præ ceteris nobis opitulari & possunt & volunt . Et sunt quidem nostræ sententiæ cardines , quod complacuit divinæ misericordis regnum pusillo gregi parare ; & quod potens est suscitare filios Abraham ex lapidibus , & producere mel de petra , oleumque de saxo durissimo . Timor quoque oritur ex consideratione humanæ infirmitatis & indignitatis : Augustiniana autem doctrina humanam docet infirmitatem , ubi demonstrat arbitrium non valere ad bonum , nisi ab omnipotenti bono adjuvetur , neque Deum diligere , ut oportet , si non sancta voluptate & caritate trahatur . Atque adeo nobis merita nostra mala proponit , ut nullus Augustini discipulus divinarum gratiarum postulet amplitudinem , nisi ab inexhausto fonte misericordis ac pietatis . Neque faciunt nos Augustini dogmata desides , languidosque ad agendum ; quin validius excitant ad orandum , cum oriatur orationis necessitas ex humili cognitione propriæ infirmitatis , & ex contemplatione divinæ misericordis . Caritatis quoque singulare motivum est , recogitare perpetuam Dei dilectionem , qua elegit nos ante constitutionem mundi , ut essemus sancti , & immaculati , non ex operibus iustitiæ quæ fecimus nos , sed secundum misericordiam suam magnam . Excitatur præterea ad grati animi recordationem , & amorem erga Dominum Jesum Christum , cujus passionis merito donatur nobis perseverantia , & a massa perditionis specialissimo beneficio subtrahimur . Denique inducitur nobis ex Augustinianis principiis ne in peccatum aliquod prolabamur , aut negligenter exequamur opera poenitentis , cum incerti simus an post peccatum & voluntariam obdurationem redonetur nobis præter auxilium sufficiens ea gratia victrix , quæ superat motus perduelli concupiscentiæ : quam tamen gratiam debemus , ut dictum est , & petere orando , & sperare ab infinita Dei misericordia , quæ clamantes ad se nunquam deserit .

His ergo monitis prædestinationem Sanctorum poterit quisque in Augustiniana Sententia populis prædicare : imo virtutes promovere ,
extrir-

extirpare vitia, vitare scandala, & incontaminatam Augustini doctrinam provide tueri adversus veteres Massiliensium objurgationes, quas aliquando repetere nonnullos minime pudet.

OPPOSITIO UNICA.

Adversus prædicta objectio una remanet, eaque ex actis adversus Leonardum Utinensem inclyti Ordinis Prædicatorum. Is ergo anno 1549. dum per Quadragesimam Utini conciones haberet, prædicationem Prædestinationis nullam aliam rationem dari, quam beneplacitum divinæ voluntatis, & nihil in æternitate præcessisse ipsam Dei voluntatem prædestinantem. Protulit inter cetera propositiones duas, quarum prima erat, *Prædestinatus nullo modo damnari potest*: altera, *Prædestinatio in voluntate & arbitrio nostro posita non est*. Cum hæc male a populis exciperentur, Vicarius Generalis Utinensis data ad Joannem Grimanum Patriarcham Epistola Leonardum tanquam hæreticum accusavit. Grimanus vero, qui Concionatoris defensionem suscepit, & ipse tanquam hæresis suspectus ad Sanctæ Inquisitionis Tribunal delatus est. Non est ergo licitum prædicare populo prædestinationem gratulitam, & rcvera hæc ad torporem, desperationem, vel saltem scandalum Christianam plebem inducit.

Resp. 1. Nego consequentiam: nam, ut liquet ex duabus propositionibus, quas Leonardus demonstrandas assumpsit, non videtur ab eo servatum primum & secundum monitum supra ex Augustino depromptum. Ceterum etsi Vicarius Generalis, & nonnulli Utinensium steterint adversus Concionatorem, ejus tamen dogma a Patriarcha, necnon a doctioribus probatum est. Et sane illud prudenter expositum non ad desperationem impellit, ut diximus, sed spem excitat vividiorum. *An vero timendum est* (inquit Aug. de Dono Persev. cap. 22.) *ne tunc de se homo desperet, quando spes ejus ponenda demonstratur in Deo; non autem desperet, si eam in se ipso superbus & infelicitissimus poneret?* Deinde licet aliqui sint ad vitia nimium proni, atque in torporem & negligentiam inclinent; non est tamen reticenda prædestinationis prædicatio ad utilitatem humilium, qui gloriantur tamen in Domino, & ad reprehensionem superbiorum qui confidunt in homine. Si enim quidam sint, qui nunquam orent, propterea quod Deus scit quid nobis sit necessarium, aut ex prædicatione Orationis fallaci consecutione inferant non innotescere Deo hominum desideria; *Num propter tales* (ait eodem lib. cap. 17. S. Pater) *hujus sententia veritas deferenda, aut ex Evangelio delenda putabitur?* Sed plura ibidem, & sequentibus Capitibus acerrimus Prædestinationis & Gratiz Vindex ac Propugnator.

Resp. 2. Leonardum Utinensem immerito fuisse accusatum, & pro
eo

eo pugnasſe Joannem Grimanum in Epiftola ad Vicarium Generalem Utinenſem, in qua gratuitæ prædeſtinationis ſententia proculdubio exponitur ac defenditur . Hanc vero Epiftolam, quantum ad dogma ſpeſcit, probatur Tridentini Concilii Patres . Quod probatur I. Ex Epiftola Cardinalis Lotharingii ad Pium IV. Pontificem Maximum, in qua refert Patriarcham Aquilejenſem unanimi conſenſu fuiſſe purgatum : unde Pontifex non ſolum Grimanum in gratiam recepit, ſed etiam purpura Cardinalitia exornare decreverat : qua tamen Grimanum denuo accuſatum de amicitia cum quibuſdam hæreticis privarunt poſtea malevoli . II. Ex Epiftola ad S. Carolum Borromæum data Tridenti die 14. Auguſti anno 1563. & a quatuor Cardinalibus ſubſcripta : in qua hæc leguntur ; *Judicaverunt omnes abſolvendum a calumnia ipſi ita impoſita, aſſerentes illum nedum proprium, verum etiam ſua nationis Theologorum, quibuſcum totum negotium diligentiffime contulerat, ſenſum eſſe* . III. Ex votis Archiepiſcoporum, Epifcoporum, & Theologorum, qui rem diſcuſſerunt : quæ vota poteſt quiſque legere in Hiſtoria Pallavicini, & apud Antoninum Reginaldum in libro de Mente Concilii Tridentini circa Gratiam efficacem Parte 1. cap. v. Tandem ex judicio ac ſententia pronuntiata die 14. Septembris eodem anno, & in publicas tabulas relata, quæ talis eſt : *Domini noſtri Jeſu Chriſti nomine invocato, ſolum Deum præ oculis habentes, & de aliorum in Theologia Peritorum conſilio & aſſenſu, judicamus, atteſtamur & pronunciamus literas Joannis Grimani Patriarchæ Aquilejenſis, cum Apologia junctas, non eſſe hæreticas, ſeu de hæreſi ſuſpectas, neque ſic declaratas eſſe ſcandalofas : non tamen divulgandas propter nonnulla difficilia minus exacte in eis tractata & explicata* .

Dices : Civitas Utinenſis, & Forojulii Provincia Patriarcham Grimanum ad Synodum provocarunt ; atque, ut conſtat ex poſtremis verbis ſententiæ latæ, Grimani Epiftolæ prohibitæ ſunt ne publicarentur . Ergo ſententia de Prædeſtinatione, quam aſſerebat Grimanus, ſuſpecta eſt, non populis prædicanda .

Reſp. Priorem partem antecedentis falſam eſſe, licet enim Vicarius Utinenſis, alique imperiti concionem F. Leonardi accuſaſſent, & poſtea multi Criminatores etiam Patriarcham Grimanum ; tamen Utinenſis Civitas Præſuli ſuo omni humanitatis officio conjuncta operam maximam contulit, ut ipſius innocentia ſicret manifeſta, & doctrina haberetur immunis . Nam cum Grimano unum fuiſſe ſenſum Theologorum ſuæ nationis affirmarunt Cardinales quatuor Legati Synodi Tridentinæ citata Epiftola ad Borromæum . Imo & univerſa Venetorum Reſpublica Grimano publicis Epiftolis ſedatis tempeſtatibus gratulata eſt : Ad alteram partem antecedentis dico non eſſe a PP. Tridentinis ſtatutum ne prædicaretur Prædeſtinatio gratuita, ſed ne publicarentur Epiftolæ Grimani, non propter dogma, ſed propter nonnulla, quæ ille

TdJ.

R r r

minus

minus in Theologicis disputationibus exercitatus non satis exacte explicaverat : quæ ex eadem Epistola ad Carolum Borromæum, & ex laudatæ Sententiæ verbis certa sunt, & majoribus quasi theatris proposita.

At Grimanus, inquis, etiam post sententiam Tridentinam ad Sanctæ Inquisitionis tribunal delatus est. Ita sane : sed irritò perverforum Accusatorum consilio. Magis quippe, magisque Præfulis innocentia refulsit : & summa cum laude fuit absolutus, ita ut ipsi honoris causa hymni publice canerentur; quorum unam duntaxat strophem recitabo:

*Quam longos sævosque fero, Pater, impete tristis
Insultus odii ardenti virtute tulisti!*

*Non secus ac amplam media inter nubila fervens
Efficit urenti semitam sibi lumine Phæbus.*

Demum etiamsi Grimanus non propter perversa tempora grassantis hæresis Lutheranae, sed etiam ob dogmatum perversitatem fecisset purpureæ palliique jacturam: Assertoribus ac Prædicatoribus Augustinianæ doctrinæ sufficit, in his, quæ ad hanc spectant, Patriarchæ Aquilejensis Epistolas nullam reportasse censuram, sed approbationem Patrum Tridentini Concilii, qui Grimanum absolvendum esse judicarunt, quoniam de prædestinatione differens ab Augustino, Prospero, Bernardo, & Thoma Aquinate nequaquam recesserat: ut liquet ex Epistola ad Borromæum non semel citata.

C A P U T XVI.

De numero, & signis Prædestinatorum.

ELECTORUM numerum incertum Viatoribus esse nemo ignorat; & Ecclesia in Dominicis Quadragesimæ ita precatur: *Deus, cui soli cognitus est numerus Electorum in superna felicitate locandus*; quæ verba habet etiam D. Thomas P. p. Q. xxii. art. 7. Quidam tamen, Prædestinatos Angelis, qui ceciderunt, numero comparandos esse opinantur: aut Angelis etiam, qui steterunt. At Angelorum quoque sive malorum, sive bonorum multitudinem dinumerare non possumus, quamquam id tentarunt otiosi quidam homines, magi præsertim & Cabbalistæ. Præterea Augustinus lib. xxii. de Civ. Dei cap. 1. de sempiterna illa Jerusalem scribit: *Nulla civium suorum, idest Angelorum lapsorum numerositate fraudabitur, sed uberiore etiam copia fortasse regnabit.* Quamvis autem Prædestinatorum numerus nobis incertus est, propter infinitam Dei prædestinantis misericordiam quisque sperare tenetur, se in eodem numero comprehendi, & sedulam navare operam ne ob patrata crimina æterno addicatur supplicio: atque, ut

Bernar.

Bernardus monet Serm. 1. in Joan., sollicitus esse in timore ac tremore, & humiliari sub potenti manu Dei, quia quales futuri sumus, id nos scire est omnino impossibile.

PROPOSITIO. Magnus est Electorum numerus, at valde exiguus, si comparetur cum numero damnandorum.

Magnum quidem esse Prædestinatorum numerum probatur ex cap. VII. Apocalyp. v. 9. *Vidi turbam magnam, quam dinumerare nemo poterat, ex omnibus gentibus, & tribubus, & populis, & linguis: stantes ante thronum, & in conspectu Agni, amicti stolis albis, & palma in manibus eorum.* Sed in comparatione reproborum Electos esse perpaucos suadet primo ex sacris literis. Matthæi enim VII. 14. legitur; *Angusta est porta, & arcta est via, quæ ducit ad vitam: & pauci sunt qui inveniunt eam:* Et Lucæ XI. 24., cuidam Christum interroganti, *Domine, si pauci sunt qui salvantur?* Ipse respondit: *Contendite intrare per angustam portam: quia multi, dico vobis, querent intrare, & non poterunt.* Item Mat. XXII. 14. *Multi sunt vocati; pauci vero electi.* Comparantur etiam prædestinati ab Isaia. Cap. XV. & XXIV. spicis, quæ post messem in agro remanent, & granis uvarum, racemisque residens in palmitibus post vindemiam. Deinde appellantur in Evangelio *pussillus Grex*, non solum ob humilitatem, sed etiam ob maiorem numerum reproborum, inquit Beda lib. IV. cap. 54. in XI. Lucæ.

Secundo probatur ex PP. S. P. Augustinus in Ps. 48. *Quot sunt illi, ait, qui videntur observare præcepta Dei? Vix invenitur unus, vel duo, aut paucissimi. Ipsos solos liberaturus est Dominus, & ceteros damnaturus.* Atque magnus Gregorius Hom. XIV. in Evangelia: *Ad fidem, inquit, multi veniunt, sed ad celestia regna pauci perveniunt.* Joannes autem Chrysostomus ita Antiochenos gravissima Oratione XIV. compellat: *Quos putatis esse in Civitate nostra, qui salvifiant? Non possunt in tot millibus centum inveniri qui salventur: quin & de his dubito. Quod ex depravatis in quolibet hominum genere moribus disertissimus Orator demonstrat.*

Accedit evidentissima ratio. Triplex enim distinguitur hominum status, naturæ videlicet, legis, & Gratiæ, sive ab Adam ad Moysen, a Moysen ad Christum, a Christo ad hæc tempora & deinceps ad mundi finem. In statu legis naturæ multa malitia hominum erat in terra; cuncta cogitatio intenta erat ad malum, & omnis caro corruerat viam suam super terram; ita ut pœnituerit Deum quod hominem fecisset, & tactus dolore cordis intrinsecus consumpsisset omnem substantiam quæ erat super terram ab homine usque ad pecus, tam reptile, quam volucres cæli, exceptis animantibus, quæ cum Noe ingressæ erant in Arcam. Narrat magnam Dei vindictam sacrum Genesios caput sextum. ac septimum. Post diluvium iterum grassata est iniquitas, & una cum

gentibus idolorum cultus, præceps appetentia, indomita, atque effrenata libido. Legem scriptam Judæi soli habuerunt, neque omnes illam servarunt, sed pauci admodum; ita ut David de Israelitis suæ ætatis hæc pronuntiaverit: *Omnes declinaverunt, simul inutiles facti sunt: non est qui faciat bonum, non est usque ad unum.* Quid vero de statu legis gratia? Major in ea pars est aut Ethnicorum, aut hæreticorum. Vix enim Catholici partem tenent Europæ dispersi in ceteris mundi plagis tanquam fructiferum arbustum in sylva. Neque omnes Catholici salvi sunt. Horum aliqui Mundani dicuntur, aliqui Clerici, aliqui Fratres aut Monachi. Quantum spectat ad illos, quos Mundanos appellant, *Præter paucissimos, qui mala fugiunt, quid est aliud pene omnis cætus Christianorum quàm sentina vitiorum?* inquit in libro iux. de Provid. Salvianus. De Clericis ob reverentiam Ecclesiastici ordinis nihil dicturi sumus. Mittimus ob eandem causam Monachos, quos ita alloquitur in Epist. ad Guilelmum S. Bernardus: *Quis in principio cum Ordo caput Monasticus ad tantam credidisset inertiam Monachos devenire? Ob quantum distamus ab iis, qui in diebus Antonii extiterunt Monachi! Sic Macarius vixit? Sic Basilus docuit? Sic Antonius instituit? Adamus Bernardi verbis: Sic Augustinus præcepit?* Ex his itaque constat in omni statu, & in omni hominum genere esse Prædestinatorum revera pusillum gregem. Debemus autem ex hoc numero Electorum, exiguo apprehendere quid possit liberum arbitrium, quidquæ homini deberetur, nisi ei Reparatoris misericordia subveniret; ideoque spe simul erecti, ac timore concussi abjicere ægritudinem animi, atque arrogantiam.

SIGNA autem prædestinatorum hæc sunt. Primum sensuum illecebris mundique voluptatibus nuncium mittere, non quidem solo corpore, sed animo ac spiritu, neque ex prava deliberatione, sed ex libertate & consilio. Pollicitus est enim Deus fidelis in omnibus verbis suis centuplum & vitam æternam, *Si quis reliquerit domum, vel fratres, &c.* Matt. cap. xix. 29.

Secundum signum est tolerare tranquillo animo persecutiones & injurias propter justitiam, ut colligitur ex eodem Evang. cap. v. 10.

Tertium signum est humilitas non ficta, sed vera, & quæ in omnibus, & erga omnes se prodatur: legitur enim in Psalmo C. 7. *Nam habitabit in medio Domus mea qui facit superbiam:* Et Matth. xv. 11. 3. *Nisi conversi fueritis, & efficiamini sicut parvuli, non intrabitis in regnum calorum. Quicumque ergo humiliaverit se, &c.*

Quartum signum est ardens in Deum & proximum caritas: de qua in Epist. ad Rom. cap. v. 11. 14. *Quicumque spiritu Dei aguntur, hi sunt filii Dei.* Huic caritati adest individua divinorum præceptorum observantia, de qua Christus Dominus Joan. xiv. 15. *Si diligitis me, mandata mea servate.*

Signum

Signum quintum est libenter Dei verbum audire, Majorum exhortationibus acquiescere, & spiritali lectione magnopere delectari. Unde Joan. x. 27. legitur: *Oves meæ vocem meam audiunt.*

Sextum signum est specialissimus Deiparæ cultus. Nam de beatissima Virgine exponi potest versus 35. Capitis Proverbiorum octavi: *Qui me invenerit, inveniet vitam, & hauriet salutem a Domino.*

Septimum signum est non confidere in homine, sed in Deo, dicente Davide Ps. xxxix. 5. *Beatus vir, cujus est nomen Domini spes ejus.*

Octavum signum est sollicitudo in vitandis peccandi periculis, anxietas præteritorum peccatorum, studium placandi Deum fervens & expeditum, Sacramentorum frequentia, verborum castigatio, candor morum, puritas mentis, frequens examinatio conscientię, propositum perseverandi usque in finem, summa in reddendis votis fidelitas, & futuri judicii sine desperatione formido. Ad hæc omnia alia facile reducuntur.

C A P U T XVII.

An reprobatio positiva antecedit præscientiam peccatorum.

DE PRÆDESTINATIS hætenus. De reprobis differendum est modo; qui in sacris literis vocantur *maledicti, vasa iræ, & contumelia, repulsi, despecti, hædi a sinistris statuendi*, aliisque consimilibus characteribus. Est autem reprobatio duplex, alia *positiva, negativa* altera. Positiva est actus divinæ voluntatis, quo reprobis infligenda pœna decernitur. Negativa vero est privatio prædestinationis, sive non electio aliquorum ad gloriam electis aliis. Dari autem reprobationem negari non potest, dicente Domino in Evangelio Matth. cap. xxv. *Ite maledicti in ignem æternum, qui paratus est diabolo, & angelis ejus.* Unde Vaticanum Concilium Canone III. *Fidenter, inquit, fateamur prædestinationem Electorum ad vitam, & prædestinationem impiorum ad mortem.*

Calvinus de reprobatione positiva asseruit nullam aliam causam habere præter divinam voluntatem, idest, fieri independenter a prævisione cujuscunque peccati tam actualis, quam originalis. Docuit enim impius hæresiarcha aliquos tam Angelos, quam homines conditos fuisse a Deo ad æternam damnationem, Deumque ipsum; ut latum a se decretum exequatur, imponere reprobis necessitatem peccandi, eosque positive & efficaciter ad peccatum impellere. Hæc affirmat Calvinus in Exposit. Epist. ad Rom. lib. III. Instit. cap. 21. & alibi: Zuinglius lib. seu Serm. de Providentia, Joannes Piscator in notis ad Collat.

Collat. Vorstii, Theodorus Beza in libro de Prædest. aliique Calviniani: quamquam nonnullis illius sectæ hæc sententia visa est detestabilis, ita ut multi Magistri sui dogma repudiaverint. Glassius Saxo-Gothanus, *Faceſſat*, inquit lib. 3. Grammat. Tract. 3. Can. 30., *illud dogma ad Orcum, ex quo in proſcenium Eccleſia productum eſt*. Merito itaque Calvinianam blasphemiam etiam ab hæreticis reprobata damnavit Sacroſancta Tridentina Synodus Seſſ. 6. Canone 6. & 17. Quare ſit

PROPOSITIO. Calvinianum de reprobatione dogma horrendum eſt, detestabile, & omni execratione digniſſimum.

Etenim repugnat 1. Sacrarum Scripturarum oraculis: cujuſmodi ſunt Sap. x1. 25. *Diligis omnia quæ ſunt, & nihil odiſti eorum, quæ feciſti*. Oſeæ x1 11. 9. *Perdiſio tua ex te Iſrael, tantummodo in me auxilium tuum*. Jacob. 1. 13. *Nemo cum tentatur dicat quoniam a Deo tentatur, Deus enim intentator malorum eſt: ipſe autem neminem tentat*. Et alia quamplurima. Accedunt definitiones Conciliorum. Arauſicani celebrati an. 529. Canon xxv. eſt: *Aliquos ad malum divina poteſtate eſſe prædeſtinatos non ſolum non credimus, ſed etiam, ſi ſunt, qui tantum malum crederent, cum omni deteſtatione illis anathema dicimus*. Et Synodus Valentina habita, ut diximus cap. xiv. in Cauſſa Gotheſcalchi anno 855. Canone 3. poſt verba paullo ſupra recitata ait: *In eleſtione tamen ſalvandorum miſericordiam præcedere meritum bonum: in damnatione vero periturorum meritum malum præcedere juſtum Dei judicium*. Citatus denique Canon 17. Tridentini Concilii talis eſt: *Si quis dixerit reliquos omnes qui vocantur, vocari quidem, ſed gratiam non accipere, utpote divina poteſtate prædeſtinatos ad malum; anathema ſit*.

Probatur 2. Traditione, quam etiam agnoverunt Centuriatores Magdeburgenſes Cent. 2. cap. 4. ubi de Patribus, qui proximo ab Apoſtoliſ ævo vixerunt, ita ſcribunt: *De Prædeſtinatione ita docuerunt, ut quantum ad utriuſque, boniſ ſcilicet, & diaboli lapſum attinet, negarint eum fatali neceſſitate contigiffe: nec prædeſtinationem in eo Dei, ſed præſcientiam ſolam admiferunt*. Egregia Juſtini Martyris in Apologia ad Antoninum Pium, & in Dialogo cum Tryphone teſtimonia collegit Voſſius lib. v 11. Hiſtoriæ Pelagianæ P. 2. theſi 12. Item Anonymi Scriptoriſ Quæſtionum eidem Juſtino falſo tributarum, nec non Iſidori Peluſiotæ Epiſt. 56. libri primi. Sed hiſ prætermiſſis S. P. Auguſtinus fauces perſtringit Calvino lib. x1 11. de Trinit. cap. 12. ubi ait: *Modus iſte, quo traditus eſt homo in diaboli poteſtatem, non ita debet intelligi tanquam Deus hoc fecerit, aut fieri juſſerit; ſed quod tantum permiſerit, juſte tamen*. Et lib. 3. contra Jul. cap. 18. *Bonus eſt Deus, juſtus eſt Deus: poteſt aliquos ſine bonis meritis liberare, quia bonus eſt: non poteſt quemquam ſine malis meritis damnare, quia juſtus eſt*. Atque huc ſpectant omnia, quibus lib. iv. cap. vii. ex Auguſtino

Augustino demonstravi dari in Deo præscientiam malorum absque prædestinatione . Concordat S. Prosper , qui cap. 7. ad objecta Gallorum ait : *Reproborum lapsum Deo adscribere immodice pravitatis est , quasi ideo ruina impulsor atque auctor est , quia eos ruituros propria ipsorum voluntate præcivit ; & ob hoc a filiis perditionis nulla prædestinatione discevit .*

Rursus Calvinus refellitur rationibus ex magno Augustino depromptis : quarum sit prima . Sententia Calvini , quæ docet homines positive a Deo reprobari absque demeritorum præscientia , æternam legem , & ordinis universi tranquillitatem pervertit : Est ergo execrabilis & blasphema . Prob. ant. ex lib. 3. de lib. arbitrio cap. 9. ubi S. Pater ait : *Si peccatis detrahis miseria perseverat , recte deformari dicitur ordo , atque administratio universi .* Et xix. de Civit. Dei cap. 13. *Pax omnium rerum est tranquillitas ordinis : ordo est parium , dispariumque rerum sua cuique loca tribuens dispositio . Proinde miseri , in quantum miseri sunt , in pace non sunt , & tranquillitate ordinis carent . Veruntamen , quia merito & iuste miseri sunt , in sua ipsa miseria præter ordinem esse non possunt .* Alterum argumentum est , quod ex Calviniano dogmate tollitur divina providentia , & iustitia : ait enim ibidem S. Pater : *Providentia summi Dei , non fortuita temeritate regitur mundus : & ideo nunquam esset istorum æterna miseria , nisi esset magna multitudo .* Iustitia vero exigit , ut pœna infligatur propter præcedentem culpam : unde inquit idem Augustinus lib. 111. de lib. arbitrio cap. 18. *Omnis pœna si iusta est , peccati pœna est , & supplicium nominatur .* Tertium argumentum illud est , quod Pelagiani , qui negabant originale peccatum , affirmabantque parvulos non baptizatos excludi a regno cælorum , & absque culpa temporalibus miseriis vexari , sic ab Augustino redarguuntur lib. 11. Operis Imperf. contra Julianum , *Cum dicitis nullum peccatum parvulis imputandum , injustum facitis Deum , qui eis grave jugum imposuit .* Et Sermon. 14. de Verbis Apostoli : *Si parvulus est innocens , cur innocens imago Dei a regno cælorum excluditur ? Salva iustitiam , si potes .* At Calvinus contendit destinari reprobis supplicium ante prævisionem cujuscunque peccati . Ergo Deum facit injustum , plusquam Pelagiani , qui putabant quidem parvulos nulla culpa inquinatos excludi a gloria , non tamen asserere audebant , quomodo Calvinus dogmatizat , prædestinari ex sola Dei constitutione ad interitum sempiternum .

Respondere solent Calvinistæ Deum præparare utique reprobis æternum supplicium independentem a meritis , sed non illud infligere , nisi post peccatum : quemadmodum præparat quidem gloriam ante prævisionem meritorum , sed illam in executione non confert , nisi post merita .

Verum dum hæc Calvinistæ dicunt , nihil plane dicunt . Nam si pœna-

pœnarum inflictio foret injusta, quando pœnis afficerentur innocentes; ut Calviniani fatentur: erit ergo etiam injustum decretum, sive Dei constitutio, quæ pœnam infligendam esse decernit, nulla præcedente malorum operum præscientia. Deinde talis constitutio absoluta, & antevergens quæcunque demerita vel justa est, vel injusta: si injusta, nequit in Deo excogitari. Si autem justa, poterit actu & executione perfici, etiamsi reprobatus innocens perseveret. Neque enim valet comparatio prædestinationis ad gloriam: quæ cum sit opus misericordiæ, non merita supponit, sed efficit. Quippe Deus cum sit bonus, potest sine bonis meritis liberare; sed cum sit justus, non potest damnare quemquam sine meritis malis: & misericordia exhibetur indignis, justitia autem dignis rependitur. Denique licet Calvinistis concedatur non infligi reprobis pœnam, nisi post perpetrata ab illis scelera; faciunt adhuc Deum injustum; cum in eorum systemate Deus vi decreti reprobativi impellat, trahatque inevitabili necessitate homines ad peccatum. At peccata nequeunt hominibus imputari, nisi sint libera, & voluntaria. Nam *peccatum usque adeo voluntarium malum est, ut nullo modo sit peccatum, si non sit voluntarium: & hoc quidem tam manifestum est, ut nulla indoctorum turba dissentiat, &c.*; inquit August. lib. de Vera Relig. cap. 14.

Præterea reponunt Calvinistæ, in eadem absurda, quæ ipsis obijciuntur, impingere etiam Theologos Catholicos, quorum plerique docent Deum propter summum dominium, ac supremam erga homines potestatem aliquos a regno excludere absque præscientia, & absque peccatorum intuitu. Sed & hæc inanis evasio. Plures enim Catholici (quibus tamen minime subscribimus) antecederent ad peccatorum præscientiam haberi putant solam reprobationem *negativam*, non *positivam*. Aliud est enim non eligi ad gloriam, quæ in horum Catholicorum sensu indebitum beneficium est: aliud destinari ad pœnam debitam culpæ. Primum ergo quidam Catholici docent, non secundum. Illi vero, qui tenent posse Deum etiam innocentes in ignem inferni de-trudere, qui perpauci sunt, & antiquiorum numero, & auctoritate refutantur, non de potentia ordinaria loquuntur, sed in altera rerum serie, atque de extraordinaria potentia, ad quam præsens rerum constitutio non spectat. At Calviniani contendunt dari prædestinationem ad mortem independentem a culpa stante hac providentia: quod perversum est, & hæreticum dogma, Deique Ordinationi ac justitiæ plane contrarium.

AD EA, QUÆ OBJICIUNTUR A CALVINISTIS.

Possunt huc revocari loca illa divinarum Scripturarum, quibus videtur affirmari definitio ac prædestinatio ad malum, ut, quod legitur cap. 2.

cap. 2. Aſt. Chriſtum traditum in mortem *definito conſilio* : & Gen. 45. Joſeph venumdatum non fratrum conſilio, ſed *Dei voluntate* ; Quæ, ut diximus lib. IV. cap. VII. ita accipienda ſunt, ut Deus prædeſigneret Chriſti redemptionem, & exaltationem Joſeph, & prævidens eodem, inſtanti Judæorum, filiorumque Jacob invidentiam, ſtatuert juſto judicio hanc non refrænare, ut liberis perverſorum hominum machinamentis Dei prædeſinitio impleretur : & ſumma Dei miſericordia ſimul commendaretur, juſtumque judicium ; illa quidem in prædeſtinatione ad bonum, iſtud in permiſſione malorum. His ergo prætermiſſis,

Opp. 1. In priori Epiſtola Petri cap. 11. 8. hæc habentur : *His, qui offendant verbo, nec credunt, in quod & poſiti ſunt.* In quo loco habet Vulgata noſtra, non, *in quod poſiti ſunt*, quæ referuntur ad priora verba, *nec credunt* : ſed *in quod poſiti ſunt*, ideſt, *in quo verbo* : atque ita leſtione noſtra eluditur Calvinianum præſidium ; ſenſus enim eſt : *Offendant verbo, in quo poſiti ſunt*, non obediunt Evangelio Chriſti, ad cujus fidem prædeſtinati ſunt. At Theodorus Beza ſatis aperte demonſtrat legendum eſſe : *In quod & poſiti ſunt* : quibus ſignificatur aliquos efficienter prædeſtinari ad non credendum. Et quidem, *videtur ponere* frequentiffime ſumitur pro *ordinare* ac *deſtinare*, ut demonſtrat plurimis exemplis etiam Grotius Tom. 111. Op. Theologi. p. 1100. Porro leſtionem Bezae eſſe noſtra meliorem probatur ex Græco, in quo legitur, *οἱ δὲ ἰσχυροί, in quod & poſiti ſunt* : ubi habetur pronomen neutrum, nec referri poteſt ad maſculinum *αἱρεσις*, *Verbum*. Deſtituimur enim exemplis, in quibus neutrum ponitur pro maſculino, quando non agitur de perſona, vel ſaltem de aliquo complexo ; ut eruditi viri facile demonſtrabunt.

Reſpondeo vulgatam leſtionem tenendam eſſe, ceteriſque præponendam : in quam collineat Arabica, & Syriaca, quæ diſerte hanc ſententiam habent : *quod non acquieſcant ſermoni, in quem poſiti ſunt* : *בְּרֵאשִׁית מִתְּחִילָתוֹ לֹא יָשְׁבוּ*, quare aut corrigendus eſt Græcus, aut neutrum reſpondet *Verbo*, quatenus etiam Chriſti perſonam ſignificat, ut in primo verſu Epiſtolæ primæ Joannis, *Quod erat in principio, &c.* Deinde perperam Beza exponit *poni* pro *deſtinari* a Deo. Nam licet *videtur* hunc ſenſum habere poſſit, tamen non legimus hoc loco *in quod poſiti ſunt a Deo* : ſed tantum, *in quod poſiti ſunt*. Ut ergo Beza concederetur reprobus poſitos eſſe in incredulitate, non in Sermone ac verbo : non ſequeretur poſitos eſſe in incredulitate per Dei prædeſtinationem, ſed propriæ voluntatis malitia, & diaboli directione.

Opp. 2. Deus reproborum corda obæcat, obduratque : nam Exodi VII. 3. *Ego, inquit, indurabo cor ejus.* Et Joan. XI. 39. *Propterea non poterant credere, quia dixit Iſaias : Excæcavi oculos eorum, & induravi cor eorum, ut non videant oculis, & non intelligant corde, &c.* At ſi Deus aliquem excæcat, induratque, eſt cauſa ad

To. I.

S I I

peccata.

peccatum impellens, pro suo lubitu damnans, & prædestinans ad interitum. Ergo, &c.

Resp. dist. maj. Deus reproborum corda obdurat, *subtrahendo gratiam*, concedo: *impertiendo malitiam*, nego. Non eo sensu dicitur Deus excæcare corda impiorum, quod eis pervicaciam, malam cupiditatem, & peccandi libidinem infundat, & efficienter ad malum humanam voluntatem inflectat: non enim vult mortem peccatoris, neque ipse operatur iniquitatem, ut sacræ literæ, nec non summi, boni, justique Dei ratio aperte demonstrant. Sed occulto judicio sapientiæ suæ denegat auxilium efficax, sine quo impii libero voluntatis arbitrio in scelera prolabantur. Propterea August. Epist. 194. alias 105. ad Sixtum docet Deum improbos obdurare *subtrahendo gratiam, non impertiendo malitiam*. Et tract. 53. in Joannem: *Excæcat, inquit, & obdurat Deus deferendo, & non adjuvando, quod occulto judicio facere potest, iniquo non potest*. In libro etiam xx. contra Faustum, cap. 9. docet in opere malo aliud venire de astutia suadentis, aliud de nequitia volentis, aliud de justitia punientis, cum diabolus suggerit, homo consentit, Deus deserit.

Dices: At S. P. August. lib. de Grat. & lib. arb. cap. 20. & 21. docet exemplo Pharaonis, aliorumque reproborum, nec non exquisitis Scripturarum testimoniis, *operari Deum in cordibus hominum ad inclinandas eorum voluntates quocunque voluerit, sive ad bona pro sua misericordia, sive ad mala pro meritis eorum; quoniam malitiam non ipse fecit, sed aut originaliter tracta est ab Adam, aut crevit per propriam voluntatem*. Igitur præsupposita in humana voluntate malitia, inclinat Deus, trahitque efficienter reprobum ad damnationem & culpam.

Resp. dist. consequens: Inclinat Deus trahitque ad culpam *directe* & per se, nego: *occasionaliter*, & permissive, concedo. Docet nempe Augustinus, ut ex supra dictis arbitror manifestum, impios aliquando deferi a Deo; quatenus finit eos aut perversorum hominum consuetudine corrumpi, aut perturbationum & calamitatum magnitudine concuti, aut in bonorum temporalium affluentia superbire, aut aliis rerum circumstantiis abuti, in quibus etiam ficta atque honesta inordinate ab improbis appetuntur. Hunc nodum erudite solvit S. Thomas in Epistolam ad Romanos cap. 1x. 17. his verbis. *Inclinatus quodam interiori moventur homines a Deo ad bonum, & ad malum: unde Augustinus dicit lib. de gratia & lib. arbitrio cap. 20. quod Deus operatur in cordibus hominum ad inclinandas eorum voluntates quocunque voluerit, sive ad bona pro sua misericordia, sive ad mala pro meritis eorum. Nam ad bonum inclinat hominum voluntates directe, & per se, tanquam auctor bonorum: ad malum autem dicitur inclinare, vel suscitare homines occasionaliter: in quantum scilicet Deus homini*

mini proponis vel interius, vel exterius, quod quantum est ex se, est inductivum ad bonum: sed homo propter suam malitiam perverse utitur ad malum. Quam doctrinam illustrat S. Thomas exemplo fati consono iis, quæ diximus de generali Dei præmotione; quam juxta Angelicum doctorem affirmavimus esse prædeterminantem tantum in ordine ad principia quædam generalia, in quibus particulares & individue operationes continentur, tanquam conclusiones in suis principiis. Exemplum, illud est: Deus infligat hominem ad bonum, puta regem ad defendendum jura regni sui, vel ad puniendum rebelles: sed hoc infligenti bono malus homo abutitur secundum malitiam cordis sui. Et hoc modo circa Pharaonem accidit: qui cum a Deo excitaretur ad regni sui tutelam, abusus est hac excitatione in crudelitatem. Hæc S. Thomas.

Quod si insistas: Repugnat Deum summe bonum inclinare voluntates reproborum hominum ad malum, etiam *occasionaliter*; distinguenda erit hæc propositio: Repugnat Deum summe bonum inclinare ad malum occasionaliter, idest hominem constituere in tali occasione, quæ natura sua trahat ad peccatum, concedo: idest hominem ponere in ea duntaxat occasione, quæ possit illum excitare ad bonum, nisi propriæ perversitatis malitia abriperetur in malum, nego.

Argumentum Calvinii ex Epistola ad Rom. cap. IX. v. 11. in proximo capite expeditur.

C A P U T XVIII.

Quid statuendum sit de reprobatione negativa.

THOMISTARUM complures, quibus etiam subscribunt Sylvius, Estius, & Collegium Salmanticense, tenent negativam reprobationem, quam definivimus supra non electionem multorum ad regnum ceteris electis, nullum ex parte reprobi habere motivum; sed Deum absolutum donorum suorum Dominum, quemadmodum absque ullo meritum intuitu electos prædestinavit ad gloriam, ita etiam nulla operum habita ratione plurimos reprobasse. Docent quippe hi Theologi Deum principio voluisse rationalem creaturam, idest Angelos, hominesque creare; deinde quosdam pro suo beneplacito ad gloriam prædestinasse relictis aliis: tum electis singularia gratiarum dona parasse: ac postremo prævidisse peccata eorum, qui prædestinati non sunt, eosque ad supplicium ex tali præscientia damnassee. Quæ opinio longe abest ab impietate Calvinii; non enim gravissimi illi Theologi ex divina reprobatione peccata hominum fieri putant, neque reprobos conditos fuisse ad damnationem, ut visum hæresiarchæ illi, qui summa cum errore malitia asseruit trahi reprobos ad interitum sempiternum fatali quadam-

necessitate. Neque tamen prædictam Thomistarum sententiam probant omnes illius Scholæ Magistri: sed plures fatentur solum originale peccatum esse causam cur homines a regno cælorum fuerint exclusi; ut docent Gonet, Lemos, Bancel, & novissime Eminentissimus Gotti. Hi tamen cum in statu quoque innocentie efficacem gratiam, & gratuitam prædestinationem propugnent, tenentur saltem reprobationem negativam angelorum statuere ante præscientiam cujusque peccati, quemadmodum ante prævisionem meritorum defendunt Angelorum bonorum electionem. Nam in eo instanti, quo ante quæcunque merita Angelorum aliqui prædestinati fuerunt, reliqui profecto reprobati sunt negative, idest non electi. Datur ergo aliqua reprobatio negativa ante prævisa demerita, scilicet reprobatio angelorum, ut fatetur Cardin. Gotti de Reprob. q. 1v. dub. 2. in fine. At si hæc vera sunt, quomodo valida erunt argumenta, quæ ab his Theologis afferuntur de reprobatione hominum propter originale peccatum, eo quod in Epist. ad Romanos cap. 9. exprimitur nomine odii & ab Augustino appelletur opus justitiæ, & pœna peccati? Hæc manifesto constare nequeunt, nisi viri illi docti reponant, negativam reprobationem in hominibus quidem esse opus justitiæ, sed in angelis denegationem beneficii indebiti. Verum si hæc dicantur, corrunt argumenta, quibus Augustinus demonstrat adversus Pelagianos existentiam originalis peccati, propterea quod imago Dei creata cum elevatione ad finem supernaturalem, non possit absque culpa a regno cælorum excludi. Etenim respondere poterunt Pelagiani, etiam Angelum cum elevatione ad finem supernaturalem fuisse conditum, & tamen sine ullo demerito exclusum a gloria, & consequenter exclusionem istam non esse pœnam, neque ex ea demonstrari parvulos, qui non abluti baptismo decedunt, & cælesti regno consensu Pelagianorum privantur, originali obnoxios esse peccato.

Ergo Augustiniana sententia est, quod Deus principio ita disposuit naturam hominum & angelorum, ut in eis prius ostenderet quid posset liberum arbitrium, deinde quid gratiæ suæ beneficium. Contulit autem utrique gratiam, sine qua perseverare non poterant, atque ut actu perseverarent in arbitrii potestate reliquit. Voluit proinde in eo priori instanti salutem & gloriam tam angelorum, quam hominum, non absoluta prædestinatione, sed conditionate tantum, idest, si per liberum arbitrium in accepta justitia stetissent. Prævidit tum ex Angelis quosdam perseveraturos, quosdam casuros, & illos ad gloriam assumens in præmium perseverantiæ majori adjutorio cumulavit, & certitudine beatitudinis; hos vero juste in perditione sua dereliquit. Quare Angelorum pars electa est propter meritum, pars propter demeritum reprobata. Vidit pariter Adæ peccatum ex eoque constatum, universum humani generis massam infectam ejusdem Adæ nequitia, quam potuisset

potuisset iccirco perdere univerſam. At ſtatuit eam reparare, decrevitque ut pro omnibus hominibus Unigenitus, quem genuit ante Luciferum, natus in tempore ex Maria Virgine mortem ſubiret. Noluit tamen beneficio mortis Chriſti omnes Adæ poſteros fieri eodem modo participes. Quibusdam beneplacito voluntatis ſuæ conſtituit conferre talem gratiam, quæ concupiſcentiam etiam in baptizatis remanentem ad luſtam præſertim in extrema vitæ periodo reprimat, ita ut finaliter perſeverent, & efficaciter perducantur ad gloriam. Atque hi ſunt *vaſa miſericordiæ*, ſive prædeſtinati. Reliquis Deus donorum ſuorum Dominus noluit tantam gratiam impertiri: ſed ut oſtenderet cum miſericordia juſtitiam, permittit ex illa perditionis maſſa nonnullos privari gratia baptiſmatis, nonnullos, etiam ex baptizatis, perduellis concupiſcentiæ motibus aſſentiri, & propria libertate perire. Quapropter quiſquis damnatur propter originale peccatum aliquo pacto damnatur; ſed alii proxime, alii remote: proxime illi, quibus tale peccatum non remittitur per baptiſmum: remote autem & *radicaliter* tantum, alii, quibus peccatum originale remiſſum eſt, ſed juſto Dei judicio permittuntur cadere, jaſtari carnalibus concupiſcentiis, & per liberum voluntatis arbitrium perire.

Hæc eſt vera Auguſtiniana doctrina, quam tradit S. P. Epiſt. 105. ad Sixtum, in Ench. cap. 98., lib. III. contra Julianum cap. 3. Fulgentius lib. 1. de Verit. Prædeſt. & grat. Proſper ad Septimam object. Gallorum, Africani Patres in Epiſt. Synodica cap. 6. Etiam S. Thomas ejuſque diſcipuli celebriores Zumel, Lemos, Bancel, Godoy, Gotti, qui, ut diximus, in his quæ ſpectant ad reprobationem hominum nobiſcum ſtant. Ex noſtris vero omnes ferme, Noriſius, Gregorius, Argentinas, Gibbon, Gavardi, Bellelli, Manſo, Piette, omnes, inquam. Tantum de Baptizatis diſſentire videntur Puteanus, Alviz, & Florez, ſed explicatæ a nobis ſententiæ neque iſtos arbitror refragari. Habemus ex Scotiſtis quoque Macedo & Fraſſen: ex recentioribus Jueſſin, Du Hamel, Habert, L'Herminier: ex ipſa Societate Jeſu Belarminum, Suareſium, Edmundum Simonnet, Vaſqueſium & quotquot docent peccatum Adæ demeruiſſe poſteris gratiam *congruam*. Sed plura de his apud Noriſium in Vindiciis cap. IV. §. X. Nos, cum cætera capita Auguſtinianæ doctrinæ alibi vindicaverimus, hoc poſtremum de cauſſa negativæ reprobationis facile, Deo auſpice, ac præſente Auguſtino expedimus.

PROPOSITIO: Reprobatio negativa ſuam ex parte reprobi cauſſam habet, nempe originale peccatum.

Tribus argumentorum generibus hæc propoſitio demonſtratur, 1. Ex Sacris literis. 11. Ex auctoritate Auguſtini. 111. Ex ratione theologica. Ex Sacris literis profero unicum teſtimonium Pauli ad Rom. cap. IX. 11. 12. & 13. *Cum enim nondum nati fuiſſent, aut aliquid boni egiſſent,*

egissent, aut mali, ut secundum Electionem propositum Dei maneret, non ex operibus, sed ex vocante dictum est ei: Quia major serviet minori, sicut scriptum est: Jacob dilexi, Esau autem odio habui. Et infra v. 21. *An non habet potestatem figulus luti ex eadem massa facere aliud quidem vas in honorem, aliud in contumeliam?* Hæc verba nequeunt intelligi de reprobatione positiva, ut liquet, hæc enim fit ex præscientia actualium peccatorum, ut supra adversus Calvinianos est demonstratum. Igitur de reprobatione negativa sunt procudubio exponenda. Jam vero ita argumentor, Qui reprobati sunt negative odio habentur a Deo, & appellantur vasa iræ, vasa contumeliæ: Non possent autem odio haberi, neque appellari vasa contumeliæ, vasa iræ, nisi propter originale peccatum: Ergo propter originale peccatum reprobati sunt negative. Probatur minor 1. quia nihil potest odisse Deus eorum, quæ fecit, ut legitur Sap. x1. 25. Omnia enim, quæ ipse fecit, sunt valde bona. Quid ergo odisse potest in Esau, quid in reprobo, nisi quod ipse non fecit, idest originale peccatum? unde præclare S. P. lib. 1. ad Simplic. q. 2. *Non odit Deus Esau hominem, sed Esau peccatorem.* Et in Epist. ad Sixtum: *Quid oderat in Esau antequam fecisset aliquid mali, nisi originale peccatum?* Præterea habet Deus potestatem ex eadem massa perditionis unum eligere, alium reprobare, propterea quod massa illa peccato primi hominis est inquinata; quomodo figulus ex eodem luto unum vas in honorem, aliud fingit in contumeliam: at si hæc massa eo fine producta ut si perstitisset in accepta originali iustitia ad beatitudinem eveheretur, antequam ulla nequitia inficeretur foret Dei lubicu destinata ut ex ea fierent vasa iræ, non videretur in Deo perfecta illa iustitia, quæ postulat, ut nemo sine malis meritis damnetur. Et ideo Augustinus in Epist. 157. ad Optatum: *Merito, inquit, videretur injustum, quod fiunt vasa iræ ad perditionem, si non esset ipsa universa ex Adam massa damnata.* Quod ergo fiunt inde nascendo vasa iræ, pertinet ad debitam pœnam. Postremo qui reprobationem negativam a sola Dei voluntate repetunt, ex hoc eodem Apostolico testimonio sententiam suam stabilire conantur, dicentes posse Deum nulla habita ratione meritorum excludere creaturam rationalem a regno tanquam a beneficio non debito. Sed hoc falsum est, quoniam Deus neminem derelinquit, neminem rejicit, nisi ipse antecederet ab homine derelinquatur, atque, ut mox demonstrabitur, sola exclusio rationalis creaturæ a regno, etiam si non prædestinetur ad gehennam, ignisque supplicium, pœna maxima est. Assignari ergo debet istiusmodi pœnæ, sive reprobationis, aut si mavis istud dicere, divinæ derelictionis motivum aliquod ex parte reprobi: ideoque bene ac sapienter Augustinus citata ad Sixtum Epistola: *Querimus causam prædestinationis, & invenire non possumus: querimus causam derelictionis, & invenimus eam causam esse peccatum originale.*

Ex

Ex Augustino autem præter ea, quæ dicta sunt, hæc depromuntur. Ac primum: Augustiniana sententia est, Adamum non habuisse quidem perseverantiam, quam si habuisset proculdubio perseverasset, sed hoc dono primum hominem minime indignisse, quia tales vires habebat ejus voluntas, quæ sine ullo fuerat instituta peccato, & nihil illi ex se ipsa concupiscentialiter resistebat, ut digne tantæ bonitati, & bene vivendi facilitati perseverandi committeretur arbitrium. Nunc vero, ut actu perseveret, opus est auxilio validiori: quoniam, si in tanta infirmitate vitæ hujus, sibi relinqueretur voluntas, ut in adjutorio Dei, sine quo perseverare non posset, maneret si vellet, inter tot, & tantas tentationes voluntas ipsa succumberet. Quare peccato Adæ deperdita est potentia illa proxime expedita perseverandi, quæ nisi data esset primo homini, non utique sua culpa cecidisset. Data est propterea per adjutorium illud, sine quo non poterat perseverare si vellet, non tamen tali, quo in illo Deus operaretur ut vellet. Hæc ergo potentia proxime expedita potentiori gratia confertur modo prædestinatis, per auxilium scilicet actualis perseverantiæ, sive per adjutorium quo Deus operatur in nobis velle, & perficere. Atque hoc adjutorium, & hæc expedita ab omni impedimento potentia, quibus deest, pœna peccati est. Hæc docet Augustinus de Corrept. & Grat. cap. xi. & xii. iisdem plane verbis. Ex quibus manifesto thesis nostra probatur: quippe illi negative reprobati sunt, quibus Deus non præparavit donum actualis perseverantiæ, neque conferre decrevit adjutorium, quo vividiori gratia reddatur in extremo agone potentia proxime expedita ut nulla adversitate vincatur; cujus potentiæ privatio in nobis pœna est originalis peccati: Ergo propter originale peccatum, saltem remote, reprobatur quisquis reprobatur. Atque hoc argumento, mirifice confirmatur sententia, quæ reperit necessitatem gratiæ efficacis ex sola corruptione naturæ: unde illud alto silentio prætereunt, qui se Augustinianos prædicant, & in utroque statu gratiam efficacem propugnant. Sed recole quæ dicta sunt lib. iv. cap. 8. & 9. Secundo Augustinus nullam prædestinationem gratuitam admittit nisi post Adæ peccatum; nam lib. de Dono Persev. cap. xiv. Prædestinationem definit *præscientiam ac præparationem beneficiorum, quibus certissime liberantur quicumque liberantur*. Et liberatio quidem miseriam pœnamque supponit. In libro quoque xv. de Civit. Dei cap. 21. Ex *Adam*, inquit, *origine damnata, veluti massa una meritæ damnationi tradita, Deus fecit alia in contumeliam vasa iræ, alia in honorem vasa misericordiæ*. Si ergo prædestinatio supponit peccatum; illud supponit & reprobatio negativa, quæ cum sit non electio aliquorum electis aliis, sit cum prædestinatione eodem, ut inquirunt, signo & instanti. Rursus negativa reprobatione fiunt homines vasa contumeliæ, ut ex Apostolo demonstravi: Sed per Augustinum si fierent homines vasa contumeliæ sine

sine originali peccato, esset Deus injustus & iniquus; ait enim S. Pater Epistola 506. nunc 86. *Hæc massa si esset ita media, ut quemadmodum nihil boni, ita nec mali aliquid mereretur, non frustra videretur iniquitas, ut ex ea fierent vasa in contumeliam.* Ergo per Augustinum nemo reprobatus est negative nisi propter originale peccatum. Denique S. Pater, negantibus Pelagianis originale peccatum, fatentibus tamen pueros sine baptismo raptos a regno celorum excludi, propter apertissimam Evangelii sententiam, *Nisi quis renatus fuerit, &c.* telo isto hæreticos laceffit, ac reprimat: Excluduntur pueruli a gloria; ergo poenæ subjiuntur. At Deus justus non infligit poenam absque culpa: culpam igitur habent aliquam infantes illi, qui ante usum rationis non expiati Baptismatis unda rapiuntur. Quod argumentum, ut satis liquet, nullum esset, si creatura rationalis ad regnum celorum ordinata posset inde excludi absque culpa. Utitur S. Pater hoc argumento lib. 111. contra Julianum cap. 3. ubi recitata Christi Sententia, *Nisi quis renatus fuerit, &c.* ait: *Verum vos excellentissimi amatores illius vita, quæ futura est æterna cum Christo, nullam poenam putatis esse imaginis Dei in æternum exulare a regno Dei: cum si parvam poenam esse diceretis, non esset hæc vox beati amatoris illius regni, sed miseri contemptoris.* Ac subinde: *Porro si quod huic sufficit causæ, parvam saltem poenam fatemini esse, quæ magna est, ut imago Dei non sinatur intrare in regnum Dei: obsecro aperite qualescunque oculos, & videte quæ iustitia poena ista infligenda sit parvulo, quem clausis oculis originali obnoxium negatis esse peccato.* Sane hæc verba nequeunt intelligi de alia poena, quam de exclusionem sola a regno Dei; quia hanc solam a regno Dei exclusionem Pelagiani concedebant in pueris non baptizatis, adeo perveraces & impij, ut nullam in his peccati poenam agnoscerent.

Ex dictis hæc theologicæ argumentationes petuntur. *i.* Reprobatio negativa est non electio aliquorum electis aliis: Non electio supponit maculam originalis peccati: Ergo hanc maculam supponit negativa reprobatio. *ii.* Reprobatio negativa est poena: igitur supponit culpam. *iii.* Quamvis gloria non sit debita rationali creaturæ, quemadmodum neque illi debetur gratia, ut contra Bajum Fide Catholica profitemur; ex quo tamen Deus condiderit rationalem creaturam cum originali iustitia, & cum gratia sanctificante, iniquus esset si perseverantem in gratia & nulli demerito obnoxiam a regno celorum excluderet: Ergo ideo illam a regno excludit, quoniam acceptam iustitiam deperdidit, & originali labe contabuit. *iv.* Ut prædestinatis gratis confertur perseverantia finalis, ita reprobis iusto Dei iudicio negatur: Quod careant reprobi perseverantia finali poena est originalis peccati, cujus effectus est privatio potentie expeditæ perseverandi, quam beneficio Conditoris acceperat primus homo: Igitur negativæ reprobationis motivum est

est macula originalis. rv. Dei constitutio, qua electis aliis plurimi reprobantur, in ordine ad electos est actus misericordiae liberantis: Ergo in ordine ad reprobos est actus iustitiae punientis. Haec omnia ex dictis videntur satis manifesta.

CONTRARIA ARGUMENTA REFUTANTUR.

Opp. 1. Apostolus in Epist. ad Romanos citato cap. 9. ait, Esau odio habitum fuisse, *antequam aliquid boni egisset, vel mali*; ergo independentem a praescientia cuiusque peccati reprobatus est Esau. Ad haec: ibidem Apostolus refundit reprobationis motivum unice in Dei potestatem exemplo figuli, qui ex eodem luto fingit quaedam vasa in honorem, quaedam in contumeliam; ideoque ex Dei voluntate, & inscrutabili judicio fit tam praedestinatio, quam reprobatio. Ulterius S. P. Augustinus lib. de Dono Perseverantiae cap. viii. non minus reprobationem, quam praedestinationem refert ad inscrutabilia judicia Dei, scribens: *Cur in eadem causa me potius, quam illum puniet, aut illum potius quam me liberabit? hoc non dico: si quaeris, quare? quia in hac re sicut iusta est ira ejus, ita inscrutabilia judicia ejus*. Idem docet S. Thomas lib. 1. ad Annibaldum q. unica art. 3. dicens: *Voluntas, secundum quam vult Deus aliquem non salvari, non requirit aliquam rationem ex parte voliti, cum salus gloriae non sit debita naturae humanae*. Denique haec omnia confirmantur ratione; nam Deus est gloriae Dominus absolutus; potest ergo illam creaturae rationali denegare, etiam si nullum in ea praesupponatur peccatum.

Resp. Apostolum per ea verba *antequam aliquid boni egissent, aut mali*, excludere merita personalia, non originale peccatum, ut supra ratione, & Augustini auctoritate satis superque probavi. Refundit vero in Dei potestatem, & in judicia Dei inscrutabilia reprobationem, comparative acceptam, non absolute: nempe, cum omnes homines spectent ad massam eandem luti, sive ad humanam naturam primi hominis macula infectam, & posset Deus iusto judicio universam damnare, ex ea quaedam vasa honoris, quaedam irae & contumeliae fieri constituit, sola quidem sua potestate, quia in hac re sicut iusta est ira ejus propter peccatum, ita magna est ejus misericordia propter demeritum. Eadem est sententia Augustini, eadem est D. Thomae: qui in Epistolam ad Romanos scribit: *Deus liberam habet potestatem ex eadem massa corrupta generis humani, sicuti ex quodam luto . . . quosdam homines facere prae paratos in gloriam, quosdam in miseria relictos, &c.* & Q. 111. de Veritate art. 2. *In ipsa electione ratio est divina bonitas: ratio autem reprobationis peccatum originale, ut Augustinus dicit*. Quod ergo scripserat ad Annibaldum accipiendum est de massa generis humani spectata cum originali noxa: qua praesupposita est quidem gloria

ria beneficium indebitum, cum tamen deberetur creaturæ rationali conditæ a Deo cum originali iustitia & gratia sanctificante, si in his per liberum arbitrium perseverasset. Ex quibus solvitur quoque ratio postremo loco producta.

Hæc ex dictis facile comprobantur: sed manifestius etiam explicabuntur. Reprobatio absolute, & comparative potest considerari. Absolute, si instituatur quæstio; Cur E. G. reprobatus est Cain, cur Esau, cur Judas? Comparative si quæras, cur non reprobatus Abel & reprobatus est Cain ex uno Adamo progeniti? Cur Esau, & non Jacob? Cur Judas, non Petrus? Priori ergo quæstioni absolute propositæ, respondemus: Propter peccatum originale; *Ex uno quippe omnes in condemnationem non injustam judicati sunt ire, sed justam. Qui ergo liberatur gratiam diligit, qui non liberatur debitum agnoscat*, ait lib. de Dono Persev. cap. viii. Augustinus: & pariter S. Thomas in Epist. ad Rom. *Cum omnes homines propter peccatum primi parentis damnationi nascantur obnoxii, quos Deus per suam gratiam liberat, soli misericordia liberat: & sic quibusdam est misericors quos liberat; quibusdam autem justus, quos non liberat: neutris autem iniquus*. Alteri autem quæstioni, *Quare liberatus est Abel non Cain, quare Jacob non Esau, quare Petrus non Judas, si omnes ex uno homine in condemnationem justam judicati sunt ire?* respondendum est cum Apostolo: *An non habet potestatem figulus luti ex eadem massa facere aliud quidem vas in honorem, aliud vero in contumeliam?* Cum Augustino eodem loco: *Cur iste assumatur, ille derelinquatur, inscrutabilia sunt judicia Dei*. Cum beato Thoma in caput vi. Joannis: *Ratio quidem in generali potest assignari, ut scilicet in his qui non trahuntur appareat & resurgat ordo divinae justitiæ, in illis autem qui trahuntur immensitas divinae misericordiæ. Quare autem in speciali trahat hunc, & illum non trahat, non est ratio aliqua, nisi beneplacitum voluntatis divinae*. Quamobrem præcedentia argumenta, & si quæ sunt his consimilia, hac distinctione solvantur: Refunditur in solam potestatem, & inscrutabile judicium Dei reprobatio in particulari & comparative accepta, concedo: considerata generaliter & absolute, id nego.

Opp. 2. Saltem in reprobis baptizatis, quibus originale peccatum remissum est, nequit tale peccatum esse reprobationis motivum; quippe Concilium Tridentinum Sess. v. de Originali Peccato hoc decretum edidit: *In renatis nihil odit Deus, quia nihil est damnationis eis, qui vere conversi sunt cum Christo per baptismum in mortem*. Quod affirmat etiam S. P. Aug. lib. 1. ad Bonifac. cap. x.

Pedificile est hoc argumentum, quo plures permoti a sententiâ Augustini recesserunt, ejus verba a nobis perversa intelligentia accipi autumantes, cum iidem profecto minime fuerint illa affecti. Nequeunt enim percipere, quomodo originale peccatum remittatur, & nihil in renatis

renatis remaneat damnationis, & tamen illud causa sit reprobationis negativæ omnium damnatorum. Advertendum tamen iis erat, hanc eandem esse secundam apud Prosperum objectionem Gallorum, qui Augustinianam doctrinam suggillabant, quasi ex ea consequatur, *quod ab his qui non sunt predestinati ad vitam non auferat baptismi gratia originale peccatum*: Cui tamen objectioni neque Prosper, neque quispiam alius Augustinianæ sententiæ vindex respondit S. Augustinum de baptizatis minime esse locutum. Neque hæc ullatenus poterant respondere, utpote qui bene noverant odisse Deum juxta Augustinum in Esaus originale peccatum, cui proculdubio per circumcisionem remissum fuerat. Quomodo ergo ex hoc evadendum est labyrintho? Non quidem filo quorundam, qui respondent peccatum originale remitti quatenus est peccatum personæ, non quatenus est peccatum naturæ. Non est adeo perspicax ingenium nostrum, ut hæc tam speciose dicta assequatur: quippe non focci facienda videntur quæ Adversarii reponunt, peccatum originale dici peccatum naturæ quia contrahitur nascendo: personam vero ac naturam in hoc tantum differre, quod illa est natura ipsa, per se incommunicabiliter existens: irrationabiliter dici remanere infectam in individuo naturam dum persona renascitur: separari non posse nequitiam & damnationem unius ab altera: non esse denique verum, quod nihil damnationis remanet in renatis, si remanet natura ipsa damnata: & alia istiusmodi, in quibus, si virorum illorum premantur vestigia, vereor ne adhuc in labyrintho versetur.

Itaque recurrendum est ad statuta supra Augustiniana principia. Diximus ex originali peccato non solum consequi privationem gratiæ sanctificantis, sed etiam privationem potentiæ proxime expeditæ ad perseverandum, quæ tollitur per auxilium quo, necessarium in presentis agonis statu, ubi caro concupiscit adversus spiritum, spiritus adversus carnem; non quod sine tali auxilio non detur potentia, & facultas liberi arbitrii, quæ stat, ut alibi demonstrabimus, etiam sub minimæ gratiæ; sed quia non viget amplius hujus arbitrii sanitas, quam primi peccati granditate perdidimus; & quam perficit medicinalis gratia Christi faciens ut faciamus præbendo vires efficacissimas voluntati. Non opus est eadem repetere iis, qui Augustini libros de Gratia, & Perseverantiæ dono legerunt. Qui ergo non baptizantur a regno celorum proxime excluduntur propter peccatum originale, quatenus sequitur inde privatio justitiæ, & gratiæ sanctificantis. At qui baptismatis gratiam perceperunt, reprobantur propter originale peccatum remote, quatenus non datur eis donum perseverantiæ, & potentia proxime expedita per speciale illud adjutorium, quo Deus in homine operatur ut velit. Hæc Augustinus: hæc Patres Africani in Sardinia exules: hæc Magnus Gregorius apud Norisium, quem vide citato loco Vindictarum.

Nunc vero ad argumentum respondeo : Concilium Tridentinum definit in renatis nihil remanere damnationis, idest deleri penitus peccati maculam, tolli privationem sanctitatis & justitiæ, infundi habitum gratiæ sanctificantis, non vero, ut impii putant hæretici, originale labem non imputari, tegique, aut radi duntaxat; concedo. Definit Tridentinum ita nihil remanere damnationis, ut in singulis, qui renascuntur, fanetur vulnus concupiscentiæ, caro amplius non concupiscat adversus spiritum, reddatur libertas illa vegetior, quam habuit Adam, aut ne succumbat, conferatur unicuique adjutorium, quo, & donum actualis perseverantiæ; nego. Sacrosancta enim Synodus eodem loco declarat, *Manere in baptizatis concupiscentiam vel fomitem: quam concupiscentiam aliquando Apostolus peccatum appellat, non quod vere & proprie peccatum sit, sed quia ex peccato est, & ad peccatum inclinat.* Et Sess. v. 1. Can. 22. definit *justificatum sine speciali auxilio Dei in accepta justitia perseverare non posse.*

Dices: Deus remittens culpæ reatum remittit etiam pœnam peccati: Baptizatis remittitur culpæ reatus: Ergo baptizatis remittitur pœna peccati.

Resp. dist. majorem: Remittit etiam pœnam peccati, idest omne debitum proxime & immediate connexum cum ipsa culpa; concedo; connexum remote tantum & radicaliter; nego. Exclusio a gloria est proxime connexa cum reatu peccati, & remote connexa cum privatione potentiæ proxime expeditæ, sive specialis auxilii actualis perseverantiæ, quæ privatio est pœna peccati. Qui ergo percipit baptismi gratiam, nequit proxime damnari propter originale peccatum, quoniam reatû hujus peccati caret, & nihil remanet in eo damnationis: damnantur tamen ob originale peccatum remote, quia, ut Africani Patres loquuntur in Epist. Synodica cap. 7. *Per nequitiam cordis (impius) in hominis terreni vetustate permanet, illius ibi judicio derelictus, qui gratis salvat, justeque damnat.*

Insurges: Adam in statu innocentie caruit dono perseverantiæ, & adjutorio quo: neque tamen illo privatus est propter originale peccatum. Falsum est ergo denegare Deum donum actualis perseverantiæ in pœnam peccati Adæ.

Resp. nego consequens. Nam Adam nulla origine viciata, nulla putredine nequitie compactus non opus habebat hoc adjutorio: eique fortissimo permisit Deus facere quod vellet, suffulto gratia, sine qua perseverare non posset, non qua actu fieret perseverans. Tali enim gratia felix ille homo nulla pugna laceratus minime egebat. Nunc vero ad elationem reprimendam tumoremque superbiæ opus est amplioris gratiæ virtute, quam aliquibus misericorditer elargitur, aliquibus juste denegat, ne sibi ipsi humana fidat infirmitas, & gratiam agnoscat in iis qui liberantur, in iis vero qui derelinquantur debitum ad judi-

judicium. Legite Augustinum de Corrept. & Grat. cap. xii.

Opp.3. Non datur causa praedestinationis: Ergo nec reprobationis.

Resp. nego consequentiam; ut enim docet S. Pater lib. iii. contra Julianum cap. 19. *Bonus est Deus, justus est Deus. Potest aliquos sine bonis meritis liberare, quia bonus est: non potest quemquam sine meritis damnare, quia justus est.* Ideoque *querimus causam praedestinationis, & invenire non possumus: querimus causam derelictionis, & invenimus eam causam esse peccatum originale:* ait idem Augustinus in Epist. ad Sixtum. At de his supra.

Opp. Ultimo: Nonnulli Theologi hanc sententiam comparant re-
futato superiori Capite dogmati Calviniano.

Resp. Iniquum esse horum Theologorum judicium, & non solum fulgidissimum Ecclesiae lumen Augustinum, verum etiam cujusque ordinis Scriptores praclarissimos hac objectione irreverenter, & maxima sine pudore nequitia vexari. Inter Augustinianam, & Calvinianam sententiam prima ratio discriminis intercedit; quod Calvinus reprobationis primariam causam non peccatum constituit, sed absolutam Dei voluntatem: Augustinus contra neminem sine malo ejus merito docet reprobari. Deinde Calvinus asseruit homines ad interitum violenter impelli: at Augustinus, voluntate sua cadere qui cadit, & adjutorio gratiae stare qui stat. Calvinus praeterea, radi tantum, sed non remittit in baptizatis peccatum originis, ideoque proximam in his damnationis causam manere: Augustinus, percepta baptismi gratia originalem maculam prorsus abstergi, & remanere concupiscentiam ad agonem, causam damnationis remotam. Ad haec Calvinus in ipsa concupiscentia peccati originalis statuit naturam: Augustinus autem in macula reatus, quam penitus delet baptismus. Calvinus denique nulli reprobo fidem veramque justitiam concedit: & Augustinus reproborum plurimos & credere & justificari fatetur, licet in accepta justitia non perseverent finaliter. Perperam ergo nebulones offundunt tenebras splendidissimo nomini Augustini,

Quem Christi gratia cornu

Uberiore rigans, nostro lumen dedit avo.

Inquit Prosper cap. 2. Carm. contra Ingratos.

C A P U T XIX.

*Absolvitur liber sextus nonnullis circa Reprobationem
impiorum adnotationibus.*

PAUCI hoc postremum caput expediam quibusdam propositis, quae ex dictis facillime percipiuntur. Ac nonnulla de Reprobationis effectibus, quaedam de reproborum numero, ac via perditionis brevissime recensabo.

De reprobationis effectibus hæc occurrunt. Primo, cum Deus neminem ad peccatum compellat, neque sit efficiens causa malorum, culpæ, nullum peccatum divinæ reprobationis effectus est, sed potius causa. Definuit enim Valentinum Concilium Can. 3. *In damnatione meritum malum præcedere justum iudicium Dei*. Et quidem originalis culpæ præscientia hominum reprobationem non sequitur, sed antevertit. Alia peccata non efficiuntur Dei prædeterminatione, sed ex voluntatis malitia, neque decretum aliud supponunt, nisi permissivum. Sunt vero peccata reprobationis causa diverso modo; Originale reprobationis negativæ sensu quæstione præcedenti explicato: & peccatum, quod cum morte conjungitur, qualecunque illud sit, reprobationis positivæ, & interitus sempiterni. Sed in Angelis, qui non sunt ex vitia massa producti, fuit reprobationis motiivum actuale peccatum.

Erunt ergo reprobationis effectus permissio actualium peccatorum, & iusta denegatio supernaturalium auxiliorum, non quidem omnium, sed eorum, quæ efficaciter ad gloriam perducunt, quorum non sunt vasa iræ, filiique perditionis participes. Deus enim prævidendo aliquorum peccata decernit impios æterna pœna punire, statuitque eadem peccata non impedire speciali gratiæ adjutorio, relinquens hominem in manu consilii sui, eumque obdurans & excæcans subtrahendo gratiam, non impertiendo malitiam: ad malum quippe sufficit se sola creata voluntas, imo & inclinatur perduelli concupiscentia; quæ est pœna peccati, neque vincitur nisi contraria delectatione iustitiæ. Quamobrem subtrahente Deo auxilium victricis gratiæ, sequitur voluntarium peccatum, & obduratio impiorum: cuius permissio, non efficientia, erit Deo tribuenda. Non sunt tamen effectus reprobationis, sive originale peccatum, sive actuale Angelorum; quoniam ea quidem permisit: sed neque homini, neque Angelis, priusquam caderent, subtraxit Deus aliquod auxilium necessarium ad perseverandum: gratia enim efficaci, quam utique non habuerunt, non egebat rationalis creatura in illo felicitatis statu. Horum ergo peccatorum permissio non attinet ad voluntatem prædestinantem, aut reprobantem, sed ad conditionatam antecedentem, qua voluit Deus ostendere quid posset liberum arbitrium absque prædeterminantis gratiæ adjutorio.

Quæ ergo diximus Cap. xii. de effectibus prædestinationis, sunt de reprobatione servato utriusque ordine confirmanda; ita ut reprobationis sit effectus quidquid est a Deo reprobante, & ad æternam damnationem perducit ex Dei intentione. Unde neque natura reprobi, neque liberum arbitrium, neque cuiuspiam generis facultates inter effectus reprobationis sunt numeranda, cum non hæc largiatur Deus creaturis, ut pereant: quemadmodum effectus reprobationis non sunt sive inclinatio ad malum, sive culpa, sive arbitrii perversitas, quoniam hæc

hæc non sunt a Deo efficienter. Igitur effectus reprobationis erunt permissio peccati quod nunquam dimittitur; justa denegatio doni perseverantiae; excæcatio & induratio, quatenus idem sunt ac debita hominis impii derelictio, & misericordiae subtractio, non prout sunt humani cordis singularis inertia ac nequitia: supplicium denique sempiternum, quo Deus iuste punit quod ipse non fecit. Si autem quæras, quomodo permissio peccati, quod nunquam dimittitur, sit effectus reprobationis, & nihilominus ipsum peccatum sit causa damnationis, atque ad illam præsupponatur; jam dictum est permissionem illam esse effectum reprobationis negativæ, ob quam denegatur gratia finalis perseverantiae, & peccatum cum morte coniunctum esse causam reprobationis positivæ, atque sempiterni supplicii. Eo pacto donum finalis perseverantiae effectus est gratuitæ prædestinationis, & perseverantia ipsa est causa glorificationis ac perennis felicitatis. Nihil est ergo in ea, quam propugnamus sententia, imperceptibile, vel repugnans.

Numerus reproborum quantus sit, ille solus comprehendit, cui noti sunt qui permaneant ad coronam, & qui permaneant ad flammam: neque alius potest, quam Iudex, plectendos poena discernere. Majorem tamen esse reproborum, quam prædestinatorum numerum diximus capite sexto decimo: quod nos humiliores ac timidiore reddere debet, quemadmodum eo loco monuimus.

Scala denique perditionis his gradibus constat. Primo reprobis leviora peccata contemnit, iisque super capillos capitis sui multiplicatis torpescit paulatim, & derelinquit illum cor ejus, crescit profusa & effrenata cupiditas, flaccescit orationis studium, ac sensuum custodia, atque a scintilla una augetur ignis, & qui minora spernit in majora prolabitur. Dein contrahitur macula mortalis culpæ, quam sequitur individua comes mors animæ, recedente ab ea cum gratia sanctitatis Deo vita spiritualis cujusque substantiæ. Descendit tanquam tertio gradu impius in peccandi consuetudinem, qua, veluti catena quadam constringitur, adeoque gravatur, ut nequaquam surgat ad poenitentiam. Hinc delabitur in mentis excæcationem: impius enim, cum in profundum venerit, non intelligit, rationem obscurante fascinatione nugacitatis; atque ita excæcatur ne videat & non intelligat corde: sitque, ut descendenti per subterraneos gradus corporaliter evenit, via illius tenebræ & lubricum. Profundior tum, ac deterior succedit gressus, idest, cordis obduratio, maloque inhærens animi pertinacia: de qua Apostolus ad Rom. 11. 5. *Secundum duritiam tuam, & impenitens cor thesaurizas tibi iram in die ira, & revelationis iusti iudicii Dei*; & Eccl. 11. 27. *Cor durum habebit male in novissimo*. Si quis nostrum (quod Deus avertat) per hos perditionis gradus progreditur, pedem tandem retrahat: clamet de profundis ad Dominum, quia apud illum misericordia, & copiosa apud eum redemptio: revertatur

520 De Theologicis Disciplinis Liber Sextus.

tatur a via sua mala : ne tardet converti ad Dominum , & ne differat de die in diem : apprehendat disciplinam , ne quando irascatur Deus , & pereat de via justa : speret in eo , qui coronat in misericordia & miserationibus ; timeat de se ipso , Deus enim non *implanavit* peccatores , neque necessarij sunt ei homines impii . Utinam hujus libri assidua lectio , Deo prædestinante ac præmovente , illud præstet , ut nemo desperet , nemo intumescat .

Explicit Liber Sextus.



PRIORIS VOLUMINIS

PROPOSITIONES.

- I. **T**heologo usus Dialectica summopere est utilis, ac necessarius. 7
- II. Non superfluit, sed illi plurimum confert etiam naturalis Philosophia. 9
- III. At ea sola duci non debet, sed illam in obsequium fidei captivare revelationibus divinis subnixus. 11
- IV. Scholastica methodus, ad quam Petrus Lombardus Theologiam revocavit, non est absolute necessaria, bene tamen perutilis. 12
- V. Theologia autem Scholastica utilis est, necessaria, & ad profigandas hereses, fidemque firmandam aptissima. 12
- VI. Scientia utique Theologia est, sed non ejusdem rationis cum aliis scientiis. 23
- VII. Illius habitus ad praxim simul, & speculationem reducitur. 24
- VIII. Quamvis principia Theologia lumine supernaturali innutescant, attamen illa ad naturales scientias pertinere videtur. 25
- IX. Theologia sive Speculatrix, sive Moralis, sive Polemica unus est habitus. 27
- X. Hujus scientie objectum attributionis est Deus: objectum adaequatum est omnis conclusio quae inferri potest ex propositionibus fidei: objectum formale est ipsa revelatio divina. 28
- XI. Valde probabile est, inditam esse singulis hominibus ab universorum Autore ingentiam, atque anticipatam ideam sui. 44
- XII. Idea illa supposito facile demonstratur Deum existere. 54
- XIII. At quod idea entis perfectissimi sit reapse cuique congenita, non est ita certum, ut inde possint athei evidenter convinci. 55
- XIV. Demonstratur Deum esse ex rerum creaturarum contingentia, 60
- XV. Atque ex motu, & serie causarum secundarum, 63
- XVI. Necnon ex rerum aspectabilium compagine, 66
- XVII. Ex naturali hominum instinctu, 69
- XVIII. Ex communi sapientum confessione, 71
- XIX. Ex parvo numero, vita, & ignorantia Atheorum. 72
- XX. Hac enunciatio Deus existit est nobis per se nota ac manifesta. 80
- XXI. Nemo, quantumvis agrestis ac barbarus, potest Creatorem suum, invincibiliter ignorare. 84
- XXII. Qui putant Enos fuisse Polytheismi autorem labili fundamento nituntur. 88
- XXIII. Ab Hebraeorum gente non fuit exortus Polytheismus, neque illum Judaico populo Moyses praescripsit. 89

xxiv. Idololatria longe ante Moysen a posteris Chami originem duxit.	93
xxv. Unum esse Deum demonstratur ex sacris literis,	95
xxvi. Atque ex innumeris a Deo patris miraculis.	96
xxvii. Idem evincitur petitis a ratione argumentis,	97
xxviii. Et corroboratur Gentilium quoque Scriptorum testimoniis.	99
xxix. Opinio de duobus Diis Bono, ac Malo una cum idololatria a posteris Cham capite disseminari.	110
xxx. At malum non est aliqua substantia, quam necesse sit ab efficiente summa Causa produci.	112
xxxi. Non ergo dantur duæ summæ Causæ, quarum una sit cujusque boni, altera malorum omnium effectrix.	113
xxxii. Constituitur metaphysice Dei natura per Esse a se.	118
xxxiii. Divina essentia explicari non potest magis proprio, atque idoneo vocabulo, quam Hebraico <i>יהוה</i> Qui est.	123
xxxiv. Deus est ineffabilis.	125
xxxv. Divinorum nominum alia divinam naturam significant, alia attributa.	126
xxxvi. Melito Sardensis Episcopus vix ab errore Anthropomorphitarum potest excusari.	130
xxxvii. Ab eodem errore non defenditur certis argumentis Tertullianus.	131
xxxviii. S. autem Epiphanius, & Audius Deum esse corporeum minime tradiderunt.	134
xxxix. Deus est purus ac simplex Spiritus qualicunque corpore expers.	135
xl. Gilbertus distinxit quidem Deum ab essentia, & Personas a relationibus, at non divinar ab invicem proprietates.	139
xli. Divinorum attributorum distinctio nulla est, nisi penes extrinsecam connotata.	140
xl.ii. Nulla intrinseca compositio in Deo admittenda est.	155
xl.iii. Deus est secundum essentiam suam infinitus.	156
xl.ii. Immensitate sua est ubique.	158
xl.ii. Est omnino immutabilis.	162
xl.ii. Sempiternus est, nec ejus aternitas alicui creatura convenire potest.	169
xl.ii. Jure ac merito Valentiniana Aeonum fabula exploditur.	170
xl.ii. Fictitium est pariter sempiternum illud lumen, quo Græci Palamita jactabant a se Deum videri.	172
xl.ii. Habet Deus infinitam potentiam.	173
l. Potest idcirco plura facere, quæ non facit.	177
li. Atque etiam meliora iis, quæ fecit.	181
lii. Est præterea Deus summe verax, neque potest esse seductor, vel auctor mendacii.	183
	liii.

- LIII. *Non sunt Deus simul & creatura aliquid perfectius, quàm sit Deus solus.* 190
- LIV. *Reperitur in Deo summa ac perfectissima pulchritudo.* 192
- LV. *Solo naturali lumine nequit Deus ab aliquo creato intellectu intuitivè videri.* 194
- LVI. *Neque a Deo creari potest rationalis substantia, quæ possit naturaliter ipsum Deum intueri.* 199
- LVII. *Intellectus creatus superno aliquo lumine irradiatus potest Deum, ut in se est, conspiciere,* 201
- LVIII. *Non autem illum comprehendere.* 205
- LIX. *Lumen gloriæ est ipse Deus menti beatorum intime affluens, suoque fulgore ac motione imprimens illi qualitatem & habitum, &c.* 213
- LX. *Cbrystostomus non visionem Dei in se, sed solam comprehensionem, possibilem esse negavit.* 218
- LXI. *Idem asserendum est de Theodoro.* 220
- LXII. *Neque D. Hieronymus visionem Dei intuitivam credidit esse impossibilem.* 222
- LXIII. *Augustinus affirmavit Deum invisibilem esse corporeis oculis, non dubitanter, sed assertive.* 225
- LXIV. *Suppeditavit omnia argumenta, quæ proferunt in hac questione Scholastici, aliæque longe iis clariora.* 226
- LXV. *Utrum post Resurrectionem Corpora Beatorum futura sint spiritualia, & oculi alterius ab illis naturæ, est alia questio a præcedenti, & hanc S. Pater prudentissime non definivit.* 227
- LXVI. *Demonstravit tamen accurate se opinionem de Corpore spirituali nequaquam probare.* 229
- LXVII. *An aliqui adhuc in hac vita degentes Deum viderint questio est ambigua, & in utramque partem trabenda.* 233
- LXVIII. *Enoch & Elias nondum Dei conspectu fruuntur.* 239
- LXIX. *Fictitium est regnum mille annorum a Cevinto excogitatum, & a Papa, licet tolerabilius, inductum.* 244
- LXX. *Nec ad minimum tempus Dei visio animabus plene purgatis differtur.* 251
- LXXI. *Catholico de Animarum beatitudine dogmati non adversatur Ambrosius.* 264
- LXXII. *Quod Augustinus fluctuet de secretis Receptaculis Animarum est summa ejus perspicacitatis indicium; verumtamen de gloria & felicitate non dubitat.* 266
- LXXIII. *Immerito a nonnullis carpitur beatus Bernardus; nam neque is a Catholico dogmate est alienus.* 267
- LXXIV. *Joannes XXII. neque ut privatus doctor assertive docuit Sanctorum animas carere visione Dei ante corporum resurrectionem.* 270
- LXXV. *Gloria inæqualis meritis inæqualibus retribuitur.* 275

<u>LXXVI. Causa moralis inaequalitatis Beatitudinis est meritum, causa vero effectrix est lumen gloria.</u>	278
<u>LXXVII. Neque per absolutam Dei potentiam fieri potest, ut videatur divina Essentia sine attributis, aut una persona sine alia.</u>	282
<u>LXXVIII. Reperitur in Deo omnis scientia plenitudo.</u>	289
<u>LXXIX. Divina scientia est ipsa Divina substantia connotans intelligibilia objecta.</u>	290
<u>LXXX. Deus semetipsum cognoscit, atque comprehendit.</u>	292
<u>LXXXI. Nulla est creatura, quae scientiam Dei subterfugiat.</u>	293
<u>LXXXII. Neque latent divinam scientiam futura qualibet contingentia, & conditionata.</u>	294
<u>LXXXIII. Scrutatur Deus intimas cujusque creaturae rationalis cogitationes, necnon quaecunque peccata.</u>	298
<u>LXXXIV. Ex divina praescientia non consequitur inevitabilis rerum contingentium eventus.</u>	300
<u>LXXXV. Nulla creatura cognoscitur a Deo tanquam ab aeterno sibi coexistens.</u>	306
<u>LXXXVI. Videt Deus omnia in seipso, & in incommutabili rerum intelligibilium ratione.</u>	309
<u>LXXXVII. Videt tamen creaturas etiam in seipsis immediate.</u>	ib.
<u>LXXXVIII. Deus non praedeterminat actiones liberas naturales, & consequenter neque eas praevidet in efficaci sua voluntatis praefinitione.</u>	314
<u>LXXXIX. Non videtur alienus a praefata assertione Doctor Angelicus.</u>	317
<u>XC. Non intuetur Deus mala culpa in decreto, seu praedeterminatione actus, cui adnectitur peccati malitia.</u>	324
<u>XCI. Nec D. Thomas certo adstruit praedeterminationem physicam ad materiale peccati.</u>	327
<u>XCII. Innocens creatura auxilio praedeterminantis gratia non indigebat, & consequenter minime novit Deus perseverantiam Angelorum in efficaci sua voluntatis decreto.</u>	336
<u>XCIII. Idem tradidit Angelicus Doctor.</u>	344
<u>XCIV. Consentis hactenus dictis Aegidius Romanus.</u>	343
<u>XCv. Si accipias Scientiam mediam pro certa praescientia futurorum ordinis naturalis, sive supernaturalis in statu naturae innocentis, necnon operum malorum ejusdem status absque ullo praedeterminante decreto, admittendum est vocabulum Scientiae mediae.</u>	355
<u>XCvi. Praescientia peccatorum in statu naturae lapsae spectat ad scientiam visionis, non ad scientiam, quam vocant mediam.</u>	ib.
<u>XCvii. Si accipiaturs Scientia media pro cognitione conditionatorum, quae non sit scientia visionis, neque scientia simplicis intelligentiae, nec in praesenti statu, nec in statu innocentiae locum habet.</u>	356
<u>XCviii. Deus videt futura libera ordinis supernaturalis, quae spectant ad</u>	ad

<i>ad statum naturæ lapsæ, de penderet ab efficaci suâ voluntatis decreto.</i>	361
<i>xcix. Persistit cum divinis prædefinitionibus humana libertas.</i>	373
<i>c. Deus voluntate antecedenti vult omnes homines, nemine profus excepto, salvos fieri.</i>	387
<i>ci. Hæc voluntas salvandi omnes est in Deo vera, propria, atque sincera.</i>	389
<i>cii. Amat Deus creaturas suas propter propriam sui ipsius bonitatem.</i>	397
<i>ciii. Gubernat etiam providentia sua omnia, quamvis abjectissima & minima.</i>	399
<i>civ. Est in Deo opposita necessitati libertas.</i>	407
<i>cv. Hæc constituitur per actum sempiternum divina voluntatis a substantia indistinctum, prout connotat objectum creatum, & effectum contingentem & defectibilem.</i>	ib.
<i>cvi. In dogmate Prædestinationis & Gratiæ recedendum non est ab Augustini doctrina.</i>	413
<i>cvi. Datur aliqua Electorum ad Gloriam prædestinatio.</i>	418
<i>cvi. Prædestinatio ad Gloriam recte definitur, Præscientia, & præparatio beneficiorum Dei, quibus certissime liberantur quicunque liberantur.</i>	420
<i>cix. Solum prædestinati salutem consequuntur æternam.</i>	423
<i>cx. Erronea est animarum præexistencia, quam finxit Origenes, & commentitium meritum prædestinationis comparatum ante illarum unionem ad corpora.</i>	425
<i>cx. Non prædestinantur Electi ex prævisis meritis comparandis solum, facultate liberi arbitrii.</i>	426
<i>cxii. Neque prædestinantur Electi ob præscientiam fidei, aut bonæ voluntatis ex solo libero arbitrio naturaliter procedentis.</i>	ibid.
<i>cxiii. Opera moralium virtutum a Deo prævisa nullo pacto prædestinationis nostræ causa sunt.</i>	427
<i>cxiv. Prædestinatio ad gloriam præcedit prædestinationem ad gratiam.</i>	431
<i>cxv. Ex Sacris literis demonstratur prædestinationem ad gloriam esse in statu naturæ lapsæ gratuitam.</i>	434
<i>cxvi. Apertissime S. P. Augustinus tradidit gratuitam ipsam prædestinationem ad gloriam.</i>	442
<i>cxvii. Veteres Patres, qui verbis ambiguis de Sanctorum prædestinatione tractarunt, possunt commode exponi, quamquam videantur alicubi illam a meritum præscientia repetere.</i>	454
<i>cxviii. At Patres, qui floruerunt post Augustinum, gratuitam prædestinationem evidentissime tenuerunt.</i>	455
<i>cxix. Est autem Augustiniana circa gratuitam Prædestinationem sententia</i>	

tentia etiam rationibus Theologicis consentanea .	458
<u>cxx. Argumenta , quibus permotus Petavius Augustinianam retraxit sententiam , nullius sunt roboris , atque verbis ipsius Petavii facillime refelluntur .</u>	462
<u>cxxi. Fit ex Christi meritis Prædestinatorum Electio .</u>	468
<u>cxxii. Utiles sunt Prædestinatis Orationes Sanctorum .</u>	469
<u>cxxiii. Effectus prædestinationis primarii sunt Vocatio , Justificatio , & glorificatio .</u>	471
<u>cxxiv. Substantia quoque prædestinati , aliaque naturalia dona inter Prædestinationis effectus possunt aliquo sensu connumerari .</u>	472
<u>cxxv. Etiam permissio peccati est aliquo pacto prædestinationis effectus .</u>	474
<u>cxxvi. Prædestinatio Sanctorum fixa est , atque immutabilis .</u>	476
<u>cxxvii. Nulla fuit in Monasterio Adrumeti , Augustino superstitie , hæresis Prædestiniana .</u>	480
<u>cxxviii. Neque sub Celestino I. erupit in Galliis Secta Prædestinatarum .</u>	484
<u>cxxix. Gotthescalcus Prædestinarianus non fuit , licet veram causam imprudenter suscepit defendendam .</u>	487
<u>cxxx. Prædicanda est populis Augustiniana de Prædestinatione sententia .</u>	492
<u>cxxxi. Magnus est Electorum numerus , at valde exiguus , si comparatur cum numero damnandorum .</u>	499
<u>cxxxii. Calvinianum de Reprobatione dogma horrendum est , detestabile , omni execratione dignissimum .</u>	502
<u>cxxxiii. Reprobatio negativa aliquam ex parte reprobi causam habet , nempe originale peccatum .</u>	509



